


Xtidxcoob Dios ni
biädinä dad Jesucrist



New Testament in Zapotec, Mitla (MX:zaw:Zapotec, Mitla)

**Xtidxcoob Dios ni biädñä dad Jesucrist
New Testament in Zapotec, Mitla (MX:zaw:Zapotec, Mitla)**

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022
5cff1274-8dc3-5398-a94d-f6033bb363c9

Contents

San Mateo	1
San Marcos	52
San Lucas	84
San Juan	137
Hechos	176
Romanos	226
1 Corintios	245
2 Corintios	264
Gálatas	276
Efesios	283
Filipenses	289
Colosenses	294
1 Tesalonicenses	299
2 Tesalonicenses	303
1 Timoteo	305
2 Timoteo	310
Tito	314
Filemón	317
Hebreos	318
Santiago	332
1 Pedro	337
2 Pedro	343
1 Juan	347
2 Juan	353
3 Juan	354
Judas	355
Apocalipsis	357

Guijtz Ni Bacuaa Mateo

Retoxpen_{goldoo} Jesucrist
(Lc. 3:23-38)

¹ Guijtz ni rusule' laj retoxpen_{goldoo} xten Jesucrist xi'n toDavid, xi'n toAbraham.

² Abraham gujc xtad Isaac, Isaac gujc xtad Jacob, Jacob gujc xtad Judá con rebejtzni. ³ Judá con Tamar gujc xcuzajn Fares con Zara. Fares gujc xtad Esrom, Esrom gujc xtad Aram. ⁴ Aram gujc xtad Aminadab. Aminadab gujc xtad Naasón. Naasón gujc xtad Salmón. ⁵ Salmón con Rahab gujc xcuzajn Booz. Booz con Rut gujc xcuzajn Obed. Obed gujc xtad Isái. ⁶ Isái gujc xtad reii David. David con nani gujc cháäl Urías gujc xcuzajn Salomón.

⁷ Salomón gujc xtad Roboam. Roboam gujc xtad Abías. Abías gujc xtad Asa. ⁸ Asa gujc xtad Josafat. Josafat gujc xtad Joram. Joram gujc xtad Uzías. ⁹ Uzías gujc xtad Jotam. Jotam gujc xtad Acaz. Acaz gujc xtad Ezequías. ¹⁰ Ezequías gujc xtad Manasés. Manasés gujc xtad Amón. Amón gujc xtad Josías. ¹¹ Josías gujc xtad Jeconías con rebetzni cheni huij reben Israel pres lo guedx Babilonia.

¹² Che gudejd huij rebejn_{ga} pres Babilonia, dxejc guyu' xi'n Jeconías, Salatiel. Salatiel gujc xtad Zorobabel. ¹³ Zorobabel gujc xtad Abiud. Abiud gujc xtad Eliaquim. Eliaquim gujc xtad Azor. ¹⁴ Azor gujc xtad Sadoc. Sadoc gujc xtad Aquim. Aquim gujc xtad Eliud. ¹⁵ Eliud gujc xtad Eleazar. Eleazar gujc xtad Matán. Matán gujc xtad Jacob. ¹⁶ Jacob gujc xtad José cháäl Marii nani gujc xnan Jesús ni birilaj Crist.

¹⁷ Ni'cni gujc tzudaj xfamil_l reni agudejd gubi'reni lo guedxliujre che gubaj_{nl}i toAbram cheni gubaj_{nl}iza toreii David. Tzudajza rexagdo_o najc reni gudejd cheni gubaj_{nl}i toDavid cheni huijli reben Israel pres Babilonia. Stzudaj rexagdo_o najc reni gudejd cheni biriilireni pres Babilonia che gojlli Crist.

Cheni gojl Jesucrist
(Lc. 2:1-7)

¹⁸ Scree gujc cheni gojl Jesucrist. Abia'n xnanni, Marii, diidx guch_{na}ani José ni gac cháäl_{ni}. Per ansde xca' sa'reni, Marii agac nuxi'nni sa'csi biääd Sprit Dxan xten Dios lojni. ¹⁹ José com najcni te ben_{sa}'c, di rlajzni nuro'nni Marii nez loj rebejn te niacbeereni, ni'c bejn_{ni} xhigab Gu_{ron}xhiga'tzni Marii. ²⁰ Xhigabga cayuj_{nni} cheni baluiloj te xangl Dios lojni, lo bacal_l räjpni lojni:

—José xajg toDavid, na'c guidxej_{blu} xca'lu Marii gacni cháällu sa'csi xi'nni nani chu najc xten Sprit Dxan xten Dios. ²¹ Che gaal xi'nni cuälaj_{luni} Jesús sa'csi laani gus_{la}ani rexpej_{nni} lo rextoj_lreni.

²² Guiraa redee gujc si'c te guzobj diidx ni gunii tej ni bacuaa xtidx Dios. Räjpni:

²³ Suu te dxapxteeb báz, saj_l te xingaanni nani guirilaj: Emanuel, (lajni säloj Dios nabaj_n con nuure).

²⁴ Che gubaj_n José lo bacal_l, bejn_{ni} si'cni räjp xangl Dad lojni. Cua'ni Marii gujc cháäl_{ni}. ²⁵ Luxh dini niembeeni si'c cháäl_{ni} dxejli cheni gudejd gojl xingangalojni ni gulälajni Jesús.

2

Che biädhu_{ii} reben_l nanduxh ni laa remagos lojni

¹ Cheni gojl Jesús nen guedx Belén xten guedx Judea, najc Herodes reii xten guedx Judea. Dxejc bidzujn reben najn ni najc remagos, siädreni nejj cadro rliejn gubijdx, bidzujn reni guedx Jerusalén. ² Rniabdiidxreni:

—¿Con reii xten reben Israel nani golgaj, ä? Nurnu abihuiinu xpajlni laadxlinu, ni'cni siopdoñnuni.

³ Che biejn diajg reii Herodes diidxga, guyuduxhni yärsia' näjza guiraa reben Jerusalén. ⁴ Dxejcti batie'ni guiraa rebixhojzro ni rnibee loj rebixhojz, näjza guiraa renani ruluu xleii Moisés lo rebejn te gunabdiidxni lojreni:

—¿Caro gaal Crist?

⁵ Laareni räjpreni:

—Nen guedx Belén xten guedx Judea sa'csi si'c gunii niguii ni bacuaa xtidx Dios che räjpni:

⁶ Luj guedx Belén xten guedx Judea, dilu gajc maazru huin loj reguedxro xten guedx Judea sa'csi nen guejdxre guirii tej nani guinibee, te ni ga'p rexpənä Israel.

⁷ Dxejcti guredx-xhiga'tz Herodes remagos te gunabdiidxni gucti biricaj bajl nani bahuiireni. ⁸ Dxejcti baxhalnireni guedx Belén, räjpni lojreni:

—Colchäj ro'c, colnabdiidxsa'c xcuent biuuxga te che abidxältuni jiädniitu loä te näjza narä chaganäni.

⁹ Che biejn diajgreni xtidx reii, sä'tireni. Bajl nani bahuiireni lagajc lajdxreni laltis niydni lojreni. Che bidzujn liren cadro yu' bázga, dxejcro guzobdx bajlga. ¹⁰ Che bahuii remagos loj bajlga, rbalazduxhneni. ¹¹ Si'c bidzujn reni. Che biu'reni nen yu', bahuiireni lo bázga con xnanni Marii. Dxejcti bazuxhijbreni, gojnreni bázga, baxhalreni rexcäl'nasa'creni bazalajzreni oor, näjza yaal näjza yalnejh. ¹² Che agojl guibi'reni, gunixcäl'reni, räjp Dios lojreni:

—Na'c guibi'tu nez loj Herodes.

Dxejcti gunaazreni garenca nez yuj, gubi'reni lajdxreni.

Che siini Egipto

¹³ Che sii remagos lajdxreni, biäd te xangl Dios baluilojni lo José lo bacal, räjpni:

—Huistie, cua' biuxe're näjza xnanni, huinäreni Egipto. Ro'c guläjz che guiniäli lojlu. Siguiil Herodes biuxe're sa'csi rlanjz ni ju'tnini.

¹⁴ Dxejc huistiegajc José, cua'ni biuxe're näjza xnanni, lagajc yäälga biriireni, siireni nez Egipto. ¹⁵ Ro'c guyu'reni cheni gujtli Herodes. Guiraa dee guzajc te guzobj diidx ni bacuaa niguii ni gunii xtidx Dios che räjpni: “Egiptoli guredxä xi'nä.”

Che guinibee Herodes gujt rebiuxbáz

¹⁶ Che gucbee Herodes abasguee remagosni, bidxechduxhni. Gunibeeni guet guiraa rebiuxniguii ni yu' tio'p ijz näjza rebiuxe' ni yu' guxiiru dxej, guideb nen guedx Belén näjza reguejdx ni re' gabiga, si'cti redxej ni räjp remagos lojni. ¹⁷ Dxejc guzobj diidx ni bacuaa Jeremías ni gunii xtidx Dios che räjpni:

¹⁸ Biejn xse' bejn nen guedx Ramá, te yälhuinduxh, te yälrbedxdij, yälrbedxnen: laa Raquel ni roon yejc rexi'nni.

Naaddini jiäjł lajzni sa'csi agujt rexi'nni.

¹⁹ Cheni gujt Herodes, dxejc lo te bacal huiluiloj xangl Dios loj José nen Egipto. ²⁰ Räjpni:

—Huistie, cua' biuxe're näjza xnanni, gubisac nez Israel sa'csi agujt renani rlanj ju't biuxe're.

²¹ Dxejcti huistie José, cua'ni biuxe' nájza xnanni. Gubi'reni Israel. ²² Luxh che biejn diajgni rnibee Arquelao guejdx Judea lacuaa Herodes, xtdani, bidxejbni nuiini ro'c. Dxejc gunisac Dios lojni loj te bacal, ni'c huijni lo reguejdx xten Galilee. ²³ Dxejc biädläjzni neñ guejdx ni laa Nazare't te si'c guzobj diidx ni bacuaa niguii ni gunii xtidx Dios cheni räjpni: “Sirilajni nazaren.”

3

Juan Bautist basule' xtidx Dios loj rebejn
(Mr. 1:1-8; Lc. 3:1-9, 15-17; Jn. 1:19-28)

¹ Neñ redxejga biääd Juan Bautist lo reyubijdz xten guedx Judea, ro'c cagulijdxni, ² cayäjpni:

—Colgusiechlajztu rextojltu sa'csi xcälrnibee Dios abidzungenajxhni.

³ Juan najc nani basä't Isaías, te niguii ni gunii xtidx Dios, cheni bacuaani: Riejn xse' te ni rbedxa' nez lo reyubijdz:

“Colguslii xnezyuj Dad, colguslii xnezyulajzni.”

⁴ Najcw Juan xquichlajd cameii. Naliib te duguijd xque'ni. Rajwni guxha't nájza dzujn xten baseerguijxh. ⁵ Riääd reben guedx Jerusalén náj guiraa reben Judea nájza rebejn ni tre' gajxh nez ro' gueu Jordán, riädcuadiajgrenti xtiidxni. ⁶ Che ruxhobdojlreni xtojlrereni, rutiobnis Juanreni ro' gueu Jordán.

⁷ Che bahuiini siääd xhidajl reben guidoo ni najc refarisee nájza ni najc resaducee, rlanjzreni gutiobnisnireni, räjpni lojreni:

—La'tu benguidxduxh, najctu si'c bäl. ¿Chu balijdxtu guxuntu loj xcälrdxe'ch Dios ni siääd? ⁸ Colguibañsa'c si'cni nungäjł te fiipac rebejn guliipac abasiechlajztu. ⁹ Na'c litis guntu xhigab naatu: “iNi nurnu najcnu rexagdoos toAbram!” Rniliä lojtu, sajc xca' Dios reguijre gunni gacreni rexi'n toAbram. ¹⁰ Asojb guibyajg lo xlobaa reyajg, luxh guiraa reyajg nani di ninexhsa'c xcaj lojni, sidinni te checni. ¹¹ Narä guliicani rustiobnisä con nis si'c te seen cheni abasiechlajztu, abaxhobdojltu. Niluxh nani siääd detzä sutiobnisni la'tu con Sprit Dxi xten Dios nájza con guiboo. Rnibeeruni loä. Beñsacduxhni. Nicla xcura'chni digacdi chanää. ¹² Aca'ni xhi cojn gusiani triuu xtenni te chuchee triuuga neñ ngodx xtenni. Dxejcti guixhtriuuga, suze'cni guijxhga lo guiboo ni rejc par tejpas.

Che gurobnis Jesús
(Mr. 1:9-11; Lc. 3:21-22)

¹³ Dxejc birii Jesús nez Galilee, bidzujñni ro' gueu Jordán cadre yu' Juan te gutiobnis Juanni. ¹⁴ Niluxh naaddi Juan gutiobnis Jesús. Räjp Juan lojni:

—Luj nanab gutiobnislu narä, niluxh naj alga luj siäädlu loä te gutiobnisälu.

¹⁵ Dxejc räjp Jesús lojni:

—Basaan gacni si'c naj, sa'csi nanab gusoobnu guiraa ni rlanjz Dios gac.

Dxejctiru batiobnis Juan Jesús.

¹⁶ Cheni gulujx gurobnis Jesús, birigajcni lo nis. Dxejc bixal xhaguibaa, bahuiini siädäjt Sprit Dxi xten Dios si'c te palom, biäjtni lojni. ¹⁷ Dxejc xhaguibaali biejn diajgrenti te xse' ni räjp:

—Dee najc xi'nä ni sanälazä. Laani rbanälazä.

4

Che huij Jesús lo reyubijdz
(Mr. 1:12-13; Lc. 4:1-13)

¹ Dxejc bejn Sprit Dxi xten Dios huij Jesús nez lo reyubijdz te nejzga nuhual bendxab Jesús.

² Che gulujx bacua'n Jesús tiuu gubijdx, tiuu guxhijñ, gulaanni. ³ Sas biääd bendxab lojni, räjpni:

—Palga guliulu Xi'n Dioslu, gunibee gac reguijre yätxtiil.

⁴ Badzu' Jesús diidxre lojni, räjpni:

—Loj reguijtz xten Dios caj scree: “Xhet ganaxdi yätxtiil guibajñ rebejñ; sibajnzani con guiraa diidx nani rnii Dios.”

⁵ Dxejcti huinä bendxab Jesús guedx Jerusalén. Gulä'pnini jiaa yejc xques guidoro. Dxejcru räjp bendxab lojni:

⁶—Palga Xi'n Dios luj, bitiäjs lo yujli, sa'csi scree caj loj rexquijtz Dios: Sinibee Dios rexanglni ga'preni luj; siliäsreni luj con ñaareni didi gacnaj ni'lu lo reguijga.

⁷ Badzu' Jesús diidxre lojni, räjpni:

—Caj loj rexquijtz Dios: “Na'c fallu Dad ni najc Xtioslu.”

⁸ Stee huält huinä bendxab Jesús yejc te danro. Dxejcti baluini lojni guiraa reguejdx, reguedxro ni tre' lo guedxliuj näj guiraa xcälñasa'creni. ⁹ Dxejcti räjpni loj Jesús:

—Guiraa redee sunidxä lojlu palga guzuxhijblu nez loä te ganlu narä.

¹⁰ Dxejcti räjp Jesús lojni:

—¡Huij nez rec bendxab! Scree caj loj rexquijtz Dios: “Dad Xtioslulu ganlu; lojtisni chulu.”

¹¹ Dxejcti gubicaj bendxab loj Jesús. Dxejc biääd rexangl Dios biädhuiireni Jesús.

Gusloj Jesús cayujñ xtzuunni

(Mr. 1:14-15; Lc. 4:14-15)

¹² Che biejn diajg Jesús yu' Juan neñ ladzguib, huijni nez Galilee. ¹³ Dxejcti gudejñni guedx Nasare't, huiläjzñi guedx Capernaum ni tre' gajxh nez ro' nis, nez reguejdx Zabulón con Neftalí. ¹⁴ Si'c gujc te guzojb diidx ni bacuaa Isaías ni gunii xtidx Dios:

¹⁵ Lajdx Zabulón, lajdx Neftalí, nezyuj ni rij nez ro' nisdoo, stelaad gueu Jordán,

Galilee cadro rbäjz rebejñ nani di gac rexpñ Israel.

¹⁶ Rebejñ nani rbäjz neñ te yälkäjy abahuiireni te bajlga, luxh bajlga basaniñ xcäriejñ renani nabajñ lo xcälrdxejb, lo xpalaa yälgujt.

¹⁷ Dxejcli gusloj cagulijdx Jesús, räjpni:

—Colgusiejchlajztu, colguxhobdojl te guibañsa'ctu sa'csi abidzungajxh xcälñnibee Dios.

Che gurejdx Jesús tajp xpejñni

(Mr. 1:16-20; Lc. 5:1-11)

¹⁸ Sasaj Jesús nez ro' nisdoo xten Galilee che bahuiini lo tio'p niguii. Tejni laa Simón, ni laaza Pedr. Steeni najc lagajc bejtzni, ni laa Andrés. Dzuun ni rujñreni najc rniaazreni bäj, ni'c cacuaareni guijxh lo nisdoo. ¹⁹ Dxejcti räjp Jesús lojreni:

—Coltanajl narä. Naj riniaaztu bäj, niluxh narä gunä cueedxtu rebejñ.

²⁰ Lagajc dxejc basa'nreni xquijxhñeni te sanajlreni laani.

²¹ Che gudejdreni ro'c, bahuiini loj stio'p niguii, Jacob con bejtzni Juan. Yu'reni neñ te barcw con xtadreni, ni laa Zebedeo cayunsa'creni guijxh. Dxejc gurejdx Jesúsreni. ²² Lagajc dxejc basa'nreni barcw näjza xtadreni te sanajlreni Jesús.

Caguluii Jesús xhidajl bejñ

(Lc. 6:17-19)

²³ Sasajti Jesús guideb nez región xten Galilee, caguluiini nen teja rexquidooreni. Cagusule'ni redidxcoob xten xcälrnibee Dios. Cagusiajczani guiraa yälracxhuu ni rajc rebejn guejdxga, guiraa yälgujdx. ²⁴ Biejn diajg reben Siria diidx xcuent ni cayujn Jesús. Sas biädnäreni guiraa rebenracxhuu ni cayajc guiraloj yälgujdx, yäl'nayan; guiraa reni rajc yejcreni, guiraa reni rajc malyälgujdx, reni rajc yälguidxbej, guiraareni abixu'n tiejxhreni. Dxejcti basi-ajc Jesús rebejn_{ga}. ²⁵ Xhidalduxh ben Galilee huinajlni, näj reben reguedx Decápolis, näjza reben guedx Jerusalén, näjza reben Judea näjza rebejn ni tre' stelaad gheu Jordán.

5

Yejc te dajn balijdx Jesucrist rebejn

¹ Che bahuii Jesús loj reben xhidajl, huä'pni yejc te dajn. Dxejcti gubig rexpejn_{ni} ni gurejdxni lojni. ² Dxejc gusloj caguluii Jesús reni'c, scree räjpni:

Rebejn ni sibaalajz

(Lc. 6:20-23)

³ —Sibaalajz rebejn nani nanchee rquinduxhreni xcälracnäj Dios, sa'csi laareni nungäjlni xcälrnibee Dios.

⁴ 'Sibaalajz rebejn nani rac-huin lajzreni xcuent rextojlni, sa'csi sudzucaj Dios xtojlreni, susiäjlni lajzreni.

⁵ 'Sibaalajz rebejn nani nadolajz nani rlajz guntis si'cni rnibee Dios, sa'csi sacnäj Diosreni lo xcäl'nabajnreni lo guedxliujre.

⁶ 'Sibaalajz rebejn ni nastoocanu rliaanreni, riojlreni, sa'csi rlajzreni guiba_{nsa'}ctisreni nez loj Dios, sa'csi sudeed Dios lojreni guiraa ni rniabreni.

⁷ 'Sibaalajz rebejn nani rulasajz sa'reni, sa'csi sulasajzza Diosreni.

⁸ 'Sibaalajz rebejn nani najc nayatis lastooreni rujnreni rexhigabsa'c xten Dios sa'csi suhuiireni lo Dios.

⁹ 'Sibaalajz rebejn nani ruscuecdxilajz sabejnreni, sa'csi laareni sirilajreni rexi'n Dios.

¹⁰ 'Sibaalajz rebejn nani rusutijp lajzreni che rusacsí bejnreni sa'csi nabansa'creni nez loj Dios, sa'csi xtenreni najc xcälrnibee Dios xhaguibaa.

¹¹ 'Colspaalajz_{tu} che gusacsí bejn_{tu} tilnäjnreni la'tu, guiniireni guiraloj didx-xhii xcuent xtidxä. ¹² Colguibaalajz, colbalajz sa'csi xhaguibaali sunidxduxh Dios xcuent xtzuntu. Sigajcza basacsireni reniguii ni gubajn galoo ni gunii xtidx Dios.

La'tu najctu si'c sejd lo guedxliujre

(Mr. 9:50; Lc. 14:34-35)

¹³ Räjpszani:

—La'tu najctu si'c sejd lo guedxliujre. Palga di sejd gac nadzujy, ¿xho gacsacni nadzujy? ¿Xhi gun bejn_{ni} dxejc? Susälreni sejdga detz yu', suläj bejn yejcn.

¹⁴ 'La'tu najctu si'c te bianij lo guedxliujre. Te guejdx nani tre' jiaa yejc te dajn, digacdi guiga'tzni. ¹⁵ Digacdi xcaguij te bajl dxejcti jäuuni nen te caj. Maazru huen soobni jiaa nen te gandilieer te gusanijni loj guiraa rebejn ni tre' nen yu'. ¹⁶ Xcäl'nabansa'ctu najc si'c te bajl loj reben guedxliuj. Suhuiireni xtzunsa'ctu dxejc siliä'preni xpala'n xtadtu ni yu' xhaguibaa.

Ruluii Jesús xcuent leii

¹⁷ Räjpszani:

—Na'c guntu xhigab siädgudzucaä leii xten toMoisés, niclaza redidx ni baluii redad ni gunii xtidx Dios. Xhet siäddzucaädini, narä siälä te guluiäpacni

si'cni najcni. ¹⁸ Rniliäpac, dxejli che ni nitloj guibaa näjza guedxliuj, nicla tej letr ni caj loj leii di nit. Sajcpac guiralii ni caj lo reguijtzga. ¹⁹ Ni'cni chutis ni rlajz gusaan te diidx nani caj loj leii, mase te didxbäzni, luxh ruluiini gun bejn si'c, laani guxiduxh sajcnij lajdx Dios guibaa. Niluxh renani rucuaiajg xtidx leii, luxh rujnpacreni si'cni caj lo leii, ruluiizani leii, beñsacduxh gacni lajdx Dios guibaa. ²⁰ Ni'cni rniä lojtu, palga ditu gansa'cru xtzun Dios, ditu guibansa'cru loj reni najn xcuent xleii to Moisés, näjza loj reben guidoo ni laa farisee, dipactu jiu' lajdx Dios xhaguibaa.

Rului Jesús xcuent yälrdxe'ch
(Lc. 12:57-59)

²¹ Räjpzani:

—Abiejnza diajgtu nani gunii rebengoldoo: “Na'c ju'tlu. Chutis te nani ju't sa'ni, sinärenini lo guxhtis te jiäuuni nen latzguiib.” ²² Niluxh narä rniä chutis nani guidxechduxh lo sa'ni sijni lo guxhtis. Chutis ni guinii didxnaj lo sa'ni, sijni lo juejz. Chutis ni gäb lo sa'ni: “bennayälajz” sidejdni loj yälguxhtis xten Dios, sijni gabijl cadro cayejc guiboduxh.

²³ 'Che sanälu gojn guidoo te gusa'nlu lo bacuug, palga guinaj lajzlu yu' chu lo cadxe'chlu, ²⁴ basansijc gojn xtenlu lagajc ro'c, huisiälxgaa diidx con sa'lu, dxejcti guibi'lu te gac gusa'nlu gojn xtenlu.

²⁵ 'Palga yu' chu rdxe'ch lojlu, basquejn basiäjl diidx con laani lagajc cheni sasanäjluni lonezyuj te di gutedni luj lo juejz. Luxh juejz suteedni luj loj reguixhajg te gusa'ureni luj nen latzguiib. ²⁶ Rniliäpac lojlu: “Dilu guirii ro'c palga dilu cue'c guiralii meel nani guiniabni lojlu.”

Rului Jesús xcuent yälrusquee sa'ni

²⁷ Räjpzani:

—Abiejn diajgtu guniireni galoo: “Na'c guesnäjtu gunaa nani di gac chäältu.” ²⁸ Narä rniä, chutis te nani fii loj te gunaa dxejcti guisia' lajzni gunaaga, abejnni dojl nen lastooni. ²⁹ Palga balojlu ladbee rujn rujnlu dojl, gulääni basälni te laad sa'csi hueenru gunijtlu te balojlu quela chää guideb tiejxhlu gabijl. ³⁰ Palga ñaalu ladbee rujn rujnlu dojl, batiu'ni sa'csi hueenru gunijtlu te ñaalu quela chää guideb tiejxhlu gabijl.

Rului Jesús xcuent yälru'o'n chääln bejn
(Mt. 19:9; Mr. 10:11-12; Lc. 16:18)

³¹ Räjpzani:

—Abiejn diajgtu guniireni galoo: “Chutis niguii ni rlajz guro'n chäälni, nanabtis gudeedni te guijtz nani rni abaro'nni chäälni.” ³² Narä rniä, niguii nani guro'n chäälni niluxh xhet dojldi bejn chäälni, niguiiga sujn gun chäälni yälgubejxh, niluxh chutis ni guchnaa gunaaga sujnzani yälgubejxh.

Rului Jesús xcuent che ria'n diidx

³³ Räjpzani:

—Abiejnza diajgtu gunii rebengool: “Che ria'nlu diidx lo Dios gunlu xhi gunlu, na'c jial lajzlu; basa'pac xtiidxlu lo Dios.” ³⁴ Narä rniä, na'c gunlu juraar, nicla tej mood, nicla por xhaguibaa, sa'csi ro'c najc lajdx Dios, ³⁵ nicla por loj guedxliuj sa'csi ro'c rsiuj ni'ni; nicla por guedx Jerusalén sa'csi ro'c najc guedxlajdx reiuro, ³⁶ niclaza por lagajc bitiuweyclu, sa'csi digacdi guncheelu te guichyas niclaza te guichnol, nicla tej guijch. ³⁷ Nanab guiniitislul: “Mbaj” o “Ajndi”. Palga yu' xhiru rniilu, bendxab najc ni rujn rniiluni.

Chanälajzni rebejn ni rdxe'ch lojni
(Lc. 6:29-30)

³⁸ Räj pzani:

—Abiejn diajgtu gunii rebengool galoo: “Te baloj por ste baloj, te läjy por ste läjy, nalajznu bejn lo sa’lu si’ctis ni rujnni lojlu.” ³⁹ Narä rniä, na’c tilnäjlü te bejn ni bejn te cos guijdx lojlu. Palga chääzni ladbee lojlu badeed stelaad lojlu chääzni. ⁴⁰ Palga yu’ chu rlajz tilnäjlü te xca’ni xcamangwlu, badeedza näj xsa’cwlu lojni. ⁴¹ Palga yu’ chu guinibee guulu xcargwni te kilómetro, huinäni tio’p kilómetro. ⁴² Nani guiniab xhi guiniabxlia’ni lojlu, badeedni. Nani guiniablaa xhi guinablaani lojlu na’c gudxoijnluni lojni, na’c gäblu: “Xhetini.”

⁴³ Abiejn diajgtu gunii rebengool: “Colchanälajz sa’tu. Colguidxe’ch loj renani rdxe’ch lojtu.” ⁴⁴ Narä rniä lojtu, colchanälajz rebejn ni rdxe’ch lojtu. Benle’ yejc reni rgue lojlu. Colyejn dxunsa’c loj renani rdxe’ch lojtu. Colcuejdx, colnab loj Dios xcuent rebejn nani rdxagdiijltu, rusacsireni la’tu, ⁴⁵ te si’c gactu xi’n xtadtu ni yu’ xhaguibaa nani rujn rii xcubijdxni lo rebensa’c sigajcza lo rebejn guijdx. Rujnzani riajb nisguij lo rebensa’c sigajcza lo rebenguijdx. ⁴⁶ Palga la’tu chanälajzta lagajctis rebejn nani rinälajz la’tu, ¿xhi gaan guntu dxejc? Najctu lagajc si’c najc rebejn ni rutie’ meel ni rajx lo gubier. ⁴⁷ Palga guiniitu: “Xchan”, lagajctis loj resa’tu, ¿xhini’c rujntu ni najc hueenru lo chutis bejn? ¿La et sigajcdiza rujn rebejn nani di gumbee Dios? ⁴⁸ Colyajc bensa’c si’c ni najc xtadtu ni yu’ xhaguibaa.

6

Rulüi Jesús xho gudeedni gojn

¹ Räj pzani:

—Na’c gusäbdiidx guntu dzunsa’c nez loj rebejn te fiitisreni xhi rujntu. Palga gusäbdiidxtu di xtadtu ni yu’ xhaguibaa guniidx xhi xca’tu. ² Che gudeedlu gojn, na’c güilu diidx xhi badeedlu. Na’c gunlu si’c rujn rebejn nani rusguee nejn reguidoo, näjza lad nezyuj. Rujnsireni si’c te ruhüi rebejn xhi rujnreni te rliä’p rebejn xpala’nreni. Narä rniä acua’re ni gaan xtenreni. ³ Luj che gudeedlu gojn xtenlu, na’c gacbee nicla tej xamiigwlu xhi badeedlu, ⁴ te gac gojn xtenlu xhiga’tz. Dxejcti xtadlu ni cahüi nani bejnlu xhiga’tz, sacnäjni luj nez loj rebejn.

Rulüi Jesucrist xho cueedx, guiniabni lo Dios

(Lc. 11:2-4)

⁵ Räj pzani:

—Cheni rbejdx, rniabtu lo Dios, na’c guntu si’c rujn rebenguidoo ni rusguee. Rchaglajzreni rniabreni lo Dios rsiuliireni nejn reyu’ cadre riel xtidx Dios, näjza guiraa resquiin, näjza nez ronejz te ruhüi rebejn xho rujnreni. Rniliäpac, acua’re ni gaan xtenreni. ⁶ Naj luj cheni cueedx, guiniablu lo Dios, biu’ nejn xyu’lu. Basäuu ro’ yu’ga, dxejcti xhiga’tz gunii loj xtadlu ni yu’ xhaguibaa. Dxejcti xtadlu ni cahüi xhi rujnlu xhiga’tz, sacnäjni luj nez loj rebejn.

⁷ Cheni caniitu lo Dios, na’c guinisactu balti huält rediidx nani aguniitu. Si’c rujn rebejn nani di gumbee Dios. Naaren ni sa’csi sanuutis rniireni xhidajl diidx balti huält, siejn diajg Dios. ⁸ Na’c guntu sigajc ni rujnreni, sa’csi anajn xtadtu xhini’c rquiintu che guiniabtuni lojni. ⁹ Ni’cni scree colguinii lo Dios: Xtdanu ni yu’ xhaguibaa dxan najc lajlu.

¹⁰ Sujiääd xcälrnibeelu;

bejn si’cni rlajzlu lo guedxliujre sigajc rujnlu xhaguibaa.

¹¹ Nadxej baniidx xcu’nnu sa’ ni rdaunu guira dxej.

12 Basiäjł lajzlu redojl xtennu si'c riäjł lajznu redojl xten rebejn ni rujn dojl loonu.

13 Na'c gusaanlu jiaabnu xhigabguijdx, baslaa nuure lo dojl, sa'csi xten guejblu najc yälrnibee, yälñadip näjza yälrdimbicha' par tejpas. Sugacni si'c.

14 Palga la'tu gusiäjł lajztu redojl ni rujn rebejn lojtu, xtadtu ni yu' xhaguibaa susiäjłza lajzni rextojłtu. 15 Palga ditu gusiäjł lajztu redojl ni rujn rebejn lojtu, sigajcza xtadnu ni yu' xhaguibaa di lajzni jiäjłza rextojłtu.

Ruluii Jesús xho gucua'n bejn

16 Räjpzani:

—Che rucua'ntu na'c guntu si'c rujn rebejn nani rusguee; rumbaa lojreni te fii rebejn cagucua'nreni. Rniliä acua'reni rexgaanreni. 17 Niluxh la'tu, che rucua'ntu, colcuñ yejctu, colquii lojtu 18 te na'c gacbee rebejn cagucua'ntu, xtadtistu suhiii cagucuanxhiga'tztu. Xtadtu ni cahuii xhi cayunxhiga'tztu suniidxni xhi xca'tu nez loj rebejn.

Yälñasa'c ni yu' xhaguibaa (Lc. 12:33-34)

19 Räjpzani:

—Na'c gapdajntu yälñasa'c lo guedxliujre cadre rajw reman o rbihtiejn xhixtentu, niluxh richu' gubaan rolijz bejn te rbajnreni. 20 Hueenru ga'ptu xcälñasa'ctu xhaguibaa cadre di reman gauu, diza rehxixtentu cuibhtiejn, diza regubaan jiu' te cuanreni. 21 Sa'csi cadre yu' xcälñasa'ctu, ro'cza naga' lastootu.

Bianij xten tiejxhtu (Lc. 11:34-36)

22 Räjpzani:

—Bianij xten tiejxhni najc balojni, ni'cni palga rhuisa'c balojtu, guideb tiejxhtu yu' lo bianij. 23 Niluxh palga rebalojtu di fisa'c, guideb tiejxhtu yu' lo nacäjy, ni'cni palga bajl nani yu' tiejxhtu dini gusanij, ðlinacäiboo najc guidebtu!

24 'Nicla te bejn di gacdi gun dzuun loj tio'p lam tejsi junt, sa'csi sibälazni tejni laga sanälajzni steeni. Digacdi guntu xtzuun Dios palga caguilltistu xcälñasa'ctu lo guedxliujre.

25 'Ni'cni rniä lojtu, na'c chutu yärsia' por xcälñabajntu, xhicha gautu, xhicha yätu, niclaza naatu xhicha lajd gajcwtu. Yälñabajn sajru lo yälrajw, luxh sajru tiejxhtu lo xhajbtu. 26 Colhiii remane' ni rtajt xhaguibaa. Direni cue'c binij, dizareni guilia' gäjł, dizareni cuchee xhi gaureni nen yu', luxh xtadtu ni yu' xhaguibaa rudeedni xhi rajwreni. ¿Laa xhet sajcdirutu loj remane'ga, ä? 27 ¿Chu tej la'tu sa'csi ru'tu yärsia' sajcdiobrutu ste bo'c jiaaru?

28 '¿Xhicuent runduxhtu xhigab xcuent xhajbtu? ¿Colhiii reguii ni tre' nesiät! ¿Xho roobreni? ¿Xho rialreni? Direni gun dzuun, dizareni guzaa xhajbreni.

29 Narä rniä lojtu, nicla reii Salomón guideb najcwni rexhabsa'c xtenni di nisiuchee si'c rsiuchee tej reguiiga. 30 Palga Dios rujn rajc recuaan ni yu' nesiät ni rial nadxej luxh guixee ahuejcreni, ¿xhixh dini gunduxhru par la'tu, bejn nani guxii rililajz? 31 Ni'cni na'c chutu yärsia' guntu xhigab: “¿Xhicha guidaunu, xhicha guidunnu, xhicha gacwnu?” 32 Sa'csi rebejn nani di gumbee Dios xhigabtisga rujnreni, caguillreni guiraa recosga. Niluxh xtadtu ni yu' xhaguibaa anajnni xhini'c rquiintu. 33 Colquixгаа yälrnibee xten Dios näjza yälñabañsa'c si'cni rlajz Dios dxejc sica'tu guiraa ni rquiintu. 34 Ni'cni

na'c gunduxhtu xhigab xho tedtu dxej guixee. Combast tedtu trabajw nani riääd dxej con dxej.

7

Na'c cubeetu sa'tu
(Lc. 6:37-38, 41-42)

¹ Räjpzani:

—Na'c cubeetu sa'tu te na'cza cubee Dios la'tu. ² Sa'csi sigacni rgubeetu sa'tu, sigajcza sigubee Dios xhi rujntu; niluxh lagajc si'cni rutiexhtu lo bejn, si'cza sutiexh Dios lojtu. ³ ¿Xhicuent ruhuiilu loj guijxh ni yu' baloj sa'lu, luxh dilu fii yagro nani yu' lagajc balojlu? ⁴ ¿Xhicuent gäblu lo sa'lu, nädonnu cuää guijxh ni yu' nen balojlu, luxh dilu fii loj yagro ni yu' nen balojlu? ⁵ Ben guijdx ni rusguee, guläxgaa yagro ni yu' balojlu te gac fisa'clu te cuäälü guijxh nani yu' baloj sa'lu.

⁶ Na'c guluiitu guiraa rextidx Dios loj chutis bejn sa'csi yu'reni najc si'c bä'cw, xlia'si rca'renini; sibi'reni, sauya'reni luj. Sigajcza recos sa'cru, na'c gudeedtuni loj chutis bejn, sa'csi yu'reni najc si'c cuch rbälazreni cossa'c najcreni si'c cuch ni ruläj yejc xhitis xhi cos.

Colnab, colquiil, colgusejz rolä'
(Lc. 11:9-13; 6:31)

⁷ Räjpzani:

—Colnab lo Dios te guniidxni nani rniabtu. Colquiilni te guidxäjltuni. Colnii rolä', te guixalni jiu'tu. ⁸ Chutis ni rniab lo Dios sica'ni nani rniabni, nani rguuil xhi cos nez loj Dios rdxälzani nani rguuilni; nani rusejz rolä', suxhalzarenini lojni.

⁹ ¿La yu' chu tejtu che guiniab xi'nni te yätxtiil, alga gudeedni te guij, ä? ¹⁰ O palga guiniabni te la' bäjl, ¿la sudeedni te bäl? ¹¹ Palga la'tu ni najc ben guijdx rajc rudeedtu cossa'c loj xi'ntu, aticaxh xtadtü ni yu' xhaguibaa. Laani suniidxni cossa'c loj renani guiniabni lojni.

¹² Ni'cni guira'ti cos ni rlanjtu gunnäj bejn la'tu, sigajcza colyennäjreni, sa'csi si'c caj lo leii xten to Moisés, näjza lo diidx ni bacuaa redad ni gunii xtidx Dios.

Rolä' xten yälhabajn najc dää
(Lc. 13:24)

¹³ 'Coljiu' nez rolä' nani najc dää, sa'csi gulajg najc rolä', gulajg najcza nezyuj nani rinä bejn lo yälrunijt, luxh xhidajlreni riu' nejzga. ¹⁴ Sa'csi dää najc rolä', dääza najc nezyuj nani rinä bejn nez loj yälhabajn, niluxh guxii najc renani rdxäl nezyujga.

Ninexhsa'c ni rcaj loj te yajg rujn gumbeeni yajgga
(Lc. 6:43-44)

¹⁵ Räjpzani:

—Colnatiro rebejn nani rlanj gusguee la'tu. Rniisireni rusule'reni xtidx Dios. Rluisi nadolajzreni si'c te xiil, niluxh direni gac. Alga si'c loob najcreni, rutie'chreni bejn si'c re'ch xiil che riädchu' loob lojreni. ¹⁶ Dzuun nani rujnreni sujn gumbeeturenini. Anajntu di uub xcaj lo reyaguejch, diza iigw xcaj lo guechbiojb. ¹⁷ Ni'cni lo guiraa reyagsa'c rcaj ninexhsa'c lojni, per lo guiraa reyajg ni xhet yagsa'c di, ganax ninejxh ni di ganaxsa'c rcaj lojni. ¹⁸ Digacdi xcaj ninexhdxuudx loj te yajg ninexhsa'c. Di gacdiza xcaj te ninexhsa'c loj te yajg ni di gac yagsa'c. ¹⁹ Guiraa reyajg nani di ninexhsa'c xcaj lojni, nanab guidinni te checni. ²⁰ Sigajcza sajg gumbeetu beñsa'c sa'csi rujnreni dzunsa'c.

Xhet guiraadi bejn jiu' lo xcäl̄rnibee Dios
(Lc. 13:25-27)

²¹ Rāj̄pzani:

—Xhet guiraadi renani rnii, “Dad, Dad”, jiu' lo xcäl̄rnibee Dios xhaguibaa. Ganaxtis renani rujn si'cni rlajz Xtadä ni yu' xhaguibaa. ²² Sidzuj̄n dxej sinii xhidajl bejn loä: “Dad, Dad, con lajlu basule'nu xtiidxlu, con lajzalu biläenu rebeñdxab, con lajzalu biennu remilagwr.” ²³ Dxejc säpä lojreni: “Dina gumbeä la'tu. Col̄bicaj loä beñlatsiaj.”

Tio'p cimient
(Lc. 6:47-49; Mr. 1:22)

²⁴ Rāj̄pzani:

—Chutis nani rucudiajg diidx nani caniä, luxh ruzoob xtidxä, laani najc si'c te beñsiñ nani basoob rolijzni yejc te guilaj. ²⁵ Che biajb nisguij, biäjt nis gueuu, gubi' bej, bidinreni yejc yu'ga sas di yu'ga niajb sa'csi sojbni yejc guilajga. ²⁶ Nani riejn diajgni xtidxä, luxh dini guzoob xtidxä najc si'c te beñ gualajz nani basoob rolijzni lo yujxh. ²⁷ Che biajb nisguij, biäjt nis gueuu, gubi' beduxh bidinreni yec yu'ga. Dxejc ligurebä'n yu'ga. Lacti xhiroob banij̄t bej̄nga.

²⁸ Che gulujx gunii Jesús rediidxga, lacti bidxeloj rebejn rediidx ni baluini, ²⁹ sa'csi baluini rebejn si'cpac te nani rnibee, xhet si'c ruluiidi rebejn ni najn leii.

8

Rusiajc Jesús te bejn ni ral̄ tiejxhni
(Mr. 1:40-45; Lc. 5:12-16)

¹ Che biäjt Jesús yec dajn, xhidajl bejn huinajlni. ² Dxejcti biääd te beñracxhuu ni ral̄ tiejxhni nez loj Jesús. Bazuxhij̄bni, rāj̄pni:

—Dad, palga rlajzlu, sajc gusiajclu narä.

³ Dxejcti basгаа Jesús ñaani, gudajnni dade'ga con ñaani, rāj̄pni:

—Rlazä jiajclu. Siajc tiejxhlu.

Lagajc dxejc gubicağ guejdx ni ral̄ tiejxhni. ⁴ Dxejcti rāj̄p Jesús lojni:

—Arniä, rut lojdi gäblu xhi guzajclu. Huijtis lo rebixhojz te badeed gojn ni gunii toMoisés gudeed bejn ni riajc, te fii rebixhojzga abiajclu.

Rusiajc Jesús te xmos capitán roman̄
(Lc. 7:1-10)

⁵ Che biu' Jesús guedx Capernaum, bidzuj̄n te capitán roman̄ nani rnibee te gayuu soldaad. Gunabduxhni lo Jesús, ⁶ rāj̄pni:

—Dad, xmosä naga' rolizä. Di gacdi guiniibni luxh cayanduxhni.

⁷ Rāj̄p Jesús:

—Do'o te gusiacäni.

⁸ Dxejcti rāj̄p capitán lojni:

—Dad, xhet sacädi; di nungäj̄l jiu' guejblu rolizä. Guiniitis te diidx, siacgajc xmosä. ⁹ Narä nacäza xmos rebejn ni rnibee, niluxh rnibeäza te gayuu soldaad. Che rniä lo tejni: “Huij”, rijni. Che gäpä loj steeni: “Gudaa”, riädgajcni. Che gäpä loj xmosä: “Bejn dee”, rungajcni.

¹⁰ Che biejn diajg Jesús si'c, bidxeloduxhni, rāj̄pni loj renani siädnañlni:

—Rniliäpac lojtu, nicla neñ guideb reguedx Israel dina nidxälä te bejn ni rililajz si'c rililajz dade're. ¹¹ Niluxh rniä, sirii xhidajl beñzijt nez ladjiaa, nez ladjiät, te jiadcuenäjreni Abram, Isaac, Jacoob lajdx Dios xhaguibaa. ¹² Luxh rebeñ Israel nani niajc xi'n Dios sijreni te laad lo yäl̄cäy cadro soonreni, sauya'reni läjyreni, sidejdtisreni trabajw par tejpas.

¹³ Dxejcti räjp Jesús loj capitán:
—Gubi' rolijzlu. Sigajcni huililajzlu, sigajcza gacni.
Dxejc lagajc or̄ga biajc xmosni.

Rusiajc Jesús xnansueegr Pedr
(Mr. 1:29-31; Lc. 4:38-39)

¹⁴ Che bidzujñ Jesús rolijz Pedr, bahuiini naga' xnansueegr Pedr, cayacx-huuni, yu'ni xliaa. ¹⁵ Dxejc gudajntis Jesús ñaani, birigajcni xliaaga. Dxejcti huistie nane'ga, gusloj cagudeedni xhi gau Jesús.

Rusiajc Jesús xhidajl beñ racxhuu
(Mr. 1:32-34; Lc. 4:40-41)

¹⁶ Che biu' guxhijñ, biädnäreni loj Jesús xhidajl bejñ ni yu' reben̄dxab lostooreni; con xtiidxni gunibeeni birii guiraa reben̄dxabga. Basiajczani guiraa reben̄ racxhuu. ¹⁷ Si'c bejnñi te guzobj diidx ni bacuaa todad Isaías, ni gunii xtidx Dios, che räjpni:

Lagajc laani cua'ni rexcälracxhuunu, sanāzani rexcälñayannu.

Reni rlajz ninajl Jesús
(Lc. 9:57-62)

¹⁸ Che bahuii Jesús tre' xhidalduxh rebejñ guideb gabi cadre suga'ni, gunibeeni tednäjni rexpejñpacni stelaad ro' nis. ¹⁹ Dxejcti biääd te beñnajñ loj Jesús, räjpni:

—Mastr, sisiaäza cadrotis chäálu.

²⁰ Räjp Jesús lojni:

—Rebäjz rajpreni xpiliääreni, remane' ni rutajt xhaguibaa rajpreni xpi-tiääzreni, niluxh narä Xi'n Dios ni gujc Niguui dina gapä cadre gaa yecä.

²¹ Stee rexpejñpacni räjp lojni:

—Dad, basaan chaxgaä ladxä te chacuatzä xtadä.

²² Räjp Jesús lojni:

—Gudanajl narä. Basaan sugucua'tz resaben̄gutreni rebejñ nani najc si'c ben̄gut sa'csi najcreni ben̄dojl.

Basiacdxi Jesús te beduxh
(Mr. 4:35-41; Lc. 8:22-25)

²³ Che biu' Jesús neñ barcw, biu'za rexpejñpacni lagajc neñga. ²⁴ Dxejc huäjs te bedonduxh lo nisdoo. Lirusiääzñi barcw neñ nisdoo. Luxh Jesús nagayejsni. ²⁵ Dxejcti huij rexpejñpacni huicuaänni, räjpreni:

—Dad, gucnäj nuure te di guetnu.

²⁶ Dxejc räjp Jesús:

—¿Xhicuent rdxejbtu, bejñ ni guxii rililajz?

Dxejcti huistieni, gudidxa'ni lo bej ñajza lo nisdoo, te biacdxireni. ²⁷ Dxejc bidxeloduxh rexpejñpacni, räjpreni:

—¿Chuni'c najc niguiire? ¡Ahuilaa xho rucuardiajg bej ñajza nisdoo xtiidxni!

Reben̄dxab ni yu' lajdx regadarenos
(Mr. 5:1-20; Lc. 8:26-39)

²⁸ Che bidzujñ Jesús stelaad nisdoo cadre najc lajdx regadarenos, tio'p bejñ ni yu' ben̄dxab lastooreni biädchaglojreni Jesús. Rebejñga riireni neñ rebaa, nialazduxhrene, ni'cni rut rajcdi rdejd nezyujga. ²⁹ Guredxa'reni räjpreni:

—¿Xhicuent siädchu'lu loonu luj ni najc Jesús Xi'n Dios? ¿La siäädlu ree te gusacsilu nuure luxh gad galdi xor̄nu, ä?

³⁰ Nez te laad, zijte' cadre suga'reni, cayajp bejñ xhidaltro cuch. ³¹ Dxejcti gunab reben̄dxabga loj Jesús, räjpreni:

—Palga cuäálu nuure, basaan jiu'nu neñ recuchre.

³² Dxejcti räjp Jesús:

—Colchäj.

Dxejcti biriireni neñ lastoo redade'ga, huichu'reni neñ recuchga. Dxejcti guiragajc recuchga caguxunreni, huitejbreni ro' te guilaj, biääzreni neñ nis-doo, gujttireni neñ nis.

³³ Rebejn ni cayajp recuchga, baxunreni, huijreni lajdxreni, huiyeireni didx guiraa ni guzajczeni näjza ni guzajc redade' ni guyu' rebeñdxab lastooreni.

³⁴ Dxejcti guiraa rebeñguejdxga huichaglojreni Jesús. Che bahuiireni lojni, gunabduxhrene lojni, jiunejzni lajdxreni.

9

Basiajc Jesús te bejn nani abixu'n tiejxhni

(Mr. 2:1-12; Lc. 5:17-26)

¹ Dxejcti biu' Jesús neñ barcw. Gudejdni stelaad ro' nis te bidzujnmi lajdxni.

² Ro'c biädnäreni lojni te bejn nani abixu'n naani, ni'ni. Naga'ni lo te da'. Che bahuii Jesús lacti rililajzreni, räjpni loj beñracxhuuga:

—¡Baspaa lajzlu xi'nä! Agubicaj rextojllu.

³ Dxejcti gaii beñnajn ni ruluu xleii Moisés cayujnreni xhigab ensilaareni, caniyaj dee Dios con rextiidxni. ⁴ Dxejc gucbegajc Jesús xhi xhigab cayujnreni, dxejc räjpni lojreni:

—¿Xhicuent cayujntu xhigabguijdx neñ lastootu? ⁵ ¿Con ni najc guyasiru? Guiniä lo te bejn: “Agubicaj rextojllu”, o guiniä lo te bejn: “Huistie, guzaj.”

⁶ Dec gunä te gacheetu Xi'n Dios ni gujc Niguii rajp yäl'rnibee lo guedxliujre te gudzucajni dojl.

Dxejcti räjpni loj beñracxhuuga:

—Huistie, cua' xta'lu, huij rolijzlu.

⁷ Dxejcti huistie beñracxhuuga, siini rolijzni. ⁸ Che bahuii rebejn lojni, bidxeloduxhrene, gulä'preni xpala'n Dios, ni badeed yäl'rnibeega loj rebejn.

Che gurejdx Jesús Mateo

(Mr. 2:13-17; Lc. 5:27-32)

⁹ Dxejcti birii Jesús cadro basiajcn beñracxhuu, sä'tini. Dxejc bahuiini loj te dade' ni laa Mateo. Sobga'ni loj te yagxhiil cadro rbej reni ruquijx xcuent guiraloj. Dxejc räjp Jesús lojni:

—Gudanajl narä.

Dxejcti huisuni, sanajlni Jesús.

¹⁰ Cheni sobga' Jesús lo mex cayajwreni rolijz Mateo, biäädza xhidajl rebejn nani ruquijx xcuent guiraloj, ni najc rebejn ni di gac xpen Israel, gurejzaren lo mex näj Jesús näjza reni najc rexpejnpacni. ¹¹ Che bahuii rebeñ guidoo, ni laa refarisee, xhi cayujn Jesús, räjpreni loj rexpejnpac Jesús:

—¿Xhicuent raunäj xmastrtu rebejn nani ruquijx xcuent reyuj näjza rebejn ni di gac xpen Israel?

¹² Che biejn diajg Jesús xhi guniireni, räjpni lojreni:

—Rebejn nani nadaan dini guiquiin chu gusiajcn, niluxh rebejn racxhuu ni'c rquiiireni chu gusiajcn. ¹³ Colchäj te colchaseed xhi säloj diidxre ni caj loj reguijtz: “Yäl'rulaslajz rlazä, dina rlazä guniidxtu guidxaa loä.” Sa'csi narä dina niädtedxä rebeñsa'c, narä siädtedxä rebeñdojl te gusiechajzreni.

Gunabdiidxreni xcuent yäl'rucua'n

(Mr. 2:18-22; Lc. 5:33-39)

¹⁴ Dxejcti biääd rexpejnpac Juan loj Jesús räjpreni:

—Nuure con refarisee rcua'nnu xhidal huält, ¿xhicuent di rexpejn̄paclu gucua'n, ä?

¹⁵ Räj̄p Jesús lojreni:

—Che ruch̄naa te bi'n, ¿xhixh rac-huin lajz regolnejdx laga suga' bi'n con laareni? Palga yu' xhi sac bi'nga, dxejc sii soonreni, sucua'nreni.

¹⁶ Rut gundi remiend te ladbiejw con te la' ladcoob sa'csi sixu'n ladcoobga, sutiäjsruni ladbiejwga, sajc xhiroobru cadre biräjsga. ¹⁷ Niclaza gac guida' bincoob neñ reguidbiejw, sa'csi reguidbiejw siräjsni dxejc sixe' bin, sinijtz reguijdgä. Ni'cni nanab guida' bincoob neñ reguidcoobza, te si'c nicla tejreni di nit.

Xindxa'p Jairo näjza gunaa nani gudajñ xhajb Jesús

(Mr. 5:21-43; Lc. 8:40-56)

¹⁸ Lañ ni caniini rediidxga, biäd te dade' ni rnibee neñ guidoo xten rexpejn̄ Israel. Bazuxhijbni nez loj Jesús räj̄pni:

—Entis gujt xindxa'pä. Gudaa, badzuub ñaalu yejñi te guibañsacni.

¹⁹ Dxejcti huisu Jesús, sanäni Jairo. Näj rexpejn̄pacni sanajlrenini. ²⁰ Luxh guyu' te gunaracxhuu nani agujc tzubitio'p ijz cayajñi yälguidxbäii. Bidzujñni nez dejt̄ Jesús, gudajñni ro' xhajbni, ²¹ sa'csi bejñni xhigab neñ lastooni: “Palga sajc canätis ro' xhajbni, siacä.” ²² Dxejc gubiré Jesús bahuiini loj gunaaga, dxejc räj̄pni:

—Gulecdxilajzlu xindxa'pä. Yäl̄rililajz xtenlu abasiajclu.

Luxh lagajc dxejc biajc gunaaga.

²³ Cheni biu' Jesús rolijz dade' nani rnibee neñ xquidoo rexpeñ Israel, bahuiini rebejn̄ ni roñ bizej näjza xhidajl rebejn̄ ni cabedxa' cayoon, li te bieje cayajc, dxejc ²⁴ räj̄pni loj rebejn̄ga:

—Col̄guibicaj. Nagayejstis dxa'pga, gajdñi guet.

Dxejc rebejn̄ga alga ruxhizñajreni Jesús. ²⁵ Cheni abirii rebejn̄ neñ yu', biu' Jesús, gunaazni ñaa dxape', dxejc huistie dxape'ga. ²⁶ Dxejcti bire'ch diidxga guiraa neñ reguejdx ni tre' nejzga.

Basiajc Jesús tio'p lotiä'p

²⁷ Che birii Jesús ro'c, huinajl tio'p bejñni nani di fii. Rbedxa'reni roonreni räj̄preni:

—Balaslajz nuure, Xi'n toDavid.

²⁸ Che bidzujñ Jesús cadre caya'nni, gubigreni lojni. Dxejcti gunabdiidx Jesús lojreni, räj̄pni:

—¿La rililajztu sajc gunä ni rniabtu?

Redade'ga basejc diidx, räj̄preni:

—Sajc gunluni, Dad.

²⁹ Dxejcti gudajñni balojreni, räj̄pni:

—Sugacni si'cpacni rililajztu.

³⁰ Lagajc dxejc bixal balojreni. Sas räj̄ppac Jesús lojreni:

—Arniä, na'c chayeitu diidxre, te rut gacbeedi xhi guzajctu.

³¹ Cuantsi biriireni ro'c guslojreni cagutie'chreni diidx xcuent Jesús guideb gabi neñ reguejdxga.

Basnii Jesús te gop

³² Che biriireni cadre biajc baloj rebejn̄ga, biäd sgaii bejn̄ biädñäreni te gop loj Jesús. Yu' xp̄rit beñdxab neñ lastoo bejn̄ga. ³³ Che barilaagw Jesús xp̄rit beñdxab neñ lastoo beñgopga, guslogajñni caniini. Rdxeloduxh rebejn̄ räj̄preni:

—Gajdpacnu guihuii sa' redzuunre lajdx rexpejn̄ Israel.

³⁴ Dxejc reben guidoo ni najc refarisee, räjpreni:
—Rbääni rexprit ben_{dx}ab con yäl_{rn}ibee xten ben_{dx}abro.

Rulaslajz Jesús rebejn

³⁵ Gudejd Jesús guiraa reguedxro näjza reguedxbäz, basule'ni xtidx Dios nen reguidoo xten rexpejn Israel. Basääbni diidx xten xcäl_{rn}ibee Dios. Basiajczani guiraloj yäl_{rac}xhuu, guiraloj yäl_guijdx ni rajc bejn nen reguejdxga.

³⁶ Che bahuini loj reben xhidajl biaduxhni rebejn_{ga} sa'csi rdebya' lajzreni, rac-huin lajzreni, najcreni si'c najc rexiil nani di ga'p baxtoor. ³⁷ Dxejcti räjpni loj rexpejn_{pacni}:

—Guliipac xhidalduxh ben guedxliuj di gan xtidxä, luxh guxii najc reni guluiireni; najcni si'c gäj_l ni agojl guilia', niluxh ruti mos ni guilia'ni. ³⁸ Col_nab lo Dad nani najc xtenni guedxliujre te guxha_lni rebejn ni sajc guluii reben guedxliujre, gacreni si'c mos ni rlia' gäj_l.

10

Gule Jesús guitzubitio'p rexpejn_{pacni}

(Mr. 3:13-19; Lc. 6:12-16)

¹ Dxejcti gurejdxni guitzubitio'p rexpejn_{pacni}, badeedni yäl_{rn}ibee lojreni te gurilaagwreni rexprit ben_{dx}ab lastoo bejn näjza te gusiajcreni guiraloj yäl_guijdx näjza yäl_{rac}xhuu.

² Laj reguitzubitio'p rexpejn_{ni} ni guleni najc: Simón, ni laaza Pedr; Andrés bejtz Simón; Jacobo xi'n Zebedeo; Juan bejtz Jacobo; ³ Felipe; Bartolomé; Tomás; Mateo, ni najc colectoor; Jacobo, xi'n Alfeo; Lebeo ni rniireni Tadeo; ⁴ Simón, te bejn ni yu' loj recananita; Judas Iscariote, nani bateed Jesús ladz_{naa} rebejn nani rdxe'ch lojni.

Baxha_l Jesús rexpejn_{pacni} gutie'chreni diidx

(Mr. 6:7-13; Lc. 9:1-6)

⁵ Guitzubitio'p rebejn_{re} baxha_l Jesús. Baliidxnireni räjpni:

—Na'c chäätu nez cad yu' rebejn ni di gumbee Dios. Na'c jiu'tu lajdx reben samaritan. ⁶ Col_{ch}äxgaa lo rexpejn Israel nani agunijt nen dojl. ⁷ Col_{ch}äj, col_zäbdiidx lo rebejn, col_{ye}'tz lojreni xcäl_{rn}ibee Dios abidzungajxh. ⁸ Col_gusiaj_c ben racxhuu, col_gusiaj_c tiejxh rebejn ni ra_l guejch tiejxh_{reni}, col_guspaj_n bengut. Col_gurilaagw xp_{rit} ben_{dx}ab lastoo rebejn. Ligaj cua'tu yäl_{rn}ibee, ligajza col_{ye}jn dzuun.

⁹ Räjpzani:

—Na'c chanätu oor, niclaza pla't, niclaza coobr nen xdo_{bd}äjltu, ¹⁰ niclaza guijxh na'c chanätu lo nejz. Na'cza chanätu tio'p xhajbtu, nicla gura'ch, nicla baston sa'csi bejn ni rujn dzuun nungäj_l xca'ni xhi gauni.

¹¹ Räjpzani:

—Che guidzujntu xhitis te guedxro, xhitis te guedxbäz, col_quiil te be_{nsa}'c. Rolijztisni col_jia'n dxejli ni jiunejz_{tu} guejdxga. ¹² Cheni jiu'tu nen yu', col_nii xtidx Dios lo rebejn_{ga}. ¹³ Palga najcreni bejn ni numbee Dios, sujia'n yäl_rbedxilajz loj rebejn_{ga}. Niluxh palga direni gac be_{nsa}'c, naaddireni xca'reni xtidx Dios, suguibi' yäl_rbedxilajzga lojtu, col_jiunejz ro'c. ¹⁴ Palga direni gusaan jiu'tu rolijzreni, palga di r_lajzreni gucua_diajg_{reni} xtiidxtu, dxejc col_jiunejz rolijz bejn_{ga}, o col_jiunejz guejdxga, dxejc col_cuij_b guxhuj ni'tu si'c te seen gulälazreni xtidx Dios. ¹⁵ Rniliäpac lojtu, dxej ni gun Dios xcäl_guxhtisni, te yäl_guxhtisoru gun Dios rebejn_{ga}, quela yäl_guxhtis ni gujc reben guedx Sodoma näj Gomorra.

Yäl_{rus}acsí ni siäd

¹⁶ Rāj̄pzani:

—iCol̄huiire! Narä suxhalä la'tu si'c xile' nez loj reloob, ni'cni col̄gacnasiñduxh si'c najc te bäl, col̄yajcza nadolajz si'c te palom. ¹⁷ Col̄natiro rebejn sa'csi suteedreni la'tu ladz̄naa rexcuxhtisreni, siguijnzarenı la'tu neñ xquidooreni. ¹⁸ Sinäzarenı la'tu nez loj regubier, nez loj reŕeii xcuent rextidxä, te gusule'tu xtidxä nez lojreni näjza nez loj rebejn nani di gumbee Dios. ¹⁹ Cheni chanärenı la'tu nez loj reguxhtis, na'c guntu xhigab xho guiniitu, niclaza guntu xhigab xhicha ni'c guiniitu, sa'csi lagajc Dios suniidx diidx guiniitu or̄ga. ²⁰ Sa'csi et la'ditu ni guinii dxejc, Sprit xten Xtadtu Dios ni yu' neñ lastootu, laani guinii neñ lastootu.

²¹ 'Luxh rebejn suteedreni lagajc bejtzreni ladz̄naa reni ju'treni. Redad suteedreni lagajc xi'nreni, rexi'n bejn sidxe'chzarenı lo xcuzajnneni te ju't bejn xcuzajnneni. ²² Guiraa rebejn guedxliuj sidxe'chreni lojtu xcuent xtidxä. Nani chanuu lo xtidxä dxej lultli, ni'c sujn gaan yäl̄nabajn par tejpas. ²³ Che guirinajlreni la'tu te gusacsıreni la'tu neñ te guejdx, col̄guxuñ ro'c, col̄chäj stee guejdx. Rniliä lojtu, ditu gun gaan tedtu guiraa reguejdx xten rexpejn Israel ansde jiäd Xi'n Dios ni gujc Niguui.

²⁴ 'Di te bejn ni casieedgaj beñroru lo xmastrni, diza te mos gac beñroru lo xlamni. ²⁵ Te bejn ni casieed, rsieedruni te gacni si'c najc xmastrni, sigajcza rujn mos, riuni xtidx xlamni te gacni si'c najc xlamni. Palga rbälajreni Beelzebú nani rnibee beñdxab, ¿xho direni cuälajza Beelzebú rexi'nni, ä?

Chuni'c nanab guidxejbni

(Lc. 12:2-9)

²⁶ Rāj̄pzani:

—Ni'cni na'c guidxejbtu rebejn, sa'csi anajntu xheti te cos ni niäuu lojni ni di guidzujn dxej guixal lojni, te fii chutis bejn lojni. Xhetiza te cos xhiga'tzdi ni di guidzujn dxej siejn diajg bejn xcuentni. ²⁷ Diidx nani rniä lojtu guxhijn, col̄guiniini che nianij lo guedxliuj. Rediidx nani rniä chigaj rodiajgtu, col̄guiniini dip, jiaali col̄zuj, guredxa' te jiejnı. ²⁸ Na'c guidxejbtu renani rugu't bejn, sa'csi direni gun gaan ju'treni xaim bejn. Col̄guidxejbru nani rugu't tiexh bejn näjza xaim bejn neñ gabijl.

²⁹ '¿La di bejn guto' tio'p manbäz ni rutajt por te centaab, ä? Luxh racbee Xtadnu ni yu' xhaguibaa che riajb tejni lo yuj. ³⁰ Näjza rexquidxejclu nagab tebgajreni. ³¹ Ni'cni rniä na'c guidxejbtu; sajcrutu lo te chinaa manbäz ni rutajt.

Renani rusule' xtidx Jesucrist nez loj rebejn

(Lc. 12:8-9)

³² Rāj̄pzani:

—Chutis renani rusule' xtidxä nez loj rebejn, narä siniäza xcuentni nez loj xtadä ni yu' xhaguibaa. ³³ Guiraa renani di gusule' xtidxä nez loj rebejn, sigajcza narä dina guiniä xcuentni nez loj xtadä ni yu' xhaguibaa.

Rlia' Jesús sa' bejn

(Lc. 12:51-53; 14:26-27)

³⁴ Rāj̄pzani:

—Na'c guntu xhigab siädñää yäl̄rbedxilajz lo reben guedxliujre, xhet yäl̄cuedxidi ni siädñää, yäl̄rdxagdijl siädñää. ³⁵ Narä siädñää yäl̄rdxagdijl te bi'n con xtadni; te dxa'p con xnanni; te gulijzni con xnansuegrni. ³⁶ Ni'cni lagajc resa'tu ni yu' rolijztu sidxe'chreni lojtu.

³⁷ 'Nani sanälajzru xtadni, xnanni, luxh narä dini chanälajz, digacdi gacni xpenä; nani sanälajzru xingaanni o xindxa'pni, di gacdiza gacni xpenä.

³⁸ Nani di guu xcrujzni, nalajznu tedni trabajw, jiädnajlni narä, di gacdi gacni xpenä. ³⁹ Nani guidxäl xcälñabajñni lo guedxliujre, sunitni yälñabajñ xhaguibaa. Luxh nani gunijt xcälñabajñni lo guedxliujre xcuent rextidxä, sidxälñi yälñabañsa'c xhaguibaa.

Gaan nani xca'ni
(Mr. 9:41)

⁴⁰ Räjzani:

—Nani guniidx rolijzni jia'ntu, runiidxzani rolijzni jia'nä; luxh nani ruscuääz narä rolijzni, rolijzni ruscuääzzani Gueb Dios nani baxhañ narä. ⁴¹ Nani guscuääz te niguii ni rnii xtidx Dios rolijzni sa'csi baxhañ Dios niguiiga, sica'za bejnga lagajc gaan ni xca' niguii ni rnii xtidx Dios. Nani guscuääz te beñsa'c rolijzni sa'csi beñsa'cni, sica'zani lagajc gaan ni xca' beñsa'cga. ⁴² Chutis nani gudeed mase te xhijgtis nis niäliuj xcuentä lo rebiuxe're, rniliäpac lojtu, direni gunijt, sica'pacreni nani nungäjñ xca'reni.

11

Renani baxhañ Juan Bautist loj Jesús
(Lc. 7:18-35)

¹ Che gulujx baluii Jesús rexpejñpacni xho gunreni dzuun, dxejcti biriini ro'c te saluiini, chasule'ni diidx lajdx rexpejñpacni.

² Juan yu' neñ latzguiib. Che biejn diajgni xhi cayujñ Jesús, baxhañni tio'p xpejñpacni ³ te huinabdiidxreni:

—¿La luj ni najc Crist ni jiääd, ä?, o ¿la silääznu chu stee bejñ?

⁴ Dxejcti badzu' Jesús diidxre räjzani:

—Colchäj, colye'tz loj Juan recos nani riejñ diajgtu, näjza recos nani ruhuiitu. ⁵ Reni di fii, ruhuiireni; reni di sa, arsiajreni, reni rañ tiejxhni, abiajñ tiejxhreni; reni di jien diajg, ariejñ diajgreni; rebeñgut, ahuäjzreni, gubañsacreni. Dxejcti loj rebejñ proob nani cabäjz xcälracñäj Dios cagusule'reni xtidx Dios ni ruslaa bejñ neñ dojl. ⁶ Chicbaa renani di jieed narä.

⁷ Cheni sii rebejñga gusloj Jesús canii loj rebejñ xcuent Juan:

—¿Chuni'c huihuiitu nez loj reyubijdz? ¿La te biquii ni rusniib bej, ä?

⁸ ¿Xhini'c huihuiitu? ¿Te bejñ ni sucheduxh, ä? Ni najntu rebejñ nani sucheduxh rbäjzreni rolijz rereii. ⁹ La'tu ¿xhicient huijtu ro'c? ¿Te fiitu te niguii ni rnii xtidx Dios, ä? O'n. Rniliä lojtu, luxh dini gac bejntis ni rnii xtidx Dios; beñroruni. ¹⁰ Laa Juan nani rusä't ni bacuaa lo reguijtz cadre caj scree:

Narä suxhañä te niguii nani guinii xtidxä nez lojlu; laani susucweeni nezyuj nezlojlu.

¹¹ Guliipac rniä, loj guiraa rexingaan xten gunaa, nicla tejni gajd guiricaj ni najc te beñsacduxh loj Dios si'c ni najc Juan Bautist. Niluxh bejñ nani najc beñ huinru lo xcälñabee Dios xhaguibaa, bejnga maazru sajñni loj Juan.

¹² 'Cheni gucli dxej ni gusloj rusule' Juan Bautist diidx najli, yu'duxh reni rlanjzpac jiu'reni lo xcälñabee Dios ni yu' xhaguibaa con yälrdxe'ch, sas reni nadxecha' rlanjzreni cuäxuuni xcälñabee Dios. ¹³ Guiraa reniguii ni gunni xtidx Dios näjza xleii Moisés, gunixgaareni recos ni churu gac, galooli hasta che biäädli Juan Bautist. ¹⁴ Palga rlanjztu chalilajztu, lagajc Juan najc Elías, niguii xten Dios nani bia'n diidx jiääd. ¹⁵ Nani sobdiajg diidx, gucua diajgni.

¹⁶ '¿Xhicojñ guntebloä rebejñ nani tre' naj, ä? Najcreni si'c najc rebiuux nani rguijñ nez lo guii cadre rdo', rbejdxreni lo sa'reni, ¹⁷ rniireni: “Bielñu bizej te guya'tu luxh ditu nuya'. Dxejcti bielñu redij ni nabaduxh luxh dizatu nioon.” ¹⁸ Sa'csi che biääd Juan dini niajw dizani niä', luxh räjz rebejñ najñni te xpejñ beñdxab. ¹⁹ Dxejcti biälä narä, Xi'n Dios ni gujñ Niguii, rauä, rä'ä

dxejcti räjp rebejn: “Niguiire rauxha't, rätejzani bin, najcni xamigw rebejdoj̄ nājza reniguii ni ruquijx xcuent reyuj ni rajx lo gubier.” Luxh loj rebejn ni najc xpejn̄ Dios yuduxh xcäl̄najn̄ Dios, ni'cni baxhałni guiro'p rebejn̄re.

*Reguejdx guyalajz
(Lc. 10:13-15)*

²⁰ Dxejcti gusloj Jesús gudil̄nājni rebejguejdx cadre benduxhni remilaagwr, sa'csi naaddireni gusiechlajzreni xtoj̄lreni, sanuutis nabaj̄nreni neñ dojl̄. Dxejcti räjpni:

²¹ —¡Gunatiru guedx Corazín! ¡Gunatiro guedx Betsaida! Paru neñ guedx Tiro nājza guedx Sidón niajc remilaagwr nani gujc guedx lajdxtu, cadxejli nusiejch lajzreni xtoj̄lreni, cadxejli niajcwreni neñ godx, nidääb cobdāj yejcreni. ²² Luxh rniä lojtu: che guidzuj̄n dxej ni gun Dios xcäl̄guxhtisni, sidejdrutu castiigw loj rebejn̄ ni gulājz guedx Tiro nājza guedx Sidón. ²³ Luj guedx Capernaum di gunlu xhigab chäslu xhaguibaa; jiāj̄t neñ baa jiajblu, sa'csi paru neñ guedx Sodoma niajc sa' remilaagwr nani gujc guedxlajdxlu, pet najli tresijc guejdxga. ²⁴ Luxh rniä lojtu, dxej ni gun Dios xcäl̄guxhtisni, trabajwduxhru tedtu loj rebejn̄ Sodoma.

*Coltaa loä, te gusilajztu
(Lc. 10:21-22)*

²⁵ Laa dxejcti räjp Jesús:

—Rliä'pä xpala'nlu Xtadä, Dad xten xhaguibaa nājza guedxliuj, sa'csi bacua'tzlu recosre lo rebejn̄najn, lo rebejn̄ ni racbee, te baluiiluni loj rebejn̄nadolajz ni najc si'c biuxbäz. ²⁶ O'n. Guliini, Xtadä, sa'csi rujnlu xhigab si'c najc hueen gacni.

²⁷ Guiraa recosre abaniidx Xtadä loä, rutru numbeedi xingaanni; xtadtisni rumbeeni. Rutruza numbeedi xtadni, xtebtis xingaanni, nājza loj renani gudeed xingaanni gumbee xtadni. ²⁸ Coltaa loä guiraatu nani abadxajg, nani rsina', narä sunidxä yäl̄rusilajz lojtu. ²⁹ Col̄guisieed guntu dzuun si'cni ruluiātu. Col̄hunii xho runä, xho nacä nadolajz, dizana gacä beñayedxlajz neñ lastoä, ni'cni sidxäl̄ xaimtu yäl̄rusilajz. ³⁰ Sa'csi guyasi najc xtzunä ni ruluiātu, dizani gac naganduxh.

12

*Rutie' rexpejn̄ Jesús triuu dxej ni rusilajzreni
(Mr. 2:23-28; Lc. 6:1-5)*

¹ Che sasaj Jesús nez loj reyuj cadre naga' triuu, luxh dxejga najc dxej ni rusilajz rexpejn̄ Israel, calaan rexpejn̄pacni, guslojreni calädxa'reni dojl̄ lo triuu te cayajwrenini. ² Che bahuii rebeñ guidoo ni laa farisee, räjpreni loj Jesús:

—Ahuii xho rujn̄ rexpejn̄pacnu dzuun nani di nungäj̄l̄ gunreni dxej nani rusilajz bejn̄.

³ Luxh laani räjpni lojreni:

—¿La gajdtu goł̄ xhi caj loj reguijtz xcuent ni bejn̄ toDavid che gulannājni rexpejn̄ni, ä? ⁴ Biu'reni xquidoo Dios, gudajwreni yätxtiil̄ nani di nungäj̄l̄ gauni, nicla laani, niclaza rebejn̄ nani sanäni, sa'csi yätxtiil̄ga rebixhojz̄tis rajwni. ⁵ O ¿la gajdtu goł̄ lo reguijtz xten leii cadre caj xcuent rebixhojz̄, ä? Laareni riu'reni neñ reguidoo dxej ni rusilajz bejn̄, rujn̄reni xtzunreni niluxh xhet dojl̄di rujn̄reni. ⁶ Narä rniä lojtu, ree suga' tej nani sajcro loj guidoo. ⁷ Paru niacbeetu xhi säloj dee: “Yäl̄rulaslajz rlazä, xhet yäl̄rejtdi

guidxaa”, ditu nucuaquij redee ni xhet bejndi. ⁸ Sa'csi narä Xi'n Dios ni gujc Niguii rnibeä dxej ni rusilajz rebejn.

Niguii ni rxu'n naani
(Mr. 3:1-6; Lc. 6:6-11)

⁹ Che birii Jesús ro'c, biu'ni te xquidobäzreni. ¹⁰ Ro'c suga' te bejn ni gubijdz te naani. Luxh sa'csi caguiilreni xho gucuaquijreni Jesús, gusloj canabdiidxreni lojni, räjpreni:

—¿La rusaan leii gusiajcní beñracxhuu dxej ni rusilajz bejn, ä?

¹¹ Badzu' Jesús diidxre lojreni, räjpni:

—Chutejtu ni rajp te xiil niluxh palga guitejbni neñ bisie che gal dxej ni rusilajz bejn, ¿xhixh dini cuää xiilga neñ bisie, ä? ¹² Sacduxhru te bejn loj te xiil, ni'cni susaan leii gun bejn dzunsa'c dxej nani rusilajz bejn.

¹³ Dxejcti räjpni loj dade'ga:

—Baslii naalu.

Che basliinini, dxejc biajc naani, gujcní tebloj si'c najc stelaad naani.

¹⁴ Dxejcti birii rebeñ guidoo ni laa farisee, bachagsa'zarení te bia'nrení diidx ju'trení Jesús.

Diidx ni guniireni xcuent Jesús

¹⁵ Che gucbee Jesús xhi xhigab cayujnreni, biriini ro'c. Xhidajl bejn sanajlní, dxejc basiajc Jesús guiraa rebeñracxhuu. ¹⁶ Dxejc räjpni lojreni:

—Na'cpac gäbrení chu najcni.

¹⁷ Si'c gujc te gusojb diidx ni gunii Isaías ni gunii xtidx Dios che räjpni:

¹⁸ Deeni najc xmosä nani aguleä, laani sanälazä, laani rbanälazä, sudedä sprit xtenä lojni te gusule'ni yälguxhtis xtenä lo guedxliuj.

¹⁹ Dini tilnä j bejn, dizani cuedxa';
rudza jiejni diajgni xse'ni lad nezyuj.

²⁰ Dini qui'ch nicla te nijt ni cabiejc,
dizani gusuii te duxiil ni cayujn guxh,
dxejli che gunni gaan guinibeení yälguxhtis.

²¹ Lajtisni sustioob lastoo rebeñ ni digac xpejn Israel.

Rucuaquijreni Jesús rajpni yälrnibee xten beñdxab
(Mr. 3:19-30; Lc. 11:14-23; 12:10)

²² Dxejcti biädnärení loj Jesús te bejn ni di fii, dizani guinii, yu' te beñdxab lastooni. Dxejcti basiajc Jesúsni, te gujc guniini, te gujca bahuiini. ²³ Guiraa rebejn bidxelojreni, räjpreni:

—¿Xhaa laa Xi'n toDavidni, ä?

²⁴ Che biejn diajg rebeñ guidoo ni laa farisee rediidxga, räjpreni:

—Bejnre rbää rebeñdxab con yälrnibee xten Beelzebú ni rnibee loj rebeñdxab.

²⁵ Che gucbee Jesús xhi xhigab cayujnreni, dxejc räjpni:

—Guiraa yälrnibee nani rlia' sa'ni sinitloj; te guedxro sigajc te famil nani rlia' sa'reni, nani ridilnä j sa'reni, sinitlojreni. ²⁶ Sigajcza palga beñdxab rbää sabendxabni, silia' sa'reni, dxejc ¿xho gac chanuu xcälrnibeerení? ²⁷ Palga narä rbää rebeñdxab con yälrnibee xten Beelzebú, ¿chu xcälrnibee rajc rbää rexpejntu beñdxab, ä? Ni'cni lagajc laarení suluiireni xhet laadi rujntu xhigab. ²⁸ Palga narä rbää rebeñdxab con Xprijt xten Dios, guliipacni abidzujn xcälrnibee Dios lojtu.

²⁹ 'Bahulaare. ¿Xho gac jiu' te bejn cuan roliiz te beñdaan, xho gac cuanni xhixten bejn ga, palga dini gulibxgaani beñdaanga? Che abilib bejn ga, sajc cuanni rexhixten bejn ga.

³⁰ 'Nani xhet yu'di xladä, rdxe'chni loä. Nani di jiädnajl narä, rutie'chni reni siädnajl narä.

³¹ 'Ni'cni rniä guira'ti dojl, guira'ti yälrusguee xte bejn sajc gusiäjł lajzni xtebtis yälrniyaj Sprit Dxiän xten Dios di Dios gusiäjł lajzni. ³² Chutis ni guinii xhi te diidx yälrniyaj Xi'n Dios ni gujc Niguii sajc gusiäjł lajzni, luxh chutis ni guiniyaj Sprit Dxiän xten Dios, di Dios gusiäjł lajzni, nicla lo guedxliujre, niclaza xhaguibaa.

Sajc gumbeetu bejn xcuent diidx ni rniireni
(Lc. 6:43-45)

³³ 'Palga nasa'c te yajg sicaj ninexhsa'c lojni, per che di yajg gac yagsa'c, xho xcaj ninexhsa'c lojni. Ni'cni huenliisi siembeetu te yajg che fiitu xho najc ninejxh ni rcaj lojni. ³⁴ Sa' la'tu beņguijdx ni najc si'c te bäl niälasduxh, ¿xho gac guiniitu te didxsa'c?, ni ro' bejn rniitis rexhigab ni yu' neņ lastoo bejn. ³⁵ Te beņasa'c rniini didxsa'c, sa'csi ganax xhigabsa'c yu' neņ lastooni, te beņguijdx rniitisni cosguijdx sa'csi ganax xhigabguijdx yu' neņ lastooni. ³⁶ Narä rniäza, guiraa redixguijdx nani rni bejn sudeedreni cuent lo Dios cheni gunni yälguxhtis, ³⁷ sa'csi lagajc rextiidxlu sujn guinii Dios najclu beņasa'c, lagajc rextiidxlu sujn gunijtlu lo Dios.

Rebeņguijdx rniab te milagwr si'c te seen
(Mr. 8:12; Lc. 11:29-32)

³⁸ Dxejcti rebejn ni ruluu xleii toMoisés näjza rebeņ guidoo ni laa farisee, räjpreni loj Jesús:

—Mastr, nuurnu rlanjnu guihuiinu te seen; bejn te milagwr te fiinuni.

³⁹ Badzu' Jesús diidxre, räjpni:

—Rebeņguijdx ni rusguee rniab te seen, niluxh xhetru seendi fiireni xseen-tis Jonás, dade' ni gunii xtidx Dios. ⁴⁰ Sa'csi lagajc si'cni guyu' Jonás xque' te bälro choņ dxej, choņ yääl, si'cza chu Xi'n Dios ni gujc Niguii neņ lastoo guedxliuj choņ dxej, choņza yääl. ⁴¹ Cheni gac yälguxhtis xten Dios pet sistie rebejn ni siääd Nínive te fiireni gac yälguxhtis rebejn ni tre' lo guedxliuj naj, niluxh säjb rebejn Nínive abanijt rebejnre sa'csi rebeņ Nínive basiejch lajzreni, bia xtojłreni che basule' Jonás xtidx Dios lojreni. Luxh nani yu' lojtu naj, sacduxhruni loj Jonás. ⁴² Näjza reiņ xten rebeņ sur sistieni te fiini gac yälguxhtis rebejn ni tre' lo guedxliujre naj, niluxh näjzani säjbni abanijtreni. Sa'csi laani zitduxh biriini te biädcuadiajgni reyälnajn xten Salomón, luxh nani yu' lojtu naj nanduxhruni loj Salomón.

Te spritdxuudx ni rbisac
(Lc. 11:24-26)

⁴³ Räjpzani:

—Cheni ri te spritdxab neņ lastoo te bejn, ricanzajni nez lo reyubijdz, ritiilni cadro gusilajzni, per cad rdxäldini. ⁴⁴ Dxejcti rujnni xhigab, naani, guibisacä cadro biriä. Cheni rbisacni ro'c, rdzujņni si'c rdzujņ te bejn neņ te yu' ni naya neņni, naliobsa'cni, sucheeni, luxh rut rbäjzdi ro'c. ⁴⁵ Dxejcti rijni, rixiini sgajdz sprit nani najc nadxuudxru lojni te jiädläznäjrenini neņ lastoo bejnga. Dxejcti rxhinduxhru bejnga lojni gujčni galoo. Sigajcza gac rebejn ni tre' lo guedxliujre naj.

Xnan Jesús con rebejtzni
(Mr. 3:31-35; Lc. 8:19-21)

⁴⁶ Lał ni caninäjni rebejn, bidzujņ xnanni con rebejtzni, suga'reni rolä' rlanjreni guiniireni lojni. ⁴⁷ Dxejcti biääd tej ni räjp loj Jesús:

—Xnanlu näjza rebejtzlu suga' rolä' rlanjreni guininäjreni luj.

⁴⁸ Laani badzu'ni diidx lo bejnga räjpni:

—¿Chuni'c najc xnanä? ¿Chuni'c najc rebetzä?

⁴⁹ Dxejcti basgaani ñaani nez loj rexpejn pacni, räjpni:

—¿Redee najc xnanä redeeza najc rebetzä! ⁵⁰ Chutis nani rujn si'cni rnibee Xtadä ni yu' xhaguibaa ni'c najc betzä, ni'c najc bisianä, ni'c za najc xnanä.

13

Xcuent bejn nani rbe'c binij

(Mr. 4:1-9; Lc. 8:4-8)

¹ Lagajc dxejga birii Jesús royu'ga, huicueni nez ro' nisdoo. ² Xhidalduxh bejn bire' cadre suga'ni, sas biu'ni neñ te barcw, ro'c gurejni. Dxejcti rebejn gurej nez lo plaii. ³ Dxejc gusloj cagului Jesús con recuent, räjpni:

—Colcuadiajg. Birii te dade' ni rbe'c binij te cue'cni binij. ⁴ Lañ ni cabe'cni binij yu' binij ni bitejb gajxh nez ro' nesuij, biääd remane' ni rutajt, sas gudajwreni binijga. ⁵ Yu' binij ni bitejb nez neñ reguij cadre guxii yu' yuj. Gulengajc binijga sa'csi direni nibej jiät neñ yuj. ⁶ Che birii gubijdx, bigolreni sa'csi xhetiza xlobaani, dxejc gubijdzni. ⁷ Yu'za binij ni bitejb neñ reguejch. Che guroob reguejchga, dini nusaan niroob regäjle', gubijdzireni. ⁸ Guyu' binij ni gurej lo reyusa'c, ro'c gucduxhni. Yu' binij cuaj te gayuu, yu'za binij cuaj gayojñni, yu'za ni cuaj galbitzuuni loj cade tej binij ni gurej. ⁹ Nani rsobdiajg diidx gucuadiajgni diidxre.

Xhi pajr najc recuent xten Jesús

(Mr. 4:10-12; Lc. 8:9-10)

¹⁰ Dxejcti gubig rexpejn pacni, gunabdiidx lojni, räjpreni:

—¿Xhicuent rusule'lu diidx loj rebejn con recuent?

¹¹ Dxejcti badzu' Jesús diidx rajpni lojreni:

—Sacnäj Dios la'tu te gacbeetu recos xhiga'tz xten xcälrnibee Dios xhaguibaa, luxh laareni digacdi gacbeerenini. ¹² Chutis ni arajp yälracbee, sica'runi te gapruni yälracbee. Sas nani guxii rajp yälracbee, guiraa yälracbee ni rajpni sibicaj. ¹³ Ni'cni rniä lojreni con recuent sa'csi mase cadxelojreni, direni fii, mase cacuadiajgreni di diajgreni jiejn, xhet racbeedireni. ¹⁴ Laareni najczeni si'c te soob diidx ni gunii Isaías, dade' ni gunii xtidx Dios, che räjpni: Siejn diajgpactu, niluxh xhetliidi gacbeetu, sidxelojactu, niluxh ditu fii.

¹⁵ Sa'csi gualajz rebejnre, lastooreni najc si'c te guij, di diajgreni jiejn,

luxh niäüza balojreni, didi fisa'creni con balojreni,

didi jiejnza diajgreni, didi gacbeeza lastooreni,

didi gusiejch lajzreni guibi'reni loä te gusiaca lastooreni.

¹⁶ 'La'tu colguibalaznäj balojtu sa'csi rhuisa'ctu, riensa'cza diajgtu.

¹⁷ Rniliäpac, xhidajl redade' ni gunii xtidx Dios, näjza xhidajl beñsa'c rladuxh nuhuii sa' recos ni cahuiitu, luxh direni nuhuiini, rlanjzreni niejn diajgreni sa' rediidx nani cayejn diajgtu, luxh di diajgreni niejnni.

Rusule' Jesús xcuent bejn ni rbe'c binij

(Mr. 4:13-20; Lc. 8:11-15)

¹⁸ Colcuadiajg xhi säloj xcuent bejn nani rbe'c binij. ¹⁹ Rebejn nani rucuadiajg diidx xten xcälrnibee Dios, niluxh direni gacbeeni, najczeni si'c najc binij nani bitejb nez ro' nesuyj; riääd bendxab rudzucajni rediidx nani biu' neñ lastooni. ²⁰ Rebinij nani bitejb nez neñ reguij, najc si'c rebejn nani rucuadiajg diidx, gustli rca'reni diidxga, ²¹ luxh guxii yu' xlobaani, direni sutijp. Che

rdjedreni trabajw, che rdxe'ch bejn lojreni, sa'csi rucuardiajgreni xtidx Dios, rusiejch lajzreni, rbälazni diidxga. ²² Rebinij nani gurej neñ reyaguejch säloj rebejn nani rucuardiajg rextidx Dios rujnrureni te gunreni dzuun te ga'preni yälhasa'c ni yu' lo guedxliujre. Dxejcti rexcälhasa'c xten guedxliujre rusgueereni. Guiraa recosre rutau lo xtidx Dios neñ lastoo rebejnre, dini gusaan gac te cosechsa'c neñ lastoo rebejnre. ²³ Dxejc rebinij nani rtejb lo reyusa'c, ni'c najc si'c rebejn nani rucuardiajg xtidx Dios, nani racbee diidxga, nani rutie'ru sa'reni te racxhidajlreni. Yu' bejn ni najc si'c binij ni gujc te gayuu; yu' bejn ni najc si'c binij ni gujc gayojn; yu'za bejn ni najc si'c binij ni gujc galbitzoo.

Xcuent triuu cadre guyu' cuanguejch

²⁴ Dxejc bij Jesús stee cuent, räjpni:

—Xcälrnibee Dios xhaguibaa najc si'c te bejn nani gule'c ganax triusa'c lo xyujni. ²⁵ Lal nagaguejs bejnga, biäd te bejn nani rdxe'ch lajz loj xpaxhuaan binijga, biädle'cni bedz cuanguejch lo xtriuu bejnga, dxejcti sääni. ²⁶ Cheni gulejn triuuga, birii doj lojni, dxejc biricaj näjza cuanguejch ro'c. ²⁷ Dxejcti räjp remos lo xlamreni; “Dad, ¿la et ganax triusa'c di gule'clu, ä? ¿Caxh bazaj cuanguejchre?” ²⁸ Räjp xlamreni: “Te bejn ni rdxechlajz loä biädle'cchani.” Dxejcti gunabdiidx rexmosni räjpreni: “¿La rlajz guejblu cholädxanu recuanguejchga, ä?” ²⁹ Dxejc räjp xlamreni: “Na'c, sa'csi che guiliädxtu cuanguejchga, nägajcza triuu guiliädxtu. ³⁰ Colsaan tioobreni tebloj. Che guire' cose'ch, dxejc guinibeä remos gutiexgaareni cuanguejch, guliibrenini gacni ters, dxejcti checni. Dxejcti saj gutie'reni triuu chucheeni neñ yu'.”

Xcuent bedz muxhtas

(Mr. 4:30-32; Lc. 13:18-19)

³¹ Bijza Jesús stee cuent räjpni:

—Xcälrnibee Dios xhaguibaa najcni si'c te bedz muxhtas nani cue'c te bejn lo xyujni. ³² Gulii bejdzga najc bäze'ru loj guiraa rebejdz, per che roob yajgga, rajcni guroobru loj guiralii recuaan, rajcni te yagro, luxh riäd remane' ni rutajt riädujxn xpitiääzreni lo xajcw yajgga.

Xcuent levaduur

(Lc. 13:20-21)

³³ Bijzani stee cuentre, räjpni:

—Xcälrnibee Dios xhaguibaa najc si'c levaduur nani rugu'ch te gunaa lo chon mediid arin, dxejc ni'c rusaguijni guideb cojbga.

Xhicuent baluii Jesús ganaxtis con cuent

(Mr. 4:33-34)

³⁴ Baluii Jesús guiraa rebejn ganaxtis con recuent, xhetiru stee mood nuluiini, ganaxtis con cuent guniini lojreni. ³⁵ Si'c bejn te guzojb xtidx dade' ni gunii xtidx Dios che bacuaani lo reguijtz, räjpni:

Suiyä diidx con recuent,

suiyä diidx xcuent recos ni naga'tz che bencheeli Dios guedxliuj.

Rusule' Jesús xcuent cuanguejch neñ triuu

³⁶ Dxejcti basadiidx Jesús rebejn, biu'tini neñ yu' cadre bire' rexpejn pacni lojni, räjpreni lojni:

—Basule' loonu xcuent cuanguejch ni guyu' loniaa.

³⁷ Räjp Jesús lojreni:

—Bejn nani rbe'c retriusa'c, najc Xi'n Dios ni gujc Niguui; ³⁸ loniaaga najc guedxliuj; retriusa'c najc rebejn nani najc xpejn Dios, nani rucuardiajg

xtiidxni; recuanguiejchga najc rebejn ni najc xpejn bendxab. ³⁹ Bejn nani rdxe'ch lajz najc lagajc bendxab. Cose'ch säloj che nitloj guedxliuj; reni gutie' cose'ch najc rexangl Dios. ⁴⁰ Sigacni guire' recuanguiejch te chääni lo guiboo te checni, sigajcza gac che gac fis guedxliuj. ⁴¹ Xi'n Dios ni gujc Niguii suxhal rexangl ni te jäädgutie'reni, te jäädlääreni lo xcälrnibeeni guiraa renani rujn riajb bejn nen dojl, näjza reni rujn cosguijdx. ⁴² Susälreni rebejnga nen te or cadro cayecduxh. Ro'c sonduxhreni, sauya'reni läijyreni. ⁴³ Dxejcti rebensa'c sidimbicha'reni si'c gubijdx lo xcälrnibee Xtradreni. Palga sobdiajgtu, colgucuadiagsa'c.

Te cossacduxh ni naga'tz

⁴⁴ Räj pzani:

—Si'cza xcälrnibee Dios xhaguibaa najc si'c te cossacduxh ni naga'tz lo te yuj loniaa. Bidxäl te dade'ni, luxh bacuatzsacnini. Dxejcti rbalajzni, huijni, huito'ni guiraa xhixtenni te rajpni meel siini yujga.

Perl nani sacduxh

⁴⁵ Räj pzani:

—Xcälrnibee Dios xhaguibaa najcza si'c najc te dad rapduxh nani caguuil perlsa'c te siini. ⁴⁶ Che bidxäl ni te perlsa'c, tejni sacduxh, bato'ni guiraa xhixtenni te gusiini perlga.

Guijxh ni rniaaz bäjl

⁴⁷ Räj pzani:

—Xcälrnibee Dios xhaguibaa najcza si'c te guijxh ni rusäl bejn lo nis te rniaazreni guiraloj cuaa bäjl. ⁴⁸ Cheni agudxajni, rbäärenini nez ro' nisdoo, te ro'c rbereni loj rebäjl. Rebäjl ni najc hueen rucheeni nen te dxijm; nani di gac hueen rusälrenini te laad. ⁴⁹ Si'cza gac che gac fis guedxliuj; sirii rexangl Dios te sudzucajreni rebenjuijdx lo rebensa'c. ⁵⁰ Dxejcti susälreni rebenjuijdx nen te or cadro cayecduxh; ro'c sonduxhreni, sauya'reni läijyreni.

Te ben rajp

⁵¹ Dxejcti gunabdiidx Jesús lojreni, räjpni:

—¿La racbeetu guiraa ni cania lojtu, ä?

Dxejcti räjpreni:

—O', racbeenuni Dad.

⁵² Dxejcti räjpni lojreni:

—Cheni rsieed te bejn nani najn leii xcuent yälrnibee xten Dios xhaguibaa, najcni si'c te lam nani rajc rbää lo rexcälhasa'cni recos ni nacoob, näjza recos bieju.

Jesús lo guedx Nazare't

(Mr. 6:1-6; Lc. 4:16-30)

⁵³ Che gulujx basule'ni recuentre, biriini ro'c, sääni. ⁵⁴ Huijni lagajc lajdxni. Ro'c gosloj caguluiini nen xquidobäzreni ro'c. Dxejcti rdxeloduxh reben ro'c, räjpreni:

—¿Caro bisieedni reyäl najnre? ¿Xho rajc rujnni remilagwr? ⁵⁵ ¿La et laadi dee ni najc xi'n carpinteer, ä? ¿La et Mariidi najc xnanni? Dee ni najc bejtz Jacob, José, Simón con Judas. ⁵⁶ Luxh rebisiajn ni rbäjzreni lo guejdxre. ¿Cacharo bisieedni guiraa nani caguluiini?

⁵⁷ Dxejcti cayujnreni xhigab chugan la guliini, dxejc räjp Jesús lojreni:

—Guiraa rebejn rinälajz te niguii nani rnii xtidx Dios, biädla reben lajdxpacni direni jiu xtiidxni.

⁵⁸ Ni'c dini niujn xhidal milagwr ro'c sa'csi direni chalilajz xtiidxni.

14

Che gujt Juan Bautist (Mr. 6:14-29; Lc. 9:7-9)

¹ Lagajc neñ redxejga Herodes, ni laaza tetarcarca, biejn diajgni diidx xcuent ni cayujn Jesús. ² Dxejc räjpni lo rexmosni:

—Dee najc Juan Bautist. Pet agubañsacni lo rebeñgut, ni'cni rajpni yälñibee te rujnni remilagwr.

³ Si'c gunii Herodes sa'csi laani basäuuni Juan neñ latzguiib. Niluxh gunibeeni biliibni con caden neñ latzguiib xcuent Herodías, ni gujc chääl bejtzni Felipe. ⁴ Bidxe'chni sa'csi räjp Juan lo Herodes:

—Et laadi rujnlu rbäznäjlu chääl bejtzlu.

⁵ Rlajz Herodes nugu'tni Juan, luxh rdxejbni rebeñguejdx, sa'csi guiraareni rniireni Juan najc te niguii ni rnii xtidx Dios. ⁶ Dxejc che gojl laj Herodes gujc lanij, birii xindxa'p Herodías te baya'ni nez loj regolnejdx. Luxh sa'csi bidxaglazduxh Herodes baya'ni, ⁷ räjpni loj gunaaga:

—Gunab xhitis ni rlajzlu, sa'csi gudix lazä gunidxä ni guiniabtislu.

⁸ Dxejcti gunaaga, abalijdx xnannini, räjpni lo Herodes:

—Loj te platón baniidx bitiyuejc Juan Bautist.

⁹ Diidxga benhuin lastoo rei Herodes, per sa'csi abia'n diidx, niluxh abiejn diajg rebejn, gunibeeni gudeedreni nani guiniab gunaaga. ¹⁰ Dxejcti gunibeeni biru' yejc Juan Bautist neñ latzguiib. ¹¹ Sas biädnäreni yejcti lo te platón, badeedrenini loj gunaaga. Dxejcti gunaaga badeednini lo xnanni.

¹² Dxejcti bidzujñ rexpejn Juan sanäreni togoolga te huicua'tzrenini. Dxejru huisa'nreni diidx loj Jesús.

Bayaan Jesús gaii miñ bejn (Mr. 6:30-44; Lc. 9:10-17; Jn. 6:1-14)

¹³ Che biejn diajg Jesús xhi guzajc Juan, xtebni huä'pni neñ te barcw huijni stee laad nez lo reyubijdz. Che gucbee rebejn caro sääni, huinajlreni Jesús lo yuj. Guiraa neñ reguejdxga biriireni. ¹⁴ Che birii Jesús neñ barcw, bahuiini loj xhidalduxh bejn, dxejc balazlajznireni, basiajcti rebejn nani racxhuu.

¹⁵ Cheni acayu' guxhijñ, gubig rexpejñpacni lojni räjpreni:

—Rut rbäjzdi nez lo reyubijdzre, niluxh agudxej naj. Basadiidx rebejn te jiireni nez rerench te chasiireni xhi gaureni.

¹⁶ Räjp Jesús:

—Xhicuent jiireni. La'tu colgudeed xhi gaureni.

¹⁷ Dxejcti räjpreni:

—Xhetru rajpdinu ree. Gaiitis yätxtiil näjza tio'p bäjñ rajpnu.

¹⁸ Laani räjpni:

—Coltanäni ree.

¹⁹ Dxejcti gunibeeni gurej rebejn lo guixa'. Dxejcti cua'ni guigaii yätxtiil näjza guiro'p bäjñ, guläsni lojni xhaguibaa, badeedni xquixhtios lo Dios, dxejcti gula'ni reyätxtiil. Badeednini loj rexpejñpacni. Dxejcti rexpejñpacni gudisrenini loj rebeñ xhidajl. ²⁰ Guiraareni gudajw, gudxaj xque'reni. Dxejcti batie'reni yätxtiilbiujy nani bia'n. Si'cti tzubitio'p dxijñ gudxajni.

²¹ Renani gudajw najcreni si'cti gaii miñ niguii, xhet näjdi regunaa niclaza rebiuux bigab.

Gusaj Jesús lo nisdoo (Mr. 6:45-52; Jn. 6:16-21)

²² Sas gunibee Jesús biu' rexpejñpacni neñ barcw te ganidreni tedreni stee lad nis lañni casadiidxni rebejn. ²³ Che gulujx basadiidxni rebejn, huä'p Jesús

yecdajn te xtebni guninäjni Dios Xtadni. Che gojl guxhijn, ro'c sugaxteb Jesús.
²⁴ Luxh barcw galäi lo nis sasaj. Cagusnibduxh reol barcw, liriääzni lo nis sa'csi cabi' beduxh cadro sääreni. ²⁵ Rsildooru gubig Jesús, bidzujñni lojreni, siädsajni lo nisdoo. ²⁶ Che bahuii rexpejn pacni siädsajni lo nisdoo, bidxejbreni, räjpreni:

—Colhuii te fantasmni —guredxa'reni sa'csi bidxebduxhreni.

²⁷ Dxejc gunii Jesús lojreni, räjpni:

—Na'c guidxejbtu, laa naräni; colsutijp lastootu.

²⁸ Dxejcti gunii Pedr lojni, räjpni:

—Dad, palga lujni, gunibee jäälä lojlu nez lo nisre.

²⁹ Räjp Jesús:

—Gudaa pues.

Dxejcti birii Pedr neñ barcw gusajni lo nis te sääni nez loj Jesús. ³⁰ Che bahuii Pedr beduxh ni cabi', bidxejbni, dxejc gusloj cayääzni neñ nisdoo. Guredxa'ni, räjpni:

—Dad, jgulää narä!

³¹ Lagajc dxejc gunaaz Jesús naani, räjpni loj Pedr:

—Guxii rajplu yälirilajz. ¿Xhicuent guctio'p lajzlu?

³² Che huä'preni neñ barcw, guläzgjajc bej. ³³ Dxejcti renani sää neñ barcw bazuxhijbreni nez loj Jesús räjpreni:

—Guliipacni najclu Xi'n Dios.

Basiajc Jesús reben racxhuu guedx Genesare't

(Mr. 6:53-56)

³⁴ Che gudejdreni lo nis, bidzujñreni nez lo reyuj xten Genesare't. ³⁵ Che biembee reben ro'cni, batie'chreni diidx guideb gabi lajdxreni. Dxejcti biädnäreni guiraa reben racxhuu lojni. ³⁶ Gunabduxhreni gusaanni canreni ro' xhajbtisni. Dxejcti guiraa renani gudajn xhajbni, biajcreni.

15

Nani ruxhiñ bejn

(Mr. 7:1-23)

¹ Dxejcti gubig gaii rebejn nani ruluii leii näjza rebejn guidoo ni laa farisee. Siäädreni guedx Jerusalén, räjpreni loj Jesús:

² —¿Xhicuent di rexpejn pacnu jiu xcostrumbr reben gool? ¿Xhicuent direni gusoob yälrdiib naareni che rajwreni?

³ Badzu'ni diidx, räjpni:

—¿Xhicuent di la'tu gusoobzatu xtidx Dios? Dee alga riurutu rexcostumbrtu. ⁴ Dios gunibeeni xho guntu che räjpni: “Gojp xpala'n xtadlu, xnanlu”, näjza “Nani guiniyaj lo xtadni o loj xnanni, suguetni.”

⁵ Luxh la'tu rniitu sajg gäb chutis bejn loj xtadni o loj xnanni: “Digacdi gacnäätu sa'csi guiraa ni rapä abadedäni lo Dios.” ⁶ Luxh chutis ni guinii si'c, xhetru nanabdi gacnäjni xtadni o xnani. Si'c ni cabälaztu rextidx Dios te gac chanuutu rexcostumbrtu.

⁷ jBejn ni rusguee najctu! Laaca gunii Isaías, bejn nani gunii xtidx Dios xcuenttu cheni räjpni:

⁸ Reben guejdxre con ro'reni rliä'preni xpala'nä niluxh lastooreni zijt suga' nez loä.

⁹ Xlia'si rajñreni narä, sa'csi ruluiireni si'c xtidxä reyälrnibee xten reben guedxliuj.

¹⁰ Dxejcti gurejdxni rebejn, räjpni lojreni:

—Colcuadiajg, colyacbee. ¹¹ Nani riu' ro' bejn di guxhiñ bejn ga, sanga nani rii ro' bejn ga ni'cni ruxhiñ bejn ga.

¹² Dxejcti rexpejn_{pacni} gubig lojni, räjpreni:

—¿La najnlu bidxe'ch rebejn_{farisee} che biejn diajgreni diidx ni guniilu?

¹³ Dxejc laani räjpni:

—Xhitis yajg nani di Xtadä ni yu' xhaguibaa nusuj siliädx_{'ni} guideb xlobaani. ¹⁴ Colgusaanreni; lotiä'preni, ruluiireni nezyuj lo salotiä'preni. Luxh palga te beñ lotiä'p guluii canejz chää stee lotiä'p, guiro'preni sitejbreni neñ te gueed.

¹⁵ Räjp Pedr loj Jesús:

—Basule' cuentre loonu.

¹⁶ Räjp Jesús:

—¿La näjza la'tu ditu gacbee, ä? ¹⁷ ¿La ditu gacbee guiraa ni rajw bejn ru' xque'ni, dxejcti che rdejdn_i xque'ni, abigo'n_{ni}? ¹⁸ Niluxh diidx nani rii ro' bejn, neñ lastoo bejn riini; dee ni ruxhiñ bejn. ¹⁹ Sa'csi neñ lastoo bejn rii rexhigabguijdx xten rebejn ni rugu't sa'ni; xten rebejn ni rusguee gunaa; xten rebejn ni rusguee chää_l sa'ni; xten rebejn ni rbajn; xten rebejn ni rnii didxxhii lo sa'ni; xtenza rebejn ni rutijl sa'ni. ²⁰ Laa sa' recosre ni ruxhiñ bejn. Che dini gusoob recostumbr xte yälrdiib naani, di ni'c guxhiñ bejn.

Te gunazit nani huililajz xtidx Jesús

(Mr. 7:24-30)

²¹ Biriiti Jesús ro'c, sääni nez región xten Tiro näjza Sidón. ²² Nejjza rbäjz te gunaa cananee, cabedxa'ni biäädni lo Jesús, räjpni:

—Dad, xi'n toDavid, balaslajz narä. Xindxa'pä yu' xpej beñdxab lastooni, niluxh cagusacsíduxhnini.

²³ Xhet räjpdi Jesús lojni. Dxejcti biädnduxh rexpejn_{pacni} lojni, räjpreni:

—Barilaagw gunaare, didi rbedxa'ni siädna_lni luj.

²⁴ Dxejcti räjp Jesús lojni:

—Dios baxhal narä lojtis xpen Israel nani agunijt neñ dojl.

²⁵ Dxejcti gubig gunaaga, bazuxhijbni nez loj Jesús, räjpni:

—Dad, gucnäj narä.

²⁶ Dxejc räjp Jesús lojni:

—Di gac hueen xca' bejn xcuxtiil rexi'n_{ni} gusäl_{ni}ni lo rebä'cw.

²⁷ Dxejc räjp gunaaga lojni:

—Guliini Dad, näjza rebä'cw rajw te la' yätxtiil ni rtejb lo mex xten xpax-huaanni.

²⁸ Dxejcti räjp Jesús lojni:

—Nane', lacti guroob najc xcäl_rrililajzlu. Sugac si'cni rlajzlu.

Lagajc dxejc biajc xindxa'pni.

Basiajc Jesús xhidäl beñ racxhuu

²⁹ Birii Jesús ro'c gudejdn_i nez ro' nisdoo ni laa Galilee. Huäpgajcni yejc te dajn, ro'c gurejni. ³⁰ Xhidajl bejn bidzujñ cad sobga'ni. Siädnäreni reben ni rajc ni'ni, reben ni najc lotiä'p, reben gop, reben ni xheti naani, näjza xhidälro beñ racxhuu, bidzunäjrenini nez loj Jesús. Dxejcti basiajcnireni. ³¹ Ni'cni lacti bidxeloduxh reben xhidajlga che bahuiireni rnii regop, riajc reni xheti naani, rsiaj reni rajc ni'ni, ruhuu relotiä'p, dxejc rliä'preni xpala'n Xtios rexpen Israel.

Badeed Jesús xhi gudajw tajp mil bejn

(Mr. 8:1-10)

³² Gurejdx Jesús rexpejn_{pacni} räjpni lojreni:

—Riaä rebejn_{re} sa'csi agujc choñ dxej yunäjreni narä luxh xhet ca'direni gaureni. Di rlazä guxhaläreni jiireni rolijzreni palga gajdreni gau didi guidxajgreni lo nezyuj.

³³ Dxejcti räjp rexpejn_{pacni} lojni:
—¿Xho guidxälnu xhi gau reben_ñ xhidajlre nez lo reyubijzre cadro rut rbäjzdi, ä?

³⁴ Räjp Jesús lojreni:

—¿Bal yätxtiil ca'tu?

Räjpreni:

—Gajdztisni, näjza gaii bälbäze'.

³⁵ Sas gunibee Jesús cue rebejn_ñ lo yuj. ³⁶ Dxejc cua' Jesús guigajdz yätxtiilga näjza rebäj_l, badeedni xquixtios lo Dios dxejc gula'ni reyätxtiilga näjza rebäj_lga badeednireni loj rexpejn_{pacni}. Dxejcti laareni gudisreni yätxtiilga con rebäj_lga lo rebejn_ñ xhidaj_lga. ³⁷ Guiraareni gudajw, gudxaj xque'reni. Che gulujx gudajwreni, batie'reni reyätxtiil ni bia'nga, gudxaj gajdz dxijm_{ni}. ³⁸ Renani gudajwga najc si'cti tajp m_l bejn, niluxh xhet näjdi regunaa niclaza rebiuux bigab. ³⁹ Dxejcti basadiidx Jesús rebejn, biu'tini neñ barcw te gudejdni lo nisdoo nez región xten Magdala.

16

Reben_ñ guidoo ni laa farisee näjza saducee rniabreni te milagwr si'c te seen
(Mr: 8:11-13; Lc. 12:54-56)

¹ Refarisee näjza resaducee bidzujn_{reni} lo Jesús, gunabreni gunni te milagwr, gudeedni te seen ni rien_ñ xhaguibaali. Niluxh cagusguesireni, sa'csi rlajzreni guiga' Jesús. ² Dxejc badzu' Jesús diidxre räjpni lojreni:

—Che rajl gudxej, rniitu: “Saru gac te dxej guixee sa'csi naxniaa xhaguibaa.” ³ Che rajl rsil rniitu: “Etlaadi gac te dxej nadxej sa'csi naxniaa xhaguibaa niluxh tre' za.” Xhoxh numbeetu xhi säloj reseñ ni rien_ñ xhaguibaa, luxh ditu gumbee xhi säloj reseñ xcuent redxejre, nalajznu recos ni cayajc.

⁴ Reben_ñ guijdxre, reben_ñ guyalajz rniab te senro, te milagwr, luxh dirureni fii stee milagwr; suhuiitisreni xsen Jonás.

Dxejcti basa'n Jesúsreni ro'c, sä'tini.

Levaduur xten refarisee

(Mr: 8:14-21)

⁵ Che gudejd rexpejn_{pacni} stelaad nisdoo biäl-lajzreni ninäreni yätxtiil.
⁶ Dxejcti räjp Jesús lojreni:

—Bacuadiajg, colnati levaduur xten refarisee näjza resaducee.

⁷ Dxejcti bejnreni xhigab neñ lastooreni: “Si'c caniini sa'csi dinu niopnä yätxtiil.” ⁸ Luxh gucbee Jesús xhigabga, dxejc räjpni lojreni:

—¿Xhicuent rujntu xhigab xhet yätxtiildi ca'tu, ä? ¡Huinuxh najc xcälirililajztu! ⁹ ¿La gajdtu gacbee? ¿La diza lajztu guinaj che gudisä gaii yätxtiil gudajw gaii m_l bejn, ä? ¿Bal dxijm_{ni} batie'tu, ä? ¹⁰ ¿La diza lajztu guizaj che gudisä gajdz yätxtiil gudajw tap m_l bejn, ä? ¿Bal dxijm_{ni} batie'tu? ¹¹ ¿Xhicuent ditu gacbee et yätxtiildi cagusä'tä cheni cania lojtu colnati levaduur xten refarisee näjza resaducee?

¹² Dxejcru gucbeerene dini niäjp: “Colnati levaduur xten yätxtiil.” Laani caniini: “Colnaati yälrlului xten refarisee näjza resaducee.”

Bicäjp Pedr Jesús najc Cristpac

(Mr: 8:27-30; Lc. 9:18-21)

¹³ Che bidzujn Jesús región xten Cesarea xten guedx Filipo, gunabdiidx Jesús loj rexpejn_{pacni}, räjpni:

—¿Chu naj rebejn_ñ nacä narä Xi'n Dios ni gujc Niguui?

¹⁴ Laareni räjpreni:

—Yu'reni naj luj najclu Juan Bautist; yu'zareni rnii luj najclu Elías, peta sgaiireni rnii luj najclu Jeremías o stee niguii ni rnii xtidx Dios.

¹⁵ Dxejcti räjpni lojreni:

—La'tu, ¿chuni'c rniitu nacä?

¹⁶ Dxejc räjp Simón Pedr:

—Luj najclu Crist, Xi'n Dios nani nabajn.

¹⁷ Badzu' Jesús diidxre, räjpni:

—Chicbaalu, Simón Pedr, xi'n Jonás, sa'csi xhet bejndi baluii dee lojlu, Xtradätis ni yu' xhaguibaa baluiinini lojlu. ¹⁸ Narä rniä lojlu, luj najclu Pedr, nani säloj: “Te guij.” Sa'csi sibäxtieju guidxagsa'za renani rililajz xtidxä, niluxh che guetreni, direni nitloj. ¹⁹ Narä gunidxä yälrnibee lojlu te gulijdxlu rebejn nani ahuiililajz xtidxä. Xhitis ni gusaanlu gunreni, o xhitis ni dilu gusaan gunreni, susoob Dios xtiidxlu.

²⁰ Dxejcti gunibee Jesús rutlojdi gäb rexpejnpacni laani najc Guejb Crist.

Gunii Jesús xho guetni

(Mr. 8:31–9:1; Lc. 9:22-27)

²¹ Lagajc dxejc gusloj cagusule' Jesús diidx lo rexpejnpacni, guniini lojreni xho nanabpac chääni guedx Jerusalén te ro'c tedni trabajwduxh ladznaa rebengool xten guidoo, ladznaa rebixhojz, näjza rebejn ni najn xleii Moisés. Guniizani sugu'trenini, niluxh ni riojn dxej sibansacni lo rebengut.

²² Dxejcti huinä Pedr Jesús te laad, gusloj cadilnäjnini, räjpni:

—¡Gacnäj Dioslu, Dad! ¡Gurniälojlu gaclu si'c!

²³ Dxejc gubiré Jesús, räjpni lo Pedr:

—¡Gubicaj loä beñdxab! Na'c rusiejytislu loä. Luj dilu gun xhigab xten Dios, alga xhigab xten rebenguedxliuj rujnlu.

²⁴ Dxejcti räjp Jesús loj rexpejnpacni:

—Palga yu' chu tejtü rlanj guirinajl narä, sucuälazni lagajc laani, suguuni xcrujzni, nalajznu tedni trabajw, sujiädnaajl ni narä. ²⁵ Sa'csi nani rlanj gunni gaan xcäl'nabajnni, sunijtnini. Luxh nani runijt xcäl'nabajnni por narä, sidxäl'ni xcäl'nabajnni par tejpas. ²⁶ Sa'csi ¿xhi gaan gun te bejn palga ga'pni guideb guedxliuj, luxh nit xaimni lo Dios, ä? o ¿la yu' xhi gudeed bejn te siini xaimni? ²⁷ Sa'csi narä Xi'n Dios ni gujc Niguii siälä lo yälrdimbicha' xten Xtradä con rexangl'ni, dxejcti siguixä tebgaj bejn si'ctis ni gujc xtzuunni. ²⁸ Rniliäpac lojtu, loj reni tre' ree naj, yu'reni di guet dxejli ni fixgaareni jiälä narä Xi'n Dios ni gujc Niguii lo xcäl'rnibeä.

17

Chuni'c najc guroob

(Mr. 9:2-13; Lc. 9:28-36)

¹ Che gudeed xho'p dxej, huinä Jesús Pedr, Jacobo, con Juan betz Jacobo, xtebreni huijreni jiaa yejc te dajn. ² Dxejcti nez lojreni bidxaa xho rujn lojni. Lojni gusloj rdimbicha' si'c gubijdx; xhajbni gujc nolbäj si'c te bajl. ³ Dxejc bahuigajcreni loj Moisés näjza loj Elías, cayujyreni diidx con Jesús. ⁴ Dxejcti räjp Pedr loj Jesús:

—Dad, ¡huenduxh suga'nu ree! Palga rlanjzlu, sajc jiennu choñ yuguijxh, tejni gac xten guejblu, steeni gac xten Moisés, steeni gac xten Elías.

⁵ Lał'ni canii Pedr, biäjt te za ni rdimbicha' guideb gabireni; neñ zaga biejn te xse' ni räjp:

—Dee najc xi'nä ni sanälazä, ruspaduxhni lazä, colcuadiajg xtiidxni.

⁶ Che biejn diajg rexpejn_{pac} Jesús diidxga, bazuxhijbreni, basajbreni lojreni lo yuj, bidxebduxhreni. ⁷ Dxejcti gubig Jesús lojreni, batzuubni naani yejcreni, räjpni:

—Colchasulii, na'c rdxejbtu.

⁸ Che guläs lojreni, lojtis Jesús bahuiireni, rutru suganäjdini.

⁹ Cheni sayäjtreni yejc dajnga, gunibee Jesús lojreni, räjpni:

—Rutlojdi gäbtu xhini'c bahuiitu dxejli ni guibaṣacä narä Xi'n Dios ni gujc Niguii lo rebeṅgut.

¹⁰ Dxejcti gunabdiidx rexpejn_{pac}ni lojni:

—¿Xhicuent rñii rebejn ni najn xleii Moisés ganid Elías nanab jääd, ä?

¹¹ Badzu' Jesús diidxre, räjpni:

—Guliini siädxgaa Elías, laani gunsa'cni guira'ti, ¹² niluxh narä rniä lojtu, abiääd Elías, di rebejn nienbeeni, luxh bennäjrenini si'ctis ni rla-jzreni, basacsíduxhrenini. Sigajcza gunnäjreni narä Xi'n Dios ni gujc Niguii, susacsíduxhreni narä.

¹³ Dxejcti gucbee rexpejn_{pac}ni caniini xcuent Juan Bautist.

Jesús basiajc te biuux ni guyu' xpej beṅdxab

(Mr. 9:14-29; Lc. 9:37-43)

¹⁴ Cheni bidzujṅreni cadre tre' xhidajl bejn, gubig te bejn lojni bazuxhijbni, dxejc räjpni:

¹⁵ —Dad, balaslajz xinä sa'csi laani cayacxhuuni, rajcni yälguidxbej, rusacsíduxh yälgujdxgani, yu' huält rtejbni lo guiboo yu' huält rtejbni lo nis.

¹⁶ Biädnäáni loj rexpejn_{pac}lu, luxh di niajcdi nusiajcrenini.

¹⁷ Jesús badzu' diidxre lojreni räjpni:

—Beṅguijdx, bejn ni di chalilajz, ¿gucli yu'ä lojtu? ¿Cati gac gunä huant la'tu? ¡Coltanä biuuxga ree!

¹⁸ Dxejcti gudilnäj Jesús beṅdxab ni yu' lastoo biuuxga, gunibeeni biriini, lagajc dxejc biajc biuuxga.

¹⁹ Dxejc guninäj rexpejn_{pac}ni Jesús te laad, gunabdiidxreni räjpreni:

—¿Xhicuent di niajcdi nibäanu beṅdxab neṅ lastoo biuuxga?

²⁰ Jesús räjp lojreni:

—Sa'csi la'tu guxiduxh rililajztu. Rniliä lojtu, paru najc yälrililajz xtentu si'cti te bejdz muxhtas, sajc gäbtu loj dajn rec: “Gubicaj ro'c, gudejd ste-laad”, luxh sibicaj dajnga. Palga rililajz_{pactu}, xhetliidi yu' ni di gacdi guntu. ²¹ Niluxh sa' beṅdxabre, dini guirii palga ditu guiniabduxh lo Dios, gucua'nzatu.

Jesús rusule' stehuält xho guetni

(Mr. 9:30-32; Lc. 9:43-45)

²² Lalni sasajreni nez región xten Galilee, räjp Jesús:

—Suteedreni narä Xi'n Dios ni gujc Niguii ladzṅaa rebeṅdojl te gusacsíreni narä. ²³ Niluxh sugu'treni narä, dxejc ni riojn dxej sibāṣacä lo rebeṅgut.

Che biejn diajgreni diidxga, guc-huinuxh lajzreni.

Gudijxni impuest xten guidoo

²⁴ Che bidzujṅ Jesús näjza rexpejn_{pac}ni guedx Capernaum, biääd rebejn ni rusquijx xcuent guidoo lo Pedr, gunabdiidxreni lojni, räjpreni:

—¿La di xmastrtu quiix impuest xten guidoo?

²⁵ Räjp Pedr:

—Rguijxnini.

Che biu' Pedr neṅ yu', ganid Jesús gunii lojni, räjpni:

—¿Xhi rchalolu, Simón? ¿Chuni'c rusquijx rebejn ni rnibee lo guedxliujre? ¿Chuni'c rguijx reimpuest, recuyo't? ¿Rebejn lajdxreni o rebenzijt?

²⁶ Badzu' Pedr diidxre räjpni:

—Rebenzijt.

Räjp Jesús:

—Ni'cni di rexi'nreni quiixni. ²⁷ Luxh te di guidxe'chreni, huij ro' nisdoo, bacuaa ansuel, gulää bäjł ni guiniazpgaalu. Ro' bäjłga sidxällu te melpla't ni sajl te chatijxlu impuest xcuentä näjza xcuentlu.

18

¿Chuni'c sajcru lajdx Dios xhaguibaa?

(Mr. 9:33-37; Lc. 9:46-48)

¹ Laa dxejcnı gubıg rexpejnpac Jesús lojni te gunabdiidxreni:

—¿Chuni'c sajcru lajdx Dios xhaguibaa?

² Dxejctı gurejdx Jesús te biuxböz, bazujnini nez galäiireni, ³ dxejc räjpni:

—Rniliäpac lojtu, palga ditu gusiechłajztu, palga ditu gac nadolajz si'c te biuxböz, ditu jiu' lajdx Dios xhaguibaa. ⁴ Ni'cni chutis bejn nani gac nadolajz si'c biuxe're, laani gac ni sajcru lajdx Dios xhaguibaa. ⁵ Chutis ni riu te sa' biuxe're, sa'csi rinälajzni narä, lagajc narä riuni.

Riezgw jiajbni nen dojl

(Mr. 9:42-48; Lc. 17:1-2)

⁶ Räjpszani:

—Chutis ni gudzucaj lo xnezyuä te sa' biuxe're ni ahuililajzni xtidxä, maazru huen niliib te guij xten molin dojb yejnı, chatejbni loj nisdoo, palga gunni jiajb tej reni'c lo dojl. ⁷ Proobza guedxliuj sa'csi yuduxh xhigabguijdx lojni. Sa'csi nanabpac chu xhigabguijdx. Gunatiro, bejn ni ruzobloj rexhigabguijdxre, ni rujn riajbza lo dojl reni rililajz xtidxä, ni najc si'c biuxe're.

⁸ Palga ni'lu o ñaalu gun jiajbłu lo dojl, batıu'ni. Hueenru jiu'lu lo xcälñabajñ Dios nıtiujnglu o ñatiujnglu lacuaa jiilu con guiro'p ni'lu o guiro'p ñaalu lo balduxh ni rejc par tejpas. ⁹ Palga te balojlu rujn riajbłu lo dojl, gulääni. Hueenru jiu'lu lo xcälrnıbee Dios najclu lotiä'p lacuaa chu guiro'p baloj chazälreni luj lo balduxh ni rejc par tejpas.

Xcuent xiil ni gunıjt

(Lc. 15:3-7)

¹⁰ Räjpsa Jesús lojreni:

—Colñatiro, andı cuälaztu rebejn ni najc si'c biuxbözre ni sasaj lo xnez Dios, sa'csi rexangl Dios ni cahuiireni, guiraatis dxej yu'reni loj Dios. ¹¹ Sa'csi Xi'n Dios ni gujc Nıguıı biääd te guslaani rebejn nani agunıjt nen dojl.

¹² Räjpszani:

—¿Xho rhuiitu? Palga rajp te bejn te gayuu xiil, dxejc nit tejni, ¿laa dini gusaan stabitzubıgaaga ni yu' nen gurajł te chatiilni xile' ni gunıjt, ä? ¹³ Luxh palga guidxälni xile'ga, rniliä lojtu, sibalazduxhrıni xcuent xile'ga luxh guxiıru guıbanäj lajzni xcuent rexiil nani di nıniıjt. ¹⁴ Sigajcza Xtadnu ni yu' xhaguibaa di rıajz nit lo Dios nicla tej reni ahuililajz xtiidxni, ni najc si'c biuxbözre.

Xho gunnäjlu bejtzlu

(Lc. 17:3)

¹⁵ Räjpszani:

—Palga gun bejtzlu te cosguıjdx lojlu, gunınäjni xtebtıslu, gojs lojni xhi dojl bejnıni lojlu. Palga saru gucuaıajgnı xtiıdxlu, abiäjł lajztu. ¹⁶ Palga naaddini

gucuadiajgni, dini jiu xtiidxlu, dxejc huinä stee o stio'p bejn chaninäjluni, te guiraa ni guiniitu jiejn diajg rebejnğa, te arajplu tio'p o choñ testiigw. ¹⁷ Palga di bejtzlu gucuadiajg xtidx rebejnğa, luxh dizani jiu xtiidxreni, neñ guidoo huile'c xquejlu loj rebejn ni ricuadiajg xtidx Dios. Palga dizani jiu rebeñ guidoo, sugacni nez lojlu si'c te beñguijdx ni di gumbec xtidx Dios o si'c rebejn nani rusquijx loj rebejn nani ruto'.

¹⁸ 'Ni'cni rniliäpac lojtu, guiraa yälguxhtis xten bejn ni di gusiechlajz xtojłreni ni guntu lo guedxliuj, si'c jia'nni xhaguibaa; guiraa redojl nani gusiäjł lajztu lo guedxliuj sa'csi basiechlajz beñdojłga, si'cza jia'nni xhaguibaa.

¹⁹ 'Sigajcza rniä lojtu, palga tio'ptu tejsi xhigab guntu xhini'c guiniabtu lo Dios, che guiniabtuni lo Dios, Xtadä ni yu' xhaguibaa suniidxni ni rniabtu lojni. ²⁰ Sa'csi cadrotis nadxagsa' tio'p o choñ bejn sa'csi rinälajzreni narä, anasuga'ä galäii rebejnğa.

²¹ Dxejcti gubig Pedr loj Jesús, gunabdiidxni:

—Dad, ¿palga gunijt betzä loä, bal huält nanab gusiäjł lazä? ¿La sajl gajdzli huält, ä?

²² Badzu' Jesús diidxre lojni räjpni:

—Dina guiniä gajdztis huält, rniä gayonbidzuu huält, nalajznu si'ctiza huält basiäjł lajzlu.

Xcuent tio'p bejn ni nazäb meel

²³ 'Xcälrnibee Dios xhaguibaa najc si'c te reii ni rlanj gunni cuent lac nazäb rexmosni lojni. ²⁴ Agusloj cayujnni xcuentni chela bidzunñajreni te mos ni nazäb balti mil lojni. ²⁵ Luxh mosre xhet rajpdini te quiixni rexti'nni, ni'c gunibee reii guido'ni si'c slav, näjza chäälni, näjza rexi'nni, nägajcza guirali xhixtenni, te gaxh xti'nni. ²⁶ Dxejcti mosga bazuxhijbni loj xlamni, gunabduxhni lojni, räjpni: “Guläzsijc tiop-choñ dxej, Dad, te gac quixä xti'nä.”

²⁷ Dxejcti lamga balazlajzni xmosni, badzucajni guiraa ni nazäb mosga lojni, baslaanini. ²⁸ Cheni birii mosga rolijz xlamni, bidxaagni stee samosni ni nazäb bale'si beex lojni. Gunaaznini, baxhiya'ni yejnni, dxejc räjpni: “Gudijxga ni nazääblu loä.” ²⁹ Dxejcti ste mosga bazuxhijbni lojni, räjpni: “Guläzsijc. Siguixäca guiraa ni nazäbä lojlu.” ³⁰ Luxh steega naaddini, alga huisäugacni samosni neñ latzguiib te bejnni gaan gudijxni guiraa ni nazäbni. ³¹ Cheni bahuii sgaii mos xhini'c bejnni, gucnaduxhlajzreni, huiye'tzreni lo xlamreni xhi huiyejnni. ³² Dxejcti gurejdx xlamreni mosga, räjpni lojni: “¡Mos guijdx! Narä badzucä di'n ni nazääblu loä, sa'csi gunabduxhlu loä. ³³ Si'cza niunnäjlu sa'lu, nulazlajzluni sigajc ni balazlazälu.” ³⁴ Sas lacti bidxechduxh lamga, gunibeeni biäuuni te gudijxni guiragajc ni nazäbni lo xlamni.

³⁵ Baluux Jesús cuentga, räjpni:

—Sigajcza gunnäj Xtadä ni yu' xhaguibaa guiraa rebejn ni di gusiälłajzpac guiraa redojl ni rujn resa'ni lojni.

19

Jesús ruluii xcuent yälrurō'n sa'ni (Mr. 10:1-12; Lc. 16:18)

¹ Che gulujx gunii Jesús recuente, biunejzni Galilee, huijni lo región xten Judea, stelaad gueu Jordán. ² Xhidajł bejn birinajłni, ro'c basiajcn rebenracxhuu, ³ dxejc gubig refarisee lojni, rlanjzreni gusguesireni Jesús ni'c räjpreni lojni:

—¿La sajc gurō'n te niguii chäälni che rlanjztisni, ä?

⁴ Badzu' Jesús diidxre lojreni, räjpni:

—¿La gajdtu goļ lo reguijtz nani bacuaa toMoisés cadre caj xho benchee Dios bejn galooli: “Niguii nājza gunaa bencheenireni”? ⁵ Guniiza Moisés: “Ni'cni gusaan niguii xtadni con xnanni te xca'ni chäälni, dxejc dirureni gac tio'p, tejtis bejn najcreni.” ⁶ Ni'cni dirureni gac tio'p, anajcreni tejtis bejn, digacdi guilia' rebejn lo sa'ni nani abachagsa' Dios lo sa'ni.

⁷ Dxejcti gunabdiidxreni lojni, rājpreni:

—¿Xhicuent gunibee Moisés gudeed niguii te guijtz lo chäälni te si'c gac guro'nni gunaaga, ä?

⁸ Rāj Jesús lojreni:

—Sa'csi najc lastootu si'c te guij, ni'c basaan toMoisés baro'n niguii chäälni, niluxh galodoo et si'cti gujcnī. ⁹ Luxh rniä lojtu, niguii nani gusaan chäälni, luxh xhet dojlđi bennāj chäälni stee niguii, dxejcti guchnaani ste'ca gunaa, rujnni dojl. Sigajcza niguii ni guchnaa gunaaga ni abaro'n chäälnini, rujnza niguiiga dojl.

¹⁰ Dxejc rāj rexpejn pacni lojni:

—Palga si'c najc xcuent niguii con chäälni, hueenru na'c guchnaani.

¹¹ Jesús rāj lojreni:

—Xhet guiraadi bejn rajc gacbee rediidxre, rebejntis ni rudeed Dios te xcäriensa'c ni'ctis racbee. ¹² Yu' xhicuent digacdi guchnaa niguii: yu'reni digacdi guchnaa sa'csi si'c gojłreni; yu'reni digacdi guchnaa sa'csi baxhin sabejnreni; yu'zareni digacdi guchnaareni sa'csi rlajzreni gunreni xtzuuntis Dios. Nani rajc racbeeni rediidxre, sugacbeenireni.

Biädnäreni rebiuux loj Jesús

(Mr. 10:13-16; Lc. 18:15-17)

¹³ Dxejcti biädnäreni rebiuxe' loj Jesús te gudzuubni naani yejcreni, guini-abni lo Dios xcuentreni. Luxh rexpejn pacni gudılınāj rebejn ni siädnä rebiuxe'ga. ¹⁴ Dxejc rāj Jesús lojreni:

—Colgusaan guibig rebiuxe' loä, na'c gudxojttureni, sa'csi xcälrnibee Dios xhaguibaa najc xten reni nadolajz si'c najc rebiuxe're.

¹⁵ Che gulujx badzuubni naani yejc rebiuxe', biunejzni ro'c.

Te ben ni rajp guninäj Jesús

(Mr. 10:17-31; Lc. 18:18-30)

¹⁶ Dxejc biäd te bi'n lo Jesús, gunabdiidxni lojni; rājpnī:

—Mastr sa'c, ¿xhini'c nanab gunä te xca'ä yälınabajn lo Dios par tejpas?

¹⁷ Dxejc rāj Jesús lojni:

—¿Xhicuent rniilu maestr sa'c narä? Diostis najc sa'c. Per par rlajzlu xca'lu yälınabajn lo Dios, bazoob rextidx Dios ni caj lo xleii Moisés.

¹⁸ Dxejcti rāj bi'nga lojni:

—¿Xhi rediidxga?

Dxejc rāj Jesús lojni:

—Na'c ju'tlu, na'c guesnäjlū bejn nani di gac chäällu, na'c cuanlu, na'c guiliäslu didxxhii xcuent bejn. ¹⁹ Bazoob xtidx xtadlu con xnanlu, huinälajz sa'lu si'cni sanälajzlu lagajc luj.

²⁰ Dxejcti rāj bi'nga lojni:

—Guiraa rediidxre runä che nacäli biuux. ¿Xhiruxni'c riäd dx gunä?

²¹ Dxejc rāj Jesús lojni:

—Palga rlajzlu gaclu beñsa'c lo Dios, huij, bato' guiraa ni rajplū, dxejc gudisni lo rebenproob, dxejc xhaguibaa sapduxhlu xhixtenlu. Dxejcti guda te jädñajllū narä.

²² Cheni biejn diajg bi'nga rediidxre, guc-huinduxh lajzni sa'csi rajpni xhidalduxh xhixtenni.

²³ Sas Jesús räjp loj rexpejn_{pacni}:

—Rniliäpac lojtu, naganduxh jiu' te bejn rajp loj xcäl_{rnibee} Dios. ²⁴ Rnisacä lojtu, guyasiru ted te cameii nejn baloj te guux; naganduxhru jiu' te bejn ni rajp lo xcäl_{rnibee} Dios.

²⁵ Che biejn diajg rexpejn_{pacni} rediidxre, bidxeloduxh_{reni}, dxejc canabdiid_x loj sa'reni:

—¿Chuni'c sajc jiu' lo xcäl_{rnibee} Dios?

²⁶ Dxejc bahuidzu'tz Jesús lojreni, räjpni:

—Naganduxh gun rebejn_{dee}, Diostis sajc gun guiraloj.

²⁷ Dxejcti Pedr räjp lojni:

—Nuurnu basa'nnu guiraa xhixtennu te siopnalnulu. ¿Xhini'c jia'pnu ro'c?

²⁸ Jesús räjp lojreni:

—Rniliäpac lojtu, la'tu ni biäd_{najltu} narä, che guscobä guiraa recos cheni cueä narä, Xi'n Dios ni gujc Niguui, lo yagxhil cadro guinibeä lo guiraa rebejn_{guedxliuj}, la'tu ni siäd_{najltu} narä sibejzatu lo tzubitio'p yagxhil te guinibeetu loj guitzubitio'p guejdx xten rexpejn_{Israel}. ²⁹ Luxh guiraa rebejn_{ni} basa'n rolijzni o rebejtzni, o rebisiajn_{ni}, o xtadni, o xnanni, o chäälni, o xi'nni, o rexhujni, te siäd_{najlni} narä, rebejn_{ga} sajc te gayuu huält locni goj_{pni}, nāgajc ga'preni xcäl_{rnabajn} Dios par tejpas. ³⁰ Rebejn_{nani} rchalo najcreni bejn_{roru} lo sa'reni nez loj Dios, reni'c gac bejn_{ni} guxii sajc nez loj Dios. Rebejn_{nadolajz} ni di guchalo sajcrureni lo sa'reni, reni'c sajcrureni nez loj Dios.

20

Xcuent reni rujn dzuun

¹ Räj_{pzani}:

—Xcäl_{rnibee} Dios najc si'c te bejn ni najc baxhuaan xten te renchro. Rsildooru biriini te satiilni mos gun dzuun lo xyujni, lo reyaguub. ² Che bidxäl_{ni} gaii mos, bachaagni diid_x. Bia'nreni diid_x quiixnireni te denaar tebdxej cade tej remosga. Dxejc baxha_{lnireni} loj xyujni sayujnreni dzuun. ³ Birisacni, satiilni sgaii mos si'cti rcagaa, rsil. Bidxaagni sgaii bejn_{ni} xhet cayujndi, suga'sireni nez lo guii. ⁴ Räjpni lojreni: “Näjza la'tu col_{chayujn} dzuun lo xyuä. Narä siguixä si'cni riäj_l xca'tu.” Sä'ti rebejn_{ga} lo dzuun. ⁵ Birisac dade' si'cti läiid_xej, birisaczani si'cti rcachon_{gudxej}. Bidxaagni sgaii bejn_{ni}, sigajcza räjpni loj rebejn_{ga}. ⁶ Dxejc si'cti rcagaii birisacni, huijni lo guii. Ro'c bidxäl_{ni} sgaii bejn_{ni} xhet cayujndireni, suga'sireni nez lo guii. Dxejc räjpni lojreni: “¿Xhicuent suga'tu ree guideb dxej xhet cayujnditu?” ⁷ Dxejc räjpreni lojni: “Sa'csi rut siäd_{tiildinu} te choyennu dzuun.” Dxejcti räjpni lojreni: “Näjza la'tu col_{chayejn} dzuun lo xyuä. Narä siguixsa'cätu.” ⁸ Che biu' guxhijn_{ni}, räjp lam_{ni} lo mos ni rnibee remos: “Gurejdx remos te quiixlureni. Gudix-xgaa reni biu' gudxejru lo dzuun. Lult gudijx reni biu' ganid lo dzuun.” ⁹ Dxejc ganid biu' remos ni agudxej biu'reni lo dzuun. Cade tejreni cua' te denaar, si'cni rca' ni rujn dzuun guideb dxej. ¹⁰ Cheni biu' reni biu' lo dzuun rsildoo, bejnreni xhigab sica'rureni meel, per sigajcza laareni cua'reni te denaar cade tejreni. ¹¹ Che cua'reni xcuentreni gusloj cadxe'chreni lo baxhuaan xten dzuunga. ¹² Räjpreni: “Redee ni biu' lult lo dzuun pet teb ortis bejnreni dzuun, luxh gudijxlureni sigajcni gudijxlu nuurnu, luxh biennu dzuun guideb dxej, luxh biennu dzuun lo yäl_{nanlaa}.” ¹³ Dxejc räjp lamga lo tejreni: “Xamigwä, xhet cosguijdxdi cayunä lojlu. ¿La xhet bia'ndinu diid_x te denaar quixälu tebdxej? ¹⁴ Huij, cua' xmeellu. Narä rlazä quixä bejn_{re} ni biu' lult sigajc ni gudixä lojlu. ¹⁵ ¿La di gacdi gunä si'ctis ni rlazä con xmelä? ¿O rdexchlajzlu

loä sa'csi nacä hueen, ä?" ¹⁶ Ni'cni reni biääd lult sajcreni tebloj con reni biääd ganid, luxh reni biääd ganid sajcreni tebloj con reni biääd lult.

Gunisac Jesús xho guetni

(Mr. 10:32-34; Lc. 18:31-34)

¹⁷ Che sasaj Jesús lo nezyuj sääni Jerusalén, huinäni rexpeljpacni te laad te räjpni lojreni:

¹⁸ —La'tu ruhuiitu sosaanu nez guedx Jerusalén. Ro'c narä, Xi'n Dios ni gujc Niguui, siabä ladznäa reni rnibee lo rebixhojz, näjza lo rebejn ni najn leii. Laareni sinibeereni guetä. ¹⁹ Sutedreni narä ladznäa rebenzijt te cubeereni narä quineni narä, dxejc gucuaareni narä lo crujz. Luxh ni riojn dxej, sibansacä loj rebenjut.

Ni gunab xnan Jacoob näjza Juan

(Mr. 10:35-45)

²⁰ Dxejcti gubig xnan Jacoob näjza Juan, xi'n Zebedeo loj Jesús. Bazuxhibni nez loj Jesús, te gunabni lo Jesús. ²¹ Gunabdiidx Jesús lojni:

—¿Xhini'c rlajzlu?

Räjp gunaaga lojni:

—Che jiu'lu lo xcälrnibeelu, gunibelaa cue tej rexi'nä xladbeelu, steeni cue xladbäjgwlu.

²² Dxejc räjp Jesús:

—¡Ditu gan xhini'c rniabtu! ¿La sajc tedtu yälrsacsí sa'ni tedä? ¿La sajc tedtu trabajwduxh sa' ni nanab tedä?

Dxejc räjpreni:

—Sajc tednuni.

²³ Dxejcti räjp Jesús lojreni:

—Guliipacni. Sidedxgaatu trabajw, sidedxgaazatu yälrsacsí. Et narädi cueä reni cue xladbägwä o xladbeä. Xtaä ni yu' xhaguibaa alaguleni rebejnğa.

²⁴ Che biejn diajg stzuu rexpeljpac Jesús, bidxe'chreni loj guiro'p rexi'n nane'ga. ²⁵ Dxejc gurejdx Jesús reni, räjpni:

—La'tu najntu xho rujn regubier ni rnibee lo rebenzijt, rnibeereni rebejnğa si'c xlamreni. Luxh reni najc rebenro lojreni runnäjreni rebejnğa si'ctis ni rlajzreni. ²⁶ Et si'cni gunditu la'tu loj rebejn. Chutis rlajz gac benro lojtu, nanab gunni dzuun gacnäjni guiraliitu si'c te mos. ²⁷ Luxh chutis tejtü ni rlajz guiliä'p xpala'nni, nanab gacni si'c xmos lo guiraliitu. ²⁸ Sigajcza biääd Xi'n Dios ni gujc Niguui. Dini niniab mos chu lojni, alga laani najc xmos bejn, badeedzani lagajc yälñabajn xtenni te gudijxni baslaani xhidal bejn ni yu' lo dojl.

Jesús rusiajc tio'p lotiä'p

(Mr. 10:46-52; Lc. 18:35-43)

²⁹ Che gojl guiriireni guedx Jericó, xhidalduxh bejn sanajlni. ³⁰ Dxejcti sobga' tio'p bejn ni di fii cuä' nez yuj. Che biejn diajgreni sadejd Jesús ro'c, gusloj cabedxa'reni:

—Dad, Xi'n toDavid, balazlajz nuurnu.

³¹ Gudilñäj rebejnreni, te gusaureni ro'reni. Luxh laareni dipru guredxa'reni:

—¡Dad, Xi'n toDavid, balazlajz nuurnu!

³² Dxejc guzudxi Jesús, gurejdxni reni di fii, räjpni lojreni:

—¿Xhini'c rlajztu gunä?

³³ Räjpreni lojni:

—Dad, rlaaznu guixal balojnu te gac fiinu.

³⁴Dxejc balazlajz Jesúsreni, gudajnni balojreni. Sas biacgajc balojreni, gujc bahuiireni, sanajltireni Jesús.

21

Biu' Jesús guedx Jerusalén

(Mr. 11:1-11; Lc. 19:28-40; Jn. 12:12-19)

¹Cheni Siäddzungajxhrene guedx Jerusalén, bidzujnreni te guedxbäz ni laa Betfagé, cuä' dajn ni laa Oliib. Baxhal Jesús tio'p xpejn pacni, ²räjpni lojreni:

—Colchäj loj guedxbäzre ni tre' nez lojtu. Ro'c guidxältu te burgunaa caduu näjza teburhuin. Colguxhecni, coltanäni loä. ³Palga yu' chu naa: “¿Xhini'c rujntu?”, colye'tz lojni: “Dad caquiinnini terate'. Suxhalgajcnini.”

⁴Luxh guiraa dee gujc te guzojb diidx ni gunii dade' nani bacuaa xtidx Dios agujc xchero, che räjpni:

⁵Colye'tz loj reni rbäjz guedx Sión,

bahuii xreilu siääd lojlu,

nadolajzni bijbni te burbäz, te burbäz, xi'n man ni rujn dzuun, ni ruu cargw.

⁶Dxejcti huij rexpejn pacni, bejnreni si'c gunibee Jesús gunreni. ⁷Biädnäreni burga näjza burbäz xi'nni. Gudixhrene xhajbreni detz burbäzga, dxejc gubijb Jesús burbäzga. ⁸Xhidalduxh bejn tre' ro'c, luxh yu' reni gudixh xhajbreni lo nez yuj, peta sgaiireni batiu' balajg te gudixhrene rebalajg lo nez yuj cadro ted Jesús. ⁹Rebejn ni nijd, näjza reni siääd dejtzn gusloj cabedxa'reni, räjpreni:

—¿Xchej guibajn Xi'n toDavid! ¿Chicbaa ni siääd xcuent Gueb Dios! Rliä'pnu xpala'n Guejblu Dios.

¹⁰Cheni biu' Jesús nen guedx Jerusalén, guiraa reben guejdxga gusloj camojm, yu'reni canabdiidxreni loj sa'reni:

—¿Chucha najc bejnre?

¹¹Yu'zarenä räjp:

—Dee najc Jesús, niguii ni rusule' xtidx Dios. Guedx Nazare't xten Galilee siäädni.

Basia Jesús guidoro

(Mr. 11:15-19; Lc. 19:45-48; Jn. 2:13-22)

¹²Dxejc biu' Jesús nen guidoro xten Dios, guläani guiraa rebejn ni caguto' näjza rebejn ni casii. Barexhättni remex xten reni ruchaa meel xten rebejn, näjza reyagxhil xten reni ruto' repalom. ¹³Dxejc räjpni lojreni:

—Loj reguijtz ni bacuaa rebengaloo caj: “Sirilaj xquidoä yu' xten yälrbejdx, yälrniab loj Dios.” Niluxh la'tu abejntuni xpiliäa gubaan.

¹⁴Lagajc nen guidooga, gubig loj Jesús gaii bejn ni di fii näjza gaii bejn ni rsiacoj, luxh basiajcnireni. ¹⁵Cheni bahuii reni rnibee loj rebixhojz, näjza reni najn leii remilagwr ni bejn Jesús, luxh biejnza diajgreni xho cabedxa' rebiuxe' caniireni: “Rliä'pnu xpala'nlu Xi'n torei David”, bidxe'ch rebixhojzga. ¹⁶Dxejc räjpreni loj Jesús:

—¿La riejn diajglu xhi caniireni, ä?

Badzu' Jesús diidxre lojreni räjpni:

—O'n, riejn diagäni. ¿La gadtu gol lo reguijtz ni bacuaa te dade' ni gunii xtidx Dios? Ro'c caj xcuent redee, cadro caj rediidxre:

Abejnlu gol rebiuux näjza rebäznite' dij ni rliäpsa'cpac xpala'n Dios.

¹⁷Dxejcti basaan Jesúsreni, biunejzni ro'c säani guedxe' ni laa Betania, ro'c gudejdni yääl.

Te yag iigw ni gubijdz

(Mr. 11:12-14, 20-26)

¹⁸ Cheni bara yääl, rsilru gubisac Jesús guedx Jerusalén. Laḷ ni sääni, gusloj calaanni. ¹⁹ Bahuiini loj te yag iigw cuä' nezyuj. Gubigni gajxh ni' yajgga, per xhet ninejxhdi bidxälhi, ganaxhtis balajg caj lo yajgga. Dxejc räjp Jesús lo yajg iigwga:

—iNuncru xcaj nicla tej ninejxh lojlu!

Dxejcti gubidzgajc yajgga. ²⁰ Cheni bahuii rexpejn pacni, bidxeloduxhreni, gunabdiidxreni loj Jesús:

—¿Xhi cuent gubidzgajc yajgga?

²¹ Räjp Jesús lojreni:

—Rniliäpac lojtu, palga chalilajzpectu, luxh ditu gun tio'p lajztu, xhet ganaxdi sa' cosre guntu, palga gäbtu lo te dajn: “Gubicaj ro'c, gusuj galäii nisdoo”, si'c gacni. ²² Guiraa ni guiniabtu loj Dios, palga chalilajzpectu, suniidxnini.

Xcälrnibee Jesús

(Mr. 11:27-33; Lc. 20:1-8)

²³ Dxejcti biu' Jesús nen guidoro, dxejc laḷ ni caguluiini rebejn gubig reni rnibee loj rebixhojz näjza rebejnool, gunabdiidxreni lojni:

—¿Xhi yälrnibee rajplu ni'cni rajc rujnlu recosre? ¿Chuni'c baniidx yälrnibeere lojlu?

²⁴ Badzu' Jesús diidxre lojreni räjpni:

—Sigajcza narä gunä te yälgunabdiidx lojtu; palga sajc gudzu'tu diidxga loä, dxejc guiniä lojtu chuni'c baniidx yälrnibee te runä recosre. ²⁵ ¿Chuni'c gunibee gutiobnis Juan ni rutiobnis? ¿La Dios o la bejn guedxliuj?

Dxejc gusloj cayäjp lo sa'reni, palga jie'tznu Dios gunibeeni, dxejc sinajni loonu, ¿xhicuent ditu nililajz xtiidxni? ²⁶ Palga jie'tznu bejn guedxliuj gunibeeni, dxejc sixa't rebejn yejcnu sa'csi guiraareni rililajzreni Juan najc te Dade' ni gunii xtidx Dios. ²⁷ Dxejc räjpreni loj Jesús:

—Dinu guidon.

Dxejc räjp Jesús lojreni:

—Sigajcza narä dina guiniä caro siääd yälrnibee te runä guiraa recosre.

Te dade' ni guyu' tio'p xi'nni

²⁸ Jesús räjp lojreni:

—Guidon xho guichalootu diidxre. Te dade' guyu' tio'p xi'nni. Räjpni loj xingangalojni: “Xi'nä, nadxej chayujnlu dzuun cadre care' uub.” ²⁹ Dxejc badzu' xi'nni diidx lojni, räjpni: “Di rlazädi cha'a.” Luxh che gojl ste ra't, basiejch lajzni säätini sayujnni xtzun xtadni. ³⁰ Dxejc räjp dade'ga lo stee xi'nni: “Xi'nä, nadxej chayujnlu dzuun.” Dxejc badzu' xi'nni diidxre, räjpni: “Mbaj, dad, sia'ä.” Luxh dini nij. ³¹ Loj guiro'preni, ¿chuni'c bejn si'cni rlazj xtadni?

Dxejc räjpreni:

—Xingangalooni.

Dxejcti räjp Jesús lojreni:

—Rniliäpac lojtu, reni ruquijx guiraloj, näjza regunabdxab ganidreni jiu'reni lojtu loj xcälrnibee Dios, ³² sa'csi Juan ni rutiobnis biädluini la'tu xho guibajntu, luxh ditu nililajz xtiidxni. Biädla reni ruquijx guiraloj, näjza regunadxab huililazduxhreni xtiidxni. Niluxh la'tu bahuiitu guiraa recosga, ditu nusiechlajz te nililajztu xtiidxni.

Xcuent remosguijdx

(Mr. 12:1-12; Lc. 20:9-19)

³³ 'iColcuadiajg stee cuentre! Guyu' te dade' ni najc baxhuaan xten te renchro, gule'cni yaguub loj xyujni, bateedni bazaa guideb gabi yujga. Gudäänni te gueed te gujcnj te tanc te chuchee nisuubga che rxii reuub. Bencheezani te yu' ni najc jiaaro te ro'c cue te ni fii guideb loj xyujni. Badedlaani yujga loj gaii bejn ni rujn dzuun, sä'tini te biaj zijtro. ³⁴ Che agojl guire' cose'ch baxhał baxhuaanga gaii xmosni loj xyujni te chaxiireni cose'ch ni riäjł xca' baxhuaanga. ³⁵ Dxejc reni biannäj yujga gunaazreni remosre, gudijnreni tejni, bagu'treni steeni, bacuaareni guij yejc steeni. ³⁶ Dxejc baxhałsac baxhuaanga sgaii mos. Niluxh reni biannäj yujga sigajcza bennäjreni remosga.

³⁷ 'Dxejcti bejn baxhuaanga xhigab: "Maazru huen guxhałä xi'nä; sucuadiajgrureni xtiidxni." ³⁸ Cheni bahuiireni lo xi'n baxhuaan xten yujga, bejnreni xhigab: "Deeni jiannäj yujre; do'o guigu'tnuni te jiannäanu yujre." ³⁹ Dxejcti gunaazrenini, guläärenini te laad, dxejc bagu'trenini.

⁴⁰ Dxejc gunabdiidx Jesús räjpni:
—Che jiäd baxhuaan xten yujga, ¿xhi gunnäjni rebejn nani biannäj xyujni?

⁴¹ Dxejc räjpreni loj Jesús:
—Dini gulazlajz rebenguijdxga, sugu'tnireni, sudedlaani xyujni loj ste'ca bejn nani gudeed cose'ch ni riäjł xca'ni che gał guire' cose'chga.

⁴² Dxejcti räjp Jesús lojreni:
—¿La gajdtu goł lo reguijtz nani bacuaa dade' nani gunii xtidx Dios galoo? Rediidxre caj ro'c:

Guij nani gulälaz reni runchee yu',
cua' Dios lagajc guijga gudixhnini squiin yu',
sajcruni loj guiraa reguij.

Dee bejn Gueb Dios, luxh rdxeloduxhnu dzunrore ni bejnni.

⁴³ 'Ni'cni rniä lojtu, sibicaj xcälrnibee Dios lojtu, sidejdni loj rebejn nani gudeed ni riäjł xca' xcälrnibee Dios, nalajznu renani chalilajzpac xtiidxni.

⁴⁴ Luxh xcuent guijga: nani jiajb lo guijga, silia'ni, per nani guitejb guijga yejcnj, li siujyni, gacni däj.

⁴⁵ Che biejn diajg reni rnibee lo rebixhojz näjza refarisee recuent ni canii Jesús, gucbeereni cagusä'tni lagajc laareni. ⁴⁶ Rlajzreni niniaazrenini, per bidxejbreni rebejn sa'csi salilajz rebejn najc Jesús bejn ni rnii xtidx Dios.

22

Xcuent yälruचना

¹ Guslosac canii Jesús lojreni con recuent, räjpni:

²—Xcälrnibee Dios najc si'c te reii ni bejn te sa' te guchnaa xi'nni. ³ Baxhałni rexmosni te saxiireni regelnejdx chääreni sa', niluxh rebejnre di rlajzdireni. ⁴ Dxejc baxhałsacni rexmosni, räjpni: "Colye'tz loj reni abidon, agujc comiid. ¡Abagutä balti gonsa'c, gonguro'! Anacchee guira'ti yälrajw. Coltaa."

⁵ Niluxh reni abidonga di niu xtiidxreni. Tejni sahuu rexyujni, steeni säa lo rexnegosni, ⁶ dxejcti sgaii reni niajc biooz gunaazreni rexmos reii, basacsireni remosga, sas bagu'trenini. ⁷ Che biejn diajg reiiga, bidxe'chduxhni, baxhałni rexsoldaadni te sagu'treni guiraa rebenguijdxga, te saze'czareni guejdx cadre rbäjzreni. ⁸ Dxejcti räjpni loj rexmosni: "Guiraa dee anacchee, di nungäjł jiädru reni abidon. ⁹ Colchäj, pues, lo resquiin lo nezyuj, colcuejdx chutis bejn ni guidxaagtistu." ¹⁰ Birii rexmosni, sääreni lo nezyuj. Dxejc bachagsa'reni guiraatis bejn ni bidxaagreni, reni najc benguijdx sigajc reni najc beñhuen te gudxaj rolijz reiiga.

¹¹ 'Dxejc biu' reii biädhuiini loj rebiooz. Bahuiini loj te bejn ni sobga' ro'c, luxh xhet xhablanijdini najcwni. ¹² Dxejc räjp reii lojni: "Xamigwä, ¿xho bejnlu biu'lu ree luxh xhet xhablanijdilu najcwlu?" Dxitis sobga' bejn̄ga, xhet rniidini. ¹³ Dxejc räjp reii loj rexmosni: "Colguliib ni'ni näjza naani, colsälni detzyu' cadre nacäȳj te ro'c gonduxhni chubejli reläȳjni." ¹⁴ Sa'csi xhidajl najc reni bidon̄ luxh guxii najc reni bibe.

La sajc quiixni impuest
(Mr. 12:13-17; Lc. 20:20-26)

¹⁵ Dxejcti sii refarisee, bia'nreni diidx siguiilreni xho gunijt Jesús te diidx te guiga'ni. ¹⁶ Ni'c baxhalreni gaii xpejnreni näjza gaii bejn ni nadxaag Herodes te räjpreni loj Jesús:

—Mastr, anajnnu rniilu ganax didxlii, ruluiizalu xtiidxpac Dios, luxh dilu jiu xhi rni rebejn̄, sa'csi dilu cue bejn ni sajcru lo stee bejn̄. ¹⁷ Gunii loonu, pues: ¿La laaca najc quiixnu impuest lo César ni rnibee loonu o et laadi?

¹⁸ Dxejc gucbee Jesús xhet laadi xhigab cayujnreni nen̄ lastooreni, dxejc räjpni lojreni:

—¿Ben̄guijdx! ¿Xhicuent r̄lajz̄tu guquiiltu narä? ¹⁹ Colguluii te meel loä.

Dxejc badeedreni te meel ni laa denario. ²⁰ Che bahuii Jesús loj meelga, gunabdiidxni lojreni, räjpni:

—¿Chuni'c caj lo meelre?

²¹ Dxejc räjpreni:

—Loj César.

Dxejc räjp Jesús lojreni:

—Colgudeed lo César ni riäjl xca' César, colgudeedza lo Dios ni riäjl xca' Dios.

²² Che biejn diajgreni rediidxre, bidxeloduxhreni. Dxejc basaanrenini, sä'tireni.

Canabdiidxreni xho gac che guibaṅsac rebejn
(Mr. 12:18-27; Lc. 20:27-40)

²³ Lagajc dxejga bidzujn̄ gaii reni laa saducee, reni di chalilajz sibaṅsac bejn loj rebengut. Gubigreni loj Jesús, gunabdiidxreni, ²⁴ räjpreni:

—Mastr, si'c naj toMoisés, palga yu' te bejn ni abachnaa, luxh ruti xi'nni che guetni, riäjl guchnaa bejtzni biuudga te chu xi'nreni xcuent bejtzni. ²⁵ Mbaj. Loonu yu' gajdz niguii ni najc bejtz sa'reni. Betzgoolga bachnaa, dxejc gujtni, luxh di xi'nni niu'. Basa'nni chäälni lo bejtzni. ²⁶ Sigajcza gusajc ni ro'p bejtzni; sigajcza gusajc ni riojn̄ bejtzni. Si'c huinuu gujc che basa'li guigajdz bejtzga. ²⁷ Sas che gujt guiraareni, näjza gunaaga gujt. ²⁸ Che guibaṅsac rebejn̄ga lo rebengut, ¿chu tej lo rebejtzga gac chäälpac gunaaga, ni guiraareni bachnaareni gunaaga?

²⁹ Dxejcti badzu' Jesús diidxre lojreni, räjpni:

—Et laadi rujntu xhigab sa'csi ditu gacbee xtidx Dios niclaza xcuent xcäl̄rnibee Dios. ³⁰ Ni che guibajn̄ rebengut, diru yäl̄ruchnaa chu, diruza bejn̄ gudeed rexindxa'preni guchnaa. Dxejc sajczeni si'c rexangl Dios ni yu' xhaguibaa. ³¹ Dxejc xcuent yäl̄rbaṅsac loj rebengut, ¿la gajdtu goļ̄ reguijtz ni bacuaa toMoisés che räjp Dios xcuent retoxtadgoldoonu: ³² "Narä nacä Xtios Abram, Xtios Isaac, näjza Xtios Jacob", ä? Dios di gac Xtios bengut, Xtioistis rebejn̄ ni nabajn̄ najcni.

³³ Che biejn diajg rebejn̄ xtidx Jesús, bidxeloduxhreni diidx ni ruluiini.

Diidx ni maazru sajc
(Mr. 12:28-34)

³⁴ Che gucbee refarisee basäu Jesús ro' resaducee, bidojpreni, bachaagreni diidx. ³⁵ Dxejc tejreni nani najn leii, rlanjni guquiilni Jesús ni'c gunabdiidxni lojni räjpni:

³⁶ —Mastr, ¿xhi diidx ni gunibee Dios sajcro lojreni caj lo leii?

³⁷ Räjp Jesús lojreni:

—Nani rnii scree: “Huinälajz Dad Xtioslu guideb lastoolu, guideb xaimlu, näjza guidebgajc xcäriejnlu.” ³⁸ Diidxre ni gunibee Dios najc ni sajcro, luxh ganidni siädni loj rextidx Dios. ³⁹ Ni ro'pga sigajcza najcni: “Huinälajz resa'lu sigajc ni sanälajzlu lagajc luj.” ⁴⁰ Guiro'p remandamientre nanab te guzoob bejn guiraa rediidx ni bacuaa toMoisés näjza ni bacuaa redade' nani gunii xtidx Dios.

¿Chu xi'n najc Crist?

(Mr. 12:35-37; Lc. 20:41-44)

⁴¹ Lalni tre' refarisee, gunabdiidx Jesús lojreni, räjpni:

⁴² —¿Xhi rujntu xhigab xcuent Crist? ¿Chu xi'n najcni?

Räjpreni lojni:

—Laani najc xajg toDavid.

⁴³ Räjp Jesús lojreni:

—¿Xhicuent räjp David “Xtadä” lojni che basanij Sprit Dxan xten Dios lastooni? Ni'c bacuaa toDavid rediidxre:

⁴⁴ Dad Dios räjp lo Xtadä,

gurej xladbeä la_l ni gudzugä guiraa reni rdxe'ch lojlu ladzni'lu.

⁴⁵ Palga lagajc David rnii: “Dad” lojni, ¿xho mood najcni xi'nni?

⁴⁶ Dxejc rut gujcdi badzu' nicla te diidx lojni, luxh dxejluga rutru gojpd_i xhi diidx niniabdiidxruren_i lojni.

23

Rucuaquij Jesús refarisee näjza rebejn nani najn leii

(Mr. 12:38-40; Lc. 11:37-54; 20:45-47)

¹ Dxejc räjp Jesús loj reben_i xhidaalga näjza loj rexpejn_ipacni:

² —Rebejn ni najn leii näjza refarisee rajp yäl_inajn te gusule'reni xleii Moisés.

³ Ni'cni colguzoob guiraa rextiidxreni, na'c guntu sa' recos ni rujnreni, sa'csi laareni rniireni xhini'c guntu, dxejcti lagajc laareni direni gun ni rnibeereni guntu. ⁴ Rnibeereni gun rebejn_i cos naganduxh ni najc si'c te cargw naduxh ni di gac guu bejn_i, per laareni nicla con te bicueñaareni direni gusniibni.

⁵ Guiraa recos ni rujnreni, rujnrenini te fiitis rebejn_i. Rchaglajzreni rcaj lo cuajsreni näjza roxhajgwreni recaje' cadre yu' tla' guijtz ni caj xtidx Dios lojni. Rustioolzaren_i xi' xhajbreni. ⁶ Rlajzreni ganidreni tedreni lo mex che gal_i te lanij; rlanjzreni cuereni lo rebancw ni suga' delant nen_i reguidobäz.

⁷ Sigajcza rlanjzreni guchagro' bejn_i ñaareni nez lo guii, guiniiza rebejn_i “Mastr” lojreni.

⁸ Na'c gusaantu guinii rebejn_i “Mastr” lojtu, sa'csi tejtisni yu' ni najc Mastr, laani najc Crist. Peta la'tu guiraatu najctu tejsi sa'tu. ⁹ Na'c guiniitu “Xtadä” loj te ben_i guedxliuj sa'csi yu' tejtis ni najc Xtadtu, ni'c najc Dios ni yu' xhaguibaa. ¹⁰ Na'cza gusaantu guiniireni lojtu “Mastr” sa'csi yu' tejtis Mastr, ni'c najc Crist. ¹¹ Ni yu' si'c mos lojtu ni'c najc ben_iroru loj resa'ni. ¹² Sa'csi chutis ni rchaloni najcni ben_iro lo sa'ni, ni'c sustuiyá lojni, chutis ni najc nadolajz loj Dios, ni'c sunáni ben_iro lo sa'ni.

¹³ 'iProobzatu remastr xten leii näjzatu refarisee, najctu ben_iguijdx! Sa'csi rudxo_ijntu jiu' rebejn_i loj xcäl_irnibee Dios. Lagajc la'tu ditu jiu' luxh dizatu gusaan jiu' rebejn_i ni rlanjz jiu'.

¹⁴ 'iProobzatu remastr xten leii nājzatu refarisee, najctu beṅguijdx! Sa'csi rudzucajtu rolizj renanbiuud laṣi cabedx canabduxhtu lo Dios, naatu gusgueetu bejṅ si'c. Sa'csi rujntu scree, siabduxh fis xten Dios yejctu.

¹⁵ 'iProobzatu remastr xten leii nājzatu refarisee, najctu beṅguijdx! Zijt rijtu lo renezyuj nājza lo nisdoo te guntu gaan guchaa mase tejtis bejṅ xmoodni te ganni Dios si'c rajntuni. Luxh che ahuililajz bejṅga xtiidxtu, rujntuni tio'p huält maazru te xi'n gabijl loj ni najctu.

¹⁶ 'iProobzatu, najctu si'c lotiä'p, rļajztu guluiitu nezyuj! La'tu ni rnii palga te bejṅ guiniliipac xtiidxni guzä'tni guidoro, xhet sajcdi xtiidxni. Palga guiniliipacni guzä'tni oor ni yu' neṅ guidoo, dxejc sii rniliini dxejc nungäjļ guzoobni xtiidxni. ¹⁷ iBeṅ nayääl, beṅlotiä'p! ¿Xhini'c sajcrū? ¿La oor la guidoro ni rundxan oorga? ¹⁸ Rniizatu: “Palga te bejṅ guiniliipacni guzä'tni lo bacuug ni yu' neṅ guidoro, di xcuentdi xtiidxni. Luxh palga yu' chu guiniliipac guzä'tni gojn ni dzuub lo bacuug, dxejc sii rniliipacni dxejc nungäjļ gusoobni xtiidxni.” ¹⁹ iBeṅ nayääl, beṅ lotiä'p! ¿Xhini'c sajcrū? ¿La gojn o la bacuug nani rundxan gojnga, ä? ²⁰ Nani ruzä't lo bacuug che rniliipacni, et ganaxdi lo bacuug ruzä'tni, nājza guiraa ni tre' lo bacuug ruzä'tni. ²¹ Ni ruzä't guidoro che rniliipacni, et ganaxdi guidoro ruzä'tni, nājza Dios ni rbäjzta neṅ guidoro ruzä'tni. ²² Sigajcza ni ruzä't guibaa che rniliipacni caguzä'tzani yagxhilro xten Dios nājza lagajc Dios ni sobga' ro'c.

²³ 'iProobzatu remastr xten leii nājzatu refarisee, najctu beṅguijdx! Bedzxtiil, anis nājza comiṅ ni rajptu, rudeedtu lo Dios tej tantga yejc cade te tzuu, niluxh ditu jiu ni sajcrū lo xtidx Dios, cadre caj xcuent yälṅnabanya, yälṅrulazļajz, nājza yälṅrililajz. Deeza ni riäjļpac guntu laṣi ni cayujnzatu steega. ²⁴ iLa'tu, lotiä'p ni rļajz guluii nezyuj! Riutu rediidx ni guxii sajc, niluxh rediidx ni sacduxh ditu jiu, najctu si'c bejṅ ni rbää te rex lo xpla'tni dxejcrū rājṅni te cameii.

²⁵ 'iProobzatu remastr xten leii nājzatu refarisee, najctu beṅguijdx! Rusiatu detz bas nājza pla't luxh nenṅni najc-dxuudx. Sigajcza la'tu riuduxhtu recostumbr, luxh lastootu guidxa yälṅgubaan nājza yälṅrdxe'chļajz. ²⁶ Farisee ni najc lotiä'p: gudibxgaa neṅ bas nājza neṅ pla't, dxejc nāj dejtznī sajc naya.

²⁷ 'iProobzatu remastr xten leii nājzatu refarisee, najctu beṅguijdx!, sa'csi najctu si'c rebaa ni nacchesa'c; nolbājreni, saru rļuiini, luxh nenṅreni guidxa dzujt xte beṅgut nājza bälṅyudx. ²⁸ Sigajcza najctu la'tu. Saru rujn lojtu, rchalo rebejṅ najctu beṅsa'c, niluxh lastootu guidxa yälṅrusguee nājza yälṅguyalajz.

²⁹ 'iProobzatu remastr xten leii nājza refarisee, najctu beṅguijdx! Runcheetu xpaā redade' ni gunii xtidx Dios galoo, rusucheezatu ro' xpaā rebejṅ ni gujc beṅsa'c, ³⁰ dxejc rniitu: “Paru nibajṅnu neṅ redxej ni gubajṅ retoxtadgoldoonu dinu niacnāj reni bagu't redade' ni gunii xtidx Dios.” ³¹ Lagajc con rediidxre rcājptu najctu rexajg renani bagu't redade' nani gunii xtidx Dios. ³² iColṅguscuääz guntu sa' recos ni guläxtiej retoxtadgoldootu!

³³ 'iLa'tu ni najc si'c bäl, la'tu ni najc si'c te bitiääz guidxa bälṅnialajz! ¿Xho guntu te na'c chäätu gabijl par tejpas? ³⁴ Ni'cni, guxhalä rexpēnä ni guinii xtidxä, nājza beṅnajn, nājza mastr. Luxh yu'reni sugu'ttu sucuaatureni lo crujz; yu'zarenī siguijntu neṅ reguidobäz, sirinajltureni guejdx por guejdx. ³⁵ Si'cza yejctu jiajb xtiejṅ guiraa rebeṅnadolajz ni bagu't bejṅ xchejli toAbel ni gujc nadolajz, xchejliza Zacarías, xi'n Berequías, ni bagu'ttu neṅ guidoro gajxh lo bacuug. ³⁶ Rniliäpac lojtu, dojļ xten guiraa recosga siajb yejc rebejṅ ni tre' lo guedxliuj naj.

*Jesús biin xcuent guedx Jerusalén
(Lc. 13:34-35)*

³⁷ Rājpa Jesús:

—¡Jerusalén, Jerusalén! Xpejnlu rugu't redade' ni rnii xtidx Dios, ru-cuaazareni guij yejc rebejn ni ruxhal Dios te gusule'reni xtiidxni lojtu. ¡Balti huält rlazä nutie'ä la'tu si'cni rutie' guidco'c rexquidbäzni nen xhigani, per ditu nicäjb! ³⁸ Colhuii xho jianxteb xquidootu cuälazrenini. ³⁹ Rnixgaä lojtu, naj dirutu fii loä, dxejli che guiniitu: “Benle' Dios nani siääd xcuentni.”

24

Jesús räjp sibijl guidoro

(Mr. 13:1-2; Lc. 21:5-6)

¹ Birii Jesús nen guidoro te asiini, dxejc gubig rexpejn pacni lojni, gusloj caguluiireni reyuduxhga lojni. ² Dxejc räjp Jesús lojreni:

—¿La ruhuiitu guiraa reyu're? Rniliäpac nicla tej guij di jia'n yejc sa'ni ree; guiragajc reyu're sibijl.

Cos ni guluiloj gac fis

(Mr. 13:3-23; Lc. 21:7-24; 17:22-24)

³ Dxejcti huijreni yejc te dajn ni laa Oliib. Che gurej Jesús ro'c, biääd rexpejn pacni lojni te xhiga'tz gunabdiidxreni lojni:

—Rlaaznu guiniilu loonu guc gac guiraa recosre. ¿Xhi seen guluiloj ameer jiäädlu näjza che ameer nitloj guedxliuj?

⁴ Dxejc räjp Jesús lojreni:

—¡Colnatiro te rut gusgueedi la'tu! ⁵ Sa'csi su' xhidajl reni jiääd, naareni: “Narä nacä Crist”, luxh susgueereni xhidajl bejn. ⁶ Siejn diajgtu xcuent cadro cayajc guer, näjza xcuent cadro rlaz chu guer, na'c guidxejbtu sa'csi si'c nungäjl gac, niluxh gajd galdi nitloj guedxliuj. ⁷ Sa'csi siäjs te naciön sidilnäjni stee naciön; te yälrnibee sujn guer con stee yälrnibee, luxh su' gubijn, su' yälguijdx, su'za xuduxh xhidajl lajt. ⁸ Luxh guiraa redee cuäxtiejtis retrabajwduxh ni churu chu.

⁹ 'Dxejc guteedreni la'tu ladznaa rebejdojl te gusacsireni la'tu, te gugu'tzareni la'tu, luxh guiraa rebejn sidxe'ch lojtu sa'csi sanälajztu narä.

¹⁰ Nen redxejga, xhidajlreni sibälaz xcälirililajzreni, sidxe'ch lo sa'reni, suto' sa'reni lo sa'reni. ¹¹ Dxejc siricaj xhidajl bejn ni rusguee, gäbreni xcuent Dios rniireni, luxh susgueereni xhidajl bejn. ¹² Sa'csi lacti suduxh yällatsiaj lo guedxliuj, diru bejn chanälajz sa'ni. ¹³ Dxejcti bejn ni chasanäj xnezyujtis Dios, ni'c sun gaan xca'ni yäl nabaj par tejpas. ¹⁴ Luxh sisiule' xtidx Dios guideb lo guedxliuj te gacbee guiraa rebejn guedxliuj xtiidxni; dxejcru jiääd fis xten Dios.

¹⁵ 'Cheni fiitu asobga' te bejnguidxduxh nen yu' ni najc dxan nen guidoro, si'cni gunixgaa toDaniel ni gunii xtidx Dios gacni, bejn ni goj dee sugacbeeni nani rojni, ¹⁶ dxejc renani rbäz lo guedx Judea, suguxunreni gucuatzlojreni nen dajn. ¹⁷ Bejn ni niä'p yejc xyu'ni dxejga di galdi jiäjtnei te chaläani xhixtenni nen xyu'ni; ¹⁸ bejn nani cayujn dzuun lo niaa, na'c guibi'ni niclaza chaxhiini xhajn. ¹⁹ ¡Proobza regunaa ni nuxi'n, näjza reni cagusiä' bäs nen redxejga! ²⁰ Colnabduxh loj Dios xhet nendi redxej ni cayacnalduxhdi nanab guxunditu, niclaza dxej che rusilajz bejn. ²¹ Sa'csi su' trabajwduxh nen redxejga, sa'ni gajd bejn fii dxejli ni guzobloj guedxliuj, luxh che tedni, diru guibi' chuni. ²² Luxh palga di Dios gutiu' yejc redxejga, nicla tej bejn di laa. Luxh suti' Dios yejc redxejga sa'csi rinälajzreni reni aguleni.

²³ 'Nen redxejga palga yu' chu naa lojtu: “Colhuii, aree Crist”, o “Colhuii ani arec”, na'c chalilajztuni. ²⁴ Siääd xhidajl niguii ni rusguee, gäbreni najcreni crist; sidzujnza rebejn ni rusguee ni gäb xtiidxpac Dios rusule'reni; luxh sujnreni remilagwr sujnzareni senro, parsi gusgueereni, susgueduxhreni

rebejn, niluxh rlajzreni gusguezareni rebejn ni agule Dios, ni rililajz xti-idxn. ²⁵ Agunixgaä lojtu xhini'c gac. ²⁶ Ni'cni palga naareni lojtu: “Bahuii, a crist yu' nez lo reyubijdz”, na'c chäätu; o palga naareni: “A crist suga' nen yu're”, na'c chalilajztureni. ²⁷ Sa'csi si'cni guideb xhaguibaa rien che rdinya' ladjiaa näjza ladjiätli, si'cza suhuiitu loä, Xi'n Dios ni gujc Niguii, cheni jiälsacä lo guedxliuj. ²⁸ Ni najntu cadro naga' te mangut, ro'c re' regolbetz.

Cheni jiädsac Xi'n Dios ni gujc Niguii
(Mr. 13:24-37; Lc. 21:25-33; 17:26-30, 34-36)

²⁹ Räjpzani:

—Cuantsi ted guiraa retrabajwduxh, sicäy lo gubijdx, diruza bäi gusanij, sitejbza rebajl ni yu' xhaguibaa, sinibduxhza guideb xhaguibaa. ³⁰ Dxejcti suhuiireni xhaguibaa seen xten Xi'n Dios ni gujc Niguii, luxh guiraa rebejn ni rbäjz nen guiraa reguejdx lo guedxliujre, sonduxhrene suhuiireni siääd Xi'n Niguii lo reza xhaguibaali. Siäädni con yälrnibee näjza yälrdimbichaduxh. ³¹ Dxejc suxhalni rexanglni con te trompet ni guscuedxa'reni dipduxh te guire' guiraa rebejn ni aguleni lo guidajp lajd squiin guedxliuj, guideb lo guedxliuj näjza xhaguibaa.

³² 'iColguisieed ni ruluu yajg iigw! Che naren renaani che cabäani be'n, asiääd bäi curex, ³³ sigajcza cheni fitu cayajc guiraa recosre, sacheetu asiädgajxh fis, rolä'li abidzujñni. ³⁴ Rniliäpac lojtu, guiraa redee sajc laj ni nabajn gaii rebejn ni suga' ree naj. ³⁵ Guibaa näjza guedxliuj sinitloj, niluxh xtidxä di nitloj.

³⁶ 'Rut najndi xhi dxej, xhior gacni, nicla rexangl Dios, niclaza Xi'n Dios; Dad Diostis najn.

³⁷ 'Sigajcni gujc nen redxej che gubajn toNoé, si'cza gac che jiälä Xi'n Dios ni gujc Niguii. ³⁸ Nen redxe galoo, cheni gajd nisguiduxhga jiajb, rebejn ni nabajn dxejc cayajwreni, cayä'reni, caguchnaareni, cagudeedza bejn xindxa'preni guchnaa, dxejli cheni biu' Noé nen barcwro. ³⁹ Direni niacbee xtiidxn; cheni biäädli nisguiduxh ni sanä guiraareni dxejcru gucbeereni. Sigajcza gacni che jiälsacä narä Xi'n Dios ni gujc Niguii. ⁴⁰ Nen redxejga palga cayujn tio'p bejn dzuun lo niaa tejni guibee, steeni sia'n. ⁴¹ Palga cayo't tio'p gunaa xobniil, tejni guibee, steeni sia'n.

⁴² 'Ni'cni colsusin, sa'csi ditu gan xhi dxej jiääd Dad xtentu. ⁴³ Colganchee, paru niacbee baxhuaan xten yu' cor yääl niääd gubaan ni siädlan rolijzni, niususin dxejc, dini nusaan niu'ni rolijzni te cuanni. ⁴⁴ Ni'cni colsusinza la'tu, sa'csi siääd Xi'n Dios ni gujc Niguii lagajc or ni ditu gun xhigab jiäädni.

Xcuent te mossa'c näjza te mosguijdx
(Lc. 12:41-48)

⁴⁵ '¿Chuni'c najc mossa'c ni ruzoob diidx, ni basannäj xlamni rebejn ni yu' rolijzni te gudeedni xhi gaureni ä? ⁴⁶ Chicbaa mos ni saru cayujn xtzuunni che guidzujñ xlamni. ⁴⁷ Rniliäpac lojtu, lamga susa'nni sa' mosga te fiini guiraa xhixtenni. ⁴⁸ Dxejc palga mosga di gusoob xtidx xlamni, gunni xhigab: “Sacladuxh guibi' xlamä”, ⁴⁹ dxejc guisloj cagusacsini resamosni, guislojni gaunäjni, yänäjni rebengu. ⁵⁰ Dxejc sidzujñ xlamni dxej che dini gun xhigab jiäädni, luxh or ni dini gan guidzujñni. ⁵¹ Dxejc siguinduxhni mosguijdxga, surilaagwnini te guidxagsa'ni sabenguijdxni, dxejc sonduxhni, chubejli reläjyni.

¹ Räjpa Jesús:

—Pues xcäl̄nibee Dios najc si'c tzuu gunadxa'p nani cua' xcandilse'treni te huijreni te sa'. ² Gaii regunaaga nasin, sgaiireni nayääl. ³ Reni nayäälga sanäreni xcandilreni, niluxh direni nica' sijl se't. ⁴ Niluxh reni nasinga sanäreni sijl se't te guze'creni neñ xcandilreni. ⁵ Sa'csi bi'nga di nidzūngaj, gunaaz bacal̄ regunadxa'pga, gudiejstireni. ⁶ Dxejc si'cti garol yääl, biejn te xse' ni räjp: “Bi'n asiäd, colchäj, colchachaglojni.” ⁷ Guiraa regunaare huistieguxunreni, dxejc bensa'creni xcandilreni, te cuaguijreni. ⁸ Dxejc guigaii regunayääl räjpreni loj reni nasin: “Colgunidxlaa te bo'c se't gusanijnu xcandilnu, sa'csi arlajzni jiuini.” ⁹ Dxejcti regunanasin räjp lojreni: “Digac-dini, dxejc dini gal̄ nicla par nuurnu nicla par la'tu. Colchäj cadre ruto'reni se't colchazii xse'ttu.” ¹⁰ Lal̄ni sasii guigaii regunaa-nayäälga se't, bidzujñ bi'n. Regunaa-sin ni cabäjz bi'n biunäjrenini lo sa', biäuuti ro lä'. ¹¹ Cheni bidzujñ regunayäälga, räjpreni: “Dad, Dad, baxhal ro lä'.” ¹² Dxejc räjpni lojreni: “Rniliäpac lojtu, dina gumbeätu.”

¹³ Dxejc Jesús räjp lojreni:

—Col̄susinza, sa'csi ditu gan nicla xhi dxej nicla xhi or̄ siäd Xi'n Dios ni gujc Niguii.

Xcuent lam̄ ni badeed meel

¹⁴ 'Xcäl̄nibee Dios xhaguibaa najc si'c te bejn ni agojl guirii chääni zijt te biaj. Gurejdxni rexmosni, badeedni meel lojreni.

¹⁵ 'Lo tejni badeedni si'cti gaii mil̄ meel, lo steeni badeedni si'cti tio'p mil̄, dxejc steeni cua' te mil̄. Loj tejgani badeedni si'cti ni rujnni xhigab sajc gunnäjreni dzuun, dxejcti biriini xpiajni. ¹⁶ Ni cua' gaii mil̄ meel bejn te dzunro, bejnni gaan sgaii mil̄ meel. ¹⁷ Sigajcza ni cua' tio'p mil̄ meel, bejnni gaan stio'p mil̄. ¹⁸ Dxejcti ni cua' te mil̄ meel, huicua'tzni xmeel xlam̄ni neñ te gueed ni gudäänni lo yuj.

¹⁹ 'Gudejdti balti bäii, dxejc gubi' xlam̄ remosga, bejnni cuent loj guiraareni. ²⁰ Che bidzujñ ni cua' gaii mil̄ meel, bidzunnäjni sgaii mil̄ meel ni bejnni gaan, räjpni loj xlam̄ni: “Dad, baniidx guejblu gaii mil̄ loä. Aree sgaii mil̄ meel ni benä gaan.” ²¹ Räjp xlam̄ni lojni dxejc: “Hueenca, mos hueen najclu, rusoobzalu xtidxä. Sa'csi gujclu beñsa'c con te cos báz, naj sunidxä guinibeelu xhiroobru. Biu' loä, bibalaznäjä narä.” ²² Che bidzujñni ni cua' tio'p mil̄ meelga, räjpni loj xlam̄ni: “Baniidx guejblu tio'p mil̄ meel loä, aree stio'p mil̄ meel ni benä gaan.” ²³ Räjp xlam̄ni lojni: “Mbaj. Mos hueen najclu rusoobzalu diidx. Sa'csi gujclu beñsa'c con te cosbáz, naj sunidxä guinibeelu xhiroobru. Biu' loä, bibalaznäjä narä.” ²⁴ Che bidzujñ mos ni cua' te mil̄ meel, räjpni lo xlam̄ni: “Dad, ananä najclu te bejn ni di gulazlajz; rca'lu cose'ch cadre dilu nibe'c binij, rutojpszalu cadre dilu nutie'ch binij. ²⁵ Ni'cni bidxebä, huicua'tzä xmeellu neñ yuj. Niluxh axh aree xmeellu.” ²⁶ Dxejc räjp xlam̄ni lojni: “iMos guijdx, mos ploj! Najnlu rca'ä cose'ch cadre dina nibe'cä binij, rutopä cadre dina nutie'chä binij. ²⁷ Riäj̄l nisa'nlu xmelä neñ te bancw te che nibi'ä nicasacä xmelä con xi'nni ni niujni gaan.” ²⁸ Dxejc räjpni loj reni suga' ro'c: “Col̄gudzucaj te mil̄ meel ni ca'ni col̄gudeedni loj ni rajp tzuu mil̄ meel. ²⁹ Sa'csi loj ni rajp sudedäru, niluxh ni xhet rajpdi sudzucaä tudxe'n nani rajpni.” ³⁰ Dxejc räjpni: “Col̄ca' mosre ni xhet sajcdi, col̄guzäl̄ni lo yäl̄nacäjy, cadre chu yäl̄ronduxh, näjza yäl̄rajw reläjy bejn.”

Yäl̄guxhtis xten reguejdx

³¹ 'Che jiädsac Xi'n Dios ni gujc Niguii con yäl̄rdimbicha' xtenni, siädnäni rexangl Dios. Dxejc sibejni lo tron̄ ni rdimbicha' xtenni te guinibeeni.

³² Dxejc sidojp nez lojni guiraa reben guedxliuj. Dxejc sibeni lojreni, silia'ni sa'reni si'c rujn te baxtoor cheni rbeni rexiil loj redxib, te rlia'reni loj sa'reni. ³³ Suzujni rexiil xladbeeni dxejc redxib xladbäjgwni. ³⁴ Dxejc säjb rei loj reni suga' xladbeeni: “Coltaa, la'tu ni benle' Xtadä. Coljiu' lo yälrnibee ni guc-chee cheni guzoblojli guedxliuj. ³⁵ Sa'csi che calanä la'tu baniidx xhi gudauä, che cayolä, la'tu baniidx xhi gu'ä. Che cuanzaä si'c te benzijt, la'tu banidxlaatu cadro bia'nä. ³⁶ Che xheti xhabä, la'tu baniidxni, che gucxhuä, la'tu biädhuiitu narä, che guyu'ä neñ latzguiib, biädhuiitu narä.” ³⁷ Dxejc sinii reni suga' xladbeeni, säjbreni: “Dad, ¿guc bahuiinu gulaanlu, baniidxnu xhi gudajwlu? ¿Guc bahuiinu cayojllu, baniidxnu xhi gu'lu? ³⁸ ¿Guc bahuiinu najclu si'c te benzijt, baniidxnu cadro bianlaalu, o biäädx xhajblu, baniidxnu xhi gojtlu? ³⁹ O ¿guc bahuiinu cayacxhuulu, o yu'lu neñ latzguiib, biophuiinu lojlu?” ⁴⁰ Dxejc reiiga säjb lojreni: “Rniliäpac lojtu, xhitis xhi bejntu loj te rexpenä ni rnii xtidxä mase proobreni, lagajc loä bejntu recosga.”

⁴¹ Dxejc säjpszani loj reni suga' ladbäjgwni: “Colguibicaj loä, benguijdx, colchäj lo balduxh ni cayejc par tejpas ni cayejc par bendxab ni rnibee näjza rexpendxabni. ⁴² Sa'csi gulanä, luxh ditu nuniidx xhi niauä; biolä, per ditu nuniidx xhi niä'ä; ⁴³ cuanzaä si'c te benzijt, luxh ditu nunidxlaa cadro nia'nä, biädxza xhabä, niluxh ditu nuniidx xhi niacwä; gucxhuä, guyu'äza neñ latzguiib, niluxh ditu niädhuii loä.” ⁴⁴ Dxejc laareni säjbreni: “Dad, ¿guc bihuiinu calaanlu, o cayojllu, o canzajlu si'c te benzijt, o cayäädx xhajblu, o cayacxhuulu, o yu'lu neñ latzguiib, luxh dinu niacnäjlu?” ⁴⁵ Dxejc säjb reiiga lojreni: “Rniliäpac lojtu, loj xhitis ni ditu niacnäj rebejn ni rililajz xtidxä, mase proobreni naräni ditu niacnäj.” ⁴⁶ Dxejcti sij rebejnre lo yälrusacsí par tejpas, per rebejn ni nadolajz, ni agule Dios, sijreni lo xcäl nabajñ Dios par tejpas.

26

Bejnreni xhigab xho guiniaazreni Jesús (Mr. 14:1-2; Lc. 22:1-2; Jn. 11:45-53)

¹ Che gulujx gunii Jesús rediidxre, räjpni loj rexpejn pacni:

² —Anajntu stio'p dxejtis cayäädx gac lanij ni laa pascw. Luxh suteedreni narä, Xi'n Niguii ladznaa reni gucuua narä lo cruzj.

³ Dxejc bidojp rebejn ni rnibee rebixhojz, näjza remastr xten leii, näjza rebengool lo rexpejn Israel. Lo xle' Caifás, ni rnibee loj rebixhojz, bidojpreni.

⁴ Ro'c bachaagreni diidx xho guiniaazreni Jesús con yälrusguee, te ju'trenini.

⁵ Luxh räjpreni lo sa'reni:

—Na'c jiennuni neñ redxe lanij, te di gun rebejn bieiduxh.

Te gunaa ni biädnä perfum (Mr. 14:3-9; Jn. 12:1-8)

⁶ Che yu' Jesús guedx Betania, rolijz Simón te bejn ni basiajcní che ral tiejxhni, ⁷ ro'c gubig te gunaa lojni, ca'ni te vasguij ni laa onix, guidxani te perfum ni sajc melro. Che sobga' Jesús lo mex, bachajni perfum yejc Jesús.

⁸ Che bahuii rexpejn pacni xhi cayujnni, bidxe'chreni, gusloj cayäjpreni:

—¿Xhicuent casälxlia'ni perfumga? ⁹ Perfumre niajc nido'ni, nirii xhidajl meel lojni te niacnäjni rebenproob.

¹⁰ Biejn diajg Jesús xhi caniireni, dxejc räjpni lojreni:

—¿Xhicuent cadxe'chnäjtu gunaaare? Ni te coshueen najc dee nani bejnni loä. ¹¹ Ni guirasi dxej su' rebejn ni xhet rajpdi lojtu, peta narä guxii dxej su'ä

lojtu. ¹² Nani bejn gunaare che bachajni perfumre guideb lagaa tiexhä, najcni par guzucheeni narä te guiga'tzä. ¹³ Rniliäpac lojtu, cadrotis gusule'reni xtidxä lo guideb guedxliuj, sujyreni diidx xcuent ni bennäj gunaare narä, te guinaj lajzreni gunaare.

Judas bato' Jesús

(Mr. 14:10-11; Lc. 22:3-6)

¹⁴ Dxejc lo retzubitio'p rexpenpac Jesús birii tej ni laa Judas Iscariote, huininäjni rebejn ni rnibee loj rebixhojz, ¹⁵ räjpni:

—¿Lac guniidxtu loä te gutedä Jesús ladzñaatu?

Dxejc badeedreni galbitzuu melpla't lojni. ¹⁶ Dxjecli caguuil Judas xho gutedni Jesús lojreni.

Lult xchej xten Jesús

(Mr. 14:12-25; Lc. 22:7-23; Jn. 13:21-30; 1Co. 11:23-26)

¹⁷ Primer dxej lanij, dxej ni rajwreni yätxtiil ni di saguij, gubig rexpejnpacni loj Jesús, räjpreni lojni:

—¿Caro rlaizlu chozucheenu te gaulu xchej xten lanipascw?

¹⁸ Dxejc räjpni lojreni:

—Colchäj lo guejdx rolijz te dade', colye'tz lojni: “Si'c naj Dad mastr: Asiäddzungajxh xorni, ni'cni rolijzlu gaunäjni rexpejnni xchej lanipascw.”

¹⁹ Bejnti rexpejnpacni si'cni gunibee Jesús gac, bazucheereni xchej xten pascw.

²⁰ Che biu' guxhijn, sobga' Jesús lo mex con retzubitio'p xpejnpacni. ²¹ Lal ni cayajwreni räjpni lojreni:

—Rniliä lojtu, yu' tejtü ni guto' narä.

²² Dxejc guc-huinuxh lajzreni, räjpreni lojni:

—Dad, ¿andi naräni?

²³ Dxejcti räjp Jesús lojreni:

—Ni gaunäj narä neñ tejtis pla't, laa ni'cni guto' narä. ²⁴ Xi'n Dios ni gujc Niguii sajç si'ctis ni caj loj guijtç xten Dios, per gunatiro bejn ni guto'ni. Huenru na'c niajl bejnğa.

²⁵ Dxejcti gunii Judas, ni caguto' Jesús, räjpni:

—Mastr, ¿andi naräni?

Jesús räjp lojni:

—O'n, lujni.

²⁶ Lal ni sobga'reni cayajwreni, guläs Jesús yätxtiil, badeedni xquixtios lo Dios, dxejcti gula'nini, badeednini loj rexpejnpacni, räjpni:

—Coltajw; dee najç si'c tiexhä.

²⁷ Dxejc guläsni te vas, badeedni xquixtios lo Dios, dxejcti badeednini loj rexpejnpacni, räjpni:

—Guiraatu colyä', ²⁸ sa'csi dee najç si'c xtienä; ni'cni riannää la'tu te didxcoob, luxh rejnre sixe'ni xcuent xhidajl bejn te guslaanireni neñ dojl.

²⁹ Luxh rniä lojtu, diruna yä'ä nis nani rii yejc uub, dxejlini yänäsacätu lo xcälrnibee Dios, Xtadä.

Räjp Jesús sibälaz Pedroni

(Mr. 14:26-31; Lc. 22:31-34; Jn. 13:36-38)

³⁰ Che gulujx bilreni te dij, biriireni, sääreni lo dajn ni laa Oliib. ³¹ Dxejc räjp Jesús lojreni:

—Guiragajctu sactio'p lajztu xcuentä, susa'ntu narä naguxhijn sa'csi lo reguijtç xten Dios caj scree: “Sugu'treni baxtoor dxejc sire'ch rexiil.” ³² Dxejc

cheni guibansacä lo rebengut, ganidä cha'ä región Galilee, dxejcti jiädnajltu narä.

³³ Dxejc räjp Pedr loj Jesús:

—Masque guiraareni cuälazlu, narä dina cuälazälu.

³⁴ Dxejc räjp Jesús lojni:

—Rniliäpac lojlu, lagajc guxhijñre, nicla gajd guidgäi cuedxa', luxh luj alagulälazlu narä choñ huält.

³⁵ Räjp Pedr loj Jesús:

—Masque riäjñ guetnäälu, dina cuälazälu.

Dxejc sigajcza gunii guiraa rexpejñpacni.

Gurejdx-gunab Jesús loj Dios neñ Getsemani

(Mr. 14:32-42; Lc. 22:39-46)

³⁶ Dxejcti bidzujñ Jesús näjza rexpejñpacni te lajt ni laa Getsemani, räjpni lojreni:

—Colcuésijc ree lañ ni cuedx-guiniabä lo Dios.

³⁷ Dxejc sanäni Pedr näjza guiro'p xi'n Zebedeo, luxh gusloj cayachuinduxh lajzni, cayu'zani yärsiaduxh. ³⁸ Dxejc räjpni lojreni:

—Te yälhuinduxh yu' lastoä; astoocanu agojl guetä. Coljia'n ree, coltie'ch bacal lojtu.

³⁹ Dxejc guzaj Jesús stla', guzuxhijbni dxejc basajb lojni lo yujli, gusloj cabedx-canabni lo Dios:

—Xtadä, palga sajcn, basanlaa tedcaj trabajwduxhre ni tedä, te na'c tedäni.

Xhet si'c di ni rlazä gacni; si'cpacni rlajzlu gac, si'c gacni.

⁴⁰ Dxejcti gubi'ni cadro suga' guichon rexpejñpacni, che bidzujñni ro'c, nagayejsreni. Räjpni lo Pedr:

—¿La di niajcdi nutie'chtu bacal lojtu nicla tebor, ä? ⁴¹ Colguibajñ, colnab lo Dios te na'c jiajbtu neñ dojl. Guliipacni, lastootu nadip, niluxh tiejxhtu rdxajc.

⁴² Gubi' Jesús stehuält, gurejdx-gunabni loj Dios, räjpni:

—Xtadä, palga digacdi tedcaj tedä trabajwre, sugacni si'ctis ni rlajzlu gacni.

⁴³ Dxejc gubisacni, bidxälñ rexpejñpacni, nagayejsreni sa'csi yuduxh bacal lojreni. ⁴⁴ Basaannireni, dxejc säsaacni, gurejdx-gunabni lo Dios ni riojn huält, gunisacni lagajc rediidx ni guniini galoo. ⁴⁵ Dxejc huijni cadro suga' rexpejñpacni, räjpni lojreni:

—¡Naj sii, colguejs, colgusilajz! Abidzujñ or ni gutedreni Xi'n Dios ni gujc Niguii ladzñaa rebendojl. ⁴⁶ ¡Colchastie, colcho', colhuii! Asiääd nani guted narä ladzñaa rebendojl.

Gunaazreni Jesús sanärenini pres

(Mr. 14:43-50; Lc. 22:47-53; Jn. 18:2-11)

⁴⁷ Lañni canii Jesús bidzujñ Judas, nani najc tej retzubitio'p xpejñpacni. Bidzunäjni xhidalduxh bejñ ni ca' espad, ni ca' garo't, najcreni xpejñ reni rnibee rebixhojz, näjza xpejñ rebengool xten rexpejñ Israel. ⁴⁸ Judas, ni bato' Jesús, abadedxgaani te seen lojreni räjpni:

—Nani guchagro'ä, ni'c najc laani; colguiniazgajcni.

⁴⁹ Dxejc gubigni loj Jesús, räjpni:

—Xchan, Dad Mastr.

Dxejc bachagro'ni lojni. ⁵⁰ Jesús räjp lojni:

—Xamigwä, ¿xhi siäädlu?

Dxejcti gubig rebejñ lojni, gunaazrenini.

⁵¹ Per tej reni suganäj Jesús guläani te spaad, batiu'ni diajg te mos xten rebixhojz ni rnibee. ⁵² Dxejc räjp Jesús lojni:

—Guluchee xspaadlu loj xse'ni. Guiraa reni rucuanäj con spaad, lagajc con spaad guetreni. ⁵³ ¿La ditu gan sajcza guiniabä lo Xtadä, luxh laani suxhalgajcni gayonbitzubitio'p mil xanglni gacnäj narä? ⁵⁴ Dxejc xho gac soob diidx ni caj lo reguijtz xten Dios ni rnixgaa riäjł gac guiraa recosre lagajc si'cni cayajcni.

⁵⁵ Dxejc räjp Jesús loj rebejn xhidajlga:

—¿La siädñätu spaad näjza garo't te guiniaaztu narä astoocanu nacä si'c te gubaan? Ni guirasi dxej gureä galäiitu, baluiätu neñ guidoro, luxh ditu niniaaz narä. ⁵⁶ Niluxh guiraa recosre cayajc te soob rediidx ni caj lo reguijtz ni bacuaa redade' ni gunii xtidx Dios.

Dxejcti guiraa rexpejn pacni basanxtebreni Jesús, baxunreni lojni.

Jesús nez loj rebixhojz

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Reni gunaaz Jesús huinänini nez loj Caifás, ni rnibee loj guiraa rebixhojz, bidzujnreni cadre abidojp guiraa rebejn nani ruluii leii näjza rebeñgool xten xpejn Israel. ⁵⁸ Dxejcti zit-zijt biädñajł Pedr rebejnğa, bidzujnlireni lole' xten bixhojz ni rnibeega. Ro'c biu'ni, gurenäjni rexquixhajg bixhojzga te ro'c bia'nni te fiini xhini'c gac.

⁵⁹ Reni rnibee rebixhojz, näjza rebeñgool con guiraa reni räjp yälrnibee gusloj caguilreni xhitis te diidx, masque xhet guliidini, te gucuaquijreni Jesús te guinibeereni guetni. ⁶⁰ Niluxh xhet bidxäldireni, luxh gubig xhidajł bejn, guniireni xhidajł didx-xhii xcuent Jesús. Dxejcti bidzujn tio'p dade' ni gunii didx-xhii, ⁶¹ räjpreni:

—Niguiire gunii scree: “Narä sajc gutzulä guidoro xten Dios, sajcza gunchesacäni neñ choñ dxej.”

⁶² Dxejc gusulii dade' ni rnibee lo rebixhojz, räjpni loj Jesús:

—¿Xhicuent xhet rniidilu, ä? ¿Xhini'c canii reniguiire cagucuaquijreni luj?

⁶³ Niluxh dxitis suga' Jesús. Dxejcti räjp dade' ni rnibee loj rebixhojz lojni:

—Rnibeä guiniliilu, guiniliipaclu con laj Gueb Dios nani nabajł. Gunii don, ¿la luj najc Crist, Xi'n Dios?

⁶⁴ Jesús räjp lojni:

—Lagajc guejblu naj si'c. Niluxh empac rniä lojtu, desde najlı suhuiitu cueä narä Xi'n Dios ni gujc Niguii xladbee Dios ni rnibee, suhuiizatu jiälä lo reza ni tre' xhaguibaa.

⁶⁵ Dxejc batiäjs dade' ni rnibee loj rebixhojz xhajbni, räjpni:

—iNiguiire aguniyajni Dios con xtiidxni! ¿Xhiru testiigw rquiinnu? Abiejn diajgtu didxyaj xtenni. ⁶⁶ ¿Xhi rchalotu?

Dxejc basejcreni diidx:

—iAbiga'ni! Riäjł guetni.

⁶⁷ Dxejc batiobxhejnreni lojni, gudijnrenini. Yu'reni gudajp lojni, ⁶⁸ räjpreni lojni:

—Palga najclu Crist, gunii chuni'c gudijnlu.

Di Pedr nicäjp numbeeni Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Lał ni cayajc reni'c, Pedr sobga' lole'. Dxejc gubig te dxape' ni rujn dzuun ro'c, räjpni lojni:

—Näjza luj cuansanäjlu Jesús, ni siäd nez Galilee.

⁷⁰ Per di Pedr nicäjp nez loj guiraareni, räjpni:

—Dina ganä xhini'c caniilu loä.

⁷¹ Asii Pedr nez ro' puert, che bidxaagni stee dxape' ni rujn dzuun ro'c. Dxape're räjp loj reni suga' ro'c:

—Näjza dade're cuansanäj Jesús ni siääd Nazare't.

⁷² Dxejc basguee Pedr stehuält, räjpni:

—Rniliäpac dina gumbeä dade'ga.

⁷³ Che gojl sterate', gubig reni suga' ro'c loj Pedr, räjpreni:

—Guliini; näjza luj najclu te xpejñni; huenliisi riejn diidx ni rniilu.

⁷⁴ Dxejcti guslojni cagueni, caguzä'tni Dios, räjpni:

—Dipacna gumbeä niguiiga.

Guniitisni si'c, chela guredxa' te guidgaii. ⁷⁵ Dxejcru banalajz Pedr rediidx ni gunii Jesús lojni che räjpni: “Che gajdli guidgaii cuedxa', choñ huält alaguniilu dilu gumbee narä.” Dxejc birii Pedr ro'c, gusloj cayonduxhni.

27

Batedreni Jesús loj Pila't

(Mr. 15:1; Lc. 23:1-2; Jn. 18:28-32)

¹ Che bianij lo guedxliuj, guiraa reni najc rebixhojz ni rnibee näjza rebengool xten rexpejñ Israel bia'nreni diidx xho gunreni ju'treni Jesús.

² Baliibrenini, guläärenini ro'c, huisa'nrenini loj Poncio Pila't, ni najc gubernadoor.

Xho gujt Judas

³ Dxejcti Judas, ni bato' Jesús, che bahuiini bacuaquijreni Jesús, basiejch lajzni, guc-huin lajzni, dxejc huidzu'ni galbitzoo meel pla't loj rebixhojz ni rnibee näjza loj rebengool. ⁴ Räjpni:

—Banitduxhä lo Dios sa'csi bato'ä te bejñ ni xhet bejndi.

Dxejc räjpreni lojni:

—Xhixh gunnu. Ni'c najc xcuentlu; lujti najn.

⁵ Dxejc bacuaa Judas meelga lo yuj neñ guidoro, biritini ro'c. Sas huijni, baliibni te duu guejñni, gojñni lo te yajg, ro'cti gujtni.

⁶ Rebixhojz ni rnibee batojpreni meelga, räjpreni:

—Di gac di guizälñu meelre neñ caj gojñ sa'csi najcni xcuent xtiejn te bejñ.

⁷ Dxejc bia'nreni diidx con meelga siireni te la' yuj xten te dade' ni runchee guejs te ro'c gucua'tzreni rebenzajt. ⁸ Ni'cni najli rniireni yujga: “Yurejñ”.

⁹ Si'c gusojb diidx ni gunii Jeremías, dade' ni gunii xtidx Dios galoo che räjpni: “Cua'reni galbitzoo melpla'tga si'cti basoob rexi'n Israel sajc bejñga. ¹⁰ Con meelga guziireni yuj lo bejñ ni runchee guejs, sigacni gunibee xtadnu Dios.”

Gusuj Jesús nez loj Pila't

(Mr. 15:2-5; Lc. 23:3-5; Jn. 18:33-38)

¹¹ Bidzunñajreni Jesús loj Pila't ni najc gubernadoor. Dxejc gunabdiidxni, räjpni lo Jesús:

—¿La luj najc reii xten rexpejñ Israel, ä?

Räjp Jesús lojni:

—Najcni si'cni najlu.

¹² Lañi cabe'c rebixhojz ni rnibee näjza rebengool rexquej Jesús xhetliidi guniidi Jesús. ¹³ Dxejc räjp Pila't lojni:

—¿La di diajglu jiejn guiraa rediidx ni caniireni cagucuaquijreni luj, ä?

¹⁴ Per xhetliidi diidxdi basejc Jesús, nicla xcuent tejsi diidx ni bacuaquijrenini. Ni'cni bidxeloduxh gubernadoorga.

Gunibeereni guet Jesús

(Mr. 15:6-20; Lc. 23:13-25; Jn. 18:38–19:16)

¹⁵ Nen redxe lanij rajpreni costumbr ruslaa Pila't tej bejn ni cue rebejn loj reni yu' nen latzguuib. ¹⁶ Nen redxejga guyu' te bejn ni säab xtiidxni ni laa Barrabás. ¹⁷ Cheni tre' guiraareni ro'c, gunabdiidx Pila't lojreni:

—¿Chuni'c rlajztu guslaá, la suslaá Barrabás o Jesús ni laa Crist?

¹⁸ Sa'csi najn Pila't rdxe'chlajzreni lo Jesús, ni'c bateedrenini lojni.

¹⁹ La_l ni sobga' Pila't lo yajgxhiil cadro rujnni yälguxhtis, baxha_l chäälni diidx lojni, räjpni:

—Xhet gundilu dade'ga ni xhet bejndi, sa'csi nuchej nadxuudx gunixca_lä xcuentni.

²⁰ Niluxh rebixhojz ni rnibee näjza rebengool baquuilreni rebejn te gunabreni laa Barrabás, näjza te guet Jesús. ²¹ Dxejcti gunii gubernadoor stehuält, räjpni lojreni:

—¿Chu tej loj guiro'preni rlajztu guslaá?

Dxejc guredxa'reni, räjpreni:

—¡Barrabás!

²² Gunabdiidx Pila't, räjpni:

—¿Xhi gunnäá Jesús ni laaza Crist?

Guiraareni guredxa':

—Bacuaani lo cruzj.

²³ Dxejc räjp Pila't lojreni:

—¿Xhi latsiaj bejnni?

Niluxh laareni guredxa'rureni, räjpreni:

—¡Bacuaani lo cruzj!

²⁴ Che bahuii Pila't xlia'si caniini, alga gusloj rebejn cayujn te bieiduxh, cua'ni nis, gudiibni naani nez lojreni, räjpni:

—Dina xcaquiä xtiejn bejnre ni xhet bejndi. La'tu colhuii xho guntu. Xcuenttitu najcni.

²⁵ Dxejc guiraa rebejnnga badzu' diidxre, räjpreni:

—Suxcaquijnu xtiejnni, nuurnu näjza rexi'nnu.

²⁶ Dxejc baslaa Pila't Barrabás, dxejc gunibeeni gudijnreni Jesús dxejc bateednini ladz_naa rebejn te gucuaarenini lo cruzj.

²⁷ Dxejc huinä resoldaad xten gubernadoor Jesús lo pretoor, yu' cadro rujnreni yälguxhtis, ro'c batojpreni guiraa resa'reni. ²⁸ Dxejc gulääreni xhajbni, bashuajcwrenini te lad xniaa. ²⁹ Dxejc bencheereni te coron guejch, basälrenini yejcn, basälreni te yabixijl naani, xladbeeni, sas bazuxhijbreni nez lojni guslogajc caguxhisnäjrenini, räjpreni:

—¡Collä'p xpala'n rei xten rexpejn Israel!

³⁰ Sas batiobxhejnreni lojni, cua'reni yabixijlga te ni'c batiäjlreni yejcn.

³¹ Che gulujx baxhiznäjrenini, gulääreni lad xniaa ni najcwni. Dxejc bashuacwsacrenini lagajc xhajbni, sanätirenini te xcajni lo cruzj.

Bacuaareni Jesús lo cruzj

(Mr. 15:21-32; Lc. 23:26-43; Jn. 19:17-27)

³² Cheni sariireni, bidxaagreni te bejn ni siäd guedx Cirene, laani Simón, basguureni dade'ga xcruzj Jesús.

³³ Che bidzujnreni te lajt ni laa Gólgota, nani säloj: dan Calabeer, ³⁴ ro'c badeedreni bin nu'ch cuanlaa te gu' Jesús. Te bochäztisni gu'ni, dxejc naadiruni niä'nini.

³⁵ Cheni abacuaareni Jesús lo cruzj, gudzujt resoldaad yejch xhajbni, te si'c gudisreni xhajb Jesús cua'reni, te si'c guzojb diidx xten te dade'ni gunii xtidx Dios. ³⁶ Gurejtireni ro'c, gusloj canäjreni Jesús. ³⁷ Yejch cruzjga bacuaareni te

guijtz con letirro. Lo guijtzga rcaj xhini'c najc xtoj̄l nani cayejt. Lo guijtzga caj: “Dee najc Jesús reii xten rexpejn̄ Israel.”

³⁸ Nájza tio'p gubaan cuaj lo stio'p cruzj con laani. Tejni cuaj lo te cruzj xlad-bee Jesús, steeni cuaj xladbájgwni. ³⁹ Luxh renani sadejd nejzga guniyajreni Jesús, cagusniibreni yejcreni, ⁴⁰ cayäjpreni lojni:

—jJa'ä! Luj ni nutiexhlu guidoo, luxh chontis dxej niunchesacluni; palga guli najclu Xi'n Dios, biäjt loj cruzjga.

⁴¹ Nájza rebixhojz ni rnibee, náj remastr xten leii, baxhiznäjrenini räjpreni loj sa'reni:

⁴² —Baslaani xhidajl bejn, xhoxh di gacdi guslaani lagajc laani. Palga najcni reii xten rexpejn̄ Israel, sujiäjtni lo cruzj nanaj te chalilajznu xtiidxni.

⁴³ Huinälajzni Dios, naj suguslaa Diosni palga sanälajz Diosni; ni najni: “Narä nacä Xi'n Dios.”

⁴⁴ Regubaan ni caj lo recruzj sigajcza guniyajreni Jesús.

Che gujt Jesús

(Mr. 15:33-41; Lc. 23:44-49; Jn. 19:28-30)

⁴⁵ Dxejcti bicäy guideb guedxliuj läidxej hasta rcachon̄ gudxej. ⁴⁶ Si'cti rcachon̄ gudxej guredxa' Jesús dipduxh, räjpmi:

—Elí, Elí, ¿lama sabacatani? —dee säloj: Xtiozä, Xtiozä, ¿xhicuent gulälazlu narä?

⁴⁷ Yu' reni suga' ro'c, che biejn diajgreni räjpmi si'c, räjpmi:

—Cabejdx Dade're Elías.

⁴⁸ Baxungajc tejreni, huica'ni te sponj, bahuajdxnini loj binagr, bacuaanini yejc te biquii te badzugni binargra ro' Jesús. ⁴⁹ Dxejc reni tre' ro'c räjpmi:

—Basaan; guidon la siääd Elías te guslaanini.

⁵⁰ Dxejc guredxaduxh Jesús stehuält, baslaatini xpriitni. ⁵¹ Lagajc orga biräsya' ladro ni zääb neñ guidoro, gujcn̄i tio'p la' jiaali hasta lo yuj. Gujc te xuro, sas gusuj bej reguero. ⁵² Dxejc gubicaj reguij ni niäuu ro' rebaa, luxh gubansac xhidajl xpejn̄ Dios ni gujt aguc xchej. ⁵³ Dxejcti, che huäjs Jesús lo rebeñgut, biriireni neñ baa, baluilojreni lo xhidajl bejn̄ ni rbäjz guedx Jerusalén.

⁵⁴ Dxejc capitán xten resoldaad nájza resoldaad ni canäj Jesús, che bahuiireni xuduxh nájza guiraa recos ni gujc ro'c, bidxejbreni, räjpmi:

—Guliipacni najc dade're Xi'n Dios.

⁵⁵ Zijtru tre' xhidajl regunaa ni biädnañl Jesús che biriini nez Galilee te bahuiirenini. Cadxelojtisreni guiraa ni cayajc ro'c. ⁵⁶ Tej regunaaga najc Marii Magdalen̄, steeni najc Marii xnan Jacoob nájza José, steeni najc xnan rexi'n Zebedeo.

Huicua'tzreni Jesús

(Mr. 15:42-47; Lc. 23:50-56; Jn. 19:38-42)

⁵⁷ Che gojl gudxej, bidzuj̄n te beñrajpmi ni siääd guedx Arimatea; laani José. Nájza dade'ga najc tej reni birinañl Jesús. ⁵⁸ Huij dade'ga loj Pila't, gunabni tiejxh Jesús. Dxejc gunibee Pila't gudeedrenini lojni. ⁵⁹ Cua'ti José tiejxh Jesús, batejbnini neñ te bariadya, ⁶⁰ huitixhnini neñ xpaapacni. Nacoob baaga, gojnni bidäänni cuä' te guilaj. Dxejc basäuni ro' baaga con guiro, dxejcti siini.

⁶¹ Sobga'za Marii Magdalen̄ nájza stee Marii nez loj baa, bahuiireni biga'tzni.

Xhi räjpmi resoldaad ni cuanäj xpaaj Jesús

⁶² Che gudejd dxej xten ni gulec-cheereni lanij, bara yääl bidojpmi rebixhojz ni rnibee nájza rebejn̄ ni laa refarisee, bidzuj̄nreni loj Pila't, ⁶³ räjpmi lojni:

—Dad, banaj laaznu xhi räjp bejn ni rusgueere. Räjpni: “Che ted chon dxej sibansacni loj rebengut.” ⁶⁴ Ni'c baxhal chu chacanj ro' baaga dxejli guisa' chon dxej, te di chää rexpejn pacni chaläärenini tiejxhni, dxejc gäbreni loj rebejn: “Agubansacni loj rebengut.” Yälrusgueega sajc cuentroru loj ni gujganid.

⁶⁵ Räjp Pila't lojreni:

—La'tu rajptu te cuaa soldaad; colchäj, basäutzu'tz ro' baaga si'ctis ni sajc guntu.

⁶⁶ Dxejcti sääreni, basäutzu'tzreni ro' baaga; con resoldaad bacuaareni te seii lojni te rut faldini. Dxejc basa'nreni resoldaad canäj ro'c.

28

Sibansac Jesús loj rebengut

(Mr. 16:1-8; Lc. 24:1-12; Jn. 20:1-10)

¹ Che gudejd sabd, dxej ni ruzilajz rexpejn Israel, che gusloj cayänij lo guedxliuj te jiu' stee xmaan, bidzujn Marii Magdalen näjza stee Mariiga, siädhuiireni lo baa. ² Luxh alagujc te xuro ni basniib lo yuj, sa'csi biääd te angl xten Dios xhaguibaali te badzucajni guij ni niäuu ro' baaga, dxejc gurejni yejc guijga. ³ Rdimbichaduxhni si'c najc che rdinya', luxh xhajbni najc nolbäj si'c najc yejg ni riajb. ⁴ Che bahuii resoldaadni, bichebduxhreni, sädiidxreni, gujcreni si'c bengut. ⁵ Dxejc räjp guixhajg xte Diosga loj regunaa:

—Na'c guidxejbtu. Ananä caguiiltu Jesús ni cuaj lo cruz. ⁶ Rutini ree sa'csi agubansacni sigajc ni najni. Coltahuii cadre gojtni. ⁷ Colguxun, colchaye'tz loj rexpejn pacni agubansacni loj rebengut. Luxh naj agunijdni lojtu sääni región xten Galilee. Ro'c suhuiitu lojni. Dee najc diidx ni rniä lojtu.

⁸ Dxejcti rusquenduxh regunaaga, biriireni ro' baaga. Cadxejbreni, cabalazduxhzareni sanäreni diidx loj rexpejn pac Jesús. ⁹ Chela bidxaagreni Jesús lo nejz, räjpni: “Xchan”, lojreni. Sas gubigreni loj Jesús, bazuxhijbreni, gudääzreni guenni'ni, gojrenini. ¹⁰ Dxejc räjpni lojreni:

—Na'c guidxejbtu. Colchanä diidx loj rexpenä, chääreni región Galilee, sa'csi ro'c suhuiireni löä.

Rediidx ni räjp resoldaad

¹¹ La'ni sää regunaaga, bidzujn gaii soldaad ni huicanäj ro' baa lo guejdxga, huisa'nreni diidx lo rebixhojz ni rnibee xcuent guiraa ni guzajc ro' baaga. ¹² Dxejc rebixhojz ni rnibee bachagsa'zarenini con rebengool te bia'nreni diidx gudeedreni xhiroob meel lo resoldaad, ¹³ räjpreni lojreni:

—Scree colye'tz lo rebejn: “La' ni nagayesnu, canäjnu ro' baa, biääd rexpejn pac Jesús guläxhiga'tzreni tiejxhni.” ¹⁴ Palga jientiajg gubernadoor dee, siohuiinuni te di yu' xhi gunni la'tu.

¹⁵ Dxejcti cua' resoldaad meel, bejnreni si'cni räjp rebixhojz. Luxh si'c bire'ch diidx loj guiraa rexpen Israel. Najli canisijcreni si'c.

Baxhal Jesús rexpejn pacni

(Mr. 16:14-18; Lc. 24:36-49; Jn. 20:19-23)

¹⁶ Dxejcti sää retzubiteeb xpejn pac Jesús lo región Galilee, lo dajn cadre bia'n Jesús diidx guidxaagnireni. ¹⁷ Cheni bahuiireni loj Jesús, bazuxhijbreni, gojrenini, per yu' reni ractio'p lajzreni. ¹⁸ Dxejc gubig Jesús lojreni, guninäjnireni, räjpni:

—Arapä guiraa yälrnibee xhaguibaa näjza lo guedxliuj. ¹⁹ Ni'cni, colchäj, guideb guedxliuj colchagajn bejn gac xpenä, colgutiobnisreni, con laj Gueb Dios, näj laj Xi'n Dios näjza laj Sprit Dxan xten Dios. ²⁰ Colguluiireni gusoobreni

guiraa rediidx ni guinibeä. Luxh lagajc narä suganää la'tu guiraa redxej,
dxejli che nitloj guedxliuj. Sugacni si'c.

Diidx Xcuent Jesucrist Nani Bacuaa San Marcw

Baluu Juan ni rutiobnis

(Mt. 3:1-12; Lc. 3:1-9, 15-17; Jn. 1:19-28)

¹ Scree gusloj diidx xcuent Jesucrist, Xi'n Dios. ² Si'cni bacuaa toIsaías, ni gunii xtidx Dios, che räjp Dios:

Bahuii gan, guxhalä ni chanä xtidxä,
ganidni chääni lojlu te guzucheeni xnezyujlu.

³ Riejn xse' ni rbedxa' nez loj reyubijdz:

“Colyunsa'c xnezyuj Dad,
colslüi rexnezyulajzni.”

⁴ Biricaj Juan ni rutiobnis nez loj reyubijdzga. Räpgajcni nanabpac gusiech-lajzreni, tiobnisgajczeni, te jia xtojreni. ⁵ Riädcuadiajg xhidajl reni rbäjz Judea, näjza reni rbäjz guedx Jerusalén. Dxejcti cheni ruxhobdojreni lo Dios, rustiobnis Juanreni neñ gueu Jordán.

⁶ Xhajib Juan nacchee con guichlajd cameii, xsindoorni nacchee con guijd, niluxh gudajwni guxha't näjza dzunbäserguijxh. ⁷ Caguluiini rebejn, räpgajcni: —Detzä siääd tej nani sajcro loä, nani nicla di nungäjü surloä, cuää xcura'chni. ⁸ Narä abatiobnisä la'tu con nis, biädla laani guxhalni Sprit Dxiän xten Dios te cuääzni neñ lastootu. Si'c gustiobnis nani jiääd detzä la'tu.

Batiobnis Juan Jesús

(Mt. 3:13-17; Lc. 3:21-22)

⁹ Dxejc, neñ redxejga, birii Jesús guedx Nasare't ni yu' Galilee. Dxejcro batiobnis Juan Jesús neñ gueu Jordán. ¹⁰ Che birii Jesús neñ nis, bahuiini bixal guibaa. siädäyjt Sprit Dxiän xten Dios yejcnü si'c te palom. ¹¹ Dxejcti guibaali bejn xse' te ni räjp:

—Luj najclu xi'nä ni sanälazä; rbanälazduxhälu.

Bateed bendxab prueb Jesús

(Mt. 4:1-11; Lc. 4:1-13)

¹² Sas baxhal Sprit Dxiän xten Dios Jesús lo reyubijdz. ¹³ Dxejc guyu' Jesús ro'c tiuu dxej, guyu'ni cadro yu' reman. Sas gudiil bendxab nani rnibee, nani laa Satanás, xho niujnni te nusoob Jesús xtiidxni. Dxejcro biääd reangl xten Dios, biädhuiireneni.

Gusloj Jesús xtzuumni

(Mt. 4:12-17; Lc. 4:14-15)

¹⁴ Basälreni Juan neñ latzguiib. Dxejcti huij Jesús nez Galilee, huiluiini xtidx Dios. ¹⁵ Dxejc räjp Jesús:

—Abidzujn dxej, luxh yälrnibee xten Dios abidzujn gajxh. Colsiejch lajztu, colchalilajz xtidx Dios.

Gurejdx Jesús tajp bejn ni rniaaz bäjl

(Mt. 4:18-22; Lc. 5:1-11)

¹⁶ Sasajti Jesús nez ro' nis xten Galilee, che bahuiini lo Simón näjza loj Andrés bejtz Simón. Cazälreni xquijxhreni lo nis, sa'csi rniaazreni bäjl.

¹⁷ Dxejc räjp Jesús lojreni:

—Coltanajl narä, te gunä cueedxtu bejn lacuaa ni guiniaaztu bäjl.

¹⁸ Lagajc dxejc basa'nreni rexquijxhreni, sanätirenini.

¹⁹ Dxejc gusaj Jesús sche'n, sas bahuiini loj Jacob näj Juan, rexi'n Zebedeo. Cayunsa'creni xquijxhrene neñ xcanuureni. ²⁰ Guredxgajcni guiro'preni, dxejcti laareni basa'nrene xtadrene Zebedeo neñ canuu, näjza rexmosni, sanätireni Jesús.

Te bejn nani guyu' bendxab neñ lastooni
(Lc. 4:31-37)

²¹ Bidzujntireni guedx Capernaum. Dxejcru sabd, dxej ni rusilajz rexpene Israel, biu' Jesús neñ guidobäz xten rexpene Israel. Dxejcti baluii Jesús rebejn ni tre' ro'c. ²² Bidxelojni rebejn xtiidxni, sa'csi caguluiinireni si'cpac te ni rnibee, xhet si'cdi remastr xten leiidi. ²³ Neñ xquidobäzrene yu' te bejn yu' te bendxab neñ lastooni. Bendxabga guredxa', räjpni:

²⁴—Jesús, ni siäd Nazare't, ¿xhicuent riu'lu loonu? ¿La siädgunitlojlu nuunu? Narä numbeälu, luxh nanä luj najclu bendxan ni siäd lo Dios.

²⁵ Dxejcti guidixa' Jesús lo bendxabga, räjpni lojni:

—Basäuu ro'lu, birii neñ lastoo niguiire.

²⁶ Sas bendxabga batienguij niguiiga, luxh cabedxa'ni biriini neñ lastoo niguiiga. ²⁷ Bidxejbti guiraareni, canabdiidx loj sa'reni:

—¿Xhi dee? ¿Xhi dzuun nacoobre ruluiini? Niguiire rnibeeni näj re-bendxab, luxh ruzoobrene xtiidxni.

²⁸ Di niacäa gucbee rebejn guideb nez Galilee xhi rujn Jesús.

Basiajc Jesús xnan suegr Pedr
(Mt. 8:14-15; Lc. 4:38-39)

²⁹ Che biriireni xquidobäz rexpene Israel, huiinä Jesús Jacob näj Juan rolijz Simón näjza Andrés. ³⁰ Luxh xnan suegr Simón naga', yu'ni xliaa. Dxejc räjpreni lo Jesús:

—Cayacxhuuni.

³¹ Dxejcti gubig Jesús lojni, gunaazni ñaani, guläsnini; lagajc dxejc biriini xliaa. Dxejc gusloj cayunireni.

Xhidajl benracxhuu basiajc Jesús che huääz gubijdx
(Mt. 8:16-17; Lc. 4:40-41)

³² Che huääz gubijdx, luxh abiu' guxhijn, biädnärene guiraa rebenracxhuu loj Jesús, näjza renani yu' bendxab neñ lastooni. ³³ Luxh guideb guejdxga bidojp ro' yu'ga. ³⁴ Basiajc Jesús xhidajl renani rajc garen-garen yälguijdx. Niluxh gulääzani xhidajl bendxab, niluxh dini nusaan ninii rebenxabga, sa'csi najnrene chu najcni.

Baluii Jesús nez Galilee
(Lc. 4:42-44)

³⁵ Che bara yääl, cäjyru bistie Jesús, biriini säani te laad cadre ruti bejn. Ro'c cabejdx-canabni loj Dios. ³⁶ Dxejcti Simón näj resa'ni huitiilrene Jesús. ³⁷ Che bidxälrenini, räjpreni lojni:

—Guiraa rebejn caguiillu.

³⁸ Dxejc räjp Jesús lojrene:

—Colcho' reguejdx ni yu' gajxh, te gusuleä xtidx Dios ro'c. Par ni'cpac biälä.

³⁹ Dxejcru cuansaj Jesús guideb nez Galilee, caguluiini xtidx Dios neñ reguidobäz xten rexpene Israel. Gunibeezani birii rebenxab neñ lastoo xhidajl rebejn.

Basiajc Jesús te bejn ni ral tiejxhni
(Mt. 8:1-4; Lc. 5:12-16)

⁴⁰ Gubig te benracxhuu ni ral tiejxhni loj Jesús, bazuxhijbni. Dxejcti räjpni lojni:

—Narä nanä sajc gusiajclu narä palga rlajzlu.

⁴¹ Balaslajz Jesús beṇracxhuuga, gunaazni ṇaani, räpgajcni:

—Rlazä jiajclu. Biajc ṇaj.

⁴² Cheni guniini scree, biacgajc beṇracxhuuga. ⁴³ Dxejcti gulunejz Jesús bejṅa. Per räpxgaani lojni:

⁴⁴ —Ahuiire, rutlojdi guiniilu dee. Huiluii tiejxhlu lo bixhojz. Badedgajc lo Dios nani räjp to Moisés gudeed bejṅ lo Dios si'c te seen, te gacbee rebejṅ abiajclu.

⁴⁵ Dxejc sää bejṅa. Sas gusloj cayujyni diidx lo rebejṅ xcuent guiraa nani gujcn. Ni'cni diru niajcdi niu' Jesús nicla tej guejdx. Cansajni te laad cadre ruti bejṅ. Niluxh guiranejz ri rebejṅ, siädhuiireni Jesús.

2

Basiajc Jesús te bejṅ ni di guniib

(Mt. 9:1-8; Lc. 5:17-26)

¹ Che agudejd balti dxej, biusac Jesús neṇ guedx Capernaum. Dxejcti biejn diajg rebejṅ arbäjzni. ² Bidopgajc xhidalduxh bejṅ. Gudxaj neṇ yu'. Nicla rolä' di niajṅ nisiujreni. Dxejcti caguluii Jesús xtidx Dios lo rebejṅ. ³ Dxejcti bidzujṅ tajp bejṅ, nuureni te bejṅ ni digacti guiniib; siädnärenini lo Jesús. ⁴ Luxh di niajcdi nidzujṅreni cadre suga' Jesús, sa'csi yu' xhidajl bejṅ ro'c. Ni'c baxhalreni yejc yu' nejc cadre sujni. Dxejcru cadre baxhalreni basiäjtreni da' ni naga' beṇracxhuuga lojni. ⁵ Che bahuii Jesús rililajzreni, dxejc räjpni loj beṇrachxhuuga:

—Xi'nä, agubicaj rextojllu.

⁶ Sas gaii bejṅ ni ruluii leii ni sobga' ro'c bejṅreni xhigab neṇ lastooreni, naareni: ⁷ “¿Xhicuent rnii niguiire scree? Caniyajni Dios; rut rajcdi rudzucaj dojl. ¡Dioſtis rajc rudzucaj dojl!” ⁸ Dxejcti gucbegajc Jesús xhi xhigab cayujṅreni. Dxejc räjpni lojreni:

—¿Xhicuent rujntu xhigab si'c neṇ lastootu? ⁹ ¿La guyasiru gäbni loj beṇracxhuure: “Agubicaj rextojllu”, o la gäbni: “Huistie, cua' xta'lu, gusaj”? ¹⁰ Baj ṇaj, te gantu rajc rudzucaj Xi'n Dios, nani gujc Niguii, dojl lo guedxliujre, cania loj beṇracxhuure:

¹¹ —Lojlu rniä, ¡Huistie, cua' xta'lu, huij rolijzlu!

¹² Lagajc dxejc huistie beṇracxhuuga, guläzni xta'ni, biriini ro'c nez loj guiraareni. Ni'cni bidxelo guiraareni. Dxejc gulä'preni xpala'n Dios, räjpreni:

—Gajdpacnu guihuii sa' dzuunre.

Gurejdx Jesús Leví

(Mt. 9:9-13; Lc. 5:27-32)

¹³ Dxejcru gubisac Jesús ro' nis xten Galilee, luxh che bidojp guiraa rebejṅ lojni, baluiini xtidx Dios lojreni. ¹⁴ Sasaj Jesús che bidxaagni Leví, xi'n Alfeo. Sobga'ni cadre rusquijxni rebejṅ. Dxejc räjp Jesús lojni:

—Gudanajl narä.

Sas huisuni, sanajltini Jesús.

¹⁵ Dxejc sobga' Jesús cayajwni rolijz Leví. Luxh sobganäj Jesús xhidajl reni rusquijx, näjza rebendojl ni di chasanäj leii, näjza rexpejṅpacni, lo mex. Xhidajlreni tre', luxh sanajlreni Jesús. ¹⁶ Dxejcru rebejṅ ni ruluii leii näj referisee, che bahuiireni cayaunäjni renani rusquijx näjza rebendojl, räjpreni loj rexpejṅpac Jesús:

—¿Xhicuent rbenäj xmastrtu reni rusquijx näj rebendojl, luxh raunäjnireni, ränäjnireni?

¹⁷ Che biejn diajg Jesús xhi caniireni, räjpni lojreni:

—Renani nadip nadaan di guiquiin doctoor, per reni racxhuu rquuin doctoor. Dina niädtedxä rebensa'c, biädtedxä rebendoj, te gusiech lajzreni.

Gunabdiidxreni loj Jesús xcuent yälrucua'n
(Mt. 9:14-17; Lc. 5:33-39)

¹⁸ Cagucua'n rexpejn Juan näj rexpejn refarisee, renani najc rebenguidoo loj guedx Israel. Dxejc biääd gaii bejn loj Jesús, gunabdiidxreni lojni räjpreni: —¿Xhicuent cagucua'n rexpejn Juan näj rexpejn refarisee luxh rexpejn paclu di gucua'n?

¹⁹ Dxejcti räjp Jesús lojreni:

—¿La rucua'n rebejn ni rdon cháä cadro ru' yälruhnaa che meer suga' bi'n? Che meer suga' bi'n lojreni, direni gucua'n. ²⁰ Per sidzujn dxej sibicaj bi'n lojreni, dxejc sii sucua'nreni.

²¹ 'Rut rucuaadi tla' ladcoob loj tla' ladyux, sa'csi ladcoob rxu'nni luxh rutiäjzni ladyuxga, dxejc xhiroobruni räjs. ²² Rutza rusäldi bin ni gajd guilaj nen guidyux ni abigaa. Sa'csi bin ni gajd guilajga sutiäjsni guiidga che guilajni, luxh sinijt binga näjza guiidga. Ni'cni nanab gusälni bincoob nen guidcoobza.

Batojp rebejn ni rinajl Jesús triuu sabd
(Mt. 12:1-8; Lc. 6:1-5)

²³ Te sabd, dxej ni rusilajz rexpejn Israel, sasaj Jesús nez loj reyuya'n. Sas gusloj rexpejn pacni caläädx doj lo triuu. ²⁴ Dxejc räjp refarisee, renani najc benguidoo loj guedx Israel, loj Jesús:

—Arniä, ¿xhicuent rujn rexpejn paclu dzuun ni di guchaag gunni nen dxej ni rusilajznu, ä?

²⁵ Dxejcti räjp Jesús lojreni:

—¿La gajdtu goj nani bejn toDavid te huält, laani näj resa'ni, ä? Che biäädx xhi gauureni, gulaanreni. ²⁶ Biu' David nen xyu' Dios cheni guyu' toAbiatar loj Dios. Abiatar sajcro loj rebixhojz ni guyu' nen xquidoo rexpejn Israel. Dxejc gudajw toDavid reyätxtiil ni dzuub ro'c. Badeedzanini gudajw rebejn ni yunäjni. Luxh rebixhojztis rajc rajw yätxtiilga.

²⁷ Räjpza Jesús lojreni:

—Dios bejn dxe sabd sa'csi najnni naquuinpac gusilajz bejn. Dini niujn sabd te gapda bejn. ²⁸ Ni'cni narä, Xi'n Dios ni gujc Niguii, näjza sabd rnibeä.

3

Niguii ni nabijdz te naani
(Mt. 12:9-14; Lc. 6:6-11)

¹ Biu' Jesús stehuält nen xquidobäz rexpejn Israel. Ro'c yu' te niguii nani nabijdz te naani. ² Niluxh ro'c cagula'tz rebejn Jesús don la susiajcniguiiga sabd, dxej ni rusilajz rexpejn Israel, sa'csi rlajzreni cue'creni xquejni loj nani rnibee rexpejn Israel. ³ Dxejc räjp Jesús lo niguii nani nabijdz naani:

—Huistie, guzuj galäiire.

⁴ Dxejcti gunabdidxgajcni loj gaii rebejn ga, räjpni:

—¿La laaca gunni dzunza'c, o la dzunguijdx, sabd, ä? ¿La suslaani yäl nabajn, o la sugu'tni?

Luxh laareni biacdxireni. ⁵ Dxejc nadxe'ch bahuii Jesús lojreni, luxh guchuin lajzni, sa'csi guc najd lajzreni. Dxejc räjp Jesús loj niguiiga:

—Baslii naalu.

Dxejcti basliini naani. Biajctini. ⁶ Dxejcro biunejz refarisee. Guslogajcni caguchaagreni diidx con reni nadxaag Herodes, te don xho ju'treni Jesús.

Xhidajl bejn bire' ro' nis

⁷ Jesús nájza rexpejn_{pacni} sääreni ro' nis, luxh xhidajl beñ Galilee birinajlni. ⁸ Che gojnreni redzunro ni rujn Jesús, xhidajlreni biäd. Yu'reni birii Judea, yu'reni birii guedx Jerusalén, yu'reni birii Idumea, yu'zaren birii nejj stelaad gueu Jordán, biriizaren nez guedx Tiro, náj nez guedx Sidón, biädhuiireni loj Jesús. ⁹ Ni'cni räjp Jesús loj rexpejn_{pacni} quiilreni te canuu, te na'c gutää reben_{xhidaalgani}. ¹⁰ Abasiajc Jesús xhidajl beñ_{racxhuu}, ni'cni guiraasi beñ_{racxhuu} caxa't lojni, te canrenini te jiajcreni. ¹¹ Niluxh che rhuii reben_{dxab} lojni, ruzuxhijbreni lojni. Dxejcti rbedxa'reni räjpreni:

—Luj najclu Xi'n Dios.

¹² Dxejcti Jesús gudidxa' lojreni te na'c niäjbreni chu najcni.

Gule Jesús tzubitiop bejn loj reni rinajlni

(Mt. 10:1-4; Lc. 6:12-16)

¹³ Birii Jesús sääni lo te dajne' cadre gurejdxni renani rlajzni cueni. Gubigtireni lojni. ¹⁴ Dxejcti guleni tzubitio'preni te sanäjreni laani, te guxhalnireni chaluiireni xtidx Dios; ¹⁵ te ga'preni yäl_{rnibee} te gusiajcreni beñ_{racxhuu}, te cuääzaren reben_{dxab}. ¹⁶ Retzubitio'p bejn ni gule Jesús najc: Simón, ni gulälajzani Pedr. ¹⁷ Dxejcti Jacoob con Juan, rexi'n Zebedeo, gulälaj Jesús Boanerges. Con xtiid_{xnu} sälojni bejn ni nasesya', si'c guzii. ¹⁸ Náj Andrés, Felipe, Bartolomé, Mateo, Tomás, Jacoob xi'n Alfeo, Tadeo, Simón, ni di guidxejb_{rnigajc}, ¹⁹ náj Judas Iscariot, ni bato' Jesús loj reni rdxechlajz lojni. Sä'tireni roliz te dade'.

Yäl_{rnijaj} loj Sprit Dxan xte Dios

(Mt. 12:22-32; Lc. 11:14-23; 12:10)

²⁰ Dxejc bidopsac reben_{xhidaalgaj}; nicla niajc niaunäj Jesús rexpejn_{pacni}. ²¹ Che biejn diajg resa' Jesús dee, biädxhiirenini, sa'csi naarenini, yej_{cni} cayajc.

²² Rebejn ni ruluii leii ni birii guedx Jerusalén bidzuj_{nza} lo Jesús, dxejc räjpreni:

—Beelzebú, nani rnibee reben_{dxab}, yu' neñ lastoo niguiire. Niluxh nani rnibee reben_{dxab} rudeed yäl_{rnibee} lo Jesús te cuääni beñ_{dxab}.

²³ Dxejc gurejdx Jesús rebejn_{ga}, bijyni te cuent ni ruluii lojreni, räjpni:

—¿Xho gurilaagw beñ_{dxab} lagajc sabend_{xabni}? ²⁴ Palga rebejn xten te yäl_{rnibee} la'reni, luxh til_{näj} te cuaani ste cuaaga, di yäl_{rnibee}ga chu xchej.

²⁵ Palga te famil_{rdil}näj lagajc sa'ni, di familga chu xchej. ²⁶ Palga beñ_{dxab} nani rnibee til_{näj} lagajc laani, di xcäl_{rnibee}ni chu xchej, sa'csi ni'c gun luuxni.

²⁷ 'Rut gacdi jiu' roliz te niguidaan, cuanni xhixhtenni, palga dini gulib_{xgaani}, si'ctis sajc cuanni xhixhtenni.

²⁸ 'Rniliäpac lojtu guiraa dojl nájza yäl_{rnijaj} xten rebejn sajc jia. ²⁹ Nani guiniyaj Sprit Dxan xten Dios, digacdi guibicaj rextol_{jni}, anuutisni xtoj_{lni} par tejpas.

³⁰ Räjpni si'c sa'csi caniireni yu' beñ_{dxab} neñ lastooni.

Xnan con rebetzhuin Jesús

(Mt. 12:46-50; Lc. 8:19-21)

³¹ Dxejcru bidzuj_n xnan Jesús, náj rebetzhuinni. Direni niu', baxhal_{tisreni} chu huitejdxni. ³² Rebejn ni sobga' gabi Jesús räjpreni lojni:

—Xnanlu náj rebejt_{zlu} suga' ro lä', caguuilreni luj.

³³ Dxejcti räjp Jesús lojreni:

—¿Chu reni'c najc xnanä náj rebetzä?

³⁴ Bahuigajcni loj renani sobga' gabini, dxejc räjpni lojreni:

—Redee najc xnanä, rebetzä. ³⁵ Chutis ni rujn ni rlajz Dios, ni'c najc betzä, bisianä, näjza xnanä.

4

Xcuent niguii ni sale'c binij
(Mt. 13:1-23; Lc. 8:4-15)

¹ Suga' Jesús ro' nis guslosac caguluiini xtidx Dios, luxh bidojp xhidajl bejn cadro suga'ni. Xhidalduxh najcreni, ni'cni biu' Jesús nen te canuu ni suga' ro' nisga. Dxejcti gurejni nenga, biääd guiraa bejn bia'ntireni ro' nis. ² Dxejc baluiinireni guiraloj, ganax cuent ni ruluii guniini. Che caguluiini, räjpni lojreni:

³ —Gucuadajgtu dee. Guyu' te niguii. Biriini sale'cni binij. ⁴ Che guslojni cabe'cni, yu' lajt biajb binijga cuä' nezyuj. Sas biääd reman xhaguibaa, gudajwreni binijga. ⁵ Stee lajt biajb binijga nen guij cadro xheti xhidajl yuj. Binijga gulengajcni, sa'csi xheti xhidajl yuj ro'c. ⁶ Dxejc, sa'csi lo jiaa yu' xlobaani, che birii gubijdx, bigolni, gubijdzitini. ⁷ Stee lajt biajb binijga nen yaguejch. Dxejcti biroob reyaguejchga, luxh bejnreni balaa loj binijga, ni'cni gujcn ganax bilii. ⁸ Per stee lajtga biajb binij lo yusa'c. Gulejn reyäjlgä, guroobreni, gucsa'creni. Yu'reni cuaj galbitzuu xob, yu'reni cuaj gayojn xob, yu'zaren cuaj tegayuu xob.

⁹ Dxejc räjpni lojreni:

—Chutis ni rlajz guisieed, sucuadajgni.

¹⁰ Che asii xhidajl bejn, rebejn nani suga' gajxh cadro suganäj Jesús guitzubitio'p xpejn pacni gunabdiidx lo Jesús xhi säloj cuentre. ¹¹ Dxejc räjp Jesús:

—Dios abejn gacheetu te gantu xho najc yälxhiga'tz xten xcälrnibee Dios nani najc xhiga'tz najli. Niluxh lo ste'ca bejn con cuenttis rniä guiraa recosre, ¹² te mase cahuiireni direni gumbee, te mase cayiejn diajgreni, direni gacbee. Scree gacni, te na'c gusiejch lajzreni, te na'c guibicaj xtojreni.

¹³ Räjpzani lojreni:

—¿La ditu gacbee cuentre? ¿Xhocha gacheetu xhidajlru cuent? ¹⁴ Niguiire nani sale'c binij najc si'c te nani ruluii xtidx Dios. ¹⁵ Yu' bejn ni najc si'c binij ni biajb cuä' nezyuj: riejn diajgreni xtidx Dios nani ruluii bejn. Dxejc che jiejn diajgreni xtidx Dios, riääd Satanás rbägajcni xtidx Dios ni yu' nen lastooreni. ¹⁶ Yu'za rebejn ni najc si'c binij ni biajb nen reguij, renani che jiejn diajgreni xtidx Dios, rbaa lajzreni rca'reni diidxga. ¹⁷ Niluxh direni nisiudzu'tz, sa'csi guxii huilii lajzreni. Che rdejreni trabajw o che rusacsí bejnreni xcuent xtidx Dios, rusaanreni xtidx Dios. ¹⁸ Yu'zaren najc si'c binij ni biajb nen yaguejch, riejn diajgreni xtidx Dios, ¹⁹ dxejc che ru'ruren yärsia' xcuent recos guedxliujre, rsia' lajzreni ga'preni meel, rlajzreni ga'pruren guiraloj recos, dxejc riu' redee nen lastooreni, rusäuuni lo xtidx Dios, xlia'si biejn diajgreni xtidx Dios. ²⁰ Yu'za bejn ni riejn diajgreni xtidx Dios, rlii lajzreni diidxga, xhet xlia'ti biejn diajgreni xtidx Dios. Najcreni si'c binij ni biajb loj yusa'c. Yu' rebejn ni najc si'c nani cuaj galbitzuu xob lojni, yu'za rebejn ni najc si'c nani cuaj gayojn xob lojni, yu'za rebejn ni najc si'c nani cuaj tegayuu xob lojni.

Xhet yuchetzu'tzdi ni di guidzujn dxej sisäbdiidx
(Lc. 8:16-18)

²¹ Räjpza Jesús lojreni:

—¿La riädnätu te bajl te suuni dejtz te alm, o nen te loon, ä? ¿La xhet nanabdi suuni jiaa te guzanijni, ä? ²² Xhet yuchetzu'tzdi ni di guidzujn dxej sisäbdiidx.

Xhetiza xhicos naga'tztis. Naga'tzni naj, niluxh sidzujn dxej sule'ni. ²³ Pal yu' chu rlajz guisieed, sucuadiajni.

²⁴ Rājpa Jesús lojreni:

—Colyunxgaa xhigab rediidx ni riejn diajgtu. Nani rusältu loj xhigabtu, ni'cza guniidx Dios xca'tu, luxh sisiojbru yejc ni xca'tu. ²⁵ Renani rajp che'n yäl'najn, lojreni sudeedru Dios yäl'najn. Luxh renani xhetru rusäldi loj xhigabreni, sudzucaj Dios yäl'najn nani rajpreni.

Xcuent binij ni roob

²⁶ Guniiza Jesús lojreni:

—Yäl'nibee xten Dios najc si'c rsiajc te niguii che rbe'cni binij lo yuj, ²⁷ dxejc yäl riguesni, rdxee ristieni, dxejcti rliejn binijga, luxh di niguiiga gan xho roobni. ²⁸ Acanajn yujga rajc binij lojni. Galoo rii cuane'ga, sas rii doj lojni. Dxejcru rdxaj bejdz'e'neñ dojga. ²⁹ Dxejcti che aguyajl bedze'ga, ruxhañi chu rituugni, sa'csi abidzujn dxej ni guidojpn.

Xcuent bedz muxhtas

(Mt. 13:31-32; Lc. 13:18-19)

³⁰ Rājpa Jesús:

—¿Xhini'c najc si'c najc xcäl'nibee Dios? ¿Xhi te cuent guiniinu te guiluiinu? ³¹ Si'c te bedz muxhtas ni rbej loyuj, si'c najcni. Bedz muxhtas najcni bedz bäze'ru loj guirali bedze' ni yu' loj guedxliuj. ³² Dxejc che agurejni, roobni, rajcni yagroru loj recuaan. Dxejcti roob rexajcwni te rajc rujn reman xhaguibaa xpitiääzni neñ xpalaani.

Si'c baluii Jesús ganax con cuent

(Mt. 13:34-35)

³³ Si'c ruluii Jesús rebejn xtidx Dios guniini xhidal cuent sa' redee, si'ctis ni rajc racbeereni. ³⁴ Con recuent ni ruluiitis gunii Jesús lojreni. Niluxh lo rexpejn pacni basule'ni guiraa recuentre.

Rusiadxi Jesús bej näj nisdoo

(Mt. 8:23-27; Lc. 8:22-25)

³⁵ Lagajc gudxejga räjpni loj rexpejn pacni:

—Colcho', chonnu stelaad nis xten Galilee.

³⁶ Basa'ntireni rebejn, sanätireni Jesús neñ canuu cadre sobgajcni. Dxejcti sgaii canuu sanajlni. ³⁷ Chela gubi' te beduxh, gusloj cayu' nis neñ canuuga. Cadxaj canuuga nis. ³⁸ Nagayejs Jesús dejtz canuuga, nagayejsni. Bacuäänreni Jesús, räpgajceni lojni:

—Dad mastr, ¿la dilu jiu siääznu neñ nis, ä?

³⁹ Dxejc huistie Jesús, gudidxa'ni lo bejga, räjpzani lo nis:

—Guredxi.

Guläzgjajc bej, biadxiini. ⁴⁰ Rājpa Jesús loj rexpejn pacni:

—¿Xhicuent cadxebduxhtu? ¿La ditu chalilajz xtidxä, ä?

⁴¹ Luxh laareni bidxelojreni, räjpreni loj sa'reni:

—¿Chucha dee ni rnibee bej con nis, luxh ruzoobreni xtiidxni?

5

Nigui Gadara ni yu' beñxab neñ lastooni

(Mt. 8:28-34; Lc. 8:26-39)

¹ Bidzujntireni stelaad ro' nisga, lo yuj xten Gadara. ² Si'ctis ni birii Jesús neñ canuu, biädgjajc te niguii lojni ni birii neñ rebiliää cadre rga'tz beñgut. Yu' beñxab neñ lastoo niguiiga. ³ Rbäjzni neñ rebiliääga luxh rut rajc di rucuaduuni, nicla con cadenguiib. ⁴ Xhidajl huält agacbacuaduureni ni',

naa niguiiga con cadenguuib, luxh litis batiuugni recadenguibga, rut rajcdi rusiacdxini. ⁵ Si'ctis canzajni, dxej, yääl. Rbedxa'ni neṅ redajn, neṅ rebiliää, luxh cagutiugni tiejxhni con reguij. ⁶ Che bahuiini loj Jesús zijtru, baxuṅni huichaglojni Jesús, bazuxhijbni lojni. ⁷ Dxejcti rbedxaduxhni, räjpni:

—¿Xhicuent siäädlu loä, Jesús, Xi'n Dios ni yu' jiaro? Rniabä lojlu nez loj Dios na'c gusacsílu narä.

⁸ Sa'csi agac cayäjb Jesús lojni:

—Luj, beṅdxab, birii neṅ lastoo niguiiga.

⁹ Dxejcti gunabdiidx Jesús räjpni:

—¿Chu laalu?

Dxejc räjpni:

—Narä laä Legión, nani säloj xhidaltro, sa'csi xhidajl najcnu.

¹⁰ Sanuutis canabni lo Jesús na'c guxhalni rebeṅdxabga ste'ca guejdx. ¹¹ Ro'c tre' xhidalduxh cuch cuä' dane'ga, cayajwreni. ¹² Dxejc gunab rebeṅdxabga loj Jesús, räjpni:

—Baxhal nuure loj recuchre te jiu'nu neṅ lastooreni.

¹³ Dxejcti basaan Jesúsreni. Biriiti rebeṅdxabga neṅ niguiiga, dxejc biu'reni neṅ lastoo recuchga. Yu' si'cti tiop miḷ cuch ro'c. Baxuṅ recuchga, dxejc birolreni ro' guilaj, bitejbreni neṅ nis, gujttireni neṅ nisga.

¹⁴ Renani cayajp recuchga baxuṅreni, huiyeiireni diidxga neṅ guejdx, näjza loniaa. Dxejc biääd bejṅ biädhui nani gujc ro'c. ¹⁵ Che bidzujṅreni cadre suga' Jesús, bahuiireni loj niguii nani guyu' rebeṅdxabga neṅ lastooni. Sobga'ni ro'c, najcwni xhajbni luxh nasa'c yejcní. Niguiire najc nani guyu' beṅdxab ni laa Legión neṅ lastooni. Bidxejbti rebejṅ nani bahuii lojni. ¹⁶ Dxejcru rebejṅ ni bahuii xhi gujc ro', huiyeiireni diidx xho guzajc niguiire nani guyu' beṅdxab neṅni galoo, näjza nani guzajc recuch. ¹⁷ Dxejc gusloj canabreni loj Jesús jiunejzni.

¹⁸ Che biu' Jesús neṅ canuu, niguii nani guyu' beṅdxab neṅ lastooni gunabni loj Jesús, räjpni:

—Huinä narä.

¹⁹ Per di Jesús nusaan nijni. Räjp Jesús lojni:

—Huij rolijzlu, lo resa'lu. Huiyeii diidx lojreni xho bennäj Dadlu, näjza xho balaslajzni luj.

²⁰ Sä'ti niguiiga, gusloj cayujyni diidx neṅ reguejdx xten Decápolis xho bennäj Jesúsni. Guiraa rebejṅ bidxeloj.

Xindxa'p Jairo näjza gunaa ni bahual xhajb Jesús

(Mt. 9:18-26; Lc. 8:40-56)

²¹ Che bidzuṅsac Jesús stelaad ro' nisga neṅ canuu, bidzujṅ xhidalduxh bejṅ cadre suga'ni. Bia'nti Jesús ro' nisga. ²² Dxejcru biääd te niguii nani laa Jairo, ni rnibee neṅ xquidobäz rexpē Israel. Che bahuiini loj Jesús, bazuxhijbni lojni. ²³ Canabpacni lojni, räjpni:

—Xindxapä'ä acayejt. Gudaa, guzujlu naalu yejcní, te jiajcní, te guibajṅni.

²⁴ Sanäti Jesús bejṅga. Xhidajl bejṅ sanajlni, luxh cagutäärenini. ²⁵ Loj rebeṅxhidaalga yu' te gunaa ni agujc tzubitio'p ijz racxhuuni yälguidxbäii.

²⁶ Agudedduxhni trabajw, abahuii xhidajl doctoorni. Xlia'si abanijtni guiraa nani rajpni, luxh xhet racnäjdini, alga rxuuruni. ²⁷ Sa'csi biejn diajgni xhini'c canii rebejṅ xcuent Jesús, gubig gunaaga nez dejt Jesús, guideb neṅ rebejṅ, bahualni xhajb Jesús. ²⁸ Cayujṅni xhigab, naani: “Palga narä falä xhajbtisni, siacä.” ²⁹ Lagajc dxejc guläjz caxe' xtiejṅni, gucbeeza tiejxhni abirii xcälracxhuuni. ³⁰ Gucbegajc Jesús yu' chu abasiajcní. Gubiregajcní neṅ rebeṅxhidaalga, räjpni:

—¿Chuni'c bahual xhabä?

³¹ Dxejcru räjp rexpejn pacni lojni:

—Rhuiilu beñxhidaal cagutäálu, luxh naalu: “¿Chuni'c bahual xhabä?”

³² Sas cahuii Jesús nez ree, nez rec, te fiini loj nani bahualni. ³³ Dxejc bidxejb gunaare, racejsni, sa'csi gucbeeni xhini'c gujcní. Dxejc biäädni, bazuxhibni loj Jesús, räbliini loj Jesús guira'ti ni bejnni. ³⁴ Dxejc räjp Jesús lojni:

—Xindxa'pä, abiajclu sa'csi huililajzlu. Gulecdxi lajzlu, huij rolijzlu, abiajc xcälracxhuulu.

³⁵ Canisijc Jesús si'c che bidzujñ renani birii rolijz dade' ni rnibee neñ xquidobáz rexpejn Israel. Räjpreni:

—Agujt xinxape'lu. ¿Xhicuent rusieedrulu Dad maestr?

³⁶ Dxejc che biejn diajg Jesús nani caniireni, räjpni lo dade'ga:

—Na'c guidxejblu. Bililajztis.

³⁷ Luxh dini nusaanru nij chu ninäni, Pedrtis näj Jacoob näjza Juan bejtzni. ³⁸ Che bidzujñni rolijz dade'ga, bahuii Jesús biejy ni cayujñ rebejñ ni rbedxa' roon. ³⁹ Biu'tini räjpni:

—¿Xhicuent rujntu si'c? Gajd dxape're guet. Nagayejssini.

⁴⁰ Alga baxhiznäjrenini. Dxejc gunibee Jesús birii guiraa rebejñga. Dxejcti huiñäni xcuzajñ dxape'ga con renani sanäni. Biu'reni cadre naga' dxape're.

⁴¹ Gunaazni ñaa dxape'ga, dxejc räjpni:

—Talita cumi —nani säloj con xtiidxnu: Dxape', lojlu rniä, huistie.

⁴² Dxejcti huistiegajc dxape'. Tzubitio'p ijz yu' dxape'ga. Bidxeloduxh rebejñ ni bahuii guläs Jesús dxape'ga. ⁴³ Dxejc balijdx Jesús reni te rut lojdi chaye'tzreni xhini'c gujc. Gunibegajcni gudeedreni xhi gauu dxape'ga.

6

Che guyu' Jesús Nazare't

(Mt. 13:53-58; Lc. 4:16-30)

¹ Dxejcru birii Jesús ro'c, huijni lajdxni, sanäzani rexpejn pacni. ² Che bidzujñ sabd, dxej nani rusilajz rexpejn Israel, gusloj caguluiini neñ xquidobáz rexpejn Israel. Bidxeloj xhidajl bejñ nani biejn diajg rextiidxni, räjpreni:

—¿Caro bisieed niguiire guiraa recosre? ¿Xhi yälñajñre cua'ni ni'c rajc rujñni rextzunduxh Dios con ñaani? ³ ¿La xhet laadi carpinteer, xi'n Marii, bejtz Jacoob, näj José, näj Judas, näjza Simón dee, ä? ¿La xhet reedi rbäjz rebisianhuinni?

Luxh bidxechlajzreni lojni. ⁴ Dxejc räjp Jesús lojreni:

—Catis rinälajzreni te ni rnii xtidx Dios. Lajdxtisni, lagajc loj resa'ni, rolijztisni, ro'c rut rinälajzdini.

⁵ Luxh di niajcdi niujñ Jesús xhidajl milaagwr ro'c. Tiopchontis beñracxhuu basiajcní, bazujñ ñaani yejreni. ⁶ Bidxelo Jesús sa'csi di lajzreni nilii. Caguluiitini neñ guiraa reguejdx'e ni ria'n gajxh nejzga.

Baxhal Jesús tzubitio'p bejñ ni rinajlni chaluiireni xtidx Dios

(Mt. 10:5-15; Lc. 9:1-6)

⁷ Dxejcru gurejdxni guitzubitio'p xpejn pacni. Gusloj caguxhalni tiopgajreni; badeedzani yälñnibee lojreni te guinibeereni loj rebeñdxab. ⁸ Gunibeeni xhet chanädireni lo nejz, ganaxhtis te yajg te sanäjreni. Di nungäjñ chanäreni nicla bisiuud, nicla yätxtiil, niclaza meel neñ dobdäjñ. ⁹ Nungäjñza xcaj gura'ch ni'reni, nägajc ga'preni tejtis gamangw, xhet tio'pdini. ¹⁰ Dxejcti räjpni lojreni:

—Cadrotis jiu'tu neñ te guejdx, coljia'n neñ tejtis yu' guiraa redxej ni chutu guejdxga. ¹¹ Palga yu' te guejdx cadre direni gusaan jiu'tu luxh di rñajzreni

cuadiajgreni diidx ni sanätu, col_rii guejdxga, col_cuijb guxhuj ni'tu si'c te seen te gacbeereni xhet laadi bejnreni. Rniliäpac lojtu, guxiiru trabajw ted reben Sodomä näj reben Gomorra quela rebejn ni yu' guejdx cadre direni gusaan jiu'tu.

¹² Dxejc biriireni, sääreni. Cayäbgajcreni nanabpac gusiejch lajz rebejn. ¹³ Gulääzarenä xhidajl ben_dxab dxejcti gudääbreni se't yejc xhidajl ben_rracxhuu, luxh biajcreni.

Xcälgujt Juan ni rutiobnis

(Mt. 14:1-12; Lc. 9:7-9)

¹⁴ Herodes najc nani rnibee dxejc. Biejn diajgni xpala'n Jesús, sa'csi guiraliä rebejn calä'p xpala'nni. Dxejc räjp Herodes:

—Juan nani rutiobnis ahuäjs loj reben_gut, ni'c rajc rujnni remilagwre.

¹⁵ Sgaii bejn räjp:

—Laa Elías ni gunii xtidx Diosni.

Sgaiireni räjp:

—Laa te bejn ni rnii xtidx Dios, o sa' te rebejn ni gunii xtidx Dios agujc xchero.

¹⁶ Che biejn diajg Herodes si'c, räjpni:

—Laa Juan dee, nani gunibeä biru' yejcnä, luxh naj agubañsacni loj reben_gut.

¹⁷ Sa'csi lagajc Herodes gunibee biga' Juan, dxejc bacuaduurenäni con cadenguib nen latzguib, xcäl_nasa'c Herodías. Herodías gujc chääl Lib, bejtz Herodes, dxejc cua' Herodes gunaaga si'c chääl_ni. ¹⁸ Räjp Juan loj Herodes:

—Xhet laadi rbäznäjl_u chääl bejtzlu.

¹⁹ Ni'cni rdxechlajz Herodías loj Juan, luxh rlajzni ju'tnini, luxh di niajcdini ²⁰ sa'csi rdxejb Herodes Juan, sa'csi najnni ben_sa'c, ben_dxan najc Juan, ni'cni dini nusaan niujn Herodías latsiajni. Mase dini gacbesa'c ni rnii Juan, rucuaadiagsa'cni xtiidxni. ²¹ Niluxh guyu' xmood Herodías. Che gojl laj Herodes, bayaanni rexpejnni ni rnibee, näjza rebejn nani sajz nez región Galilee. ²² Dxejcti biu' xindxa'p Herodías cadre cayajwreni, baya'ni nez lojreni. Bidxaglazduxh Herodes näjza rexpioozni baya' gunaaga, xindxa'p Herodías. Dxejc räjp Herodes lo gunaaga:

—Gunab ni rlajztislu loä, narä sunidxäni.

²³ Dxejcru räplii Herodes lojni:

—Sunidxä xhitis ni guiniablu. Mase gala' yuj ni rnibeä.

²⁴ Biriitini nen yu', huiye'tzni loj xnanni, räjpni:

—¿Xhini'c guiniabä lojni?

Dxejc räjp xnanni lojni:

—Gunab yejc Juan ni rutiobnis lojni.

²⁵ Huigajcni loj reii, sas gunabni lojni, räjpni:

—Rlazä gunidxgajclu loä yejc Juan ni rutiobnis. Nen te pla't baniidx yejcnä.

²⁶ Dxejcti guc-huinuxh lajz Herodes, sa'csi abadeedni xtiidxni lojni, luxh sa'csi abiejn diajg renani sobganäjni lo xmexni, ni'c dipac rlajzni nudxojni nani gunab gunaaga lojni. ²⁷ Baxhalgajc reii te soldaad ni rcanäj ro'c, baxhalnini, te chaxiini yejc Juan. ²⁸ Ni'c huij, dxejcti bagu'tni Juan nen latzguib, biäd_nätini yejc Juan nen te pla't. Badeedtinini loj gunaaga. Dxejcti gunaaga badeednini loj xnanni.

²⁹ Che biejn diajg rexpejnpac Juan si'c, biädläsreni togoolga. Dxejcti bacua'tzrenäni nen te baa.

Bayaan Jesús gaii mil bejn

(Mt. 14:13-21; Lc. 9:10-17; Jn. 6:1-14)

³⁰ Che gubi' renani baxhal Jesús, bijreni diidx guiraa ni bejnreni nájza ni baluiireni. ³¹ Dxejc rájp Jesús lojreni:

—Coltaa, xtebnu choñnu cadro rut rbájzdi, guisilaaznu tudxe'n.

Rájp Jesús si'c sa'csi yu' xhidajl bejn ni sää, ni siääd, nicla gal gauureni. ³² Dxejcti sääreni neñ te canuu cadro rut rbájzdi. ³³ Bahuii xhidajl bejn sääreni, biembeereni Jesús. Dxejc xhidajlreni huini' ro'c, xhidajl guejdx biriireni, ganidreni bidzujñreni loj Jesús nájza rexpejnñpacni, dxejcti bidojpreni lojni. ³⁴ Birii Jesús neñ canuu, bahuiini loj beñxhidaalga. Dxejc balazlajznireni, sa'csi najcreni si'c rexiil ni ruti baxtoor xtenreni. Dxejc gusloj caguluiinireni guiraloj. ³⁵ Che gojl gudxej, gubig rexpejnñpacni lojni, rájpreni:

—Rut rbájzdi ree, luxh agudxejñaj. ³⁶ Baxhal rebejn te chääreni lo reguejdx, nájza rerench, te chasiireni yätxtiil gauureni sa'csi xheti xhi gauureni ree.

³⁷ Dxejc rájp Jesús lojreni:

—La'tu coldeed xhi gauureni.

Dxejc rájpreni loj Jesús:

—¿Xhixh sajl tiop gayuu meel yätxtiil chosiinu gauu guiraa rebeñxhidajlre?

³⁸ Dxejcti rájp Jesús lojreni:

—¿Bal yätxtiil rajptu? Colchahuii.

Che gojnreni balni dxejc rájpreni:

—Gaii yätxtiil, nájza tiop bájł.

³⁹ Dxejcru gunibee Jesús rájpreni loj guiraa rebejn:

—Colcuej xcua-xcuaatu loj guixhaya'.

⁴⁰ Sas gurej xcua-xcuaareni. Yu' lajt gurej tegayuureni, yu' lajt gurej garol gayuureni. ⁴¹ Dxejcti cua' Jesús guigaii yätxtiilga nájza guiro'p bájłga, bahuiini xhaguibaa, badeedni xquixhtios loj Dios. Dxejcti gula'ni yätxtiil nájza guiro'p bájł, badeednini loj rexpejnñpacni te badeedrenini loj guiraa rebeñxhidaalga. ⁴² Dxejc gudajw guiraareni, gudxaj xque'reni. ⁴³ Dxejcru batojpreni tzubitiop dxijm guidxadoo yätxtiil nájza bájł ni bia'n. ⁴⁴ Luxh loj guiraa rebejn ni gudajw yu' si'cti gaii mil niguii.

Guzaj Jesús loj nis

(Mt. 14:22-27; Jn. 6:16-21)

⁴⁵ Gunibee Jesús jiu' rexpejnñpacni neñ canuu, chägajcreni Betsaida, ni tre' dejtz nis stelaad, lalni cagusadiidxnirebejn. ⁴⁶ Che gulujx basadiidxnireni, sääni neñ redane', sanabni lo Dios. ⁴⁷ Cheni acayu' guxhijñ, yu' rexpejnñpacni neñ canuu galäii nis lał ni suga' Jesús xtebni ro' nis. ⁴⁸ Dxejcti bahuii Jesús abadxajgreni cagusajreni xcanuureni, sa'csi säbduhx bej. Bejga rulanaareni nez dejtzreni stehuält. Dxejcru che acara yääl, gusaj Jesús loj nis, huijni cadro sasajreni, rlajzni ninijdni lojreni. ⁴⁹ Dxejc che bahuiireni sasaj Jesús loj nis, naareni pet te beñmalni, ni'c guredxa'reni. ⁵⁰ Guiraareni bahuiireni lojni, bidxebduhxreni. Sas gunigajcni lojreni, rájpreni:

—Colsutijp lajztu. Laa naräni. Na'c guidxejbtu.

⁵¹ Dxejcti huä'p Jesús neñ canuu cadro yu'reni. Lagajc dxejc biacdxi bej, luxh laareni bidxeloduxhrene, ⁵² sa'csi direni niacbee xhini'c bennäj Jesús reyätxtiil. Guc najd lajzreni, ni'c direni niacbee.

Basajc Jesús rebeñracxhuu neñ guedx Genesare't

(Mt. 14:34-36)

⁵³ Gudejdreni lo nis, bidzujñreni lo yuj xten Genesare't. Ro'c bacuaduureni canuu ro' nis. ⁵⁴ Che biriireni neñ canuu, biembegajc rebejn Jesús, ⁵⁵ dxejcti birii rebejn guideb nejzga. Guslojti siädnäreni beñracxhuu loj Jesús, naga' rebeñracxhuuga lo da'. Cadrotis riejn diajgreni yu' Jesús riädnäreni rebeñracxhuu.

⁵⁶ Niluxh cadrotis rij Jesús, nen reguedxbäz, nen reguedxro, näjza loj rerench, rguixhreni rebenracxhuu cadre rajc guii. Dxejcti rniabreni loj Jesús te gac caanreni xhajbni, niluxh biajc guiralii renani gudajn xhajb Jesús.

7

Nani runijt lastoo bejn

(Mt. 15:1-20)

¹ Dxejcti refarisee, renani najc beņguidoo loj guedx Israel, näjza gaii rebejn ni ruluii leii, renani birii Jerusalén, bidojpreni loj Jesús. ² Bahuiireni cayajw gaii rexpejn_{pac} Jesús, luxh canii rebejn nacdxuudx naareni (dee säloj direni quiib naareni si'ctis ni rdiib naa reben lajdxreni). Ni'cni guniyajreni rexpejn_{pac} Jesús. ³ (Guiraa rebejn xten Israel, näjza refarisee, sasanäj nani baluii rebeņgool ni yu' guedx Israelreni. Direni gauu palga direni quiib naareni balti huält. ⁴ Che rbi'reni rijreni lo guii, rguibsa'creni naareni, lojreni, ni'reni, dxejcti rajc rajwreni. Niluxh guyu' xhidajl costumbr ni sasanäjruren, luxh yu' mood rguibreni rextrastreni näjza rexplooreni, näjza rextrastguibreni, näjza rexloonreni.) ⁵ Dxejc gunabdiidx refarisee näjza rebejn ni ruluii leii loj Jesús, räjpreni:

—¿Xhicuent di rexpejn_{pac}u gun si'cni baluii rebeņgool, niluxh rajwreni guideb nacdxuudx naareni?

⁶ Dxejcti gunii Jesús lojreni räjpni:

—iBeņ guijdx! Laaca gunii Isaías xcuenttu che guniini xtidx Dios. Scree cajni loj guijtz:

Guejdxre sanälajz narä con rextiidxni,
niluxh lastooreni zitro suga' loä.

⁷ Xlia'si ruzuxhijbreni, sa'csi direni chanälajz narä.

Ruluiireni si'c xtiidx_{pac} Dios nani rni rebejn.

⁸ Rusa'ntu xleii Dios, sasanädu'tztu costumbr nani baluii rebeņgool. Rdibsa'c rexploortu, rextrasttu, luxh rujnzatu xhidajlru cos sa' redee.

⁹ Räjpza Jesús lojreni:

—Rusa'ntu xtidx Dios te risanäjtu recostumbr xtentu. ¹⁰ Sa'csi räjp Moisés: “Huinälajz xtadlu con xnanlu.” Räjpzani: “Suju'tpactu nani gudzubde yejc xtadni o yejc xnanni.” ¹¹ Niluxh la'tu rniitu sajc gäb bejn loj xtadni o loj xnanni: “Dina gapä xhi cojn gacnäälü” (nani säloj, abadedä guira'ti loj Dios). ¹² La'tu ditu gusaan gunru bejn por xtadni nicla por xnanni. ¹³ Si'c rbälaztu xtidx Dios, te sasanäjtu recostumbr nani ruluiitu, luxh xhidajl cos sa' dee rujntu.

¹⁴ Gurejdx Jesús guiraa rebejn, dxejc räjpni loj guiraareni:

—Colcuadiajg, colyacbee xtidxä. ¹⁵ Rexhicos yälrajw ni rajw bejn, dini gunijt bejn_{ga}, rediidx ni rii neņ lastoo bejn, näjza recos ni rujn bejn, ni'c runijt bejn_{ga}. ¹⁶ Pal yu' chu rlajz guisieed, sucuadiajgni.

¹⁷ Dxejcti gula'reni loj rebeņxhidaal, biu'reni neņ yu'. Dxejc gunabdiidx rexpejn_{pac}ni loj Jesús xhi säloj cuent ni guniini. ¹⁸ Basejc Jesús diidx lojreni, räjpni:

—¿La näjza la'tu xheti xcäriejntu? ¿La di'tu gacbee xhitis yälrajw nani riu' neņ bejn digacdi gunijtni lastoo bejn, ä? ¹⁹ Sa'csi dini jiu' neņ lastooni; riu'ni xque'ni, rdejdtini.

Si'c guniini te baluiini guira'ti xhicos najc naya. ²⁰ Dxejc räjpni:

—Rediidx ni rii neņ lastoo bejn, näjza recos ni rujn bejn, ni'c sii runijt lastoo bejn. ²¹ Sa'csi neņ lastoo rebejn rii rexhigabguijdx, näjza yälresnäjä chääl sa'ni, yälresnäjä ni xhet najcdi chääl_{ni}, yälrugut sa'ni, ²² yälgubaan, yälrlajzni

ga'pni xhixhten bejn, yällatsiaj, yälrusgueeni, yäl xheti xtuuj lojni, yälrdxechlajz, yälrudzubde sa'ni, yälñayechlajzni, yälguyalajz. ²³ Guiraa reyällatsiajre neñ lastoo bejn riireni, luxh reni'csi runijt bejn.

Tej guna Sirofenicia ni bililajz xtidx Jesús

(Mt. 15:21-28)

²⁴ Dxejc biriini ro'c, sääni nez guedx Tiro näjza nez Sidón. Ro'c bia'nni neñ te yu' sa'csi di rlajzni niacbee rebejn caro yu'ni, niluxh di niajcdi niuxhiga'tztisni. ²⁵ Biengajc diajg te gunaa ro'c yu' Jesús. Xindxape' gunaaga yu' beñdxab neñ lastooni. Bidzujñ gunaaga, bazuxhijbni lo Jesús. ²⁶ Gunaaga rnii griegw, najcni beñ Sirofenicia. Gunabni lojni guinibeeni guirii beñdxabga neñ lastoo xi'nni. ²⁷ Dxejc räjp Jesús lojni:

—Basaan gauxgaa rebiuux, sa'csi xhet laati gudzucajni xcuxtiil rebiuux te gudeednini loj rebä'cw.

²⁸ Dxejc gunii gunaaga, räjpni loj Jesús:

—Yo, Dad. Näjza rebäcue' ni suga' neñ mex rajw nani rtejb ro' rebiuux.

²⁹ Dxejcti räjp Jesús lojni:

—Laaca rniliilu. Huij rolijzlu. Abirii beñdxab neñ lastoo xindxape'lu.

³⁰ Luxh che bidzujñ gunaare rolijzni, a dxape' naga' lo da'. Gucbegajc gunaaga abirii beñdxab neñ lastoo dxape'ga.

Basiajc Jesús te bengop

³¹ Dxejcru birii Jesús stehuält lo rexyuj guedx Tiro, gudejdni nez Sidón näjza rexyuj Decápolis. Bidzujñtini ro' nis xten Galilee. ³² Biädnä gaii bejn te niguii ni nacua't diajgni lo Jesús. Digacdiza guinisa'c niguiiga. Biädnabreni lo Jesús nusujni naani yejc niguiiga. ³³ Dxejcti badzucanjini loj rebejn. Baquitzgajcni rebicueñaani neñ diajgni, dxejcru batiobxhejnni, gudajntini lujdxni. ³⁴ Bahuiini xhaguibaa, bazaa lajzni, dxejc räjpni:

—¡Efata! —nani säloj bixal.

³⁵ Dxejcru bixalgajc rediajgni, gubangajc lujdxni, gunisa'cni. ³⁶ Dxejcti gu-nibee Jesús rutlojdi gäbreni, per che räjpni lojreni si'c, laareni batie'chrureni diidxga. ³⁷ Rdxeloduxhreni, räjpreni:

—Guira'ti laaca rujnni; ruxhalni diajg rediagcua't, luxh rusniini regop.

8

Bayaan Jesús tajp mil bejn

(Mt. 15:32-39)

¹ Neñ redxejga bidojp xhidalro bejn, luxh xheti xhigauureni. Dxejc gurejdx Jesús rexpejnpacni ni rinajlni, räjpni lojreni:

² —Rulazlazä rebejnre, sa'csi naj rajc choñ dxej tre'reni loä, luxh xhet yu'di gauureni. ³ Niluxh palga guxhaläreni rolijzreni, xliajzreni, sidxajgreni lo nejz; sa'csi yu' renani zijtru siäädreni.

⁴ Dxejcru räjp rexpejnpacni lojni:

—¿Caro chaca'nu yätxtiil te cha xque' rebejnre ree, cadre rut rbäjzdi?

⁵ Sas gunabdiidx Jesús lojreni:

—¿Bal yätxtiil rajptu?

Dxejcru räjpreni:

—Gajdztisni.

⁶ Gunibee Jesús gurej rebenxhidaalga loj yuj. Sas cua'ni guigajdx yätxtiilga, badeedni xquixhtios lo Dios, guľa'ni reyätxtiilga. Dxejc badeednini loj rexpejnpacni te guteedrenini loj rebenxhidaal. Bateedtireni yätxtiilga lo rebenxhidaalga. ⁷ Rajpzareni gaii bälbäz, dxejcti badesac Jesús xquixhtios lo

Dios, gunibeeni bateedzareni rebälbäzre loj reben_xhidaalga. ⁸ Dxejc guda-jwreni, gudxaj xque'reni. Dxejc batojp rexpejn_{pac} Jesús gajdz dxijm_{reyät}xtiil näj rebäjl dxuc ni bia'n. ⁹ Niluxh renani gudajwga najcreni si'cti tajp mil bejn. Dxejcti basadiidxnireni. ¹⁰ Biunägajc Jesús rexpejn_{pac}ni neñ canuu, biädreni nez Dalmanuta.

Gunab refarisee te senro loj Jesús
(Mt. 16:1-4; Lc. 12:54-56)

¹¹ Biäd refarisee, renani najc reben_{guidoo} loj guedx Israel, guslojreni cayeinäjreni Jesús. Canabreni gunni te senro nani Diostis ni yu' guibaa sajc gun. Cagula'tzsireni, don xhi gunni. ¹² Dxejcti bazaa lajz Jesús neñ lastooni, räjpni:

—¿Xhicuent rlaiz rebejn ni nabajn naj fii gac resenro xten Dios? Rniliäpac lojtu, di rebejn ni nabajn naj fii nicla tej sen xhaguibaali.

¹³ Dxejcti basa'nnireni ro'c, biusacni neñ canuu, sä'tini stelaad nisga.

Levaduur xten refarisee
(Mt. 16:5-12)

¹⁴ Biallajzreni nica'reni yätxtiil, luxh xhetliidi sanädireni. Tejtis yätxtiil nuureni neñ canuu. ¹⁵ Cagulijdx Jesús rexpejn_{pac}ni, räjpni lojreni:

—Col_{susiñ}, col_{nati} levaduur xten refarisee, col_{natiza} levaduur xten Herodes. (Nalajznu, xtiidxnireni najc si'c levaduur.)

¹⁶ Dxejcti cayeinäj sa'reni diidx xcuent nani gunii Jesús lojreni, dxejc räjpreni:

—Sa'csi dinu jia'p yätxtiil, ni'c rniini scree.

¹⁷ Che gucbee Jesús xhini'c caniireni, räjpni:

—¿Xhicuent rniitu: “Sa'csi dinu jia'p yätxtiil”? ¿La gajdtu fii, la gajdtu gacbee? ¿La lałtis nacnajd lastootu? ¹⁸ ¿La yu' balojtu, luxh ditu fii? ¿La sojb diajgtu luxh di diajgtu jiejn? ¿La dilajztu guizaj? ¹⁹ Che guła'a guigaii yätxtiil te gudajw gaii mil niguii, ¿bal dxijm_{yätxtiil} biujy batojptu?

Sas räjpreni lojni:

—Tzubitio'pni.

²⁰ —Che guła'a guigajdz yätxtiil te gudajw tajp mil bejn, ¿bal dxijm_{yätxtiil} biujy batojptu?

Sas räjpreni:

—Gajdzni.

²¹ Dxejc räjpni lojreni:

—¿La gajdtu gacbesa'c xhi benä?

Basiajc Jesús te lotiä'p Betsaida

²² Bidzun_{näj} Jesús rexpejn_{pac}ni guedx Betsaida. Dxejc biädnäreni te lotiä'p loj Jesús, gunabreni loj Jesús caanni bejn_{ga}. ²³ Dxejc gunaazni naa lotiä'pga, guläänini neñ guejdx. Che batiobxhejn_{ni} neñ rebalojni, basugajcni naani yejc baloj lotiä'pga, gunabdidxgajc Jesús:

—¿La yu' xhi rhuiilu, ä?

²⁴ Luxh che bahuii bejn_{ga} räjpni:

—Rhuiä sasaj rebejn, luxh si'c yajg rhuiä lojreni.

²⁵ Basusac Jesús naani yejc rebaloj bejn_{ga}. Dxejc bejn Jesús bahuii bejn_{ga}. Bija_{ctini}, zijtru gujc bahuisa'cni lo guiraa rebejn. ²⁶ Dxejcti baxhał Jesúsni rolizjni, räjpni:

—Basquejn, huijga rolizlu, na'c jiu'lu neñ guejdx, na'c gäblu xhi gujclu lo rebejn ni yu' neñ guejdx.

*Basule' Pedr Jesús najc Crist
(Mt. 16:13-20; Lc. 9:18-21)*

²⁷ Birinäj Jesús rexpejn̄pacni lo reguejdx ni ria'n nez Cesarea xten Filipo. La_lni sasajreni lo nejz räjp Jesús loj rexpejn̄pacni:

—¿Chuni'c rnii rebejn̄ nacä narä?

²⁸ Sas räjpreni lojni:

—Yu'reni rnii najclu Juan ni batiobnis, yu'zareni rnii najclu Elías, yu'zareni rnii najclu te rebejn̄ ni gunii xtidx Dios.

²⁹ Dxejc räjpni lojreni:

—¿La'tu a'? ¿Chuni'c rniitu nacä narä?

Dxejc bazejc Pedr diidx, räjpni lojni:

—Luj najclu Crist.

³⁰ Dxejcti räjp Jesús lojreni:

—Rutlojdi gäbtu chu nacä.

*Gunii Jesús xho guetni
(Mt. 16:21-28; Lc. 9:22-27)*

³¹ Dxejcti gusloj Jesús caguluiini rexpejn̄pacni, räjpni:

—Narä nacä Xi'n Dios, ni gujc Niguii. Nanabpac tedä trabajwduxh. Sibälaz rebe_ngool ni najc guxhtis ne_n guedx Israel narä, näjza renani rnibee loj rebixhojz, näjza rebejn̄ ni ruluii leii: sugu'treni narä, luxh ni riojn̄ dxej guibansacä lo rebe_ngut.

³² Guyasi guniini rediidxre. Sas huinä Pedr Jesús telaad, dxejc räjpni loj Jesús:

—Na'c guiniilu si'c.

³³ Dxejc batzuré loj Jesús, bahuiini loj rexpejn̄pacni. Dxejc gudil_näjni Pedr räjpni:

—Gubicaj loä, Satanás, luj dilu gun xhigab xten Dios, xhigab ni rujn rebejn̄tis rujnlu.

³⁴ Dxejc gurejdxni rebe_nxhidaal con reni najc xpejn̄pacni, räjpni lojreni:

—Palga yu' chu rlanj gac xpenäpac, sucuääz gunni ni rsia' lajzni gunni, sutedni trabajw si'c tej ni caj lo cruiz, sujiädna_jni narä. ³⁵ Sa'csi nani rlanj gus_laa xcäl_nabaj_nni, sunijtni xcäl_nabaj_nni. Luxh nani runij_t xcäl_nabaj_nni xcäl_nasa'c narä, xcäl_nasa'c xtidxä, siliaapac xcäl_nabaj_nni. ³⁶ Xlia' ga'p bejn̄ guiraloj lo guedxliujre palga nitni lo Dios par tejpas. ³⁷ Xhet gacdi gudeed bejn̄ te guibannäjni Dios. ³⁸ Nani guituinäj narä con rextidxä _naj, cheni najc rebejn̄ be_ndoj_l, narä, Xi'n Dios nani gujc Niguii, situinäázani che jiädnaä reangl xten Dios che jiälää lo xcäl_rdimbicha' Xta_dä.

9

¹ Dxejc räjp Jesús lojreni:

—Rniliäpac lojtu, yu'reni suga' ree nani di guet fixgaareni abiää_d xcäl_rrnibee Dios.

*Gubixhlo Jesús garenca
(Mt. 17:1-13; Lc. 9:28-36)*

² Che gudejd xho'p dxej, Jesús cua' Pedr, näj Jacob, näjza Juan, laatisreni huinäni yejc te danro. Ro'c gubixhlojni garenca lojreni. ³ Gusloj rdimbicha' rexhajbni, gujc xhajbni nolbäj. Rut rajcti rusquijtz lajd lo guedxliujre si'c biquijtz xhajbni. ⁴ Dxejc baluiiloj Elías näjza Moisés lojreni, cayuinäjreni Jesús diidx. ⁵ Sas räjp Pedr loj Jesús:

—Dad, laaca dxunnu ree. _Naj jiennu cho_n yuguixa', tejni xtenlu, steeni xten Moisés, steeni xten Elías.

⁶ Si'c guniini sa'csi nicla niacbeeni xhini'c guiniini, sa'csi cadxebduxhreni.
⁷ Dxejc biääd te za bejn balaa yejcreni. Neñ zaga biejn xse' te ni räjp:

—Dee najc xi'nä nani sanälazä, colcuadiajg xtiidxni.

⁸ Che batzuré lojreni, bahuiireni rutru suganäjti Jesús, xtebtis Jesús suga'.

⁹ Che siädjiäjtreni dajnga, gunibee Jesús rut lojdi guiniireni xcuent ni bahuiireni, guibanxgaasi Xi'n Dios nani gujc Niguii lo rebengut. ¹⁰ Basälcheereni redidixre neñ lastooreni. Dxejcru canabdiidx lo sa'reni xhicha säloj guibanxgacni lo rebengut. ¹¹ Sas gunabdiidxreni lojni, räjpreni:

—¿Xhicuent rni remastr xten leii naquiinpac jädxgaa Elías?

¹² Dxejcti bazejcnii diidx lojreni, räjpni:

—Guliireni siädxgaapac Elías, luxh sunsa'cni guira'ti xhi cos. Naj a', ¿xhicuent caj lo guijtzc xcuent Xi'n Dios ni gujc Niguii, sidejdni trabajwduxh, rutza jjudini? ¹³ Luxh narä rniä lojtu, abiääd Elías, luxh bennäjrenini si'ctis ni rlajzreni, si'cpac ni caj loj guijtzc ni rusule' xcuentni.

Basiajc Jesús te biuux ni guyu' bendxab neñ lastooni
(Mt. 17:14-21; Lc. 9:37-43)

¹⁴ Che asiäädreni cadre tre' sgaii rexpejn pac Jesús, bahuiireni loj xhidralro bejn ni tre' lojreni, luxh cayeinäj rebejn ni ruluii leiireni. ¹⁵ Che bahuii guiraa rebejn loj Jesús, bidxeloduxhreni, baxunreni, huiye'tzreni xchan lojni.

¹⁶ Dxejc gunabdiidx Jesús lojreni:

—¿Xhini'c rusieinäjtu laareni?

¹⁷ Sas gunii tej reni yu' lo beñxhidaalga, räjpni:

—Dad, ree siädnaä xi'nä lojlu, yu' bendxab neñ lastooni, nani rujn najcni gop. ¹⁸ Cheni rniaaznini, rutienta'ni xi'nä, luxh riduxh bitzun ro'ni, näjza rauya'ni ro'ni, luxh cabijdzni. Aräpä loj rexpejn pacu cuääreni bendxabga, niluxh di niajcdi nibäärenini.

¹⁹ Dxejcti gunii Jesús lojreni, räjpni:

—La'tu, bejn ni di chalilajz, ¿gucli chu'ä lojtu te chalilajztu? ¿Gucli gusieedtu narä? ¡Coltanäni loä!

²⁰ Dxejc biädnaäreni biuuxga lojni. Che bahuii bendxab lo Jesús, basnijni bi'nga, basälta'tinini lo yuj. Sädiidxni, luxh carii bitzun ro'ni. ²¹ Gunabdiidx Jesús loj xtadni:

—¿Gucli rajcni si'c?

Dxejc räjp dade'ga:

—Che gujclini biuxbäz. ²² Balti huält rusäl'nini lo guiboo näjza lo nis te ju'tnini. Palga yu' xhi gac gunlu, balazlajz nuunu, gucnäj nuunu.

²³ Sas räjp Jesús lojni:

—¿Xhicuent rniabdiidxlu la sajc gacnäälü? Xhitis sajc gac par nani rililajz.

²⁴ Guredxa' xtad bi'nga, räjpni:

—¡Rililazä! Gucnäj narä te chaliiru lazä.

²⁵ Che bahuii Jesús bixa't xhidajl bejn lojni, gudidxa'ni lo bendxabga räjpni lojni:

—Bendxab ni rujn gop, narä canibeä, birii neñ lastoo bi'nga. Na'cru chulu neñ lastooni.

²⁶ Dxejcru guredxa' bendxabga, luxh basnibzejsni bi'nga, dxejcru biriini neñ lastooni. Astoo te beñgut bia'n bi'nga ro'c. Xhidajl rebejn räjp:

—Agujtni.

²⁷ Dxejc gunaaz Jesús naa bi'nga guläsnini. Guzuliiti bi'nga. ²⁸ Dxejcti che abiu' Jesús neñ yu', gunabdiidx rexpejn pacni lojni:

—¿Xhicuent di niajcdi nibäänu bendxabga?

²⁹ Dxejc räjp Jesús lojreni:

—Di gacdi cuäätu sa' be_ndxabre palga ditu cued_x-guinab lo Dios, palga ditu gucua_nxgaa.

Gunisac Jesús xho guetni
(Mt. 17:22-23; Lc. 9:43-45)

³⁰ Dxejc biriireni ro'c, gudejdreni Galilee. Luxh di r_lajz Jesús niacbee rebej_n sadejdreni nejzga, ³¹ sa'csi caguluiini rexpej_npacni. Cayäjpni lojreni: “Xi'n Dios ni gujc Niguüi sidejdni ladz_naa rebej_n, niluxh sugu'trenini. Che guiza' cho_n dxej gujtni, sibaj_nni stehuält.” ³² Niluxh laareni direni niacbee xhini'c guniini, bidxejbzareni niniabdiidxreni lojni.

¿Chuni'c saj_cru?
(Mt. 18:1-5; Lc. 9:46-48)

³³ Bidzuj_ntireni Capernaum. Che biu'ni ne_n yu' räjpni lojreni:

—¿Xhini'c cagusiej_ytu lo nejz?

³⁴ Dxejc xhet guniitireni, sa'csi laareni cagusieinäj sa'reni lo nejz don chuni'c saj_cru lojreni. ³⁵ Sas gurej Jesús, dxejc gurejdxni guitzubitio'p xpej_npacni, räjpni lojreni:

—Palga yu' chu r_lajz gasaj_cru lojtu, sugacxgaani si'c te nani xhet sajcti, sugunzani xtzuun chutis.

³⁶ Dxejcti cua'ni tej biuxbäz, huinänini galäiireni. Dxejc gudääzni biuxbäzga, räjpni lojreni:

³⁷ —Chutis ni gacnä_j te rebiuxe're sa'csi rinälajzni narä, sacnä_jni narä, luxh nani gacnä_j narä, xhet narätis gacnä_jtini, näjza xta_dä nani baxha_l narä racnä_jni.

Nani di guiniyaj nuunu, xladnu yu'ni
(Lc. 9:49-50; Mt. 10:42)

³⁸ Dxejcti gunii Juan räjpni lojni:

—Bahuiinu lo te bej_n ni rbää be_ndxab con xcäl_rnibee lajlu, niluxh dini sanäj nuunu. Sas huiye'tznu lojni na'c gunni si'c sa'csi dini sanäj nuunu.

³⁹ Dxejc räjp Jesús lojni:

—Na'c gudxo_jntu gunni si'c sa'csi bej_n nani rujn milagwr con xcäl_rnibee laä digacdi guiniyagajcni narä. ⁴⁰ Nani di guidxagdij_l nuunu, xlaadnu yu'ni. ⁴¹ Rniliäpac lojtu, chutis ni guniidx te bas nis lojtu sa'csi najctu xpej_npac Crist, siguijx Diosni xcu_ent nani bejn_ni.

Nani rujn jiajb bej_n lo dojl
(Mt. 18:6-9; Lc. 17:1-2)

⁴² 'Chutis ni gusiu' tej rebiuxe' ni rililajz narä ne_n dojl, suga_l te guimolin yejn_ni dxejcti gucuaarenini lo nisdoo. ⁴³ Palga tej _naa_lu gun gunlu dojl, batiu'ni: hueenru natiujnglu chaläjzlu cadro yu' Dios quela sojb guiro'p _naa_lu gusa_lreni luj gabijl, loj bajl ni di jiu_{ii}, ⁴⁴ cadro diza xpisiujgreni guet, diza bajl jiu_{ii}. ⁴⁵ Luxh palga tej ni'lu gun gunlu dojl, batiu'ni: hueenru nitiujnglu chaläjzlu cadro yu' Dios quela sojb guiro'p ni'lu luxh chäälu gabijl, lo bajl ni di jiu_{ii}, ⁴⁶ cadro di xpisiujgreni guet, diza bajl jiu_{ii}. ⁴⁷ Luxh palga tej balojlu gun gunlu dojl, gulaäni: hueenru chäälu cadro rnibee Dios natiä'p lojlu quela sojb guiro'p balojlu chäälu gabijl, ⁴⁸ cadro di xpisiujgreni guet, diza bajl jiu_{ii}.

⁴⁹ 'Si'cni rloj sejd yejc xhi cos yälrajw, si'cza guiloj bajl yejc guiraareni. Guilojza sejd lo guira'ti ni rdeed bej_n lo Dios. ⁵⁰ Hueen najc sejd, luxh palga agudejd yäl_nadzij yejcni, ¿xho guntu te gacsacni nadzij? Co_lyajc nadzij la'tu, col_guiba_nnäsa'c sa'tu.

10

Baluu Jesús xcuent rärru'o'n sa'ni

(Mt. 19:1-12; Lc. 16:18)

¹ Dxejcru birii Jesús ro'c huijni nez Judea näjza nez ro' gueu Jordán stelaad. Ro'c bidojp xhidajl bejn lojni stehuält, sas guslosacni caguluiinireni si'ctis ni ruluiinireni. ² Sas refarisee, renani najc rebenguidoo loj guedx Israel, gubigreni loj Jesús, cagula'tzreni Jesús. Ni'c gunabdiidxreni, räjpreni:

—¿La laaca gun niguii gusaan chäälni, ä?

³ Dxejc laani bazejcnii diidx, räjpni lojreni:

—¿Xhini'c gunibee Moisés guntu?

⁴ Dxejcru räjpreni:

—Moisés basaan gudeedni te guitz gusaan chäälni che guro'nnini.

⁵ Dxejc Jesús räjp lojreni:

—Sa'csi guyaa lajztu, ni'cni bacuaa Moisés diidxga lojtu. ⁶ Niluxh che birixtiej bejn guedxliuj, “niguii con gunaa benchee Diosreni.” ⁷ “Ni'cni te niguii siriini loj xtadni, loj xnanni te cuäznäjni chäälni. ⁸ Niluxh renani gujc tiop bejn sajcreni si'c tejsi bejn”, dirureni gac tiop bejn, si'c tejsi bejn gacreni.

⁹ Na'c gudzucaj bejn lo sa bejn nani abachaag Dios lo sa'ni.

¹⁰ Che biu'reni neñ yu' gunabdidxsac rexpejnpacni lojni xcuent rediidxre.

¹¹ Dxejc räjpni lojreni:

—Chutis niguii ni gusaan chäälni, sas guchñaani ste'cani, rujnni dojl.

¹² Niluxh palga gunaa guro'n chäälni sas guchñaani ste'ca niguii, rujnzani dojl.

Gunab Jesús gunle' Dios yejc rebiuxbáz

(Mt. 19:13-15; Lc. 18:15-17)

¹³ Biädnäza rebejn biuxbáz lojni te gutzuub Jesús ñaani yejcreni, sas gudidxa' rexpejnpacni lojreni. ¹⁴ Che bahuii Jesús xhi cayujn rexpejnpacni, bidxe'chni räjpni lojreni:

—Colsaan jiäd rebiuxbáz loä. Na'c gudxojtoreni, sa'csi xcälñibee Dios najc xten reni najc nadolajz si'c najc biuxbáz. ¹⁵ Rniliäpac lojtu, chutis ni rlanj jiu' lo xcälñibee Dios nanab guzobdiajgreni xtidx Dios si'c ruzobdiajg rebiuxe' xtidx xtadreni. Palga dini gun si'c, dini jiu' lo xcälñibee Dios.

¹⁶ Dxejcti gudääz Jesús rebiuxbáz, bazujzani ñaani yejcreni, gunab Jesús gunle' Dios yejcreni.

Te bi'n ni rapduxh guninäj Jesús

(Mt. 19:16-30; Lc. 18:18-30)

¹⁷ Che birii Jesús loj xnejzni, ruxuñ te niguii biäd lojni, bazuxhijbni. Dxejcti gunabdiidx niguiiga lojni räjpni:

—Dad, beñsa'c, ¿xhini'c gunä te xca'ä yälñabajn par tejpas?

¹⁸ Sas räjp Jesús lojni:

—¿Xhicuent rniilu loä beñsa'c? Tejtisni najc beñsa'c; Diostis najc beñsa'c.

¹⁹ Najnlu xhini'c gunibee Dios gunni: “Na'c guesnäjlü chäälni sa'lu, na'c ju'tlu, na'c cuanlu, na'c gusgueelu chutis, na'c cuäälü yejc xhixten sa'lu, huinälajz xtadlu, xnanlu.”

²⁰ Dxejc räjp niguiiga lojni:

—Dad, guiraa redee cayunä cheni gucäli bi'n.

²¹ Che bahuii Jesús lojni, huinälajznini, räjpni lojni:

—Tejtis nani cayäädx gunlu. Huij, huito' guiraa xhixtenlu, badeed xcuentni loj rebejn nani diga'p, dxejcti guniidx Dios xhidajl xhi ga'plu xhaguibaa. Gudanajl narä, mase tedlu trabajw.

²² Dxejc che biejn diajgni diidxre, guc-huin lajzni, xhet laadi yu'ni siini, sa'csi naclenduxh xhixtenni yu'.

²³ Dxejc bahuii Jesús guideb gabi lojreni, räjpni loj rexpejn_{pacni}:

—Naganduxh jiu' rebejn nani yu'duxh xhixtenni lo xcäl_{rnibee} Dios.

²⁴ Dxejc bidxelo rexpejn_{pacni} che biejn diajgreni rextiidxni. Dxejc räjp Jesús lojreni stehuält:

—iAiitu xi'nä!, lacti naganduxh gusaan renani sanälajz xhixtenni guinibee Diosreni. ²⁵ Guyasiru ted te cameii ni' te guux quela gusaan te bejn ni yuduxh xhixtenni guinibee Diosni.

²⁶ Dxejc bidxeloduxh_{reni}, räjp_{reni} lojni:

—¿Chuxhni'c sajc laa lo dojl?

²⁷ Dxejc bahuii Jesús lojreni, räjpni:

—Bejn digacdi gus_{laa} sabejn_{ni}, Diostis rajc rus_{laa} bejn lo dojl, sa'csi Dios rac rujn guira'ti.

²⁸ Sas gusloj Pedr cayäjp lojni:

—Naj nuure ahuilälaznu guira'ti te siopnajl_{nu} luj.

²⁹ Dxejc räjp Jesús:

—Rniliä_{pac} lojtu, chutis nani cuälaz rolijzni, rebejz_{ni}, rebisiaj_{nni}, xtadni, xnanni, chää_{ni}, rexi'_{nni}, rexyuj_{ni}, xcäl_{nasa}'c narä, näjza xcäl_{nasa}'c xtidx Dios, ³⁰ sica'ni lo guedxliujre te gayuu huält xhidajlru. Sica'ni rolijzni, rebejz_{ni}, rebisiaj_{nni}, xnanni, rexi'_{nni}, rexyuj_{ni}. Sisiunajlrenini naj, dxejc xhaguibaa sica'ni yäl_{nabaj} par tejpas. ³¹ Xhidajl rebejn nani sajc lo guedxliujre xhet sajcdireni xhaguibaa; niluxh rebejn nani xhet sajcdi lo guedxliujre, xhaguibaaru gasajc_{reni}.

Gunisac Jesús diidx xho guetni

(Mt. 20:17-19; Lc. 18:31-34)

³² Dxejcru sasaj Jesús, nijdni lo rexpejn_{pacni} sääreni Jerusalén, luxh cadxelojreni. Cadxejbza rebejn nani sanajlreni. Dxejcti guläsac Jesús rexpejn_{pacni} lo rebejn, gusloj cayäjp_{ni} lojreni guira'ti nani sacni. ³³ Räjp Jesús:

—Sionnu Jerusalén, luxh narä, Xi'n Dios nani gujc Niguui, sidedä ladz_{naa} rebixhojz nani rnibee näjza rebejn ni ruluii leii. Luxh sinibeereni guetä. Suteedreni narä lo rebenzijt nani digac xpejn Israel. ³⁴ Suxhisnäjreni narä, siguijnreni narä, sutiobxhejnzareni loä, dxejcru sugu'treni narä. Che riojn dxej siba_{nsacä}.

Gunab Jacob näjza Juan te yäl_{nasa}'c

(Mt. 20:20-28)

³⁵ Dxejcti gubig Jacob näjza Juan, rexi'n Zebedeo, räjp_{reni} lojni:

—Dad, rlaaznu gunlaalu nani guiniabnu lojlu.

³⁶ Dxejc räjp Jesús lojreni:

—¿Xhini'c rlajztu gunä xcuent la'tu?

³⁷ Räjp_{reni}:

—Cue tejnu cuä'lu ladbee, xteenu cue cuä'lu ladbä_{gw} che acanibeelu.

³⁸ Dxejc räjp Jesús lojreni:

—Ditu gan xhini'c rniabtu. ¿Xhixh sajc yätu nani yä'ä? ¿Xhixh sajcza guirobnistu si'cni guirobnisä? Nalajznu, xhixh sajc tedtu trabajw nani tedä narä.

³⁹ Sas räjp_{reni} lojni:

—Sajc tednuni.

Dxejc räjp Jesús lojreni:

—Guliini sajc yätu nani yä'ä, luxh guirobnistu si'cni guirobnisä narä. ⁴⁰ Te cue tejtü ladbee xtenä steetu cue xladbägwä, xhet xtenä dini te gunidxäni. Rebejn nani agule Dios, reni'c cue xladbeä, xladbägwä.

⁴¹ Luxh che biejn diajg stzuureni bidxe'chreni loj Jacob näjza loj Juan. ⁴² Sas gurejdx Jesúsreni, räjpni lojreni:

—La'tu najntu renani rnibee lo rebejn nani digac xpejn Israel, rdxaglajz gasajcrueni lo rebejn. Luxh rebejn ni sajc rnibeduxhreni lo rebejn. ⁴³ Xhet si'cni guntu la'tu. Chutis nani rlajz gasajcru lojtu, riäjł gacni mos lojtu.

⁴⁴ Luxh chutis la'tu nani rlajz gasajcru, riäjł gacni xmos guiraatu. ⁴⁵ Di Xi'n Dios ni gujc Niguii niääd, te ga'ptisni mos, biäädzani te quixni con xcäl nabajjni te laa xhidajł bejn lo dojł.

Basajc Jesús Bartimeo, ni natiä'p lojni
(Mt. 20:29-34; Lc. 18:35-43)

⁴⁶ Dxejcti biäädreni Jericó. Che birii Jesús ro' guedx Jericó con rexpejnpacni näjza rebenxhidaal, cuä' nezyuj sobga' Bartimeo, xi'n Tímeo. Natiä'p lojni. Ro'c cabääni gojn. ⁴⁷ Che biejn diajgni laa Jesús ni siääd Nasare't ni sadejd ro'c, guslojni rbedxa'ni, räjpni:

—Jesús, xi'n David, balazlajz narä.

⁴⁸ Xhidajłreni gudidxa' lojni, te jiäuu ro'ni. Dxejc laani dipru rbedxa'ni räjpni:

—Xi'n David, balazlajz narä.

⁴⁹ Dxejc guzudxi Jesús, gunibegajcni gucrejdx niguiiga.

Gurejdxreni lotiä'pga, räjpreni lojni:

—Basutijp lajzlu, gusulii, luj cabejdxni.

⁵⁰ Sas rołca xhablajzni gudixhni, huisuliini, biäädtini lo Jesús. ⁵¹ Dxejc räjp Jesús lojni:

—Naja', ¿xhini'c rlajzlu gunä?

Dxejc räjp lotiä'pga loj Jesús:

—Dad, rlazä gunlu fiä.

⁵² Dxejcti räjp Jesús lojni:

—Huij, abiajclu sa'csi rililajzlu.

Lagajc dxejc gujc bahuiini. Sanajłtini Jesús lo nejz.

11

Biu' Jesús Jerusalén

(Mt. 21:1-11; Lc. 19:28-40; Jn. 12:12-19)

¹ Cheni sadzujnreni gajxh Jerusalén, gudejdreni neñ reguedx Betfagé näjza neñ guedx Betania nez cuä' dajne' ni laa dan Oliib. Baxhał Jesús tiop xpejnpacni, ² räjpni lojreni:

—Colchäj guedxe' ni ria'n nez lojtu. Che guidzujntu ro' guejdxga, sidxäلتu te bure' ni caduu. Gajd bejn cuibni. Colxhecni, coltanägajcni. ³ Palga yu' chu naa lojtu: “¿Xhicuent rujntu si'c?” Colye'tztis: “Dad caquiinni.” Dxejc suxhalgajcni bure'ga ree.

⁴ Säätireni ro'c. Dxejcru ronejz bidxälreni te bure' caduu ro' te lä'. Dxejcti baxhecrenini. ⁵ Gaii bejn ni tre' ro'c räjp lojreni:

—¿Xhicuent caguxhectuni?

⁶ Dxejc räjpreni loj rebejnga si'cni räjp Jesús lojreni gäbreni. Basangajc rebejnga sanäreni bure'ga. ⁷ Dxejcru biädnäreni bure'ga loj Jesús. Badzuubreni xhablajzreni dejtz bure'ga. Gubijbti Jesús bure'ga. ⁸ Xhidajłza bejn gudixh xhablajzreni lo nezyuj, sgaiireni gudi'ch balajg lo reyajg te gudixhrenini lo nezyuj.

⁹ Rebejn ni nijd lojni näj reni sanajl dejtzni guredxa'reni, räjpreni:

—¿Colguiliä'p xpala'nni! Coldeed xquixhtiooz loj Dios sa'csi baxhalni nani siääd xcuentni. ¹⁰ Coldeed xquixhtiooz loj Dios sa'csi agubiré xcälrnibee toxtadnu David. ¿Colguiliä'p xpala'n Dios ni yu' jiaro!

¹¹ Dxejcti biu' Jesús nen guedx Jerusalén. Biu'zani nen guidoro. Che bahuii Jesús guira'ti ni cayajc nenga, sanäni guitzubitio'p xpejn'pacni, sääreni Betania sa'csi agudxej.

Batzubde Jesús yejc te yagiigw ni xhet cajdi lojni
(Mt. 21:18-19)

¹² Che bara yääl, biunejzreni Betania. Dxejcti gusloj calaan Jesús, ¹³ bahuiini zijt sojb te yag iigw caj balajg lojni. Sas gubigni, bahuiini don gaxäjsi caj iigw lojni. Xhet bidxäldini lojni; balajgtis caj lojni, sa'csi xhet xtiempdi iigw dxejc. ¹⁴ Sas gunii Jesús räjpni loj yag iigwga:

—Rutru gauudi ninejxh ni rcaj lojlu par tejpas.

Biejnza diajg rexpejn'pacni.

Gulää Jesús renani ruto' näj renani rsii nen guidoo
(Mt. 21:12-17; Lc. 19:45-48; Jn. 2:13-22)

¹⁵ Dxejcti bidzujn'reni guedx Jerusalén. Biu' Jesús nen guidoro. Gusloj cabääni renani ruto' näj renani rsii nen guideoga. Niluxh batiejxhni rexmex renani ruchaa meel, näjza reyagxhil xten renani ruto' paloom. ¹⁶ Diruni nusaan nidednäjreni xhicos nez nen guideoga. ¹⁷ Dxejc caguluinireni, räpgajcni lojreni:

—¿La et screedi caj loj guijtz? “Xyu'ä sirilaj yu' cadre rninab guiraa reben'guedxliuj lo Dios.” La'tu abejntuni si'c xpiliää gubaan.

¹⁸ Rebixhojz ni rnibee näjza remastr xten leii biejn diajgreni nani gunii Jesús. Sas gudiilreni xho ju'trenini, sa'csi rdxejbreni Jesús, sa'csi guiraa rebejn rdxelox rextidx Jesús. ¹⁹ Che biu' guxhijn, birii Jesús guejdxga.

Gubijdz yagiigw ni bidzubde
(Mt. 21:20-22)

²⁰ Che bara yääl gudejdreni, bahuiireni agubijdz guideb yagiigw, näj rexlobaani. ²¹ Dxejc banaj lajz Pedr, räjpni loj Jesús:

—Dad, bahuii yagiigw nani batzubdelu yejcn, agubijdzni.

²² Dxejcti gunii Jesús räjpni lojni:

—Colchalilajz Dios. ²³ Rniliäpac lojtu, chutis nani gäb loj dajnre: “Gubicaj, bitejb loj nisdoo”, luxh dini guntio'p lajzni, chalilajztisni scree gac nani guniini, sajcpac nani guniini. ²⁴ Ni'cni rniä lojtu, xhitis nani guiniabtu lo Dios che rninäjtuni, colchalilajz xca'tuni, dxejc sica'tuni. ²⁵ Luxh che guiniabtu Dios, palga yu' chu loj rdxechlajztu, colsiäjlza lajztu, te näjza Xtadtu nani yu' xhaguibaa gusiäjlza rextojltu. ²⁶ Palga ditu gusiäjl lajztu con resa'tu, diza Xtadtu nani yu' xhaguibaa gusiäjl lajzni rextojltu.

Yälrnibee xten Jesús
(Mt. 21:23-27; Lc. 20:1-8)

²⁷ Sas bidzunsacreni guedx Jerusalén. Lał ni sasaj Jesús nen guidoro, rebixhojz nani rnibee, näjza rebejn ni ruluii leii, näjza reguxhtis gubig lojni.

²⁸ Räjpreni lojni:

—¿Xhi yälrnibee rajplu, ni'c rujnlu redzuunre? ¿Chu baniidx yälrnibee rujnlu redzuunre?

²⁹ Dxejc räjp Jesús lojreni:

—Guiniabdidxäza lojtu. Coltzu'ni loä, dxejcti guiniäza xhi yälrnibeere rapä ni'c runä redzuunre. ³⁰ ¿Chu baxhal Juan ni batiobnis? ¿La Dios o la rebejn? Colnii loä naj.

³¹ Dxejcti gunii loj sa'reni, räjpreni:

—Palga jie'tznu “Dios”, naani “¿xhicuent ditu nililajz xtiidxni?” ³² Diza niacti niäjbreni “rebejn” sa'csi rdxejbreni rebenxhidaal, sa'csi guiraa rebejn huililajz Juan gujc te bejn ni guniipac xtidx Dios.

³³ Dxejcti guniireni, räjpreni loj Jesús:

—Dinu guidon.

Sas räjp Jesús lojreni:

—Dizana guiniä xhi yälrnibeere rapä runä redzuunre.

12

Te xcuent rebenquijdx ni rbäzlaa

(Mt. 21:33-46; Lc. 20:9-19)

¹ Dxejcti gusloj caguseed Jesús rebejn con recuent ni ruluii, räjpni:

—Yu' te bejn bazuj yaguub loj xyujni, bejnzani bazaani, dxejcru gudäänni te lajt cadre jä't uubga. Dxejcti bejnii te yu' jiaa, te ro'c cue nani ga'p lo xyujni.

'Badedlaatinini loj gaii bejn, sä'tini zijt. ² Che bidzujn xpäii uub, baxhal baxhuaan uubga te xmosni loj rebejn ni rbäzlaa ro'c, te xca'ni uub nani riäj] xca' bejnga. ³ Dxejc rebejn ni rbäzlaa ro'c gunaazreni mosga, gudijnrenini, luxh bazejcrenini siini ganaxni. ⁴ Dxejcru baxhal baxhuaanga stee mos lojreni. Niluxh laareni bacuaareni guijni, gudilguijdxreni yejc mosga, xho rniajni gubi'ni. ⁵ Dxejc baxhal bejnga stee mos, dxejc bagu'trenini. Baxhalni xhidajlrureni. Gaii gudilguijdxreni, sgaiini bagu'treni.

⁶ Yu'za tejtis xi'nni, luxh sanälajznini. Por lult näjza xi'nni baxhalni, naani: “Siucareni xi'nä.” ⁷ Dxejc rebejn nani rbäzlaa ro'c räjp loj sa'reni: “Dee najc laa ni jiannäj ree. Coltaa, guigu'tnuni, te xca'nu yujre.” ⁸ Sas gunaazrenini, bagu'trenini. Guläätirenini lo yujga.

⁹ ¿Xhicha gun baxhuaan yaguubga rebejnre? Siädni luxh sugu'tni rebejnre, dxejcti gudeedni yujga loj ste'ca bejn.

¹⁰ ¿La gajdtu gol guijtz ni rnii scree?

Guij nani guläcaj renani runchee yu', ni'c agujc mastr ni guzuj galoo.

¹¹ Dad xtenu bejn scree, cos sacduxhni nezlojnu.

¹² Dxejc rlanj reguxhtis nani bacuadijg cuentre niniaaz Jesús, sa'csi gucbeereni laareni cacuaa Jesús diidxre. Sa'csi bidxejbreni rebenxhidaal, ni'c basa'nrenini, sä'tireni.

Diidx xcuent reimpuest

(Mt. 22:15-22; Lc. 20:20-26)

¹³ Dxejcti baxhalreni gaii xpejn refarisee näjza gaii xpejn Herodes loj Jesús te gula'tzreni don xho gac guiniaazreni Jesús. ¹⁴ Dxejcti biädreni, räjpreni lojni:

—Dad, nadonnu luj najclu te bejn ni rnili. Par luj guiraasi bejn sajc tebloj, sa'csi dilu fii la sajc bejn o la xhet sajc di bejn. Luj ruluiipaclu xhini'c rlanj Dios gun bejn. ¿La laaca quiix bejn reimpuest lo xcubieer César o la xhet laadi? ¿La guidiixnu o la dinu guidiix?

¹⁵ Dxejcti laani gucbegajcni rujnsireni si'cni rniabdiidxreni. Räjpni lojreni:

—¿Xhicuent runnäjtu narä scree? Coltanä te meelga loä, te fiä lojni.

¹⁶ Badeedtireni te meel lojni, dxejc räjpni lojreni:

—¿Chu yejc caj lojni, chu laj caj lojni?

Dxejc räjpreni:

—Xten César.

¹⁷ Dxejc räjp Jesús lojreni:

—Coldeed nani najc xten César loj César; coldeedza nani najc xten Dios loj Dios.

Baschelojni rebejn̄ga con xtiidxni.

Yäl̄rniabdiidx xcuent yäl̄rbansacni lo rebeṅgut

(Mt. 22:23-33; Lc. 20:27-40)

¹⁸ Sas biädhuii resaducee loj Jesús. Resaducee najc rebejn̄ nani rnii di rebeṅgut guibansac. Dxejc gunabdiidxreni lojni, räjpreni:

¹⁹—Dad, xleii Moisés ruluii loonu, palga guet te niguii luxh gusa'nni chäälni ruti xi'nni, nanabpac xca' bejtzni chäälni, te chu xi'nni con laani lacua niu' xi'n tobejtzni. ²⁰ Guyu' gajdz niguii, bejtz najcreni. Sas cua' niguigalooga chäälni. Che gujtni ruti xi'nni. ²¹ Dxejcti cua' ni rojppga gunaaga. Che gujtni, rut gajc̄di xi'nni. Si'cza gusajc ni riojn̄ga. ²² Si'cza guläznäj gunaaga guigajdzreni. Per nicla tej reni di xi'nreni niu'. Dxejcti gujtz̄a gunaaga. ²³ Guigajdzreni guläznäjreni gunaare. Cheni guibansacreni lo rebeṅgut, ¿chu chäǟl gacni?

²⁴ Dxejc bazejc Jesús diidx lojreni, räjpni:

—Et laadi rniitu, sa'csi ditu gumbesa'c rextidx Dios nani bacuaa reniguii lo guijt̄z, dizatu gumbee yäl̄rnibee xten Dios. ²⁵ Che guibansacreni loj rebeṅgut, direni guch̄naa, rutza gudeedtireni te guch̄naareni. Niluxh sajcreni si'c najc rexangl Dios nani yu' xhaguibaa. ²⁶ Palga canabdiidxtu la rbansac rebeṅgut, ¿la di lajztu guisaj biltu guijt̄z ni bacuaa Moisés? Moisés bacuaa nani gunii Dios lojni neṅ bajl, räjpni: “Narä nacä Xtios Abraham, Xtios Isaac, Xtios Jacob.” ²⁷ Palga Dios najc Xtios rebejn̄re, direni gac beṅgut, nabaṅnäjreni Dios. Et laadi najc xhigabtu.

Yäl̄rnibee ni sajcr̄u

(Mt. 22:34-40)

²⁸ Dxejcr̄u bidzuj̄n tej rebejn̄ ni najn leii, biejn diajgni xhi caniireni, biejnza diajgni laaca gunii Jesús lojreni. Dxejcti gunabdiidxni loj Jesús:

—¿Xhi mandamient sajcr̄u lo guiraareni?

²⁹ Dxejc räjp Jesús lojni:

—Mandamient nani sajcr̄u loj guiraareni najc dee: “Bacuadiajg luj, guejdx xten Israel, Dad Xtiosnu, Dad tejtis najcni. ³⁰ Chanälajzlu Dad Xtioslu guideb lastoolu, naj xaimlu, naj guideb xcäriejn̄lu, najza guideb xcäl̄nadiplajzlu.”

³¹ Sigajcza najc mandamient ni rojppga: “Huinälajz sabejn̄lu si'ctis sanälajzlu lagajc luj.” Redee najc remandamient nani sajcr̄u loj guiraareni.

³² Dxejcti räjp bejn̄ga ni najn leii lojni:

—Laaca guniilu Dad. Tejtis najc Dios, luxh ruti chu stee najc si'c laani.

³³ Luxh sacduxh chanälajz bejn̄ Dios guideb lastooni, naj xcäriejn̄ni, najza xaimni, naj guideb xcäl̄nadiplajzni, luxh chanälajzni resabejn̄ni sigajc laani. Redee sajcr̄u loj ni rujn̄ bejn̄ che rudeedreni gojn̄ lo Dios.

³⁴ Che bahuii Jesús laaca guniini, räjpni lojni:

—Guxii cayääd̄x te jiu'lu loj xcäl̄rnibee Dios.

Sas rutru biajxhdi gunabdiidx loj Jesús.

Chu xi'n najc Crist

(Mt. 22:41-46; Lc. 20:41-44)

³⁵ Che caguseed Jesús neṅ guidoro, räjpni:

—¿Xho mood rnii rebejn ni najn leii Crist najc xi'n David? ³⁶ Sprit Dxan xten Dios basnii David che bacuaani:

Räjp Dios loj Dad xtenä:

“Gurej ladbee xtenä, che gudzugäli reni rdxe'ch lojlu.”

³⁷ Palga lagajc David räjp: “Dad, xtenä”, che guniini xcuent Crist, ¿xhoxh najc Crist xi'n David?

Rebenxhidaal nani yu' guejdxga bacuadiagsa'creni xtiidxni.

Gule'c Jesús xquej remastr xten leii

(Mt. 23:1-36; Lc. 11:37-54; 20:45-47)

³⁸ Lalni caguseedni rebejn, räjpni lojreni:

—Col̄susin, na'c gu'chtu loj rebejn ni ruluii leii. Laareni rlajz sanäj reladsool xtenreni. Rdxagljazreni rnii bejn lojreni nez lo reguii. ³⁹ Rlajzzareni cuereni cadro rbej renani sajcro nen reguidoo näjza cadro ru' relanij.

⁴⁰ Rudzucajzareni xhixten rebiuud, rniizareni xhidalduxh diidx che rol̄reni le', te rusäuureni loj rebejn. Castigwroru gac redee.

Gojn xten te biud prob

(Lc. 21:1-4)

⁴¹ Dxejcti gurej Jesús cuä' caj cadro rusäl̄ bejn gojn. Cahuiini cagusäl̄ rebejn meel nen cajga. Xhidajl reni rajp cagusäl̄ xhidajl meel nenga. ⁴² Che biääd te biud prob, basäl̄ni tiop melbäz ni sajc si'cti tej centaab. ⁴³ Dxejcru gurejdx Jesús rexpejn̄pacni, räjpni lojreni:

—Rniliäpac lojtu, biud proobre basäl̄ xhidajlru lo guiraa renani basäl̄ nen cajre, ⁴⁴ sa'csi guiraareni abasäl̄ che'nsi xhixtenreni. Luxh gunaare basäl̄ guiraa nani rajpni. Ni'ctis najc nani gaunäjni.

13

Gunii Jesús sibijl̄ guidoo

(Mt. 24:1-2; Lc. 21:5-6)

¹ Cheni sariireni nen guidoro, räjp tej rexpejn̄pacni lojni:

—Dad, bahuui lacti reguij, lacti reyu'.

² Dxejcti räjp Jesús lojni:

—¿La rhuiilu loj reyu're? Nicla tej guij dijia'n dzuub yejc sa'ni, guiraliireni sire'ch.

Recos ni gac che ameer nitloj guedxliuj

(Mt. 24:3-28; Lc. 21:7-24; 17:22-24)

³ Dxejc sobga' Jesús yejc dajne' ni laa dan Oliib, cahuiini nez ro' guidooga. Che sugaxhtebreni, gunabdiidx Pedr näj Jacob näjza Juan näjza Andrés lojni, räjpreni:

⁴ —Gunii loonu, ¿guc gac dee? ¿Xhi guihuiinu te gacbeenu asiäddzungajxh soob guiraa rediidxre?

⁵ Dxejcti gusloj gunii Jesús lojreni, räjpni:

—Col̄huii, te rut gusguedi la'tu, ⁶ sa'csi xhidalduxh bejn jiääd con laä, gäbreni: “Narä nacä Crist”, luxh rniisireni si'c, susguezareni xhidajl bejn.

⁷ 'Che jiejn diajgtu yu' guer näj yäl̄nadxeeb xten guer, na'c guidxejbtu. Nanabpac gacni; et dxejcdi nitloj guedxliuj. ⁸ Säjs nación̄ yejc sanacion̄ni, näj yäl̄rnibee yejc sayäl̄rnibeeni. Xhidajl lajt sajcu xu, siliaanza bejn, luxh säjs rebejn yejc sa'ni. Redee najc ni guisloj guidxejb, gachuinza lajzni.

⁹ Dxejc la'tu col̄susin sa'csi suteedreni la'tu ladzn̄aa reguxhtis, siguijnzareni la'tu nen reguidoo. Sacrejdxtu lo regubieer näjza loj rereii xcäl̄nasa'c narä, te si'c gac guiniitu xtidxä lojreni. ¹⁰ Nanabpac guirechxgaa xtidx Dios loj guiraa reben̄ guedxliuj. ¹¹ Che guiniaazreni la'tu, che chanäreni la'tu loj reguxhtis,

na'c gunxgaatu xhigab xhi diidx guiniitu. Colnii nani jiäjtis yejctu dxejc, sa'csi xhet la'ditu ni guinii, Sprit Dxan xten Dios ni guinii. ¹² Luxh suto' bejn lagajc bejtzni te guet bejtzni. Suto'za dad lagajc xi'nni. Säjs rebiuux yejc rexcusajnni te guet reguzajnga. ¹³ Sidxechlajz guiraa rebejn lojtu sa'csi najctu xpenä; nani ted guiraa retrabajwre, ni'c gudeed Dios xcälhabajnni.

¹⁴ 'Che fiitu loj nani najc yälrdxechlajz, nani najc yälrunitloj, nani gunii Daniel ni gunii xtidx Dios. Che fiitu nani suga' cadre di nunyäj suuni, dxejcti suguxun renani yu' nez Judea chääreni nez neñ redajn. (Nani gol giijtzre sugacbeenini.) ¹⁵ Bejn nani suga' yejc yu' na'c jiäjtne jiu'ni neñ te yu' xca'ni gatii xhixtenni. ¹⁶ Nani yu' loj niaa, di gal jiäjt te xca'ni xhablajzni. ¹⁷ ¡Aii! Xhiza nalas chu regunaa ni nuu báz, luxh renani rusiä' xi'nni, neñ redxejga. ¹⁸ Colnab loj Dios na'c sactu scree neñ rebäinajl. ¹⁹ Neñ redxejga su' trabajwduxh, nani gajd chu che bencheeli Dios guedxliuj, luxh diruni chu, dxejctis chuni. ²⁰ Paru di Dad gusia'tz redxejga, nicla tej bejn di laa. Susia'tzni redxejga sa'csi sanälajzni rexpejnni nani aguleni.

²¹ 'Dxejc palga yu' chu naa lojtu: "Colhuii, aree Crist", o "Colhuiire, ani suga' rec", na'c chalilajztuni. ²² Sa'csi su' bejn nani rniisi najcni Crist. Su'za reniguii nani rniisi rniireni xcuent Dios. Sujnzareni milaagwr, te gusgueereni, te palga sajcn, rlajzreni gusgueelireni renani agule Dios. ²³ Ni'cni la'tu colsusin; agunixgaä lojtu guira'ti ni gac.

Xho gac che jiääd Xi'n Dios ni gujc Niguii

(Mt. 24:29-35, 42-44; Lc. 21:25-36)

²⁴ 'Neñ redxejga, cheni luux retrabajwduxhga, sicäy lo gubijdx, luxh diru bäii gusanij. ²⁵ Sitejb rebalxhaguibaa, sinibsejs recos nani nasnäy rebalxhaguibaa. ²⁶ Dxejcti suhuii rebejn loä, Xi'n Dios nani gujc Niguii, siälä neñ reza guideb yälrnibeduxh xtenä, näjza xcäldimbicha'ä. ²⁷ Dxejcti guxhalgacä rexanglä jiädtojpreni renani guleä guideb lo guedxliuj, cat nalooli guedxliuj näjza cadre nalooli guibaa.

²⁸ 'Colguisieed nani ruluii yagiigw. Cheni rii rebäte' lojni luxh che rcaj balajg lojni, acaxhnajntu bäii gusguij asadzunqajxh. ²⁹ Sigajcza, che fiitu acayajc recosre, sacbeetu asiädgaxhä, ameer guidzunä. ³⁰ Rniliäpac lojtu, rebejn ni nabajn dxejc, direni nitloj, fixgaareni gac recosga. ³¹ Sinitloj guibaa näjza guedxliuj, rextidxä di nitloj.

³² 'Naj, rut najndi guc gac recosga, nicla rexangl Dios ni yu' xhaguibaa, niclaza narä Xi'n Dios, Xtradätis najn.

³³ 'Colhuii, colsusin, colnab loj Dios, sa'csi ditu gan guc guidzujn redxejga. ³⁴ Dee najc si'c najc te bejn ni birii sää zijt. Che gajdlini guirii, badeedni xtzun rexmosni, luxh gunibeezani susin nani canäj rolä'. ³⁵ Si'cza colsusin, sa'csi ditu gan guc jiääd baxhuaan yu'ga, la jiäädni gudxej, o la jiäädni garol yääl, o la cäy, o la jiäädni rsil. ³⁶ Colsusin, te di guiga'tu nagayejstu che guidzujnni. ³⁷ Rediidx nani rniä lojtu, loj guiraa rebejn rniäni: colsusin.

14

Ruchaagreni diidx te guiniaazreni Jesús

(Mt. 26:1-5; Lc. 22:1-2; Jn. 11:45-53)

¹ Riäädx tiop dxej guidzujn lanij, dxej ni ruzaa lajzreni gułaareni ladznaa reEgipto. Neñ redxejga rajwreni yätxtiil nani di saguij. Rebixhojz nani rnibee neñ guidoo xten rexpejn Israel näj rebejn ni ruluii leii rlajzreni niniaazreni Jesús con yälrusguee, te nugu'trenini. ² Dxejcti räjpreni lo sa'reni:

—Na'c jiennu scree neñ redxelanij, te na'c gun beñguejdx biejy.

*Te gunaa ni basäl se't yejc Jesús Betania
(Mt. 26:6-13; Jn. 12:1-8)*

³ Yu' Jesús Betania, rolijz Simón, nani guyu' guejch ni raĵ tiejxhni. Che sobga'ni lo mex, biääd te gunaa ca' te bo'tguij yu' setnard nenñi. Rlianexhduxhni, sacduxhni. Dxejc gudi'chni yejn bo'tguijga, te basälñi se'tga yejc Jesús. ⁴ Yu'za gaiireni ro'c ni bidxe'ch, räjp loj sa'reni:

—¿Xhicuent banijtni setnejxhga? ⁵ Paru nido' se'tga, nijni si'cti choñ gayuu denar, te nica' meelga rebejn ni xhet rajpdi meel.

Luxh caguidxa'reni loj gunaaga.

⁶ Dxejc räjp Jesús lojreni:

—Colsaanni, ¿xhicuent rudxojuñtu nani cayujn gunaare? Cos sacduxh dee bennäjni narä. ⁷ Guideb ni guibajñtu, su' rebejn nani xhet rajpdi lojtu, luxh che rĵajztu sajc gacnäjtoreni. Narä et xchejdi chu'ä lojtu. ⁸ Gunaare abejñni nani gujctis bejnñi. Abaslanexhxgaani tiexhä, te chää tiexhä neñ baa. ⁹ Rniliäpac lojtu, cadrotis guidzujñ xtidx Dios, guideb lo guedxliuj, siniizareni xcuent nani bejn gunaare, te guinaj lajzreni gunaare.

*Rĵajz Judas guto' Jesús
(Mt. 26:14-16; Lc. 22:3-6)*

¹⁰ Dxejcti huij Judas Iscariot, nani najc tej retzubitio'p xpejnñpac Jesús, loj rebixhojz nani rnibee te guto'ni Jesús lojreni. ¹¹ Che biejn diajg rebixhojz xtiidxni, bibalajzreni. Räjpreni sudeedreni meel lojni. Dxejcti caguñil Judas xho guto'ni Jesús.

*Gudauxchej Dad con rexpejnñpacni
(Mt. 26:17-29; Lc. 22:7-23; Jn. 13:21-30; 1Co. 11:23-26)*

¹² Biu'ti xmaan che rajwreni yätxtiil ni di saguij. Dxej lanijga, rugu'treni xiil, te ruzaa lajzreni dxej ni gulaareni ladzña reEgipto. Räjp rexpejnñpacni loj Jesús:

—¿Caro rĵajzlu chosucheenu te gauulu nadxej, dxelaniñ?

¹³ Dxejc baxhañni tiop rexpejnñpacni, räjpni lojreni:

—Colchäj neñ guejdx, ro'c guidxaagtu te niguii ni nuu te re' nis. Colchanajl niguiiga. ¹⁴ Cadro jiu'ni colye'tz loj bejn ni najc rolijzni ro'c: “Naj Dad mast; ¿con yu' cadro ria'n rebiooz, cadro gaunäjni rexpejnñpacni nadxej, dxelaniñ?”

¹⁵ Dxejcti guluini lojtu te yu' ni sojb jiaaliga yejc sa'ni, ni asuchexgaa nenñi. Colyujñ xhi guidaunu ro'c.

¹⁶ Sas huij rexpejnñpacni, bidzujñreni neñ guejdxga. Bidxälreni te yu' si'cni räjp Jesús lojreni. Ro'c bejnreni xhi gudajwreni dxelaniñ.

¹⁷ Che huääz gubijdx, bidzujñ Jesús guitzubitio'p xpejnñpacni. ¹⁸ Lañni sobga'reni lo mex cayajwreni, räjp Jesús lojreni:

—Rniliäpac lojtu, tej la'tu ni cayaunää, suto'ni narä.

¹⁹ Dxejcti gusloj cayac-huin lajzreni, räjp tebgajreni lo Jesús:

—¿La naräni?

Räpgajc steeni:

—¿La naräni?

²⁰ Dxejcti guniini, räjpni lojreni:

—La tej retzubitio'p, tej ni cayajw loj xpla'tä. ²¹ Sa'csi narä Xi'n Dios nani gujc Niguii, sia'ä, si'cpacni caj loj xtiidx Dios, per xhiza nalajz niguii ni guto' narä. Huentejti na'c niajl niguiire.

²² Lañni cayajwreni, cua' Jesús yätxtiil, badeedzani xquixhtiooz loj Dios dxejc gula'nini, badeednini lojreni. Dxejcti räjpni:

—Colca' yätxtiilre. Dee najc si'c tiexhä.

²³ Cuagajcni te bas. Che abadeedni xquixhtiooz loj Dios, badeednini lojreni, gu' guiraareni nen basga. ²⁴ Dxejcti räjp Jesús lojreni:

—Dee najc si'c xtienä ni rului diidx ni biä'nnu, nani guixe' xcuent xhidajl rebejn. ²⁵ Rniliäpac lojtu, diruna yä'a bin nani rii yejc uub, dxejli yä'äni stehuält loj xcälrnibee Dios.

Gunii Jesús sinii Pedr dini gumbeeni

(Mt. 26:30-35; Lc. 22:31-34; Jn. 13:36-38)

²⁶ Che gulujx bilreni te dij xten Dios, biriireni, sääreni nez dajne' ni laa dan Oliib. ²⁷ Dxejcru räjp Jesús lojreni:

—Guiraatu sibälaztu narä naguxhijn, sa'csi si'c cajni lo guijtz: “Sugu'tä baxhtoor luxh suxun rexiiil.” ²⁸ Che guibaṅsacä loj rebengut, ganidä cha'a Galilee, dxejcti jäädttu.

²⁹ Dxejc räjp Pedr loj Jesús:

—Palga guiraareni cuälazlu, narä dina cuälazälu.

³⁰ Dxejc räjp Jesús lojni:

—Rniliäpac lojlu, lagajc guxhijnre, nicla gajd guidgaii cuedxa' tiop huält, luj aguiniilu chon huält dilu gumbee narä.

³¹ Luxh laani sanuutis xtiidxni, räjpni:

—Cadro guetlu setäza, dina guiniä dina gumbeälu.

Luxh guiraa rexpejn pacni gunii si'c.

Gunab Jesús loj Dios che yu'ni Getsemaní

(Mt. 26:36-46; Lc. 22:39-46)

³² Dxejcti bidzujnreni te lajt cadro laa Getsemaní. Dxejc räjpni loj rexpejn pacni:

—Colcuej ree lalni chanabä lo Dios.

³³ Dxejcru sanäni Pedr näj Jacob näjza Juan. Dxejc gusloj cayac-huinduxh lajzni, luxh cayu'ni yälrsiaduxh. ³⁴ Dxejc räjpni lojreni:

—Cayac-huinduxh lazä, an sugu'tni narä. Coljia'n ree, coltie'ch bacal.

³⁵ Sas gusajni tla', bazuxhijbni lo yuj, dxejcti gunabni lo Dios don la niajc nidedcaj nani sacni dxejc. ³⁶ Räjpni:

—Abba, xtadä, luj rajc rujnlu guira'ti: badzucay retrabajwre loä. Xhet si'cni rlazädi narä, bejn si'cni rlazzlu luj.

³⁷ Dxejc biädni gunaaznireni nagayejsreni. Dxejc räjpni lo Pedr:

—Simón, ¿la nagayejslu? ¿La nicla te rate' diniajcdi nutie'chlu bacal?

³⁸ Coltie'ch bacal, colnab lo Dios, te na'c guntu dojl. Lastootu rlazj gutie'chtu bacal, luxh tiejxhtu abadxajg.

³⁹ Huij Jesús stehuält, binabni loj Dios, guniini lagajc rediidx ni guniini galoo. ⁴⁰ Dxejcti biädsacni cadro tre'reni, gunazsacnireni nagayejsreni, sa'csi yuduxh bacal lojreni. Luxh direni nidxäl xhi niniireni lojni. ⁴¹ Ni riojn huält biädni, dxejc räjpni lojreni:

—Agojl colguejs, colsilajz, agujc, abidzujn or ni ted Xi'n Dios ni gujc Niguii ladzṅaa rebeṅdojl. ⁴² Colchastie, colcho'. Asiäddzṅgajxh ni guto' narä.

Gunaazreni Jesús

(Mt. 26:47-56; Lc. 22:47-53; Jn. 18:2-11)

⁴³ Canisijcni scree, che bidzujn Judas, ni najc te retzubitio'p xpejn pacni, siädnäni xhidajl bejn. Ca'reni spaad, ca'reni yajg biriireni lo rebixhojz nani rnibee, näjza rebejn ni rului leii, näjza rebengool nani najc guxhtis. ⁴⁴ Niluxh nani ruto' Jesús abadeedni te seen lojreni, räjpni:

—Nani guchagro'ä, ni'c najc laani. Colnaazni, colyaptzu'tzni te si'c chanätuni.

⁴⁵ Che bidzujn Judas, gubigni loj Jesús, räjpni lojni:

—Dad, Dad.

Sas bachagro'nini. ⁴⁶ Dxejcru gunaazreni Jesús ro'c.

⁴⁷ Dxejc tej reni suga' ro'c, gulää xspaadni, gudilguijdxni xmos bixhojz nani sajcru, batiu'ni diajgni. ⁴⁸ Dxejc räjp Jesús loj rebejn:

—¿La siädxhiitu narä con spaad näjza garo't si'c rixiitu te gubaan? ⁴⁹ Guiraa dxej guyu'ä lojtu nen guidoo, caguluiätu xtidx Dios luxh ditu niniaaztu narä. Scree cayajcni, te soob diidx ni caj lo reguijtz.

⁵⁰ Dxejcru rexpejn pacni gulälazrenini, baxun̄tirenini.

Bi'n nani baxun

⁵¹ Sanajlza te bi'n Jesús, nadejbni ganaxhtis te bariaad. Si'c gunaazrenini.

⁵² Dxejcti baxun̄ni, libasa'nni bariaadga, sä'tini xhabäälni.

Suga' Jesús loj reguxhtis

(Mt. 26:57-68; Lc. 22:54-55, 63-71; Jn. 18:12-14, 19-24)

⁵³ Dxejc biädnäreni Jesús loj bixhojz ni sajcru. Bidojp rebixhojz nani rnibee, näj rebejn̄gool ni najc guxhtis, näjza rebejn̄ ni ruluii leii. ⁵⁴ Luxh Pedr zijt zijt sanajlni Jesús. Che bidzujnt̄ini lo xle' bixhojz ni sajcru, gurenäjni rebejn̄ nani rajp ro'c, cagucha' lajzni lo bajl.

⁵⁵ Rebixhojz nani rnibee, näjza guiraa rebejn̄gool ni najc guxhtis, caguiilreni xhi tej xquej Jesús nidxälreni, te nugu'treni Jesús, xhet bidxäldireni. ⁵⁶ Xhidajl bejn̄ gunii didxxhii, räjpreni et laadi rujn Jesús, niluxh di xtiidxreni nile', sa'csi garen garen guniireni. ⁵⁷ Dxejc huisulii gaii bejn̄ ni guniireni stee didxxhii xcuent Jesús, räjpreni:

⁵⁸ —Nuunu biejn diaagun̄i guniini: “Sutiexhä xyu' Dios ni guc-chee con naa rebejn̄, luxh chont̄is dxej guncheä steeni, ni nac-chee et con naadi rebejn̄.”

⁵⁹ Nicla si'c di xtiidxreni nile', sa'csi garen garenza guniireni.

⁶⁰ Dxejcti huisulii bixhojz ni sajcru galäii guiraa rebejn̄, gunabdiidxni loj Jesús räjpni:

—¿La digacdi guiniilu xhi guiniilu xcuent requej ni cabe'c reniguiire, ä?

⁶¹ Laani niäuuutis ro'ni, xhet guniidini. Dxejcti gunabdidxsac bixhojz ni sajcru lojni, räjpni:

—¿La luj ni najc Crist, xi'n Dios nani rliä'p bejn̄ xpala'nni, ä?

⁶² Dxejcti räjp Jesús lojni:

—Naräni. Suhuiitu loä, Xi'n Dios nani gujc Niguui, sobga'ä xladbee Dios ni rnibee, siäläza neñ reza ni tre' xhaguibaa.

⁶³ Dxejcru bixhojz ni sajcruga, batiäjsni tla' xhajn̄ni, räjpni:

—¿Xhi jienrunu guidiilnu diidx xcuentni? ⁶⁴ Abiejn diajgtu xho guniyajni Dios. Naja', ¿xhi najtu?

Dxejcti guiraarenini räjp nungäjlpac guetni.

⁶⁵ Dxejc yu' reni gusloj cagutiobxhejn lojni, luxh basäuurenini lojni, dxejc huääzrenini, räjpreni lojni:

—Gunii, ¿chuni'c huääzlu?

Luxh renani canäjni gudajp lojni.

Gunii Pedr dini gumbee Jesús

(Mt. 26:69-75; Lc. 22:56-62; Jn. 18:15-18, 25-29)

⁶⁶ Dxejc suga' Pedr lo yuj, nez lo le'ga, che biäd te xcriaad bixhojz ni sajcru.

⁶⁷ Luxh bahuiini cagucha' lajz Pedr, cadxelojni lojni. Dxejcti räjpni:

—Näj luj nadxaaglu Jesús ni siäd Nazare't.

⁶⁸ Dxejc Pedr basgueeni, räjpni:

—Dina gumbeäni. Dizana ganä xhini'c caniilu.

Dxejcti biriini sääni ro' suaan. Dxejcti guredxa' guidgaa. ⁶⁹ Dxejc bahuisac criaadga lojni, räjpni loj renani suga' ro'c:

—Niguiire najc laa tejreni.

⁷⁰ Luxh laani basgueeni stehuält. Che gojl stera't, räpsac renani suga' ro'c loj Pedr:

—Guliipacni näj luj najclu tejreni, sa'csi beṅ Galileelu, luxh guyasi riejn rniilu si'c rnii reben Galilee.

⁷¹ Dxejc gusloj canii Pedr:

—Dios gun castiigw narä palga xhet guliidi ni caniä. Dios najc testiigw, dina gumbeä niguii nani caniitu.

⁷² Dxejcti barojp huält guredxa' guidgaa. Dxejc banalajz Pedr nani räjp Jesús lojni: “Che gajdli guidgaa cuedxa' tiop huält, luj gacla choṅ huält aräjplu dilu gumbee narä.”

Dxejc guslojni cayoonni.

15

Suga' Jesús loj Pila't

(Mt. 27:1-2, 11-14; Lc. 23:1-5; Jn. 18:28-38)

¹ Che bara yääl bidxaag sa' rebixhojz ni rnibee, näj rebenṅool ni najc guxhtis, näjza rebejn ni ruluii leii, näjza guiralii reguxhtis. Dxejcti gusloj cachaagreni diidx xho gunreni. Baliibreni Jesús, sanätirenini, niluxh badeedrenini loj Pila't. ² Dxejc gunabdiidx Pila't loj Jesús räjpni:

—¿La luj ni najc rei xten rexpejn Israel, ä?

Räjp Jesús lojni:

—Si'cni guniilu, si'c najcni.

³ Dxejc gusloj rebixhojz nani rnibee cabe'c rexquej Jesús. ⁴ Gunabdidxsac Pila't lojni:

—¿Xhet rniidilu ä? Ahuii lacti xquejlu cabe'creni.

⁵ Bidxeloj Pila't sa'csi nicla si'c xhetru guniidi Jesús.

Gunibeereni guet Jesús

(Mt. 27:15-31; Lc. 23:13-25; Jn. 18:38-19:16)

⁶ Dxelaniipac ruslaa Pila't tej rebejn ni yu' latzguiib. Ruslaani chutis te ni rniab rebejn. ⁷ Lo rebejn ni yu' latzguiib nadxaag te niguii ni laa Barrabás. Bagu'tni te bejn che nu'chni lo te cuaa bejn ni gudilnäṅ gubieer. ⁸ Dxejc bidojp xhidajl bejn loj Pila't, gunabreni lojni gunni si'ctis rujnni casob lanij. ⁹ Dxejc gunabdiidx Pila't lojreni, räjpni:

—¿La rlajztu guslaä rei xten rexpejn Israel, ä?

¹⁰ Sa'csi gucbegajcni rdxechlajz rebixhojz loj Jesús, ni'c bateedrenini lojni.

¹¹ Ni'cni baquiilza rebixhojz ni rnibee rebenxhidaal te gäbreni lo Pila't:

—Baslaa Barrabás loonu lacuaa ni guslaalu Jesús.

¹² Dxejc räjp Pila't lojreni stehuält:

—¿Xhini'c rlajztu gunnää nani rniitu rei xten rexpejn Israel?

¹³ Dxejcru guredxa'reni:

—¡Bacuaani lo cruzj!

¹⁴ Dxejc räjp Pila't lojreni:

—¿Xhini'c xhet laati bejnni?

Dxejcti laareni rbedxa'rureni:

—¡Bacuaani lo cruzj!

¹⁵ Baslaati Pila't Barrabás, sa'csi rlajzni nuspaani lajz rebenxhidaal. Che gulujx gunibee Pila't, bia Jesús. Bateedti Pila't Jesús loj rexsoldaadni, te xcajni loj cruzj.

16 Dxejc huinä rexsoldaadni Jesús nen Pretoor, yu' cadre rujnreni yälguxhtis, ro'c batojpreni guiraa resa'reni. 17 Dxejcti bashuajcwreni Jesús te lad moraad, bencheereni te coron guejch basälreni yejcní. 18 Guslogajc caguxhi näjrenini, caniireni lojni:

—¡Colguiliä'p xpala'n reii xten rexpejn Israel!

19 Batiäjlneni te yabixhijl yejcní, batiobxhejnreni lojni, luxh guzuxhijbreni te rajnrenini. 20 Che gulujx basacsíreni Jesús, gulääreni lad moraad ni najcwni, sas bashuajcwrenini xhajbpacni. Gulägajczeni Jesús te cuaarenini lo cruzj.

Bacuaareni Jesús loj cruzj

(Mt. 27:32-44; Lc. 23:26-43; Jn. 19:17-27)

21 Te niguii ni laa Simón, ni siäd Cirene, sadejd ro'c, bazajni lo nejj. Niguiire najc xtad Alejandro näjza Rufo. Che sadejdni nejjga, la fuerz basguurenini xcruzj Jesús.

22 Dxejcti huinäreni Jesús cadre laa Gólgota, nani säloj: dan Calabeer. 23 Ro'c badeedreni lo Jesús bin nani nu'ch mir lojni, dxejc laani naaddini niä'ni binga. 24 Che gulujxti bacuaareni Jesús loj cruzj, gudzujtreni yejc rexhajbni, te don xhini'c xca' tejjarení.

25 Agujc chon or gulejn gubijdx che bacuaareni Jesús lo cruzj. 26 Letreer cadre bacuaareni xtojlñi scree bejnrenini: “Reii xten rexpejn Israel.” 27 Bacuaazareni lo stiop cruzj tiop gubaan, tejni xladbee Jesús, xtee xladbäjgwni. 28 Dxejc guzobj diidx ni caj loj guijtznani rñii: “Loj rebenguijdx bigabni.”

29 Luxh renani sadejd nejjga guniyajreni Jesús, cagusniibreni yejcreni, räjpreni lojni:

—¡Jaa! Luj nutiejxhlu guidoo luxh chontis dxej niunchesacluni. 30 Naj baslaa lagajc luj, biäjt loj cruzjga.

31 Näjza rebixhojznani rnibee, näj rebejn ni ruluu leii, baxhiznärenini, räjp loj sa'reni:

—Ste'ca bejn ruslaani, xhoxh digacdi guslaani lagajc laani. 32 Naj sujiäjt Cristre, reii xten rexpejn Israel, lo cruzj te guihuiinu, te chalilaaznu.

Näj regubaan ni caj lo cruzj guniyajzarení Jesús.

Xcälgujt Jesús

(Mt. 27:45-56; Lc. 23:44-49; Jn. 19:28-30)

33 Che gojl läidxej, bicäyj si'cti chon or. 34 Che gudejd chon orga, guredxa' Jesús dipro, räjpni con xtiidxni:

—Eloi, Eloi, ¿lama sabactani? —dee säloj: Xtiozä, Xtiozä, ¿xhicuent gulälazlu narä?

35 Biejn diajg gaii bejn ni suga' ro'c räjpni si'c, dxejc räjpreni:

—Colcuadiajg, Elías cabejdxni.

36 Sas baxun tejni, bahuajdxni te sponj loj binagr. Dxejcru basälñini yejc te yabixhijl, badeednini loj Jesús te yänini, räbgajcni:

—Colgusaan guihuiinu don la siädläjd Elíasni loj cruzj.

37 Dxejcru guredxaduxh Jesús, gujttini. 38 Dxejc lajd ni najl nen guidoro biräjsni, gujcní tiop la', jiaali lo yujli. 39 Suga' capitán nani rnibee te gayuu soldaad nez loj Jesús, luxh che bahuiini xho guredxa' Jesús scree näj xho gujtni, räjpni:

—Guli'pacni, niguiire najc Xi'n Dios.

40 Suga'za gaii gunaa, zijt cadxelojreni. Lojreni yu' Marii Magdalen, näj Marii, xnan Jacob ni najc huinru, näjza José, näjza Salomee. 41 Che guyu' Jesús Galilee birinajl regunaare Jesús, luxh bahuiirenini. Yu'za xhidajlru regunaa ni biädñajl Jesús che biädñi Jerusalén.

*Biga'tz Jesús**(Mt. 27:57-61; Lc. 23:50-56; Jn. 19:38-42)*

⁴² Bui' gudxhijn, luxh najcni dxe bispr che rusucheereni par sabd, dxej ni rusilajz rexpejn Israel. ⁴³ Biääd José ni siääd Arimatea, najcni te rebejn ni sajc loj reguxhtis. Näjza laani cabäjzni xcälrnibee Dios. Guideb yäl nabajn gunabni tiexh Jesús lo Pila't. ⁴⁴ Bidxelo Pila't alagujt Jesús, sas gurejdxni capitán ni rnibee tej gayuu soldaad, gunabdiidxni lojni la balagujt Jesús. ⁴⁵ Che räjp capitánga lojni agujt Jesús, dxejc badeed Pila't tiexh Jesús lo José. ⁴⁶ Agusii José te bariaad, luxh che gulätni Jesús lo cruzj, batejbnini neñ bariaadga. Dxejc gudixhni Jesús neñ te biliää ni caj cuä' te guilaj, dxej cru batzugni te guiro ro' biliääga. ⁴⁷ Bahuii Marii Magdalen näj Marii xnan José cadro biga'tz Jesús.

16*Huäjz Jesús loj rebengut**(Mt. 28:1-10; Lc. 24:1-12; Jn. 20:1-10)*

¹ Che gudejd sabd, dxej ni rusilajz rexpejn Israel, Marii Magdalen näj Marii xnan Jacob näjza Salomee gusii setnejxh te chatäábreni se'tga tiexh Jesús. ² Che biu' xmaan, rsildooru, che calejn gubijdx, biädreni ro' xpaani. ³ Cayäjp loj sa'reni:

—¿Chu gudzucaj guiroga ro' xpaani te jiu'nu?

⁴ Che gudixhlojreni, bahuiireni alagubicaaj guijga, luxh najcni te guiroduxh. ⁵ Che biu'reni neñ biliääga, bahuiireni lo te bi'n sobga' ladbee neñ biliääga. Najcw bi'nga te ladnol ni najc siool. Dxejc bidxejb regunaaga. ⁶ Dxejcti räjp bi'nga lojreni:

—Na'c guidxejbtu. Caguiltu Jesús ni siääd Nazare't, nani cuaj lo cruzj. Rutiruni ree. Agubajñni lo rebengut, coltahuii cadro gudixhreni tiejxhni. ⁷ Colchäj, colchaye'tz lo rexpejnpacni, loj Pedr, ganidla Jesús guidzujñ Galilee, dxejcti guidzujñtu. Ro'c fiitu lojni, si'cni guniini lojtu.

⁸ Biriitireni ro' biliääga, racejslireni sa'csi cadxejbreni. Rut lojdi guniidi-reni sa'csi cadebduxhreni.

*Baluiloj Jesús loj Marii Magdalen**(Jn. 20:11-18)*

⁹ Gubajn Jesús loj rebengut rsildooru che biu' xmaan. Baluilojni galoo loj Marii Magdalen, nani agacgulääni gajdz beñdxab neñ lastooni. ¹⁰ Dxejcti huij Marii Magdalen, huiye'tzni loj renani cuansanäj Jesús, renani cayac-huin lajzni, cayoonreni. ¹¹ Che biejn diajgreni ahuäzsac Jesús lo rebengut, luxh Marii abahuii lojni, di lajzreni nilii.

*Baluiloj Jesús loj tiop xpejñpacni**(Lc. 24:13-35)*

¹² Ste'ca najc Jesús baluilojni loj tio'p renani sasaj sääreni lo nejz. ¹³ Dxejcti gubi'reni, huiye'tzreni loj sgaiga, luxh nicla xtidx reni'c di lajzreni nilii.

*Baxhal Jesús repost**(Mt. 28:16-20; Lc. 24:36-49; Jn. 20:19-23)*

¹⁴ Lult baluilojni loj guitzubiteebreni che sobga'reni lo mex. Gudidxa' Jesús lojreni, sa'csi di lajzreni nilii luxh guyaa lajzreni. Di lajzreni nilii xtidx renani bahuii loj Jesús che gubanğajcni loj rebengut. ¹⁵ Räjp Jesús lojreni:

—Colchäj guideb lo guedxliuj, colñii xtidx Dios lo guiraa rebejn. ¹⁶ Nani chalilajz luxh tiobnisni, siliaani loj dojl; biäda nani di lajzni chalii sinijtni lo dojl. ¹⁷ Niluxh remilagwre jiannäj renani chalilajz: sibääreni beñdxab

xcuentä; siniireni ste'ca diidx; ¹⁸ guiniaazreni bäl con naareni; masque yäreni xhicos ni rugu't bejn, xhet gacdireni; susujreni naareni yejc rebenracxhuu luxh siajc rebenracxhuu.

Huä'p Jesús xhaguibaa

(Lc. 24:50-53)

¹⁹ Gulujxti gunii Dad Jesús si'c lojreni. Dxejc huäjsni sääni xhaguibaa. Ro'c huicueni cuä' Dios ladbee. ²⁰ Dxejcti laareni bire'chreni, guniireni xtidx Dios guiranejz. Lagajc Dadga gucnäjreni, bejnni milagwr te gucbee bejn laapac xtidx Dios ni caniireni. Sugacni si'c.

Rediidx Nani Bacuaa Lucas Xcuent Jesucrist

Xhicuent bacuaa Lucas rediidxre

¹ Xhidajl bejn abacuaa lo guijtzcxcuent guiraa redzuun ni gujc nez loonu te cuäxnejzreni redzuunga ² si'cpac ni biääd rediidxga loonu. Rebejn nani bahuiloj guiraa recosre cheni guslojlireni, näjza reni gucnäj basule' xtidx Dios najc renani basule' rediidxga loonu. ³ Luxh sa'csi abilä, abahuiloä, abenduxhä xhigab xcuent guiragajc ni gusajc che gusoblojlini, ni'c runä xhigab laaca gucuaä rediidxre, xnejz-xnejzni lo guejblu, Dad Teófilo, ⁴ te gachesa'c guejblu ni najc didxlii xcuent guiraa rediidx ni abisieed guejblu.

Te xangl Dios gunii xho gaal Juan ni rutiobnis

⁵ Cheni gujc Herodes reii xten región Judea, guyu' te bixhojz ni laa Zacarías, ni nadxaag lo rexpejn Abías. Chäälni laa Elisabe't, ni najcza te xagdoobixhoz Aarón. ⁶ Guiro'preni najcreni nadolajz nez loj Dios, rusobreni xtidx Dios näjza xleii Dios, ni'c digacdi gucuaquij bejnreni xcuent nicla tej dojl. ⁷ Luxh ruti xi'nreni, sa'csi chäälni digacdi chu xi'nni. Luxh guiro'preni anajcreni bengool.

⁸ Te dxej, laj ni cayujn Zacarías dzuun nen guidoro si'c bixhojz nez loj Dios, ⁹ dxejc con daad bibee chuni'c jiu' nen yudxan xten guidoro te guze'creni yaal si'cni najc costumbr xten rebixhojzga. Dxejc si'c gulereni Zacarías gunni. ¹⁰ Laļ ni caguze'cni guxhyaal, suga' guiraa rebejn lo xle' guidoro, cabedxcanabreni lo Dios. ¹¹ Dxejcti baluiloj te xangl Dios lo Zacarías, suliiini ladbee lo dxan cadro cayejc guxhyaal. ¹² Che bahuii Zacarías lo xangl Dios, di jien xhi gunni, lacti bidxebduxhni. ¹³ Sas xangl Dios räjp lojni:

—Na'c guidxejblu, Zacarí, sa'csi Dios abiejn diajgni xtiidxlu, luxh su' te xi'n chääl, Elisabe't; cuälajluni Juan. ¹⁴ Sibalazduxhlu, siroob lastoolu; xhidajl bejn sibalajz sa'csi gaalni, ¹⁵ sa'csi benro gac xi'nlu nez loj Dios. Dini yä bin, nicla maxcaal. Sibäjz Sprit Dxan xten Dios nen lastooni cheni gaallini. ¹⁶ Sujnni gusiechlaiz xhidajl rexpejn Israel, guibi'reni lo Gueb Dios. ¹⁷ Juanre sinijdni loj Dad, sujni lagajc xhigab, sajpn lagajc yälrnibee ni gojp profe't Elías, te che jiejn diajgreni xtiidxni susiechlaiz redad, susiäjlzarenini diidx con rexi'nreni. Sigajcza rebejn ni di gusoob xtidx Dios sisieedreni gusoobreni xtidx Dios, te si'c jiädsucheeni lastoo rebejn te chalilajzreni xtidx Dad ni jiääd.

¹⁸ Gunabdiidx Zacarí loj anglga, räjpni:

—¿Xho mood gacheä guliilu? Sa'csi anacä bengol, sigajcza chälä.

¹⁹ Dxejcti räjp anglga lojni:

—Narä nacä Gabriel, runä dzuun lo Dios. Laani baxhalni narä te guininää luj, jiädnäädidxhuenre lojlu. ²⁰ Luxh naj, sa'csi dilajzlu nilii xtidxä, sia'nlu gop, digacdiru guiniilu, cheni gaalli xi'nlu sinisacclu. Rextidxä sisiojb che guidzujn dxej che riäjlgacni.

²¹ Lalni cayajc dee, cadxeloj rebejn ni suga' nez ro' yudxan cabäjzreni guirii Zacarí sa'csi cayaclaani nen yudxan. ²² Che birii Zacarí, di niajcdiru niniini loj rebejn; dxejc gucbeereni yu' xhi cosro bahuiini nen yudxan xten guidoo. Dxejc con seen guninäjni rebejnnga, sa'csi xheti xse'ni te niniini.

²³ Che gulujx bejnini dzuun nen guidoro, gubi'ni rolizni. ²⁴ Che gudejd redxej dxejcti bazejn nuu Elisabe't, chäälni, báz, gaii bäii diruni nirii rolizni. Bejnini xhigab, räjpni: ²⁵ “Si'c bejn Dad Dios narä naj, gucnäjni narä te diru bejn cuälaz narä sa'csi ruti xi'nä.”

Biäddeed te xangl Dios diidx lo Marii gaal Jesús

²⁶ Che gudejd xho'p bäii, baxhal Dios xanglni Gabriel lo te guedx Galilee ni laa Nazare't, ²⁷ te chahuini te dxapxteeb ni laa Marii. Agojt xtiidxni te guchnaani te dade' ni laa José. Dade're najc xagdoo torei David. ²⁸ Biu' anglre cadro sobga' dxape'ga, räjpni lojni:

—Xchan, dxa'p ni sanälajz Dios, ni agule Dios loj guiraa regunaa. Dios gacnäjlü. Abenle' Dioslu loj guiraa regunaa.

²⁹ Luxh che bahuiini lo xangl Dios bidxelojni lo rextiidxni, rujnni xhigab: “¿Xhicuent caniini si'c loä?” ³⁰ Dxejc räjp xangl Dios lojni:

—Na'c guidxejblu, Marii; agule Dios luj. ³¹ Bacuadiajg diidx. Suulu báz, su' te xi'nlu. Che gaalni guirilajni Jesús. ³² Laani sajcní te bejn ni sacduxh. Sirilajzani Xi'n Gueb Dios ni yu' xhaguibaro. Gueb Dios sujn gacni reii sigajc ni gujc toxtadgoldooni David, ³³ te tejpas guinibeeni loj rexi'n Israel, luxh dipac xcälrnibeeni nitloj.

³⁴ Dxejc gunabdiidx Marii lo xangl Dios, räjpni:

—¿Xho mood gac dee? Ni dxapxteeb narä, gajd narä gumbeä niguii.

³⁵ Badzu' xangl Dios diidxre lojni, räjpni:

—Sprit Dxa xten Dios siäd lojlu, xcälrnibee Gueb Dios ni yu' xhaguibaa suhuajcwni luj si'c te za. Ni'cni báz ni gaal sajcní te bendxan, sibälaj bejn ni Xi'n Dios. ³⁶ Näjza sa'lu Elisabe't su' te xi'nni luxh anajcni te bengool; ni'cni gunaa nani najreni digacdi chu xi'nni agujc xho'p bäii nuuni báz. ³⁷ Xheti te cos ni naganduxhtej nez loj Dios —räjp Xangl Dios.

³⁸ Dxejcti räjp Marii:

—Narä nacä xmos Xtadnu Dios; mbaj, sugunnäj Dios narä si'ctisni gunii gueblu loä.

Dxejcti biunejz angl xten Dios lojni, sä'tini.

Bihuii Marii lo Elisabe't

³⁹ Nen redxejga, basquejn Marii sääni lo te guejdx ni tre' nen redajn xten Judea. ⁴⁰ Biu'ni rolijz Zacarí, guniini xtidxbee loj Elisabe't.

⁴¹ Che biejn diajg Elisabe't guniini, biniib xi'nni xque'ni, gudxaj Sprit Dxa xten Dios lastoo Elisabe't. ⁴² Dxejc dipduxh guniini räjpni:

—Abenle'ru Gueb Dios luj loj guiraa regunaa. Abenle'zani xi'nlu. ⁴³ ¿Chu narä te siädhuii xnan Xtioozä narä? ⁴⁴ Biejntis diagä xtiidxlu, bibalazgajc xi'nä, biniibni xque'ä. ⁴⁵ Sibaa lajzlu, luj ni huililajz sisiojbpac nani gunii Xtadnu Dios.

⁴⁶ Dxejc räjp Marii:

Xaimä rliä'p xpala'n Xtadnu Dios.

⁴⁷ Rbalazduxhza lastoä xcuent Dios ni ruslaa narä lo dojl.

⁴⁸ Sa'csi agule Dios narä,

nacä te mos gunaa ni xhet sajcdi,
luxh najli sinii rebejn näjza reni churu chu lo guedxliuj,
chicbaani loj guiraa regunaa.

⁴⁹ Sa'csi Gueb Dios ni rajp guiraa yälrnibee abejn xhidajl cosro loä, dxanduxh najc lajni.

⁵⁰ Dini cuääz gulaslajzni guiraa rebejn ni riu xtiidxni, reni rajnni.

⁵¹ Xhidajl cosnagajn abejnni con lagajc naani,
abatie'chni renani rustioob lastooreni rliä'p lagajc xpala'nreni.

⁵² Abasajbni reni rnibee,
per rebenadölajz bejnni gacreni benro.

⁵³ Bachajni xque' reni calaan,
badeedni ganax cossa'c,

niluxh badzu'ni rebejn ni yu' xhixtenreni xhet badeed dini lojreni.

⁵⁴ Gucnäjni nación xten xpejn Israel, ni najc xmos Dios.

Di lajzni niäl nulaslajznireni

⁵⁵ sa'csi si'c bia'nni diidx con retoxtadgoldoonu,

sinuu gulazlajzni toAbram näjza rexagdooni par tejpas.

⁵⁶ Dxejc bia'n Marii rolijz Elisabe't si'cti chon bäii, dxejc gubisacni rolijzni.

Che gojl Juan ni rutiobnis

⁵⁷ Che baza' xpäi Elisabe't, dxejc gojl xpäzni te báz niguini. ⁵⁸ Dxejc bidzujn rexpisiñni näjza resa'ni biädhuiireni guiro'preni che gacbeereni lacti hueen gujc Dios con laani. Bibalaznäjreneni. ⁵⁹ Che gudejd xhujn dxej, huinäreni bāze'ga chuni bee. Rlajz rebejn nirilaj bāze'ga si'c laa xtadni, Zacaríi. ⁶⁰ Niluxh xnanni räjp:

—Na'c, guirilajpacni Juan.

⁶¹ —¿Xhicuent? —räjpreni—. Ruti xfamillu ni laa si'c.

⁶² Dxejcti gunabdiidxreni con seen lo xtad bāze'ga te gacbeereni xho rlanjzi guirilaj bāze'ga. ⁶³ Xtadni gunab te la' guijtz, dxejc bacuaani: “Lajni najc Juan.” Dxejc guiraareni bidxelojreni. ⁶⁴ Luxh lagajc dxejc gujc gunii Zacaríi stehuält, dxejc guslojni calä'pni xpala'n Dios. ⁶⁵ Bidxeloduxh rexpisiñreni xhini'c gujc ro'c. Luxh bire'ch diidx xcuent recosre guideb neñ redajn xten Judea. ⁶⁶ Guiraa reni biejn diajg rediidxga gusloj cayujnreni xhigab, dxejc gunabdiidxreni loj sa'reni:

—¿Chuchani'c gac biuxe'ga?

Si'c guniireni sa'csi huenliisi abenle' Diosni.

Dij ni bil Zacaríi

⁶⁷ Dxejcti biääd Sprit Dxañ xten Dios neñ lastoo xtadni Zacaríi, gusloj caniini rediidx ni badeed Dios lojni, räjpni:

⁶⁸ Guiliä'pnu xpala'n Dios, Xtios rexpejn Israel, sa'csi abiädhuiini loonu, ni najcnu rexpejnñi, te siädguslaani nuurnu neñ dojl.

⁶⁹ Abaxhalni loonu te bejn ni rajp yälrusladuxh bejn neñ dojl.

Najcni te rexagdo toxmosni David.

⁷⁰ Lagajc si'cni badeed Dios gunii redade' ni bacuaa xtiidxni lo guijtz galoo:

⁷¹ Suslaani nuurnu loj reni rdxe'ch loonu,

näjza ladzñaa rebejn ni gulälaz nurru.

⁷² Te gulaslajzni retoxtadgoldoonu,

te soob diidx ni bia'nni con rebejnğa.

⁷³ Scree bia'nni diidx con toxtadgoldoonu, Abram:

⁷⁴ Suslaani nuurnu ladzñaa rebejn ni rdxe'ch loonu,

te na'c guidxeebnu chunu lojni gusoobnu xtiidxni,

⁷⁵ con yälñabañsa'c näjza yälğuxhtis guiraa redxej ni guibajñnu.

⁷⁶ Luxh luj, bāze', sirilajlu dade' nani rnii xtidx Gueb Dios ni yu' xhaguibaa,

sa'csi sinijdlu lo Dad te gusucheelu rexnezyulajzni,

⁷⁷ te gunlu gacbee rexpejnñi xho gac laani lo dojl,

te gac guibicaj xtojreni.

⁷⁸ Sa'csi Dios sanälajz bejn,

näjza rulaslajzni bejn ni'cni xhaguibaali suxhalni xi'nni te jiädñani te dxe-coob,

⁷⁹ te gusanijni lo rebejn ni nabajn lo yälxcäy xten dojl,

näjza rebejn ni nabajn lo xpala yälğujt,

te guluiini xho sánu lo xnez yälrbecdxilajz.

⁸⁰ Dxejc gunís biuxe'ga, guyuduxh xcäriejnni xcuent recos xten Dios. Gubajnni nez loj reyubijdz cheni bidzujnli dxej che baluilojnj loj rexpejn Israel, che gusloj cagusule'ni xtidx Dios.

2

Che gojl Jesús (Mt. 1:18-25)

¹ Neñ redxejga, gunibee Augusto César xcaj laj rebejn guideb guedxliuj lo xquijtzni. ² Ni'c nacobguc yälbigabre cheni najc Cirenio gobernadoor xten Siria. ³ Guiraa rebejn nanab chääreni lagajc lajdxreni te ro'c guigabreni. ⁴ Ni'cni birii José guedx Nazare't Galilee, te huijni Judea, lo guedx Belén, cadre gojl toDavid, sa'csi najc José xagdoo toDavid. ⁵ Huinäni Marii, nani guchnaani, huijreni guedx Belén te ro'c guigabreni. Luxh nuu Marii báz. ⁶ Lalsi yu'reni guedx Belén, bidzujn dxej ni gaal xi'n Marii. ⁷ Ro'c gojl xi'n galooni, dxejc batejbnini te xzuudni. Dxejc gudixhnini cadre rusälreni guijxh rajw reguidxaa sa'csi xhetiru yu' xcalaareni jia'nreni.

Rexangl Dios näjza rebaxtoor

⁸ Gajxh guejdxga guyu' gaii baxtoor cayajpreni xhiilreni lo niaa guxhijn. ⁹ Chela baluiloj te xangl Dios, luxh bianij guideb gabireni con yälrdimbicha' xten Dios, dxejc bidxebduxhreni. ¹⁰ Sas anglga räjp lojreni:

—Na'c guidxejbtu, narä siädnää lojtu te didxsa'c ni suspalajz guiraa ben guedxliuj. ¹¹ Nadxej gojl neñ guejdx xten toDavid, tej ni guslaa bejn neñ dojl, laani najc Crist ni najc Dad. ¹² Dee najc te seen lojtu, sidxäلتu baze'ga nadejbni neñ te xzuudni, naga'ni cadre rusälreni guijxh rajw reguidxaa.

¹³ Lagajc dxejc guideb gabi anglga baluiloj naclejn xangl Dios, gulä'preni xpala'n Dios, räjpreni:

¹⁴ Collä'p xpala'n Dios ni yu' xhaguibaali.

Suchu yälrbecdxilajz lo rebejn guedxliuj ni balazlajzni.

¹⁵ Che gubi' rexangl Dios xhaguibaa, gusloj rebaxtoor canii loj sa'reni:

—Colcho' guedx Belén colchohuii ni guzajc ro'c ni gunii Xtadnu Dios loonu.

¹⁶ Rusquenduxhreni sääreni, dxejc bidxälreni Marii näjza José näjza baze' ni naga' neñ cadre rusälreni guijxh rajw reguidxaa. ¹⁷ Cheni bahuiireni loj rebejnnga, bijreni diidx xhi räjp rexangl Dios lojreni xcuent baze'ga. ¹⁸ Niluxh guiraa reni biejn diajg rediidxre bidxeloduxhreni xtidx rebaxtoorga. ¹⁹ Niluxh Marii gulucheeni guiraa rediidx ni biejn diajgni neñ lastooni, rujntisni xhigab xcuent rediidxga. ²⁰ Dxejcti rebaxtoorga gubisacreni cayolreni, calä'pzareni xpala'n Dios xcuent guiraa rediidx ni biejn diajgreni näjza ni bahuiireni sa'csi guiraani gujc si'cni räjpreni lojreni.

Cheni huinäreni Jesús chuni bee

²¹ Che gudejd xhujn dxej, huinäreni baze'ga chuni bee, dxejc gulälajrenini Jesús, lagajc laj ni räjp xangl Dios loj Marii guirilajni galooli guuni bázga.

²² Che basa' redxej ni gac naya te nan si'cni gunibee toMoisés loj xquijtzni, huinäjreni baze'ga guedx Jerusalén, neñ guidoro gunabreni gacnäj Diosni par tejpas. ²³ Bejnreni scree sa'csi caj lo guijtz xten Dios: “Guiraa rexingangaloo xten bejn guilia'tu lo sa'reni te gunreni xtzunä”, räjp Dios. ²⁴ Bidzujnreni ro'c ca'reni te gojn si'cni rnibee rexquijtz Dios: “Tio'p gague' o tio'p palombáz.”

²⁵ Neñ redxejga, neñ guedx Jerusalén rbäjz te dade' ni laa Simeón. Najcni te bensacduxh, randuxhni Dios, cabäjzni jääd te bejn ni guslaa rexpejn Israel. Rbäjz Sprit Dxaan xten Dios neñ lastoo Simeón. ²⁶ Sprit Dxaan abejn gacheeni dini guet ansde fiini loj Crist ni guxhal Dios. ²⁷ Dxejcti räjp Sprit Dxaan xten

Dios lojni chääni guidoro. Laḷni yu'ni neḷ guidoo, bidzujḷ José con Marii, biädnäreni báz Jesús, te gunnäjreni Jesús nani rnibee xtidx Dios gunreni.

²⁸ Dxejc gudääz Simeón bāze'ga, gusloj calä'pni xpala'n Dios, räjpni:

²⁹ Dad, asajc gusaanlu guetä con yälrbedxilajz,

sa'csi abasooblu nani bia'n diidx gunnäjlu xmoslu.

³⁰ Sa'csi abahuiloä nani siädgusḷaa nuurnu neḷ dojl,

³¹ ni abasujlu nez loj guiraa rebeḷ guedxliuj.

³² Laani najc bianij ni susanij loj rebejḷ ni di gac xpejḷ Israel,

nājza nani gac xpala'n rexpejḷlu guedx Israel, lajdxlu.

³³ Bidxeloj José nājza xnan Jesús rediidx ni canii Simeón xcuent bāze'ga.

³⁴ Dxejc benle' Simeón yejcreni, dxejc räjpni lo Marii xnan Jesús:

—Bahuii gan; bāze're biääd te loj rexpejḷ Israel chu reni sibälaz xtiidxni, te chuza reni sililajz xtiidxni. Laani gacni te seen nani sibälaz bejḷ, ³⁵ te si'c jienloj xhi xhigab rujḷ cade tej rexpejḷ Israel neḷ lastooreni. Dxejcti par luj sajcnī asdoo chääz te spaad lastoolu, sa'csi gac-huinuxh lastoolu.

³⁶ Suga'za te nane' ni laa Ana ro'c, rniini xtidx Dios xcuent recos ni churu gac. Najcni xindxa'p Fanuel, ni najc famil xten Aser. Anajcni beḷgolduxh. Bachḷnaani che najcni dxaphuin, luxh gajdztiis ijz guläznäjni chäälni che bia'nni biuud. ³⁷ Najcni te gunabiuud ni yu' tajbitajp ijz. Diruni guirii guidoro, ro'ctis yu'ni dxej, yääl te yu'tisni lo Dios con yälrucua'n nājza yälrbedx-rniab lo Dios. ³⁸ Che gubigni lojreni lagajc dxejc, badeedni xquixtios lo Dios sa'csi abidzujḷ tej ni gusḷaa rebejḷ lo dojl. Dxejc gusloj caniiini diidx xcuent báz Jesús loj guiraa renani cabājz yälrusḷaa xten Jerusalén.

Che gubi'reni guedx Nazare't

³⁹ Che gulujx bejḷ xcuzajnni guiraa recos ni caj lo xquijtz Dios gunreni, gubisacreni Galilee, lo guedx Nazare't, lajdxreni. ⁴⁰ Gunís biuxe'ga, guc nadaanni, guc nasinruzani sa'csi cayacnäj Diosni.

Che biu' Jesús guidoro

⁴¹ Casob ijz rij rexuczajḷ Jesús guedx Jerusalén te rinäreni te gojḷn xten lanij pascw. ⁴² Che basa' Jesús tzubitio'p ijz, huij guiraareni guedx Jerusalén si'c najc costumbr gac lanijga. ⁴³ Che gulujx lanijga, gubisacreni. Bia'n Jesús guedx Jerusalén, luxh nicla xnanni niclaza José direni niacbee bia'nni. ⁴⁴ Bejḷnreni xhigab pet siädsanäjni rebeḷsa'ni. Si'c guzajreni tebdxej, dxejc gudiilrenini loj resa'reni, nājza loj reni rumbeereni, ⁴⁵ direni nidxälḷni. Dxejc gubisacreni guedx Jerusalén te huitiilrenini ro'c.

⁴⁶ Choḷn dxej gudiilrenini dxejc bidxälrenini neḷ guidoro, sobga'ni nez galäii rebejḷ ni najḷn leii, cacuadiajḷgnī xtiidxreni, cayujnzani yälgunabdiidx lojreni. ⁴⁷ Luxh guiraareni cacuadiajḷ xtiidxni, cadxeloduxhreni yälḷnajḷn xtenni, nājza rediidx ni cagudzu'ni lojreni. ⁴⁸ Che bahuii rexuczajnni lojni, bidxelojreni. Dxejc räjp xnanni lojni:

—Xi'nä, ¿xhicuent bennäjlu nuurnu scree? Narä nājza xtaḷḷu cayunduxhnu xhigab caguiilnu luj nezree, nezre'c.

⁴⁹ Dxejcti räjp Jesús lojreni:

—¿Xhicuent caguiiltu narä? ¿La ditu gan riäjḷ gunä xtzun Xtaḷä, ä?

⁵⁰ Luxh laareni direni niacbee rediidx ni guniini lojreni.

⁵¹ Dxejcti gubinäjnirenī guedx Nazare't, sanuuni rusooḷbni xtiidxreni. Luxh Marii gulucheetisni guiraa recosre neḷ lastooni. ⁵² Duurtis gunís Jesús, caroobruza xcälḷnajnni. Sanälajz Diosni, sanälajz za guiraa rebejḷnni.

3

*Yälrusule' Juan ni rutiobnis**(Mt. 3:1-12; Mr. 1:1-8; Jn. 1:19-28)*

¹ Neñ redxej cheni agujc tzuun ijz najc Tiberio César reii, Poncio Pila't najc gobernadoor xten Judea; Herodes najc gobernadoor xten Galilee; Felipe, bejtz Herodes najc gobernadoor xten Iturea näjza Traconite; Lisantias najc gobernadoor xten Abilinia. ² Lagajc neñ redxejga Anás näjza Caifás najc rebixhojzro xten guidoro guedx Jerusalén. Neñ redxejga biääd xtidx Dios lo Juan, xi'n Zacaríi cheni rbäjzni nez lo reyubijdz. ³ Ni'c cuanzaj Juan guideb nez reyuj xten gueu Jordán, ro'c basule'ni xcuent yälrusiechljaz, yälrobnis ni nanab gunreni te gudzucaj Dios xtojłreni. ⁴ Si'cni caj lo xquijtz Isaías, dade' ni gunii xtidx Dios, cadre räjpni:

Riejn xse' te ni rbedxa' nez loj reyubijdz:

“Colyunsac xnezyuj Dad, colslíi rexnezyulajzni.”

⁵ Guiraa cadre sojb gueed sidxe'ni,

guiraa relom sibicajreni,

guiraa renezyuj ni xhet naliidi, siliireni,

guiraa renezyudxuudx, saccsa'ceni.

⁶ Dxejcti guiralii bejn suhuu loj nani guxhal Dios.

⁷ Che bahuii Juan siääd xhidalduxh bejn te guirobnisreni, räjpni lojreni:

—¡La'tu benguijdx ni najc si'c bälñialajz! ¿Chuni'c balijdxtu guxuntu loj xcälrdxe'ch Dios ni siädgajxh, ä? ⁸ Colguchaa xmoodtu te si'c fii bejn guliini abasiechljaztu. Na'c cuentis rniitu lagajc neñ lastootu “Abram najc xtadnu”, sa'csi narä rniä lojtu, sajc xca' Dios reguijre te con laareni guncheeni bejn gac rexagdoo toAbram. ⁹ Aguibyajg naga' cuä' xlobaa reyajg; ni'cni guiraa reyajg nani di ninexhsa'c xcaj lojni, sidinreni te checreni.

¹⁰ Dxejcti gunabdiidx rebejn lojni, räjpreni:

—¿Xhini'c nanab jiennu?

¹¹ Dxejc badzu' Juan diidxre räjpni:

—Ni rajp tio'p xhajbni, sugudeedni tejni lo bejn ni xhet rajpdi. Sigajcza gunreni rajp xhi gaurení, quisrenini loj ni xheti xhi gauni.

¹² Näjza gaii bejn nani rusquijx xcuent reimpuet bidzujñ lojni te guirobnisreni, dxejc gunabdiidxreni lo Juan räjpreni:

—Dad, mastr, ¿xhini'c nanab jiennu?

¹³ Räjp Juan lojreni:

—Na'c gusquijxtu bejn maazdi ni nungäjł quiixreni.

¹⁴ Näjza gaii resoldaad gunabdiidx lojni räjpreni:

—¿Nurnu a'? ¿Xhini'c nanab jiennu?

Dxejc räjpni lojreni:

—Na'c guchejbtu bejn; na'c gäbtu chale'ctu xcälquij bejn ni xhet bejndi parsi guniidxreni meel lojtu; colbalaznäj nani rujntu gaan.

¹⁵ Cadxeloj rebejn, cayujnreni xhigabduxh, naareni, “pet Juan najc Crist ni jiääd.” ¹⁶ Dxejc badzu' Juan diidxre, räjpni loj guiraa rebejn:

—Guliipac rutiobnisä la'tu con nis, luxh siääd tej ni sajcrú loä, nani nicla gac surloä, cuää xcura'chni. Laani sutiobnisni con Sprit Dxan xten Dios te cuääzni neñ lastootu näjza con guiboo, sa'csi rajpruni yälñibe loä. ¹⁷ Aca'ni pal te gusiani triuu te cuääni triusa'c lo guijxh te cucheeni triuu neñ ngodx xtenni, dxejcti reguixhtriuuga suze'cnini lo bajl ni rejc par tejpas.

¹⁸ Rediidxre näjza xhidajł yälñulijdx gunii Juan te basule'ni redidxcoob loj rebejn. ¹⁹ Näjza lo Herodes ni najc gobernadoor basule' Juan diidx, gudilñajnini sa'csi xhet laadi cayujñni, sa'csi rbäznäjni Herodías, chääl bejtzni

Felipe, näjza xcuent sgaii dojl ni bejn̄ni. ²⁰ Di Herodes niu xtidx Juan, alga bejn̄ni stee dojl, basäl̄ni Juan nen̄ latzguib.

Che gurobnis Jesús

(Mt. 3:13-17; Mr. 1:9-11)

²¹ Che batiobnis Juan rebejn̄, näjza Jesús birobnis. Cheni cabedx-canabni lo Dios, bixal xhaguibaa, ²² dxejc biäjt Sprit Dxi xten Dios si'c te palom, bidzuj̄ni cadro suga' Jesús. Dxejc xhaguibaali biejn̄ xse' te ni räjp:

—Luj, najclu xi'nä ni sanälazä. Rbanälazduxhä luj.

Resa' Jesús

(Mt. 1:1-17)

²³ Yu' Jesús galbitzoo ijz che gusloj cayuj̄ni dzuun ni badeed Dios gunni. Rchalo rebejn̄ najcni xi'n José, xi'n Elí. ²⁴ Elí gujc xi'n Matat. Matat gujc xi'n Leví. Leví gujc xi'n Melqui. Melqui gujc xi'n Jana. Jana gujc xi'n José. ²⁵ José gujc xi'n Matatías. Matatías gujc xi'n Amós. Amós gujc xi'n Nahum. Nahum gujc xi'n Esli. Esli gujc xi'n Nagai. ²⁶ Nagai gujc xi'n Maat. Maat gujc xi'n Matatías. Matatías gujc xi'n Semei. Semei gujc xi'n José. José gujc xi'n Judá. ²⁷ Judá gujc xi'n Joana. Joana gujc xi'n Resa. Resa gujc xi'n Zorobabel. Zorobabel gujc xi'n Salatiel. Salatiel gujc xi'n Neri. ²⁸ Neri gujc xi'n Melqui. Melqui gujc xi'n Adi. Adi gujc xi'n Cosam. Cosam gujc xi'n Elmodam. Elmodam gujc xi'n Er. ²⁹ Er gujc xi'n Josué. Josué gujc xi'n Eliezer. Eliezer gujc xi'n Jorim. Jorim gujc xi'n Matat. ³⁰ Matat gujc xi'n Leví. Leví gujc xi'n Simeón. Simeón gujc xi'n Judá. Judá gujc xi'n José. José gujc xi'n Jonán. Jonán gujc xi'n Eliaquim. ³¹ Eliaquim gujc xi'n Melea. Melea gujc xi'n Mainán. Mainán gujc xi'n Matata. Matata gujc xi'n Natán. ³² Natán gujc xi'n David. David gujc xi'n Isaí. Isaí gujc xi'n Obed. Obed gujc xi'n Booz. Booz gujc xi'n Salmón. Salmón gujc xi'n Naasón. ³³ Naasón gujc xi'n Aminadab. Aminadab gujc xi'n Aram. Aram gujc xi'n Esrom. Esrom gujc xi'n Fares. Fares gujc xi'n Judá. ³⁴ Judá gujc xi'n Jacob. Jacob gujc xi'n Isaac. Isaac gujc xi'n Abraham. Abraham gujc xi'n Taré. Taré gujc xi'n Nacor. ³⁵ Nacor gujc xi'n Serug. Serug gujc xi'n Ragau. Ragau gujc xi'n Peleg. Peleg gujc xi'n Heber. Heber gujc xi'n Sala. ³⁶ Sala gujc xi'n Cainán. Cainán gujc xi'n Arfaxad. Arfaxad gujc xi'n Sem. Sem gujc xi'n Noé. Noé gujc xi'n Lamec. ³⁷ Lamec gujc xi'n Matusalén. Matusalén gujc xi'n Enoc. Enoc gujc xi'n Jared. Jared gujc xi'n Mahalaleel. Mahalaleel gujc xi'n Cainán. ³⁸ Cainán gujc xi'n Enós. Enós gujc xi'n Set. Set gujc xi'n Adán. Adán gujc xi'n Dios.

4

Che biricaj bendxab loj Jesús

(Mt. 4:1-11; Mr. 1:12-13)

¹ Jesús, sa'csi rbäjz Sprit Dxi xten Dios lastooni, biunejzni gueu Jordán, dxejc huinä Sprit Dxi xten Diosni lo reyubijdz. ² Ro'c bia'nni tiuu gubijdx, tiuu guxhij̄n. Ro'c bidzuj̄n bendxab ni rnibee te rlanj̄ni gunni gusoob Jesús xtiidxi. Luxh calaan Jesús, sa'csi gajdni gau guiraa nen̄ redxejga. ³ Dxejc räjp bendxab lojni:

—Palga guliilu Xi'n Dioslu, gunibee gac reguijre yätxtiil.

⁴ Badzu' Jesús diidxi lojni räjpni:

—Acax loj reguijtz xcuent Dios: “Xhet ganaxdi yätxtiil gun sajc guibaj̄n bejn̄, näjza guiraa diidxi nani rnii Dios suj̄n guibaj̄n bejn̄.”

⁵ Dxejcti huinä bendxab Jesús jiaa yejc te daj̄n. Teratbäztis baluilojni guiraa reguedxro ni tre' lo guedxliuj. ⁶ Dxejc räjp bendxab lojni:

—Narä sunidxä guiraa yäl̄rnibee näjza reyäl̄nasa'c ni yu' loj reguejdxga sa'csi xtenä guiraareni, luxh sajc gudedäni lo chutis ni rlazä. ⁷ Palga luj suzuxhijblu loä, guiliä'plu xpala'nä, guiraani sajc xtenlu.

⁸ Dxejc Jesús badzu' diidx, räjpni lojni:

—Acaj loj xquijtz Dios: “Dad Xtioostislu ganlu, luxh lojtisni chulu gunlu dzuun.”

⁹ Dxejcti huinä beñdxabni lo guedx Jerusalén, huinänini jiaa yejc xques guidoro. Dxejc räjp beñdxab lojni:

—Palga guiliu najclu Xi'n Dios, gutiäjs lo yuj ¹⁰ sa'csi si'c caj loj rexquijtz Dios:

Suxhal̄ Dios rexangl̄ni te ga'preni luj,

¹¹ guiniaazreni luj didi jiajblu lo guij.

¹² Badzu' Jesús diidx lojni, räjpni:

—Cajza lo rexquijtz Dios: “Na'c fallu Dad ni najc Xtioozlu.”

¹³ Che baluux beñdxab rextiidxni, gubicajni lo Jesús sa'csi dini niujn gaan nusob Jesús xtiidxni. Guläjzni guidzujñ stee dxej te gusacsíruni Jesús.

Gusloj Jesús cayujñ xtzuunni

(Mt. 4:12-17; Mr. 1:14-15)

¹⁴ Dxejc gubi' Jesús lo rexyuj Galilee räjpni yäl̄rnibee xten Sprit Dxan. Bire'ch diidx xcuentni guiraa neñ reguejdx ni tre' nejzga. ¹⁵ Ruluiini neñ reguidobäz luxh guiraa rebejn̄ rliä'p xpala'n̄ni.

Jesús guyu' guedx Nazare't

(Mt. 13:53-58; Mr. 6:1-6)

¹⁶ Dxejcti huij Jesús guedx Nazare't cadre gulaani. Che gojl dxej ni rusilajz rexejn̄ Israel, biu'ni neñ guidobäz sigajc ni rujnpacni, dxejc huisuliini te bil̄ni ¹⁷ reguijtz xten Dios. Badeedreni lojni guijtz ni bacuaa Isaías; cheni baxhalni guijtzga, bidxäl̄ni cadre rnii scree:

¹⁸ Sprit Dxan xten Dios suganäj narä,

sa'csi agule Dios narä te gusule'ä xtidxcoobni lo reben̄proob.

Baxhalni narä te gusiäcä lastoo renani di lastooreni cuedxi,

te gusule'ä yäl̄rusläa lo rebejn̄ ni yu' lo dojl,

te gusiäcä baloj reben̄ lotiä'p, te guslää reben̄ ni cadejd trabajw,

¹⁹ te gusule'ä abiu' ijzsa'c che rulaslajz Dios rebejn̄.

²⁰ Dxejc basäu Jesús reguijtzga, badeednini loj bejn̄ ni cayacnäjä neñ guidooga, dxejc gurejni. Sa'csi guiraa rebejn̄ ni sobga' neñ guidooga cahuidzu'tzreni lojni, ²¹ gusloj guniini, räjpni lojreni:

—Lagajc nadxej guzobj rediidx ni caj lo reguijtzre nez loj guiraatu.

²² Guiraareni sarú guniireni xcuent Jesús, bedxeloduxhzareni redidxsaruduxh ni guniini lojreni. Gunabdiidxreni loj sa'reni, räjpreni:

—¿La et xi'ndi José dade're, ä?

²³ Dxejc räjp Jesús lojreni:

—Siniipactu rediidxre loä: “Doctor, basiajc lagajc luj”; siniizatu loä: “Recos ni biejn̄ diajgnu bejnlu nez guedx Capernaum, lagajc recosga bejn̄ nez ree cadre najc lajdxlu.”

²⁴ Dxejc huinuu xtiidxni, räjpni lojreni:

—Rniliäpac lojtu, nicla tej redade' ni rnii xtidx Dios, di reben̄ lajdxreni jiu xtiidxni. ²⁵ Luxh rniliä lojtu, che gubajñ Elías lo guedxliuj, guyu' xhidajl̄ gunabiuud guedx Israel che di nisguij̄ niajb choñ ijz garol, dxejc guyu' yäl̄rlianduxh guideb guejdxga. ²⁶ Luxh di Dios nuxhal̄ Elías rolijz nicla tej regunabiuud ni guläjz guedx Israel, alga baxhal̄nini lo beñzijt, rolijz te gunabiuud ni rbäjz Sarepta, gajxh guedx Sidón. ²⁷ Sigajcza che gubajñ Eliseo lo

guedxliuj, guyu' xhidajl beṇ racxhuu ni raḷ tiejxhrenei guedx Israel, luxh dini nusiajc nicla tejreni, alga basiajcnī dade' ni laa Naamán, ni siäd te guedxzijṭ ni laa Siria.

²⁸ Che bieṇ diajg reni sobga' neṇ guidoo rextidx Jesús, bidxechduxhrenei, ²⁹ huisuliireni, gulääreneni neṇ guejdxga. Dxejc huinäreneni yejc dajn cadro tre' guejdxga cadro yu' te balaro, te ro'c rlaizreni nustejbrenini. ³⁰ Dxejc Jesús sigaj gudejdni galäiireni, sä'tini ste'ca lajt.

Gulää Jesús beṇdxab lastoo te dade'

(Mr. 1:21-28)

³¹ Dxejc huij Jesús guedx Capernaum, te guejdx xten Galilee. Ro'c gusloj cagusule'ni diidx loj rebejṇ che gojl dxej ni rusilajz rexpejṇ Israel. ³² Bidxeloduxhrenei xtiidxni sa'csi rusule'ni si'c te beṇnajn, si'c te ni rnibee.

³³ Neṇ guidooḡa suga' te dade' ni rbäjz te beṇdxab neṇ lastooni. Guredxa'ni ³⁴ räjpni:

—¡Aii! ¡Basaan nurnu! ¿Xhicuent riädchu'lu loonu Jesús ni siäd Nasare't? ¿La siädḡdu te gunitlojlu nuurnu, ä? Narä numbeälu, nanä najclu Xin Dxaṇ Dios.

³⁵ Gudidxa' Jesús lo beṇdxabga, räjpni lojni:

—Basäu ro'lu, birii lastoo niguiire.

Dxejcti beṇdxabre basäl niguiiga lo yuj nez loj guiraareni, dxejc biriini neṇ lastoo dade'ga, per xhet bejndini dade'ga. ³⁶ Bidxeloduxh rebejṇga, dxejc gusloj caniireni lo sa'reni, räjpreni:

—¿Xhi diidx najc redee? Bahuii xho rnibee dade're rebeṇdxab con yälrnibee, luxh rusoob rebeṇdxab xtiidxni, riireni lastoo bejṇ.

³⁷ Dxejc gusäáb xtidx Jesús lo guiraa reguejdx ni tre' guideb gabi guejdxga.

Rusiajc Jesús xnan xueerg Pedr

(Mt. 8:14-15; Mr. 1:29-31)

³⁸ Birii Jesús guidobäz, huijni rolijz Simón. Dxejc naga' xnan sueerg Simón, cayacxhuuni, yu'ni xliaduxh. Sas gunabduxhrenei lojni te gusiajcnini.

³⁹ Gubig Jesús loj nane'ga, gudidxa'ni xliaaga, luxh lagajc orḡa biriini xliaa. Dxejc huistiegajcni, gusloj cayujṇni mandaad, cahuiinireni.

Rusiajc Jesús xhidajl yälracxhuu

(Mt. 8:16-17; Mr. 1:32-34)

⁴⁰ Laḷ ni cayäz gubijdx, guiraa reni rajp beṇracxhuu ni rajc garen garen yälracxhuu biädnäreni rebejṇga lo Jesús. Dxejc laani batzuubni ṇaani yejc teygareni, dxejc biajc rebeṇracxhuuga. ⁴¹ Loj rebeṇracxhuuga, yu'reni birii rebeṇdxab neṇ lastooreni, rbedxa'reni räjpreni:

—Luj najclu Xi'n Dios.

Luxh Jesús gudilṇäjni rebeṇdxab, dini nusaa niniireni sa'csi laareni najnreni najcni Crist ni cabäjzreni.

Rusule' Jesús xtidx Dios

(Mr. 1:35-39)

⁴² Che bianij, biriini lo guejdx, huijni te lajt cadro rut rbäjzdi. Niluxh gudiil rebejṇni, dxejc bidzujṇreni cadro suga'ni. Rlaizreni nuscuääzrenini te di nuini. ⁴³ Dxejc Jesús räjp lojreni:

—Nanab cha'a chasule'ä rextidx xcuent xcälrnibee Dios xhidajlruga guejdx, ni'cni baxhaḷpac Dios narä.

⁴⁴ Dxejc si'ctis cuanzaj Jesús basule'ni xtidx Dios neṇ guiraa reguidobäz neṇ reguejdx xten Galilee.

5

*Che gunaazreni xhidajl bäjl**(Mt. 4:18-22; Mr. 1:16-20)*

¹ Cheni suga' Jesús ro' nis ni laa Genesare't, gubig xhidajl bejn lojni te jiejn diajgreni xtidx Dios. ² Dxejc bahuii Jesús tio'p barcw ni suga' ro' nisga, rud yu'di nenreni sa'csi rebejn ni rniaz bäjl abiriireni nen rebarcw te caguiibreni xquijxhreni ro' nisga. ³ Dxejc biu' Jesús nen te barcw ni najc xten Simón, dxejc gunab Jesús chää barcwga lo nis te la', te guibicajni ro' yuj. Dxejc gurej Jesús nen barcwga, ro'cli guslojni caguluiini rebejn. ⁴ Che gulujx xtiidxni, räjpni loj Simón:

—Huinä barcw cadre jättru, colcuaa xquijxhtu lo nis te guiniaaztu bäjl.

⁵ Räjp Simón lojni:

—Mastr, guideb yääl biennu dzuun, luxh dinu niniaz nicla tej bäjl, niluxh naj agunibeelu gusälsacnu guijxh lo nis.

⁶ Cheni basälreni xquijxhreni lo nis, gunaazreni xhidalduxh bäjl, dxejc guslojli caräjs xquijxhreni. ⁷ Dxejc bejnreni seen loj resa'reni ni yu' nen stee barcwga te jädyacnäjreni. Bidzujntireni, bachajreni guiro'p barcw. Gudxaduxh rebarcw, ameer niääzreni nen nis. ⁸ Che bahuii Simón Pedr recosre, bazuxhijbni nez loj Jesús, dxejc räjpni:

—Gubicaj loä Dad, sa'csi narä nacä te ben DOJL.

⁹ Si'c gunii Simón sa'csi bidxejb laani näjza guiraa rebejn ni yunäjni sa'csi gunaazreni xhidalduxh bäjl. ¹⁰ Näjza Jacoob näjza Juan, rexi'n Zebedeo, ni runnäj Simón dzuun, näjzaren bidxejbreni. Per Jesús räjp lo Simón:

—Na'c guidxejblu, najli guisloj cuedxlu bejn lacuaa ni guiniaazlu bäjl.

¹¹ Dxejc, che bidzunnäjreni rebarcw ro' nis, basa'nreni guiraa xhixtenreni, te sanajlreni Jesús.

*Basiajc Jesús te bejn ni ral tiejxhni**(Mt. 8:1-4; Mr. 1:40-45)*

¹² Cheni guyu' Jesús tej reguejdx, bidzujn te bejn lojni ni rajc lepra te yälguidxduxh ni ral tiejxhni. Che bahuiini loj Jesús, bazuxhijbni, basajbni lojni lo yuj, räjpni lojni:

—Dad, palga rlajzlu, sajc gusiajclu narä.

¹³ Dxejc batzuub Jesús naani yejcn räjpni lojni:

—Rlazä jiajclu. Susiacälu.

Che guniini rediidxre, biacgajc ben racxhuuga. ¹⁴ Dxejcti gunibee Jesús lojni rut lojdi gäbni xhi guzajcni. Räjpni lojni:

—Huijtis lo bixhojz te fiini lojlu, huisa'nza gojn xcuent ni biajclu si'cni rnibee xleii Moisés, te filoj rebejn abiajclu.

¹⁵ Luxh xpala'n Jesús sanuutis cayä'pruni, guixe-guixee care'ch diidx xcuentni. Rdojpza xhidalduxh bejn te gucua diajgreni xtidx Jesús näjza te gusiajcn yälracxhuu xtenreni. ¹⁶ Yu'za huält riunejz Jesús rijni relajt cadre ruti rebejn, te ro'c rbedx-rniabni lo Xtadni Dios.

*Basiajc Jesús te bejn ni digacdi guiniib**(Mt. 9:1-8; Mr. 2:1-12)*

¹⁷ Te dxej lalni caguluiini rebejn, nejzga sobga' gaii farisee näjza gaii bejn ni ruluii leii garen-garen reguejdx, siädreni guideb nez reguejdx xten Galilee, näjza región Judea, näjza guedx Jerusalén. Dxejc huenliisi rlui loj suganäj xcälrnibee Dios Jesús te rajc russiajcn rebenracxhuu. ¹⁸ Dxejc bidzujn gaii dade' nuuren lo te lonbäz te bejn ni di gacdi guiniib, rlajzreni gusiu'renini nen yu' te quixhrenini nez loj Jesús. ¹⁹ Niluxh direni nidxäl canejz niu'reni

sa'csi nadäduhx ro'c sa'csi tre' xhidajl rebejn. Dxejc huäpnäjrenini yejc yu'ga, badzucajreni gaii tej, dxejc basajbreni xloon beñracxhuuga yejcli yu'ga te gujc bidzujñni nez loj Jesús. ²⁰ Che bahuii Jesús yälrlilajz xtenreni, räjpni loj beñracxhuuga:

—Dade', agubicaj xtojllu.

²¹ Dxejc rebejn ni ruluii leii näjza refarisee gusloj cayujnreni xhigab, naareni: “¿Chucha niguiire ni caniyajni Dios con rextiidxni? Ruti te bejn ni sajc gudzucaj xtojñ rebejn, Diostis rudzucaj dojl.”

²² Dxejc gucbee Jesús xhi xhigab cayujnreni, ni'c räjpni lojreni:

—¿Xhicuent rujntu xhigab si'c neñ lastootu? ²³ ¿Xhini'c najc guyasiru guiniini: “Agubicaj rextojllu”, o guiniini: “Huistie, guzaj”, ä? ²⁴ Mbaj naj, suluiä nez lojtu Xi'n Dios ni gujc Xi'n Niguii rajp yälrnibee, yälñadip lo guedxliujre te gudzucajni xtojñ rebejn.

Dxejc räjpni lo bejnga ni digacdi guiniib:

—Lojlu rniä, jhuistie, guläs xloonlu, huij rolijzlu!

²⁵ Lagajc dxejc nez lojreni huistiegajc bejn ni digacdi guiniib, guläsni xlooni cadro naga'ni, dxejc siini rolijzni, calä'pni xpala'n Dios.

²⁶ Guiraareni rdxeloduxhreni recosga, dxejc guslojreni calä'preni xpala'n Dios, rdxejbliireni räjpreni:

—Abihuiinu cosro, cos ni guidxeloj bejn nadxej.

Rbejdx Jesús Leví

(Mt. 9:9-13; Mr. 2:13-17)

²⁷ Che gudejd gulujx recosre, birii Jesús ro'c. Dxejc bahuiini lo te bejn ni rusquijx xcuent impuest, nani laa Leví. Sobga'ni lo te mex cadro rusquijxni impuest; ro'c bahuii Jesús lojni. Räjp Jesús lojni:

—Gudanajl narä.

²⁸ Dxejc huisu Leví, basa'nni guiraa recosga, dxejc sanajlni Jesús.

²⁹ Dxejc bejn Leví te lanij rolijzni par Jesús. Biäd xhidajl bejn ni rusquijx xcuent impuest näjza sgaii bejn; sobganäjnirenini lo mex. ³⁰ Dxejcti refarisee näjza rebejn ni ruluii leii guslojreni cayeinäjreni rexpejn pac Jesús, räjpreni:

—¿Xhicuent raunäjtu, ränäjtu rebejn ni rusquijx impuest näjza rebendojl, ä?

³¹ Dxejc badzu' Jesús diidxre, räjpni lojreni:

—Rebejn ni nadaan di guiquiin te doctoor, ganaxtis rebejn nani racxhuu rquiinreni te doctoor. ³² Dina niädtedxä rebeñsa'c, narä biädtedxä rebendojl te gusiechlajzreni.

Gunabdiidxreni loj Jesús xcuent yälrucua'n

(Mt. 9:14-17; Mr. 2:18-22)

³³ Dxejc gunabdiidx rebejnga loj Jesús, räjpreni:

—¿Xhicuent lacti rucua'n rexpejn Juan näjza rexpen refarisee, lacti rbedxniabreni loj Dios; niluxh rexpejn paclu alga rajwreni, rä'reni?

³⁴ Badzu' Jesús diidxre lojreni, räjpni:

—¿La sajc gucua'n rebejn ni yu' lo te sa' lañni yunäjreni bi'n, ä? ³⁵ Niluxh sidzujñ dxej cheni sibicaj bi'n lojreni, dxejc sii sucua'nreni.

³⁶ Guniiza Jesús cuentre lojreni, räjpni:

—Rut rucuaadi te remiend ladcoob loj te ladyujxh, sa'csi che rxu'n ladcoob rutiäjzni ladyujxhga, dxejc xhiroobruni guiräjs, luxh diza ladcoob guchaag lo ladyujxh. ³⁷ Di gacdi gusälñi bincoob neñ te guidbiejw sa'csi bincoobga sutiäsyani guidbiejwga dxejc sixe' binga, sixijñza guidbiejwga. ³⁸ Ni'cni nanab gusälñi bincoob neñ guidcoob si'c sigucheeza guiro'preni. ³⁹ Luxh

nicla tej bejn ni agu' bin ni yu' agujc xchej rlaiz yä bincoob, sa'csi säjbni: “Bin ni yu' agujc xchej najc huenru.”

6

Rutie' rexpejn Jesús triuu dxej nani rusilajzreni

(Mt. 12:1-8; Mr. 2:23-28)

¹ Te dxej ni rusilajz rexpejn Israel sasaj Jesús näjza rexpejnpacni nez loj reyuj cadro naga' triuu. Dxejc, sa'csi calaanreni gusloj caläädxreni doj lo triuu te cayajwrenini. ² Dxejc gunabdiidx gaii refarisee ni najc benguidoo, räjpreni lojreni:

—¿Xhicuent rujntu dzuun ni di nungäj] guntu che rajl dxej ni rusilajznu?

³ Dxejc räjp Jesús lojreni:

—¿La gajdtu go] loj reguijtz xhi bejn toDavid cheni calannäjni rebejn nani sanäni, ä? ⁴ Biu'ni nen xquidoo Dios, gudajwni yätxtiil nani di nungäj] gau bejn sa'csi xtebtis rebixhojz rajc rajwni, luxh badeedni yätxtiilga gudajw resa'ni.

⁵ Räjpza Jesús lojreni:

—Sigajcza narä, Xi'n Dios ni gujc Niguii, rnibeä dxej ni rusilajztu.

Niguii ni nabijdz naani

(Mt. 12:9-14; Mr. 3:1-6)

⁶ Che goj] stee dxej ni rusilajz rexpejn Israel, biu'ni nen te guidobäz, dxejc guslojni caguluini rebejn. Lagajc ro'c sobga' te dade' ni nabijdz naani ladbee. ⁷ Dxejc remastr xten leii näjza refarisee cagula'tzreni te don la susiajcnä bejnga dxej ni rusilajzreni, sa'csi caguuilreni xho gucuaquijreni Jesús. ⁸ Niluxh laani najnni xhi xhigab cayujnreni, dxejc guniini lo dade' ni nabijdz naani, räjpni:

—¡Huisulii! ¡Gudaa nez galäiire!

Dxejc huisulii bejnga, gubigni lojni. ⁹ Dxejc räjp Jesús lojreni:

—Rlazä guiniabdiidxä lojtu dee: ¿Xhini'c najc huen gunni che rajl dxej ni rusilajznu? ¿La te dzunsa'c o la te dzunguijdx? ¿La gacnäjnu bejn laa xcäl'nabajnni o la gudzucajnu yäl'nabajnni, ä?

¹⁰ Che gulujx bahuii Jesús loj guiraa rebejn ni tre' guideb gabini, räjpni loj bejn ni nabijdz naani:

—¡Baslii naalu!

Dxejc bejn si'c, luxh biacgajc naani. ¹¹ Dxejc bidxechduxh rebejn ni tre' ro'c, gusloj canabdiidxreni lo sa'reni xhi gunnäjreni Jesús.

Gule Jesús guitzubitio'p rexpejnpacni

(Mt. 10:1-4; Mr. 3:13-19)

¹² Nen redxejga, huij Jesús loj te dajn te huininäjni Xtadni Dios. Ro'c gudejdni yääl cabedx-canabni lo Dios. ¹³ Che bianij lo yuj, gurejdxni rexpejnni. Ro'c guleni tzubitio'preni te gacreni xpejnpacni. Gulälajnireni reapost. ¹⁴ Renani guleni najc Simón ni gulälajni Pedr; Andrés, bejtz Simón; Jacob; Juan; Felipe; Bartolomé; ¹⁵ Mateo; Tomás; Jacob xi'n Alfeo; Simón ni nagab loj rexpej cananista; ¹⁶ Judas, bejtz Jacob; näjza Judas Iscariote ni guto' Jesús loj rebixhojz.

Ruluii Jesús xhidajl bejn

(Mt. 4:23-25)

¹⁷ Che biätnäj Jesúsreni yejc dajnga, guzudxireni yejc te danbäz sa'csi suga' xhidajl bejn ro'c. Siädreni guiraa nez reguedx Judea, näjza guedx Jerusalén näjza reguejdx ni tre' gajxh nisdoo Tiro con Sidón. Rebejnä bidzujnreni

te gucuadiajgreni xtidx Jesús, te gusiajczanireni xcälracxhuureni. ¹⁸ Guiraa ni rdejdza trabajw yu' bendxab nen lastooreni näjza reni'c biajc. ¹⁹ Guiraa rebejn rlazj caan Jesús, sa'csi rusiajzni guiraareni con xcälrnibeeni.

Balijdx Jesús rebejn

(Mt. 5:1-12)

²⁰ Dxejc bahuii Jesús loj rexpejn pacni räjpni lojreni:

—Chicbaatu, bejn nani xheti xhixtentu, sa'csi xtentu najc cadre rnibee Dios xhaguibaa.

²¹ 'Chicbaatu, bejn nani calaan naj, sa'csi suniidx Dios lojtu nani rniabtu.

'Chicbaatu, bejn nani roon naj sa'csi susiäjł Dios lajztu dxejcru suxhijztu.

²² 'Chicbaatu, bejn nani rdxechlajz bejn lojtu, rbääreni la'tu te laad, rniyaren i la'tu, luxh rbälazreni lajtu si'c te cos guiidx sa'csi rililajztu xtidx Xi'n Dios ni gujc Niguii. ²³ Colguibalajz nen redxejga, na'c gac-huin lastootu sa'csi sunidxduxh Dios xhi xtentu xhaguibaa. Sigajcza basacsí retoxtdagoldooreni rebejn nani gunii xtidx Dios galoo.

²⁴ 'Probe'zatu, la'tu benrajp, sa'csi agojptu xcäl'nasa'ctu, xcälrbalajztu lo guedxliujre.

²⁵ 'Probe'tu nani rajp guiraloj xhixtentu naj, sa'csi sidejdtu yälrliaan.

'Proobzatu ni ruxhijztu naj, sa'csi sonduxhtu sidejdtu yälhuinduxh, yäl'nalas.

²⁶ 'Probe'tu palga rliä'p rebejn xpala'ntu naj, sa'csi si'c bejn retoxtdagoldooreni rebejn ni gunii didx-xhii lacuaa niniireni xtiidxpac Dios.

Chanälajzni rebejn nani rdxe'ch lojni

(Mt. 5:38-48; 7:12)

²⁷ Räjpzani:

—La'tu ni cacuadiajgtu rextidxä rniä diidxre lojtu: colchanälajz rebejn ni rdxe'ch lojtu, colyujn dzunsa'c loj rebejn ni rdxechlajz lojtu. ²⁸ Benle' yejc rebejn ni rgube la'tu. Gunab lo Dios xcuent rebejn ni rcuaquij la'tu. ²⁹ Palga yu' chu rlazj quiin te laad lojlu, badeedza stelaad quiinni. Palga yu' chu gudzucaj xhablojiaalu, badeedza näj xcamangwlu xca'ni. ³⁰ Xhitis ni guiniabreni lojlu, badeedni; ni gudzucaj te xhi xtenlu lojlu, na'c guiniabsacluni lojni. ³¹ Sigajc ni rlazjlu gunnäj bejn la'tu, si'cza la'tu colyennäj bejn.

³² 'Palga la'tu sanälajztistu rebejn nani sanälajz la'tu, xlia'sini, sa'csi sigajcza rujn rebendojł. ³³ Palga guntu hueen lojtis rebejn ni rujn hueen lojtu, xhet laadi cayujntu, sa'csi sigajcza rujn rebejn ni nabajn nen dojł. ³⁴ Palga gudedlaatu lojtis reni rujntu xhigab gunidxsacni lojtu, ¿xhi cos hueen rchalotu rujntu? Ni rebendojł rudedlaazareni loj rebejn ni najnreni siguixsac ni nasääbreni. ³⁵ La'tu, nanab chanälajztu rebejn ni rdxe'ch lojtu, guntu hueen lojreni, gudedlaatu loj rebejn, na'c gunlojtu xcasactu recos ni rudedlaatu, te si'c guroob gac nani guzalajz Dios lojtu; te si'c gactu xi'n Gueb Dios ni nabajn xhaguibaa. Sa'csi si'cza najc Dios huenduxh loj reni di gudeed xquixtios lojni, näjza loj rebendojł. ³⁶ Colgulasajz resa'tu si'c rulasajz Xtdanu Dios guiraa rebejn.

Colgulasajz sa'tu

(Mt. 7:1-5)

³⁷ Räjpzani:

—Na'c guntu yälguxhtis nani rujn bejn, naatu xhet laadi rujnni; te na'cza gun Dios yälguxhtis rextojłtu. Na'c gucuauquijtu bejn te sigajcza di Dios gucuauquij la'tu. Colgusiäjł-lajz dojł ni rujn sa'tu, te si'cza gusiäjł-lajz Dios rextojłtu. ³⁸ Colgudeed loj bejn ni rquiinreni te si'cza guzalajz Dios ni rquiintu. Suniidxreni xca'tu te mediid guidxadoo, sibatijp ni yu' nen, cupe'tlini

gusälreni neñ xpolstu. Dios suniidx lojtu lagajc con mediid ni rudeedtu loj rebejn.

³⁹ Guniiza Jesús stee cuent räjpni:

—¿La sajc guluii te beñ lotiä'p nez yuj lo stee beñ lotiä'p, ä? ¿La di guiro'preni guitejb neñ te gueed, ä? ⁴⁰ Te bejn ni casieed di gacdi guisieedruni loj ni najn xmastrni. Te bejn, che agulujx bisieedni, sajcni si'cni najc mastr xtenni.

⁴¹ '¿Xhicuent cahuiilu guixhe' ni yu' baloj bejtzlu, luxh dilu fii yagro ni yu' balojlu? ⁴² O, ¿xho mood gäblu lo bejtzlu: “Guidon cuää guixhe' ni yu' balojlu”; luxh dilu gacbee yu' te yagro balojlu, ä? ¡Beñguijdx! Guläxgaa yagro ni yu' balojlu, dxejc sajc fisa'clu te cuäälü guixhbäz ni yu' baloj bejtzlu.

Ninexhsa'c ni rcaj loj te yajg sujn gumbeeni yajg

(Mt. 7:17-20; 12:34-35)

⁴³ Räjpzani:

—Xheti te yagsa'c ni rudeed ninejxh ni xhet sajcdi, xhetiza te yajg ni xhet sajcdi ni rudeed ninexhsa'c. ⁴⁴ Sa'csi tebgaj reyajg rusenlojni xhi yajgni xcuent ninejxh ni rcaj lojni. Di bejn gutie' iigw lo reyaguejch, diza bejn gutiu' uub lo te yag balagrejñ. ⁴⁵ Rebeñsa'c rnii didxsa'c, sa'csi xhigabsa'c yu' neñ lastooni. Niluxh rebeñguijdx rnii ganax didxguijdx sa'csi xhigabguijdx yu' neñ lastooni, sa'csi ro'ni rnii nani yu' neñ lastooni.

Tio'p bejn ni benchee tio'p yu'

(Mt. 7:24-27)

⁴⁶ Räjpzani:

—¿Xhicuent rniitu loä: “Dad, Dad,” luxh ditu gun nani rniä guntu? ⁴⁷ Guiniä lojtu chuni'c najc si'c bejn ni riääd loä, rucua diajgni xtidxä luxh rusoobni xtidxä. ⁴⁸ Najcni si'c te bejn ni benchee rolijzni, ganid gudäänni jiät, dxejcti bejn ni cimient yejc te guilaj. Cheni biäjt nisro ro' gueuu, bidijn nisro cuä' yu'ga, luxh nicla nusniibnini, sa'csi yu'ga sobgadzu'tz yejc te guilaj. ⁴⁹ Niluxh reni rcua diajg xtidxä, dxejc direni guzoob xtidxä, najcreni si'c te bejn ni bejn xyu'ni loj yujxh, dini niujn cimient xten yu'ga. Dxejcti biäjt nisro, bidijn ni cuä' yu'ga, dxejc li gurebä'n yu'ga, gunitlojtini.

7

Basiajc Jesús xmos te beñ romañ ni rnibee

(Mt. 8:5-13)

¹ Che gulujx gunii Jesús loj rebejn, huijni te guejdx ni laa Capernaum. ² Ro'c yu' te beñ romañ ni rnibee, yu' te mos lojni, luxh sanälazduxhni mosga. Cayacxhuduxh mosga, ameerli guetni. ³ Che biejn diajg capitán cagusä'treni Jesús, baxhalgajcni gaii bengool lo rexpejn Israel te chagajnreni Jesús jiädni te gusajcni xmos dade'ga. ⁴ Che gubigreni loj Jesús, gusloj gunabduxhreni lojni, räjpreni lojni:

—Dade're najc beñsa'c, nungäj l gacnäjluni ⁵ sa'csi sanälajzni lajdx rexpejn Israel, luxh lagajc laani gunibee guc-chee xquidobäznu.

⁶ Dxejcti huinä Jesúsreni. Cheni siäddzungajxhreni royu', baxhal capitánga gaii xamiigwni, gäbreni loj Jesús:

—Si'c naj capitán: “Di rlazä gutalä xtzuunlu. ¿Chu narä te jiu'lu rolizä? Xhet sacädi. ⁷ Ni'c dina niapä baloor te lagajc narä niädganä guejblu, sa'csi rajplu yälrnibeduxh niluxh narä rut nacädi. Ni'cni gunibeetis jiajc xmosä, luxh laani siacgajcni. ⁸ Sa'csi narä nacä xmos rebejn ni rnibee, luxh rnibeäza loj resoldaad. Che gäpä lo tejni: Huij rec, rijni; che gäpä loj steeni: Gudaa ree, riädni; che gäpä loj xmosä: Bejn dee, rungajcni.”

9 Che biejn diajg Jesús rediidxre, bidxeloduxhni, gubiréni loj rebejn ni siädnajlni, räjpni lojreni:

—Rniliäpac lojtu, nicla lo rexpejn Israel gajdna guidxälä te bejn ni rililajz-duxh si'c ni rililajz capitánre.

10 Che gubi' rebejn ni huij loj Jesús rolijz capitán, bahuiireni abiajc xmosni.

Baspañsac Jesús xi'n te gunabiuud

11 Neñ redxejga, huij Jesús te guejdx ni laa Naín. Huinäni rexpejn pacni näjza xhidajl bejn ni sanajlni. 12 Che bidzujñni gajxh ro' guejdxga, bahuiini sacua'tzreni te bengut, te bi'n ni najc xtebtis xi'n te gunabiuud. Xhidalduxh bejn sacua'tzni. 13 Che bahuii Jesús loj gunabiuudga, biani nane'ga, räjpni lojni:

—¡Na'c roonlu!

14 Dxejc gubig Jesús lo rebejn ni sanä bengutga, dxejc guzudxi reni nuu bengutga. Dxejc räjp Jesús loj bengutga:

—¡Bi'n!, narä rniä lojlu; ¡Huistie!

15 Dxejc huistie bengutga, sobga'ni guslojni caniini. Dxejc badeed Jesúsni lo xnanni. 16 Che bahuiireni xhini'c gujc, bidxejbreni, bidxeloduxhreni, guslojreni calä'preni xpala'n Dios, räjpreni:

—Te niguisacduxh ni rnii xtidx Dios abidzujñ nez loonu.

Caniizaren:

—Lagajc Guejb Dios abiädhuui rexpejñni.

17 Dxejc bire'ch diidx xcuent Jesús guideb nez reguedx Judea näjza guiraa reguejdx ni tre' nejjga.

Xpejn Juan ni rutiobnis huinabdiidx loj Jesús (Mt. 11:2-19)

18 Rexpejñpac Juan ni rutiobnis bij rediidxga lojni che yu'ni latzguiib. 19 Dxejc baxhalñi gaiireni lo Jesús te sanabdiidxreni: “¿La guliipac najclu Crist ni jiäd o sibäjznu chu stee bejn, ä?” 20 Dxejcti gubig rexpejn Juan loj Jesús, räjpreni:

—Juan ni rutiobnis baxhal nuurnu te guiniabdiidxnu lojlu: “¿La luj najc Crist ni jiäd o la sibäjznu chu stee bejn?”

21 Lagajc dxejc che bidzujñreni, basiajc Jesús xhidajl bejn ni rajc garen-garen yälgujdx, ni yu'za rebenxab lastooreni, basiajczani baloj ni di fii.

22 Dxejcti badzu' Jesús diidxre, räjpni:

—Colchaye'tz lo Juan guiraa ni abahuiitu näjza ni abiejn diajgtu. Colye'tz lojni: “Relotiä'p ruhuisac; rebencoj rsiasa'c; reben ni ral guejdx tiejxhni, abiajc tiejxhni; rediagcua't riensac diajgreni; reben gut, agubansacreni; luxh loj rebenproob nani cabäjz xcälracnäj Dios riejn diajgreni rsiule' xtidx Dios xcuent xho laa bejn lo dojl. 23 Chicbaa nani rumbee narä, nani di cuälaz narä.”

24 Cheni sii rexpejn Juan, gusloj Jesús caniini xcuent Juan loj rebejn, räjpni:

—¿Chuni'c huihuiitu nez lo reyubijdz? ¿La te nijt ni rusniib bej, ä? 25 ¿Xhini'c huihuiitu? ¿Te bejn ni sucheduxh, ä? La'tu najntu rebejn ni sucheduxh näjza reni nabañsa'c, rolijz rerei yu'reni. 26 ¿Chuxhni'c biriitu huihuiitu? ¿Te niguii ni rnii xtidx Dios, ä? O'n, rniliä lojtu, luxh te ni sacduxhru loj guiraa reniguii ni rnii xtidx Dios. 27 Juan najc niguii ni ruzä't rexquijtz Dios cadre caj scree: Narä guxhalä te niguii nani guinii xtidxä, te nidni lojlu, te laani guzucheeni xnezyujlu nez lojlu.

28 Rniliäpac, loj guiraa rexingaan regunaa, nicla tejni gajd guiricaj ni najc te bensacduxhru nez loj Dios si'c najc Juan ni rutiobnis. Niluxh nani guxiiru sajc lo xcälrnibee Dios ni jiäd, sajcruni loj Juan.

²⁹ Che biejn diajg rebejn nájza reni rusquijx impuest rextiidxni xcuent Juan, gucbeereni rujn Dios yálguxhtissa'c, sa'csi abatiobnis Juanreni. ³⁰ Niluxh refarisee nájza rebejn ni ruluu leii gulälazreni nani niujn Dios par laareni, sa'csi direni nicäjb nutiobnis Juanreni. ³¹ Rájpa Jesús lojreni:

—¿Xhocha guiniä najc rebejn nani tre' naj? ³² Najcreni si'c rebiuxbáz nani rguijt nez lo guii cadro rdo', rbedxa'reni loj sa'reni, rniireni: “Bielnu te bizej te guya'tu, niluxh ditu nuya'. Bielzanu te dij ni nabaduxh dxejcti dizatu nioon.” ³³ Sa'csi che biääd Juan, dini niauxha't, dizani niä' bin, luxh räjptu: “Yu' bendxab lastooni.” ³⁴ Dxejcti biälä narä, Xi'n Dios ni gujc Niguii, rauä, rä'ä. Dxejc räjptu: “Bahuilaare, dade're rauxha't, rä'zani, najcni xamiigw rebendojł nájza rebejn ni rusquijx reimpuest xten gubier.” ³⁵ Ni'cni xcäl_najn Dios huenliisi rien_loj loj dzuun ni rujn rebejn ni najn.

Jesús huij rolizj Simón ni najc farisee

³⁶ Dxejc tej refarisee gunii loj Jesús, räjpmi:

—Jiäädlu rolizä te guidaunu.

Dxejc huij Jesús rolizjni, ro'c gurejni lo mex. ³⁷ Rbäjz te gunagubejxh lo guejdxga. Che biejn diajgni satajw Jesús rolizj fariseega, bidzunnäjni te bo't guidxa se't nejxh, luxh bo'tga najc si'c onix, botsa'cni. ³⁸ Che biu' gunaaga, bidzujjni lo ni' Jesús, guslojni cayoanni. Con nisbee caguiibni ni' Jesús, dxejc caguspjdzni ni'ni con xquidxejcti. Dxejc bachagro'ni ni'ni bazaazani setnejxhga ni' Jesús. ³⁹ Che bahuii farisee ni gurejdx Jesús rolizjni, recosre, bejn ni xhigab: “Palga gulii najc niguiire Xi'n Dios, sacbeeni chu najc nájza xho najc gunaare ni cagajn ni'ni, sacbeezani najcni te gunadołduxh.” ⁴⁰ Dxejc gunii Jesús loj fariseega, räjpmi:

—Simón, yu' xhi rlazä guiniä lojlu.

Dxejc räjpmi fariseega lojni:

—Guniini, Dad mastr.

⁴¹ Dxejc räjpmi Jesús lojni:

—Tio'p bejn nazäab meel lo te bejn ni rudedlaa meel. Tej reni nazäab si'cti gaiigayuu meel. Steeni nazäab si'cti tiubitzuu meel. ⁴² Cheni di niajcdi niguijxreni xti'nreni, basiäl_lajzni xti'n guiro'preni. Naj gunii loä, ¿chu tejreni sianälajzru dade'ga, ä?

⁴³ Badzu' Simón diidxre lojni, räjpmi:

—Rchaloä bejn ni nazääbru lojni.

Dxejc räjpmi Jesús:

—Laaca rniilu.

⁴⁴ Dxejc gubiré Jesús, bahuiini loj gunaaga. Dxejc räjpmi loj Simón:

—¡Bahuii loj gunaare! Che biu'ä rolizjlu, dilu nuniidx nis te nidiib ni'ä. Per gunaare gudibnäjni ni'ä nisbee ni birii balojni, dxejc baspijdzni ni'ä con xquidxejcti. ⁴⁵ Dilu nuchagro' narä, luxh laani cheli biu'ä ree, gajdni cuäaz guchagro'ni ni'ä. ⁴⁶ Dilu nusäl se't yecä, niluxh laani basälni se't ni rlianexhduxh ni'ä. ⁴⁷ Ni'cni rniä lojlu, dojł xten gunaare, luxh xhidalduxh najcreni, abadzucaj Dios redojłga sa'csi huenliisi sanälajzni Dios. Luxh rebejn ni rudzucaj Dios guxii xtojłreni, guxiiza sanälajzreni Dios.

⁴⁸ Dxejcti räjpmi loj gunaaga:

—Agubicaj rextojłlu.

⁴⁹ Dxejc rebejn ni sobga' lo mex con laani, che biejn diajgreni rediidxre, gusloj canii lo sa'reni, räjpmi:

—¿Chuchani'c najc niguiire, ni'cni rudzucajlini xtojł bejn, ä?

⁵⁰ Räjpmi Jesús loj gunaaga:

—Agułaalu lo xtojłlu sa'csi ahuililajzlu; huij naj, bascuexi lajzlu.

8

Regunaa ni gucnäj Jesús

¹ Dxejcti gusloj huij Jesús guiraa reguejdx nájza rerench, cagusule'ni xtidx Dios, caguluiini xcuent xcälrnibee Dios loj rebejn. Sanäni rexpejn_{pacni} ² nájza gaii gunaa ni abasiaj_{cni}, agulääni rebejdxab lastooreni, nájza basiaj_{cni} xcälguijdxreni. Tejni laa Marii ni laaza Magdalen, ni gulää Jesús gajdz bejdxab neñ lastooni. ³ Stee gunaa laa Xuan, ni najc chääl Chuza, ni ruhuii xhixten Herodes. Stee gunaa laa Susan. Guyu'za sgaii gunaa. Guiraa reni'c rudeed lagajc xhixtenreni te rio' recos ni rquineni.

Xcuent bejn ni rbe'c binij

(Mt. 13:1-9; Mr. 4:1-9)

⁴ Dxejcti bire' xhidajl bejn lojni ni birii xhidajl reguejdx. Lojreni gunii Jesús con te cuent ni ruluii, räjpni:

⁵ —Birii te bejn sale'c binij. Cheni cabe'cni binij, yu' binij ni bitejb cuä' nezyuj. Che sadejd rebejn baläjreni yejc binijga, biäädza remane' ni rutajt xhaguibaa, gudajwrenini. ⁶ Yu'za lajt bitejb binijga neñ reguij cadre xheti xhidajl yuj. Che gulejn binijga, gubidzgaj_{cni} sa'csi xheti xcoj_p ro'c. ⁷ Yu'za lajt bitejbni nez neñ reyaguejch. Che gulejn_{ni}, di reyaguejch nusaan niroob gäjlgä. ⁸ Yu'za lajt bitejb binijga lo yusa'c, ro'c gucduxhni. Cheni guroobni, yu' binijga gujc te gayuu xob loj tejga binij ni gule'c dade'ga.

Che gulujx guniini scree, dxejc guniini dip räjpni:

—Palga saj_c gucuadiajgtu rediidxga, colcuadiagsa'cni.

Xhicuent gunii Jesús recuent

(Mt. 13:10-17; Mr. 4:10-12)

⁹ Dxejcti gunabdiidx rexpejn_{pacni} lojni räjpreni:

—¿Xhi säloj cuentre?

¹⁰ Dxejc räjpni lojreni:

—Lojtu ni najc rexpejnä suniidx Dios yäl_{naj}n te gacbeetu reyälxhiga'tz xten xcälrnibeeni. Loj chutis stee bejn, siniä recuent lojreni te mase cadxelojreni, direni fisa'c, luxh mase cacuadiajg_{reni}, direni gacbesa'c.

Rusule' Jesús xcuent ni rbe'c binij

(Mt. 13:18-23; Mr. 4:13-20)

¹¹ Räjpzani:

—Scree säloj cuentre, rebini_j najc si'c xtidx Dios. ¹² Binij ni biajb lo nezyuj najc si'c rebejn ni rucuardiajg xtidx Dios. Dxejc riäd bejdxab, riäddzucaj_{ni} rediidxga lastooreni te na'c chalilajzreni xtidx Dios, te na'cza laareni lo dojl.

¹³ Binij ni biajb neñ reguij najc si'c rebejn ni rucuardiajg xtidx Dios, rbaalajzreni; per sa'csi xheti xlobaareni, nalajznu, direni gandzu'tz xtidx Dios, rililajzreni te bo'c, per che rsacsí rebejn_{reni}, rbälazreni xtidx Dios. ¹⁴ Binij ni biajb neñ reyaguejch najc si'c rebejn ni rucuardiajg xtidx Dios, per la_i ni sanuureni xnejzreni, rijia'nreni lo recos guedxliuj, lo yäl_{nasa}'c ni ruhuiireni, nájza rujnreni si'ctis ni r_{lajz} tiejxh_{reni}. Reni'c rujn runijtreni xtidx Dios, ni'cni direni guzoob xtidx Dios, direni chanuu te gunreni xtzunsa'c Dios.

¹⁵ Binij ni ri_{ajb} lo reyusa'c najc si'c rebejn nani rucuardiajg xtidx Dios, ni rililajz diidxga guideb te lastoya ni najc hueen. Randzu'tzreni xtidx Dios, dxejc rudeedreni te yäl_{nasa}'c, nalajznu ruzoobreni xtidx Dios, rujnreni xtzunsa'c Dios.

Xhet yu'di ni naga'tz par tejpas
(Mr. 4:21-25)

¹⁶ Räjpzani:

—Ruti te bejn ni rucuaguuj te bajl dxejc rusäuni te caj yejc bajlga, dizani gusujnini dejt te loon. Alga rusoobnini nen candilieer loj te mex te guzanijni guideb nen yu'ga te reni jiu' fiireni lo bajlga. ¹⁷ Xhet yu'di ni yuchetzu'tzdi ni di guidzujn dxej guiluini; xhet yu'diza ni naga'tz naj ni di guidzujn dxej gachee bejni.

¹⁸ 'Ni'cni colcuadiagsa'c diidx; sa'csi guiraa rebejn ni rajp yälracee, sajprureni yälajn. Luxh reni di ninuu nucuadiajg xtidx Dios, lojni sibicaj naj ni abacuadiajgni, ni rchaloni najjni.

Xnan Jesús con rebejtzni
(Mt. 12:46-50; Mr. 3:31-35)

¹⁹ Dxejc bidzujn xnan Jesús najza rebejtzni cadre suga'ni, niluxh di niajcdi nibigreni lojni sa'csi tre' xhidalduxh bejn ro'c. ²⁰ Dxejcti huisa'n te bejn diidx loj Jesús, räjpni:

—Xnan guejblu najza rebejtz guejblu suga' rolä', luxh rlajzreni fiireni lo guejblu.

²¹ Badzu' Jesús diidxre lojreni, räjpni:

—Xnanä najza rebetzä najc rebejn ni rucuadiajg, ni ruzoobza xtidx Dios.

Basiacdx i Jesús te beduxh
(Mt. 8:23-27; Mr. 4:35-41)

²² Te dxej biu' Jesús najza rexpejn pacni nen te barcw. Dxejc räjpni lojreni:

—Colcho' stelaad ro' nisre.

Basyu'reni barcw lo nis, sä'tireni. ²³ Cheni sadejdreni galäi nisga, gudiejs Jesús nen barcw. Dxejc gubi' te beduxh lo nisga, luxh sa'csi lacti nadip ro' bejga, gusloj cayu' nis nen barcw, ameerli jääz barcwga lo nis. ²⁴ Dxejcti huicuaänreni Jesús, räjpreni lojni:

—¡Mastr! ¡Mastr! ¡Cayääznu lo nis!

Che gubajjni, huistieni, dxejc gudidxa'ni lo bejga najza lo nis ni cayäsjaa. Dxejc guläjz bejga, guredxiza nisga. ²⁵ Dxejc räjpni lojreni:

—¿Con xcälirililajztu, ä?

Per laareni bidxejbreni, bidxeloduxhreni, canabdiidxreni lo sa'reni:

—¿Chuni'c najc niguiire te rnibeeni bej najza nis, luxh rusobdiajg bej najza nis xtiidxni?

Te ben Gadara ni guyu' rexsprit benxab lastooni
(Mt. 8:28-34; Mr. 5:1-20)

²⁶ Bidzujntireni lo yuj xten Gadara ni tre' stelaad ro' nis nez loj reyuj xten Galilee. ²⁷ Cheni biäjt Jesús nen barcw baläjni lo yuj, gubig te bejn ni siäd guejdxga lojni. Agujc xchej yu' rebenxab nen lastooni. Dini gacw xhajn, dizani cuääz nen yu', alga rbäjzni cadre yu' rebaa. ²⁸ Che bahuiini loj Jesús bazuxhijbni nez lojni, guredxa'ni räjpni:

—¿Xhicuent riädchu'lu loonu, luj, Jesús Xi'n Gueb Dios ni rbäjz xhaguibaa? Rniabduxhä lojlu, na'cru gusacsílu nuurnu.

²⁹ Guniini rediidxre sa'csi canibee Jesús guirii rebenxabga nen lastoo bejnre. Agujc xchero cazob rniaaz rebenxabga bejnga ruliib rebejn ni'ni, naani con cadenguuib te guilibdzu'tzni, te xhet gundini bejn. Niluxh laani rutiugya'ni recaden, dxejc rebenxabga rinäreni nez lo reyubijdz. ³⁰ Jesús gunabdiidx lojni, räjpni:

—¿Chu laalu?

Dxejc badzu'ni diidxre loj Jesús räjpni:

—Legión najc laä.

Si'c guniini sa'csi xhidalduxh najc rebeñdxab ni yu' neñ lastooni. ³¹ Dxejc gunabduxhrenei loj Jesús na'c guxhalsacnireni cadre biriireni. ³² Lagajc dxejc suga' xhidajl cuch cayajwreni guixa' lagajc nejzga lo te bala'. Dxejc gunab rebeñdxabga loj Jesús te gusaanni jiu'reni neñ recuchga. Che cuäjb Jesús, ³³ birii rebeñdxabga neñ lastoo dade'ga, biugajcreni neñ recuchga. Che biu'reni neñ recuch, baxun recuchga bitejbreni ro' te bala', dxejc biajbreni lo nis, ro'cti gujtreni.

³⁴ Baxun reni cayajp recuchga che bahuiireni xhini'c gujc ro'c, huisa'nreni diidx lo rebeñguejdxga näjza lo rebeñ rench. ³⁵ Dxejc biädhuii rebejn xhini'c gujc ro'c. Che bidzujnreni cadre suga' Jesús, bahuiireni loj bejn ni birii beñdxab lastooni. Sobga'ni cuä' ni' Jesús, najcwni xhajnbi, luxh xhetru rajcde yejcni; dxejc bidxebduxh rebejnga. ³⁶ Sas reni bahuiloj xho gujcni, bijreni diidx xho basiajc Jesús bejn ni guyu' rebeñdxabre lastooni. ³⁷ Dxejc guiraa rebeñ Gadara näjza reguejdx ni tre' nejzga, gunabreni jiunejz Jesús ro'c sa'csi cadxebduxhrenei. Ni'cni biu' Jesús neñ barcw te gubisacni nejz cadre siäadni. ³⁸ Dade' ni birii rebeñdxab lastooni gunabni lo Jesús gusaanni chanajlnini, niluxh Jesús gunibee jia'nni, räjpni lojni:

³⁹ —Gubi' rolijzlu te güilu diidx recosro ni bejn Dios xcuent luj.

Dxejc sääni, batie'chni diidx guideb lo guejdxga xhi bennäj Jesúsni.

Xindxa'p Jairo näjza te gunaa ni gudajn xhajn Jesús

(Mt. 9:18-26; Mr. 5:21-43)

⁴⁰ Che gubi' Jesús stelaad nis, bibalajz rebejn gubi'ni, sa'csi cabäjpacreni guibisacni. ⁴¹ Dxejc bidzujn te bejn ni laa Jairo, ni rnibee te guidobäz, bazuxhijbni nez loj Jesús, gunabni chanänini rolijzni ⁴² sa'csi yu' tejtis xindxa'pni. Yu'ni tzubitio'p ijz, luxh cayacxhuuni, ameerli guetni. Lalsi sää Jesús rolijzni, birinajl xhidalduxh bejnini, catäälirenini.

⁴³ Loj rebejnga nadxaag te gunaa ni agujc tzubito'p ijz cayacxhuuni, caya-jcni yälguidxbäii. Xlia'si abanijtni guiraa xhixtenni cua' renani rujn remeed.

⁴⁴ Gubig gunaaga dejtz Jesús te gudajnni ro' xhajnbi. Lagajc dxejc biacgajcni.

⁴⁵ Dxejcti gunabdiidx Jesús räjpni:

—¿Chuni'c najc ni gudajn narä, ä?

Guiraa rebejn räjp:

—Dinu gan.

Räjpza Pedr:

—Mastr, ni yu'lu galäii reben xhidajl, luxh cagutäälirenini luj. ¿Xhicuent rniabdiidxlu: “¿Chu gudajn narä?”

⁴⁶ Räjppac Jesús lojni:

—Yu' chu gudajn narä, sa'csi gucbeä yu' chu basiajc xcälrnibeä.

⁴⁷ Che gucbee gunaaga anajn Jesús gudajnni xhajnbi, bidxejbni, racsejslini gubigni loj Jesús, bazuxhijbni lojni. nez loj guiraa rebejn räjpni xhicuent gudajnni xhajnbi näjza xho biacgajcni.

⁴⁸ Dxejc räjp Jesús lojni:

—Huij. Gulecdxilajzlu, xinda'pä. Abiajclu sa'csi huililajzlu.

⁴⁹ Lalni canii Jesús si'c bidzujn te bejn ni siäad rolijz Jairo, ni rnibee te guidobäz. Räjpni loj Jairo:

—Agujt xindxa'plu. Na'cru gutajllu xtzauun Dad Mastr.

⁵⁰ Che biejn diajg Jesús rediidxga, räjpni loj Jairo:

—Na'c guidxejblu. Huililajztis te jiac xindxa'plu.

⁵¹ Che bidzujnreni rolijzni, xtebtis Pedr, Jacob, Juan näjza xcuzajndxape'ga biunäjni neñ yu'ga. Peta rebejn ni siädajnini bia'nreni rolä'.

⁵² Cayonduxh guiraa rebejn ni sobga' neñ yu'. Dxejc Jesús räjp lojreni:

—Na'c roontu, gajd dxape're guet, nagayejstisni.

⁵³ Alga baxhiznäjärenini, sa'csi anajreni agujt dxape'ga. ⁵⁴ Dxejcti gunaaz Jesús naa dxape'ga, dip guniini, räjpni lojni:

—¡Dxape', huistie!

⁵⁵ Dxejc gubansac dxape'ga, huistiegajcni. Dxejc gunibee Jesús gudeedreni xhi gauni.

⁵⁶ Bidxeloduxh rexcuzajjni. Per gunibee Jesús na'c güireni diidx xhini'c gujc ro'c.

9

Ruxhal Jesús guitzubitio'p rexpejn̄pacni (Mt. 10:5-15; Mr. 6:7-13)

¹ Batie' Jesús guitzubitio'p rexpejn̄pacni te badeedni yäl̄rnibee lojreni te cuääreni reben̄dxab lastoo rebejn̄, näjza te gusiajcreni reben̄racxhuu.

² Baxhal̄nireni te gusule'reni diidx xcuent xcäl̄rnibee Dios näjza te gusiajcreni reben̄racxhuu. ³ Dxejc räjpni lojreni:

—Xhet chanäditu lo nejj, nicla baston̄, nicla bols, nicla yätxtiil, nicla meel; na'cza chanätu tio'p xhajbtu; tejtisni chanätu. ⁴ Chutis rolijz bejn̄ cadre guidzujntu, ro'c col̄jia'n cheni guiriilitu lo guejdxga. ⁵ Palga direni gusaan jiu'tu rolijzreni, che jiunejztu lo guejdxga, col̄cuijb guxhuj ni'tu si'c te seen direni nililajz xtiidxtu.

⁶ Dxejc biriireni sääreni garen-garen reguejdx, cagusule'reni xtidx Dios, cagusiajczareni reben̄racxhuu cadrotis rdzujn̄reni.

Xho gujt Juan ni rutiobnis (Mt. 14:1-12; Mr. 6:14-29)

⁷ Che biejn diajg Herodes ni rnibee guiraa ni cayujn Jesús, guyu'ni yärsia', dini gan xho gunni xhigab, sa'csi yu' reni canii laa Juan ni agubansac lo rebengut. ⁸ Sgaiireni canii abaluiloj Elías. Yu'zareni canii pet laa stee niguii ni gunii xtidx Dios galoo ni agubansac. ⁹ Per räjp Herodes:

—Lagajc narä gunibeä biru' yejc Juan ni rutiobnis, ¿chuchani'c najc niguiire ni riejn diagä xhidajl didxro xcuentni?

Dxejc rlaizpac Herodes fii lojni.

Bayaan Jesús gaii mił bejn (Mt. 14:13-21; Mr. 6:30-44; Jn. 6:1-14)

¹⁰ Che gubi' rexpejn̄pacni, bijreni diidx loj Jesús xhini'c bejnreni. Sas huinä Jesúsreni te lajt cadre ruti bejn̄, gajxh te guejdx ni laa Betsaida. ¹¹ Che gucbee rebejn̄ caro sääreni, huinajlrenini bidxälrenini. Che siäädreni lojni huichaglojnireni, sas gusloj cagusule'ni lojreni xcuent xcäl̄rnibee Dios. Basiajczani rebejn̄ ni cayacxhuu.

¹² Che gusloj cayäaz gubijdx, gubig rexpejn̄pacni loj Jesús, räjpreni lojni:

—Gojs loj rebejn̄re, agojl̄ jüireni te chatiilreni xhi gauren̄i, näjza cadre tedreni guxhijn̄ lo rerench, neñ reguedxbäz, sa'csi ree xhet yu'di.

¹³ Dxejcti räjp Jesús loj rexpejn̄pacni:

—¡La'tu col̄gudeed xhi gauren̄i!

Dxejc räjpreni lojni:

—Xhet rajpdinu, gaiitis yätxtiil näjza tio'p bäjl. Ni'ctis yu' palga dinu chasiiru xhi gau reben̄ xhidajlre.

¹⁴ Luxh najc rebejn̄ga si'cti gaii mił niguii. Dxejc räjp Jesús loj rexpejn̄pacni:

—Col̄yejtz lojreni cuereni xcua-xcuaaren̄i, si'cti tiuubitzugajreni te cuaa.

¹⁵ Si'c bejnrenini, sas gurej guiraa rebejn̄ga si'c. ¹⁶ Dxejc cua' Jesús gaii yätxtiilga näjza tio'p bäljga, guläsni lojni xhaguibaa, badeedni xquixtios lo Dios xcuent yälrajwga. Che gulujx badeedni xquixtios gula'ni reyätxtiilga näjza rebäljga, dxejc sanuutis badeednini loj rexpejn̄pacni te gudisrenini loj rebejn̄ga. ¹⁷ Guiraa reben̄ xhidaalga gudajw, gudxaj xque'reni. Dxejcti batojpreni ni bia'n bachajreni tzubitio'p dxijm̄ yätxtilbiujy näjza bälbiujy ni bia'n.

Gunii Pedr Jesús najc Crist

(Mt. 16:13-19; Mr. 8:27-29)

¹⁸ Te dxej lałni cabedx-canab Jesús lo Dios, xtebni näjza rexpejn̄pacni, gunabdiidxni lojreni, räjpni:

—¿Chuni'c rnii rebejn̄ nacä?

¹⁹ Dxejc räjpreni lojni:

—Yu'reni rnii najclu Juan ni rutiobnis; yu'zarenı rnii najclu Elías; sgaiireni rnii najclu stee niguii ni gunii xtidx Dios galoo ni agubañsac.

²⁰ Dxejc gunabdiidxni lojreni, räjpni:

—¿La'tu a? ¿Chuni'c rniitu nacä?

Dxejc räjp Pedr lojni:

—Luj najclu Crist Xi'n Dios ni cabäaznu.

Jesús rnixгаа xho guetni

(Mt. 16:20-28; Mr. 8:30-9:1)

²¹ Dxejc gunibee Jesús lojreni, räjpni:

—Na'c gäbtu si'c lo rebejn̄.

²² Räjpszani lojreni:

—Nanab ted Xi'n Niguii trabajwduxh; rebeñgool xten guidoo, näjza rebixhojz, näjza rebejn̄ ni ruluii xleii Moisés sibälazreni narä, naareni dina gacä Crist ni cabäaznu. Sugu'treni narä Xi'n Dios ni gujc Niguii, niluxh sibañsacä ni riojn̄ dxej.

²³ Dxejc räjpni loj guiraareni:

—Palga chu tejtı rıajz guirinajl narä, nanab jiällajzni xhixtenni, te guixeguixee guntisni nani gudedä gunni. ²⁴ Sa'csi nani rıajz guiniazdzu'tzni xcälñabajñni, sunijtni yälñabajñ lo Dios; luxh nani runijt xcälñabajñni xcuent xtidxä, sica'ni yälñabajñ par tejpas. ²⁵ Sa'csi ¿xhi gaan gun te bejn̄ palga xca'ni guideb guedxliuj, luxh gunijtni xcälñabajñni lo Dios? ²⁶ Niluxh nani guituinäj narä näjza xtidxä, sigajcza narä, Xi'n Dios ni gujc Niguii, situinäazani cheni jiälä si'c reii guideb yälrdimbicha' xten Xtađä näjza rexanglñi. ²⁷ Guliipac rniä lojtu, yu' gaii reni suga' ree, ni di guet, suhuixgaareni xcälñabee Dios.

Bachaa xho rluiıoj Jesús

(Mt. 17:1-8; Mr. 9:2-8)

²⁸ Gudejdti xhujñ dxej gunii Jesús diidxre, dxejcru huiñä Jesús Pedr näjza Jacob näjza Juan, huijreni jiaa yejc te dajn te guredx-gunabni loj Dios.

²⁹ Lałni cabedx-canab Jesús lo Dios, bidxaa xho ruluii lojni; dxejc xhajbni gujc nolbäj, rdimbicha'lini. ³⁰ Biricajza tio'p dade' caninäjrenini. Redade'ga najc toMoisés näjza Elías. ³¹ Rdimbicha'za redade'ga. Caninäjreni Jesús xcuent xho guetni guedx Jerusalén. ³² Luxh Pedr näjza resa'ni guyuduxh bacal lojreni; che bire'ch bacal lojreni bahuiireni lo yälrdimbicha' xten Jesús näjza loj guiro'p redade' ni caninäjni. ³³ Cheni agojl jiunejz redade'ga loj Jesús, räjp Pedr loj Jesús:

—Dad, Mastr, huenduxh suga'nu ree. Basaan jiencheenu choñ yue', tejni par luj, tejni par Moisés, steeni par Elías.

Luxh di Pedr gaan xhini'c caniini. ³⁴ La_lni caniini si'c, bire' te za gusloj cayäjt yejcreni, dxejc bidxejbreni che biu'reni ne_n zaga. ³⁵ Dxejcti biejn diajgreni ne_n zaga te xse' te ni gunii, räjpni:

—Dee najc Xi'nä ni sanälazä, colcuadiajg xtiidxni.

³⁶ Che gulujx guniini rediidxga, bahuiireni sugaxteb Jesús. Dxejc niäutis ro'reni ne_n redxejga, rut lojdi bijreni diidx xcuent ni bahuiireni ro'c.

Basiajc Jesús te biuux ni guyu' be_ndxab lastooni

(Mt. 17:14-21; Mr. 9:14-29)

³⁷ Barayääl cheni biäjtreni yejc dajnga, xhidalduxh bejn cabäz Jesús.

³⁸ Dxejcti te dade' ni nadxaag rebejnga guredxa'ni, räjpni loj Jesús:

—Mastr, balaslajz narä, gudahuii xi'nä, sa'csi xtebtisni najcni xinganä.

³⁹ Luxh be_ndxab rniaazni, sas ruscuedxa'nini, rajcni si'c yälguidxbej, rbääni bitzun ro'ni, rusacsíduxhnini, luxh dini gusaanni. ⁴⁰ Agunabä loj rexpejn_npaclu nibääreni be_ndxabga, luxh di niajcdini.

⁴¹ Dxejc badzu' Jesús diidxre, räjpni:

—iBejn ni di chalilajz, benguijdx! ¿Gucli chunäätu, gucli gunä huant la'tu? iGudanä xi'nlu ree!

⁴² Dxejc che cabig biuuxga lojni, basälta' be_ndxabga biuuxga lo yuj, sas gusloj cayajcni si'c yälguidxbeduxh. Dxejc gudidxa' Jesús loj be_ndxabga, basiacgajcni biuuxga, dxejc badeednini lo xtadni. ⁴³ Guiraa rebejn bidxeloduxh yäl_nnibeduxh xten Dios.

Rnii Jesús stehuält xho guetni

(Mt. 17:22-23; Mr. 9:30-32)

La_lni cadxeloj rebejn lo recos ni bejn Jesús, räjpni loj rexpejn_npacni:

⁴⁴ —Colcuadiajgsa'c rediidxre, na'cza jällajztureni, sa'csi sutedreni narä Xi'n Dios ni gujc Niguii ladz_naa rebejn.

⁴⁵ Niluxh di rexpejn_npacni niacbee xhi säloj rextiidxni, sa'csi Dios bacua'tznini lojreni te di niacbeerenini. Bidxejzbareni niniabdiidxreni loj Jesús xhi säloj rediidxga.

Chuni'c sajcru

(Mt. 18:1-5; Mr. 9:33-37)

⁴⁶ Guslojza rexpejn Jesús canabdiidx lo sa'reni:

—¿Chuchani'c sajcru loonu?

⁴⁷ Per gucbee Jesús xhi xhigab cayujnreni. Dxejc cua'ni te biuxbäz, bazu_nnini cuä'ni, ⁴⁸ räjpni lojreni:

—Chutis ni xca' te biuxe' sa'csi sanälajzni narä, naräni rca'ni luxh ni rca' narä, rca'ni xtadä ni baxha_l narä. Ni najc maazru nadolajz lojtu, ni'c najc ni sajcru.

Nani di guiniyaj nuurnu, xladnu yu'ni

(Mr. 9:38-40)

⁴⁹ Dxejc räjp Juan loj Jesús:

—Mastr, bihuiinu loj te bejn ni rbää rexpe_ndxab ne_n lastoo bejn con xcäl_nnibee lajlu. Dxejc rie'tznu lojni na'cru gunni si'c, sa'csi dini sanäj nuurnu.

⁵⁰ Dxejc räjp Jesús lojreni:

—Na'c gudxo_njtuni, sa'csi nani di guiniyaj nuurnu, xlaadnu yu'ni.

Jesús gudidxa' loj Jacoob näjza Juan

⁵¹ Che siäddzuj_n redxej ni chää Jesús xhaguibaa, bejn_ni xhigab chää_npacni guedx Jerusalén. ⁵² Baxha_lni gaii bejn gunijd lojni chääreni te guejdx xten Samaria te satiilreni cadre jia'nreni ro'c. ⁵³ Luxh rebejn samarita_n di

rlajzreni gudedlaareni te lajt cadre jia'nreni, sa'csi najnreni chääreni guedx Jerusalén. ⁵⁴ Che biejn diajg Jacoob näj Juan, tio'p xpejn pacni, si'c, sas räjpreni loj Jesús:

—Dad, ¿La rlajzlu guinibeenu jiäjt guiboo xhaguibaali te guze'cni guiraa rebenguejdxga si'cni bejn Elías?

⁵⁵ Dxejc bahuii Jesús lojreni, gudidxa'ni lojreni, räjpni:

—Ditu gaan chuni'c rnibee lastootu. ⁵⁶ Sa'csi narä Xi'n Dios ni gujc Niguui dina niälä te gudzucaä xcäl nabajñ rebejn. Narä biälä te guslääreni lo dojl.

Dxejcti huijreni garenca guejdx.

Reni rlajz nirinajl Jesús

(Mt. 8:19-22)

⁵⁷ Lalni sääreni lo nezyuj, biääd te bejn gunii loj Jesús, räjpni:

—Dad, narä rlazä jiädnalä guejblu cadrotis chää guejblu.

⁵⁸ Dxejc badzu' Jesús diidxre lojni, räjpni:

—Rebäjz rajp xpiliääreni, remane' ni rutajt rajp xpitiääzreni, niluxh narä Xi'n Dios ni gujc Niguui, dina gapä nicla te lajt cadre guscugä yecä.

⁵⁹ Dxejcti räjp Jesús lo stee bejn:

—Gudanajl narä.

Luxh laani räjpni:

—Dad, basaan suchacua'tzxgaä xtadä, dxejcru jiädnalä guejblu.

⁶⁰ Dxejc räjp Jesús lojni:

—Basaan suchacua'tz rebejn ni najc si'c bengut, resabengutreni. Per luj, huij, huisule' diidx xcuent xcäl rnibee Dios.

⁶¹ Dxejc räjp steeni lojni:

—Dad, rlazä jiädnalälu, niluxh basanxgaa chasadidxä resa'ä ni tre' rolizä.

⁶² Dxejc räjp Jesús lojni:

—Nani ruzuj naani yejc garaad, dxejc rudzuré lojni ruhuiini nez dejtzni di gacdi gunni dzuun lo xcäl rnibee Dios.

10

Ruxhal Jesús regayonbitzuu

¹ Che gulujx reni'c, gule Jesús gayonbitzuu bejn, baxhalnireni tio'pgajreni te basnijdnireni lojni loj reguejdx cadre nanab tedni. ² Räjpni lojreni:

—Guliipacni, cayacduxh cose'ch, niluxh guxii najc rebejn ni gun dzuun gutie'nini. Ni'cni colguiniab lo baxhuaan xten cose'ch te guxhalni xhidajlru bejn ni gun dzuun gutie' xcose'chni. ³ Colchäj la'tu; colhuii xho ruxhalä la'tu si'c xiil galäii recuyo't sa'csi sunnäjreni la'tu si'ctisni rlajzreni. ⁴ Na'c chanätu ngodx, niclaza guijxh, niclaza xcura'chtu, luxh na'c sudxitu guininäjtu bejn lo nejz. ⁵ Cheni jiu'tu rolijz te bejn, ganiddoo colye'tz: “Sucuedxilajz reni rbäjz ree.” ⁶ Palga najcni te bejn ni rdxaglajz yälrbecdxilajz sia'n xcälrbecdxilajztu ro'c, luxh palga dini gac, sibi' xcälrbecdxilajztu lojtu. ⁷ Coljia'n lagajc rolijz bejn cadre guidzujntu. Ro'c coltajw, colyä'za xhitis ni guniidxreni, sa'csi nani rujn dzuun, riäjñ xca'ni xcuent dzuunga. Coljia'n tejtis lajt dxejtis ni chutu lo guejdxga. ⁸ Xhitis te guejdx ni jiu'tu, palga jiureni la'tu, colgajw xhitis ni guniidxreni lojtu. ⁹ Colgusajc rebenracxhuu ni yu' ro'c, colye'tz lojreni: “Abidzujngajxh xcäl rnibee Dios.” ¹⁰ Palga jiu'tu te guejdx cadre di rlajzreni gucuadijgreni xtiidxtu, colrii lo nezyuj, ro'c colye'tz lojreni: ¹¹ “Guxhuj xten lajdxtu ni rcaj ni'nu, rudzu'nuni nez lojtu si'c te seen sa'csi ditu nililajz xtiidxtu. Colgacbee dee, abidzujngajxh xcäl rnibee Dios lojtu.” ¹² Ni'cni rniliäpac lojtu, che gac fis xten Dios, nalasru gac fis xten Dios lo guejdxga loj ni gujc guedx Sodoma ni guyu' galoo.

*Reguejdx ni di niu xtidx Jesucrist
(Mt. 11:20-24)*

¹³ Rājzani:

—¡Probe'tu beñ guedx Corazín! ¡Probe'zatu beñ guedx Betsaida! Paru nuhuii rebenzajt ni gubajñ guedx Tiro nājza Sidón remilaagwr ni benä nez lojtu, pet gucli nusiechlajzreni, niajcwreni ladnagas, nibejzaren lo cobdāj si'c te seen abasiechlajzreni. ¹⁴ Che gun Dios fis rextojl rebejn guedxliuj, guxiiru gac xfis Dios lo rebenzajt ni gubajñ guedx Tiro nājza Sidón. Fisroru gun Dios reguedx Corazín nājza Betsaida. ¹⁵ Luxh luj guedx Capernaum, rchalolu siäjslu xhaguibaa, alga siajblu gabijlli, cadre gaclu fisro xten Dios.

¹⁶ Rājzani lo rexpejn pacni:

—Ni riu xtiidxtu, laa xtidxä ni riuni. Nani di jiu xtiidxtu, laa xtidxä ni dini jiu. Luxh ni di jiu xtidxä, laa xtiidx ni baxhal narä ni dini jiu.

Rbi' regayonbitzuu

¹⁷ Che gubi' regayonbitzuu bejn nani baxhal Jesús, rbaduxh lajzreni, rājzreni:

—Dad, nājza rebenxab rusobdiajg xtiidxnu che rusä'tnu lajlu.

¹⁸ Rājz Jesús lojreni:

—O'n. Ni'cni narä bahuiä che gunijt xcälrnibee beñdxab, bitejbni xhaguibaa si'c bianij xten guzii. ¹⁹ Colgacbee. Narä runidxä yälrnibee lojtu te gulajtu yejc bäl nājza yejc naxejb; runidxäza yälrnibee te guntu gaan lo xcälrnibee beñdxab. Xhetliidi gun daan la'tu. ²⁰ Na'c guibalajztistu sa'csi rusobdiajg rebenxab xtiidxtu; colguibalajzru sa'csi acuj lajtu lo xquijtz Dios xhaguibaa.

Bibalajz Jesús

(Mt. 11:25-27; 13:16-17)

²¹ Lagajc dxejc bibalaznäj Jesús Sprit Dxi xten Dios, dxejc rājzni lo Dios:

—Rliä'pä xpala'nlu Xtäda ni rnibee xhaguibaa nājza guedxliuj, sa'csi bacua'tzlu xnezyujlu lo reben nanduxh, per baluiilu xnezyujlu loj rebejn ni najc nadolajz si'c te biuxbäz. O'n, Xtäda, sa'csi si'c rlajzlu gunlu.

²² 'Guiraa recosre abaniidxlu loä Xtäda. Dadtis najc chuni'c najc Xi'nni, rutru najndi chu najcni. Rutza najndi chuni'c najc Guejblu Xtäda, xtebtis narä ni najc Xi'nlu, con rebejn ni rlazä gumbee luj.

²³ Dxejc bahuii Jesús loj rexpejn pacni, rājzni lojtisreni:

—Chicbaa la'tu nājza renani ruhuii guiraa nani cahuilojtu. ²⁴ Sa'csi rniliä lojtu, balti redade' ni gunii xtidx Dios galoo, baltiza rereij rlajz nuhuiireni guiraa ni cahuilojtu, niluxh direni nuhuiini. Rlajzreni niejn diajgreni redidxre ni cayejn diajgtu, luxh di diajgreni niejn.

Xcuent te beñhuen ni siääd Samaria

²⁵ Dxejc huisulii te maestr xten leii, huininäjni Jesús, rlajzni nuxhiidni Jesús lo xtiidxni, gunabdiidxni lojni:

—Dad, Mastr, ¿xhini'c nanab gunä te guibañnä Dios par tejpas?

²⁶ Sas rājz Jesús lojni:

—¿Xhini'c caj lo guijtz xten leii? ¿Xho rolluni?

²⁷ Dxejc badzu'ni diidxre, rājzni:

—Chanälajzlu Dad, Xtioslu guideb lastoolu, guideb xaimlu, guideb xtijplu, nājza guideb xcäriejnlu. Huinälajzza resa'lu si'ctis ni sanälajzlu lagajc luj.

²⁸ Dxejc rājz Jesús lojni:

—O'n, laaca rudzu'lu diidx. Palga gunlu si'c, sajplu yäl nabajñre.

²⁹ Per maestr xten leii, rlajzni nidedbiani ni'cni gunabdiidxni loj Jesús rājzni:

—¿Chuni'c najc resa'ä?

³⁰ Dxejc räjp Jesús lojni:

—Te beṅ laadxnu birii guedx Jerusalén, sääni guedx Jericó. Dxejc lo nezyuj biricaj gaïi gubaan, gulajnreni guiraa xhixtenni, näjli xhajbni ni najcwni. Sas gudijnrenini, basa'nrenini ro'c, guxii cayäädx nugu'trenini. ³¹ Gudejd te bixhojz ni siääd laadxnu, sazaj lagajc nezyujga, cheni bahuiini lojni, alga gudejdni stee laad, sä'tini. ³² Gudejdza te levita, bejn ni rujnza dzuun neṅ guidoo. Che bidzujṅni cadro naga' bejṅga, gudejdni stelaad, sä'tini. ³³ Dxejcti te beṅ Samaria, laṅni sääni biaj, gudejdni nezyujga, bidzujṅni cadro naga' bejṅga. Che bahuiini lojni, balaslajznini. ³⁴ Gubigni loj bejṅga, basäṅni se't näjza bin loj bejn ni nadxälgujdx, dxejc batejbnini te la' lajd. Dxejc bascuijbnini dejtz lagajc xmanni, huinänini cadro rudedlaareni yu', ro'c cuanäjnini. ³⁵ Che bara yääl, gulääni tio'p meel badeedni lo baxhuaan yu'ga. Dxejc räjpni: “Cuanälaa bejṅre; palga gunijtrulu, siguixätini lojlu che guibi'ä.”

Sä'tini.

³⁶ Dxejc räjp Jesús lo maestr xten leii:

—¿Chu tej lo guidxoṅ rebejṅga najc si'c sa' xten dade' ni biajb ladzṅaa gubaan?

³⁷ Dxejc räjpni loj Jesús:

—Ni balaslajz bejṅga.

Dxejc räjp Jesús lojni:

—Huij te sigajcza chayejnlu.

Bidzujṅ Jesús rolijz Mart näjza Marii

³⁸ Laṅni huinuu xnezyujni, bidzujṅni te guejdx. Ro'c bidxaagni te gunaa ni laa Mart ni huinänini rolijzni. ³⁹ Yu' te bäjṅl Mart ni laa Marii, luxh laani gurejni cuä' ni' Jesús te cacuadiajgni xtiidxni. ⁴⁰ Mart cagusquejṅni cayujṅni xhi gaureni. Sas gubigni loj Jesús, räjpni lojni:

—¿La dilu jiu rusanxteb bälä narä te xtebä cayunä remandaad? ¿Gojs lojni gacnäjni narä!

⁴¹ Dxejc räjp Jesús lojni:

—Mart, Mart, cayuduxhlu yärsia', riulu xhidajl cos, ⁴² luxh yu' tejtis ni nanabpac. Agule Marii ni najc huenru, rut sajcdi gudzucajnini lojni.

11

Rului Jesús xho guiniabni lo Dios

(Mt. 6:9-15; 7:7-11)

¹ Te huält cabedx-canab Jesús loj Xtadni Dios, suga'ni te lajt. Che gulujx cabedx-canabni, gunii te xpejṅpacni lojni, räjpni:

—Dad, baluii nurnu xho cuedx-guiniabnu lo Dios, si'c baluii Juan ni batiobnis rexpejṅpacni.

² Dxejc räjp Jesús lojreni:

—Che cuedx-guiniabtu lo Dios, scree colṅnii:

Xtadnu ni yu' xhaguibaa,

suchä'p xpala'nlu, sujiääd xcälṅnibeelu.

Sugac si'ctisni rlajzlu gac lo guedxliuj si'cpac rajcni xhaguibaa.

³ Guira dxej baniidx xcu'nnu si'ctis ni rquiinnuni.

⁴ Basiäjṅl lajzlu redojlṅl xtenu si'cni riäjṅl lajznu redojlṅl ni rujn rebejṅ loonu.

Na'c gusaanlu jiajbnu lo xcälṅnibee beṅdxab.

Basṅaa nuurnu lo dojlṅ.

⁵ Dxejc räjpza Jesús lojreni:

—Paru tejtü yu' te xamiigwani, luxh guidzujṅni rolijzni garol yääl, gäbni: “Xamigwä, banidxlaa choṅ yätxtiil, ⁶ sa'csi bidzujṅ te xamigwä rolizä ni bazaj

biaj, luxh xhet ra'pädi te gudedä xhi gauni.”⁷ Xhixh sinii ni naga' neñ xyu'ni, gäbni: “Na'c riädtie'chlu bacal loä. Niäu rolä' luxh rexi'nä naga' cuä'ä, digacdi chästieä te gunidxä xhi gunidxä lojlu.”⁸ Rniliä lojtu, mase dini chastie te gudeednini sa'csi najcni xamiigwni, sistieni, sudeedni nani rquiintisni te na'cru gutie'chni bacalni.⁹ Sigajcza rniä lojtu, palga guiniabtu xhi guiniabtu, sica'tuni. Palga chatiiltu xhi chatiiltu, sidxältuni. Palga chasejztu rolä', suxhalreni rolä' lojtu.¹⁰ Sa'csi chutis ni rniab, rca'ni nani rniabni; chutis ni rguuil xhi cos, rdxälhini; nani rusejz rolä', suxhalzaren lojni.

¹¹ 'Paru tejtü ni najc dad, jääd te xi'ntu guiniabni te yätxtiil lojtu, ¿la sudeedtu te guij, ä? O palga guiniabni te bäjl, ¿la sudeedtu te bäj, ä? ¹² O palga guiniabni te tzutbejt, ¿la sudeedtu te naxejb, ä? ¹³ Palga la'tu, ni najc bendojl, rajc rudeedtu cossa'c loj rexi'ntu, aticaxh Dios ni yu' xhaguibaa sudeedni Sprit Dxan xtenni loj renani rniabni lojni.

*Rucuaquijreni Jesús, rniireni rajpni yälrnibee xten bendxab
(Mt. 12:22-30; Mr. 3:19-27)*

¹⁴ Gulää Jesús te bendxabgop lastoo te bejn. Che birii bendxabga lastoo bejnga, guslogajc canii bejnga, dxejc bidxeloduxh reben xhidaalga.¹⁵ Dxejc yu' reni räjp:

—Niguiire rbää rebenxab con yälrnibee xten Beelzebú ni rnibee loj rebenxab.

¹⁶ Sgaiireni rrajz guquuilrenini, ni'c canabreni gunni te seen ni siääd xhaguibaali.¹⁷ Niluxh laani gucbeeni xhi xhigab cayujnreni dxejc räjpni lojreni:

—Xhitis gubieer ni rlia' sa'ni lo sa'ni, luxh tilnä j te cuaani stee cuaaga, di gaclaa sinijt gubierga lo guedxliuj. Palga te famil rdilnä j lagajc sa'ni, di gaclaa sinitloj familga.¹⁸ Palga guiliä' sa' rebenxab, ¿xho mood chanuu xcälrnibeereni? Dee rniä sa'csi la'tu rniitu narä rbää rebenxab con lagajc yälrnibee xten Beelzebú.¹⁹ Palga si'c najcni, ¿chuni'c rudeed yälrnibee loj rexejntu te rbääreni bendxab? Lagajc laareni ruluu xhet laadi rujntu xhigab.²⁰ Palga narä rbää rebenxab con xcälrnibee Dios, ni'cni ruluiloj abidzujn xcälrnibee Dios lojtu.

²¹ 'Cheni suga' te bendaan, ca'ni guuib, canäjni rolijzni, rutliidi ruhualdi rehxixtenni.²² Niluxh che jääd stee ni nadipru lo bendaanga, rudxagdijlnini, rujnni gaanni, dxejc rudzucajni xquibni ni badeed yälbendaan lojni, dxejc sajc chanäni guiraa rehxixtenni.²³ Reni xhet yu'di xladä, rdxe'chreni loä. Ni di gutopnä j narä, rutie'chni.

²⁴ Räjpzani:

—Cheni rii te bendxab neñ lastoo te bejn, ricansajni nez lo reyubijdz, caguiilni cadro gusilajzni. Che cad rdxäldini, rujnni xhigab, naani: “Guibisacä rolizä cadro biriä.”²⁵ Cheni guibi'ni, rdxälni lastoo bejnga si'c te yu' ni entis gulujx bilioobni, suchesa'cni.²⁶ Dxejcti rixiini sgajdz bendxab ni rujnru latsiaj lojni. Dxejc riu'reni neñ lastoo bejnga, dxejc nalasru ria'n bejnga loj ni gujcn galoo.

Chicbaa renani riu xtidx Dios

²⁷ Lal ni canii Jesús rediidxre, te nane' ni yu' lo reben xhidaalga dipli guniini, räjpni:

—¡Chicbaa nan ni biädñalu guedxliuj! Chicbaaza nani baslaa luj.

²⁸ Luxh laani räjpni:

—Xhet si'c di najcni; chicbaaru rebejn ni rucua diajg xtidx Dios, ni ruzoobza xtiidxni.

Rebenguidx rniab te milagwr si'c te seen
(Mt. 12:38-42; Mr. 8:12)

²⁹ Sanuutis cadojp rebejn gabi Jesús, dxejc guslojni caniini, räjpni:

—Rebejn ni yu' naj benguidxduxhrenei, rniabzareni te milaagwr si'c te seen; niluxh xhetru seendi fiireni, seentis xten Jonás, dade' ni gunii xtidx Dios galoo fiireni. ³⁰ Lagajc si'c ni gujc Jonás te seen loj rebejn guedx Nínive, si'cza narä, Xi'n Dios ni gujc Niguui, gacä te seen lo rebejn ni nabajn naj. ³¹ Cheni guidzujn dxej ni gac fis sistie te nane' ni gujc rein lo reyuj ni tre' ladbäjgw, sucuaquijni rebejn ni tre' guedxliuj naj sa'csi laani biriini zitduxh te bacuadiajgpacni yäl najn xten Salomón. Ree suga' galäiitu tej ni sacduxhru lo Salomón, ³² luxh ditu chalilajz xtiidxni. Rebejn ni guläjz guedx Nínive sisiunäj rebejn ni nabajn naj neñ redxej ni gac fis. Dxejc sucuaquijrenei rebejn ni nabajn naj sa'csi laareni, che huinäli Jonás xtidx Dios lojrenei, basiechlajzrenei, basa'nrenei xtojlenei. Ni suga' lojtu naj sajcruni lo Jonás, niluxh ditu jiu xtiidxni.

Ni rusanij xcäriejn bejn
(Mt. 5:15; 6:22-23)

³³ Räjpzani:

—Rut rucuaguji di te bajl, te gusujnini te lat xhiga'tz, niclaza neñ te caj. Susujni bajlga jiaa te rajc ruhuisa'c chutis ni riu' neñ yu'. ³⁴ Balojlu najc si'c bajl xten xcäriejnlu. Palga ruhuisa'c balojlu, guideb xcäriejnlu yu' si'c bianij. Palga rajc balojlu dilu fisa'c, guideb xcäriejnlu yu' si'c lo nacäy. ³⁵ Gunatiro te di gac xpianijlu yäl nacäy. ³⁶ Palga guideb xcäriejnlu yu' bianijtis, xheti te lajt nacäy, sajc fisa'clu guira'ti, si'c najc che rusanij te bajl neñ yu'.

Rucuaquij Jesús refarisee näjza rebejn ni najn leii
(Mt. 23:1-36; Mr. 12:38-40; Lc. 20:45-47)

³⁷ Che gulujx gunii Jesús, biädgajn te farisee Jesús chääni rolijzni te chatajwni. Sä'tireni. Che biu' Jesús, gurejni lo mex. ³⁸ Bidxeloj fariseega sa'csi dini niguiib naani si'cpac caj lo xleii Moisés gunrenei te gaureni, sa'csi rujnrenei xhigab si'c racnayareni lo Dios. ³⁹ Dxejcti räjp Jesús lojni:

—La'tu ni najc refarisee, rguibtu nez dejtz te bas näjza te pla't, niluxh la'tu guidxa lastootu yäl gubaan näjza yäl latsiaj. ⁴⁰ ¡Beñ nadduxh! ¿La ditu gacbee? Nani benchee dejtzni, bencheeza nenni. ⁴¹ Colyajc nadolajz, colyacnäj rebejn con ni rniitu, dxejc guiraa recos sajc naya par la'tu.

⁴² '¡Probe'zatu, beñ farisee! Rudeedtu lo Dios tej lo tejga tzuu ni rajptu: rudeedtu bedzxtiil näjza ruud, näj guiraa recuane' ni rajptu lo le', niluxh ditu jiu xcäl guxhtis Dios näjza xcäl rinälajz Dios. Dee nanab guntu ganid, luxh na'cza gusaantu guntu ni alacayujntu par Dios.

⁴³ '¡Proobza la'tu reben farisee! Rchagljaztu rbejtu lo reyagxhil xten rebejn ni sajc neñ reguidobäz; rchagljaztu saru rni rebejn “xchan Dad” lojtu che rijtu lo guii.

⁴⁴ '¡Probe'zatu! La'tu najctu si'c rebaa ni di guzeñ, rsiaj rebejn yejc cadre naga'reni luxh direni gan.

⁴⁵ Dxejcti badzu' tej rebejn ni ruluii leii diidxre lojni, räjpni:

—Dad mastr, che rniilu rediidxre, rniyajlu nuurnu.

⁴⁶ Dxejc räjp Jesús lojrenei:

—¡Probe'za la'tu rebejn ni ruluii leii! Sa'csi rnibeetu gun rebejn recos naganduxh ni najc si'c te cargw naduxh ni di gacdi guu bejn. Luxh la'tu di rlajztu faltuni nicla con te bicuenabäztu.

⁴⁷ '¡Proobzatu! Sa'csi runcheetu xpaa redade' ni gunii xtidx Dios galoo, luxh najctu rexajg renani bagu't redade'ga. ⁴⁸ Ni'cni najnpactu xhi gusajczeni,

rchaglajzzatu redzuun ni bejn retoxtadgoldootu; si'cza gunnäjtu narä sa'csi laareni bagu'treni redade'ga, dxejc la'tu runcheetu xpaareni.

⁴⁹ 'Ni'cni gunii Dios, sa'csi yuduxh xcälñajnni, räjpni: “Suxhalä reniguii ni guinii xtidxä näjza reapost, luxh sugu'treni gaiireni, susacsizareni sgaiireni.” ⁵⁰ Loj rebejn ni nabajn naj siniab Dios gudeedreni cuent xcuent xtiejn guiraa redade' ni gunii xtidx Dios ni bagu'treni cheni guc-cheeli guedxliuj. ⁵¹ Guislojni xtiejn toAbel, näjza xtiejnli Zacarías ni bagu'treni galäii nez lodxan neñ guidoro. Ni'cni rniä lojtu, siniab Dios cuent xten xcälgujt guiraareni loj rebejn ni nabajn naj.

⁵² 'iProbe'za la'tu, rebejn ni ruluii leii! Sa'csi rniitu la'tistu rajptu yälñajn, luxh di rlanjtu chalilajztu xtidx Dios, dizatu gusaan chalilajz rebejn ni rlanj chalilajz xtidx Dios.

⁵³ Cheni räjp Jesús rediidxre, bidxe'ch rebejn ni ruluii leii näjza refarisee lojni. Dxejc guslojreni canabdiidxreni xhidalduxh diidx, ⁵⁴ te cagula'tzreni don la sajc guiga'ni lo xhitis te diidx ni guiniini.

12

Jesús ruluii xcuent levaduur

¹ Lañ ni caniini, bidojp xhidajl miñ bejn ro'c, calaro'li sa'reni. Dxejc gusloj canixгаа Jesús loj rexpeljñpacni, räjpni lojreni:

—Colñati levaduur xten refarisee, rusgueerene rniitisreni xhidajl diidx luxh direni gunni. ² Sa'csi xheti xhi niäu lojni ni di guxal lojni luxh xheti xhi naga'tz ni di jienloj. ³ Ni'cni guiraa ni guniitu lo nacäy, sienni lo bianij xten dxej. Luxh ni gunii xhiga'tztu neñ reyu' ni niäudzu'tz, sivedxa'renini rediidxga yejcli reyu'.

Chuni'c nanab guidxejbtu

(Mt. 10:28-31)

⁴ Räjpszani:

—Rniä lojtu, xamigwä, na'c guidxejbtu rebejn ni sajc ju't tiejxhtu, dxejc xhetru sajcdi gunreni. ⁵ Guiniä lojtu chuni'c nanab guidxejbtu. Colguidxejb nani che abadzucajni yälñabajñ räjpni yälñibee gusälñi la'tu gabijl lo bajl ni cayejc par tejpas. Ni'csii colguidxejb.

⁶ 'Anajntu sajc jio' gaii mane' tio'p melbäz, luxh di Dios jiällajz nicla tej remane'ga. ⁷ Rexquidxejctu abigab tebgajni. Na'c guidxejbtu; la'tu sajcrutu loj xhidajl remane'ga.

Reni riembee Jesús nez loj rebejn

(Mt. 10:32-33; 12:32; 10:19-20)

⁸ Räjpszani:

—Rniä lojtu, guiraa rebejn nani rcäjp rililajzni xtidxä nez loj rebejn, narä Xi'n Dios ni gujc Niguii sicäpä najcni xpenä nez loj rexangl Dios. ⁹ Luxh reni di guicäjp rililajzni xtidxä nez loj rebejn, sigajcza sunnäani nez loj rexangl Dios xhaguibaa.

¹⁰ 'Chutis ni guinii te didxnaj xcuentä, susiäjllajz Dios laani. Niluxh chutis ni guiniyaj Sprit Dxan xten Dios, di Dios gusiäjllajz xtojñni.

¹¹ 'Cheni chanäreni la'tu nez loj rebejn guidobäz o nez loj reguxhtis, na'c guntu xhigab xhi gudzu'tu diidx o xhini'c guiniitu, ¹² sa'csi che guidzujñ or ni guiniitu, Sprit Dxan xten Dios suluiini xhini'c guiniitu.

Reyälñasa'c rusajb bejn neñ dojl

¹³ Te niguii ni nadxaag rebejn xhidaalga räjpni loj Jesús:

—Dad, Mastr, gojs lo betzä guniidxni gala' xhixtenä ni basa'n toxtadnu loonu.

¹⁴ Dxejc räjp Jesús lojni:

—Dade', ¿chuni'c gule narä gunä yälguxhtis o gacä abogaad lojlu, ä?

¹⁵ Dxejc räjp sac Jesús lojreni:

—Colnatiro, colgantzu' te di rlajtistu ga'ptu yäl'nasa'ctis sa'csi xcäl'nabajn bejn dini gac yälrajptis xhidajl xhi cos.

¹⁶ Dxejcti bij Jesús te cuent, räjpni lojreni:

—Guyu' te bejn rapduxh. Racduxh cose'ch lo rexcäjlni. ¹⁷ Dxejcti gusloj bejn ni xhigab: “¿Xhocha gunä? Dina gapä cadre cucheä recose'ch.” ¹⁸ Sas bejn ni xhigab: “Ananä xhini'c gunä. Gudzulä reyu' cadre rgucheä recose'ch, te gustiobä reyu'ga, te ro'c cucheä guiraa recose'ch näjza rehxixtenä.” ¹⁹ Dxejcti siniä lo lastoä: “Lastoä, agulucheelu xhidajl xhi cos, sajlni xhidajl ijz. Basilajz naj, gudajw, gu', bibalajz.” ²⁰ Dxejc räjp Dios lojni: “¡Bejn najd! Lagajc guxhijñre siniabä xaimlu. ¿Dxejca'? ¿Chu xca' guiraa recos ni gulucheelu?” ²¹ Si'c sisiajc guiraa rebejn ni rguiltis xcäl'nasa'creni lo guedxliujre, niluxh xhet rajpdireni loj Dios.

Rcanäj Dios rexi'nni

(Mt. 6:25-34)

²² Che gojl stera't, räjp Jesús loj rexpejn pacni:

—Ni'cni rniä lojtu, na'c rujntu xhigab xcuent xho guibajntu o xhini'c gautu te guibajntu, niclaza xcuent lajd ni gacwtu. ²³ Yäl'nabajn sajcruni lo yälrajw; tiejxhni sajcruni lo lajd ni rajcw bejn. ²⁴ ¡Colhuui rebaloo! Direni cue'c binij, dizareni gutojp cose'ch, dizareni ga'p nicla yu' nicla te cadre chuchee cose'ch, per rudeed Dios xhi rajwreni. ¿La xhet sajcdirutu loj rebalooga, ä? ²⁵ Luxh ¿Chu tejtü palga runduxhni xhigab sajc tioobruni sgarol metr? ²⁶ Palga di gacdi guntu nicla te cosbäz, ¿xhicuent ru'tu yärsia' xcuent xhi stee cos?

²⁷ ¡Colhuui xho rga' reguino'ch! Direni gun dzuun, dizareni gun lajd lo dzujb, luxh rniä lojtu, nicla rei Salomón con guiraa xcäl'nasa'cni, dini nisiuchee si'c rsiuchee reguiiga. ²⁸ Palga rusuchee Dios recuaan ni rga' lo niaa, ni rial nadxej, luxh guixee-huijdx, che agubijdzni, rejcní lo däj, aticaxh Dios suniidx xhi gacw la'tu, ¡bejn nani guxii rililajz! ²⁹ Ni'cni rniä na'c runtejtü xhigab xho quiiltu xhini'c gautu, xhini'cza yätu, na'c chutistu yärsia'. ³⁰ Si'ctis rujñ rebeñguedxliuj guideb xtijpreni rguilreni rehxicosre. Niluxh xtadtu ni yu' xhaguibaa anajñni xhini'c rquiintu. ³¹ La'tu colquiiltis xcäl'nibebe Dios, dxejcti laani suniidxzani guiraa recos ni rquiintu.

Yäl'nasa'c ni yu' xhaguibaa

(Mt. 6:19-21)

³² Räjpzani:

—La'tu ni najc rexilä'ä, na'c guidxejbtu, sa'csi rbaali lajz Dios, aguleni la'tu te la'tu guntu yälguxhtis lo xcäl'nibebe. ³³ Colguto' xhixtentu, colgudeedni loj rebejn ni caquinduxhni, te si'c guntu te bols ni di jiuixh, te chu yäl'nasa'c neñni xhaguibaa cadre di gubaan jiu' niclaza xcabäj rehxicos. ³⁴ Sa'csi cadre rajptu xcäl'nasa'ctu, ro'cza yu' lastootu.

Nanab susiñtu

³⁵ Räjpzani:

—¡Colsusin! ¡Colhualguij rebajl! ³⁶ Colyujñ si'c remos ni cabäjz guibi' xlamreni ni säa te sa', te cheni guibi'ni guxhalgajcreni rolä'. ³⁷ Chicbaa remos ni susiñ che guibi' xlamreni. Rniliäpac lojtu, lagajc xlamreni sajcwñi xhajbñi sibe'cni rexmosni lo mex, dxejc lagajc laani sudeedni xhi gaureni. ³⁸ Mase

guidzujñni garol yääl, mase guidzujñni cäjyru, palga guidxälñi arexmosni susiñ, ¡chicbaa remosga! ³⁹ Colyacheepac, paru gacbee baxhuaan xten yu' xhi or guidzujñ gubaan rolijzñi, dini gusaan guxhalreni rolijzñi te cuanreni xhixtenni. ⁴⁰ Näjza la'tu colsusñ, sa'csi or ni ditu gun xhigab jiädni, sidzujñ Xi'n Dios ni gujc Niguui.

Te mos guijdx

(Mt. 24:45-51)

⁴¹ Dxejc gunabdiidx Pedr lojni, räjpni:

—Dad, ¿la lootisnu rujylu cuentre o la najcni par guiraa rebejn?

⁴² Dxejc räjp Jesús lojreni:

—¿Chuni'c najc mos hueen, mos nasiñ, ni rusannäj xlamñi guiraa rexmosni te gudeedni xhi gaureni che gal oor, ä? ⁴³ Chicbaa mosga palga laaca cayujñni che guibi' xlamñi. ⁴⁴ Rniliäpac lojtu, lamga sudeed guiraa rexhixtenni te xcanäj mosgani. ⁴⁵ Per palga gun mosga xhigab neñ lastooni: “Saclaa guibi' xlamä”, sas guislojni gusacsíni resamosni, gunaa sigajc niguii, dxejc guisloj gauni, yäni, soozni; ⁴⁶ sibi' xlamñi te dxej ni xhet cabäjdinini, or ni dini gun xhigab guidzujñni. Dxejc sii sudeedni te castigwro lojni, sutiäjñi te duu dejtzní dxejc sinibeeni jiini, guidxaagni rebejn ni di gusobdiajg diidx.

⁴⁷ 'Mosga ni najñ xhini'c rlanj xlamñi gac, luxh dini susiñ, dizani guzoob xtiidxni, sutiälduxhrene duu dejtzní. ⁴⁸ Niluxh mos ni di gan xhi rlanj xlamñi gac, ni'c rujñni redzuun ni di xlamñi guidxagljaz gac, guxiiru castiigw gacni. Reni rca' xhidajl, xhidajlza riäjñ gudeedreni; loj reni rca' yälñribeduxh, xhiroobza siniabni lojni.

Rlia' Jesús bejn lo sa'ni

(Mt. 10:34-36)

⁴⁹ Räjpza Jesús:

—Narä biälä te gucuaguiä guedxliujre; ¡malaii alagusloj cayejcni! ⁵⁰ Niluxh nanab tedä te yälrobnis ni säloj te trabajwduxh, ni'c cayuduxhä yärsia' cheni chale'lini. ⁵¹ ¿La rujntu xhigab biälä te jiädñää yälñbedxi loj guedxliuj, ä? Rniä lojtu, dini gac si'c. Alga biälä te guilia'ä bejn lo sa'reni. ⁵² Silia' sa' te famil; loj gaiireni, sidxe'ch choñreni loj tio'preni, luxh tio'preni sidxe'chza lo choñreni. ⁵³ Silia' sa'reni; sidxe'ch dad lo xingaanni, luxh xingaanga sidxe'chza lo xtadni; nane' sidxe'ch lo xindxa'pni, luxh xindxa'pga sidxe'chzani lo xnanni; nansuegr sidxe'chni lo xculijzñi, luxh gulijzga sidxe'ch lo xnansuegrni.

Reseen xten retieemp

(Mt. 16:1-4; Mr. 8:11-13)

⁵⁴ Caniiza Jesús lo reben xhidajlga, räjpni:

—Cheni rhuiitu räjs reza nez lad jiät, rniitu: “Siajb nisguij.” Luxh riabñi.

⁵⁵ Che rbi' bej nez lad danbägw, rniitu: “Sacnalaa nadxej”, luxh si'c rajcni.

⁵⁶ ¡Bejn ni rusguee! La'tu racbeetu xhi säloj reseem ni rien lo guedxliuj näjza xhaguibaa, ¿xhicuent ditu gan xhi säloj retieemp ni dxunnu naj, ä?

Basiäjñ diidx con rebejn ni rdxe'ch lojlu

(Mt. 5:25-26)

⁵⁷ Räjpzani:

—¿Xhicuent ditu quiil lagajc la'tu xhini'c najc hueen, xhini'c najc laaca te guntuni? ⁵⁸ Sa'csi palga yu' chuni'c chale'c xquejlu lo guxhtis, lañni sanäni luj ro jusgaad, basiäjñ diidx con laani lo nejz, te na'c chanäni luj lo reguxhtis, sa'csi dxejc reguxhtis suteedreni luj lo reguixhajg te gusaureni luj neñ latzguuib. ⁵⁹ Luxh rniä lojlu, dilu guirii ro'c hasta gusa'lu quiixlu guiraa lojreni.

13

Colgusiejch lajztu te di guettu

¹ Lagajc dxejc, gubig gaa reni huisa'nreni diidx loj Jesús xcuent gaa beñ Galilee ni bagu't Pila't nen guidoo, bagu'chni xtiejnreni con xtiejn reman ni siädnäreni si'c gojn lo Dios. ² Sas räjp Jesús lojreni:

—¿La rujntu xhigab si'c gusajc reben Galileega sa'csi najcrureni ben dojl lo rebejn lajdxreni? ³ Narä rniä, dini gac si'c. Palga di'tu gusiechlajz sigajcza sejt guiragajctu. ⁴ O xcuent guitzunchon rebejn nani gujt che gubixh te or ni laa Siloé yejcreni, ¿La rujntu xhigab najcrureni ben dojl lo rebejn ni rbäjz guedx Jerusalén, ä? ⁵ Narä rniä, dini gac si'c. Palga di'tu gusiechlajz, sigajcza sejt guiragajctu.

Xcuent te yag iigw

⁶ Dxejcti gusloj bij Jesús te cuent ni ruluini lojreni, räjpni:

—Te dade' gojp te yagiigw ni basujni lo xyujni. Sas huihuiini don la caj ninejxh lojni. Luxh xhet ninejxhdi bidxälni. ⁷ Dxejc räjpni loj bejn ni canäj xyujni, agujc chon ijz siädtilä ninejxh lo yajgre, luxh xhetini. Batin yajgre. ¡Xlia'si sujni lo yuj! ⁸ Luxh xmosni räjp lojni: “Dad, basaanni steb ijz, guslää yuj ni'ni, gusälä abonni. ⁹ Palga xcaj ninejxh lojni steb ijz, laaca, palga dini xcaj, dxejc guitinnuni.”

Rusiajc Jesús te gunaa

¹⁰ Te dxej ni rusilajz rexpejn Israel caguluii Jesús nen te guidobäz. ¹¹ Ro'c suga' te nane' ni agujc tzunbichon ijz racxhuuni. Benxab cagusoodni, niluxh di gacdi sulini. ¹² Che bahuii Jesús lojni, gurejdxnini, dxejc räjp Jesús lojni:

—Gunaa, abasaan yälguijdxga luj.

¹³ Che basujni naani yejcnini, lagajc dxejc gujc gusulii nane'ga. Dxejc guslojni calä'pni xpala'n Dios. ¹⁴ Luxh dade' ni rnibee guidobäz bidxe'chni sa'csi basiajc Jesús nane'ga che najcni dxej ni rusilajzreni, ni'c gusloj cayäjpni loj rebejn:

—Xho'p dxej sajc gun bejn dzuun; nen redxejga sajc jiäädte te jiajctu, per na'c jiäädte dxej ni rusilajz rexpejn Israel.

¹⁵ Dxejc badzu' Jesús diidxre, räjpni lojni:

—¡Ben rusguee! ¿La di chutis tejtü guxhec xconni o xpurni te chanänini yäni nis, mase najcni dxej ni rusilajz bejn, ä? ¹⁶ Luxh nane're najc te xagdo to Abram, nani numbee Dios, ni agujc tzunbichon ijz baliib benxabni, ¿la digacdi guixecni lo xcälguijdxni mase najcni dxej ni rusilajz bejn, ä?

¹⁷ Che gunii Jesús rediidxre, bianxtujy rebejn ni rdxe'ch loj Jesús, luxh reben xhidaalga cabalazduxhreni sa'csi cayujn Dios redzunro nez lojreni.

Xcuent bedz muxhtas (Mt. 13:31-32; Mr. 4:30-32)

¹⁸ Ni'cni räjp Jesús lojreni:

—¿Xhocha najc xcälrnibee Dios? ¿Xhicha cojn guiniä najcni tebloj? ¹⁹ Najcni si'c te bedz muxhtas ni rbe'c te bejn lo xyujni. Luxh che guiroobni, rajcni te yagro. Dxejc riääd remane' ni rutajt siädynchee xpitiääzni loj rexhajcwni.

Xcuent cojb ni rusaguij (Mt. 13:33)

²⁰ Guniiza Jesús stehuält te gacbeereni xho guire'ch rextidx Dios. Räjpni lojreni:

—¿Xhicha cojn guntebloä xcäl̄rnibee Dios? ²¹ Najcni si'c levaduur ni rugu'ch te gunaa lo choñ mediid arin, luxh rusaguijni guiraa cojbgä.

Dää rolä' cadre jiu'ni xhaguibaa
(Mt. 7:13-14, 21-23)

²² Huinuu Jesús xnejzni sääni guedx Jerusalén. Lañi sadejdni reguejdx näjza rerench caguluiini rebejn. ²³ Dxejc gunabdiidx te bejn lojni, räjpni:

—Dad, ¿la guxii najc rebejn ni caḷaa loj rextojl̄reni, ä?

Dxejc räjpni lojreni:

²⁴ —Dää rolä' cadre jiu' bejn xhaguibaa. Ni'cni col̄tip lajztu te jiu'tu ro'c, sa'csi xhidajl bejn rlaḷz jiu'reni ro'c, niluxh direni gun gaan. ²⁵ Cheni abasäu baxhuaan xten yu' rolä', dxejc la'tu ni suga' detz yu' guisloj gusejstu rolä', guiniitu: “Dad, baxhal-laa rolä'”, dxejc laani sudzu'ni diidx, siniini: “Dina ganä caro siääd̄tu.” ²⁶ Dxejc guislojtu guiniitu: “Bidxunnäänu, bidaunäänu, bidunnäänu luj, baseedlu nuurnu lo xnezyuunu.” ²⁷ Dxejc siniini lojtu: “Rniliä lojtu, dipacnä gumbeä la'tu. Col̄jij guiraatu, beñlatsiaj.” ²⁸ Dxejcti sonduxhtu, chubejli läjytu che fiitu abiu' toAbram, con toIsaac, con toJacooḷ, näjza guiraa redade' ni gunii xtidx Dios, suga'reni lo xcäl̄rnibee Dios xhaguibaa, luxh la'tu di gacdi jiu'tu. ²⁹ Dxejga sidzujñ xhidajl beñzijt ni siääd ladjiaa, ladjiaät, ladbäḷgw, näjza ladbee, te jiu'reni lo xcäl̄rnibee Dios xhaguibaa, ro'c sibejzarenı lo mex. ³⁰ Luxh yu' renı rujntu xhigab guxii sajcreni naj, sacduxhrenı dxejc. Yu'za renı rchalotu sacduxh naj, xhet sajcdireni dxejc.

Jesús biin xcuent guedx Jerusalén
(Mt. 23:37-39)

³¹ Lagajc dxejga, bidzujñ gaii refarisee, räjprenı lojni:

—Huij, biunejz ree, sa'csi Herodes rlaḷz ju'tlu.

³² Dxejc laani badzu'ni diidxre lojrenı, räjpni:

—Gojz lo bäjzga, beñ rusguee: “¡Bahuii! cabää rebeñdxab lastoo rebejn, cagusiaca rebejn ni racxhuu nadxej näjza guixee, luxh huijdxli guluxä xtzunä.”

³³ Niluxh mase si'c gacni nanab chanuä xnezyuä nadxej näjza guixee, huijdx, sa'csi di gacdi guet te dade' ni rnii xtidx Dios ste'ca guejdx, guejdx̄tis Jerusalén saj̄c guetni.

³⁴ ¡Probe'tu, la'tu beñ Jerusalén! Rugu'ttu redade' ni riäd̄nii xtidx Dios lojtu, rucuaazatu guij yejc rebejn ni ruxhal̄ Dios lojtu. Balti huält rlaḷzä nuchagä sa'tu si'c ruchagsa' te guidco'c rexquidbäz̄ni lajd xhigani, niluxh ditu nicäjp.

³⁵ Bahuii xho bianxteb xquidootu. Ni'cni arnixgää lojtu, dirutu fii loä cheni guidzujñli dxej ni guiniitu loä: “Chicbaa ni siääd xcuent Dios.”

14

Rusiajc Jesús te bejn ni guidxa guij

¹ Che gojl te dxej ni rusilajz rexpejn̄ Israel, huitajw Jesús rolijz tej ni rnibee loj refarisee. Cagula'tz gaii refarisee, guidon xhini'c gun Jesús, ² sa'csi nez loj Jesús suga' te dade' ni guidxa guij tiejxhni. ³ Dxejc gunabdiidx Jesús lo rebejn ni ruluii leii näjza lo refarisee, räjpni lojrenı:

—¿La saj̄c gusiajcni te beñracxhuu dxej ni rusilajz bejn o la di gacdini?

⁴ Per laarenı dxitis suga'reni, niäutis ro'reni. Dxejc cua' Jesús beñracxhuuga, basiajcnini, gunibeezani biunejzni. ⁵ Dxejc räjpni loj refarisee:

—Chu la'tu ni rajp te bur̄ o te gon, palga jiajbni neñ te bisie, ¿la ditu chalägajcni mase najcni dxej ni rusilajz bejn, ä?

⁶ Dxejc di niajcnı nudzu'reni diidx lojni.

Reni bidon̄ chää sa'

⁷ Cheni bahuii Jesús xho rchaglazj rebejn rbereni latsa'c te cuereni cuä' rebejnro, bijni te cuent ni ruluii lojreni, räjpni:

⁸ —Cheni guidontu chäätu te sa', na'c guntu te cuetu cuä' rebenro, te di guidzujn te benroru lojlu, ⁹ dxejc jiääd bejn ni cayujn lanij, naani lojlu: “Badeed cue dade're ro'c.” Dxejc situjylilu chacuelu ste'ca lajt lo le'li. ¹⁰ Maazru hueen, cheni guidonlu chäälu te sa', huicue lo mex ni zuj lo le' te che guidzujn bejn ni cayujn lanij, naani lojlu: “Xamigwä, gudaä cuelu nen yu' cadre rbej rebenro.” Si'c sä'p xpala'nlu nez loj guiraa rebejn ni sobganäjlu lo mex. ¹¹ Sa'csi ni rlazj chä'p xpala'nni nez loj rebejn, sianxtujyni nez lojreni. Luxh bejn ni najc nadolajz, sä'p xpala'nni nez loj guiraa rebejn.

¹² Räjzpiani loj bejn ni cagudeed xhi gaureni:

—Cheni gunlu te lanij o gutedlu bejn lo xmexlu, na'c cueedxtislu rexamigwlu con rebejtzu, con resa'lu, niclaza rexpisinlu ni najc ri'cw, sa'csi laareni sigajcza sibejdxreni luj che gunreni te lanij, luxh si'c agudijxreni ni badeedlu lojreni. ¹³ Che gunlu te lanij, alga gurejdx rebenproob, rebencoj, näjza rebenlotiä'p, ¹⁴ dxejcti sibaa lajzlu sa'csi laareni di gacdi gunidxsacreni ni badeedlu lojreni; luxh si'c siguixsac Dios ni bejnlu che gal dxej ni guibansac rebejn loj rebenjut.

Xcuent te laniro

¹⁵ Che biejn diajg tej reni sobga' lo mex, räjpni loj Jesús:

—Chicbaa rebejn ni gau yätxtiil cadre rnibee Dios.

¹⁶ Dxejc räjp Jesús lojni:

—Guyu' te dade' ni bejn te laniro rolijzni. Gunibeeni bidon xhidajl bejn te jiädaunäjrenini. ¹⁷ Che bidzujn or ni gaureni, baxhal dade'ga te xmosni chatejdxni rebejn ni abidon, räjpni lojreni: “Colchäj, asuchee lo mex.” ¹⁸ Dxejc guiragajcreni gusloj cayäjb di gacdi chääreni. Tejni räjp: “Entis gusiä te la' yuj, luxh naj nanab chahuiä xho najcni. Goslaa di gacdi jiälä.” ¹⁹ Steeni räjp: “Gusiä gaii nejs gon, luxh nanab chahuiä xho rujnreni dzuun. Goslaa di gacdi jiälä.” ²⁰ Steeni räjp: “Entis bachnaä ni'cni di gacdi jiälä.” ²¹ Che gubi' mosga, badeedni diidx lo xlamni xhi räjp rebejnga lojni. Dxejc bidxechduxh lamga, räjpni lo xmosni: “Basquejn huij ladnezyuj näjza ladnezyuj däa, gudanä rebenproob, rebencoj, rebenlotiä'p, rebennatiujnc.” ²² Si'c bejn mosga. Che gubi'ni räjpni lo xlamni: “Dad, abenä si'c ni gunibeelu, luxh lajtru yagxhiil.” ²³ Dxejc räjp lamga lo xmosni: “Huij lo renezyuj ni sii loj reguedxzij, gudanäj rebejn ni guidxaaglu nejzga, te cha bejn rolizä. ²⁴ Rniliä lojtu, nicla tej reni bidon ganid di gau xhuej nani benä.”

Ni nanab gunni te chanajlni Crist

²⁵ Laļ sasaj Jesús lo nejz, xhidalduxh bejn sanajlni. Dxejc gubiréni, gusloj cayäjpni lojreni:

²⁶ —Palga yu' chu tej ni jiääd loä, ni di cuälaz xtadni, xnanni, chäälni, rexi'nni, rebejtzni, näjza rebisiajnini, nägajcza xcäl nabajnni, di gacdi gacni te rexpenä. ²⁷ Palga yu' chutis tej ni di rlazj tedni trabajw te jiädnajlni narä, di gacdi gacni te rexpenäpac. ²⁸ Chu tejtü ni rlazj gun te yuro, ni di gunxgaa xhigab lacti meel chanä yu'ga, te guidon la sajc guluuxnini. ²⁹ Didi cheni abejnni recimient, di gacdi guluuxnini, dxejc guiraa reni fi lojni suxhiznäjnrenini, ³⁰ säjpreni: “¡Bahuilaa! Bejnre gusloj bencheeni te yu' per di niajcdi nuluuxnini.” ³¹ ¿Chu te rei ni gun xhigab chachagdijlni stee rei, ni di gunxgaa xhigab don laa sajc gunni gaan con tzuu mil soldaad loj stee rei ni siääd con gajl mil soldaad, ä? ³² Palga di gacdi gucuanäjnini, che gacbeeni zijtli siääd stee reiiga, suxhalni te xpejnini chanab yälrbexi lojni. ³³ Ni'cni

palga chutis tejtü di gusaan rehxixtenni te jäädnajlñi narä, di gacdi gacni te rexpennäpac.

Che diru sejd gac nadzujy
(Mt. 5:13; Mr. 9:50)

³⁴ Räjpzani:

—Huen najc sejd. Per cheni diruni gac nadzujy, ¿xho gacru gac nadzujyni?

³⁵ Xhetru sajcdini, nicla te chääni loj yuj, niclaza te chääni lo abon. Gusäl̄tis bejn sejdga. Reni rlazj gucuadiajg xtidxä, sucuadiagsa'creni.

15

Xcuent xiil ni gunijt
(Mt. 18:10-14)

¹ Guiraa reni rusquijx impuest näjza rebendoj̄l cabigreni loj Jesús, te cuadi-ajgreni rextiidxni. ² Refarisee näjza rebejn̄ ni ruluii leii gusloj camojmreni, räjpreni:

—Bejn̄re rusaan rbig rebendoj̄l lojni, luxh raunäjzanireni.

³ Dxejcti bij Jesús cuent ni ruluiire lojreni, räjpn̄i:

⁴ —Chutejtu ni rajp tegayuu xiil, palga chanijtni tejni, ¿la dini gusaan stap-bitzuubigaa rexiilni lo niaa te chatiilni xile' ni gunijt, hasta guidxällinini, ä? ⁵ Luxh che guidxäl̄nini sibaduxh lajzni, dxejc sutzuubnini ro xhajcwni. ⁶ Che guidzuj̄n̄ni rolijzni sutojpn̄i rexamiigwni näjza rexpisinn̄i te gäbni lojreni: “Colguibalaznäj narä sa'csi abidxälä xile' ni gunijt.” ⁷ Rniä lojtu, sigajcza su'ru yärlbalajz xhaguibaa xcuent tejtis bejn̄ ni guibig lo Dios ni gusiechlajz xtoj̄lni quela xcuent tapbitzubigaa bejn̄ ni di guiquiin gusiechlazreni xtoj̄lreni.

Xcuent meel ni gunijt

⁸ Räjpzani:

—Sigajcza te gunaa ni rajp tzuu meel, palga chasäl̄ni tejni, ¿la dini gusanij te bajl te gulooobni nen̄ yu' hasta guidxäl̄nini, ä? ⁹ Luxh che guidxäl̄nini, sutojpn̄i rexamiigwni näjza rexpisinn̄i, säjpn̄i lojreni: “Colguibalaznäj narä sa'csi abidxälä meel ni gunijt.” ¹⁰ Rniäza lojtu, sigajcza sibalajz rexangl Dios xhaguibaa xcuent te ben̄doj̄l ni rusiechlajzni.

Te bejn̄ ni baxun̄ te xi'nni

¹¹ Dxejc bijza Jesús cuentre lojreni:

—Guyu' te dade' ni yu' tio'p xingaanni. ¹² Dxejc xi'nni ni najc huinruga, räjpn̄i lo xtadni: “Dad, baniidx yäl̄nasa'c nani nungäj̄l xca'a.” Sas badeed xtadni xerensni. ¹³ Di niacclaa, balsi dxej gudejd, chela bato' xihuinni guiraa xhixtenni, dxejc sääni, bidzuj̄n̄ni te guedxzij̄t. Ro'c banijtni guiraa xmeelni lo recosguijdx. ¹⁴ Che abanijtni guiraa xhixtenni, biääd te gubinuxh guedxzij̄tga cadre yu'ni. Sas guslojzani calaanni. ¹⁵ Dxejc huitiilni dzuun lo te ben̄guejdxga. Baxhal̄ bejn̄gani te huigajpn̄i cuch lo xyuj dade'ga. ¹⁶ Luxh calanduxhni bejn̄ni xhigab malaii sajç gauni recuaan ni najc si'c lia ni cayajw recuch, niluxh rut badeeddi xhi ni ajwni. ¹⁷ Lal̄ ni cadejdn̄i trabajwga, bianij xcäriejn̄ni bejn̄ni xhigab, naani: “Balti rexmos xtadä rausa'c, ria'nru xhi gaureni. Luxh narä ree calanduxhä, ameerli guetä. ¹⁸ Guibi'älis ladxä, rolijz xtadä, gäpä lojni, Dad, banitä lo Dios näjza lojlu. ¹⁹ Diru nungäj̄l guirilaä xi'nlu. Cua' narä si'c te xmoslu.” ²⁰ Dxejc gunazgajcni nejz te gubi'ni rolijz xtadni.

'Cheni zijtru siäädni, bahuii xtadni lojni. Dxejc balaslajznini, ruxun̄lini, huichaglojnini, sas gudäänzini, bachagro'ni lojni. ²¹ Dxejc räjç xi'nni lojni: “Dad, abanitä lo Dios näjza lojlu. Diru nungäj̄l guirilaä xi'nlu.” ²² Per

räjp xtadni loj rexmosni: “Coltanä te ladsa'c, colshuajcwnini xi'nä, colgusäl te niil bicuenaani, xcajza te gura'ch ni'ni. ²³ Coltanä te biser ni guro' colgu'tni. ¡Colsqejn te guidaunu, jienu te lanij! ²⁴ Sa'csi xi'näre abenä xhigab gujtni, luxh naj si'cni agubansacni, gunijtni niluxh naj abidxäjlni.” Dxejc guslojreni bejnreni te lanij.

²⁵ 'Lal ni cayajc dee, xingangalooni cayujn dzuun lo niaa. Che gubi'ni, siäddzungenajxhni rolijzni, che biejn diajgni cayel rolijzni, caguya'zareni. ²⁶ Dxejcti gurejdxni te mos, gunabdiidxni lojni xhi cayajc royu'. ²⁷ Dxejc räjp mosga lojni: “Gubisac bejtzlu, luxh xtadlu gunibee gujt te biser guro' te gac lanij sa'csi nadaanni gubi'ni.” ²⁸ Dxejc bidxe'ch xingangalooni. Naadtini jiu'ni rolijzni. Che gucbee xtadni naadtini jiu'ni, bihuii xtadnini te gunabni jiu'gani. ²⁹ Dxejc räjpni lo xtadni: “¡Bahuilaa! Agujc xchej cayunä dzuun lojlu, luxh rusobdiagä guiraa xtiidxlu, per nicla tej huält gajdlu guniidx nicla te dxibe' loä te gunä te lanij con rexamigwä. ³⁰ Luxh naj ni abidzujn xi'nlure, ni banijt xmeellu con regunadxab, xhoxh bagu'tlu te biser guro' te cayujnlu xlanijni.” ³¹ Dxejc räjp xtadni lojni: “Xi'nä, sugagajclu loä, luxh guiraa ni rapä najc xtenlu. ³² Niluxh naj riäjlpac jienu lanij, guibalaaznu, sa'csi bejtzlu ni benä xhigab agujt, agubi'ni naj, najcni si'cni gubansacni; gunijtni, naj abidxäjlni.”

16

Xcuent te ni rnibee loj remos

¹ Dxejc cayujyza Jesús stee cuent loj rexpejn pacni, räjpni:

—Guyu' te bejrajp ni guyu' lojni te ni rnibee loj rexmosni. Dxejc biääd reni badeedreni diidx lojni, räjpreni: “Bejn ni rnibee loj rexmoslu xhetlaadi cayujnni cagunijtni rexhixtenlu.” ² Dxejcti gurejdx xlamnini, räjpni lojni: “¿Xhi dee ni riejn diagä caniireni xcuentlu, ä? Naj guniidxlu loä cuent xte xtzuunlu, sa'csi dirulu chanuu guinibeelu lo rexmosä.” ³ Dxejc bejnnga bejn xhigab: “¿Xhichani'c gunä naj ni gudzucaj xlamä dzuun loä? Dina ga'pä yälrstijp te gunä dzuun lo niaa, luxh situjyä chanabä gojn. ⁴ Ananä xhini'c gunä te che dirunä ga'pä dzuun, sibejdx rexamigwä narä rolijzreni.” ⁵ Dxejcti gurejdxni tebgajreni rebejn ni nazäab lo xlamni, dxejc räjpni loj ni bidzunxgaa: “¿Lac nazääblu lo xlamä?” ⁶ Dxejc räjpni: “Nazäbä si'c te gayuu baril se't.” Dxejc räjpni lojni: “Basquejn, cua' guijtzre, bacuaa tiubitzuutis baril nazääblu lojni.” ⁷ Dxejc gunabdiidxni loj steeni, räjpni: “¿Luj a'? ¿Lac nazääblu lo xlamä?” Dxejc räjpni lojni: “Te gayuu dximro triuu.” Dxejc räjpzani: “Aree xquijtzlu; bacuaa tajtis dximro.” ⁸ Bidxeloj xlamni, gulä'pni xpala'n benguijdxga ni gunibee sa'csi bisinni bejnni recosga. Dxejc räjpza Jesús, rebejn ni di gumbee xtidx Dios nadxällajzreni lo rextzuunreni con sa'reni loj rebejn ni arumbee xtidx Dios.

⁹ 'Rniä lojtu, colquiil rexamiigwtu con reyäl'nasa'c ni räjpni loj guedxliujre, te che abaraj xhixtentu, sica' Diostu xhaguibaa cadre yu' rolijztu par tejpas.

¹⁰ 'Renani runsa'c dzuun lo te dzunbäz, sajca gunsa'cni dzuun lo te dzunro, luxh reni di gacdi gunsa'c dzuun lo te dzunbäz, di gacdiza gunsa'creni dzuun lo te dzunro. ¹¹ Ni'cni palga xhetlaadi cuaräl'näjtü reyäl'nasa'c xten guedxliuj, ¡xho guniidx Dios reyäl'nasa'c xtenni lojtu! ¹² Palga xhetlaadi cuaräl'näjtü xhixten bejn, ¿chu guniidx lojtu ni gac xtenpactu, ä?

¹³ 'Nicla tej mos di gacdi gunni dzuun lo tio'p lam, sa'csi sidxe'chni lo tejni, steeni sinälajzni o susobdiajpacni xtidx tejni, sibälazni steeni. Di gacdi gun bejn xtzun Dios lal ni sanälajztisni xcäl'nasa'cni.

¹⁴ Mbaj naj, refarisee, sa'csi rchaglazduxhrenei meel, cacuadiagdzu'tzreni xtiidxni, dxejc caguxhisnäjreni Jesús. ¹⁵ Dxejcti räjp Jesús lojreni:

—La'tu najctu bejn ni ruhuii rebejn lojtu, naareni bensacduxhtu, niluxh acanajn Dios xhi xhigab rujntu neñ lastootu. Sa'csi guiraa ni rchalojtu najc yäl_{nasacduxh}, guiraa ni'c rbixhlajz Diosni.

Xleii Moisés con xcäl_{rnibee} Dios

¹⁶ Räjpzani:

—Dxejli ni biäd Juan ni rutiobnis, guyu' xleii Moisés, näjza xtidx redade' ni gunii xtidx Dios. Cheni biäd Juan gusloj rsule' didxsa'c xcuent xcäl_{rnibee} Dios, ni'cni xhidajl bejn cagusutijp lajzni te jiu'reni loj yäl_{rnibeega}.

¹⁷ 'Per guyasiru nitloj xhaguibaa näjza guedxliuj quela di jialoj guiralii rediidx ni bacuaa Moisés; nicla tej diidxga di nitloj.

Rulii Jesús xcuent ruro'n sa' bejn

(Mt. 19:1-12; Mr. 10:1-12)

¹⁸ Räjpzani:

—Palga guro'n te bejn chääl_{ni}, dxejc guch_{naani} stee gunaa, rujnni dojl, luxh nani ruch_{naa} te gunaa ni abaro'n chääl_{nini}, niguiiga rujnzani dojl.

Te benrajp näjza Lázaro

¹⁹ Räjpzani:

—Guyu' te benrajp ni rchaglajz rajcwni ganax reladsacduxh, luxh guixe-guixee rujnni laniro. ²⁰ Guyu'za te benproob ni laa Lázaro ni rniab gojn, ricueni ro xlä' benrajpga, yu' guejdx ni rgaadz tiejxhni. ²¹ Rlajzni maläii xho gunni gauni nani rtejb loj xmex benrajpga, luxh direni gusaan. Dxejc rebä'cw siäd rilejp loj reguejdx ni rgaadz ni guidxa tiejxhni. ²² Guyu'ti te dxej gujt benproobga, biädläs rexangl Dios xaimni, huinärenini cadre yu' Abram xhaguibaa. Dxejcti näjza benrajpga gujt, huicua'tztirenini. ²³ Che yu'ni gabijl cadre rij guiraa rebendojl, ro'c cadejdni trabajwduxh. Dxejcti guläsni lojni, bahuiini zitduxh cadre suganäj Abram Lázaro. ²⁴ Dxejcti guredxaduxh benrajpga, räjpni lo Abram: “jxtadä Abram! Balazlajz narä, baxhal Lázaro guhuajdxni yejc bicue_{naani} nis te gusiäl_{yujni} ludxä, sa'csi ree cadedä trabajwduxh lo guiboo.” ²⁵ Luxh räjp Abram lojni: “Xi'nä, basaa lajzlu che gubaj_{nl} lo guedxliuj gojplu guira'ti xhixtenlu, luxh sigajcza Lázaro gudejdni trabajwduxh. Per naj ree casilajzni, naj luj cadejdlu trabajwduxh. ²⁶ Luxh di gacdi jääd Lázaro ro'c, sa'csi yu' te baladuxh ni rlia' sa'nu, te mase rlajz bejn guirii ree te tedreni lojlu ro'c, di gacdini. Di gacdiza ted reni yu' ro'c te jäädreni loonu.” ²⁷ Dxejcti räjp benrajpga lojni: “Rniabduxhä lojlu, xtadä, baxhallaa Lázaro chääni rolijz xtadä, ²⁸ sa'csi ro'c yu' gaii betzä, te chaliidxni laareni, te gusiechlajzreni, te di näjza laareni jäädreni ree cadre rdejd bejn trabajwduxh.” ²⁹ Dxejc räjp Abram lojni: “Arajpreni guijt_z cadre caj xleii Moisés näjza xtidx redade' ni gunii xtidx Dios, sugusobdiajgreni rediidxga.” ³⁰ Luxh benrajpga badzu' diidxre, räjpni lojni: “Gulii dad Abram, per palga chäs te bejn loj rebengut, chani lojreni, dxejc sii pet susiechlajzreni.” ³¹ Dxejc räjp Abram lojni: “Palga direni gusobdiajg xtidx to Moisés näjza xtidx redade' ni gunii xtidx Dios, dizareni chalilajz xtidx te bejn ni guiba_{nsac} loj rebengut.”

17

Riesgw jiajbni lo dojl

(Mt. 18:6-7, 21-22; Mr. 9:42)

¹ Räjp Jesús loj rexpejn_{pacni}:

—Siäädpac recos ni gun jiajb bejn lo dojl. Proobza bejn ni rujn riajb bejn lo dojl. ² Maaz guliibni te guij xten molin guejnni, gusal bejn ni lo nisdoo cadro jiätro quela gunni jiajb rexi'nä ni ahuililajz xtidxä. ³ ¡Col̄susiñ!

'Palga gun bejtzlu dojl lojlu, balijdxni. Palga gusiechlajzni, basiäjl diidx con laani. ⁴ Masque gajdz huält nen̄ teb dxej gunni dojl lojlu, palga jiädniini lojlu gajdz huält, naani: “Xhet laadi benä, basiäjl lajzlu”, basiäjl lajz con laani.

Bastioob xcäl̄rililaaznu

⁵ Gunii rexpejn̄pacni lo Jesús, räjpreni:

—Dad, baniidxru yäl̄rililajz loonu.

⁶ Dxejc räjp Jesús lojreni:

—Palga rajptu yäl̄rililajz, mase najcni si'cti te bedzbäz xten muxhtas, sajc gäbtu lo yagro rec: “Biliädxä' ro'c, guzuj galäii nisdoo”, susobdiajg yajgga xtiidxtu.

Ni riäj̄l gun te mos

⁷ Räjzp̄zani:

—¿Chu tejt̄u ni rajp te mos ni riga'n o ni rigajp rexquidxaani ni gäbni lojni che guibi'ni lo niaa: “Biu'ga, gurej lo mex te gaulu”? ⁸ Dini gäb si'c. Niluxh säjpn̄i lojni: “Bachaa xhajblu. Bejn xhi gauä, gudanäni loä. Che luux gauä, yä'a, dxejc sajc gauzalu, yäzalu.” ⁹ Dini gudeed xquixtios lo mosga sa'csi rujn̄ni recos ni gunibeeni sa'csi si'c riäj̄l gunni. ¹⁰ Sigajcza la'tu, che luux guntu guiraa redzuun ni guniä guntu, riäj̄l guiniitu lo Dios: “Najcnu mos ni xhet sajc̄di, nani riäj̄l jiennu, ni'ctis biennu.”

Basiajc Jesús tzuu bejn ni ral̄ tiejxh̄reni

¹¹ Lal̄ ni sasaj Jesús nez guedx Jerusalén, gudejdni loj región Samaria näjza región Galilee. ¹² Che biu'ni tej reguejdxga, huichagloj Jesús tzuu bejn ni rajc te yäl̄guijdx ni ral̄ tiejxh̄reni, niluxh zijtru guzujreni. ¹³ Dxejc rbedxa'reni räjpreni:

—Jesús, Dad, Mastr, balaslajz nuurnu.

¹⁴ Che bahuii Jesús lojreni, räjpni lojreni:

—Col̄chäj, te fii rebixhojz abiajct̄u.

Lal̄ ni sääreni, bia tiejxh̄reni. ¹⁵ Dxejc tejreni, che bahuiini abiajcn̄i, gubiguxuñni, cabedxa'ni calä'pni xpala'n Dios. ¹⁶ Bazuxhijbni nez loj Jesús, basajbni lojni lo yuj cagudeedni xquixtios loj Jesús. Luxh bejn̄re najc te beñzijt, te beñ Samaria. ¹⁷ Dxejcti räjp Jesús lojni:

—¿La et tzuudi najc reni biajc, ä? ¿Con sgaareni? ¹⁸ ¿La rutru gubi'di loä te guiliä'preni xpala'n Dios, xtebtis beñzijt̄re, ä?

¹⁹ Dxejc räjp Jesús loj bejn̄re:

—¡Huisulii, huij! Abiajclu sa'csi huililajzlu.

Xho guidzuj̄n xcäl̄rnibee Dios

(Mt. 24:23-28, 36-41)

²⁰ Dxejc, sa'csi agunabdiidx referisee loj Jesús guc guidzuj̄n xcäl̄rnibee Dios, badzu'ni diidxre, räjpni lojreni:

—Di xcäl̄rnibee Dios guidzuj̄n con seen ni sajc fiitu. ²¹ Diza bejn̄ naa: “Bahuii, aniree”, o “Anirec”, sa'csi abidzuj̄n xcäl̄rnibee Dios lojtu.

²² Dxejc räjp Jesús lo rexpejn̄pacni:

—Sidzuj̄n dxej r̄lajzgat̄u fiitu te dxej sa' ni chu che jiädsac Xi'n Dios ni gujc Niguii, luxh ditu fiini. ²³ Luxh siniireni lojtu: “Aniree”, o “Anirec”, per na'c chäät̄u, na'cza chanajltu reni rihuii. ²⁴ Sa'csi sigajc ni rien̄ che rdinya' te laad xhaguibaa hasta stelaad xhaguibaa, si'cza gac che jiälä narä, Xi'n Dios ni gujc Niguii, che gal̄ dxej guibi'ä. ²⁵ Luxh ganiddoo sidedä trabajwduxh, sa'csi

sibälaz reben̄ guedxliuj ni tre' naj narä. ²⁶ Si'cni gujc neñ redxej cheni gubajn toNoé, si'cza gac neñ redxej che jiälä narä, Xi'n Dios ni gujc Niguui. ²⁷ Neñ redxej ni gubajn toNoé gudajwreni, gu'reni, bachnaareni, badeedzareni xindxa'preni guchnaa bejn̄, bidzujnli dxej cheni biu' toNoé neñ barcwro ni bencheeni. Dxejc biääd nisguiduxh, gujt guiraa reben̄ dojl̄, guzääbreni lo nis. ²⁸ Sigajcza gujc neñ redxej ni gubajn toLo't: gudajwreni, gu'reni, gusiireni, bato'reni, gule'creni binij, bencheezareni rolijzreni. ²⁹ Niluxh cheni birii Lo't lo guedx Sodoma, biajb guiboo xhaguibaali, näjza te däj ni rudxuii, gunitlojti guiraa rebejn̄ dojl̄, huejcreni. ³⁰ Sigajcza gac neñ redxej cheni jiälä narä, Xi'n Dios ni gujc Niguui.

³¹ 'Dxejga, palga yu' chu niä'p yejc yu', diru gal̄di jiajt̄ni te chalääni rexhixt̄enni ni yuchee neñ yu'; palga yu' chu suga' nezjiät, di gal̄diruni guibi'ni rolijzni. ³² Col̄gusnaj lajztu xhi gujc chäǟl toLo't. ³³ Ni r̄lajz ga'p xcäl̄nabaj̄nni lo guedxliujre, sunijtnini, nani gunij̄t xcäl̄nabaj̄nni lo guedxliujre xcuent rextid̄xä, xcäl̄nabaj̄nni rajpni xhaguibaa.

³⁴ 'Rniä lojtu, guxhij̄nga ni jiälä lo tio'p reni naga' lo te da', chäǟ tejni, steeni jia'n. ³⁵ Lo tio'p gunaa ni cayo't, chäǟ tejni, steeni jia'n. ³⁶ Lo tio'p bejn̄ ni yu' lo niaa, chäǟ tejni, steeni jia'n.

³⁷ Che biejn̄ diajḡreni rediidxre, gunabdiidxreni lojni, räjp̄reni:

—Dad, ¿caro gac recosre?

Badzu' Jesús diidxre, räjp̄ni:

—Cadro naga' te mangut, ro'c rdojp̄ regolbetz.

18

Xcuent te gunabiuud con te juejz

¹ Bijza Jesús te cuent ni ruluii lojreni, te guisieedreni xho riajl̄ cuedxguiniabreni lo Dios lacuaa gac-huin lajzreni, ² räjp̄ni lojreni:

—Te guejdx guyu' te juejz ni di chalilajz xtid̄x Dios, dizani jiu rebejn̄.

³ Lagajc guejdxga guyu' te gunabiuud. Guixe-guixee rijni lo juejz, rniabni lojni gunni yäl̄guxhtis lo bejn̄ ni rdxe'ch lojni. ⁴ Balti dxej naadti juejzga gun yäl̄guxhtisga. Dxejcti bejn̄ni xhigab, naani: “Mase dina guidxebä Dios, dizana jiuä rebejn̄, ⁵ sa'csi gunabiuudre sanuutisni siäädni loä, abasiedliini narä, gunälis yäl̄guxhtis xten gunaaga, te di chanuutis riädgusieedni narä.”

⁶ Dxejc räjp̄ Jesús lojreni:

—Riejn̄ diajgtu xtid̄x juejzguijdxga, ⁷ Naj̄ ¿xho di Dios, ni najc hueen, gucuadiajg xtid̄x rexi'nni ni rbedx-rniab lojni dxej-yääl? Di gaclaa gunni yäl̄guxhtis xcuent reni aguleni. ⁸ Ni'cni rniä lojtu, sungajcni yäl̄guxhtis par laareni. Luxh che guibi' Xi'n Dios ni gujc Niguui, ¿la sidxäl̄ni bejn̄ ni rililajz xtiidxni lo guedxliuj?

Xcuent te farisee con te ni rusquijx impuest

⁹ Bij Jesús stee cuent ni ruluii loj rebejn̄ ni rluiisi najc beñsa'c, ni rchalo xhet sajcdi resabejn̄reni. Räjp̄ni:

¹⁰ —Tio'p dade' huij guidoo te huinabreni lo Dios. Tej ni najc farisee, steega najc te dade' ni rusquijx impuest. ¹¹ Sulii fariseega lāl̄ ni canabni lo Dios, räjp̄ni: “Dad, Dios, runidxä xquixtios lojlu sa'csi dina gacä si'c najc rebejn̄ ni najc gubaan, ni najc beñ nadiplajz, ni najc beñdojl̄, dizana gacä si'c najc bejn̄re ni rusquijx impuest. ¹² Rucua'nä tio'p huält neñ te xmaan, luxh rudedä te tzuu lo te beex loj guiraa ni runä gaan.” ¹³ Niluxh bejn̄ ni rusquijx impuest, zijtru suga'ni, dini guiliäs lojni xhaguibaa. Catiäl̄naatisni lastooni, caniini lo Dios, räjp̄ni: “Dad, Dios, ¡balaslajz narä, nacä te beñdojl̄!” ¹⁴ Rniliäpac

lojtu, ni rusquijx impuest rbaali lajzni gubi'ni rolijzni sa'csi badzucaj Dios rextoj_{ni}, niluxh di Dios nudzucaj rextoj_l be_n farisee. Sa'csi guiraa rebejn ni rlanj guiliä'p lagajc xpala'n_{ni}, susanxtiujy Diosreni, dxejc reni di rlanj guiliä'p lagajc xpala'nreni, siliä'p Dios xpala'nreni.

Benle' Jesús yejc rebiuxbäz
(Mt. 19:13-15; Mr. 10:13-16)

¹⁵ Yu'reni siäd_{nä} rexp_iuxbäzreni loj Jesús te guzujni naani yejcreni. Che bahuii rexpejn_{pacni} si'c, gusloj cadildiidxreni con rebejn te na'c jiäd_{nä}reni rebiuxe'. ¹⁶ Dxejc gurejdx Jesúsreni, räjpni lojreni:

—Colgusaan jääd rebiuxe' loä, na'c gudxo_jntureni, sa'csi xcäl_rnibee Dios najc xten reni najc nadolajz si'c rebiuxbäze're. ¹⁷ Rniliäpac lojtu, chutis ni rlanj jiu' lo xcäl_rnibee Dios nanab gusobdiajgreni xtidx Dios si'c rusobdiajg rebiuxe' xtidx xtadreni. Palga dini gun si'c, dini jiu' lo xcäl_rnibee Dios.

Te bi'n ni rajp xhidajl xhixtenni
(Mt. 19:16-30; Mr. 10:17-31)

¹⁸ Te bi'n ni rnibee gunabdiidx loj Jesús, räjpni:

—Dad, mastrsa'c, ¿xhini'c nanab gunä te xca'ä yäl_nabaj_n par tejpas?

¹⁹ Dxejc räjp Jesús lojni:

—¿Xhicuent rniilu narä: “Mastrsa'c”? Rutru najc_{di} be_nsa'c, xtebtis Dios.

²⁰ Anajnl_u xho najc remandamient ni caj lo xleii Moisés: “Na'c guesnäjl_u gunaa ni di gac chäällu; na'c ju'tlu bejn; na'c cuanlu, na'c guiniilu didx-xhi_i xcuent bejn; bazoob xtidx xtadlu, xnanlu, bahuiizareni.”

²¹ Dxejc räjp bi'nga lojni:

—Guiraa remandamiente rusobä cheni gucäli biuux.

²² Che biejn diajg Jesús xtiidxni, räjpni lojni:

—Tejtis cayääd_x gunlu. Bato' guiraa rexhixtenlu, gudisni loj rebejn ni xhet rajp_{di} dxejc sajplu xcäl_nasa'clu xhaguibaa. Dxejc gudanajl narä.

²³ Che biejn diajg bi'nga rediidxre, guc-huinduxh lajzni, sa'csi najcni te bejn ni rapduxh. ²⁴ Dxejc rdxelotjis Jesús lojni, guc-huinza lajzni räjpni:

—Naganduxh jiu' rebenrajp lo xcäl_rnibee Dios. ²⁵ Guyasiru ted te cameii ni' te guux lo ni jiu' rebenrajp lo xcäl_rnibee Dios.

²⁶ Reni biejn diajgni rediidxre, räjpreni:

—¿Chuxhni'c sajc laa lo dojl, palga si'c najcni?

²⁷ Dxejc räjp Jesús lojreni:

—Guira'ti ni di gacdi gun rebejn, guyasi rajc rujn Diosni.

²⁸ Dxejc räjp Pedr lojni:

—Dad, nuurnu abasa'nnu guiraa rexhixtenu te siopnalnu luj.

²⁹ Dxejc badzu' Jesús diidxre lojni, räjpni:

—Rniliäpac lojtu, chutis ni gusaan rolijzni näjza rex_cuzaj_{nni}, rebejtzni, chääl_{ni}, xi'nni xcuent xcäl_rnibee Dios, ³⁰ sica'ni xhiroobru lo guedxliujre, luxh sica'ni yäl_nabaj_n par tejpas.

Rusule' Jesús stehuält xho guetni
(Mt. 20:17-19; Mr. 10:32-34)

³¹ Gurejdx Jesús rexpejn_{pacni} te laad, te räjpni lojreni:

—Naj chonnu guedx Jerusalén cadre nanab soob rediidx nani bacuaa dade' ni gunii xtidx Dios galooli xcuent Xi'n Dios ni gujc Niguii. ³² Sutedrenini ladz_naa rebenzijt, suxhiznäjrenini, susacsírenini, sutiobxhejn_lireni lojni, ³³ luxh che luux quiinrenini, dxejc sugu'trenini, luxh ni riojn dxej siba_nsacni loj reben_gut.

³⁴Dxejc laareni direni niacbee rediidxre, dizareni gan xhini'c caniini, sa'csi najcreni diidx ni di gacdi gabeereni.

Rusiajc Jesús te beñ lotiä'p
(Mt. 20:29-34; Mr. 10:46-52)

³⁵Cheni sadzujñ Jesús te guejdx ni laa Jericó, sobga' te beñ lotiä'p ro' nezyuj, canabni gojn. ³⁶Che biejn diajgni cadejd xhidajl bejn lo nezyujga, gunabdiidx beñ lotiä'pga xhini'c cayajc. ³⁷Dxejc räjpreni:

—Jesús ni siäd Nazare't cadejdni nezga.

³⁸Dxejc guredxa'ni räjpni:

—jJesús, xi'n toDavid, balaslajz narä!

³⁹Rebejn ni nijd lojreni gudilñajreni beñ lotiä'pga te jiäu ro'ni, niluxh laani dipru guredxa'ni, räjpni:

—jXi'n toDavid, balaslajz narä!

⁴⁰Dxejc guzudxi Jesús ro'c, gunibeeni jiädnäreni bejnğa lojni. Che bidzujñni lojni, gunabdiidx Jesús lojni, räjpni:

⁴¹—¿Xhini'c rlajzlu gunnäá luj?

Badzu' beñ lotiä'pga diidxre, räjpni:

—Dad, rlazä jien löä.

⁴²Dxejc räjp Jesús lojni:

—jSujien balojlu! Abiajclu sa'csi huililajzlu.

⁴³Lagajc dxej, biengajc lojni, calä'pni xpala'n Dios, huinajlni Jesús. Luxh guiraa rebejn ni bahuii xhi guzajcni, gulä'pzareni xpala'n Dios.

19

Huij Jesús rolijz te bejn ni laa Zaqueo

¹Dxejc biu' Jesús guedx Jericó, sadejdzani guejdxga. ²Ro'c rbäjz te beñrapduxh, ni laa Zaqueo, ni rnibee lo reni rusquijx xcuent impuest. ³Rlajz Zaqueo fiini loj Jesús te gumbeenini, per digacdi fiini lojni sa'csi najcni te beñxhate', luxh xhidajl bejn siädsaj guideb gabi Jesús. ⁴Ni'c baxuñni gunijdni lojreni, huä'pni lo te yajgro ni suga' gajxh nez cadre ted Jesús te si'c saj fiini loj Jesús. ⁵Che gudejd Jesús nejzga, guläsni lojni jiaa, bahuiini cadre sobga' bejnre. Dxejc räjpni lojni:

—Zaqueo, basquejn biäjt ro'c, lagajc nadxej rlazä chajia'nä rolijzlu.

⁶Dxejcti biätguxuñ Zaqueo lo yajgga, rbalazduxhni huinäni Jesús rolijzni.

⁷Che bahuii guiraa rebejn xhi gujc, gusloj camojmreni, direni jiulajz, räjpreni:

—Jesús sajia'n rolijz te beñdojl.

⁸Dxejcti huisulii Zaqueo, räjpni loj Jesús:

—Bahuilare, Dad, gala' xhixtenä gudedä loj rebenproob; luxh palga yu' chu loj cua'ä xhixtenni con yälrusguee, sudzu'ä lojni tajp huält si'cti ni cua'ä.

⁹Räjp Jesús lojni:

—Lagajc nadxej gubicaj xtojllu näjza xtojlni reni rbäjz rolijzlu, sa'csi guliipac najclu te xagdoo toAbram. ¹⁰Pues Xi'n Dios ni gujc Niguui biädtil rebennojlni te guslaani rebejnğa ni gunijt neñ dojl.

Xcuent tzuu meel

¹¹Lañ ni cagucuadiajgreni xtidx Jesús, bijzani te cuent ni ruluii, sa'csi asiäddzujngajxhreni guedx Jerusalén, luxh laareni rujnreni xhigab sisloj guinibee Jesús si'ctisni guidzujñni guejdxga. ¹²Dxejc räjpni lojreni:

—Guyu' te bejn, beñrajpni, huijni te guejdx zijtro te gacni reii, dxejc guibisacni. ¹³Che gajdni guirii, gurejdxni tzuu xmosni, te badeedni lo tebgajreni te melpla't ni sacduxh, räjpni lojreni: “Colujñ dzuun con meelre

che guibisacäli.” Sä'tini. ¹⁴ Per reben lajdxni dipacreni guichagljajz bejnga, ni'c baxhalreni gäi bejn te saye'tzreni: “Di rlajzdinu gacni xreinu.” ¹⁵ Luxh empac gujcnı reii, dxejc gubisacni lajdxni. Che bidzujñni gurejdxni rexmosni ni badeedni meel cua'reni, te gacbeeni lac bejn teygareni gaan. ¹⁶ Ni bidzujñ ganid räjpni lojni: “Dad, xmeellu bejn gaan stzuu meel.” ¹⁷ Dxejc räjp reii lojni: “Hueenca, luj najclu te mossa'c, sa'csi laaca bejnlu dzuun lo te dzunbäz, naj sunidxä guinibeelu loj tzuu guejdx.” ¹⁸ Bidzujñ stee mos lojni, räjpni: “Dad, xmeellu bejn gaan gäi meel.” ¹⁹ Dxejcti räjpni lojni: “Luj guinibeelu loj gäi guejdx.” ²⁰ Bidzujñti stee mos lojni, räjpni: “Dad, aree xmeellu, guluchedzu'tzäni neñ te baii ²¹ sa'csi bidxebä guejblu, sa'csi najc guejblu te beñ nadiplajz, rutojp guejblu cadre di guejblu nuzuj, luxh rliäs guejblu cose'ch cadre di guejblu nibe'c.” ²² Dxejcti räjp reii lojni: “iMosguijdx! lagajc ro'lu birii diidx ni gunälu yälguxhtis. Palga najnlu nacä te beñ nadiplajz, najnlu rutopä cadre dina nusuä, najnlu rliäsä cose'ch cadre dina nibe'cä, ²³ ¿xhicuent dilu nisa'n xmelä neñ te bancw te che nibi'ä nica'a xmelä nägajc xi'n meelga?” ²⁴ Dxejc räjpni loj reni suga' ro'c: “Colgudzucaj meelga lojni, colgudeedni loj ni rajp tzuu meel.” ²⁵ Laareni räjpreni: “Dad, per laani arajpni tzuu meel.” ²⁶ Dxejc badzu' reii diidxre lojreni, räjpni: “Ni'cni rniä, reni rajp, sica'rureni, niluxh reni di ga'p lojreni sibicaj guiraa recosbäz ni rajpreni. ²⁷ Luxh xcuent reni rdxe'ch loä, ni di rlajz niacä reii lojreni, coltanäreni ree, colgugu'treni nez loä.”

Che biu' Jesús guedx Jerusalén

(Mt. 21:1-11; Mr. 11:1-11; Jn. 12:12-19)

²⁸ Che gulujx guniini guiraa rediidxre, huinuuni xnejzni, sääni nez lo guejdx Jerusalén. ²⁹ Che asadzunğajxhni reguejdx ni laa Betfagé näjza Betania, gajxh lo dajn ni laa Oliib, baxhalni tio'p rexpejnıpacni, ³⁰ räjpni lojreni:

—Colchäj lo guejdx' ni suga' lad rec. Che guidzujñtu, guidxältu caduu te bur huin ni gajd bejn cuib. Colguxhečni, coltanäni ree. ³¹ Palga yu' chu guini-abdiidx lojtu: “¿Xhicuent caguxhectuni?” colye'tz lojni: “Dad caquiinnini.”

³² Sä'ti rexpejnıpacni nani baxhalni, bidxälreni manga sigajctisni räjp Jesús. ³³ Cheni caguxhecreni bure'ga, rexpaxhuan bure'ga räjp lojreni:

—¿Xhicuent caguxhectu bure'ga, ä?

³⁴ Dxejc badzu'reni diidxre, räjpreni:

—Sa'csi caquiin Dadni.

³⁵ Sas huinäreni bure'ga loj Jesús, gudixhreni xhajbreni dejtznı, te gubijb Jesúsni. ³⁶ Guideb cadre gudejd Jesús gudixhreni xhajbreni lo nezyuj cadre tedni. ³⁷ Cheni ameer guidzujñni bajaad xten dan Oliib, gusloj cabaa lajz guiraa rebejn, rbedxa'lireni calä'preni xpala'n Dios sa'csi bahuiireni guiraa remilagwr ni bejnı. ³⁸ Räjpreni:

Chicbaa reii ni siäd xcuent Xtadnu Dios te guinibeeni loonu.

Sucuedxilajz guiraa reni yu' guibaa, chä'p xpala'n Dios xhaguibaali.

³⁹ Dxejc gäi refarisee ni suga' galäi rebejn, räjpreni loj Jesús:

—Mastr, gudidxa' lo rebejn ni siädnajllu te na'cru guiniireni si'c.

⁴⁰ Dxejc Jesús räjp lojreni:

—Rniliä lojtu, palga redee gusäu ro'reni, sixedxa' reguijre.

⁴¹ Che bidzujñni gajxh, che bahuiini guedx Jerusalén, biin Jesús xcuent guejdxga, ⁴² räjpni:

—iMaläi gacbeelu, masque neñ redxejre, xhini'c sajc guniidx yälrbedxilajz lojlu! Per naj naga'tzni, luxh digacdi filu lojni. ⁴³ Sidzujñ dxejga lojlu, cheni jiäd reni rdxe'ch lojlu sujnreni si'c te guralyuj guideb gabilu, nez lojlu sigajc

nez dejtzu sisiujreni. ⁴⁴ Susäl'ta'reni luj lo yujli. Sugu'treni rebejn ni rbäjz ro'c, luxh nicla gusaanreni cuib te guij yejc sa'ni sa'csi dilu niembee dxej ni biääd Dios biädhuilu.

Rusia Jesús nen guidoro

(Mt. 21:12-17; Mr. 11:15-19; Jn. 2:13-22)

⁴⁵ Dxejcti biu' Jesús nen guidoro, guslojni cabääni rebejn ni caguto' näjza reni casii. ⁴⁶ Dxejc räjpni lojreni:

—Loj rexquijtz Dios caj rediidxre: “Rolizä sajc te yu' cadro jädnabtu lo Dios”, niluxh la'tu abejntuni si'c te biliää xte gubaan.

⁴⁷ Guixe-guixee caguluii Jesús nen guidoro, luxh reni rnibee loj rebixhojz näjza rebejn ni ruluii leii, näjza reben'gool xte guejdxga caguilreni mood te ju'trenini, ⁴⁸ luxh direni nidxäjl xho niujnrenini sa'csi guiraa rebejn cacuadiagdu'tzreni xtiidxni.

20

Xcälrnibee Jesús

(Mt. 21:23-27; Mr. 11:27-33)

¹ Te dxej suga' Jesús nen guidoro, caguluiini rebejn, cagusule'zani diidx xcuent xho guibicaj xtojreni, che bidzujn reni rnibee loj rebixhojz näjza rebejn ni ruluii leii näjza reben'gool, ² räjpreni lojni:

—¿Xhi yälrnibee rujnlu recosre? ¿Chu baniidx yälrnibeega lojlu?

³ Dxejcti räjp Jesús lojreni:

—Narä sigajcza gunä te yäl'gunabdiidx lojtu, col'gudzu' diidxre loä, ⁴ ¿chuni'c baxhal Juan te gutiobnisni rebejn? ¿La Dios o la rebejn, ä?

⁵ Niluxh laareni guslojreni canabdiidx lo sa'reni, räjpreni:

—¿Xhichani'c jie'tznu? Palga jie'tznu Dios baxhalni, dxejc naani loonu: “¿Xhixhcuent ditu ninilajz xtiidxni?” ⁶ Palga jie'tznu: “Rebejn baxhalni”, guiraa rebejn sucuaa guij yejcnu, ju'tlireni nuurnu sa'csi laareni rujnpacreni xhigab gunii Juan xtidx Dios.

⁷ Dxejc badzu'reni diidxre, räjpreni:

—Dinu guidon chuni'c baxhal Juan te biäd'tiobnisni.

⁸ Dxejc räjp Jesús lojreni:

—Dizana guiniä xhi yälrnibee rapä te runä recosre.

Xcuent remosgujdx

(Mt. 21:33-44; Mr. 12:1-11)

⁹ Dxejc gusloj canii Jesús loj rebejn, bijni cuentre lojreni, räjpni:

—Guyu' te bejn bazuj yaguub lo xyujni. Dxejc badedlaanini lo gaii bejn chääreni meed, sä'tnini zijt, gucladuxhni ro'c. ¹⁰ Che bidzujn dxej ni guidojp cose'ch, baxhalni te xmosni sanab cose'ch ni riäj' xca'ni. Per laareni gudi-jnreni mosga, xhetliidi badeedreni chanäni lo xpaxhuaan yujga. ¹¹ Dxejcti baxhalni stee mos lojreni. Dxejc sigajcza gudil'näjrenini, gudi-jnrenini, luxh xhetza badeeddireni lojni, ganaxni gubi'ni lo xlamni. ¹² Dxejcti baxhalni ni riojn mos lojreni, per sigajcza gudinduxhrenini, barilaagwrenini.

¹³ 'Dxejc bejn baxhuaanga xhigab, naani: “¿Xhichani'c gunä? Suxhalä xi'nä ni sanälazä; che fiireni lojni, pet siureni xtiidxni.” ¹⁴ Dxejc che bahuii reni go'n-meed lo xi'nni, dxejc räjpreni lo sa'reni: “Laa deeni gac xtenni reyujre. Do'o guigu'tnuni te nuurnu xca'nu yujre gacni xtennu.” ¹⁵ Dxejcti barilaagwrenini lo yujga, sas bagu'trenini.

Dxejc gunabdiidx Jesús lojreni, räjpni:

—¿Xhichani'c gunnäj xpaxhuaan yujga reben guidxre, ä? ¹⁶ Sidzujñni, sugu'ni guiraa reni cayujn dzun-meed lo yujga, dxejc sudeedni yujga lo garenca bejn.

Che biejn diajgreni rediidxre, räjpreni:

—¡Na'c gusaan Dios gacni si'c!

¹⁷ Bahuii Jesús lojreni, dxejc räjpni:

—¿Xhixhni'c caj lo guijtz ni bacuaa redade' ni gunii xtidx Dios galoo? Ro'c cajni:

Guij nani guläcaj renani runchee yu',

ni'c agujc guisa'c ni guzuj galoo.

¹⁸ Chutis ni jiajb yejc guijga, sianduxhni, per nani jiajb guijga yejcn siujy-pacni, li däj gacni.

Xcuent reimpuest

(Mt. 21:45-46; 22:15-22; Mr. 12:12-17)

¹⁹ Reni rnibee loj rebixhojz, näjza reni ruluii leii rlajzreni guiniaazreni Jesús lagajc orga, sa'csi gucbeerreni lojreni gunii Jesús cuentre, luxh xhet bejndireni sa'csi rdxejbreni rebejn. ²⁰ Dxejc cagula'tztisrenini, baxhalreni gaii bejn te gunsireni si'c ni najczeni bendxan, te gucuadiajgreni xtiidxni don gaxäjssi guiga'ni lo te diidx te guteedrenini lo yälguxhtis, yälrnibee xte gubernadoor. ²¹ Dxejc gunabdiidxreni lojni, räjpreni:

—Dad, Mastr, nadonnu laaca rnii guejblu, laaca ruluii guejblu, luxh di guejblu fixгаа la yu' chu najc bejn, ruluisa'c guejblu xnez lo Dios. ²² Gunilaa loonu, ¿la laaca guidiixnu reimpuest loj xcubieer César o la xhet laadini, ä?

²³ Sas gucbegajc Jesús cayujnsireni yälgunabdiidxga, dxejc räjpni lojreni:

—¿Xhicuent runnäjtu narä scree? ²⁴ Baluii loä te xmeeltu. ¿Chucha yejc caj lojni, chucha laj caj lojni?

Dxejc räjpreni:

—Xten César.

²⁵ Dxejc räjpni lojreni:

—Coldeed lo César nani najc xten César; coldeedza lo Dios nani najc xten Dios.

²⁶ Luxh direni niujn gaan niga'ni loj nicla te diidx ni guniini nez loj rebejn. Rdxelojtisreni lo rextiidxni, biäuti ro'reni, guzudxireni.

Rniabdiidxreni xcuent yälrbansac lo rebengut

(Mt. 22:23-33; Mr. 12:18-27)

²⁷ Dxejc huij gaii resaduceos huihuiireni loj Jesús. Di resaduceos chalilajz rbansac bejn lo rebengut. Ni'cni gunabdiidxreni loj Jesús, ²⁸ räjpreni:

—Dad, Mastr, basa'n Moisés guijtz loonu, lojga caj: “Palga guet te bejn, gusaanni chäälni ruti xi'nni, nanabpac xca' bejtzni gunaaga te chu xi'nni con laani xcuent tobejtzni.” ²⁹ Guyu' gajdz niguii, bejtz najczeni. Sas cua' niguigalooga chäälni. Che gujtni ruti xi'nni. ³⁰ Dxejcti cua' ni rojpga gunaaga.

Che gujtni, rutiza xi'nni. ³¹ Sigajcza guzajc ni riojnga. Si'cza guläsnäj gunaaga guigajdzreni. Guiraareni gujt, nicla tejreni di xi'nreni niu'. ³² Dxejcti näj gunaaga gujt. ³³ Guigajdzreni guläsnäjreni gunaare, ni'cni, che guibansacreni lo rebengut, ¿chu chääl gacni, ä?

³⁴ Dxejc räjp Jesús lojreni:

—Lo guedxliujre ruchnaa rebejn, rudeedzarenini xindxa'preni ruchnaa.

³⁵ Niluxh rebejn ni agule Dios te chääreni xhaguibaa, näjza te guibansacreni loj rebengut, di reni'c guchnaa, dizarenini gudeed xindxa'preni guchnaa, ³⁶ sa'csi diru gac guetreni, anajczeni si'c najc rexangl Dios. Laareni najc xi'n Dios sa'csi abaspansac Diosreni. ³⁷ Moisésli basule' xcuent ni rbansac reben loj rebengut che bacuaani diidx xcuent yajg ni gurebajl. Ro'c gurejdxni Dios

räjpni: “Xtios Abram, Xtios Isaac, näjza Xtios Jacob”, ni'cni nabajnpacreni lo Dios. ³⁸ Sa'csi di Dios gac Xtios rebengut; najcni Xtios rebejn ni nabajn par tejpas, sa'csi par laani guiraa rebejn nabajn.

³⁹ Dxejc gaii reni ruluii leii badzu'reni diidxre, räjpreni lojni:
—Mastr, laaca guniilu.

⁴⁰ Sa'csi dirureni niajx niniabdiidxrureni lojni.

Chu xi'n najc Crist

(Mt. 22:41-46; Mr. 12:35-37)

⁴¹ Dxejcti räjp Jesús lojreni:

—¿Xho mood rniireni Crist najc xi'n toDavid, ä? ⁴² Ni lagajc toDavid bacuaa lo reguijtz ni laa reSalmo:

Dad Dios räjp lo Xtadä:

⁴³ “Gurej xladbeä cheni guidzujnli dxej ni gudzugä guiraa ni rdxe'ch lojlu te gachebereni luj rnibeelu guira'ti.”

⁴⁴ ¿Xho mood gacni xi'nni palga rnii toDavid lojni “Dad”?

Rucuaquij Jesús reni ruluii leii

(Mt. 23:1-36; Mr. 12:38-40; Lc. 11:37-54)

⁴⁵ Guiraa rebejn cagucuaadiajg che räjp Jesús loj rexpejnpacni:

⁴⁶ —Colyajp cuidaad reni ruluii leii, sa'csi rdxagljazreni rajcwreni lajd siool, rlajzreni saru guinii guiraa rebejn “xchan” lojreni, rlajzreni jiu bejnreni nez loguii, rlajzreni cuereni lo reyagxhilsa'c nen reguidobäz, näjza cadre rajc lanij. ⁴⁷ Rudzucajzaren rehxixten regunabiuud, dxejc rojreni rele' siolduxh che rniabreni lo Dios te fii rebejn, te naa bejn najczeni bendxan, luxh lojreni suxhal Dios te castigwroru.

21

Gojn xten te gunabiuud

(Mr. 12:41-44)

¹ Nen guidoro bahuii Jesús cagusäl rebenrajp gojn nen te guiyn cadre rdojp gojn. ² Bahuiizani lo te gunabiuud, lacti proobni. Basälni xcojnni nen guijnga, tio'ptis melbäz basälni. ³ Dxejc räjp Jesús:

—Rniliäpac lojtu, gunabiuud proobga basälruni loj guiraa reni casäl gojn, ⁴ sa'csi guiraa reddec ni cagusäl xcojnni casälreni tudxe'nsi xmeelreni, niluxh gunaare loj xcälproobni, basälni guiragajc ni rajpni te jio' xhi gauni.

Räjp Jesús sibijl guidoro

(Mt. 24:1-2; Mr. 13:1-2)

⁵ Yu' reni cayujy diidx xcuent guidoro, räjpreni:

—Lacti sacruduxh rienni sa'csi guisa'c naccheeni, suchenäjzani xhidajl recossa'c ni badeed bejn si'c gojn.

Dxejc gunii Jesús lojreni, räjpni:

⁶ —Sidzujn dxej sibijl guiralii ni cahuiitu, nicla tej guij di jia'n yejc sa'ni, guiragajcni sibijl.

Reseen ni chu che nitloj guedxliuj

(Mt. 24:3-28; Mr. 13:3-23)

⁷ Dxejc gunabdiidx rexpejnpacni lojni, räjpreni:

—Dad, Mastr, ¿guc gacni? ¿Xhi seen chu che gac recosga?

⁸ Räjp Jesús lojreni:

—iColsusin te na'c gusgueereni la'tu! Sa'csi xhidajl reni jiääd sinii: “Narä nacä Crist”, o “Asiädgajxh redxej che jiäädni”, per na'c chalilajztu xtiidxreni,

na'cza chanajltureni. ⁹ Luxh che jiejn diajgtu cayajc guer cadilnäj sa' bejn, na'c guidxejbtu, sa'csi ganid recosga gac, luxh gad galđi nitloj guedxliuj.

¹⁰ Dxejc sanuu cayäjpni lojreni:

—Säjs te nación, sucuanäj stee nación, näjza te ladx bejn sucuanäj stee lajdx bejn. ¹¹ Sajcza xuro, su' gubijn, su'za yälguijdx nez ree nez rec. Luxh xhaguibaali sien guiraloj ni ruchejb näjza seenro.

¹² 'Luxh ganid gac recosre, siniaazreni la'tu, sirinajlreni la'tu, suteedreni la'tu trabajw. Suteedreni la'tu lo reben guidobäz, susälzarenı la'tu nen latzguıib, sinäzarenı la'tu nez loj reıi näjza gubernadoor sa'csi rinälajztu xtidxä.

¹³ Luxh guiraa dee sajctu te gac gusule'tu xtidxä lojreni. ¹⁴ Na'c gunxgaatu xhigab nen lastootu xhini'c guiniitu lojreni, ¹⁵ sa'csi narä sunidxä diidx guiniitu, sunidxäza yälınajn lojtu te digac gudzu'reni diidx lojtu niclaza gacdi guiniyajreni xtiidxtu. ¹⁶ Näjza rex cuzajntu sibire lojtu, suto'reni la'tu, sigajcza rebejtztu, resa'tu, rexamiigwtu, luxh yu'tu sugu'treni. ¹⁷ Guiraa rebejn guedxliuj sibälaz la'tu sa'csi rinälajztu xtidxä. ¹⁸ Niluxh ni'cla tej xquidxejctu di nitloj. ¹⁹ Luxh palga sutijptis lajztu, sajptu yälınabajn par tejpas.

²⁰ 'Che fiitu tre' xhidajl soldaad guideb gabi guedx Jerusalén colyabee abidzujn dxej ni guibijlni. ²¹ Dxejc reni yu' guedx Judea, nanab guxunreni chacuatztlojreni nen redajn; reni yu' guedx Jerusalén, nanab jiunejzreni ro'c; reni suga' lo nıaa, na'c guibi'reni lo guejdxga, ²² sa'csi nen redxejga sujn Dios fis lo guejdxga te soob rediidx ni caj lo reguijtz xten Dios. ²³ Probe'za regunaa ni nuu báz nen redxejga, näjza regunaa ni ca' báz, sa'csi su' yälhuınduxh lo guedxliuj, näjza fis ni gun Dios loj rebejnğa. ²⁴ Yu'reni guet lo guer, yu'zarenı chää pres, sijreni balti guedxzıjt. Dxejc rebenzıjt sinıbee guedx Jerusalén che guıza'lı redxej ni gusaan Dios guıııbee rebejn ni di gac xpejn Israel.

Cheni jiäd Xi'n Nıguıı

(Mt. 24:29-35, 42-44; Mr. 13:24-37)

²⁵ Räjpzani:

—Dxejc su' seen lo gubijdx näjza lo bäıı, näjza loj rebajle' ni yu' xhaguıbaa. Luxh lo renacion guedxliuj su' rebejn yärsia', di jıen xhi gunreni, sidxebduxhreni sa'csi siejn diajgreni chubeduxh lo nısdoo, säsduxh nis ni räjs lo nısdoo. ²⁶ Sitiol rebejn xcuent yälrdxebduxh che gunreni xhigab xhıcharuni'c gac lo guedxliuj, sa'csi näj guideb guıbaa sinıbsejs. ²⁷ Dxejcti suhıııreni lo Xi'n Dios ni gujc Nıguıı, sıädni lo te za guideb xcälrnıbeeni, näjza yälrdımbıchaduxh. ²⁸ Che guıslol gac recosre, colsutıjp lajztu, colguıııas yejctu, colguıbalajz sa'csi asadzujn dxej gusılajztu.

²⁹ Gıniızani stee cuent lojreni, räjpnı:

—ıColhııı lo yagııgw näjza lo guiraa reyajg! ³⁰ Che fiitu acabääni be'n, colyabee lagajc la'tu, abıdzunğajxh bäıı nısgııj. ³¹ Sigajcza che fiitu agusloj cayajc recosre, colyabee sıädıdzujn xcälrnıbee Dios.

³² 'Rnılıäpac lojtu, guiraa recosre sajcz ansde guet rebejn ni yu' näj. ³³ Guıbaa näjza guedxliuj sınitloj, rextıdxä dıni nitloj.

³⁴ 'ıColsusın lagajc la'tu! Na'c gusaantu cha lajztu yälrausa'c, yälrä', yälga'ptu xhıxtentı, dxejc dıtu gacbee che bıdzujn dxejga. ³⁵ Sa'csi sı'c sıdzujn dxejga loj guiraa reben guedxliuj. ³⁶ Colsusın, colbejdx, colguıııabtı lo Dios, te gac laatu lo guıra'tı ni gac, gacza suutu nez loj Xi'n Dios ni gujc Nıguıı.

³⁷ Rdxee rulııı Jesús nen guıdoro dxejc guxhıjn sıajıa'nnı yejcz dan Olııı. ³⁸ Rsilru ristıe rebejn te rdzujnreni lo Jesús nen guıdoro casob rsıl, te gucuadıajgreni rextııdxnı.

22

Ria'nreni diidx xho guiniaazreni Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Siäddzungajxh dxe lanij che rajwreni yätxtiil ni di säguuj, laaza lanijga pascw. ² Dxejc reni rnibee loj rebixhojz näjza rebejn ni ruluii leii caguiilreni xho gunreni te ju'treni Jesús, sa'csi rdxejbreni rebeñguejdx.

³ Dxejc biu' beñdxab lastoo Judas ni laaza Iscariote, ni najc tej retzubi-tio'p xpejn pacni. ⁴ Dee huininäjni dade' ni rnibee loj rebixhojz näjza loj reni rnibee rexcuxhtis guidoo. Guninäj Judasreni xho gunni te guteedni Jesús ladzñaareni. ⁵ Dxejc bibalajzreni, bia'nreni diidx gudeedreni meel lojni. ⁶ Cuäjbtı Judas, dxejcni guslojni caguiilni xho gunni guteedni Jesús ladzñaareni che rut bejñdi suga'.

Xchej xten Dad Jesús

(Mt. 26:17-29; Mr. 14:12-25; Jn. 13:21-30; 1Co. 11:23-26)

⁷ Bidzujñ dxe lanij che rajwreni yätxtiil ni di säguuj, che rugu'tzarenı te xiil si'c ni caj lo xleii to Moisés. ⁸ Dxejc baxhal Jesús Pedr näjza Juan, räjpni lojreni: —Colchayejn xchej xten pascw te guidaununi.

⁹ Dxejc laareni gunabdiidxreni lojni, räjpreni:

—¿Caro rıajzlu choyennuni?

¹⁰ Räjp Jesús lojreni:

—Cheni jiu'tu lo guejdx, sidxaagtu te dade' ni nuu te re' nis. Colchanajlni, coljiu' rolıjz bejn cadre jiu'ni laani. ¹¹ Dxejc colye'tz lo bejn ni najc rolıjzni ro'c: “Si'c naj Dad Mastr: ¿Con yu' cadre sajc gauxchenää rexpennä naj pascw?”

¹² Dxejc guluiini lojtu te yu' ni sojb jıaa yejc stee yu'. Asuchexgaa yu'ga. Ro'c colyejn xhi guidaunu.

¹³ Sä'tireni. Si'ctis ni räjp Jesús lojreni, si'cpac bidxälreni. Dxejc bejnreni xchej xte lanij pascw gaureni.

¹⁴ Che bidzujñ or, gurenäj Jesús rexpejn pacni lo mex. ¹⁵ Dxejc räjpni lojreni: —Guyuduxhä gaan gaunääpactu xchej xten pascw ansde tedä trabajwduxh. ¹⁶ Sa'csi rniä lojtu, diruna gaunää la'tu pascw cheni guidzujñli dxej ni gacni lo xcälrnibee Dios.

¹⁷ Dxejc cua'ni te co'p, badeedni xquixtios lo Dios, räjpni:

—Colyá' dee, colgudeedni lo sa'tu. ¹⁸ Sa'csi rniä lojtu, diruna yá'ä nis ni rii yejc uub stehuält cheni guidzujñli xcälrnibee Dios.

¹⁹ Dxejcti cua'ni yätxtiil, badeedni xquixtios loj Dios, gula'nini, gudisnini lojreni, räjpni:

—Dee najc si'c tiexhä ni gudedä ju'treni xcuenttu. Colyejn screeza te guinalajztu narä.

²⁰ Si'cza bennäjni co'p che gulujx gudajwreni, räjpni lojreni:

—Ni yu' neñ co'p najc si'c xtienä ni guixe' che ju'treni narä xcuenttu te si'c jiu' didxcoob ni jia'n Dios con rebejn ni aguleni.

²¹ 'Per bahuılaare, bejn ni guto' narä sobganäj narä lo mexre. ²² Guliipacni, Xi'n Dios ni gujc Niguıi sinuu tedni loj nezyuj ni abaluii Dios lojni. Luxh proobza bejn ni guto' narä.

²³ Dxejc gusloj canabdiidxreni lo sa'reni, ¿chuchani'c gunni?

Cayejyreni chuni'c najc beñroru

²⁴ Sas gusloj cayejyreni, don chuni'c guibee gac beñro lojreni.

²⁵ Dxejcti räjp Jesús lojreni:

—Rereıi ni rnibee lajdx bejn ni digac xpejn Israel, rnibeereni lojreni astoo xtenpacreni najc reguejdxga. Luxh rebeñguejdxga rniı lacti hueen najc

reŕeiiga. ²⁶ Per la'tu na'c gactu si'c. Nani najc beŕgoolru lojtu, ni'c riäjĵ gacni si'c najc ni huinru lojtu. Luxh nani rnibee riäjĵ gacni si'c mos. ²⁷ ¿Chuni'c sajcru lo bejn? ¿La bejn ni rbej lo mex te gauni o la ni ruteed xhi gaureni lo mex? ¿La xhet sajcdiru bejn ni sojb lo mex, ä? Niluxh narä yu'ä lojtu si'c ni ruteed xhi gauni.

²⁸ 'La'tu najctu ni gusunäj narä guideb ni gudedä reŕabajw ni gudedä. ²⁹ Ni'cni narä runidxä yälrnibee lojtu sigajc ni baniidx xtad yälrnibee loä, ³⁰ te gautu, yätu lo xmexä xhaguibaa, te cuezatu lo yagxhil cadre guntu yälguxhtis loj rexpejn guitzubitio'p rexagdo Israel.

Räpxgaa Jesús di Pedr guicäjp numbeeni
(Mt. 26:31-35; Mr. 14:27-31; Jn. 13:36-38)

³¹ Räjpedr Jesús loj Simón:

—Simón, Simón, agunab beŕdxab ni laa Satanás luj te gusniibni luj si'c rusniib bejn xob te jiani. ³² Narä agunabä lo Dios xcuentlu te na'c jiäädxcälirililajzlu. Luxh luj che gusiejch lajzlu, guibi'lu, bastioob lastoo resa'lu.

³³ Räjpedr Simón lojni:

—Dad, narä sirinalälu; mase gusäureni luj latzguuib, näjza narä siäunäälu; mase ju'treni luj, näjza narä setnäälu.

³⁴ Dxejcti räjpedr Jesús loj Simón:

—Pedr, rniä lojlu, nicla gajd guidgail cuedxa' nadxej niluxh luj alaräjplu choŕli huält, dipaclu gumbee narä.

Nanab soob rediidx ni bacuaareni xcuent Jesús

³⁵ Dxejcti gunabdiidx Jesús lojreni räjpedr:

—Che ganaxtu baxhalä la'tu, xhet bolsdi sanätu, nicla carteerdi, niclaza stee gura'chdi, ¿la yu' xhi biquiintu, xhi biäädxc lojtu, ä?

Dxejcti räjpedr:

—Xheti.

³⁶ Dxejcti räjpedr lojreni:

—Luxh naj rniä lojtu, ni rajp bols, suchanänini; sigajcza carteer. Luxh ni di ga'p espad, guto'ni xchamarni te siini tejni. ³⁷ Sa'csi rniä lojtu, sisiojb rediidx ni caj lo requijtz Dios xcuentä, cadre caj: “Bigabnäjni reben latsiaj.” Guiraa ni caj lo reguijtz xten Dios xcuentä nanab soobpacni.

³⁸ Dxejcti räjpedr lojni:

—Dad, aree tio'p espad.

Dxejcti räjpedr lojreni:

—Sajl reni'c.

Rbedx-rniab Jesús loj Dios

(Mt. 26:36-46; Mr. 14:32-42)

³⁹ Dxejcti birii Jesús, si'cni rujnpacni, sääni nez dajn ni laa Oliib. Dxejcti sanajl rexpejnpacni. ⁴⁰ Che bidzujpni ro'c, räjpedr lojreni:

—Colcuejdx, colnab lo Dios te na'c jiajbtu lo dojl.

⁴¹ Dxejcti gubicaj Jesús lojreni, huijni te lajt zite' cadre suga'reni, si'cti cadre rdzujn te guij che rucuaanini. Ro'c bazuxhijbni, gurejdx-gunabni lo Dios,

⁴² räjpedr:

—Xtadä, palga rlajzlu, basläa narä loj trabajwduxhre. Niluxh na'c gacni si'c ni rlazä narä. Bejn si'cni rlajzlu gunlu.

⁴³ Dxejcti biricaj te xangl Dios lojni te badeedni yälrutiplajzni. ⁴⁴ Laŕni cadejndi trabajwduxh, cayac-huinuxh lajzni, cabedx-canabrui lo Dios. Guzunisluni gusloj catejb lo yuj biniduxh si'c rejn lojni.

⁴⁵ Cheni huisuni, gulujx gurejdx-gunabni lo Dios, huijni cadre suga' rexpejn_{pacni}. Ro'c bidxäl_{nireni} nagayejs guiraareni sa'csi cayac-huin lajzreni.

⁴⁶ Dxejc räjpni lojreni:

—¿Xhicuent nagayejstu? ¡Colchastie! ¡Colnab lo Dios te na'c jiajbtu lo dojl!

Che gunaazreni Jesús

(Mt. 26:47-56; Mr. 14:43-50; Jn. 18:2-11)

⁴⁷ La_l ni canii Jesús lojreni, bidzuj_n xhidaj_l bejn. Tej rexpejn_{pacni} ni laa Judas, nijdni nez loj rebejn_{ga}. Dxejcti gubigni loj Jesús, te bachagro'ni loj Jesús. ⁴⁸ Dxejc räjp Jesús lojni:

—Judas, ¿la con te yäl_{ruchagro'} rutedlu Xi'n Dios ni gujc Niguii ladz_{naa} rebejn_{re}, ä?

⁴⁹ Che bahuii reni suganäj Jesús xhini'c cayajc ro'c, gunabdiid_{xreni} loj Jesús, räjpreni:

—Dad, ¿la sixa'tnu yejcreni con spaad, ä?

⁵⁰ Sas tej rexpejn Jesús gudil_{näj} te mos xten ni rnibee loj rebixhojz, batiu'ni diajgni ladbee. ⁵¹ Dxejc räjp Jesús lojreni:

—¡Agujc! ¡Colgusaanreni!

Dxejc gudajn Jesús diajg mosga, basiajcnini. ⁵² Gunigajc Jesús loj reni rnibee loj rebixhojz näjza reni najc guixhajg xten guidoo näjza rebengool, guiraa reni siädxiinini, räjpni:

—¿La siäd_{nä}tu spaad näjza garo't, astoocanu siädxiitu te gubaan, ä? ⁵³ Cheni suga'a lojtu guixe-guixee ne_n guidoo, ditu nuhual_{narä}. Per dee najc xortu, luxh arnibee yäl_{nacä}y la'tu.

Di Pedr guicäjp numbeeni Jesús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Dxejcti gunaazreni Jesús huinärenini rolijz bixhojz ni rnibee lo guiraa rebixhojz. Siäd_{näj}l Pedrni zit-zijt. ⁵⁵ Che bidzuj_{nreni} gule'creni guiboo galäi_i lole' xten bixhojzga, gurejreni guideb gabi, te bidxa' lajzreni. Näj Pedr nadxaag lojreni gurej ro'c. ⁵⁶ Dxejc te gunaa ni rujn dzuun ro'c, che bahuiini sobga' Pedr ro'c, rdxelajtisni lojni, räjpni:

—Näj niguiire guyunäj Jesús.

⁵⁷ Dxejc basuni' Pedr räjpni:

—Nan, dina gumbeäni.

⁵⁸ Che gojl stera't, che bahuii stee bejn lojni, räjpni lojni:

—Näj luj najclu te rexpejn_{ni}.

Per Pedr räjp lojni:

—Gurniälojlu, Dad, dina gacä xpejn_{ni}.

⁵⁹ Che gudejd si'cti teb or, räjp stee bejn lojni:

—Guliipacni, näj bejn_{re} guyunäjni, sa'csi laani najczani te be_n Galilee.

⁶⁰ Dxejc räjp Pedr lojni:

—Gurniälojlu Dad, dipacna ganä xhini'c canii_{lu} loä.

Lalni canii Pedr rediid_{xre}, guredxa' te guidgaii, ⁶¹ luxh gubiréza Jesús, bahuidzu'tzni lo Pedr, dxejc banalajz Pedr nani gunii Jesús lojni, räjpni: “Che gajd guidgaii cuedxa', abazuni'lu cho_n huält, räjp_{lu} dilu gumbee najrä.”

⁶² Dxejcti guc-huin lajz Pedr, biriini ro'c, rಂಡuxhni.

Rnijajreni Jesús

(Mt. 26:67-68; Mr. 14:65)

⁶³ Rebejn ni canäj Jesús, gusloj caguxhisnäjrenini, caguijnzarenini. ⁶⁴ Dxejc basäurenini lojni, gudajpreni lojni, räjpreni lojni:

—¡Gunii chuni'c gudijn_{lu}!

⁶⁵ Luxh guiraloj cayäjbreni lojni, caniyaduxhrenini.

Bidzunnäjreni Jesús nez loj rebixhojz
(Mt. 26:59-66; Mr. 14:55-64; Jn. 18:19-24)

⁶⁶ Che bara yääl, bidojp rebengool ni rnibee, näjza reni rnibee loj rebixhojz, näjza rebejn ni ruluii lei, huinäreni Jesús te suuni nez lojreni nen yu' cadre rujnreni yälguxhtis. Dxejcti räjpreni lojni:

⁶⁷ —Palga luj najclu Crist, bicäjpni loonu.

Dxejc badzu' Jesús diidxre lojreni, räjpni:

—Palga guicäpäni, ditu chalilajz. ⁶⁸ Luxh palga gunä te yälgunabdiidx lojtu xcuent Crist, ditu gudzu' diidxga loä. ⁶⁹ Per najli sibej Xi'n Dios ni gujc Niguui xladbee Gueb Dios ni yu' xhaguibaa.

⁷⁰ Dxejc gunabdiidx guiraareni lojni, räjpreni:

—Mbaj pues, ¿la luj najclu Xi'n Dios, ä?

Dxejc badzu' Jesús diidxre lojreni räjpni:

—Nacäni, si'cni najtu la'tu.

⁷¹ Dxejc räjpreni lo sa'reni:

—¿Xhirucxhamaaz rlajztu? Dirunu guiquiin diidx guinii bejn, sa'csi lagajc nuurnu abiejn diajgnu diidx ni guniini lagajc laani.

23

Jesús nez loj Pila't

(Mt. 27:1-2, 11-14; Mr. 15:1-5; Jn. 18:28-38)

¹ Dxejc huisu guiraareni, huinäreni Jesús nez loj Pila't. ² Ro'c guslojreni cabe'creni xquejni, räjpreni:

—Bidxälhu bejnre cayujnni bieju lo rexpejnnu. Räjpzani xhet nanabdi quixnu impuest lo reii César. Caniizani laani najcni Crist, nalajznu najczani reii.

³ Dxejc gunabdiidx Pila't lojni, räjpni:

—¿La luj ni najc reii xten rexpejn Israel, ä?

Sas badzu' Jesús diidxre räjpni:

—Najcni lagajc si'c ni guniilu.

⁴ Dxejc räjp Pila't loj reni rnibee loj rebixhojz näjza loj guiraa rebejn:

—Dina guidxälä nicla tej dojl xten bejnre.

⁵ Niluxh laareni sanuutis caniireni, dipru caniireni, räjpreni:

—Guiraa reben Judea cayu' yärsia' xcuent xcälrluiini. Guslojni guedx Galilee, luxh reeli sanuu caguluiinini.

Jesús nez loj Herodes

⁶ Che biejn diajg Pila't rediidxre, gunabdiidxni: “¿La Galilee siääd bejnğa?”

⁷ Cheni räjpreni ro'c siäädni, baxhalnini loj Herodes ni najc gubernadoor xten Galilee, sa'csi nen redxejga yu' Herodes guedx Jerusalén. ⁸ Che bahuii Herodes loj Jesús, bibalajzni sa'csi agujc xchej rlajzni fiini lojni, sa'csi abiejn diagni diidx xcuent ni cayujnni. Luxh rlajzni fiini gunni te milaagwr.

⁹ Xhidajl yälgunabdiidx bejn Herodes, luxh xhet guniidi Jesús. ¹⁰ Ro'c suga'za reni rnibee loj rebixhojz näjza rebejn ni ruluii lei, cabecduxhrueni xquejni.

¹¹ Dxejc gulälaz Herodes näj rexsoldaadni Jesús, baxhiznäjrenini, ni'c bashuajcwrenini te ladsa'c sa' ni rajcw reii, dxejcti baxhal sacrenini loj Pila't. ¹² Lagajc dxejga, Pila't näjza Herodes gujcreni amiigw, luxh galoo bidxe'ch lo sa'reni.

Gunibeereni guet Jesús

(Mt. 27:15-26; Mr. 15:6-15; Jn. 18:39-19:16)

¹³ Dxejc gurejdx Pila't reni rnibee loj bixhojz, näjza rebengool ni najc guxhtis, näjza rebenguejdx. ¹⁴ Dxejc räjpni lojreni:

—La'tu biädna'tu bejnre loä, najtu caguquĩni rebejn gunreni biey, luxh narä agunabdiidxä guiraloj lojni nez lojtu, luxh abahuiitu dina nidxälä nicla tej dojl ni cagucuaquijtuni. ¹⁵ Niclaza Herodes di nidxäl nicla tej dojl, ni'cni baxhaľsacnini loonu, luxh abahuiitu xhet dojldi bejnni te guetni. ¹⁶ Ni'cni quinäni, dxjecti guslaäni.

¹⁷ Najc costumbr ruslaa Pila't te bejn ni yu' neñ latzguiib casob rajc lanijre.

¹⁸ Per guiraareni guredxa'reni si'c tejsi bejn, räjpreni:

—¡Bagu't bejnre, baslaa Barrabás!

¹⁹ Barrabás najc ni basälreni latzguiib sa'csi batojpni te cuaa bejn ni bacuanäj resoldaad xten Rom, näjza sa'csi yu' chu bagu'tni. ²⁰ Rlajzpac Pila't guslaani Jesús, ni'c gunisacni lojreni, ²¹ niluxh rebejn dipru guredxa'reni, räjpreni:

—¡Bacuaani lo cruzj, bacuaani lo cruzj!

²² Riojn gunisac Pila't lojreni, räjpni:

—¿Xhi doľduxh bejnni? Xhetlidi dojl rdxälä bejnni te guetni. Ni'cni siguinäni dxejc suslaäni.

²³ Luxh laareni sanuutis guredxa'reni, gunabreni xcajni lo cruzj. Luxh sa'csi guredxa'tisreni, bejntireni gaan gujc si'c ni rlajzreni. ²⁴ Dxejc cuäjb Pila't gunibeeni gac si'c ni gunabreni. ²⁵ Dxejc baslaani bejn ni yu' latzguiib sa'csi bejnni biey, bagu'tzani bejn, dxejc badeedni Jesús lojreni te gunnäjrenini si'ctis ni rlajzreni.

Che cuaj Jesús lo cruzj

(Mt. 27:32-44; Mr. 15:21-32; Jn. 19:17-27)

²⁶ Cheni sanäreni Jesús xcaj lo cruzj, gunaazreni te bejn ni laa Simón ni siäd guedx Cirene; basaj bejnğa lo niaa. Dxejc basguurenini cruzj, siädnajltini dejt Jesús.

²⁷ Siädnajlza xhidalduxh bejn, näjza xhidajl gunaa ni cayonduxh, cabedxa'reni sa'csi cayac-huinduxh lajzreni xcuent Jesús. ²⁸ Dxejc gubiré Jesús, räjpni lojreni:

—Gunaa Jerusalén, na'c roontu xcuentä, colyoon lagajc xcuenttu näjza xcuent rexi'ntu. ²⁹ Sa'csi sidzujn dxej gäbreni: “Chicbaa regunaa ni di gacdi chu xi'nni, chicbaaza reni di nuxi'n, renani di nusiä' báz.” ³⁰ Dxejc guisloj rebejn gäb loj redajn: “Coljiajb yejcnu”, säjbzarenı loj relom: “Colgucua'tz nuurnu.” ³¹ Palga scree runnäjreni narä ni nacä si'c te yagnaga, aticaxh gunnäjreni la'tu ni najc si'c te yagbijdz.

³² Sanäzarenı tio'p benguijdx xcajzarenı loj recruzj, guetnäjrenı Jesús.

³³ Che bidzujnreni te lajt ni laa Calabeer, ro'c bacuaarenı Jesús lo te cruzj, bacuaazarenı guiro'p rebenguijdxga lo stio'p cruzj, tejni xladbee, steeni xladbäjgwni. ³⁴ Chenı cagucuaa rebejn renı lo cruzj, gunii Jesús, räjpni:

—Xtadä, badzucaj xtojľ rebejnre, sa'csi direni gan xhini'c cayujnreni.

Dxejc gudzujt resoldaad daad yejc xhajbni, te gudisrenı xhajbni cua'renini. ³⁵ Suga' rebejn ro'c cadxelojtisrenı. Näjza reguxhtis caguxhisnäjrenı laani, cayäjpreni:

—Balti bejn baslaani, naj suguslaani lagajc laani palga guliini laani najcni Crist ni gule Dios.

³⁶ Näjza resoldaad caguxhisnäjni, gubigrenı lojni te badeedrenı bin-nii yäni.

³⁷ Dxejc räjprenı lojni:

—Palga guliı najclu reiı xten rexpejn Israel, baslaa lagajc luj.

³⁸ Luxh bacuaareni gaii diidx loj te baräjd ni cuaj yejc cruzj. Con didx griegw, con didx latín, näjza didx hebreo, bacuaareni scree: “Dee najc Reii xten rexpen Israel.”

³⁹ Te reben guijdx ni najl lo te cruzj ni caj cuä'ni caniyajni Jesús, räjpni lojni: —Palga luj najclu Crist, baslaa lagajc luj nägajcza nuurnu.

⁴⁰ Per benguijdx ni najl lo cruzj stelaadga gudidxa'ni loj stee benguijdx ni caniyaj Crist, räjpni:

—¿La dilu guidxejb Dios? ¡Ni cayajczalu tejsi castiigw! ⁴¹ Per nuurnu cayajcnu castiigw ni riäjł gacnu te guidiixnu redojl ni biennu. Luxh laani xhet dojlđi bejnni.

⁴² Dxejc räjpni loj Jesús:

—Bazalajzlu narä che guidzujñlu lo xcälrnibeelu.

⁴³ Dxejc badzu' Jesús diidxre, räjpni lojni:

—Rniliäpac lojlu, lagajc nadxej chunäjlu narä xhaguibaa.

Che gujt Jesús

(Mt. 27:45-56; Mr. 15:33-41; Jn. 19:28-30)

⁴⁴ Agojl si'cti läidxej. Dxejc bicäy guideb guedxliuj, si'c bianxcäy si'cti rcachonti. ⁴⁵ Bicäy lo gubijdx, luxh ladró ni najl neñ yudxanro xten guidoro, biräjsni gucni tio'p la'. ⁴⁶ Dxejcti guredxa' Jesús, räjpni:

—Xtadä, ladznaalu rutedä xaimä.

Che guniini si'c, gujttini.

⁴⁷ Che bahuii capitán ni rnibee loj resoldaad guiraa ni guzajc, gulä'pni xpala'n Dios, räjpni:

—Guliipacni, xhet dojlđi bejn bejnre.

⁴⁸ Guiraa rebejn ni suga' ro'c ni bahuii guiraa ni guzajc ro'c, gubi'reni rolijzreni, cayäazreni lagajc lastooreni. ⁴⁹ Luxh guiraa reni rumbee Jesús, näjza regunaa ni biädnañni che biriilini Galilee, zijtru bia'nreni cahuiireni guiraa recos ni cayajcre.

Che biga'tz Jesús

(Mt. 27:57-61; Mr. 15:42-47; Jn. 19:38-42)

⁵⁰ Guyu' te bejn ni laa José, lacti huen najcni, luxh laaca rujñni guira'ti. Siäädni guedx Arimatea, región Judea. Nadxaagzani loj reni rnibee neñ guidoro xten rexpejn Israel. ⁵¹ Cabäjzza José jiaäd yälrnibee xten Dios, ni'cni dini nidxaglaz nani bejn resa'ni. ⁵² Dxejcti huijni lo Pila't, gunabni tiejxh Jesús. ⁵³ Che gulätñini lo cruzj, batejbnini neñ te bariaad, dxejcti bacua'tznini neñ te baa ni guc-chee cuä' te guilaj. Nacoob baaga, nicla tej bejn gajd guiga'tz ro'c. ⁵⁴ Dxejga najc dxej ni rusucheereni guira'ti, luxh agojl jiu' dxej ni rusilajzreni.

⁵⁵ Regunaa ni guzanäj Jesús che biriilini Galilee huihuiireni robaaga te bahuiireni xho gudixhreni togoalga neñ baa. ⁵⁶ Che gubi'reni rolijzreni bencheereni recuaan ni rlianexhduxh näj te ni najc si'c te saj ni rlianexhduxh ni ruzaareni retogool. Dxejcti basilajzreni dxej ni rusilajz bejn, si'cni caj lo xleii Moisés gunreni.

24

Che gubansac Jesús lo rebengut

(Mt. 28:1-10; Mr. 16:1-8; Jn. 20:1-10)

¹ Dxej ni gusloj xmaanga, rsildooru huinä regunaaga robaa recuaan ni rlianexh ni bencheereni. ² Che bidzujñreni, bahuiireni agubicaj guij ni rusäu ro' baa. ³ Dxejc che biu'reni neñ baaga, direni nidxäl tiejxh Jesús.

⁴ Laḷ ni cadxelojreni, di jien xhi gunreni, biricaj tio'p dade' gusuj cuä'reni. Rdimbichaduxh xhajbreni. ⁵ Bidxebduxh regunaaga, basajbreni lojreni lo yuj. Dxejc räjp redade'ga lojreni:

—¿Xhicuent siädtiiltu te bejn ni nabajñ lo rebengut, ä? ⁶ Rutini ree. Agubañsacni. Colgusnaj lajztu rediidx ni guniini cheni guyusijcni Galilee, ⁷ che najni lojtu: “Riäjḷ jiajb Xi'n Dios ni gujc Niguui ladzñaa rebendojḷ, xcajzani lo crujz, dxejc ni riojñ dxejga sibañsacni loj rebengut.”

⁸ Dxejc banaj lajz regunaa xtidx Jesús, ⁹ biriireni robaa, gubi'tireni te bijreni diidx lo retzubiteeb rexpejñpacni näjza loj rebejñ ni yunäjreni. ¹⁰ Reni huisa'n diidx loj rexpejñpac Jesús najc redee: Marii Magdalen, näjza Xuan, näjza Marii xnan Jacoob, näjza sgaii gunaa. ¹¹ Niluxh rexpejñpacni bejn xhigab didxnayäälñi, direni nililajz xtidx regunaaga.

¹² Dxejc huisu Pedr, ruxuñlini huijñi ro' baa. Che gudixhlojñi, bahuiini neñ baaga, ganaxtis bariaad dzuub te laad. Dxejc gubi'ni rolizñi, rdxelojtisni xcuent ni gujc.

Ni guzajc lo nezyuj ni sii guedx Emaús
(Mr. 16:12-13)

¹³ Lagajc dxejga, tio'p rexpejñpacni sääreni te guejdx ni laa Emaús, ni ria'n si'cti tzubiteeb kilómetro loj guedx Jerusalén. ¹⁴ Laḷ ni sasajreni lo nezyujga, cayujyreni diidx xcuent reni gujc ro'c. ¹⁵ Laḷ ni caniireni gubig Jesús lojreni, gusloj sasanäjñireni. ¹⁶ Luxh mase cahuiireni lojñi, yu' xhi badxojñ niembeerreni. ¹⁷ Dxejc gunabdiidx Jesús lojreni, räjpñi:

—¿Xhini'c rujytu laḷ ni sasajtu, ä? ¿Xhicuent cayac-huin lajztu?

¹⁸ Tejreni ni laa Cleofas badzu' diidxre, räjpñi:

—Guiraasi bejñ najñ xhi gujc neñ guedx Jerusalén. ¿La lujtis bia'nlu neñ guejdxga ni di gan xhi gujc ro'c, ä?

¹⁹ Dxejcti räjp Jesús lojreni:

—¿Xhini'c gujc ro'c?

Dxejc räjpñi lojñi:

—Recos xcuent Jesús ni siädä guedx Nazare't, ni gujc te niguui ni gunii xtidx Dios, rajpñi yälñribeduxh xten Dios loj redzuun ni rujñni näjza loj rediidx ni rniini, nez loj Dios näjza nez loj rebejñ. ²⁰ Näjza xho bejñ reni rñibee loj rebixhojz näjza rexcuxhtisnu, bateedreniini ladzñaa reni gunibee guetni, dxejc bacuaarenini lo crujz. ²¹ Niluxh nuurnu cabäaznu laani gacni nani nusläa rexpejñ Israel ladzñaa rebenzijt. Naj agujc choñ dxej ni gujc recosre. ²² Luxh yu' gaii gunaa ni nadxaag loonu ni baschelojreni nuurnu. Barsil, che huijreni robaa xtenni, ²³ direni nidxäl tiejxhni. Biädsa'nreni diidx loonu najreni bahuiireni lo tio'p xangl Dios ni räjp lojreni, agubañsac Jesús lo rebengut. ²⁴ Dxejcti huihuii gaii sa'nu robaa, bahuiizarenini najcni si'ctis ni naj regunaaga loonu, niluxh direni nuhuii loj Jesús.

²⁵ Dxejc räjp Jesús lojreni:

—¡Lacti nayääl tre' xcäriejntu! Lacti neñ rililajztu xtidx redade' ni gunii xtidx Dios xcuent Crist. ²⁶ ¿La di nungäjḷ tedxgaa Crist retrabajwduxhre dxejcti jiu'ni lo xcälrdimbicha' Dios, ä?

²⁷ Dxejc gusloj cagusule'ni guiraa rediidx ni caj lo xquijtz Dios xcuent Crist. Guslonäjñi xtidx Moisés, dxejc huinuuni basule'ni guiraa reguijtz ni bacuaa redade' ni gunii xtidx Dios.

²⁸ Che bidzujñreni guejdx cadre sääreni, bejñ Jesús si'cni chanuuni chääni lo nezyuj. ²⁹ Dxejc laareni bascuääzrenini te jiannäjñireni, räjpñi lojñi:

—Biannäj nuurnu, sa'csi acayajc gudxej, agojñ jiu' guxhiñ.

Dxejcti biu' Jesús te jiannäjñireni. ³⁰ Cheni sobganäjñireni lo mex, cua'ni yätxtiil, benle'nini, dxejc gula'nini, gudisnini lojreni. ³¹ Lagajc dxejc, baxhal Dios balojreni, biembeereni Jesús, dxejc laani gunitlojni lojreni. ³² Dxejcti räjpreni lo sa'reni:

—¿La di lastoonu nibeguiboo cheni siädniini loonu lo nezyuj, che cagusule'ni xtidx Dios?

³³ Dxejc dirureni nibäjz ro'c, alga gunasgajcreni nez, gubi'reni guedx Jerusalén. Ro'c bidxälreni abidojp xpejn̄pac Jesús nájza sgaii bejn̄. ³⁴ Dxejcti bijreni diidx loj guiro'preni bidzujñ, räjpreni:

—Guliipac gubañsac Jesucrist, luxh baluilojni loj Simón.

³⁵ Dxejc guiro'p reni bidzujñ bijzaren diidx ni gusajcreni lo nezyuj, náj xho biembeezaren Jesús che gula'ni yätxtiil.

Baluiloj Jesús loj rexpejn̄pacni

(Mt. 28:16-20; Mr. 16:14-18; Jn. 20:19-23)

³⁶ Canisi'creni rediidxre chela baluiloj lagajc Jesús galäiireni, guniini xchan lojreni, räjpni:

—¡Col̄cuedxi lajztu!

³⁷ Per laareni rdxelojreni bidxejbreni, naareni cahuiireni lo te sprit. ³⁸ Dxejc räjp Jesús lojreni:

—¿Xhicuent cadxejbtu? ¿Xhicuent rac tio'p lastootu? ³⁹ ¡Col̄huii reñaä, nájza reni'ä! Lagajc naräni. Col̄cajn narä te fiipactu laa naräni, sa'csi anajntu di te sprit ga'p bääł niclaza tzujt si'c rapä narä.

⁴⁰ Che guniini rediidxga, baluigajcni reñaani nájza reni'ni. ⁴¹ Lał ni cadxelojreni, di gacdi chalilajzreni, sa'csi cabaduxh lajzreni, räjpni lojreni:

—¿La yu' xhi rajptu gauä ree, ä?

⁴² Dxejc badeedreni te la' bälbigue', nájza te la' seer ni yu' tzujñ. ⁴³ Ni'c cua'ni gudajwnini nez lojreni. ⁴⁴ Dxejc räjpni lojreni:

—Dee najc xtidxä ni rniä lojtu cheni yusicä lojtu, rniä riäjł soob guiraa rediidx xcuentä ni caj lo xleii Moisés, nájza lo rexquijtz redade' ni gunii xtidx Dios nájza ni caj lo rexquitz Salmos.

⁴⁵ Dxejcti basanijni xcäriejnreni te gucbeereni xhi säloj rediidx ni caj lo rexquijtz Dios xcuentni. ⁴⁶ Dxejc räjpni lojreni:

—Scree caj lo reguijtz: Nanab guet Crist, dxejc ni riojn̄ dxej, guibañsacni loj rebengut. ⁴⁷ Sire'chza diidx xcuent xho rusłaa Crist rebejn̄ nen̄ dojl̄ che rusiejchreni lajzreni, che rililajzreni xtiidxni. Guedx Jerusalén guislojni, dxejc sire'ch diidx guideb guedxliuj. ⁴⁸ La'tu najctu testiigw guiraa recosre. ⁴⁹ Narä suxhalä Sprit Dxan xten Dios lojtu, ni'c col̄jia'n guedx Jerusalén cheni jiädłajzlini nen̄ lastootu, guniidxni yäl̄rnibee ni siääd xhaguibaali.

Huäj̄s Jesús xhaguibaa

(Mr. 16:19-20)

⁵⁰ Dxejc huiinä Jesúsreni stelaad guedx Jerusalén gajxh lo te guejdx ni laa Betania. Ro'c guläsni ñaani, benle'ni yejcreni. ⁵¹ Lał ni cayujñni si'c, gubicajni lojreni, huäj̄sni xhaguibaa. ⁵² Peta laareni gulujx gojnrenini, dxejc cabalazduxhreni gubi'reni guedx Jerusalén. ⁵³ Ro'c guixe-guixee guyu'reni nen̄ guidoro, calä'preni xpala'n Dios. Sugacni si'c.

Redidxhuen Xten Jesucrist Ni Bacuaa San Juan

Xtidx Dios najc te Niguü

¹ Galodoo che gusloj guira'ti, ala yu' Diidx. Luxh nani najc Diidxga yunäj Dios, luxh Diidxga najc Dios. ² Che gajd gac-cheeli guedxliuj, yunäjni Dios. ³ Xcuent laani benchee Dios guedxliuj näjza guira'ti ni yu' lojni. Guiraa recos ni yu' di gacdi niu'reni paru rutini. ⁴ Laani gojp yäl_nabaj_n. Yäl_nabaj_nga najc bianij xten rebejn. ⁵ Luxh bianijga rdimbicha' nez lo yäl_cäy, niluxh yäl_cäyga di niajcdi nusuiinini.

⁶ Guyu' te niguü birilaj Juan, ni baxha_l Dios. ⁷ Laani biädni te basule'ni diidx. Biädsule'ni diidx xcuent bianij te nililajz guiraa rebejn diidx xcuent bianij. ⁸ Laani dini gac bianij, laani biädsule'ni diidx xcuent bianij. ⁹ Laa bianijpacga ni rusanij lastoo guiraa rebejn, luxh naj abiädni lo guedxliujre.

¹⁰ Nani najc Diidxga guyu' lo guedxliujre, xcuent laazani gac-chee guedxliujre, luxh di rebejn guedxliujre nililajz chu najni najcni. ¹¹ Biädni loj rexpejn Israel, niluxh rexpejn_ni direni nicäjb niu'ni lojreni. ¹² Dxejc loj guiraa reni cuäjb guyu'ni lojreni, loj renani huililajz xtiidxni, loj reni'c badeedni yäl_rnibee gacreni xi'n Dios. ¹³ Laa reni'c ni di gac si'c xi'n bejn guedxliuj, ni gojl sa'csi rlajz te biniet chu xi'nni, dee najcpacreni Xi'n Dios sa'csi sudeedni yäl_nabaj_n par tejpas lojreni.

¹⁴ Diidxga gujc te bejn guedxliuj. Guläjzni lo guedxliujre, bahuilojzanu xcäl_rdimbicha'ni, si'c yäl_rdimbicha' xten xingan xteb xtdadni, laani najcpacni nani sanälajz nuurnu, nani rnii didxlii loonu. ¹⁵ Juan gunii xcuent Jesús. Guredxa'ni, räjpni:

—Laa dee ni rniä, nani siäd detzä sajcruni loä, sa'csi laani ganidni nabaj_nni loä.

¹⁶ Sa'csi guiraanu cua'nu xcäl_nasacduxhni, yäl_rracnäj detz yäl_rracnäj. ¹⁷ Leii xten Dios biädniä toMoisés, niluxh yäl_rracnäj näjza redidxlii biädniä Jesucrist. ¹⁸ Rut chu tejdi abahuii lo Dios, xinxtetni ni yunäjpac Dios, laani basule'ni diidx xcuent Dios loonu.

Juan ni rutiobnis gunii chuni'c najc Jesucrist (Mt. 3:11-12; Mr. 1:7-8; Lc. 3:15-17)

¹⁹ Dee najc diidx nani gunii Juan ni rutiobnis che baxha_l rexpejn Israel rebixhojz näjza rexpejn guidoo ni laa levitas, biriireni guedx Jerusalén te sanabdiidxreni lo Juan, räjpreni lojni:

—¿Luj chu najclu?

²⁰ Dxejcti bicäjpni lojreni, xhet bacua'tzdini lojreni, räjpni:

—Et narädi nacä Crist ni jiäd.

²¹ Dxejcti gunabdiidxreni lojni, räjpreni:

—¿Chuxhni'c najclu? ¿La lujni najc Elías?

Räjpni:

—Dina gacäni.

Räjpreni:

—¿La najclu te dade' ni gunii xtidx Dios ni cabäaznu jiäd?

Dxejc räjpni:

—Dina gacäni.

²² Räjpreni:

—¿Chuxhni'c najclu? Te chonänu diidx loj reni baxha_l nuure. ¿Xhi rniilu, chuxhni'c najclu?

²³ Räj̄p Juan:

—Narä nacä nani rbedxa' nez lo reyubijdz si'c ni gunii Isaías, ni gunii xtidx Dios scree: “Colyensa'c xnezyuj Dad.”

²⁴ Rebejn̄ ni baxhaļ redee najc reni rniireni “farisee”. ²⁵ Dxejc gunabdi-idxreni stee, räj̄preni lo Juan:

—¿Xhicuent rutiobnislu palga dilu gac Crist ni jiääd niclaza Elías niclaza stee niguii ni rnii xtidx Dios ni cabääznu jiääd, ä?

²⁶ Dxejcti räj̄p Juan lojreni:

—Narä rutiobnisä con nis, niluxh galäiitu yu' tej nani ditu gumbee. ²⁷ Laa dee ni siääd detzä niluxh di nungäj̄l nicla surloä cuää xcura'chni, sa'csi sajcruni loä.

²⁸ Guiraa recosre gujc stelaad cadro laa Betábara, ni ria'n stelaad ro' gueu Jordán cadro cagutiobnis Juan.

Jesús najc Xile' xten Dios

²⁹ Che bara yääl, bahuui Juan siääd Jesús lojni. Dxejc räj̄pni:

—¡Colhuii! Aree Xile' xten Dios nani rudzucaj xtoj̄l reben̄ guedxliuj.

³⁰ Lagajc xcuent dee ni rniä cheni guniä lojtu: “Detzä siääd te niguii ni sajcru loä, sa'csi ganidli narä agac nabaj̄nni.” ³¹ Luxh dina niembeäni, per biädtiobnisä con nis te guluiä lo rexpejn̄ Israel chu najcni.

³² Guniiza Juan stee diidx xcuentni, räj̄pni:

—Narä bahuiä biäj̄t Sprit Dxan xten Dios xhaguibaa si'c te palom guzudxini yej̄cni. ³³ Dina niembeäni, per nani baxhaļ narä gutiobnisä con nis, laani najni loä: “Cheni fiilu jiäj̄t Sprit Dxan xten Dios xhaguibaa si'c te palom, sudxini yejc te bejn̄, laanini najc ni gutiobnis con Sprit Dxan xten Dios.”

³⁴ Narä abahuiä lojni, ni'cni rniliä: “Dee ni najc Xi'n Dios.”

Reni gujc xpejn̄ Jesús ganiddoo

³⁵ Che bara stee yääl, sugasac Juan ro'c, suganäj̄ni tio'p rexpejn̄ni.

³⁶ Bahuiini lo Jesús che sasajni, dxejc gunii Juan, räj̄pni:

—¡Colhuii! ¡Laa dee ni najc Xiil xten Dios!

³⁷ Biejn̄ diajg guiro'p rexpejn̄pac Juan diidxga, dxejc sanaj̄lreni Jesús. ³⁸ Che gubiré Jesús bahuiini siädnaļreni, dxejc räj̄pni:

—¿Xhi caguuiltu?

Räj̄p rebejn̄ga:

—Mastr, ¿caro rbäj̄zlu?

³⁹ Badzu' Jesús diidxre, räj̄pni:

—Coltaa, te fiitu.

Dxejcti huijreni te bahuiireni caro rbäj̄zni ro'c. Biannäj̄renini ro'c sa'csi agoļ̄l si'cti rcataj̄p gudxej.

⁴⁰ Tej reni biejn̄ diajgni xtidx Juan laa Andrés, bejtz Simón Pedr dxejc huinäj̄l̄ni Jesús. ⁴¹ Ganiddoo huitiilni bejtzni, dxejc räj̄pni lojni:

—Abidxäl̄nu Mesías nani sälojza Crist ni cabääznu jiääd.

⁴² Sas huinänini loj Jesús. Che bahuui Jesús lojni, räj̄pni:

—Luj najclu Simón xi'n Jonás; sirilaj̄lu Cefas nani sälojza Pedr.

Gurejdx Jesús Felipe näjza Natanael

⁴³ Bara yäälga rļajz Jesús chää nez Galilee. Dxejc bidxaagni Felipe, räj̄pni lojni:

—Gudanaj̄l narä.

⁴⁴ Felipe siääd guedx Betsaida, guedxro ni najcza lajdx Andrés näjza Pedr.

⁴⁵ Felipe bidxaag Natanael räj̄pni lojni:

—Abidxälnu bejn nani bacuaa to Moisés xcuentni lo reguijtz xten leii agujc xchej, nani bazä'tza reniguii ni gunii xtidx Dios, Jesús xi'n José ni siäd Nazare't.

⁴⁶ Räjpn Natanael:

—¿La sajc guirii te beñsa'c guedx Nazare't, ä?

Räjpn Felipe lojni:

—Gudaa, te fiilu.

⁴⁷ Che bahuii Jesús siäd Natanael nez lojni, räjpni:

—Colhuii te beñ Israelpac nani dipacni gusguee.

⁴⁸ Räjpn Natanael:

—¿Xho numbeelu narä?

Badzu' Jesús diidxre lojni räjpni:

—Che gajd Felipe cueedx luj, che suga'lilu ni' te yagiigw, bahuiä lojlu.

⁴⁹ Badzu' Natanael diidxre, räjpni:

—Mastr, luj najc Xi'n Dios, luj najc Reii xten rexpen Israel.

⁵⁰ Räjpn Jesús lojni:

—Sa'csi rniä lojlu, “bahuiä suga'lu ni' yagiigw”, ¿ni'c rililajzlu, ä? Xhidajl cosroru suhuiilu.

⁵¹ Dxejcti räjpzani:

—Rniliäpac lojtu, suhuiitu guixal xhaguibaa, näjza rä'p riäjt rexangl Dios yejc Xi'n Dios ni gujc Niguii.

2

Te sa' ni guyu' guedx Caná xten Galilee

¹ Che gudejd choñ dxej, guyu' te sa' guedx Caná xten Galilee. Ro'c guyu' xnan Jesús. ² Huijza Jesús näjza rexpejn pacni, sa'csi bidoñreni chääreni lo sa'ga.

³ Gubijdz bin. Dxejc räjp xnan Jesús lojni:

—Dirureni ga'p bin.

⁴ Dxejc badzu' Jesús diidxre räjpni:

—¿Xhicuent rniilu si'c loä, xnanä? Gajd xhorä guidzujñ.

⁵ Niluxh räjp xnanni loj remos ni tre' ro'c:

—Colyejn guira'ti si'ctis ni guiniini lojtu.

⁶ Suga' xho'p guesguij nani rdxaj nis te rdiib naa rexpejn Israel te racna-yareni te si'c guisa' xleii to Moisés. Neñ tejga guesguijga ru' si'cti te gayuu litr nis. ⁷ Räjpn Jesús loj remos:

—Colguchaj reguesguijre nis.

Dxejcti bachadoo rebejn gani. ⁸ Dxejcti räjp Jesús lojreni:

—Colca' che'n ni näj te colchanäni lo nani cahuii cayajc sa're.

Dxejc huinä remosga che'n bin lojni. ⁹ Che gu' dade'ga che'n nis ni gubixhloj bin (luxh dini gan caro siädni, remostis ni gulä'p nis, ni'ctis najn). Dxejcti gurejdx dade'ga bi'n. ¹⁰ Dxejcti räjpni:

—Guiraa rebejn rudeedreni binsa'c räxgaa rebejn, dxejcti che agudxaj xque'reni, rudeedreni bin nani di xcuent, niluxh luj gulucheelu binsa'cre najli.

¹¹ Seenre najc ganiddoo ni gusloj bejn Jesús; bejnnini neñ guedx Caná xten Galilee. Seenga bazäbdiidx yälrnibee xtenni luxh ni'cni huililajz rexpejn pacni xtiidxni.

¹² Che gudejd sa'ga, huijni guedx Capernaum con xnanni, rebejtzni näjza rexpejn pacni. Ro'c bia'nreni tio'p-choñ dxej.

Basia Jesucrist guidoro

(Mt. 21:12-13; Mr. 11:15-18; Lc. 19:45-46)

13 Sa'csi abidzungenjxh lanij pascw xten rexpejn Israel cheni rnalajzreni guxhijn ni gudejd guixhajg xten yälgujt neñ Egipto, ni'c sää Jesús guedx Jerusalén. 14 Neñ guidoro bidxälni xhidajl bejn nani ruto' gon, xiil, palom näjza reni sobga' caguchaa melzijt. 15 Dxejc bejnne te chico't con gaii duu, gulääni regon con rexiil neñ guidoo. Batie'chni xcoobr rebejn nani ruchaa melzijt, barexh-xhätni rexmexreni. 16 Räjpzani loj reni caguto' repalom:

—Colcuää redee, na'c rujntu rolijz xtadä si'c te guii cadro rdo' guiraloj.

17 Dxejcti banajlajz rexpejnpacni xhi caj lo reguijtz ni bacuaa redade' ni gunii xtidx Dios: “Gucnaj läzä xcuent ni runnäjreni rolijzlu.”

18 Dxejcti gunabdiidx reni najc xpejn Israel lojni, räjpreni:

—¿Xhi seen guluiilu loonu naj te fiinu arajplu yälrnibee te abejnlu recosre?

19 Badzu' Jesús diidxre räjpni:

—Colgutzujl guidoore, luxh narä neñ chontis dxej sunchesacäni.

20 Räjpx rexpejn Israel lojni:

—Tiubixho'p ijz guclaa ni guc-chee guidoore, ¿xhixh sajc gunchesacluni neñ chontis dxej, ä?

21 Niluxh laani caniini xcuent guidoo ni najc lagajc tiejxhni. 22 Ni'cni cheni gubansacni loj rebenjut, banajlajz rexpejnpacni rediidxre ni guniini, dxejc huililajzreni nani caj lo rexquijtz Dios näjza rediidx ni gunii Jesús.

Numbee Jesús guiraa rebejn

23 Cheni guyu' Jesús guedx Jerusalén cadro cayajc lanij pascw, lañ ni cayajc lanijga, xhidajl rebejn huililajz xtiidxni, bahuiizareni remilagwr ni bejnne. 24 Luxh di Jesús nililajz xtidx rebejnnga, sa'csi arumbeeni xho najc rebejn. 25 Niluxh dini niquiin chu gäb lojni xho najc bejn, sa'csi lagajc laani anancheeni xho najc lastoo tejga bejn.

3

Jesús con Nicodem

1 Guyu' te niguii lo rexpejn refarisee ni laa Nicodem, najcni te beñroro loj reni rnibee rexpejn Israel. 2 Te guxhijn biädxhiga'tzni nez loj Jesús, räjpni lojni: —Mastr, nadonnu lo Dios siäädlu si'c te ni ruluii, sa'csi rut rajcdi rujn sa' remilagwr nani rujnlu palga di Dios sunäjni.

3 Dxejcti räjp Jesús lojni:

—Rniliäpac lojlu, nani di gaal stehuält, di gacdi fiini xcälrnibee Dios xhaguibaa.

4 Dxejcti räjp Nicodem lojni:

—¿Xho gac gaal te bejn stehuält niluxh anajcni beñgool? ¿Xhixh sajc chusacni xque' xnanni stehuält te galsacni, ä?

5 Badzu' Jesús diidxre räjpni:

—Rniliäpac lojlu, nani di gaal con nis, näjza con Sprit Dxañ xten Dios, di gacdi jiu'ni lo xcälrnibee Dios xhaguibaa. 6 Nani rajl xi'n beñ guedxliujre, ni'c najctisni bejn guedxliuj, luxh nani rajl por Sprit Dxañ xten Dios, Spritza najcni. 7 Na'c rdxeløjlu sa'csi rniä: “Nanabpac gaallu stehuält.” 8 Rbi' bej cadrotis rlajzni; riejn diajglu rubejni niluxh dilu gan caro siäädni, dizalu gan caro sääni. Si'cza rebejn guedxliuj direni gan xho rajl rexpejn Dios stehuält con Sprit Dxañ xten Dios.

9 Badzu' Nicodem diidxre, räjpni:

—¿Xho mood sajc gac recosre?

10 Räjpx Jesús lojni:

—¿La najclu te maestr xten rexpejn Israel luxh dilu gan recosre, ä?
 11 Rniliäpac lojlu, aguniinu xcuent recos ni nadonnu, abasule'nu recos ni abahuiloonu, niluxh la'tu ditu nililajz xtiidxnu. 12 Palga ditu chalilajz xtiidxnu che guniinu xcuent recos guedxliuj nani rniinu: ¿Xho chalilajztu xtiidxnu palga guiniinu xcuent recos xhaguibaa?

13 'Rut chutejdi ahuä'p xhaguibaa, xtebtis nani biäjt xhaguibaa, lagajc Xi'n Dios ni gujc Niguii. 14 Lagajc si'cni guläsjaia to Moisés bäl guiib lo yajg nen reyubijdz, sigajcza nanab chäs Xi'n Dios ni gujc Niguii jiaa; 15 te guiraa renani chalilajz xtiidxni direni nit lo Dios, sica'reni yäl'nabajn par tejpas.

Xho huinälajz Dios reben guedxliuj

16 'Sa'csi huinälazduxh Dios rebejn guedxliuj, ni'cni badeedni biääd Xinxtebni lo guedxliuj, te guiraa renani chalilajz xtiidxni direni nit lo Dios, sa'csi sajpreni yäl'nabajn par tejpas. 17 Sa'csi di Dios nuxhal xi'nni te gusnijtni rebejn guedxliuj, alga baxhalnini te laa rebejn nen xtojlni xcuentni.

18 'Nani chalilajz xtiidxni näjza chalilajz najcni chu najni najcni dini nit, luxh nani di chalilajz xtiidxni agunijtni sa'csi dini nililajz xtidx Xinxteb Dios. 19 Ni'cni dee najc yäl'nijtga: abiääd bianijga loj guedxliuj, biädna Xi'n Diosni, niluxh rebejn guedxliuj bidxaglazrurenä yäl'nacäy cadro tre'reni, gulälazreni bianijga sa'csi xhet laadi najc xtzuunreni. 20 Guiraa reni rujn dzunguijdx, rbälaz bianijga, dizareni guibig loj bianijga, didi guluiloj bianijga rextzunguijdxreni. 21 Luxh reni rusoob didxlii, rbigreni loj bianijga, te bianijga ruluiloj najc rextzuunreni redzunsac xten Dios.

Rnisac Juan ni rutiobnis xcuent Jesús

22 Dxejcti biääd Jesús näjza rexpejnpacni nez lo reyuj xten Judea. Ro'c guyunäjnirenä, batiobnisza rexpejnpacni rebejn. 23 Juan ni Rutiobnis cagutiobniszani bejn te lajt ni laa Enón ni tre' gajxh Salim, sa'csi ro'c yu' sijl nis. Ro'c säa rebejn lojni te cagutiobnisnirenä. 24 Dxejc gajdreni gusäu Juan nen latzguiib.

25 Dxejcti gusloj rexpejn Juan cayujy diidx con gaii xpejn Israel xcuent yäl'rduib naarenä ni najc xcostumbr rexpejn Israel. 26 Dxejc biäädreni lo Juan, räjpreni:

—Mastr, dade' nani guyunäjlu stelaad gueu Jordán, nani basule'lu xcuentni, adade'ga cagutiobnis, luxh guiraa rebejn asää lojni.

27 Dxejc badzu' Juan diidxre, räjpni lojni:

—Nicla tej bejn digacdi ga'p te xhi cos palga di Dios gudeedni lojni. 28 Lagajc la'tu nancheetu guniliä: “Dina gacä Crist ni cabäjztu jiääd.” Guniäza: “Narä nacä nani biädnijd lojni.” 29 Che rajc sa', nani sobganäj dxa'p, ni'c najc bi'n ni gac chäälni, luxh xamigw bi'n nani suga' ro'c, riejn diajgni rniini, rbalazduxhni sa'csi riejn diajgni xse' bi'n. Sigajcza abibaduxh lazä xcuentni. 30 Nanab gacni laani benroru, bensajcru, biädla narä riajl gacä benhuinru, ni guxiiru saj lojni.

Nani siääd Xhaguibaa

31 'Nani siääd jiaali, ni'c rnibee guiralii, niluxh nani najc bejn guedxliuj ni'c rnii xcuent recos guedxliuj. Nani siääd xhaguibaa ni'c rnibee guiralii. 32 Nani bahuiini, nani biejn diajgni, ni'c rusule'ni niluxh guxii rililajzreni xtiidxni. 33 Nani rililajz diidx ni rusule'ni, bejnga ruluiloj guliipac najc xtidx Dios. 34 Nani baxhal Dios, ni'c rnii xtidx Dios sa'csi che rudeed Dios Sprit xtenni, dini gudeed guxiini. 35 Dad Dios sanälajzni xingaanni, abadeedzani guiraliiiti chu ladznaani. 36 Nani rililajz xtidx xingaanni arajp yäl'nabajn par tejpas, luxh

ni di chalilajz xtidx xi'nni, dini fii yäl_nabaj_n, siädä xcäl_rdx'e'ch Dios yej_cni, suj_n Dios castiigw_ni.

4

Rdxaag Jesús te gunaa Samaria

¹ Che gucbee Jesús abiej_n diajg refarisee xhidaj_ru bej_n sanaj_l Jesús luxh guxiiru sanaj_lreni Juan, luxh cagutiobnisreni, ² (niluxh xhet Jesúsdi cagutiobnis. Rexpej_nni ni catiobnis), dxej_c ³ biriini Judea gubisacni nez Galilee.

⁴ La_l ni sasaj_ni, nanab tedni nez Samaria. ⁵ Ni'c bidzuj_nni te guedxro xten Samaria ni laa Sicar, gajxh nejz loj te la' yuj ni badeed toJacoob lo xi'nni toJosé. ⁶ Ro'c sojb te bisie ni rniireni “xpisie Jacob”. Sa'csi abadxajg Jesús siädsaj_ni, gurej_ni ro bisiega. Agoj_l läidxej. ⁷ Bidzuj_n te gunaa siädlä'pni nis, dxej_c räjp Jesús lojni:

—Baniidx che'n nis yä'ä.

⁸ Sa'csi rexpej_npacni asääreni guejdxga sasiireni xhi gaureni.

⁹ Räjp_ti guna samaritanga lo Jesús:

—¿Xho mood rniablu nis loä, luj ni najc te be_n Israel luxh narä nacä gunaa samaritan?

(Sa'csi di rexpej_n Israel chanä sa'reni rebej_n Samaria.) ¹⁰ Räjp Jesús lojni:

—Paru naj_nlu xhini'c najc yäl_rulasajz xten Dios, paru numbeelu chuni'c canab nis loj_lu, luj siniablu lojni te laani guniidxni nisnabaj_n loj_lu.

¹¹ Räjp_ti gunaaga lojni:

—Dad, xhet ca'dilu te guiliä'plu nis, luxh bisiere najc jätduxh. ¿Caxh chaca'lu nisnabaj_nga, ä? ¹² ¿La be_nrorulu lo toxtadgoldoonu Jacob ni basa'n bisiere cadre huä'p nis gu'ni, gu'za rexi'nni, näjza rexquidxaani, ä?

¹³ Badzu' Jesús diidxre lojni, räjpni:

—Guiraa reni rä' nis bisiere, sioj_lreni stehuält. ¹⁴ Luxh nani yä nis nani gudedä, diruni jioj_l, sa'csi nis nani gudedä ne_n lastooni saj_cni si'c te bisie nani rdatis nisni te gudeedni yäl_nabaj_n par tejpas.

¹⁵ Dxej_ct_i räjp gunaaga lojni:

—Dad, baniidx nisga yä'ä, te na'cru jio_lä, te na'cruza guibi'ä jädlä'pä nis ree.

¹⁶ Räjp Jesús:

—Huij, huitejdx chääl_u gudanäni ree.

¹⁷ Räjp guna loj Jesús:

—Ruti chälä.

Räjp Jesús lojni:

—Laaca guniilu, ¹⁸ sa'csi aguyu' gaiili chäällu. Luxh nani rbäznäj_lu naj dini gac chäällu; guliica naj_lu.

¹⁹ Che biejn diajg gunaaga si'c, räjpni:

—Dad, rchaloä naj_{cl}u te niguii ni rni_i xtidx Dios. ²⁰ Retoxtadgoldoonu goj_nreni Dios lo daj_nre, luxh la'tu rniitu guedx Jerusalén najc cadre nanab ganni Dios.

²¹ Räjp Jesús lojni:

—Gunaa, huililajz xtidxä, sidzuj_n or cheni nicla lo daj_nre, niclaza guedx Jerusalén ditu chagaj_n Dad Dios. ²² La'tu raj_ntu Dios nani ditu gumbee, nuunu raj_nnu Dios nani rumbeenu; sa'csi yäl_rus_laa bej_n lo doj_l siädä xcuent rexpej_n Israel. ²³ Niluxh sidzuj_n or, luxh alabidzuj_nni, che reni guliipac raj_n Dad, reni'c ne_n lastooreni, lo xcäriej_nreni saj_nreni Dios. Sa'csi sa' bej_nre rguil Dad Dios te gan_rrenini. ²⁴ Dios najc te Sprit. Reni raj_n Dios nanab gan_rrenini ne_n lastooreni, lo xcäriej_nreni, guideb xtijpreni sa'csi rumbeerenini.

²⁵ Räj̄p gunaa lojni:
—Ananá siääd Mesías ni laaza Crist. Cheni jiäädni, laani susule'ni guiraliiti loonu.

²⁶ Räj̄p Jesús lojni:

—Narä ni caniä lojlu, nacä laani.

²⁷ Dxejc bidzuj̄n rexpejn̄pacni, bidxelojreni sa'csi gunii Jesús lo gunaaga, niluxh rut gunabdiidxdi xhi rlajzni, niclaza rut gunabdiidxdi xhini'c caninäj̄ni gunaaga. ²⁸ Dxejcti basa'n gunaaga xtie'ni, sä'tini guedxroga. Dxejcti räj̄pni loj rebejn̄:

²⁹ —Col̄taa, fiitu te niguii ni gunii loä guira'ti nani abenä. ¿La et laadi dee Crist ni cabäaznu jiääd, ä?

³⁰ Dxejc birii rebejn̄guejdxga, bidzuj̄ntireni lojni. ³¹ Reni najc rexpejn̄pacni canabduxhrenei gau Jesús, räj̄preni:

—Mastr, gudajw.

³² Laani räj̄pni:

—Narä rapä xhi gauä nani ditu gumbee.

³³ Dxejcti räj̄p rexpejn̄pacni lo sa'reni:

—¿Xhaa yu' chu abiädñä xhi gudajwini, ä?

³⁴ Räj̄p Jesús:

—Yärajw xtenä najc gunä si'cni rlajz nani baxhal̄ narä, näj guluxä xtzuunni. ³⁵ La'tu rniitu riäädx tajp bäii te guire' cose'ch. Narä rniä col̄guiliäs lojtu, col̄fisa'c loniaa, abiquijtz regäj̄l, agoj̄l guire' cose'ch. ³⁶ Nani ruj̄n dzuun rutie' cose'ch rca'ni xcuentni, luxh ni caca'ni najc par yäl̄nabaj̄n par tejpas, te tejsi guibalaznäj̄ nani gule'c binij̄ näj nani batie' cose'ch. ³⁷ Sa'csi gulīi najc diidx nani rnīi bejn̄, rniireni: “Tejni rbe'c binij̄, ste'cani rutie'ni.” ³⁸ Narä abaxhalä la'tu gutie'tu cose'ch nani ditu nibe'c; ste'ca najc nani bejn̄ dzuun gule'cni binij̄, dxejc la'tu jiu'tu gutie'tu cose'ch loj xtzuunni.

³⁹ Xhidajl rebejn̄ Samaria huililajz xtidx Jesús xcuent rediidx ni räj̄p gunaaga lojreni che räj̄pni: “Guniini loä guiralīi nani abenä.” ⁴⁰ Ni'cni, che biääd rebejn̄ guedx Samaria lojni gunabreni loj Jesús jia'nni lajdxreni. Dxejc bia'nni ro'c tio'p dxej. ⁴¹ Dxejc xhidajlrureni huililajz xtiidxni ni guniini lojpacreni.

⁴² Dxejcti räj̄preni loj gunaaga:

—Dirunu chalilajz ganaxtis xcuent diidx ni guniilu loonu, sa'csi lagajc nuure abiej̄n diajgnu xtiidxni, ni'c nancheenu dee najcpac ni ruslaa rebejn̄ guedxliuj̄ loj doj̄l. Laani najc Crist ni cabäaznu jiääd.

Basiajc Jesús xi'n te bejn̄ ni ruj̄n xtzuun gubier

⁴³ Che gudejd tio'p dxej, biriini guedx Samaria, huinuuni xnezyuj̄ni nez Galilee. ⁴⁴ Sa'csi lagajc Jesús gunii, räj̄pni: Te bejn̄ nani rnīi xtidx Dios di rebejn̄ lajdxpacni chanälajz xtiidxni. ⁴⁵ Che bidzuj̄nni rexyuj̄ Galilee, rebejn̄ Galilee huichaglojrenini sa'csi näj laareni huijreni lanij̄ pascw guedx Jerusalén, ro'c bahuiireni guiraa redzuun nani bejn̄ni.

⁴⁶ Gubisacni, bidzuj̄nni guedx Caná xten Galilee cadre bejn̄ni bidxaa nis guj̄cni bin. Dxejcti guyu' te dade' nani ruj̄n xtzuun reīi. Guedx Capernaum naga' te xi'nni cayacxhuu. ⁴⁷ Che biejn̄ diajg dade'ga abirii Jesús Judea, abidzuj̄nni nez Galilee, huij̄ni lo Jesús, gunabduxhni lojni chääni te gusiaj̄cni xi'nni nani naga' cuentro, ameerli guetni. ⁴⁸ Dxejcti räj̄p Jesús lojni:

—Paru ditu fii reseen, remilagwr, ditu chalilajz chuni'c nacä narä.

⁴⁹ Dade' ni ruj̄n xtzuun reīi, gunii lojni, räj̄pni:

—Do'o Dad, te di guet xi'nä.

⁵⁰ Räj̄p Jesús lojni:

—Huij. Di xi'nlu guet.

Huililajz dade'ga, sä'tini. ⁵¹ Che gubi'ni rolijzni, birii rexmosni, huichaglojni, badeedreni diidx nabajñ xi'nni.

⁵² Dxejcti gunabdiidxni:

—¿Corti gusloj cayajcni?

Räjpreni lojni:

—Naii si'cti rcatej gudxej biriini xliaa.

⁵³ Dxejcti gucbee dade'ga lagajc orga ni räjp Jesús lojni: “Di xi'nlu guet.” Dxejc dade'ga näjza guiraa rebejñ ni yu' rolijzni huililajzreni Jesús najc ni cabäjzreni jiääd.

⁵⁴ Dee barojp seen ni bejn Jesús cheni biriini Judea, biu'ni Galilee.

5

Bejñ Betesda nani naxu'n

¹ Che gujcti recosre, guyu' te lanij xten rexpejñ Israel, dxejc huij Jesús guedx Jerusalén. ² Guedx Jerusalén, gajxh ro' puert ni laa xten rexiil, yu' te guipilro nis; xtidx hebreo laani Betesda. Cuä' guipilroga caj gaii cordoor. ³ Ro'c naga' xhidajl bejñ racxhuu, yu' bejñ ni di fii, beñcoj, näj bejñ nani bixu'n tiejxhni. Cabäjzreni guiniib nisga ⁴ sa'csi gucti-guc riääd te xangl Dios rusniib nisga. Dxejc bejñ nani gun gaan chachu' lo nis ganiddoo che guiniibni, riajcti lo xhitis yälgujdx ni rajcni. ⁵ Ro'c guyu' te beñ racxhuu nani agujc galbitzubixhujñ ijz cayacxhuuni. ⁶ Cheni bahuii Jesús naga'ni, badeedzani cuent lacti xchero raxchuuni, räjpni lojni:

—¿La rlaizlu jiajclu?

⁷ —Dad —räjp beñ racxhuuga lojni—, dina gapä chu gusäl narä nen nis cheni rniib nisre. Cheni rlažä chachu'ä lo nis, stee bejñ rujñ gaan narä, ganidni richu'ni lo nisga.

⁸ Räjp Jesús lojni:

—Huistie, guläs xta'lu, guszaj, huij.

⁹ Lagajc dxejc biajç bejñga, guläsni xta'ni, gusloj gusajni. Niluxh dxejga najc dxej nani rusilajz rexpejñ Israel, ¹⁰ ni'c räjp rexpejñ Israel lo bejñ ni biajçga: —Nadxej najc dxej ni rusilajz bejñ. Di gacdi guulu xta'lu.

¹¹ Laani räjpni:

—Nani basiajç narä, laani naj loä: “Guläs xta'lu, guszaj.”

¹² Dxejc gunabdiidxreni lojni:

—¿Chuni'c naj lojlu “Guläs xta'lu, guszaj”?

¹³ Dxejcti beñ racxhuu ni biajçga dini gaan, sa'csi gunitloj Jesús, biriini ro'c laj ni tre' xhidajl bejñ lajtga. ¹⁴ Che bidxaagni Jesús stehuält nen guidoro, räjp Jesús lojni:

—Ahuii, naj ni abiajclu, na'c gunlu dojl stehuält, didi sajclu xhi stee ni najc cuentroru.

¹⁵ Sä'ti bejñga, huiye'tzni loj rexpejñ Israel laa Jesús ni basiajçni. ¹⁶ Ni'cni gusloj rexpejñ Israel carinajlreni Jesús, rlaizreni guiga'ni te ju'trenini, sa'csi rujñni redzuunga dxej ni rusilajzreni. ¹⁷ Luxh räjp Jesús lojreni:

—Xtadä Dios najli cayujñni dzuun, ni'cni näjza narä cayunä dzuun.

¹⁸ Ni'cni rlaizru rexpejñ Israel ju'tni, xhet ganaxdi sa'csi rujñni dzuun dxej ni rusilajzreni, per näjza sa'csi räjpni Dios najc Xtadni, rniizani tebloj najcni con Dios.

Yälrnibee xten Xi'n Dios

¹⁹ Badzu' Jesús diidxre räjpni lojreni:

—Rniliä, rniliäpac lojtu. Di gacdi gun Xi'n Dios dzuun xtebni, palga dini fixgaa rujñ Xtadni dzuunga, sa'csi guira'tis dzuun ni rujñ Xtadni, dzuunga

rujnza Xi'nni sigajc rujn Xtradni. ²⁰ Sa'csi rinälajz Dad xi'nni, ruluiini lo xi'nni guiraa redzuun nani rujnni, luxh dzunroruza suluiini lojni gunni, te guidxelojtu. ²¹ Sigajc ni rliäs Dios rebengut, rudeedni yälñabajñ lojreni, sigajcza sudeed xi'nni yälñabajñ lo renani rlažztisni. ²² Nicla Dad di gun yälğuxhtis, alga badeedni guiralii yälğuxhtis gun Xi'nni, ²³ te guiraa bejn guiliä'p xpala'n xi'nni si'cni rliä'preni xpala'n Dad. Nani di guiliä'p xpala'n Xi'nni, dizani guiliä'p xpala'n Xtradni ni baxhałni biädni.

²⁴ 'Rniliä, rniliäpac lojtu, nani rucuardiajg xtidxä, ni chalilajzzani nani baxhał narä, ni'c rajpni yälñabajñ par tejpas; niluxh dini ted lo yälğuxhtis, alga abiriini lo yälğujt, agudejdni lo yälñabajñ. ²⁵ Rniliä, rniliäpac, sidzujñ or, luxh alabidzujñni, cheni siejn diajg rebengut xse' Xi'n Dios, luxh reni riejn diajgni diidxga sibansacreni lo rebengut. ²⁶ Si'cni rajp Dad Dios yälñabajñ lagajcsi laani, sigajcza badeedni lo Xi'nni ga'pni yälñabajñ lagajcsi laazani. ²⁷ Badeedzani lojni yälñabee te gunni yälğuxhtis, sa'csi najcni Xi'n Dios ni gujc Niguii. ²⁸ Na'c rdxelojtu rediidxre, sa'csi sidzujñ or cheni guiraa reni yu' neñ baa siejn diajgreni xse'ni ²⁹ siriizareni neñ baa. Reni bejn dzunsa'c siriireni te guibansacreni loj yälñabansa'c, niluxh reni bejn dzunguijdx, siriireni te guibansacreni te tedreni lo xcälğuxhtis Dios.

Nani ruluiioj yälñabee ni rajp Jesús

³⁰ 'Xhet rajcdi runä lagajcsi narä. Sigajc ni riejn diagä, sigajcza runä yälğuxhtis. Luxh yälğuxhtis ni runä laaca najcni sa'csi dina quilä gunä nani rlažätis, rguilätis gunä si'c ni rlažz Dad nani baxhał narä. ³¹ Palga narätis rniä diidx lagajc xcuentä, xhet sajcdi diidxga. ³² Yu' stee nani rniliä diidx xcuentä, luxh nancheä diidx ni rniini xcuentä sacduxhni, guliipacni. ³³ La'tu abaxhałtu chu huij loj Juan, huinabdiidxreni lojni "chu najc bejñga", niluxh badzu'ni diidx lojreni guniini diidx guliipac xcuent chu nacä. ³⁴ Narä dina jiuä diidx nani rnii rebejñ xcuentä luxh canisacä rediidxre te laatu lo xtojtu. ³⁵ Juan gujc si'c te bajl ni ralguij, basanižzani. Luxh la'tu huihuiituni bibalajztu lo xpianijni balsi dxej. ³⁶ Luxh narä rapä xhi ruluiiojru chu nacä lo diidx ni gunii Juan; sa'csi lagajc dzuun nani baniidx Xtradä gunä, lagajc redzuun ni runä, huenliisi ruluiiojreni Xtradä Dios baxhał narä. ³⁷ Xtradä ni baxhał narä lojtu agunilii chu nacä. Gajdpactu jiejn diajg xse'ni, gajdzatu fii lojni. ³⁸ Dizatu ga'p xtiidxni neñ lastootu, sa'csi di lajztu chalii xtiidx nani baxhał narä. ³⁹ La'tu rolduxhtu reguijtz xten Dios sa'csi rchalotu si'c sidxältu yälñabajñ par tejpas, luxh lagajc reguijtzga rusule' chu narä. ⁴⁰ Naadditu jiaädtu loä te ga'ptu yälñabajñ par tejpas.

⁴¹ 'Narä dina quilä chu bejñ guiliä'p xpala'nä nez loä. ⁴² Luxh narä anumbeätu, ananä ditu chanälajz Dios neñ lastootu. ⁴³ Narä biälä xcuent Xtradä, luxh ditu gucuadiajg xtidxä; paru jiaäd chu stee bejñ xcuentcani, ni'c sii sucuadiajgtu xtiidxni. ⁴⁴ Xho gac chalilajztu, ni rliä'ptu xpala'n lagajc sa'tu. Ditu quiil xho gac guiliä'p Gueb Dios xpala'ntu. ⁴⁵ Di naatu pet narä ni chale'cä xquejtu lo Xtradä. ToMoisés ni chale'c xquejtu, luxh rujntu xhigab lagajc xleiini gacnäj la'tu. ⁴⁶ Paru la'tu nililajzpacu xtidx toMoisés, dxejc niliiza lajztu xtidxä sa'csi xcuentä bacuaa toMoisés lo reguijtz. ⁴⁷ Palga ditu chalilajz nani bacuaani lo reguijtz, ¿xho chalilajztu rediidx nani caniä lojtu, ä?

6

Bayaan Jesús gaii mił niguii
(Mt. 14:13-21; Mr. 6:30-44; Lc. 9:10-17)

¹ Che gulujx gujc recosre, dxejc sää Jesús stelaad nezro' nisdoo xten Galilee, nani rniizareni nisdoo xten Tiberias. ² Sanajl xhidajl bejn̄ni sa'csi rhuiireni remilagwr ni rujnni lo rebenracxhuu. ³ Dxejcti huä'p Jesús yejc te dajn, ro'c gurenäjni rexpejn̄pacni. ⁴ Niluxh ameer gac lanij pascw xten rexpejn̄ Israel, cheni rudeedreni xquixhtios lo Dios xcuent dxej ni biriireni Egipto. ⁵ Cheni guläs Jesús lojni, bahuiini siääd xhidalduxh bejn̄, siäädreni nez lojni, dxejcti räjpni loj Felipe:

—¿Caro guisiinu yätxtiil te gau rebejn̄re?

⁶ Dxejc räjpzani si'c te don xhi xhigab gun Felipe, luxh laani anajnni xho gunni. ⁷ Räjp Felipe lojni:

—Di tio'p gayuu beex yätxtiil gaḷ te gaureni tlagaj.

⁸ Tej rexpejn̄pacni ni laa Andrés, bejtz Simón Pedr, räjp lojni:

⁹—Ree suga' te biuux ca' gaii yätxtiil con tio'p bäjl, ¿xhixh sajl ni'c gau reben xhidajlre?

¹⁰ Dxejcti räjp Jesús:

—Colyejtz loj rebejn̄re cuereni.

Yuduxh guixa' ro'c. Dxejcti gurej reniguii. Si'cti gaii miḷ najc reniguii.

¹¹ Dxejcti cua' Jesús yätxtiilga, badeedni xquixhtios lo Dios, gudisni yätxtiilga lo rexpejn̄pacni. Dxejcti rexpejn̄pacni gudisrenini loj rebejn̄ nani sobga'. Sigajcza gudisreni rebäjl si'ctisni rlajzreni gaureni. ¹² Che gulujx gudajwreni, gudxaj xque'reni, dxejcti räjp Jesús loj rexpejn̄pacni:

—Colgutie' guiraa reyätxtilbiujy nani bia'n te xhet nitdi.

¹³ Batie'tireni reyätxtilbiujy, guläsreni tzubitio'p dxijm̄ yätxtilbiujy nani bia'n lo gaii yätxtiilga nani gula' gudajwreni. ¹⁴ Che bahuii rebejn̄ga reseem, remilagwr nani bejn̄ Jesús, dxejc räjpreni:

—Guluiipacni, laa dee ni najc niguii ni rniü xtidx Dios nani cabääznu jiääd lo guedxliuj.

¹⁵ Sas che gucbee Jesús cayujnreni xhigab jiädnaazrenini te niujnreni gacni reii te guinibeeni lojreni, biriini ro'c, xtebni gubisacni neḅ dajn.

Gusaj Jesús lo nisdoo

(Mt. 14:22-27; Mr. 6:45-52)

¹⁶ Che gojl guxhij̄n, bidzuj̄n rexpejn̄pacni lo nisdoo. ¹⁷ Biu'reni neḅ te barcw te tedreni lo nisdoo nez guedx Capernaum. Abicäy lo yuj niluxh gajd Jesús guibi' lojreni te chääni. ¹⁸ Gusloj cayäjs nisdoo xcuent te beduxh nani cabi'.

¹⁹ Ni'cni che gusajreni si'cti gaii o xho'p kilómetro, bahuiireni siädzungajxh Jesús lo barcw, lo nisdoo siädsajni. Bidxebduxhreni. ²⁰ Luxh laani räjpni lojreni:

—Naräni. Na'c guidxejbtu.

²¹ Dxejcru cuäjbreni biu'ni neḅ barcw. Dxejcti bidzungajczeni stelaad lo yuj cadro sääreni.

Caguuil rebejn̄ Jesús

²² Che bara yääl, rebejn̄ nani bia'n stelaad ro' nisdoo, bahuiireni asanä rexpejn̄pacni barcwbäz nani suga' ro'c, niluxh di Jesús nij, xtebsireni sääreni.

²³ Luxh bidzungajc sgaii barcw nani birii guedx Tiberias, te lajt ni tre' gajxh cadro gudajwreni yätxtiil che gulujx badeed Jesús xquixhtios lo Dad. ²⁴ Che bahuii rebejn̄ ruti Jesús ro'c, niclaza rexpejn̄ni, biu'reni neḅ rebarcw, sääreni guedx Capernaum satiilreni Jesús.

Jesús najc yätxtiil xten yäl̄nabajn̄

²⁵ Che bidxälreni Jesús stelaad ro' nisdoo, räjpreni lojni:

—Mastr, ¿guc bidzuj̄nlu ree?

²⁶ Badzu' Jesús diidxre, räjpni lojreni:

—Rniliä, rniliäpac lojtu, caguiiltu narä sa'csi gudajwtu, gudxaj xque'tu, et sa'csi bahuiiditu remilagwr nani benä. ²⁷ Na'c guntu dzuun ganax par yälrajw nani rnitloj. Colyejn dzuun par yälrajw nani di nitloj, ni runiidx yälñabajn par tejpas. Yälrajwre suniidx Xi'n Niguii, sa'csi loj rebejn baluii Xtadni, Diospac, laani najc Xi'npacni.

²⁸ Dxejcti räjpreni:

—¿Xhini'c jiennu te gac jienpacnu dzuun ni rlajz Dios?

²⁹ Räjp Jesús lojreni:

—Dee najc ni rlajz Dios guntu: chalilajztu xtidx narä, nani baxhañni.

³⁰ Räjpreni lojni:

—¿Xhi seen gunlu te guihuiinu xcälñibeelu te cholilajznu xtiidxlu? ¿Xhi dzuun rujnlu? ³¹ Retoxtadnu gudajwreni yätxtiil ni laa mana loj reyubijdz si'cni caj loj reguijtz: “Badeedni yätxtiil ni biajb xhaguibaa gudajwreni.”

³² Räjpza Jesús:

—Rniliä, rniliäpac lojtu, xhet toMoisésdi ni badeed yätxtiil ni biajb xhaguibaa. Xtadä ni suniidx yätxtiil nani siäädpcac xhaguibaa. ³³ Sa'csi yätxtiil xten Dios najc bejn ni siääd xhaguibaa, niluxh laani rudeedni yälñabajn par tejpas loj rebejn guedxliuj.

³⁴ Räjpreni:

—Dad, baniidx yätxtiilga loonu.

³⁵ Dxejcti räjp Jesús lojreni:

—Narä nacä yätxtiil xten yälñabajn nani riäjñ jiaäd; chutis ni jiaäd loä diruni guiliaan, niluxh chutis ni rililajz xtidxä diruni jiojñ par tejpas. ³⁶ Aguniä lojtu, la'tu ditu chalilajz, luxh abahuiitu loä. ³⁷ Guiraa renani abaniidx Xtadä loä, siäädni loä, niluxh chutis ni jiaäd loä dina cuälazäni. ³⁸ Sa'csi narä siälä xhaguibaali te gunä si'c ni rlajz Xtadä, xhet si'cni ni rlazädi. ³⁹ Dee najc ni rlajz Xtadä nani baxhañ narä: na'c nit nicla tej renani baniidxni loä, te guspañsacä guiragajcreni che gañ dxej lult ni riäjñ jiaäd. ⁴⁰ Scree rlajz nani baxhañ narä: guiraa renani fii lo Xi'n Dios, näj chalilajzreni xtiidxni, xca'reni yälñabajn par tejpas niluxh narä suspañsacäreni che gañ dxej lult ni riäjñ jiaäd.

⁴¹ Rediidxre bejn gusloj casiejy rexpejn Israel xcuent Jesús sa'csi räjpni: “Narä nacä yätxtiil ni biäjt xhaguibaa.” ⁴² Dxejcti räjpreni:

—¿La et Jesúsdi, xi'n José dee, ä? Nuure numbeenu xtadni, xnanni, ¿xhoxh rniini xhaguibaa biäjtñi?

⁴³ Dxejcti räjp Jesús lojreni:

—Na'c rusieinäj sa'tu. ⁴⁴ Rut rajcni riääd loä palga di Xtadä ni baxhañ narä jiaädni loä, te guspañsacäni che gañ dxej lult ni riäjñ jiaäd. ⁴⁵ Loj reguijtz ni bacuaa redade' ni gunii xtidx Dios caj scree: “Suliii Dios guiraareni.” Ni'cni guiraa reni rucuaiajg xtidx Xtadä, reni rsieed lojni, reni'c ni jiaäd loä.

⁴⁶ 'Dinä guiniä yu' chu abahuii lo Dios; tejtis ni abahuii lojni: nani baxhañ Dios, ni'ctis abahuii lojni. ⁴⁷ Rniliä lojtu che rniä: nani chalilajz xtidxä, ni'c rajp yälñabajn par tejpas. ⁴⁸ Narä nacä yätxtiil nani rudeed yälñabajn. ⁴⁹ Retoxtadtu gudajw mana ni bastejb Dios lo reyubijdz, dxejcti gujtzareni. ⁵⁰ Dee najc yätxtiil ni siääd xhaguibaa, te chutis ni gau yätxtiilga dini guet. ⁵¹ Narä nacä yätxtiil bajn ni siääd xhaguibaa. Palga yu' chu gau yätxtiilre, sibajñni par tejpas. Yätxtiil nani runidxä narä te xca' rebejn guedxliuj yälñabajn najc lagajc bältiexhä.

⁵² Dxejcti gusloj casiejy rexpejn Israel räjpreni:

—¿Xho gac guniidx dee bältiejxhni guidaunu, ä?

⁵³ Räjp Jesús:

—Rniliä, rniliäpac lojtu, palga ditu gau bältiejxh Xi'n Dios ni gujc Niguii, palga dizatu yä xtiejnni, digacdi ga'ptu yäl_nabaj_n. ⁵⁴ Nani gau bältiehxä, nani yäza xtienä, ni'c rajp yäl_nabaj_n par tejpas, niluxh suspansacäni che gal redxejlult. ⁵⁵ Sa'csi bältiehxä najc te yäl_rausa'cpac, xtienä najcza te yäl_räsa'cpac. ⁵⁶ Nani gau bältiehxä, nani yäza xtienä, ni'c yu'pac con narä, luxh narä yu'äza con laani. ⁵⁷ Xta_dä ni baxha_l narä rajp yäl_nabaj_n par tejpas. Narä naba_nä xcuent laani. Sigajcza nani rajw narä, sibaj_nzani xcuent narä. ⁵⁸ Dee najc yätxtiil nani biääd xhaguibaali; dini gac si'c mana ni gudajw xtadtu dxejc empac gujtreni, sa'csi nani gau yätxtiilre sibaj_nni par tejpas.

⁵⁹ Recosre baluui Jesús ne_n te guidobäz la_l ni guyu'ni guedx Capernaum.

Diidx xten yäl_nabaj_n par tejpas

⁶⁰ Che biejn diajgreni si'c, xhidajl rexpej_npacni räjp:

—Naganduxh najc rextiidxni. ¿Chu laa nani gac cuadiajgni?

⁶¹ Dxejcti gucbee Jesús cagusiejyreni xcuent rediidxga, dxejc gunabdiidxni räjpni:

—¿La rusieed rediidxre la'tu, ä? ⁶² ¿Xhicha guntu paru fitu chä'p Xi'n Dios ni gujc Niguii cadro guyu'ni galoo? ⁶³ Sprit xten Dios najc ni rudeed yäl_nabaj_n; bältiejxhni xhet rujndini gaan. Rediidx nani guniä lojtu najc didxlii xcuent recos xten Sprit, luxh rediidxga rudeed yäl_nabaj_n par tejpas. ⁶⁴ Luxh la_tis yu' lojtu reni di chalilajz.

Sa'csi Jesús nancheeni galooli chu reni'c di chalilajz, anajnzani chuni'c guto'ni, gutedni laani ladz_naa rebe_n dojl. ⁶⁵ Dxejcti räjpni:

—Ni'cni rniä lojtu, nicla tej rut sajcdi jiääd loä palga di Xta_dä jiäd_näni loä.

⁶⁶ Lagajc dxejc gusloj cabicaj xhidajl rebej_n ni agujc xchej gusanäj Jesús, dirureni nisianäj Jesús. ⁶⁷ Dxejcti räjp Jesús loj guidzubitio'p rexpej_npacni:

—¿La nägajcza la'tu r_lajztu jiitu, ä?

⁶⁸ Badzu' Simón Pedr diidxre, räjpni:

—Dad, ¿chuloj chonnu? Luj rajplu diidx ni rudeed yäl_nabaj_n par tejpas.

⁶⁹ Nuure abiolilaaznu, anajnnu najclu Crist Xi'n Dios nani nabaj_n.

⁷⁰ Badzu' Jesús diidxre, räjpni:

—¿La et lagajc narädi guleä guitzubitio'ptu? Luxh tejt_n najc be_ndxab.

⁷¹ Diidxga guniini xcuent Judas Iscariote, xi'n Simón, sa'csi Judas najc ni guto'ni mase nadxaagni lo guitzubitio'p rexpej_npac Jesús.

7

Di rebejtz Jesús chalilajz

¹ Che gujcti recosre, cansaj Jesús nez reyuj xten Galilee, di r_lajzni jia'nni nez reguedx Judea sa'csi r_lajz rebe_n ro'c ju'tni. ² Luxh ameer gal lanij xten cose'ch xten guidoguijd, te relanij xten rexpej_n Israel. ³ Ni'c räjp rebejtz Jesús lojni:

—Na'c jia'nlu ree. Huij Judea te näjza rexpej_npacu fii redzunro nani rujnlu.

⁴ Sa'csi rut rujndi xtz_uunni xhiga'tz palga r_lajzni gacbee bej_n xhi dzuun rujnni, te gumbee bej_nni. Palga rujn_npacu redzuunre, baluini lo guiraa rebe_n guedxliuj.

⁵ Guniireni si'c lojni sa'csi nicla rebejtzni di chalilajz xtiidxni. ⁶ Dxejcti räjp Jesús lojreni:

—Gajd xhorä guidzuj_n, niluxh par la'tu xhitis or najc hueen. ⁷ Di gacdi guidxe'ch rebe_n guedxliuj lojtu, luxh rdxe'chreni loä sa'csi narä rniliä xcuentreni: dzunguijd_n najc xtz_uunreni. ⁸ La'tu colchäj lanij; narä dina cha'a lanijga sa'csi gajd xhorä gal.

⁹ Che gulujx guniini si'c lojreni bia'ntini nez Galilee.

Huij Jesús lanij xten retabernaculos

¹⁰ Dxejcti che asää rebejtzni lanij, dxejc näjza laani sääni lanij, luxh dini nusäbdiidx, si'c xhiga'tz sääni. ¹¹ Dxejcti caguiil rexpejn Israelni lo lanijga, räjpreni:

—¿Concha niguiiga?

¹² Lo rebejn xhidaalga yu' xhidajl bejn ni cagusieyreni xcuentni. Yu'reni räjp: “Hueen najcni”, per sgaiireni räjp: “Dini gac hueen. Cagusgueeni rebeñguejdx.”

¹³ Nicla tejreni xhet casäbdiidxireni xhini'c caniireni. Direni guinii dip sa'csi rdxejbreni rexpejn Israel nani rnibee.

¹⁴ Agurojl lanij, che biu' Jesús neñ guidoro. Dxejcti gusloj caguluiini.

¹⁵ Dxejcti rdxeloy rexpejn Israel nani rnibee, räjpreni:

—¿Xho najn dee guiraloy, niluxh dini nisieed xleii toMoisés?

¹⁶ Badzu' Jesús diidxre, räjpni:

—Yälruuii nani caluiyā et xtenādini, xten nani baxhaļ narāni. ¹⁷ Palga yu' chu rlajz gun nani rlajz Dios, sacbeeni la xten Dios najc reyälruuii xtenā, o la lagajcsi narā rbää diidx ni caguluiā. ¹⁸ Nani rusule'ni diidx nani lagajc laani rbääni, ni'c rniini diidxga te guiliā'p rebejn xpala'nni, luxh nani rguuil chā'p xpala'n nani baxhaļni, ni'c ni rni diidxlii, xheti yälrusguee neñ lastooni. ¹⁹ ¿La di toMoises nuniidx leii lojtu, ä? Niluxh nicla tejtū di gusoob xtidx leiiga. ¿Xhicuent rlajztu ju'ttu narā, pes?

²⁰ Badzu' rebeñ xhidajlga diidxre, räjpreni:

—¿Xpriet beñdxab yu' lastoolu! ¿Chuni'c rlajz ju'tlu?

²¹ Badzu' Jesús diidxre lojreni, räjpni:

—Tejtis dzuun benā con xcälrnibeā, dxejc guiraatu cadxeloytu sa'csi benāni dxej ni rusilajztu. ²² Ni'cni baniidx toMoisés lojtu yälru'tu bee, luxh etlaadini guläxtiejnini, agac guläxtiej retoxtadgoldootuni. La'tu rusäl'tu bee rebiuux mase najcni dxej nani rusilajztu. ²³ Mbaj pes, palga rajc rusäl'tu bee bejn te dxej nani rusilajztu didi nit xleii Moisés, ¿xhicuent rdxe'chtu loā sa'csi basiacāpac te bejn te dxej nani rusilajztu, ä? ²⁴ Na'c rujntu yälguixhtis si'ctis ni rlajztu. Colyeyn yälguixhtis con yälguixhtis xten Dios.

Rusule' Jesús casiädni

²⁵ Dxejcti gusloj gaii bejn Jerusalén cayujn yälgunabdiidx, räjpreni:

—¿La etlaadi dee ni caguiilreni te ju'trenini, ä? ²⁶ Ani asuga', caniini nez loj guiraa rebeñguejdx, niluxh rut rudxojdini. ¿Xhaa ahuililajz reguxhtis, regubier laani najcpacni Crist, ä? ²⁷ Niluxh nuure nadoncheenu caro siäd niguiire, niluxh che jiäd Crist, rut gacbeedi caro siädni.

²⁸ Caguluii Jesús neñ guidoo che biejn diajgni rediidxre, dxejc dipduxh guniini, räjpni:

—La'tu numbeetu narā, najntu caro siälā; luxh dina niälā lagajcsi narā; nani baxhaļ narā guliipac nabajnni, luxh la'tu ditu gumbeeni. ²⁹ Luxh narā numbeāni, sa'csi lojni biriā, laani baxhaļzani narā.

³⁰ Dxejc rlajzreni niniaazrenini, niluxh rut gunaazdini, sa'csi gajd xhoṛni gaļ. ³¹ Xhidajl bejn lo rebeñ xhidajlga huililajz xtiidxni, dxejcti räjpreni:

—Cheni jiäd Crist, ¿xhixh sujnrūni milagwr loj nani rujn dee, ä?

Ruxhaļ refarisee guixhajg guiniaaz Jesús te jiāuni

³² Che biejn diajg refarisee xhi canii rebejn xcuent Jesús, laareni näjza rebixhojz nani rnibee lo rebixhojz baxhaļreni guixhajg te guiniaazreni Jesús te jiāuuni. ³³ Sas räjp Jesús lojreni:

—Bale'si dxej su'ä lojtu, dxejcti guibi'ä loj nani baxhaġ narä. ³⁴ Sigiuiltu narä, niluxh ditu guidxäl narä, sa'csi cadre cha'ä digacdi jiäädte.

³⁵ Ni'c gunii rexpejn Israel lo sa'reni; räjpreni:

—¿Cacharo chääni ni'c di gacdi guidxäl nuni? ¿Xhaa sijni loj rexpejn Israel nani nare'ch nez lajdx regriegos te guluiini regriegos? ³⁶ ¿Xhi säloj diidxre nani guniini loonu: “Sigiuiltu narä, niluxh ditu guidxäl narä, sa'csi cadre cha'ä di gacdi jiäädte”?

Regueu nisnabajn

³⁷ Lult dxe lanij, ni najc dxero, gusulii Jesús dipduxh guniini, räjpni:

—Palga yu' chu cayojġ, sujiäädni loä te yäni. ³⁸ Nani chalilajz xtidxä si'cni caj lo rexquijtz Dios neġ lastoolini siliejn nisnabajn.

³⁹ Rediidxre guniini xcuent Sprit Dxa nani churu jiädläz neġ lastoo reni rililajz xtiidxni, sa'csi gajd Sprit Dxa jiääd, sa'csi gajd Jesús guibañsac lo rebeġgut.

Gucgala' rebejn

⁴⁰ Lo rebeġ xhidajlga yu' reni biejn diajgreni rediidxga, dxejc räjpreni:

—Guliipacni, dade're najc laapac ni siääd, si'c ni rnii xtidx Dios.

⁴¹ Yu'zareni räjp:

—Dade're najc Crist ni cabääznu.

Yu'za sgaii ni räjp:

—Gurniälojtu jiääd Crist nez Galilee. ⁴² Ni loj rexquijtz Dios caj riäjlpac gac Crist te rexagdoo toreei David, jiäädzani guedx Belén, lagajc guejdx cadre siääd toreei David.

⁴³ Dxejcti gucgala' rebejn xcuent Jesús. ⁴⁴ Yu'reni rlajz chääni pres luxh rut biajxdi gunaazni.

Di reguxhtis chalilajz biääd Crist

⁴⁵ Gubi' reguixhajg xten guidoo loj rebixhojzro näjza refarisee. Dxejcti gunabdiidxreni loj reguixhajg, räjpreni:

—¿Xhicuent ditu niädnäni?

⁴⁶ Badzu' reguixhajg diidxre, räjpreni:

—¿Gajdpac te bejn guinii si'cni rnii bejnga!

⁴⁷ Dxejc räjp refarisee:

—¿La näj la'tu abasgueeni, ä? ⁴⁸ ¿Xhixh loj regubier o loj refarisee yu' chu tej ni ahuililajz xtiidxni, ä? ⁴⁹ Rebeġ xhidajlre ni di gan xleii to Moisés, reni'c agunijtpac.

⁵⁰ Nicodem, nani huij lojni te guxhijġ, najc te refarisee. Laani räjpni lojreni:

⁵¹ —Lo xleiiu caj: digacdi guntu yälguxhtis te bejn palga gajdtu gucuadi-agxgaa xtiidxni, te don xhi bejnni.

⁵² Badzu'reni diidxre räjpreni lojni:

—¿La näjza luj siäädlu Galilee, ä? Biłsa'c xhi caj lo xquijtz Dios, suhuiilu nicla tej niguii nani rnii xtidx Dios di jiääd nez Galilee.

Gunaa nani biga' carälguijxh con te niguii

⁵³ Dxejc cade tejreni sii rolizreni.

8

¹ Dxejcti huij Jesús nez dan Oliib. ² Rsilru gubi'ni, bui'ni neġ guidoo. Luxh sanuutis siääd guiraa rebeġguejdx lojni. Dxejc ro'c gurejni, gusloj caguluiinireni. ³ Dxejcti biääd refarisee näjza rebeġ najn, biädnäreni te gunaa nani biga' carälguijxh con te niguii. Basujrenini galäii reni suga' ro'c. ⁴ Räjpreni loj Jesús:

—Mastr, gunaare biganäj te niguii carälguijxhrene, niluxh yu' chäälni. ⁵ Loj leii xten Moisés caj guicuaanu guij yejc sa' gunaaga te guetni. Luj ¿xhicha naalu?

⁶ Si'c räjpreni lojni te gaxäjsi gunijtni te diidx te gac cue'creni xquejni. Niluxh Jesús basajbtisni lojni lo yuj, gusloj cagucuaani lo yuj con bicueñaani.

⁷ Dxejc sanuutisreni canabdiidxreni, huisutini, räjpni:

—Nani yu' lojtu ni xhettipac xtojlni, ni'c ganiddoo sugucuaani guij yejc gunaare.

⁸ Basabsac lojni lo yuj sanuutis cagucuaani con bicueñaani lo yuj. ⁹ Luxh laareni che biejn diajgreni diidxga, sa'csi yu' xtojlni, gusloj biriireni tebgajreni, ganid ni najc bengolru, dxejcti ni najc huinru. Dxejcti bianxteb Jesús näjza gunaä ni suga' galäiireni. ¹⁰ Dxejc gusulii Jesús, luxh sa'csi rutru lojdi bahuini, xtebtis gunaaga, räjpni lojni:

—Gunaä, ¿con reni cabe'c xquejlu? ¿La rut bacuaquiadiru luj, ä?

¹¹ Räjp Gunaaga:

—Nicla tejreni, Dad.

Dxejcti räjp Jesús lojni:

—Niclaza narä dina gucuaquiäru luj. Huij, na'cru gunlu dojl.

Jesús najc bianij xten guedxliuj

¹² Gunii Jesús lo rebejn stehuält, räjpni lojreni:

—Narä nacä bianij xten guedxliuj; nani jiädnajl narä dini sa lo yäl_nacäjy, sica'ni bianij ni rudeedpac yäl_nabajn.

¹³ Dxejcti räjp refarisee lojni:

—Luj caniilu diidx lagajcsi xcuentlu. Xhet sajcdi sa' diidxga.

¹⁴ Badzu' Jesús diidxre, räjpni lojreni:

—Masque lagajc narä rniä diidx xcuentä, sajc xtidxä, guliipacni, sa'csi ananä caro siälä, ananäza caro cha'ä. Niluxh la'tu ditu gan caro siälä, niclaza caro cha'ä. ¹⁵ La'tu rujntu yälguxhtis si'c najctis rehxigab xten beñ guedxliuj. Narä rut lojdi runä yälguxhtis. ¹⁶ Palga gunä yälguxhtis, yälguxhtis xtenä laaca najcni, sa'csi et xtebädi runä yälguxhtis, sa'csi narä näj Xtäädä ni baxhal narä rien_nuni. ¹⁷ Luxh lo xleiitu caj diidxre: “Che rnii tio'p bejn tejsi diidx, didxliini, colchalilajzni.” ¹⁸ Narä rniliäpac diidx lagajc xcuentä, dxejcti Xtäädä nani baxhal narä rniliizani diidx xcuentä.

¹⁹ Räjpreni loj Jesús:

—¿Caro yu' xtadlu?

Räjp Jesús lojreni:

—Ditu gumbee nicla narä, niclaza Xtäädä; paru niembeetu narä, niem-beezatu Xtäädä.

²⁰ Rediidxre gunii Jesús cadre re' gojn, la_l ni caguluiini nen guidoro niluxh rut gunaazdini sa'csi gajd xhorni guidzujn.

Cadro cha'ä, la'tu digacdi jiäädту

²¹ Gunisac Jesús lojreni, räjpni:

—Narä sia'ä, luxh la'tu siguiiltu narä, niluxh loj xtojltu sejtту. Cadre cha'ä di gacdi jiäädту.

²² Räjp rexpejn Israel loj resa'reni:

—¿Xhaa sugu'tni lagajc laani, ni'cni najni di gacdi chonnu cadre chääni?

²³ Räjp Jesús lojreni:

—La'tu najctu beñ lo yuj. Narä nacä beñ ni siääd jiaa. La'tu najctu beñ guedxliujre. Luxh narä dina gacätis beñ guedxliujre. ²⁴ Ni'cni guniä lojtu, sejtту lo xtojltu sa'csi palga ditu chalilajz nacä chu nacä, sejtpactu lo xtojltu.

²⁵ Dxejcti räjpreni lojni:

—¿Chuxh najclu?

Dxejcti badzu' Jesús diidxre lojreni, räjpni:

—¿Xhini'c guniä lojtu galooli? ²⁶ Xhidajl diidx rlazä guiniä, xhidajlza yäl̄guxhtis rlazä gunä xcuenttu sa'csi ditu chalilajz, per nani baxhaḷ narä najc beḅ guliipac; nani biejn diagä guniini, rediidxga rniä loj reben guedxliuj.

²⁷ Luxh laareni direni niacbee la xcuent Dad Dios ni caniini. ²⁸ Ni'cni räjp Jesús lojreni:

—Cheni guiliästu Xi'n Niguui jiaa, dxejc sacbeetu laa narä ni baxhaḷni, luxh xhetliidi runä lagajcsi xcuentä. Si'cni baluii Dad narä, si'ctis rniä. ²⁹ Nani baxhaḷ narä suganäjni narä. Gajd Dad gusanxteb narä, sa'csi runätis ganax redzuun nani rchaglajzni.

³⁰ Laḷ ni caniini si'c, xhidajlreni huililajz xtiidxni.

Rexi'n Dios con remos xten dojl

³¹ Dxejcti räjp Jesús lo rexpejn̄ Israel nani huililajzga:

—Palga la'tu sutijptu, guzoobtu xtidxä, dxejc guliipac najctu xpenä.

³² Sumbeezatu nani najc didxgulii, niluxh didx guliiga susḷaa la'tu lo xtojḷtu.

³³ Räjpreni lojni:

—Rexagdoo toAbraham najcnu, rut chu lojdi gudo'nu si'c mos. ¿Xho mood naalu “sil̄iaatu”?

³⁴ Räjp Jesús:

—Riniliä, rniliäpac lojtu, chutis ni rujn̄ dojl̄ najc mos xten dojl̄. ³⁵ Nani najc mos, dini jia'n rolijz xlamni guideb guibaj̄ni, niluxh nani najc xi'n lamga, ni'c sii sia'n rolijz xtadni guideb guibaj̄ni. ³⁶ Ni'cni, palga rusḷaa xi'nni la'tu lo dojl̄, dxejcsii apac gulaatu. ³⁷ Ananä najctu xagdoo toAbraham, luxh la'tu rlanjtu ju'ttu narä sa'csi di xtidxä jiu' lo xcäriejntu. ³⁸ Narä rniä nani abahuiä con Xtadä; luxh la'tu rujntu nani biejnza diajgtu lo xtadtu.

³⁹ Badzu'reni diidxre, räjpreni lojni:

—Xtadnu najc toAbraham.

Dxejc räjp Jesús lojreni:

—Palga la'tu najc pactu xi'n toAbraham, sujntu sa' dzuun ni bejn̄ toAbraham. ⁴⁰ Luxh naj rlanjtu ju'ttu narä, sa'csi rniliä rediidx nani baluii Dios loä. ¿Di toAbraham niujn̄ si'c! ⁴¹ La'tu rujntu xtzuun xtadtu.

Dxejc räjpreni lojni:

—Nuure dinu gac xi'n chäl̄bejn̄di; nuure tejtis xtadnu yu', laani najc Dios.

⁴² Dxejcti räjp Jesús:

—Paru guliini najc xtadtu Dios, ninälajztu narä sa'csi loj Dios biriä siälä ree. Xhet lagajcsi xcuentä siälädi; Dios baxhaḷ narä. ⁴³ ¿Xhicuent ditu gacbee rediidx ni rniä lojtu? Sa'csi di rlanjtu gucuadiajgtu rextidxä. ⁴⁴ Xtadtu najc beḅdxab. La'tu najctu xi'nni, rlanjtu guntu nani rlanjtisni guntu. Xtadtu galooli najcni te ni rugu't, dini suu xlaad didxlii, sa'csi xheti didxlii neḅ lastooni. Che rniini didx-xhii, si'c rniini sa'csi si'cpac najcni, sa'csi najcni beḅ didx-xhii, najczani xtad didx-xhii. ⁴⁵ Niluxh narä rniä didxlii, ni'c ditu chalilajz xtidxä. ⁴⁶ ¿Chu tejtis sajc guluii te dojl̄ ni benä? Narä rniä didxlii. ¿Xhicuent ditu chalilajz xtidxä, ä? ⁴⁷ Nani najc xpejn̄ Dios, ni'c rucuardiajg xtidx Dios. Sa'csi la'tu ditu gac xpejn̄ Dios, ni'cni ditu gucuadiajg xtidxä.

Ansde toAbraham, agac nabaj̄n̄ Crist

⁴⁸ Dxejcti badzu' rexpejn̄ Israel diidxre, räjpreni lojni:

—Laaca rniinu luj najclu te bejn̄ ni siääd Samaria, beḅdxab yu' lastoolu.

⁴⁹ Räjp Jesús lojreni:

—Xhet bendxabdi yu' lastoä. Nani runätis rliä'pä xpala'n Xtaä, luxh la'tu alga rbälaztu narä. ⁵⁰ Luxh narä dina quilä chu guiliä'p xpala'nä, yu' chu rguuil guiliä'p bejn xpala'nä, niluxh laani rujnni yalguxhtis. ⁵¹ Rniliäpac lojtu, nani riu, nani rusob xtidä, dipacni guet.

⁵² Dxejcti räjp rexpejn Israel lojni:

—Naj agucebeepacnu yu' bendxab lastoolu. ToAbraham näjza reniguii nani gunii xtidx Dios, guiraareni agujt. Luxh luj rniilu: “Nani riu, nani ruzoob xtidä, dipacni guet.” ⁵³ ¿Xhixh sajcrulu lo toxtadnu Abraham, ä? Ni laani gujtni, gujtzä reniguii ni gunii xtidx Dios. ¿Chuxh rchalolu najclu?

⁵⁴ Badzu' Jesús diidxre, räjpni lojreni:

—Palga lagajc narä rliä'pä xpala'nä, xhet sajcdi xpala'nä. Per nani rliä'p xpala'nä najc Xtaä, lagajcza Xtaä ni rniitu najc Xtiostu. ⁵⁵ Niluxh la'tu ditu gumbeeni. Narä numbeäni. Paru guiniä dina gumbeäni, sacä te bejn didx-xhii si'c najctu la'tu. Niluxh dee, numbeäpacni, luxh riuä ni rniini, rusobä xtiidxni. ⁵⁶ ToAbraham toxtadgoldootu, bibalajzni sa'csi nuhuiini dxej nani jiälä, niluxh bahuiinini dxej bibalazduxhni.

⁵⁷ Dxejcti räjp rexpejn Israel lojni:

—Niela gajdlu chu tiubitzuu ijz, ¿xho naalu abahuiilu lo toAbraham?

⁵⁸ Räjp Jesús lojreni:

—Rniliäpac lojtu, che gajdli guibajn toAbraham, agac nabañä narä.

⁵⁹ Dxejcti cua'reni guij te nucuaareni yej Jesús, per di Jesús niga', biriini nen guidoro, gudejdn galäireni. Sä'tini.

9

Basiajc Jesús te bejn ni natiä'p balojni che gojllini

¹ Che cadejd Jesús te lajt, bahuiini sobga' te bejn ni che gojlli bejnga agajc natiä'p balojni. ² Dxejcti gunabdiidx rexpejpacni lojni, räjpreni:

—Mastr, ¿chuni'c bejn dojl, la bejnre o la xcuzajnni, ni'c natiä'p balojni che gojlni, ä?

³ Räjp Jesús:

—Niela laani, niela xcuzajnni di niujn dojl. Si'c gojlni te xcuent ni saj bejnre suhuii bejn xho najc xtzuun Dios. ⁴ Nanab gunä xtzuun nani baxhal narä naj ni najc rdxee, sa'csi cheni guidzujn guxhijn rut gacdi gun dzuun.

⁵ Lalni yu'ä lo rebejn guedxliuj, nacä xpianij guedxliuj.

⁶ Che gulujx guniini si'c, batiobxhejn lo yuj, bejn bajn con xhejn, gudäbnini con bicuenaani lo rebaloj lotiä'pga. ⁷ Dxejcti räjpni:

—Huij, huitiib lojlu nen nis ni laa Siloé. Laj nisga sälojza “baxhalni”.

Dxejcti huijni. Huitiibni lojni. Che gubi'ni, aruhuiini. ⁸ Dxejcti rexpisin lotiä'pga, näj renani galoo bahuiireni natiä'p lojni, räjpreni:

—¿La et laadi dee ni rbej te rutie'ni gojn, ä?

⁹ Yu'reni räjp:

—Laanini.

Yu'zareni räjp:

—Et laadini, rujnsi lojni si'c.

Laani räjpni:

—Laa naräni.

¹⁰ Räjpreni lojni:

—¿Xho mood arien balojlu?

¹¹ Dxejcti räjp dade'ga nani gujc lotiä'p:

—Dade' ni laa Jesús bejn bajn, gudäbnini baloä, dxejcti najni: “Huitiib lojlu nen te nis ni laa Siloé”, dxejcti che huitibä loä, lagajc dxejcti bien loä.

¹² Dxejcti räjpreni lojni:

—¿Con dade'ga naj?

Räjpti bejn̄ga:

—Dina ganä.

Reben farisee bejn yälgunabdiidx lo dad lotiä'p nani biajc lojni

¹³ Huinäreni nani gujc lotiä'pga nez loj refarisee. ¹⁴ Luxh sa'csi najcni dxej ni rusilajzreni che bejn Jesús bajn̄ ni gudäábni loj lotiä'pga te biajc balojni, ¹⁵ gunabdiidxsac refarisee loj dade' nani biajc balojni, xho mood arien̄ balojni naj.

Laani räjpni lojreni:

—Bajn̄ gudäábni loä, dxejc gudibä loä, naj aruhuiä.

¹⁶ Dxejc yu' refarisee ni räjp:

—Di dade' ni bejn̄ dee gac xpejn̄ Dios, sa'csi dini jiu dxej ni rusilajz xpejn̄ Israel.

Yu'zareni räjp:

—¿Xho gac gunni sa' remilagwrga paru najcni bejn̄ dojl?

Ni'cni gula' sa'reni, gujcreni tio'p gala'. ¹⁷ Dxejcti gunabdiidxsacreni lo ni gujc lotiä'p:

—Luj a', ¿xhi rniilu xcuent nani basiajc balojlu?

Dxejc räjp dade'ga:

—Narä rniä najcni te bejn̄ nani rni xtidx Dios.

¹⁸ Luxh rexpejn̄ Israel naaddireni chalii lajzreni gujcpacni te lotiä'p ni abien̄ balojni, dxejcti gurejdxreni xcuzajn̄ dade' ni gujc lotiä'pga. ¹⁹ Dxejcti gunabdiidxreni lojreni, räjpreni:

—¿Laa xi'ntu dee nani najtu cheni gojllini natiä'p lojni? ¿Xhoxh arien̄ lojni naj?

²⁰ Badzu' rexcuzajnni diidxre, räjpreni:

—Nadonnu laa xi'nnuni, luxh che gojlni natiä'p lojni. ²¹ Niluxh dinu guidon naj xho mood arien̄ lojni, dizanu guidon chu basiajc balojni. Colguiniabdiidx lojni, anajcni bejn̄gool, lagajc laani sajc guiniini xhi gusajcni.

²² Si'c gunii xcuzajnni sa'csi rdxejbreni rexpejn̄ Israel, sa'csi agac bia'nreni diidx sibääreni, dirureni gusaan jiu' nejn̄ guidoo chutis te bejn̄ ni naa Jesús najc Crist nani abiääd. ²³ Ni'cni räjp rexcuzajnni:

—Anajcni bi'n ni ayu' xcäriejnni. Lojni colguiniabdiidx.

²⁴ Dxejcti guredxsacreni nani gujc lotiä'pga, räjpreni lojni:

—Gulä'p xpala'n Gueb Dios. Nuure nadonnu bejn̄ dojl̄ najc dade'ga.

²⁵ Dxejcti badzu' dade'ga diidxre, räjpni:

—Dina ganä la najcni bejn̄ dojl̄ o la dini gac. Tejtis nanä: gucä lotiä'p, luxh naj arien̄ baloä.

²⁶ Stehuält gunabdiidxreni, räjpreni lojni:

—¿Xho bennäjni luj? ¿Xho bejn̄ni basiajcni balojlu?

²⁷ Badzu' dade'ga diidxre, räjpni:

—Ni aguniä guira'ti lojtu, luxh la'tu ditu jiu xtidxä. ¿Xhicuent rlanjtu guinisacäni? ¿Xhixh naj la'tu rlanjtu gactu xpejn̄pacni, ä?

²⁸ Dxejc gudilnäjrenini, räjpreni:

—Luj najclu xpejn̄ni, per nuure najcnu xpejn̄ to Moisés. ²⁹ Anadonnu guninäj Dios to Moisés, niluxh dade're dinu guidon casiäädni.

³⁰ Dxejcti räjp dade' lojreni:

—Dee najc te cos ni guidxeloj bejn̄: la'tu ditu gan casiäädni, jniluxh laani basiajcni baloä! ³¹ Nadoncheenu di Dios cuadiajg xtidx reben̄ dojl̄; palga yu' chu rajn̄ Dios, ni rusoobza xtiidxni, rucuardiajg Dios xtidx sa' bejn̄ga. ³² Che

guslojli guedxliuj gajd diajgnu jiejn xcuent te bejn nani rusiajc baloj te bej lotiä'p nani natiä'p lojni cheni gojllini. ³³ Palga xhet lo Diosdi siääd dade're, xhet sajcdi gunni.

³⁴ Badzu'reni diidxre räjpreni lojni:

—Luj, lo dojlpac gojllu, ¿xho jiädluulu nuure?

Dxejcti guläärenini neñ guidoro, barilaagwrenini.

³⁵ Biejn diajg Jesús guläärenini neñ guidoro, che bidxälnini, räjpni lojni:

—¿La rililajzlu xtidx ni najc Xi'n Dios ni gujc Niguü, ä?

³⁶ Badzu'ni diidxre, räjpni:

—¿Chuni'c najcni, Dad, te chalilazä xtiidxni?

³⁷ Räjp Jesús:

—Abahuulu lojni, lagajcza laani caninäjlu naj.

³⁸ Dxejcti räjpni:

—Rililazä Dad.

Dxejcti bazuxhijbni te gojñnini.

³⁹ Räjp Jesús:

—Par yälguxhtis biälä lo guedxliujre, te fii renani di lojni jieñ, niluxh reni rien lojni sajcreni lotiä'p.

⁴⁰ Refarisee nani suganäjreni, che biejn diajgreni diidxre, räjpreni:

—¿Xhixh najczanu beñ lotiä'p, ä?

⁴¹ Räjp Jesús:

—Paru najctu lotiä'p, rut gucuaquijditu xtojltu, naj sa'csi rniitu rien lojtu, sicaquijtu rextojltu.

10

Jesús najc te baxtorsa'c

¹ 'Rniliä, rniliäpac lojtu, nani di jiu' ro' gurajl xte rexiil, alga richu'ni stelaad, rä'pni cuä' gurajl, ni'c najcni te gubaan. ² Nani riu' nez ro' gurajl xten rexiil, laani najc xpaxtoorreni. ³ Che guidzujñ baxtoor, ruxhal nani rcanäj ro lä', te jiu'ni. Rexiilga numbeerani xse' baxtoor, dxejctiru laani rbejdxni rexiilga, tebgaj xiilga yu' lajni, rinäzanireni cadre naga' guixasa'c. ⁴ Che rii rexiilga neñ gurajl, sanä baxtoorgareni, luxh numbee rexiilga xse'ni, ni'c rsianäjreni baxtoorga. ⁵ Luxh dipacreni chanä te baxtoor nani direni gumbee, ruxuñreni lojni sa'csi direni gumbee xse' garenca bejn.

⁶ Bij Jesús rediidxga lojreni, niluxh direni niacbee xhi säloj ni guniini.

⁷ Dxejcti gunisac Jesús diidx lojreni; räjpni:

—Rniliä, rniliäpac lojtu, narä nacä si'c roxlä' xcurajl rexiil. ⁸ Guiraa reni abiääd galoo, najcreni ganax gubaan luxh di rexiil nucuadiajg xse'ni. ⁹ Narä nacä si'c rolä' xten gurajl, nani jiu' nejzga, silaani loj xtojlni, siu'ni, siriini te guidxälni guixasa'c gauni.

¹⁰ 'Ni najc gubaan riäädtsini te cuanni, te ju'tni, te guxhinzani, niluxh narä siälä te ga'ptu yäl'nabañsa'c, yäl'nabajñ par tejpas. ¹¹ Narä nacä baxtorsa'c; luxh baxtorsa'c sudeed lagajc xcäl'nabajñni xcuent rexiilni. ¹² Niluxh te mos ni rajxh, di gac baxtoorpac, ni xhet xtendini najc rexiil, che rhuini siääd te cuyo't, ruxuñni, li rbälazni rexiil. Dxejc rniaaz cuyo't rexiil, rutie'chzani rexiil. ¹³ Mosga ruxuñ sa'csi najcni mostis, luxh dini jiu xhi rsiajc rexiil.

¹⁴ 'Narä nacä baxtorsa'c; numbeä reni najcpac rexilä; rexilä numbeezareni narä ¹⁵ sigajc numbee Xtadä narä, sigajc numbeäza Xtadä; luxh sudeä xcäl'nabañä xcuent rexiilga. ¹⁶ Rapäza ste cuaa xiil, ni di gac xten gurajlre; näjza laareni nanab chaxiä, te gusobdiajgreni xtidxä, te guidxagsa' guiro'p cuaareni, gacreni tejtis gurajl, tejtisza baxtoor.

17 'Narä siguixäza xcäl̄nabanä, guetä, te dxejcru siliässacä xcäl̄nabanä, guibaṣacä, ni'cni sanälajz Xtadä narä. 18 Rut sajcdi ju't narä, lagajc narä gudedä xcäl̄nabanä, guetä. Rapä yäl̄rnibee te gudedä xcäl̄nabanä, guetä, rapäza yäl̄rnibee te xcasacä xcäl̄nabanä te guibaṣacä, sa'csi dee najc yäl̄rnibee ni baniidx Xtadä loä.

19 Xcuent rediidxre gula' sa' rexpejn̄ Israel, gujcreni tio'p gala'.
20 Xhidajlreni canii:

—¿Xhicuent riutuni? ¿La ditu gan te beṅdxab yu' lastooni? Yejcni rajc. Xhigac rcuadiajgtu xtiidxni.

21 Dxejc ste cuaareni:

—Dini gac. Di rediidxre gac xtidx te beṅdxab. ¿Xhixh sajc rusiajc beṅdxab baloj relotiä'p, ä?

Rdxe'ch rebejn̄ loj Jesucrist

22 Lagajc neṅ redxejga gujc lanij xten xquidoo rexpejn̄ Israel guedx Jerusalén. 23 Najcni bäi najl. Biu' Jesús guidoro, sasajni nez neṅ cordoor ni laa xten Salomón. 24 Gubig rexpejn̄ Israel guideb gabi Jesús, räjpreni lojni:

—¿Gucli gucua'tzlu loonu chu najclu? Palga luj najclu Crist ni cabääznu jiääd, guiniliini loonu tejpas.

25 Dxejc badzu' Jesús diidxre, räjpni lojreni:

—Aguniä lojtu si'c, niluxh ditu nililajz. Redzuun nani runä xcuel̄rnibee Xtadä, huenliisi ruluilojreni chuni'c nacä. 26 La'tu ditu chalilajz sa'csi ditu gac rexilä. 27 Rexilä numbee xse'ä, luxh narä numbeäzareni, riädnajlzareni narä. 28 Narä rudedä yäl̄nabajn̄ par tejpas loj rexilä, luxh direni nitloj par tejpas. Rutza laadi nani sajc gudzucajreni ladzṅaa. 29 Xtadä baniidxreni loä, laani najcni guroobru, nadipru loj guiraareni. Rut laadi nani sajc gudzucajreni ladzṅaa Xtadä. 30 Narä näjza Xtadä najcnu tejsi.

31 Dxejc gulässac rexpejn̄ Israel guij, te nucuaareni yejc Jesús. 32 Dxejcti räjp Jesús lojreni:

—Xhidajl dzuun xten Xtadä abaluiä lojtu, ¿lo redzuunga, xhi tej dzuun rujn̄ gucuaatu guij yecä?

33 Dxejcti räjp rexpejn̄ Israel lojni:

—Xcuent redzuun ni rujnlu dinu gucuaa guijlu. Sa'csi guniyajlu, ni'c nucuaanu guij yejclu. Beṅ guedxliujlu, luxh najlu najclu tejsi con Dios.

34 Badzu' Jesús diidxre, räjpni lojreni:

—¿La et loj xleiiditu caj rediidxre: “Narä rniä, la'tu najc redios”?
35 Nancheenu digacdi guidxaa xquijtz Dios. Palga gulalajni redios rebejn̄ nani bejn̄ yäl̄guxhtis loj rexpejn̄ Israel, dxejc 36 ṅaj ¿xhicuent guniitu loä: “Caniyajlu Dios”, sa'csi guniä lojtu narä nacä Xi'n Dios? Ni gule Dios narä, baxhaḷni narä lo guedxliujre. 37 Palga dina gunä redzuun xten Xtadä, na'c chalilajztu rextidxä. 38 Luxh palga runnäni, mascä ditu chalilajz xtidxä, colchalilajz ni ruluii reyäl̄milagwr nani runä, te gacbeetu par tejpas, Xtadä yunäj narä, narä yunääza laani.

39 Che rlajzreni niniaazrenini stehuält, laani biriini ladzṅaareni.

40 Dxejcti sääni, gubisacni nez stelaad gueu Jordán, nejzga huijia'nni, cadre gosloj batiobnis Juan. 41 Xhidajl bejn̄ bidzujn̄ lojni ro'c, räjpreni:

—Di Juan niujn̄ nicla tej yäl̄milagwr luxh guiraa rediidx ni gunii Juan xcuent dade're najc didxliipac.

42 Xhidalduxhreni huililajz xtiidxni ro'c.

¹ Yu' te dade' ni cayacxhuu ni laa Larz. Rbäjzni guedx Betania, lajdxza rebisiajnni Marii näjza Mart. ² Mariire, bisiajn Larz, najc nane' ni basäl setnejxh ni' Jesús, batiaazani ni'ni con xquidxejcní. ³ Ni'cni baxhal guiro'p bälre diidx loj Jesús, räjpreni lojni:

—Dad, xamiigwlu nani sanälajzlu cayacxhuu.

⁴ Che biejn diajg Jesús rediidxga, räjpni:

—Di yälracxhuure ju'tni, sa'csi yälracxhuure najc te gululojni xcälrnibee Dios. Te gululojza yälracxhuure xcälrnibee Xi'n Dios.

⁵ Sanälajz Jesús Mart, bäljni, näjza Larz, ⁶ che räjpreni lojni cayacxhuu Larz, bia'nni stio'p dxej cadre yu'ni. ⁷ Dxejcti räjpni loj rexpejn_{pacni}:

—Colcho', chonnu stehuält región Judea.

⁸ Räjp rexpejn_{ni} lojni:

—Mastr, gajd gac xchej rlajz rexpejn Israel ni rnibee nucuaa guij yejclu te nugu'treni luj, luxh naj rlajzlu chäsaclu ro'c.

⁹ Dxejcti räjp Jesús lojreni:

—¿La xhet tzubitio'p orđi yu' lo tebdxej, ä? Palga sa bejn rdxee, dini jiajb sa'csi ruhuiini lo bianij nani yu' lo guedxliujre. ¹⁰ Palga chasajni guxhijn, siliaro'ni, sa'csi xheti bianijga.

¹¹ Dxejcti räjp Jesús lojreni:

—Nagayejs xamigwä Larz. Cha'a te chacuänäni.

¹² Dxejc räjp rexpejn_{pacni} lojni:

—Dad, palga agudiesni, pet siajcní.

¹³ Jesús canii lojreni agujt Larz, niluxh rexpejn_{pacni} bejn xhigab caniini xcuent yälrejs xten bacaltis.

¹⁴ Ni'cni guniliipac Jesús räjpni lojreni:

—Agujt Larz. ¹⁵ Rbalazä sa'csi rutinu ro'c, te chalilajztu xtidxä. Colcho' te chohuiinuni.

¹⁶ Dxejcti Tomás ni rniizareni “cua'ch”, räjpni loj resa'ni:

—Colcho' te guetnāzanuni.

Jesús najc yälrbansac lo yälgujt

¹⁷ Che bidzujn Jesús lo guejdxga, agujc tajp dxej biga'tz Larz. ¹⁸ Guedx Betania tre' gajxh lo guedx Jerusalén, si'cti tio'p garol kilómetro. ¹⁹ Xhidajl rexpejn Israel abidzujn, siädhuiireni Mart, näjza Marii, te di gac-huin lajzreni sa'csi gujt bisiajnreni. ²⁰ Che gucbee Mart abidzujn Jesús, biriini huichaglojnini; niluxh Marii bia'n rolizreni. ²¹ Dxejcti räjp Mart lo Jesús:

—Dad, paru suga'lu ree, di bisianä niejt. ²² Narä nanä suniidx Dios guiraa nani guiniablu lojni.

²³ Jesús räjpni lojni:

—Sibansac bisiajnlu.

²⁴ Räjp Mart lojni:

—Acananä sibansacni che guidzujn dxej ni guibansac bejn loj rebengut dxej lult che gun Dios yälguxhtis.

²⁵ Dxejc räjp Jesús lojni:

—Narä nacä yälruspansac bejn loj rebengut, näjza yäl_{nabajn} par tejpas. Nani rililajz rextidxä, masä agujtni, sibansacni. ²⁶ Chutis tej bejn ni nabajn ni chalilajz xtidxä, dini nitloj par tejpas, ¿riliiga lajzluni, ä?

²⁷ Dxejcti räjp Mart lojni:

—Rililazäni, Dad. Ahuililazä luj najclu Crist, Xi'n Dios nani bia'n diidx guxhal Dios lo guedxliujre.

Biin Jesús cuä' xpaal Larz

28 Che guluux gunii Mart, huitejdxni bājlni Marii, xhiga'tz rājpnī lojni:
—Abidzujn Mastr. Cabejdxzani luj.

29 Che biejn diajg Marii rediidxga, huisugajcni, sahuuini Jesús. 30 Gajd Jesús jiu' guejdxga, laltis suga'ni cadro bidxaagni Mart. 31 Rexpejn Israel nani biādcuenāj Marii, ni cahuii didi gac-huin lajzni, che bahuiireni huisu Marii, sääni, nājza laareni huirinajlreni Marii, naareni pet lo baa sayoonni.

32 Ni'cni che bidzujn Marii cadro suga' Jesús, bazuxhijbni lojni, rājpnī:
—Dad, paru suga'lu ree, di bisianā niejt.

33 Che bahuii Jesús cayoon Marii, nājza rexpejn Israel ni siādnajl Marii, guc-huin lastooni, biāād te rsliajz lastooni. 34 Dxejcti rājpnī lojreni:

—¿Caro bacua'tztuni?

Rājpreni lojni:

—Dad, gudaa ree te filu.

35 Dxejcti biin Jesús. 36 Ni'cni cayājpx rexpejn Israel:

—Colhuidi, lacti sanāljznini.

37 Yu'zareni rājpx:

—Dade're basiajcx beñ lotiä'p. ¿Xha di niajcdi nusiajcxni bejñre te di niejtni, ä?

Gubansac Larz

38 Guc-huinduxh lastoo Jesús, gubigni lo baa. Baaga najc si'c te biliää, suga' te guiro ni rusäuureni ro'ni. 39 Dxejcti rājpx Jesús lojreni:

—Colgudzucaj guijga.

Mart, ni najc bisiajcx beñgutga, rājpnī lojni:

—Dad, pet acaladxuudxni, sa'csi agujc tajpx dxej gujtni.

40 Dxejcx rājpx Jesús lojni:

—¿Et rniä lojlu, palga rililajztu, suhuuilu xcälrnibee Dios, ä?

41 Dxejcti badzucajreni guijga. Guläs Jesús lojni xhaguibaa, rājpnī loj Xtadni:

—Xtadä, runidxä xquixtios lojlu sa'csi abiejn diajglu xtidxä. 42 Narä nanä guliica rucua diajglu xtidxä, luxh naj caniäni xcuent rebejn ni tre' ree, te chalilajzreni luj baxhallu narä.

43 Che gulujcx guniini rediidxga, guredxa'ni rājpnī:

—¡Larz! ¡Gudaa ree!

44 Dxejcx birii beñgutga neñ biliää. Naliib reñaani, reni'ni, niäuu te baii lojni. Dxejcti rājpx Jesús lojreni:

—Colguslaani, colgusaan jiini.

Bachaagreni diidx xho guiniaazreni Jesús

(Mt. 26:1-5; Mr. 14:1-2; Lc. 22:1-2)

45 Xcuent dzunrore huililajz rextidx Jesús xhidajl rexpejn Israel nani huinajl Marii, che bahuiireni xhi bejn Jesús. 46 Yu' reni huuhuii loj rexpejn Israel ni laa farisee, bijreni diidx xhi bejn Jesús. 47 Dxejcti refariseega, nājza rebixhojz ni rnibee, bire'reni bidxagsa'reni lo Junt Suprem, rājpxzarenī:

—¿Xho jiennu? Niguiire cayujn xhidajl milagwr. 48 Palga guisaannuni si'c, guiralii bejn sililajz xtiidxni, sinajlrenini. Dxejcti jiääd rebeñ roman ni rnibee, gudzucajreni xcälrnibeenu, sudzujlzarenī lajdxnu.

49 Dxejcx Caifäs, bixhojzro ni riäjlx gunibeeni lo rebixhojz ijzga, rājpnī lojreni:
—La'tu xhetliidi najnditu. 50 Ditu gun xhigab laaca guet tejtis bejñ xcuent guideb guejdx, didi nitloj guideb lajdxnu.

51 Niluxh Caifäs dini ninii diidxre xcuentcani. Sa'csi ijzga rnibeeni lo rebixhojz, lagajc Dios badeed diidxga guniini. Ni'c gunixgaani guet Jesús xcuent nación xten rexpejn Israel. 52 Luxh xhet ganaxtis xcuent naciónga,

nājza te guire' guiraa rexpejn Dios nani nare'ch loj guideb guedxliujre.
⁵³ Ni'cni dxejlīga bachaag rebejnğa diidx te don xho gunreni gugu'treni Jesús.

⁵⁴ Ni'cni diru Jesús nisiaj nez loj rexpejn Israel. Biriini región Judea, huijni te lajt gajxh nez lo reyubijdz, lo te guejdx ni laa Efraín. Ro'c biannājni rexpejn pacni.

⁵⁵ Guxii dxej cayäädx guidzujn lanij ni laa pascw ni rujn rexpejn Israel. Xhidalduxh rebenguejdx huij guedx Jerusalén te gusiareni lastooreni, te gac gunreni lanij xten pascw. ⁵⁶ Cansajreni caguiilreni Jesús; che yu'zareni neñ guidoro, canabdiidx lo sa'reni, räjpreni:

—¿Xhi najtu? ¿La siäädni lanijre o laa dini jiääd, ä?

⁵⁷ Refarisee nājza rebixhojz ni rnibee loj rebixhojz, agunibeereni palga yu' chu najn caro yu' Jesús, chaye'tzni lojreni te guiniaazrenini.

12

Gudäáb te gunaa se't ni' Jesús *(Mt. 26:6-13; Mr. 14:3-9)*

¹ Che riäädx xho'p dxej gal lanij pascw, huij Jesús guedx Betania cadre rbäjz Larz nani baspañsac Jesús loj rebengut. ² Ro'c bejnreni te xchej te gau Jesús. Mart bateed xchejga, nājza Larz sobganāj Jesús nājza rexpejn pacni lo mex. ³ Dxejcti bidzunāj Marii si'cti garol litr se't ni rlianexhduxh si'c nard. Sacduxh se'tga. Dxejcti gudäábni se'tga lo reni' Jesús, baspijdzni ni'ni con xquidxejcní. Guideb neñ yu'ga gulanejxh se'tga. ⁴ Dxejcti räjp Judas Iscariot, xi'n Simón, ni najc te rexpejn pac Jesús, lagajc ni abejn xhigab guto'ni Jesús, räjpni:

⁵ —¿Xhicuent di se'tre nido' choñ gayuu denar te nidis meelga loj rebenproob? (Choñ gayuuga najc si'cti ni xca' te niguii paru gunni dzuun tzubiteb bäii.)

⁶ Guniini si'c, xhet sa'csi riadini reproob, per sa'csi laani najcni te gubaan, luxh laani ca'ni bols cadre rucnee meel, luxh rbääni meel lojga te rca'nini.

⁷ Ni'cni räjp Jesús lojni:

—Na'c gudxojn luni; subasälxgaanini, che gajd guidzujn dxej nani guiga'tzä.

⁸ Dxej-yääl yu' rebenproob lojtu, luxh narä dina chuä lojtu xchej.

Laareni rlajzreni nugu'tzareni Larz

⁹ Dxejc che gucbee xhidajl xpejn Israel yu' Jesús rolijz Larz ni gubañsac lo rebengut, bidzujnreni, xhet xcuentis Jesús. Biäädreni te fizareni loj Larz nani baspañsacni lo rebengut. ¹⁰ Dxejcti rebixhojz ni rnibee bachaagzareni diidx te ju'tzareni Larz, ¹¹ sa'csi xhidajl rexpejn Israel salilajzreni xtidx Jesús sa'csi bahuiireni gubañsac Larz.

Biu' Jesús guedx Jerusalén *(Mt. 21:1-11; Mr. 11:1-11; Lc. 19:28-40)*

¹² Che bara yääl, rebejn xhidajl ni bidzujn lanij biejn diajgreni asiäddzujn Jesús guedx Jerusalén, ¹³ dxejcti batiu'reni naa reyagzijñ, biriireni neñ guejdx, sachaglojrenini. Guredxa'reni, räjpreni lo Jesús:

—¡Colguiliä'p xpala'n Dios! ¡Chicbaa nani siääd xcuent Dad nani najc rei lo rexpejn Israel!

¹⁴ Bidxäl Jesús te burbäz, gubijbnini, si'cni caj lo reguijtz:

¹⁵ Na'c guidxejbtu, bejn ni rbäjz neñ guedx Sión.

¡Colhuii! Reii xtentu asiääd, bijbni dejt te burbäz.

¹⁶ Di rexpejn pacni niacbee recosga che gujcreni, niluxh che gubansacni loj rebengut, dxejc banaj lajzreni recos nani caj lo guijtzc xcuentni, näjza guiraa recos ni bejn rebejn lo Jesús te guzojb rediidxga.

¹⁷ Reben xhidajl ni suganäjni che gurejdxni Larz te biriini neñ baa che baspansacnini lo rebengut, bijzareni diidx xcuent guiraa ni bahuiireni. ¹⁸ Ni'cni biädchagloj reben xhidajlgani, sa'csi abiejn diajgreni laani bejnmi milagwrre. ¹⁹ Ni'cni räjp refarisee lo sa'reni:

—Aruhuiitu xhet sajcdi jieñnu. ¡Colhuii! Empac sanajl guideb guedxliujni.

Riädtiil regriegw Jesús

²⁰ Yu' gaii bengriegw nadxaag lo rebejn ni biädted lanij guedx Jerusalén. ²¹ Rebejnre bidzujn loj Felipe nani siäd guedx Betsaida xten Galilee, gusloj gunabreni lojni, räjpreni:

—Dad, rlaaznu guihuiinu lo Jesús.

²² Biäd Felipe, räjpni loj Andrés, dxejcti guiro'preni huiye'tzreni lo Jesús. ²³ Dxejcti räjp Jesús lojreni:

—Abidzujn or ni chä'p xpala'n Xi'n Dios ni gujc Niguii. ²⁴ Rniliäpac lojtu, palga di te xob binij jiajb lo yuj, neñ xhurc cadre cueni, te rianxtebni, guetni, dini guiliejn. Luxh palga guetni, siliejnni, rajcza te nisro lojni, rajc xhidajl xob binij. ²⁵ Nani sanälajz xcäl'nabajnni, sunijtnini, luxh nani rbälaz xcäl'nabajnni lo guedxliujre, sica'ni yäl'nabajn par tejpas. ²⁶ Palga yu' chu tej ni rrajz chu loä, sujiädnajlni xnezyuä, te cadre yu'ä, ro'cza cuääz ni ru' loä. Palga yu' chu gun xtzunä, siliä'pza Xtadä xpala'nni.

Rnixgaa Jesús guetni

²⁷ Räjzani:

—Naj cayac-huin lastoä. ¿Xhichani'cza gäpä lo Xtadä? ¿La siniä: Dad, gucnäj narä te di tedä or ni siäd? Ni te tedäpac orga biälä lo guedxliujre. ²⁸ Xtadä, bejn si'cni riäjlgac te guiliä'p bejn xpala'nlu.

Dxejcti xhaguibaali biejn te xse' te ni räjp:

—Agulä'pä xpala'nä, siliä'pä xpala'nä stehuält.

²⁹ Ni'cni lo rebejn ni tre' ro'c, ni biejn diajgreni se'ga, yu' reni räjp:

—Lascanu gunii te guzii.

Guyu'zareni räjp:

—Te xangl Dios ni gunii lojni.

³⁰ Dxejcti räjp Jesús lojreni:

—Et xcuentädi gunii xse' ni gunii, xcuenttis la'tu guniini. ³¹ Naj abiäd xcäl'guxhtis Dios lo guedxliuj. Naj sibicaj xcäl'nibee nani rnibee lo guedxliujre.

³² Naj, che guiliäsreni narä jiaa lo guedxliuj, te galä ro'c, sutie'ä guiraa bejn loä.

³³ Rediidxre gunii Jesús te canixgaani xho guetni. ³⁴ Räjp rebejn lojni:

—Nuure biejn diajgnu bilreni lo leii, Crist ni jääd sibajn par tejpas. ¿Xho mood rniilu, nanab chäs Xi'n Dios ni gujc Niguii jiaa lo guedxliuj? ¿Chuxhni'c najc Xi'n Dios ni gujc Niguii ni ruzä'tlu?

³⁵ Dxejcti räjp Jesús lojreni:

—Stera'tsi yu' bianij lojtu. Col'saj lał ni rajptu bianijga, te di guiniaaz yälxcäy la'tu, sa'csi ni rsiaj loj nacäy, dini gan caro chääni. ³⁶ Lał ni rajptu bianij, col'chalilajz bianijga te gactu rexi'n bianij.

Gunii Jesús rediidxga lojreni, dxejcti biunejzni ro'c, bicuatzlojni.

Xhicuent di rexpejn Israel nililajz xtidx Jesús

³⁷ Xhidajl remilagwr bejn Jesús nez loj rexpejn Israel, niluxh direni nililajz xtiidxni, gulälazreni nani baxhal Dios lojreni. ³⁸ Ni'cni guzojb diidx nani gunii Isaías, ni gunii xtidx Dios galoro, räjpni:

Dad, ¿chuni'c huililajz xtiidxlu?

¿Chuloj baluiilu xcäl_rnibeduxhlu, ä?

³⁹ Ni'cni di niajcdi nililajzreni, sa'csi guniiza Isaías, räjpni:

⁴⁰ Abascäjyni lojreni,
abennajdni lastooreni,
te di rebalojreni fii,
te di lastooreni gachee,
te di gusiejch lajzreni,
te di gusiäcäreni.

⁴¹ Rediidxre gunii Isaías, sa'csi bahuiini xcäl_rdimbicha' Jesús xhaguibaa, dxejc guniini xcuenti.

⁴² Dxejcti gaii rebejn ni rnibee huililajz xtiidxni che räjpni abaxhal Diosni, niluxh bidxejbreni reben farisee, ni'c direni nicäjp ahuililajzreni, te di gurilaagwreni laareni, gudxojnreni jiu'reni nen guidoo. ⁴³ Sa'csi rdxaglaizrreni guiliä'p rebejn xpala'nreni luxh guxiiru rlajzreni guiliä'p Dios xpala'nreni.

Xtidx Jesús sigubee rebejn

⁴⁴ Dxejcti gudidxa' Jesús:

—Nani chalilajz xtidxä, et ganaxdi ni cania rililajzni, näjza xtidx Xtaä nani baxhal narä rililajzni. ⁴⁵ Nani ruhuii loä, ruhuiizani loj ni baxhal narä. ⁴⁶ Narä biälä si'c bajl lo guedxliujre, te guiraa renani chalilajz xtidxä, dirureni chu lo yäl_cäy. ⁴⁷ Nani riendiajg xtidxä, luxh dini gusoob rediidxga, dina gunä yäl_guxhtis lojni, sa'csi dina niälä te gunä yäl_guxhtis reben_guedxliuj, biälä te guslää reben_guedxliuj lo dojl. ⁴⁸ Nani rbälaz narä, ni di gusoob xtidxä, yu' chu gun yäl_guxhtis xtojlni; lagajc rediidx nani guniä gun yäl_guxhtis xtojlni che gal lult dxej. ⁴⁹ Sa'csi narä dina niädniä lagajc xcuentä, lagajc Dad ni baxhal narä, lagajc laani gunibeeni xhini'c guiniä, xhini'c guluiä. ⁵⁰ Luxh nancheä gunibeeni chu yäl_nabajn par tejpas. Ni'cni rediidx nani rniä, rniäreni si'cpacni gunii Xtaäni loä.

13

Jesús gudiibni ni' rexpejn_pacni

¹ Che gajd gal dxe lanij ni laa pascw, najn Jesús asiäddzungenajxh xorni, or ni jiunejzni lo guedxliujre te chääni lo Xtaäni. Luxh sa'csi agajc sanälajzni rexpejn_pacni nani yu' lo guedxliujre, sinälajznanireni par tejpas.

² Ni'cni laj ni cayauxchejreni biu' ben_dxab nen lastoo Judas Iscariote, xi'n Simón, te guto'ni Jesús. ³ Sa'csi agucbee Jesús abateed Xtaäni guira'ti ladznaani, gucbeezani loj Dios biriini, lo Dios guibi'zani, ⁴ ni'c huisu Jesús lo xchejga, gulääni xhablojiaani, gudobjni te tuäi, batejbnini xque'ni. ⁵ Dxejcti cua'ni nis nen te chaa, guslojni gudiibni ni' rexpejn_pacni, baspijdzni ni'reni con tuäiiga. ⁶ Che bidzujn ni loj Simón Pedr, räjp Pedr lojni:

—Dad, ¿xhixh luj siguiiblu ni'ä?

⁷ Dxejc räjp Jesús lojni:

—Nani cayunä dilu gacheeni naj, guixee-huijdx sacbeeluni.

⁸ Räjp Pedr lojni:

—¡Dipaclu quiib ni'ä!

Räjp Jesús lojni:

—Palga dina quibä ni'lu, digacdiru gaclu xpenä.

⁹ Räjp Pedr lojni:

—Dad, na'c quiiblu ni'ätis näjza naä näjza yecä gudiib.

¹⁰ Räjp Jesús lojni:

—Nani agojz di guiquiin gzasacni; ni'tisni guidiib, sa'csi naya guidebni; nayazatu, per xhet guiraaditu naya.

¹¹ Sa'csi anajnni chu guto'ni, ni'cni guniini: “Xhet guiraaditu naya.”

¹² Ni'cni che gulujx gudiibni ni' rexpeljnni, gotsacni xhajibni, guresacni lo mex, räjpni:

—¿La najntu xhini'c benä lojtu, ä? ¹³ La'tu rniitu narä, Mastr näjza Dad. Luxh laaca rniitu sa'csi nacäni. ¹⁴ Mbaj, palga narä ni nacä Dad, nacäza Mastr, gudibä ni'tu, la'tu sigajcza riäjl quiibtu ni' resa'tu. ¹⁵ Sa'csi abaluiä lojtu xho gacni, te chanuu guntu sigajc ni benä lojtu. ¹⁶ Rniliä, rniliäpac lojtu, di te mos gac beñroru lo xlamni; diza te ni rij xmandaad bejn gac beñroru loj nani baxhalni. ¹⁷ Palga najntu recosre, chicbaazatu palga si'c guntu.

¹⁸ Dina guiniä diidxre lo guiraatu. Numbeä reni aguleä, niluxh nanab soob xtidx Dios ni caj lo rexquijtzni. Scree najc rediidxga: “Nani rajw xcuxtilä, ni'c agubiréni, agulälazni narä.” ¹⁹ Ni'cni agunixgaäni, che gajdni gac, te che gacni chalilajztu nacä chu rniä nacä. ²⁰ Rniliä, rniliäpac lojtu, nani riu xtidx nani ruxhalä, riuzani xtidxä; luxh nani riu xtidxä, riuzani xtidx nani baxhalä narä.

Räjp Jesús chuni'c guto'ni

(Mt. 26:20-25; Mr. 14:17-21; Lc. 22:21-23)

²¹ Che gulujx gunii Jesús rediidxre, guc-huinduxh lastooni, dxejc guniliini: —Rniliä, rniliäpac lojtu, tejtuto suto' narä.

²² Dxejc gusloj cadxeloj rexpeljnni lo sa'reni, di jien chuchani'c cagusä'tni.

²³ Tej rexpeljnni nani sanälajzruni sobga' cuä'ni. ²⁴ Dxejcti bejn Simón Pedr seen lojni te guiniabdiidxni loj Jesús chu xcuent caniini. ²⁵ Dxejc nani sobga' cuä'ni, gubigruni loj Jesús, gunabdiidxni lojni, räjpni:

—Dad, ¿chuni'c rusä'tlu?

²⁶ Dxejcti räjp Jesús lojni:

—Guhuadxä te la' yätxtiil. Loj nani gudedäni, ni'c najcni.

Dxejcti bahuajdxni tla' yätxtiil, badeednini loj Judas Iscariote, xi'n Simón.

²⁷ Che gulujx gudajw Judas yätxtiilga, biu' beñdxab lastooni. Dxejcti räjp Jesús lojni:

—Ni rlajzlu gunlu, bejngani.

²⁸ Nicla tej reni sobga' lo mex direni niacbee xhicuent räjpni lojni si'c.

²⁹ Sa'csi Judas ca' bols meel, gaiireni bejn xhigab pet guniini si'c sa'csi yu' xhi chasiini par lanij, o pet yu' xhi gudeedni loj reben ni xhet rajpdi. ³⁰ Che gudajw Judas yätxtiilga, birigajcni, luxh abiu' guxhijn.

Didxcoob ni gunibee Jesús

³¹ Dxejcti che abirii Judas lojreni, räjp Jesús lojreni:

—Naj sienloj xcälnibee Xi'n Dios ni gujc Niguui, luxh lojni sienloj xcälnibee Dios. ³² Palga suluiloj Xi'n Dios ni gujc Niguui xcälnibee Dios, dxejc suluilojza Dios xcälnibee Xi'n Dios ni gujc Niguui, luxh siojb gunnini. ³³ Rexi'nä nani sanälazä, diru gac xchej chunää la'tu. La'tu siguiiltu narä, per si'cni räpä lo rexpelj Israel si'cza rniä lojtu naj: Di gacdi jiäädto cadre cha'a. ³⁴ Te didxcoob rnibeä guntu: Colchanälajz sa'tu. Sigajc ni sanälazä la'tu, sigajcza colchanälajz sa'tu. ³⁵ Palga rinälajz sa'tu, si'c sacbee guiraa beñguedxliuj najcpactu rexpänä.

Xhini'c gun Pedr loj Jesús

(Mt. 26:31-35; Mr. 14:27-31; Lc. 22:31-34)

³⁶ Dxejcti räjp Simón Pedr loj Jesús:

—Dad, ¿caro chäälu?

Räjp Jesús lojni:

—Cadro cha'ä digacdi jiädnajllu narä naj; niluxh sidzujn dxej jiäädlu ro'c.

³⁷ Räj̄p Pedr lojni:

—Dad, ¿xhicuent digacdi jiälä naj? Palga rquiin guetä xcuentlu, suguetä.

³⁸ Räj̄p Jesús lojni:

—¿La guliilu guetlu xcuentä, ä? Rniliäpac lojlu, nicla gajd guidgahi cuedxa' choñ huält, säjblu dilu gumbee najrä.

14

Jesús najc nezyuj lo Dad

¹ Dxejcti räj̄p Jesucrist lojreni:

—Na'c chutu yärsia'. Rililajztu xtidx Dios, colchalilajzza xtidxä. ² Yu' xhidalduxh yu' cadre rbäjz Xtadä. Palga xhet si'c di najcni, dizana niniä lojtu si'c. Sia'ä chasucheä reyu' par la'tu. ³ Luxh palga chasucheä cadre cuääztu, che guluxäni, sibisacä, te chanäätu ro'c, te cadre yu'ä, ro'cza chutu. ⁴ La'tu anajntu caro cha'ä, anajnzatu nezyuj ni chäätu.

⁵ Dxejcti räj̄p Tomás loj Jesús:

—Dad, dinu guidon caro chäälu, ¿xho guidonnu nezyujga, ä?

⁶ Räj̄p Jesús lojni:

—Narä nacä nezyuj. Narä nacä didxliipac, nacäza yäl̄nabajñ. Por narätis saj̄c chää bejñ cadre rbäjz Xtadä. ⁷ Palga la'tu niembeetu chuni'c nacä, niembeezatu Xtadä. Luxh najli abiembeepactuni sa'csi acahuiitu lojni.

⁸ Räj̄p Felipe loj Jesús:

—Dad, basaan guihuiinu loj Xtadlu; ni'ctis rlaaznu.

⁹ Dxejcti räj̄p Jesús lojni:

—Felipe, ¿la gajdlu gumbee narä, luxh lacti xchej yu'ä lojtu, ä? Nani ruhuii loä, abahuiini lo Xtadä. ¿Xhicuent rniablu fiilu lo Xtadä, ä? ¹⁰ ¿La dilu chalilajz najrä yunää Xtadä, luxh Xtadä yunäjzani narä, ä? Rediidx nani rniä dina guiniäni lagajc xcuentä, sa'csi Xtadä ni yunäj narä laani rujn lagajc rextzuunni. ¹¹ Colchalilajz xtidxä, che rniä narä yunää Xtadä, luxh Xtadä yunäj narä. O palga ditu chalilajzni sa'csi najcni xtidxä, colchalilajzni sa'csi abahuiitu rextzuun ni runä. ¹² Rniliäpac lojtu, nani chalilajz xtidxä, saj̄c gunni redzuun nani runä, luxh sujñni dzunroru sa'csi sia'a cadre yu' Xtadä. ¹³ Luxh guiraa ni guiniablu lo Xtadä xcuentä, narä sunäni, te gululoä xcäl̄rnibee Xtadä. ¹⁴ Narä sunä xhitis ni guiniabtu por laä.

Ria'n diidx guxhal Jesús Sprit Dxañ

¹⁵ Räj̄pzani:

—Palga sanälajztu narä, susoobtu xtidxä. ¹⁶ Dxejc siniabä lo Xtadä, te guniidxni stee nani gacnäjt̄u te chunäjni la'tu par tejpas. ¹⁷ Nalajznu, Xp̄rit Dxañ xten Dios, ni rnili. Di gacdi xca' reben̄ guedxliujñi, sa'csi direni fii lojni, niclaza gumbeerenini. Niluxh la'tu numbeetuni sa'csi yunäjni la'tu, yu'ni neñ lastootu. ¹⁸ Dina gusanbisiäbä la'tu; sibisacä jiädhuiä la'tu. ¹⁹ Diru gac xchej, dxejc diru reben̄ guedxliuj fii loä, niluxh la'tu suhuiitu loä. Sa'csi nabanä, la'tu nabajñzatu. ²⁰ Neñ redxejga, dxejc sacbeetu yunää Xtadä, la'tu yunäjtu narä, luxh narä yunääza la'tu. ²¹ Nani numbee Xtadä, nani rusoobza xtidxä, ni'c ruluiini sanälajzpacni narä. Luxh Xtadä sinälajzza nani sanälajz narä, näjza narä chanälazä bejñga, luxh sululoä lagajc narä lojreni.

²² Dxejcti räj̄p Judas (xhet Iscariótedi) lojni:

—Dad, ¿xhini'c gunlu te gululojlu lojtisnu, xhet näjdi loj reben̄ guedxliujdi, ä?

²³ Dxejcti räj̄p Jesús lojni:

—Nani sanälajz narä, ni'c riu xtidxä. Ni'c chanälajz Xtradä, dxejc jio-pläznäänuni guiro'pnu Xtradä. ²⁴ Nani di chanälajz narä, dini jiu xtidxä. Luxh rediidx nani biejn diajgtu, et xtidxädini; xtidx Xtradäni ni baxhaļ narä.

²⁵ 'Caniä guiraa rediidxre lojtu laļni yu'ä lojtu, ²⁶ per Sprit Dxaan xten Dios nani jiädyacnäjtu, nani guxhaļ Xtradä xcuentä, laani suluiini lojtu guira'ti, näjza susnajni lajztu guiraa rediidx nani aguniä lojtu. ²⁷ Yälrbecdxilajz rusa'nä lojtu, xcälrbecdxilazä runidxä lojtu, et si'cdini runiidx guedxliujdi najc nani runidxä lojtu. Na'c chutu yärsia', na'cza guidxejbtu. ²⁸ Abiejn diajgtu ni guniä lojtu: Sia'ä luxh siälsacä lojtu. Paru ninälajzfactu narä, sibalajztu xcuentä che guniä sia'ä lo Xtradä, sa'csi Xtradä najc beņroru loä. ²⁹ Scree agunixgaäni lojtu, te che soobni, dxejcru chalilajztu xtidxä.

³⁰ 'Diruna guiniduxhä lojtu, sa'csi asiääd nani rnibee loj guedxliujre, luxh digacdi guinibeeni narä; ³¹ riäjl gac recosre te gacbee reben guedxliuj sanälazä Xtradä, rusobäza xtidx Xtradä, runä nani gunibeeni. Colchastie, colcho' jiunejznu ree.

15

Jesús najc si'c te yaguub

¹ Rāpzani:

—Narä nacä si'c te yaguub. Xtradä najc si'c nani rusuj yajgga. ² Rebejn najc si'c reṇaa yajgga. Guiraa reṇaa yajgga nani xhet cajdi lojni rutiugnini. Luxh guiraa reṇaa yajgga ni caj ninejxh lojni, rusianini te xcajru ninejxh lojreni. ³ La'tu anajctu beņnaya xcuent rediidx nani aguniä lojtu. ⁴ Colguibaṇnäj narä, sigajc ni nabaṇnää la'tu. Digacdi xcaj ninejxh lo te ṇaa yajg palga agurujgni lo yaguub. Sigajcza la'tu, palga guibicajtu loä, di gacdi guntu xtzunä.

⁵ 'Narä nacä si'c yaguub. La'tu najctu si'c reṇaa yajgga. Nani riannäj narä, naräza riannääni, ni'c sajc runduxhni xtzunä, sa'csi che guibicajni loä, xhet sajcdi gunni. ⁶ Nani di chupac loä, sibicajni si'c reṇaa yajg nani rdin sa'csi xhetru rcajdi lojni, dxejcti rbijdzni, rusäl bejṇreni lo dāj te checni.

⁷ 'Palga chupactu loä, palgaza chupac xtidxä lastootu, colṇab nani rļajztistu, luxh narä sunidxäpacni. ⁸ Che gunpactu xtzun Dios, dxejc fi bejṇ najcpactu xpenä, siliä'p bejṇ xpala'n Xtradä, Dios. ⁹ Si'cpacni sanälajz Xtradä narä, sigajcza sanälazä la'tu. Colchanuu lo xcälrinälazä. ¹⁰ Palga jiutu rextidxä, sinuutu lo xcälrinälazä, sigajc ni abasobä xtidx Xtradä, luxh rinuä lo xcälrinälajz Xtradä.

¹¹ 'Rniä rediidxre lojtu te guibalaznäjtu narä, te si'c guibalazduxhpactu. ¹² Dee najc diidx ni rnibeä guntu: colchanälajz sa'tu si'cni sanälazätu. ¹³ Xheti te yäl'sanälajz ni guroobru lo yäl'sanälajzre, gudeed te bejṇ xcälṇabajṇni, guetni lacuaa resa'ni. ¹⁴ La'tu najctu resa'ä palga gusoobtu diidx nani guinibeä guntu. ¹⁵ Diruna cuälaä “mos” la'tu, sa'csi di remos gan xhi rujn xlamreni. Luxh narä agulälaä la'tu “rexamigwä”, sa'csi guira'ti rediidx ni biejn diagä lo Xtradä aguniäza rediidxga lojtu. ¹⁶ Et la'ditu gule narä, narä guleä la'tu. Guleä la'tu te guntu xtzun Xtradä, te na'cza nitloj dzuunga. Te guira'tiza nani guiniabtu lo Xtradä por laä, ni'cza guniidxni lojtu. ¹⁷ Dee rnibeä guntu: colchanälajz sa'tu.

Rbälaz rebejn guedxliuj Jesús näjza rexpejṇni

¹⁸ 'Palga cuälaz reben guedxliuj la'tu, anajntu agulälazxgaareni narä. ¹⁹ Paru najctu bejṇ guedxliujre, sinälajzreni la'tu. Per ditu gac bejṇ guedxliuj, sa'csi narä guleä la'tu te jiutu xtidx Xtradä, ni'cni rbälaz reben guedxliuj la'tu. ²⁰ Colsnaj lajztu diidx nani guniä lojtu, 'di te mos gac beņroru lo xlamni'. Palga basacsíreni narä, susacsízareni la'tu. Palga rusoobreni xtidxä, susoobzareni

xtiidxtu. ²¹ Guiraa recosre sunnäjreni la'tu xcentä sa'csi direni gumbee nani baxhal narä.

²² 'Paru dina niädniä lojreni direni niujn dojl xten xcälrdxechlajzreni loä, per naj di gacdi guiniireni direni gacbee yu' xtojreni. ²³ Nani rbälaz narä, rbälazzani Xtadä. ²⁴ Palga dina niunä nez lojreni remilagwrrro, sa' nani rutru rajcdi rujn, direni niajp dojlga; sa'csi abahuiireni redzuunga, ni'c agulälazreni narä, näjza Xtadä. ²⁵ Bejnreni si'c te guzobj diidx nani cuaj lo guijtz agujc xchero: "Gulälazreni narä, luxh xhetlidi benä."

²⁶ 'Che jiäd nani gacnäj la'tu, laani sini xcuentä, chu nacä. Laani najc Sprit ni yu' lo Xtadä, siniini didxlii. Narä suxhaläni lojtu; lo Xtadä guiriini jiädni lojtu. ²⁷ Näjza la'tu siniitu diidx xcuentä, chu nacä, sa'csi guyu'tu loä cheni gusloäli cagusule'ä diidxga.

16

¹ 'Rediidxre rnixgä lojtu, te didi yu' xhi gun jiajbtu te gunijttu lo xtidxä. ² Sidzujn dxej sibääreni la'tu dirureni gusaan jiu'tu nen guidoro. Sidzujn or chutis ju't tejtü, suchaloni cayacnäjni Dios. ³ Guiraa recosre sujnreni sa'csi direni gumbeepac Xtadä, niclaza narä. ⁴ Agunixgä rediidxre lojtu, te che guidzujn orga sinaj lajztu xcuent rediidx ni guniä lojtu.

Redzuun ni rujn Sprit Dxaan xten Dios

'Dina niniä rediidxre lojtu che gusloä cagusule'ä diidx, sa'csi suganää la'tu. ⁵ Naj agojl guibi'ä loj nani baxhal narä, luxh nicla tejtü di guiniabdiidx: "¿Caro chäälu?" ⁶ Dxejc sa'csi aguniä recosre lojtu, ni'c cayac-huin lastootu. ⁷ Luxh rniliäpac lojtu, hueenru par la'tu cha'ä. Palga dina cha'ä, di gacdi jiäd lojtu nani racnäj. Niluxh palga cha'ä, suxhaläni lojtu. ⁸ Luxh laani, che jiädni lo guedxliujre, susanijni xcäriejn rebejn te gacbeereni xcuent dojl, näjza xcuent xcäl'nabañnaya Dios, näjza xcuent yälguxhtis xten Dios. ⁹ Guluiizani xcuent dojl lojreni sa'csi direni chalilajz xtidxä. ¹⁰ Guluiini xcäl'nabañnaya Dios lojreni sa'csi sibisacä lo Xtadä, luxh dirutu fii loä. ¹¹ Guluiini xcuent yälguxhtis xten Dios lojreni sa'csi abejn Dios yälguxhtis loj beñdxab nani rnibee lo guedxliujre.

¹² 'Yu' xhidajlru diidx rlazä guiniä lojtu, niluxh digacdi gacbeetureni naj. ¹³ Che jiäd Sprit xten didxlii xten Dios, laani susanijni xcäriejntu te gacbeetu guiraa redidxguli, sa'csi dini guinii diidx xcuentcani, siniitisni ganax rediidx nani gudeed Dios lojni te guiniini. Siniizani xcuent recos nani churu gac. ¹⁴ Laani siliä'pni xpala'nä sa'csi sica'ni xhixtenä, suluiinini lojtu. ¹⁵ Guiraa ni rajp Xtadä najc xtenä, ni'cni rniä suluiini xhixtenä lojtu.

Xcälrac-huin lajztu sibixloj ni yälrbalajz

¹⁶ 'Sbale'si dxej, dxejc dirutu fii loä; dxejctiru sgaii dxej suhuisactu loä sa'csi narä sia'a lo Xtadä.

¹⁷ Dxejcti räjp rexpejn pacni lo sa'reni:

—¿Xhini'c caniini loonu? Sbale'si dxej, dxejc dirutu fii loä, dxejctiru sgaii dxej suhuisactu loä, näjza: sa'csi sia'a lo Xtadä. ¹⁸ Ni'cni cayäjpreni lo sa'reni: ¿Xhi dee rniini, "sbale'si dxej"? Dinu gacbee xhini'c caniini.

¹⁹ Gucee Jesús xhini'c rlazjreni guiniabdiidxreni lojni, dxejcti räjpni lojreni:

—Canabdiidx lo sa'tu xhi säloj nani guniä che guniä, sbale'si dxej, dxejc dirutu fii loä; dxejcru sbale'si dxej, suhuisactu loä. ²⁰ Rniliäpac lojtu, la'tu soontu, niluxh rebejn guedxliujre sibalazduxhreni. Sac-huinduxh lastootu niluxh yälrac-huinre sibixhlojni yälrbalajz. ²¹ Te gunaa che gaal xi'nni, rdejndi trabajw, dxejcti che aguyu' xi'nni, riäl lajzni gudejdni trabajw, dxejc arbaa lajzni gojl xi'nni te niguii lo guedxliujre. ²² Ni'cni, sigajcza rac-huin lastootu

naj, dxejcti che jiadhuisacātu, dxejc sii sibalajztu nen lastootu, luxh rut gacdi gudzucajdi yälrbalajzga.

²³ 'Nen redxejga xhetiru xhi yälguiniabdiidxd i guntu loä. Rniliäpac lojtu, nani guiniabtu lo xtadä xcuentä, laani suniidxnini lojtu. ²⁴ Naj xhet canabditu xcuentä. Colnabni, te xca'tuni, te guibalajztu.

Jesús, nani abejn gaan lo guedxliujre

²⁵ 'Aguniä guiraloj lojtu con cuent ni ruluii, niluxh sidzujn dxej che diruna guiniä cuent ni ruluii lojtu. Siniä didxguyasi lojtu xcuent Xtradä. ²⁶ Nen redxejga guiniabtu por laä. Luxh dizana guiniä siniabä narä loj Xtradä par la'tu, ²⁷ sa'csi lagajcza Xtradä sanälajzni la'tu, sa'csi la'tu sanälajztu narä, luxh ahuililajzzatu loj Dios biriä biälä lo guedxliuj. ²⁸ Biriä lo Xtradä xhaguibaa, biälä lo guedxliujre, siunezäza lo guedxliujre, sibisacä lo Xtradä xhaguibaa.

²⁹ Räjp rexpejn pacni lojni:

—Naj sii caniilu guyasi, dini gac si'c redidx-xhiga'tz xten cuent ni ruluii.

³⁰ Naj sii gucebeenu racbeelu guira'ti rexhicos, xhetru nanabdi guiniabdiidxrunu lojlu; ni'cni ahuililajznu biriilu lo Dios ni yu' xhaguibaa.

³¹ Räjp Jesús lojreni:

—¿La rililajzpacktu naj, ä? ³² Asiäddzungajxh teb or luxh ala bidzujn orga, che guire'chtu, cade tejtü xnez-xnejztu, te gusanxtebtu narä, luxh dina jianxtebä sa'csi Xtradä suganäj narä. ³³ Aguniä rediidxre lojtu te cuedxi lastootu lo guedxliujre xcuentä. Lo guedxliujre sidejdpactu trabajw, colgusutijp lastootu sa'csi narä abenä gaan loj guedxliujre.

17

Gunab Jesús lo Dios xcuent rexpejn pacni

¹ Che gulujx guniini loj rexpejn pacni rediidxga, guläsni lojni xhaguibaa, räjpni lo Dios:

—Xtradä, abidzujn or; gulä'p xpala'n xi'nlu te guiliä'pza xi'nlu xpala'nlu, ² sigajc ni badeedlu lojni yälrnibee loj guiraa reben guedxliuj, te gac gudeedni yäl nabajn par tejpas lo guiraa renani badeedlu lojni. ³ Redee rajp yäl nabajn par tejpas; numbeereni luj ni najc tejtis GuebDios, näjza narä Jesucrist nani baxhalu lo guedxliujre.

⁴ 'Narä gulä'pä xpala'nlu lo guedxliujre, abaluxä dzuun nani baniidxlu gunä ree. ⁵ Naj Xtradä, gulä'p xpala'nä con luj, con bala'n, con yälrdimbicha' ni gopä galooli che gajdli guirixtiej guedxliuj.

⁶ 'Loj rebejn nani baniidxlu loä, ni gulelu lo reben guedxliujre, loj reni'c abasule'ä, abaluiä chu najclu. Xtenpaclu najcreni, baniidxlureni loä, luxh rapdzu'tzreni xtiidxlu. ⁷ Naj agucebeereni guiraa rediidx ni guniä lojreni lojpaclu siädni. ⁸ Sa'csi rediidx nani baniidxlu loä, aguniä rediidxga lojreni, luxh ahuililajzreni rediidxga, agucebeepacreni lojlu biriä, ahuililajzreni lujpac baxhal narä.

⁹ 'Narä rniabä xcuentreni, dina guiniabä xcuent reben guedxliujre, ganaxtis xcuent renani abaniidxlu loä, sa'csi laareni najcreni xpejnlu. ¹⁰ Guiralii ni najc xtenä, najczani xtenlu. Guira'tiza ni najc xtenlu najczani xtenä. Agulä'pzareni xpala'nä.

¹¹ 'Narä diruna jia'nä lo guedxliujre, laareni sia'nrureni lo guedxliujre. Luxh narä siälä lojlu. Xtradä ni najc Dxfanro, gucnäj renani baniidxlu loä con xtiidxlu, nani baniidxlu loä te gunreni tejsi xhigab sigajcni riennu nurnu tejsi xhigab. ¹² Che guyunääreni lo guedxliujre, gucnää con xtiidxlu guiraa renani

baniidxlu loä, luxh nicla tejreni di ninitloj, xtebtis nani gunijt te gusojb ni caj lo xtidx Dios.

¹³ 'Luxh naj sibilacä lojlu. Caniä rediidxre laj ni yu'ä lo guedxliujre, sa'csi rlazä guibaa lajzreni si'c ni rbaa lazä. ¹⁴ Abasule'ä xtiidxlu lojreni, luxh rebejn guedxliuj rdxe'chreni lojreni sa'csi direni gac bejn guedxliujre sigajc ni dizana gacä bejn guedxliujre. ¹⁵ Dina guiniabä cuäälureni lo guedxliujre, rniabä gudzucajlureni loj bejndxab. ¹⁶ Direni gac bejn guedxliuj, sigajc ni dizana gacä narä bejn guedxliuj. ¹⁷ Basyareni con xtiidxlu, sa'csi xtiidxlu najc didxguliipac. ¹⁸ Sigajc ni baxhallu narä lo guedxliujre, sigajcza ruxhaläreni te chääreni guideb guedxliuj. ¹⁹ Xcuentreni rudedä lagajc narä, te näj laareni gacnayareni con xtidxguliipaclu. ²⁰ Dina guiniabä xcuent laatisreni, rniabäza xcuent guiraa renani churu chalilajz xtidxä ni gusule'reni. ²¹ Rlazä gun guiraa reni tejsi xhigab, sigajc ni rujnlu, Xtaä, si'c runäza; te sigajc ni yu'äza con luj, sigajcza churen i con nuurnu, te gacbee reben guedxliuj luj baxhallu narä. ²² Yälrnibee ni baniidxlu loä, lagajc yälrnibeega badedä lojreni te gunreni tejsi xhigab, si'cni riennu tejsi xhigab. ²³ Narä cayunnääreni dzuun, luj cayunnäjlu narä dzuun, te jiennu tejsi dzuun, te gacbee rebejn guedxliuj luj baxhallu narä, luxh sanälajzlureni si'cni sanälajzzalu narä.

²⁴ 'Xtaä, guiraa renani baniidxlu loä, rlazäza churen i cadro chuä xhaguibaa, te fiireni xcälrnibeä nani baniidxlu, sa'csi huinälajzlu narä galooli che gajdli guirixtiej guedxliujre. ²⁵ Xtaä ni rujn cossa'ctis, di rebejn guedxliuj gumbeelu, luxh narä numbeälu, luxh redee agucbeezareni luj baxhallu narä. ²⁶ Aräpä lojreni chu najclu; säpäzaru lojreni te chu yäl sanälajz sa' ni rajplu par narä neñ lastooreni, te cuäzäza neñ lastooreni.

18

Xho gunaazreni Jesús

(Mt. 26:47-56; Mr. 14:43-50; Lc. 22:47-53)

¹ Che gulujx gunii Jesús rediidxga, huinäni rexpejn pacni dejtz gueu Cedrón. Ro'c yu' xhiroob yuj cadro sojb guiraloj reyajg. Ro'c biu' Jesús näjza rexpejn pacni. ² Anajn Judas, nani guto' Jesús, caro rij Jesús con rexpejn pacni sa'csi si'csi-si'c rdxaag sa'reni ro'c. ³ Dxejcti Judas, che biääd lojni te cuaa soldad roman, näj rebixhojz ni rnibee, näjza refarisee, huinätinireni ro'c, ca'reni balguejd näjza lintern, näjza spaad näjza lans. ⁴ Ni'cni Jesús, sa'csi ananxgaani xhini'c sacni, gubigni lojreni, räjpni lojreni:

—¿Chu rguiltu?

⁵ Räjpreni lojni:

—Jesús nani siääd guedx Nazare't.

Räjp Jesús lojreni:

—Laa naräni.

Näjza Judas ni bato'ni suganäjnireni. ⁶ Che gunii Jesús lojreni: “Laa naräni”, biäxhanreni, biajbreni lo yuj. ⁷ Dxejcti gunabdidxsac Jesús lojreni:

—¿Chu rguiltu?

Dxejc räjpzareni stehuält:

—Jesús nani siääd guedx Nazare't.

⁸ Räjp Jesús lojreni:

—Aguniä lojtu, laa naräni. Palga narä rguiltu, colgusaan jii redee.

⁹ Guniini rediidxga te gusojb rediidx nani guniini che räjpni: “Loj guiraa ni baniidxlu, nicla tejni di ninijt.” ¹⁰ Dxejcti Simón Pedr, sa'csi ca'ni te spaad, guläänini, batiuugni diag ladbee xten xmos bixhojzroga. Laj mosga najc Malco. ¹¹ Dxejcti räjp Jesús lo Pedr:

—Guluchee spaad xtenlu neñ xpaguinni. ¿La dina tedä trabajwduxh nani agunibee Xtadä tedä, ä?

Jesús nez loj bixhojzro

(Mt. 26:57-58; Mr. 14:53-54; Lc. 22:54)

¹² Dxejcti resoldaadga näjza comandant, näjza reguxhtis ni rnibee rexpejn Israel, gunaazreni Jesús baliibrenini. ¹³ Dxejcti ganid huinärenini lo Anás, sa'csi najcni xtadsueegr Caifás, luxh ijzga biäjł najc Caifás bixhojzro ni rnibee lo rebixhojz. ¹⁴ Caifás najc nani baliıdx rexpejn Israel nanab guet te niguii xcuent rebenğuejdxga.

Cadro gunii Pedr dini gumbée Jesús

(Mt. 26:69-70; Mr. 14:66-68; Lc. 22:55-57)

¹⁵ Simón Pedr näjza stee xpejnıpacni huinajł dejtz Jesús. Luxh numbee bixhojzro bejnğa, biunäjzani Jesús lo xle' bixhojzro. ¹⁶ Bia'nti Pedr rolä'ga. Dxejc birii xpejnıpac Jesús nani numbee bixhojzroga, guniini lo nani cayajp rolä'ga, te biu' Pedr nez lo le'ga. ¹⁷ Dxejcti räjp mos gunaa ni rcanäj rolä', räjpni lo Pedr:

—¿La et näjdi luj najclu te xpejnıpac Jesús, ä?

Räjp Pedr loj gunaaga:

—ıXho gacäni!

¹⁸ Dxejcti sa'csi cayacnalduxh, caguse'creni boo te cagucha'lajzreni. Näjza Pedr suganäjreni, cagucha'lajzni ro guibooga.

Bixhojzro cayujn yälğunabdiıdx lo Jesús

(Mt. 26:59-66; Mr. 14:55-64; Lc. 22:66-71)

¹⁹ Dxejcti gusloj cayujn bixhojzro yälğunabdiıdx loj Jesús xcuent chuni'c najc rexpejnıpacni näjza xcuent xhini'c ruluini.

²⁰ Dxejcti räjp Jesús lojni:

—Narä xhet xhiga'tzdi guniä rextıdxä, guniäni lo guiraa rebejn guedxliuj. Basule'ä diıdx neñ rexquıdobäztu näjza neñ guıdoro cadre re' guiraa rexpejn Israel, nicla tej diıdx dina ninixhiga'tzädi. ²¹ ¿Xhicuent cayujnlu yälğunabdiıdxga loä? Gunabdiıdx loj renani biejn diajg xhini'c guniä lojreni. Laareni najnreni xhini'c guniä.

²² Che gulujx gunii Jesús rediıdxre, te rexpejn bixhojzroga huääz loj Jesús, räjpni lojni:

—¿La si'c rudzu' bejn diıdx loj bixhojzro, ä?

²³ Dxejcti räjp Jesús lojni:

—Palga xhet laadi guniä, baluii narä xhi diıdxga najc xhet laadi, niluxh palga laaca najc ni guniä, ¿xhicuent huääzlu loä?

²⁴ Dxejcti guideb naliıbni baxhal Anásni lo bixhojzro lo ni laa Caifás.

Gunisac Pedr dini gumbée Jesús

(Mt. 26:71-75; Mr. 14:69-72; Lc. 22:58-62)

²⁵ Sugasijc Pedr ro' guıboo, cagucha'lajzni, che räjpreni lojni:

—¿La et näjdi luj najclu te xpejnıpac niguiiga, ä?

Badzu'ni diıdxga räjpni:

—ıXho gacäni!

²⁶ Dxejcti te xmos bixhojzroga, sa'csi sa'ni najc mos ni batiu' Pedr diajgni, räjpni lojni:

—¿La et lujdi ni bahuiä neñ huert con laani, ä?

²⁷ Dxejcti räjp Pedr stehuält:

—Nicla gumbeäni.

Cuantis guniini si'c, guredxagajc te guidgaii.

*Jesús nez loj Pila't**(Mt. 27:1-2, 11-14; Mr. 15:1-5; Lc. 23:1-5)*

²⁸ Dxejc birinäjreni Jesús rolijz Caifás, huinärenini rolijz gubernadoor cadro laaza Pretorio, niluxh direni niu' ro'c sa'csi ameer guiliejn gubijdx, te di gacdxuudxreni dxejc di gacdi gaureni lani pascw. ²⁹ Ni'cni birii Pila't lojreni räjpnj lojreni:

—¿Xhi yälquij xten niguiire siädle'ctu loä?

³⁰ Dxejcti räjpnj lojni:

—Paru di niguiire niajc te beñ latsiaj, dinu niopnäni ladzñaä guejblu.

³¹ Räjpnj Pila't lojreni:

—Colchanäni, colhuii xho gunnäjtuni yälguxhtis con lagajc xleiitu.

Dxejc räjpnj rexpejn Israel lojni:

—Di xleiitu gusaan ju'tnu te bejn.

³² Guniireni si'c te guzobj diidz nani gunii Jesús xcuent xho guetni.

³³ Ni'cni biusac Pila't neñ Pretorio, gurejdxni Jesús räjpnj lojni:

—¿La luj najclu reii xten rexpejn Israel, ä?

³⁴ Dxejcti räjpnj Jesús lojni:

—¿La lagajc luj rniilu si'c, ä? O ¿laa yu' chureni'c naj lojlu si'c?

³⁵ Dxejcti räjpnj Pila't lojni:

—¿Xhixh näj narä nacä te xpejn Israel? Lagajc rebeñ lajdxlu näjza rebixhojz bateedlu ladzñaä. ¿Xhi bejnlu?

³⁶ Dxejcti räjpnj Jesús lojni:

—Xcälrnibeä dini gac yälrnibee sa' ni yu' guedxliujre. Paru najc xcälrnibeä te yälrnibee sa' ni yu' guedxliujre, ala cagucuaa rexpenä te di tedä ladzñaä rexpejn nani rnibee Israel. Naj di xcälrnibeä gac yälrnibee sa' ni yu' lo guedxliujre.

³⁷ Ni'cni räjpnj Pila't lojni:

—¿Reii najclu, ä?

Räjpnj Jesús lojni:

—Laaca najlu nacä reii. Par ni'cpac golä, par ni'cpacza biälä lo guedxliujre, partis gusule'ä didxliipac. Guiraa renani najn didxlii, reni'c rucuadiajgreni xtidxä.

³⁸ Räjpnj Pila't lojni:

—¿Xhini'c najc didxlii?

Che guniini si'c gunisacni loj rexpejn Israel:

—Dina guidxälä nicla tej xtojñ bejnre. ³⁹ Niluxh la'tu rajptu te costumbr, casob lani pascw, ruslaanu te bejn ni yu' neñ latzguiib. ¿Xhi najtu? ¿La rlanjtu guslää ni najc reii xten rexpejn Israel, ä?

⁴⁰ Dxejcti guiragajcreni guredxa', räjpnj lojni:

—¡Na'c gusläalu niguiiga! ¡Basläa Barrabás!

Niluxh Barrabás najc te gubaan.

19

¹ Ni'cni gunibee Pila't gudijnreni Jesús con duu ni yu' guechguiib lojni.

² Bejn resoldaad te coronguejch, bazalrenini yejc Jesús. Dxejcti bahua-jcwrenini te ladmoraad. ³ Dxejcti gusloj gubigreni lojni, te räjpnj lojni:

—¡Gubajn par tejpas Reii xten rexpejn Israel!

Dxejc huääzreni lojni.

⁴ Dxejcti birisac Pila't, räjpnj lojreni:

—¡Colhuii! Acabääni nez lojtu, te gacbeetu dina guidxäl nicla tej xtojñni.

⁵ Dxejcti birii Jesús nez lojreni, yu' coronguejch yejcnj, najcwzani ladmoraadga. Dxejcti räjpnj Pila't lojreni:

—¡Colhuii! ¡Aree niguiire!

⁶ Ni'cni, che bahuii rebixhojzro nájza rexquixhajgreni lojni, guredxa'reni, rájpreni:

—¡Colgucuaani lo cruzj! ¡Colgucuaani lo cruzj!

Rájpa Pila't lojreni:

—Lagajc la'tu colchanáni te gucuaatuni lo cruzj. Per narä dina guidxälä nicla tej xtojlni.

⁷ Dxejcti rájpa rexpejn Israel lo Pila't:

—Nuurnu rajpnu te leii, luxh xcuent leiiga, nanab guetni sa'csi najni najcni Xi'n Dios.

⁸ Che biejn diajg Pila't rediidxga, bidxejbruni, ⁹ biusacni neñ Pretorio, rájpa loj Jesús:

—¿Caro siädü?

Per xhet rájpa Jesús lojni.

¹⁰ Dxejcti rájpa Pila't lojni:

—¿La dilu guinii löä? ¿La dilu gan narä rapä yälrnibee te gucuaälu lo cruzj, rapäza yälrnibee te guslaälu, ä?

¹¹ Rájpa Jesús lojni:

—Xhetliidi yälrnibee niajplu löä paru dilu nica'ni xhaguibaali. Ni'cni bejn nani bato' narä lojlu rapduxhruni dojl loj ni rajplu.

¹² Ni'cni gudiil Pila't xho nuslaani Jesús, niluxh rexpejn Israel rbedxaduxhrureni, rájpreni:

—Palga luj guslaaluni, dilu gac xamiigw reii César, sa'csi chutis ni rnii najcni reii, najcni xcontraar César.

¹³ Che biejn diajg Pila't rediidxre, guläani Jesús, dxejcti gurej Pila't lo yagxhiil cadro rujnni yälguxhtis, cadro laa Litóstroros con didx-griegw sälojni naga' guisa'c, con didx-hebreo laani Gabata. ¹⁴ Najcni dxej vispr lani pascw, si'cti läidxej, dxejcti rájpa loj rexpejn Israel:

—Colhuii, aree xreiitu.

¹⁵ Ni'cni guredxa'reni rájpreni:

—¡Suguetni! ¡Suguetni! ¡Bacuaani lo cruzj!

Dxejcti rájpa Pila't lojreni:

—¿La sucuaä xreiitu lo cruzj, ä?

Dxejcti rájpa rebixhojz ni rnibee lojni:

—Rutru reidi rajpnu, Césartis najc xreiinu.

¹⁶ Ni'cni bateed Pila't Jesús lojreni te chacuaarenini lo cruzj.

Che bacuaarenini lo cruzj

(Mt. 27:32-44; Mr. 15:21-32; Lc. 23:26-43)

¹⁷ Dxejcti cua'reni Jesús, biriini ro'c guideb nuuni xcruzjni, cheni bidzujnlireni te lajt ni laa lajt xten Calabeer, con didx hebreo laani Gólgota.

¹⁸ Ro'c bacuaarenini lo cruzj. Bacuaazareni tio'p niguii lo stio'p cruzj, tejnani te laad cuä' Jesús. ¹⁹ Dxejcti bacuaa Pila't diidx ni cháa yejc xcruzjni; rediidxga najc scree: “Jesús, beñ Nazare't, Reii xten rexpejn Israel.” ²⁰ Xhidajl bejn bil diidx ni caj yejc xcruzjni, sa'csi lajt cadro bacuaarenini lo cruzj najc gajxh ro' guejdxga, luxh didx hebreo, diidx griegw, nájza didx latin bacuaareni rediidxga. ²¹ Dxejcti rájpa rebixhojzro xten rexpejn Israel loj Pila't:

—Na'c nucuaalu: “Reii xten rexpejn Israelni”, laacaru nacuaalu: “Laani najni, najcni reii xten rexpejn Israel”.

²² Dxejcti rájpa Pila't lojreni:

—Nani abacuaä, abacuaä. Si'c jia'nni.

²³ Dxejcti resoldaad, che gulujx bacuaareni Jesús lo cruzj, cua'reni rexbablojiaani bejnrenini tajp la', te cade tejreni cua'reni te la'ni. Luxh yu' stee xhajnbi ni laa tunica, nadijbni, guejnni hasta lo yuj guc-cheeni. ²⁴ Ni'cni räjpreni lo sa'reni:

—Na'c guitiäjznuni; do'o guidzujtnu te daad lojni, te don chu xten gacni.

Si'c bejnreni te gusobj xtiidx Dios cadre caj scree: “Batiäjsreni xhablojiaä; yejca xhabä ni bia'n gudzujtreni daad.”

Ni'cni bejn resoldaad recosre. ²⁵ Niluxh cuä' xcruzj Jesús suga' xnanni, con bäjl xnanni, ni laa Marii chääl Cleofas, näjza Marii Magdalen. ²⁶ Che bahuii Jesús loj xnanni, dxejc bahuiizani loj xpejn pacni nani sanälazduxhni, räjp Jesús loj xnanni:

—Nan, ¡bahuii, aro'c xi'nlu!

²⁷ Dxejcti räjp Jesús loj xpejn pacni nani sanälazduxhni:

—¡Bahuii, aro'c xnanlu!

Ni'cni dxejcli sinä nani najc xpejn pacni xnan Jesús rolijz pacni.

Xho gujt Jesús

(Mt. 27:45-56; Mr. 15:33-41; Lc. 23:44-49)

²⁸ Ni'cni, sa'csi najn Jesús alagujc guiraa recos ni nanab gac te soob rextidx Dios, räjpni:

—Cayolä nis.

²⁹ Ro'c suga' te guejs vinagr, nenga bahuaajdxreni te esponj dxejc bacuaarenini lo te yajg ni laa hisopo, guläsreni esponjga batzugrenini ro'ni.

³⁰ Che gulujx gu' Jesús vinagrga, räjpni:

—Agulujxni.

Dxejcti basajb yejcti, basläani xaimni.

Xhi bejn te soldaad lo Jesús

³¹ Dxejga najc dxe vispr xte lani pascw, che ru' mandaad par lanijga. Rexpejn Israel di rlanjreni nia'n rebejn ga lo recruzj, sa'csi dxe sabdga najc dxej ni rusilajzreni. Ni'cni gunabreni lo Pila't guxhahni chu qui'ch ni'reni te guetreni, te jiäjtreni loj recruzj. ³² Dxejcti bidzujn resoldaad, gudi'chreni guiro'p ni' nani caj te laad, sigajca bennäjreni stee ni caj ste laadga. ³³ Che gubigreni lo Jesús, bahuiireni alagujtni, direni nigui'ch ni'ni. ³⁴ Tej soldaadga baqui'tzni te lans ro' xcustiini, dxejc bixe' rejn näjza nis. ³⁵ Lagajc narä Juan bahuiä recosga, ni'cni caniä rediidxre, luxh diidxga guliipacni. Lagajc narä nanä didxguliipac caniä, te chaliiza lajztu xcuentni. ³⁶ Sa'csi si'c gujc guira'ti, te guzobj xtidx Dios cadre caj: “Nicla tej xtuzjtni di guech.” ³⁷ Sigajca lo stee guijtca diidxre: “Sidxelojreni loj nani biguijtca te lans.”

Huicua'tzreni Jesús

(Mt. 27:57-61; Mr. 15:42-47; Lc. 23:50-56)

³⁸ Che gulujx recosga, dxejcti huij José, te bejn Arimatea, nacxhiga'tzni te xpejn Jesús, sa'csi rdxejbni rexpejn Israel, ni'c huijni loj Pila't, gunabni loj Pila't te laani guiliättni Jesús lo cruzj. Cuäjbza Pila't, dxejc biääd José gulättni Jesús, sanätini togoolga. ³⁹ Näjza Nicodem biääd dxejc, nani galoo huininäj Jesús te guxhijn. Biädnäni si'cti tiuu kil te dänejh ni najc si'c yaal ni laa mirra näjza áloes. ⁴⁰ Dxejcti cua'reni Jesús batejbrenini te la' lad lino, basälzarenini däjga ni laa mirra con áloes, sa'csi si'c najc xcostumbr rexpejn Israel che rucua'tzreni te togool. ⁴¹ Gajxh cadre cuaj Jesús lo cruzj, yu' te huert, nen huertga yu' te bacoob si'c te biliäa, cadre nicla tej bejn gajd guiga'tz. ⁴² Sa'csi abidzujn dxej vispr lani pascw xten rexpejn Israel, luxh gajxh suga' biliäaga, nenga gudixhreni Jesús; si'c biga'tztini.

20

*Gubansac Jesús loj rebengut**(Mt. 28:1-10; Mr. 16:1-8; Lc. 24:1-12)*

¹ Primer dxej xten xmaanga, cäjyru, gajd lo guedxliuj jianij che huij Marii Magdalen lo baaga. Che bidzujñni ro' baaga, bahuiini agubicaj guij ni suga' ro' baaga. ² Dxejcti ruxunni gubi'ni te huiye'tzni lo Simón Pedr näjza lo stee xpejñpac Jesús ni sanälazduhni, räjpni lojreni:

—Ahuilääreni Dad neñ baa, luxh dinu guidon caro sanäreni.

³ Dxejc biriguxun Pedr näjza stee bejnga, huijreni nez lo baa. ⁴ Ruxun guiro'preni. Niluxh stee bejnga ruxunduxhruni loj Pedr. Laani ganid bidzujñni lo baaga. ⁵ Dxejcti guretänni te bahuiini neñ ba-biliääga. Bahuiini te laad naga' relajdtis nani bidejb Jesús, luxh dini niu' neñ baaga. ⁶ Dxejc bidzujñgajc Pedr, biugajcni neñ baaga, bahuiini naga' relajdga te laad. ⁷ Bahuiizani lajd ni guyu' yejcn, ni'c nie'tni saru, naga'ni te laad. ⁸ Dxejcti biu' stee bejnga nani bidzujñ ganid. Che bahuiini neñ baaga, huililajzni gubansac Jesús. ⁹ Sa'csi gajdreni gacbee ni caj lo reguijtz, cadre caj nanab guibansacni loj rebengut. ¹⁰ Dxejc gubisac guiro'p rexpejñpacni rolizreni.

*Baluiloj Jesús loj Marii Magdalen**(Mr. 16:9-11)*

¹¹ Laltis suga' Marii cuä' baaga, cayoosni. Ni'cni läl ni cayoosni, basajb lojni te bahuiini neñ baaga. ¹² Dxejcti bahuiini lo tio'p xangl Dios, najcwreni ladnolbäj, sobga'reni, tejni nez cadre gojt yejc Jesús, steeni nez cadre gojt ni'ni. ¹³ Dxejcti räjpreni lojni:

—Nane', ¿xhicuent roonlu?

Räjpni lojreni:

—Sa'csi sanäreni Dad, luxh dina ganä caro huisa'nreni.

¹⁴ Che gulujx guniini si'c, gubiréni, dxejc bahuiini loj Jesús suga' ro'c, niluxh dini niembee Jesús. ¹⁵ Dxejc räjp Jesús lojni:

—Nane', ¿xhicuent roonlu? ¿Chu rguillu?

Marii bejn xhigab laa dade' ni rcanäj huertga, ni'c räjpni lojni:

—Dad, palga luj sanäluni, gunii caro gudixhluni te guiliäsáni te chanääni.

¹⁶ Dxejcti räjp Jesús lojni:

—¡Marii!

Dxejc gubiré Marii, räjpni neñ xtidx hebreo:

—¡Raboni!

(Säloj diidxga “Mastr”.)

¹⁷ Dxejcti räjp Jesús lojni:

—Na'c guiniaazlu narä sa'csi gadna cha'a lo Xtadä xhaguibaa. Huij loj rebetzä, huiye'tz lojreni, cha'a lo Xtadä, näjza Xtadtu, loj Xtiozä näjza Xtiooztu.

¹⁸ Dxejcti huij Marii Magdalen, bidzujñni loj rexpejñpacni badeedni didx-coob, räjpni:

—Abahuiä lo Dad Jesús.

Räjpzani lojreni guiraa recos ni gunii Jesús lojni.

*Baluiloj Jesús loj rexpejñpacni**(Mt. 28:16-20; Mr. 16:14-18; Lc. 24:36-49)*

¹⁹ Che gojl gudxej, najcni dumingw, primer dxej xten xmaan, abiäudzu'tz ro lä' ro' yu' cadre tre' rexpejñpacni, sa'csi rdxejbreni rexpejñ Israel. Chela bidzujñ Jesús, guzujni nez galäiireni, räjpni lojreni:

—Suchu yälrbexi lastootu.

²⁰ Che guniini si'c, baluigajcni renaani lojreni näjza cuä' xcustiini. Ni'cni bibaduxhlajz rexpejn_{pacni} che bahuiireni lo Dad Jesús. ²¹ Dxejc räjp Jesús lojreni stehuält:

—Suchu yäl_rbedxi lastootu. Si'c ni baxhal_l Xtadä narä, si'cza ruxhalä la'tu.

²² Che gulujx guniini rediidxga, balejbni yejcreni, räjpni, lojreni:

—Suguibaj_n Sprit Dxan xten Dios nen_n lastootu. ²³ Rextoj_l rebej_n nani siäl_lajztu, sibicajreni. Rextoj_l rebej_n nani ditu jiäl_lajz, siannäjreni redo_jlga.

Tomás bahuii lo Jesús ni guba_nsac

²⁴ Tomás, ni laaza Didimo, najcni te retzubitio'p xpejn_{pac} Jesús. Rutini che biääd Jesús loj rexpejn_{pacni}. ²⁵ Dxejcti räjp rexpejn_{pacni} lojni:

—Abihuiinu loj Jesús, aguba_nsacni loj rebe_ngut.

Dxejcti laani räjpni lojreni:

—Palga dina fiä loj renaani cadre caj seen xten reclaab, palga dina guqui'tzä bicueñaä cadre guyu' claabga, guqui'tzäza naa cadre bixal cuä'ni, di lazä chalii guba_nsacni loj rebe_ngut.

²⁶ Che gudejd xhuj_n dxej, tresac rexpejn_{pacni} nen_n yu', nadxaagza Tomás lojreni. Niäudzu'tz yu'ga, luxh chela gucbeereni abidzuj_n Jesús, guzujni galäiireni, räjpni lojreni:

—Suchu yäl_rbedxi lastootu.

²⁷ Dxejcti räjpni loj Tomás:

—Baqui'tz bicueñaalu ree loj patnaä, basälza naalu cuä'äre, na'c ractio'p lajzlu, huililajzpac guba_nsacä loj rebe_ngut.

²⁸ Dxejcti räjp Tomás lojni:

—jXtadä, Xtioozä!

²⁹ Dxejcti räjp Jesús lojni:

—Sa'csi abahuiilu loä, Tomás, huililajzlu. Chicbaa renani mase direni fii, rililajzreni xtidxä.

Xhicient bacuaani reguijtzre

³⁰ Xhidalroduxhru dzuun bejn Jesús nez loj rexpejn_{pacni}, nani di nicaj lo guijtz. ³¹ Redzuunre nani bejn Jesús nani cuaj lo guijtzre cuajni te chalilajztu diidxre: Jesús najc Crist, nani cabäjz rebej_n jiääd, Xi'n Dios. Luxh che chalilajz te bej_n xtiidxni, sajpni yäl_nabaj_n par tejpas.

21

Jesús baluilojni lo gajdz xpejn_{pacni}

¹ Dxejcti baluiloj Jesús loj rexpej_{nni} ro' nisdoo ni laa Tiberias. Scree baluilojni lojreni. ² Nadxaag sa' rebej_nre: Simón Pedr, Tomás ni laaza Didimo, näjza Natanael, nani siääd Caná xten Galilee, rexi'n Zebedeo, näjza stio'p rexpejn_{pacni}. ³ Dxejcti räjp Simón Pedr loj resa'ni:

—Chanazä bäj_l.

Räjpreni lojni:

—Näjza nuure chonnu.

Dxejcti sääreni, huä'preni nen_n te barcw. Guideb guxhijnga xhet bäjldi gunaazreni. ⁴ Che acayanij loj guedxliuj, suga' Jesús ro' nisdoo, di rexpej_{nni} niembeeni. ⁵ Ni'cni räjp Jesús lojreni:

—Rexi'nä, ¿la xhet bäjldi rajptu, ä?

Räjpreni lojni:

—Xhet rajpdinu.

⁶ Dxejcti räjpni lojreni:

—Colgusäl_l xquijxhtu ladbee xten barcwga, te ro'c siniaaztuni.

Dxejcti bacuaareni guijxhga ladbee xten barcwga, dxejcti ameer dinia-jcdi nibääreni guijxhga ro'c sa'csi gudxadotzu'tzni bäjł. ⁷ Dxejcti bejn nani sanälazduxh Jesús, räjp loj Pedr:

—Laa Dad Jesús.

Che biejn diajg Simón Pedr laa Dad Jesús, gotgajcni xhablojiaani sa'csi ladxhagjiättis najcwni sa'csi canaazni bäjł, dxejcti gutiäjsni lo nisdoo. ⁸ Sgaii rexpejnpacni biädnäreni rebarcwga sa'csi ameer guidzujnreni ro' nisdoo, si'cti tegayuu metrtis cayäädx. Siädnäzarenı guijxh guidxa rebäjł. ⁹ Che bidzujnreni ro' nisdoo, bahuiireni re' guiboo, ro'c dzuub te bäjł näjza yätxtiil cague'. ¹⁰ Dxejcti räjp Jesús lojreni:

—Coltanä gaii bäjł nani entis gunaaztu.

¹¹ Dxejcti huij Simón Pedr, gulääni guijxhga, guidxani bälro. Guyu' si'cti te gayuu garol con choñ bäjł neñ guijxhga, niluxh dini niräsyä' mase guyu' xhidalduxh bäjł neñni. ¹² Dxejcti räjp Jesús lojreni:

—Coltaa te gauxharejntu.

Nicla tej rexpejnpacni dini niabdiidx lojni: “¿Chu luj?” sa'csi anajnreni laa Jesúsni. ¹³ Dxejcti cua' Jesús yätxtiil, badeedni lojreni, sigajcza rebäjł.

¹⁴ Dee najc ni riojn huält baluilojni loj rexpejnpacni, che gubansacni loj rebengut.

Jesús rrinäj Simón Pedr

¹⁵ Che gulujx gudajwreni, räjp Jesús loj Simón Pedr:

—Simón xi'n Jonás, ¿la sanälajzrulu narä loj chu stee, ä?

Räjpni lojni:

—O'n, Dad, luj najnlu sanälazä luj.

Räjp Jesús lojni:

—Gojp rexilä'ä.

¹⁶ Räpsacni lojni ni rojp huält:

—Simón, xi'n Jonás, ¿la sanälajzlu narä, ä?

Räjpni lojni:

—O'n, Dad. Luj najnlu sanälazä luj.

Räjpni lojni:

—Gojp rexilä.

¹⁷ Räpsacni lojni ni riojn huält:

—Simón xi'n Jonás, ¿la sanälajzlu narä?

Guc-huin lastoo Simón Pedr sa'csi gunabdiidx Jesús lojni choñ huält: “¿La sanälajzlu narä?” Dxejcti räjp Simón lojni:

—Dad, luj najnlu guira'ti. Luj najnlu sanälazä luj.

Räjp Jesús lojni:

—Gojp rexilä. ¹⁸ Rniliäpac lojlu, che gujclu bi'nru, lagajc luj rajcwlu xhajblu, rijlu cadrotis rlajzlu. Che anajclu bengool, susgaatislu ñaalu te gushuajcw ste'ca bejn xhajblu, te chanäreni luj cadro di rlajzlu.

¹⁹ Luxh diidxga gunii Jesús te cagusule'ni xho gugu'treni Pedr te guiliä'pni xpala'n Dios. Che gulujx guniini si'c, räjpni loj Pedr:

—Gudanajl narä.

²⁰ Che gubiré Pedr, bahuiini loj stee xpejnni, nani sanälajzru Jesús, siädnajlni dejtreni. Lagajc bejnre ni gurej cuä' Jesús lo lult xchej, ni räjpza loj Jesús: “Dad, ¿chuni'c najc nani guto'lu?” ²¹ Ni'cni, che bahuii Pedr lojni, räjpni loj Jesús:

—Dad, deea', ¿xhi gun dee?

²² Dxejcti räjp Jesús lojni:

—Palga rlazä jia'nni che guibisacäli loj guedxliujre, ¿xhixh najcni? Basaanni. Luj gudanajl narä.

²³ Ni'cni bire'ch diidx lagajc loj resa'ni, di bejn̄ga guet. Di Jesús niäjb lojni dini guet, alga räjpni: “palga rlazä jia'nni loj guedxliujre che guibisacäli lo guedxliujre, ¿xhixh najcni?”

²⁴ Luxh bejn̄ga najc narä, xpejn̄ Jesús nani bahuiloj guiraa recosre, nani bacuaazareni. Anadonnu didxliipac najc recos nani rniini.

²⁵ Yu'ru xhidalduxh dzuun ni bejn̄ Jesús. Palga gucuaanu guiralii redzuun ni bejn̄ Jesús, nicla lo guedxliujre di gal̄ chu reguijtz cadre xcajni.

Redzuun Rexpejn̄ Dios

Siääd Sprit Dxiān xten Dios te cuääzni neñ lastootu

¹ Xamigwä Teófilo, abacuaä lojlu xcuent guiraa recos nani bejn Jesucrist näjza nani baluui Jesucrist, che guslojlini, ² hasta dxejli ni huäjsni xhaguibaa. Gunibexgaani xhini'c gun renani guleni gac xpejn̄pacni. Sprit Dxiān xten Dios baluui Jesucrist xhi guiniini lojreni. ³ Gudejd Jesucrist trabajwduxh, dxejcti gujtni. Dxejc gubañsacni lo rebengut, baluilojni lo rexpejn̄pacni. Tiuu dxej baluilojni loj rexpejn̄pacni balti huält te gachebereni agubañsacni. Guniizani lojreni xcuent xcäl̄rnibee Dios.

⁴ Che gudejd tiuu dxejga, batojp Jesucrist rexpejn̄pacni, gunibeeni na'c guiriireni guedx Jerusalén, cuääzreni jiääd Sprit Dxiān xten Dios nani aguniipac Dios jiääd. Räj̄pni:

—Dee abiejn̄ diajgtu guniä lojtu. ⁵ Juan batiobnis con nis, luxh ñaj guxii dxej cayääd̄x dxejcru siääd Sprit Dxiān xten Dios te cuääzni neñ lastootu. Si'c guirobnistu —räj̄pni.

Huäjs Jesucrist siini xhaguibaa

⁶ Lagajc dxejc che abidojpreni loj Jesucrist, gunabdiid̄xreni lojni:

—¿La ñaj gudedsaclu yäl̄rnibee lo rexpejn̄ Israel, ä?

⁷ Dxejcti räj̄p Jesucrist loj rexpejn̄pacni:

—Di riäj̄l̄ gacheetu xcuent redxej näjza retieñp nani abasobxgaa Dios con xcäl̄rnibeeni. ⁸ La'tu sica'tu yäl̄rnibee che abiääd Sprit Dxiān xten Dios neñ lastootu. Dxejc chatie'chtu xtidxä näjza rextzunä neñ guedx Jerusalén, neñ guiraa reguedx Judea, neñ guiraa reguedx Samaria, näjza neñ guideb gued̄xliuj —räj̄pni.

⁹ Gulujxtis gunii Jesucrist rediidxga, luxh lañi cahuii rebejn̄ lojni huäjsni xhaguibaa, sa'csi gurejdx Diosni. Dxejc biääd te za, biu'ni neñ zaga. Ro'cti diru rebejn̄ nuhiii lojni. ¹⁰ Lañi cadxelod̄xi rebejn̄ xhaguibaa cadre gunitloj Jesucrist, tiop angl xten Dios ni najcw lād̄nol suga' gajxh cadre suga'reni.

¹¹ Dxejc räj̄p reangl loj rebejn̄:

—¿Xhi rajctu beñ Galilee? ¿Xhicuent cadxelojtu xhaguibaa? Abahuiitu xho huäjs Jesucrist siini xhaguibaa. Lagajc si'c guibisacni —räj̄preni.

Gulereni Matías ni najc apostcoob

¹² Dxejc birii rebejn̄ yejc dajne' ni laa Dan Oliib, siireni guedx Jerusalén. Dan Oliib suga' gajxh Jerusalén. Gusajrenini si'cni rnii leii saj̄c sareni dxej ni rusilajzreni. ¹³ Che biu'reni Jerusalén, bidzuj̄preni ro' yu' cadre rbäzlaareni. Yu'ga najc jiaa yejc stee yu'. Ro'c rbäzlaa Pedr näjza Jacob, Juan, Andrés, Felipe, Tomás, Bartolomé, Mateo, Jacob xi'n Alfeo, Simón nani laaza Zelote, näjza Judas bejtz Jacob. ¹⁴ Ro'c yu' guiraareni näjza regunaa näjza Marii xnan Jesucrist näjza rebetzhuin̄ Jesucrist. Cabejdx, canabreni loj Dios; tejsi najc xhigab xten guiraareni.

¹⁵ Nadxagsa' te gayuu gaj̄l̄ bejn̄. Dxejcti huisulii Pedr galäiireni, räj̄pni loj rebejn̄:

¹⁶ —Caniä lojtu, resa'ä, nanabpac soob xtidx Sprit Dxiān xten Dios ni bacuaa toDavid lo guiitz xcuent Judas, nani bato' Jesucrist loj renani gunaazni.

¹⁷ Gujc Judas sa'nu, bejnzani lagajc dzuun ni biennu. ¹⁸ Cua' Judas meel ni badeedreni lojni che bato'ni Jesucrist. Che gulujx bejnni dzunguijdx ni bejnni, badesacni meel lojreni. Gusiireni te la' yuj. Dxejcti lagajc

Judas basäl duu guejnni, guzäbnajl̄ni lo bej, gujtni. Gusaguijni, dxejcti biräjs xque'ni birii guiraa reziini. ¹⁹ Che biejn diajg rebejn̄ Jerusalén si'c, gulälajreni yujre Acéldama, ni säloj yurejn. ²⁰ Neñ guijt̄z ni laa Salmos abacuaa toDavid rediidxre:

Sujianxteb rolijzni;
na'c cuääzru bejn̄ rolijzni;
näjza:

Suxca'za ste'ca niguii xtzuunni.

²¹ Naj nanab cuenu stee niguii —räjp Pedr—. Nanab gacni tej ni gusanäj nuunu guideb redxej ni guyunäj Jesucrist nuunu, ²² dxejli ni gusloj batiobnis Juan hasta dxej ni huäjs Jesucrist xhaguibaa. Te gacnäj niguiire nuunu gusule'nu diidx gubansacpac Jesucrist lo rebeñgut.

²³ Dxejc gulääreni tiop niguii lojreni, tejni laa José Barsabás ni rbälajreni Justo, steeni laa Matías. ²⁴ Gurejdx, gunabreni lo Dios, räjpreni:

—Dad, Dios, ni racbee lastoo guiraa rebejn̄, baluii loonu con ni najc niguii ni agulelu loj guiro'p niguiire, ²⁵ te jiu'ni lo dzuun näjza lo yälapost ni basa'n Judas cheni sääni garenca nejz —räjpreni.

²⁶ Dxejcti gudzujtreni daad te gulereni lo guiro'preni. Che biajb daad, gulereni Matías. Dxejc bigabnäj Matías stzubiteeb reapost te gujcreni tzubitio'p apost.

2

Biääd Sprit Dxan xten Dios

¹ Che bidzujn̄ dxej ni rajc lanij xten Pentecostés, tre' guiraareni tejsi lajt neñ te yu', ² chela gusloj cayubej xhaguibaa si'c te beroduxh, bachajni guideb neñ yu' cadre suga'reni. ³ Dxejc bahuiireni astoo carechxteb xhidajl̄ bale' casanij rebajlga yejc tejga reni sojb ro'c. ⁴ Biu'ti Sprit Dxan xten Dios neñ lastoo guiragajcreni. Dxejc gusloj caniireni garen-garen didxsaj si'ctisni badeed Sprit Dxan xten Dios guiniireni.

⁵ Neñ redxejga, xhidajl̄ rexpejn̄ Israel ni sasanäjpac xtidx Dios bidzujn̄ guedx Jerusalén. Xhidajl̄ lajt biriireni siädreni. ⁶ Che biejn diajgreni guyubej beduxhga, bidojp rebeñ xhidaalga, bachaag sa'reni. Rdxeloduxh rebeñ xhidaalga sa'csi cayejn diajgreni canii reapost xtidxsajpac cade tejreni. ⁷ Cadxelojreni räjpreni:

—¡Bahuilare! ¿La et beñ Galileedi renani canii, ä? ⁸ ¿Xhoxh riejn diajgnu caniireni xtiidxpacnu si'ctis ni rniinu laadxnu, ä? ⁹ Najcnu beñ nación Partia, beñ nación Media, beñ región Elam, beñ Mesopotamia, beñ Judea, beñ estad Capadocia, beñ región Ponto, näjza beñ Asia. ¹⁰ Najczanu beñ distrit Frigia, beñ estad Panfilia, beñ nación Egipto, näjza bejn̄ ni siäd stelaad Cirene, te estad neñ Africa. Loj rebejn̄ ni siäd Roma yu' reni najc xpejn̄ Israel, yu'za reni bazuxhijb lo Dios sa'csi rililajzreni si'cni rililajz rexpejn̄ Israel. ¹¹ Yu'za beñ Creta. Yu'za beñ nación Arabia. Guiragajcnu riejn diajgnu caniireni xtiidxpacnu si'ctis ni rniinu laadxnu. Caniireni loonu xcuent recosroduxh ni cayujn̄ Dios.

¹² Bidxelojre rebeñ xhidaalga, dijiejn̄ xhi xhigab gunreni. Räjpreni lo sa'reni:

—¿Xhi säloj dee?

¹³ Dxejcti guyu' rebejn̄ ni baxhiznäjreni, räjpreni:

—Agusojz redee.

Gunii Pedr loj rebejn̄

¹⁴ Dxejcti gusulii Pedr nājza tzubiteeb sa'ni, guredxa'ni guniini lo reben xhidaalga:

—Guejbtu, rexpejn Israel, nani rbājz distrit Judea nājza guedx Jerusalén. Colcuadiajg diidx nani guiniä. ¹⁵ Xhet sojzdinu si'cni cayujntu xhigab. Rsilru naj, entis gojl rcagaa. ¹⁶ Dxejc scree gunii Joel che guniini xtidx Dios agujc xchero. ¹⁷ Räj p Dios:

Sidzujn dxej che guxhalä Xsprit Dxañä cuääzni neñ lastoo guiraa rebejn. Rexingaantu nājza rexindxa'ptu sinii xtidxä xcuent recos ni gajd gac.

Rexi'ntu sinixcal,

rextadgoldootu suluiloj bacal recos nani guluiä lojreni.

¹⁸ Guxhalä Xsprit Dxañä loj guiraa reni siädnañl narä.

Siniireni rediidx ni gudedä lojreni xcuent recos nani gajd gac.

¹⁹ Suluiä lojtu balti senro xhaguibaa nājza lo guedxliuj.

Resenro ni gac najc rejn con guiboo, luxh guxh sire' si'c te za.

²⁰ Sicäy loj gubijdx, sajc bäi si'c rejn.

Sajc guiraa recosre,

dxejcru sidzujn dxeduxh che jiälsacä narä, Dios.

²¹ Dxejc guiraa rebejn nani cuedx guiniab gacñäy Diosreni, reni'c siliaa lo dojl.

²² Räj p Pedr lojreni:

—Rexpejn Israel, colcuadiajg xtidxä. Dios baluii Jesucrist, beñ Nazare't, lojtu por recosro, remilagwr, reseñ nani bejni nez lojtu. Lagajc Dios badeed yälrnibee loj Jesucrist te bejni redzunroga. La'tu nancheetu dee.

²³ Galooli ananchee Dios xhi guntu loj Jesucrist Xi'nni. Basaanza Dios bateedtu Jesucrist ladzñaa rebengujdx te bacuaareni Jesucrist lo cruzj te bagu'trenini. ²⁴ Baspañsac Dios Jesucrist, baslaa Diosni ladzñaa yälgujt, sa'csi di niajcdi nica' yälgujtni par tejpas, sa'csi laani rnibee lo yälgujt. ²⁵ Che gubañsac Jesucrist, guzojb diidx ni bacuaa David lo guijtzcuent Jesucrist. Räj p David lo Dios:

Guira dxej ruhuiä lojlu, Dios.

Suga'lu xladbeä cayacñajlu narä te di guidxejb lastoä.

²⁶ Ni'cni bibalajz lastoä, guniäza lojlu lacti rbaa lazä.

Rbalazä sa'csi suhuiilu narä che guetä.

²⁷ Dizalu gusaan jia'n xaimä neñ baa.

Dizalu gusaan gudx tiejxh xi'nlu nani sanälajzlu.

²⁸ Abaluiilu loä xho guibañä par tejpas.

Sibalazduxhä sa'csi guibañnä luj,

si'c räj p David xcuent Jesucrist.

²⁹ Räj p Pedr:

—Guyasi guiniä lojtu agujc xchero gujt David. Aguyutzu'tzni neñ baa. Sajc guihuiinu baa cadre biga'tz David. ³⁰ Gunii David xtidx Dios. Che nabajñli David bia'n diidx gudeed Dios te xajgni ni guirilaj Crist, luxh laani gacni reii si'cni gujc David. ³¹ Sa'csi baluixgaa Dios recosre lo David, ni'c räj p David sibañsac Crist lo rebengut sa'csi di Dios gusaan jia'n xaimni neñ baa, dizani gusaan gudx tiejxhni. ³² Guläs Dios Jesucrist lo rebengut. Nuure bahuiloonuni, najcnu testiigw gubañsacni lo rebengut. ³³ Gurejdx Dios Jesucrist. Naj nabajñ Jesucrist xhaguibaa, nabejni xladbee Dios ro'c canibeeni. Badeed Dios Xsprit Dxañi loj Jesucrist si'cni bia'n diidx. Naj abaxhal Jesucrist Sprit Dxañ lo guedxliuj. Jesucrist cayujñ guira'ti nani cahuiitu, nani cayejñ diajgtu nadxej. ³⁴ Di David nij xhaguibaa, sa'csi lagajc David räj p:

Gunii Dios lo Dad nani rnibee loä: “Gurej xladbeä

³⁵ che guidzujnli dxej gudzugä guiraa reni rdxe'ch lojlu te gacbeereni luj rnibeelu guira'ti."

³⁶ 'Rniliäpac lojtu —räjp Pedr—. La'tu bacuaatu Jesús lo cruz. Ni'cni, colgacbee, guiraatu xpeñ Israel, abejn Dios gac Jesúsre Dad nani rnibee loonu.

³⁷ Che biejn diajgreni laareni bacuaareni Jesús lo cruz, guc-huinuxh lajzreni. Räjpreni lo Pedr näjza lo reapost ni suga' ro'c:

—Aiilu, resa'nu, ¿xhini'c jiennu naj?

³⁸ Dxejcti räjp Pedr lojreni:

—Colgusiech lajztu, colguirobnisza, sa'csi ni'c najc te seen rlanjztu chanajltu Jesucrist, te si'c jia xtojltu. Dxejc suniidx Dios Sprit Dxan cuääz neñ lastootu.

³⁹ Si'c rlanj Dios guniidx Xsprit Dxanni lojtu näjza loj rexi'ntu, näjza lo rebejn ni rbäjz zijtru, näjza loj guiragajc rebejn nani cueedxni —si'c gunii Pedr lo rexpejn Israel.

⁴⁰ Dxejcru gunii Pedr xhidajlru diidx, baliidxni rebejn:

—Colguirii loj rebeñ latsiaj ni re' lo guedxliuj naj, te laatu lo dojl.

⁴¹ Xhidajlreni huililajz rediidxga. Dxejcti gurobnisreni sa'csi huililajzreni xtidx Dios. Lagajc dxejga huililajz si'cti chon mil bejn. ⁴² Sanuutis rusoobreni diidx ni baluii reapost, bibalazduxhreni sa'csi bidxaag sa'reni con rexpejn Jesucrist, gudaunäj sa'reni si'c gudaunäj Jesucrist rexpejn pacni, bidojpreni tejsi lajt te guniireni lo Dios.

Xho gubajn rexpejn Jesucrist galoo

⁴³ Bidxeloduxh guiraa rebejn luxh bejn reapost redzunro, remilagwr.

⁴⁴ Bichaag sa' renani huililajz xtidx Dios. Bachagsa'reni xhixtenreni te tejsi gojpreni guiraa xhixtenreni. ⁴⁵ Bato'reni xhixtenreni, dxejcti badeedreni meel lo sa'reni si'ctis ni caquiin chutis tejreni. ⁴⁶ Guixe-guixee bidojpreni neñ guidoro xten Israel. Tejsi najc rexhigabreni. Gudaunäj sa'reni roliz cadetejreni, guiraareni bibalaznăduxh sa'reni. ⁴⁷ Gulă'preni xpala'n Dios. Guiraa rebejn gunii rexpejn Jesucrist najc beñsa'c. Guixe-guixee batie' Dios xhidajlru bejn nani rililajz xtiidxni, badzucajni rextojlreni, dxejc bachaagreni lo rexpejn Jesucrist.

3

Biajc niguii nani racxhuu ni'ni

¹ Guyu' te dxej sää Pedr näjza Juan nez loj guidoro si'cti rcachon gudxej.

² Guyu' te niguii nani racxhuu ni'ni, digacdi sani che gojllini. Guixe-guixee rile'c bejn niguiiga ro' puertroga xten guidoro. Puertroga laa Sacré. Ro'c rbejni rniabni gojn lojreni riu' guidoo. ³ Che bahuiini agojl jiu' Pedr näjza Juan neñ guidoroga, gunabni te gojn lojreni. ⁴ Dxejcti bahuii Pedr näjza Juan lojni. Räjpreni lojreni:

—¡Bahuii loonu!

⁵ Che biejn diajg niguiiga xtidx Pedr, bahuiini lojreni sa'csi naani sudeedreni meel lojni.

⁶ Räjpreni lojreni:

—Xhetliidi meeldi rapä, nani rapätis sunidxä lojlu. Xcuent xcälrnibee Jesucrist, beñ Nazare't, rniä lojlu: ¡Gusuli! ¡Gusaj! —räjpreni.

⁷ Dxejcti gunaaz Pedr naani, guläsnini. Biligajc ni'ni, gusutijp ni'ni.

⁸ Huisuyälni, gusajni. Biunäjni Pedr näjza Juan neñ guidoro. Rsiajni, rtiäsnini, calä'pni xpala'n Dios. ⁹ Bahuii xhidajl bejn lojni neñ guidoro, rsiajni, calä'pzani xpala'n Dios. ¹⁰ Biembeerreni laa niguii ni rbej ro' puertro xten guidoro, rniabni gojn. Guiraareni bidxeloduxhreni bahuiireni xhi gusajc niguii ni gucxhuu ni'ni.

Baluu Pedr xtidx Dios nen cordoor xten guidoro

¹¹ Ro' guidoroga yu' te cordoor ni laa Cordoor xten Salomón. Ro'c suga' Pedr näjza Juan, naztzu'tz niguiiga ñaareni. Ruxun guiraa rebejn bidzujn nen cordoorga. Bidxelojreni sa'csi arsiaj niguii ni gucxhuu ni'ni. ¹² Che bahuii Pedr lo rebejn räjpni lojreni:

—¿Xhicuent rdxeloj guejbtu, rexpejn Israel? Pet naatu nuure basiajcnu ni' niguiire. Xhet nuudire basiajcnu ni'ni. Xcuent xcälrnibee Jesucrist biajc ni' niguiire. ¹³ Xtiooznu, ni najc Xtiooz toxtadgoldoonu Abram, toxtadgoldoonu Isaac, näjza toxtadgoldoonu Jacob, lagajc Diosga abadeed yälrnibee loj Xi'nni Jesús. Niluxh la'tu bateedtuni ladzña reguxhtis. Che rlajz Pila't ni rnibee nuslaa Jesucrist, ditu nicäjb niriini, alga guniyajtuni nez loj Pila't. ¹⁴ Niluxh la'tu baro'ntu Xi'n Dxaan xten Dios nani rujn ganax dzunsa'c. Alga gunabtu birii te niguii nani bagu't bejn. ¹⁵ Jesucrist rudeed yäl nabajn, luxh la'tu gunabtu bacuaareni Jesucrist lo cruzj. Gulässac Dios Jesucrist lo rebejgut. Bahuiloonu nabajn Jesucrist, najcnu testiigw gubansac Jesucrist lo rebejgut. ¹⁶ Cahuiitu loj niguiire nani gucxhuu ni'ni, luxh rumbeetuni. Xcälrnibee Jesucrist abasiajc niguiire, sa'csi huililajzni. Sa'csi huililajznu xtidx Jesucrist, ni'c biajcnu te najcni si'cni rhuiituni naj.

¹⁷ Rexpejn Israel, narä nanä di'tu niacbee, diza rexcuxhtistu niacbee laa Xindxan xten Dios ni bacuaatu lo cruzj. ¹⁸ Scree gujc te guzobj xtidx Dios ni cuaj lo guijt agujc xchero. Diidre bacuaa reniguii ni gunii xtidx Dios, Crist xten Dios sidejd trabajwduxh. ¹⁹ Ni'cni colsiechlajztu, colguibi' loj Dios te guibicaj xtojltu. Dxejc susiälyuj Dios lastootu, sujnni gac nacoob guira'ti, si'cni bia'n diidx gacni. ²⁰ Lojtu suxhalza Dios Jesucrist nani rnibee, nani aguleni galooli. ²¹ Naj nungäjl jia'n Jesucrist xhaguibaa dxejli guscoob Dios guiralii recos si'cni bia'n diidx gac, si'cni gunii Dios lo reniguii nani gunii xtiidxni lo retoxtadgoldootu agujc xchero. ²² Scree gunii to Moisés lo retoxtadgoldoonu, räjpni: “Xtadnu Dios suxhal te niguii sa' narä nani cueni lo resa'tu. Siniini xtidx Dios. Colgusobdiajg guiralii diidx nani guiniini lojtu. ²³ Renani di gusooob rextiidxni, sinitlojreni, direni gac rexpejn Dios.”

²⁴ Räjpza Pedr:

—Sigajcza agunii guiralii reniguii nani gunii xtidx Dios. Si'c agunixgaa to Samuel, näjza guiraa reniguii ni siädnajlni, xcuent recos ni cayajc nen redxejre. ²⁵ La'tu najc xajg reniguii ni gunii xtidx Dios. La'tu biannäjtu diidx nani gunii Dios loj retoxtadgoldoonu. Bia'n diidx, räjp Dios loj toxtadgoldoonu Abram: “Jiädjajl te xajglu ni gupalazduxh rebejn guedxliuj, sa'csi suslaanireni lo dojl.” ²⁶ Dxejcti ganiddoo lojtu baxhal Dios Jesucrist te guibaa lajztu che gusiejch lajztu, te na'cru guntu dojl —räjp Pedr.

4

Baluu Pedr näj Juan xtidx Dios loj reguxhtis

¹ Lał ni caniireni lo rebejn, ro'c bidzujn rebixhojz xten Israel näjza nani rnibee lo resoldaad xten guidoro näjza resaduceos. ² Bidxe'chduxhrene sa'csi cagulijdxrene rebejn, cayäjpreni:

—Sibansac rebejn lo rebejgut sa'csi gubansac Jesucrist lo rebejgut.

³ Gunaaz reguxhtisrene, biäureni sa'csi agudxej luxh abiäu jusgaad. Nen latzguib barareni yääl. ⁴ Xhidajl reni biejn diajg xtiidxrene huililajz xtidx Dios. Si'cti gaii mil niguii huililajz xtidx Dios.

⁵ Che bara yääl, bachaag sa' guiraa rebejgool, renani rnibee guedx Jerusalén, näjza rebejn ni ruluii leii, ⁶ näjza Anás ni rnibee guiraa rebixhojz, näjza xpagojzni ni laa Caifás, näjza Juan, näjza Alejandro, näjza guiraa reniguii

ni najc sa' rebixhozro ni rnibee. ⁷ Gunibeereni biääd Pedr näjza Juan gusuj galäiireni te gunabdiidxreni lojreni:

—¿Chu xcälrnibee rajptu? ¿Chu laj basä'ttu te basiajctu niguiire?

⁸ Dxejcti sa'csi cayu Pedr diidx ni canii Sprit Dxan xten Dios neñ lastooni, räjpni lojreni:

—Caniä lo guejbtu, reguxhtis näjza rebengool xten rexpejn Israel, ⁹ palga canabdiidxtu xhicuent gucnäjnu niguii nani gucxhuu ni'ni, palga canabdiidxtu xho basiajctnu niguiiga, ¹⁰ gusule'nu xcuent dee te gacbeetu te gacbeeza guiraa rexpejn Israel. Xtidx Jesucrist najc yälrnibeduxh. Diidxga abasiajct ni' niguiire, xhet rajcdini suga'ni nez lojtu. La'tu abacuaatu Jesucrist lo cruzj, niluxh Dios guläsni lo rebengut. ¹¹ Di'tu ninälajz xtidx Jesucrist. Laani najc si'c te guij nani rbäcajtü che runcheetu te yu'. Per Dios abejn najc Jesucrist si'c guij nani maazru nacsä'c, nani guyu' squiin xte yu'. ¹² Xtebtis Jesucrist rusläa bejn lo dojl, ruti stee bejn lo guedxliuj nani baxhal Dios te gusläani bejn lo dojl —si'c räjp Pedr.

¹³ Che biejn diajgreni xtidx Pedr, bidxelojreni sa'csi di Pedr näjza Juan guidxejb, dizareni guitujy. Dxejcti räjp rebixhojz ni sajcro lo sa'reni:

—Direni ganduxh guijt, bejntisreni.

Dxejcti gucbeereni gusanäj redee Jesucrist, lojni bisieedreni. ¹⁴ Bahuiiza rebixhojz lo niguii ni abiajct ni'ni, suganäjni guiro'preni. Ro'cti xhetru gujcdi gunii rebixhojz sa'csi laaca bejnreni. ¹⁵ Dxejcti gunibee rebixhojz birii guidxojnreni telaad te bij rebixhojz diidx ensilaareni. ¹⁶ Räjpreni lo sa'reni:

—¿Xhi jiennäanu reniguiire? Guiraa reben Jerusalén anajn xcuent dzunroduxhre ni cayujnreni. Digacdi gucuatzaaznuni. ¹⁷ Per te di guire'ch xtidx Jesucrist ste'ca guejdx, do'o gulijdxnu guidxojnreni te na'c guiniirureni xtidx Jesucrist ste'ca guejdx.

¹⁸ Huixisac rebixhojzreni. Dxejcti räjpreni lojreni:

—Na'c guluirutu xtidx Jesucrist, na'cru guiniitu xtiidxni.

¹⁹ Dxejcti gunii Pedr näjza Juan, räjpreni lojreni:

—¿Colguinii loonu chu xtiidx sajcro guicuaadiaagnu? ¿Xtiidx la'tu, o xtiidx Dios? ²⁰ Digacdi gusäunu ro'nu. Nanabpac gusule'nu diidx xcuent recos nani abahuiinu näjza rediidx ni abiejn diajgnu.

²¹ Balidxsac rebixhojzreni te na'cru guiniireni xtidx Jesucrist. Dxejcti basläa rebixhojz guiro'preni, sa'csi xhetru niajcdi niujnreni lo Pedr näjza Juan, sa'csi canii rebejn bejnreni te dzunsa'c. Xhidajl rebejn gulä'pza xpala'n Dios sa'csi bahuiireni xhini'c gujc ro'c. ²² Sa'csi niguii ni basiajctreni xcuent yälmilagwr agudejdni tiuu ijz.

Guredx-gunab rexpejn Jesucrist lo Dios

²³ Che basläa rebixhojz guiro'preni, gubi'reni lo sa'reni ni najc rexpejn Jesucrist. Bijreni diidx guiraa ni gunii reguxhtis xten rebixhojz näjza rebengool lojreni. ²⁴ Che biejn diajg rexpejn Jesucrist xtiidxreni, tejtis xhigab bejnreni guredx-gunabreni lo Dios, räjpreni:

—Xtadnu Dios, nani benchee xhaguibaa näjza guedxliuj näjza nisdoo näjza guira'ti ni yu' lojreni, neñreni, ²⁵ nani bejn basoob toDavid xtidx Sprit Dxan te bacuaani xtiidxlu, räjpni:

¿Xhicuent guyuduxh reben guedxliuj yärsia'?

¿Xhicuent bejn rexpejn Israel xhigab ni xhet sajcdi?

²⁶ Bidxagsa' rereii lo guedxliuj näjza reguxhtis xten reguejdx te gudxojnreni xtzun Dios näjza xten Dad Crist nani baxhal Dios, si'c gunii toDavid.

²⁷ 'Aguzojb diidxre, sa'csi lo guejdxre bidxagsa' Herodes näjza Poncio Pila't näjza rexpejn Israel näjza rebenzijt nani di gac xpejn Israel. Bidxechnäjreni Xi'nlu nani najc Crist ni baxhallu. ²⁸ Naj abejnreni dzunguijdx si'cni galooli guniilu gac. ²⁹ Naj Guejblu Xtiosnu, bahuii xho cagusacsireni nuure, gucnäj nuure te gutiplaaznu, te na'c guidxeebnu guiniinu xtiidxlu, sa'csi najcnu rexpejnlu. ³⁰ Baniidx xcälrnibeelu loonu te guisajcnu rebejn, te jienzanu redzunro, remilajgwr con xcälrnibee Xi'ndxanlu Jesucrist.

³¹ Che gulujx gurejdxreni lo Dios, gusloj canibsejz yu' cadre tre'reni, cayac si'c te xu. Dxejcti biääd Sprit Dxan xten Dios basutijpruni lastooreni. Dxejcti dirureni nidxejb guniireni xtidx Dios.

Rudeedreni xhixtenreni lo sa'reni

³² Guiraa renani huililajz xtidx Dios, tejsi xhigab bejnreni. Rut chu tejdireni bejn guinibexteb xhixtenni: bachaagreni sa' rehxixtenreni te xca' guiraa renani nani rquiinreni. ³³ Gucnäj Dios reapost, gusutzu'tzreni bijreni diidx bahuilojreni loj Jesucrist che gubansacni lo rebenjut. Gucnäj Dios guiraa rexpejn Jesucrist, luxh gopduxh reben guejdx respe'treni. ³⁴ Ni'cla tejreni di niäädx xhixtenni sa'csi renani gojp xyujni, rolijzni, bato'renini, dxejcti biädnäreni xcuentni, ³⁵ badeedreni meelga lo reapost. Dxejcti gudis reapost meelga lo guiraa renani rquiinni. ³⁶ Guyu' te niguii ni laa José. Lajdxni najc Chipre, ni re' lo nisdoo. Najcni sa' rexfamil levita. Reapost gulälajni Bernabé (ni säloj xtiidxreni bejn ni rbecdxi lajz sa'ni). ³⁷ Scree gulälajrenini sa'csi bato'ni te la' yuj xtenni, dxejcti badeedni meel ni cua'ni lo reapost.

5

Ananías näj chäälni rujn dojl

¹ Guyu' stee niguii ni laa Ananías. Chäälni laa Safira. Bato'reni te la' yuj. ² Niguiire biannäjni gala' meel, dxejc sgala' meelga badeedni lo reapost si'c guiraa xcuent yujga luxh chäälni nanchee xhi cayujnni. ³ Dxejcti räjp Pedr lojni:

—Ananías, ¿xhicuent ruseoblu xtidx Satanás ni rnibee lo rebenjxab, ä? ¿Xhicuent rlanjlu gusgueelu Sprit Dxan xten Dios? Biannäjlu gaii meel ni cua'lu che bato'lu te la' yuj. ⁴ Che gajdlu guto' yujga, xtenluni. Che bato'lu yujga, ¿la xhet xtendilu meel ni cua'lu? ¿Xhicuent bejnlu xhigab neñ lastoolu gunlu dee? Loj Dios guniilu didx-xhii, xhet loodinu.

⁵ Che biejn diajg Ananías xtidx Pedr, biajbni lo yuj, gujtni. Bidxebduxh rebejn che biejn diajgreni xhi gusajcni. ⁶ Sas gubig gaii bi'n batejbreni Ananías neñ lajd. Dxejcti sanärenini huicua'tzrenini neñ baa.

⁷ Pet agujc chon or gujtni chela bidzujn chääl Ananías. Dini gan agujt chäälni. ⁸ Räjp Pedr lojni:

—Gunii, ¿la bato'tu xyujtu si'cni naj chäällu huijni, ä?

Räjp Safira lojni:

—O'n, si'c huijni.

⁹ Dxejcti räjp Pedr lojni:

—¿Xhicuent bejnlu tejsi xhigabguijdx con chäällu? ¿Xhicuent rlanjtu gusgueetu Sprit Dxan xten Dios? Ro lä' siääd renani huicua'tz chäällu. Naj näjza luj chacua'tzreni neñ baa.

¹⁰ Si'ctis biajb Safira, gutgajczani. Dxejcti bidzujn rebi'n, bahuiireni agujtni. Dxejcti guläsrenini, biriireni huicuatgzajgrenini cuä' baa cadre biga'tz chäälni. ¹¹ Bidxebduxh guiraa rexpejn Jesucrist, näjza guiraa rebejn nani biejn diajgni recosre.

Bejn reapost xhidajl redzunro, remilagwr

¹² Xhidajl redzunro, remilagwr bejn reapost nez loj rebenguejdx. Nadxaag sa' rexpejn Jesucrist, caguchaagreni diidx neņ cordoor ni laa Salomón. ¹³ Guyu' xhidajl bejn ni di nuchaag lo rexpejn Jesucrist sa'csi bidxebreni guchaagreni lojreni. Rebenguejdxga guläpduxhreni xpala'n rexpejn Jesucrist. ¹⁴ Neņ redxejga xhidalduxh rebejn huililajz xtidx Jesucrist, niguii sigajc gunaa. ¹⁵ Dxejcti gulääreni lo nezyuj rebejn nani cayacxhuu. Siädnä rebejn benracxhuu naga' lo da', te gaxäjsi ted xpalaa Pedr yejcreni che ted Pedr ro'c, te si'c jiajcreni. ¹⁶ Guedx Jerusalén bidzujn xhidajl rebejn ni siäd ste'ca guejdx. Biädnäreni rebejn ni cayacxhuu näjza balti bejn ni yu' benđxab neņ lastooreni. Con xcälrnibee Jesucrist basiajc reapost reben racxhuu, gulääzarenı rebenđxab neņ lastoo balti bejn.

Gudejd reapost trabajw

¹⁷ Dxejcti bidxechlajz bixhojz ni rnibee, näjza reniguii ni laa saducee, sa'csi calä'p rebenguejdx xpala'n reapost sa'csi basiajcreni reben racxhuu. ¹⁸ Gunaazreni reapost. Basäurenini neņ latzguiib. ¹⁹ Niluxh yäälga, biäd te angl xten Dios, baxhalni ro' latzguiibga. Dxejcti gulääni reapost neņ latzguiib. Räjpmi lojreni:

²⁰ —Colchäj guidoro. Ro'c colguinii lo rebejn xho gac guibanjäjreni Dios par tejpas.

²¹ Che biejn diajgreni si'c, rsildooru biu'reni neņ guidoro, ro'c baluiireni xtidx Dios lo rebejn.

Dxejc bixhojz nani rnibee, näjza rebengool, bachagsa'reni gurejdxreni guiraa reguxhtis xten guidoo, näjza guiraa reguxhtis xten rexpejn Israel. Dxejcti gunibeereni jiädnä reguixhajg reapost nani biäu neņ ladtguiib. ²² Che bidzujn reguixhajg latzguiib, bahuii reguixhajg neņ latzguiibga, niluxh rut yu'di neņ latzguiib. Che gubi'reni biädnäreni diidx, räjpmi loj reguxhtis:

²³ —Che bidzunnu latzguiib, niäudzu'tz ro' latzguiib luxh resoldaad ni cayajp ro' latzguiib suga' guiro'p laad. Che baxhalnu ro' latzguiib, rut yu'di neņ latzguiib.

²⁴ Che biejn diajg bixhojz ni rnibee, näjza capitán nani rnibee resoldaad xten guidoro, näjza rebixhojz, ben tio'p lajzreni, räjpmi lo sa'reni:

—¿Xhini'c gujc? ¿Xhoni gac naj? —räjpmi.

²⁵ Dxejcti bidzujn te niguii, räjpmi lojreni:

—Reniguii ni basäutu neņ latzguiib, areni suga' neņ guidoro, luxh caguluiireni rebejn —räjpmi.

²⁶ Dxejcti sanä capitán xten resoldaad rexcuxhtis guidoro te biädnäreni reapost, luxh direni nusacsí reapost sa'csi rdxebreni nucuaarenı guij yejcreni.

²⁷ Che bidzunjäjreni reapost, räjpmi suurenı nez loj reguxhtis xten Israel, sas gunii bixhojz ni rnibee, ²⁸ räjpmi loj reapost:

—¿Et agunibeenu lojtu na'cru guiniitu xtidx Jesucrist? Xhoxh naj cagutie'chtu rediidxga lo guiraa rebejn neņ guedx Jerusalén. La'tu rlanjtu cuaquijtu nuure bagu'tnu Jesucrist.

²⁹ Dxejc räjpmi Pedr näjza reapost lojreni:

—Nanabpac gusoobnu xtidx Dios, lacuaa gusoobnu xtidx bejn. ³⁰ Bagu'ttu Jesucrist che bacuaatuni lo cruzj. Niluxh Xtios xtadgoldoonu guläsni lo rebengut. ³¹ Naj agule'c Diosni xladbeenı cadro rnibeenı, abadeedza Dios yälrnibee loj Jesucrist te gusläani nuure, te si'c rlanjzı guibicaj xtojł guiraa rexpejn Israel nani gusiechlajzreni. ³² Bahuiloonu xhi bejn Dios. Ni'c cagusule'nu. Nadoncheenu Sprit Dxaan xten Dios cayacnäj nuure te gusule'nu rediidxre. Badeed Dios Sprit Dxaan xtenni lo guiraa renani susoob xtiidxni.

³³ Che biejn diajg reguxhtis rediidxga, bidxechduxhreni, rlanjreni nugu'treni reapost.

³⁴ Dxejcti huisulii te niguii ni laa Gamaliel, nani najc te farisee nani ruluii leii xten Israel, rebejn rapduxh respe't dade'ga. Gunibee Gamaliel guirii reapost neñ yu'ga.

³⁵ Dxejcti räjp Gamaliel lo rebixhojz:

—Guejbtu rexpejn Israel, colyensa'c xhigab xhini'c rlanjtu gunnäjtu reniguiire. ³⁶ Colzaa lajztu gajd gac xchej guyu' tej ni laa Teudas, räjpni rnibeduxhni. Dxejc huinajl tajp gayuu bejn. Che bagu'trenini, bire'ch guiraa rexpejn, xhetru bejndireni. ³⁷ Neñ ijz ni guyu' cens, biriiza Judas ni siääd Galilee. Dxejc gurejdxni xhidajl bejn ni huinajlni. Bagu'tza bejn, dxejcti bire'chza guiraa reni huinajlni. ³⁸ Naj rniä, colguibicaj, colgusaan reniguiire, rexpejn Jesús. Palga guejbcareni cayujnreni dzuunre, xtebcani sinitlojni. ³⁹ Palga xtzuun Dios ni cayujnreni, digacdi guscuääznu dzuunga, sa'csi guidilnu guidxe'ch Gueb Dios loonu.

⁴⁰ Bichagljaz rebixhojz xtiidx Gamaliel. Gurejdxreni reapost, dxejcti gudijnreni reapost, gunibeereni loj reapost na'cru guiniireni xtidx Jesús. Dxejc baslaarenini. ⁴¹ Biriitireni nez loj rebixhojz. Cabaduxh lajzreni sa'csi gujc gudejdreni trabajw xcuent Jesucrist. ⁴² Guixe-guixee laltis baluiireni xtidx Jesucrist neñ guidoro näjza rolijz bejn. Cagusule'reni diidx lo rexpejn Israel:

—Jesús najc Crist nani cabääztu jiääd.

6

Gulereni reniguii ni gudeed yäxtiil lo rexpejn Jesucrist

¹ Neñ redxejga, xhidarlo gujc rexpejn Jesucrist. Niluxh gusloj camojm rexpejn Jesucrist nani rnii didx griegw. Räjpreni:

—Xhet laadi cayujn rebejn ni rnii didx hebreo. Rebiuud nani rnii didx hebreo rca'ru loj rexpiuudnu. Rebiuud ni rnii didx hebreo rca'ru xhi gaureni che rguisreni xhi gau rebiuud guixe-guixee.

² Dxejcti batie' guitzubitio'p reapost guiraa rexpejn Jesucrist, räjpreni lo guiraareni:

—Et laadi guisaannu guluiinu xtidx Dios te quisnu xhi gau rebiuud. ³ Ni'c nanab cuetu lo resa'tu gajtz niguii nani najntu najc beñsa'c, nani rbäjz Sprit Dxan xten Dios neñ lastooreni, nani yu' xcäriejnreni. Reniguiire quis xhi gaureni. ⁴ Te si'c sajc chanuutis guiniabnu lo Dios, guiluiizanu xtidx Dios lo rebejn.

⁵ Guiralii rebejnnga bidxagljazreni diidxga. Dxejcti gulereni Esteban, te niguii ni rlilajzpac xtidx Dios, rbäjzza Sprit Dxan xten Dios neñ lastooni. Gulezarenini Felipe, Prócoro, Nicanor, Timón, Parmenas; gulezarenini Nicolás nani siääd guedx Antioquía. Nicolás najc te proselite, nalajznu, dini gac xpejn Israel, per basoobni xleii toMoisés che gajdni chalilajz xtidx Jesucrist.

⁶ Sas biädnä rexpejn Jesús guigajtz niguiiga lo reapost. Dxejcti guredx-gunab reapost lo Dios xcuent reniguiiga, batzuubreni ñaareni yejc reniguiiga si'c te seen abiu'reni lo xtzuunreni.

⁷ Birechduxh xtidx Dios. Xhidajl beñ Jerusalén huililajz xtidx Dios, näjza xhidajl bixhojz.

Gunaazreni Esteban sanärenini lo rebixhojz nani rnibee

⁸ Gucnäduxh Dios Esteban, bejnini redzunro, remilagwr nez lo rebejn.

⁹ Dxejc rebejn guidoo ni laa Libertados gusloj cadiñäj Esteban. Lojreni nadxaag beñ Cirene, näjza beñ Alejandría, näjza gaii beñ Cilicia, näjza sgaii bejn ni siääd reguedx Asia. ¹⁰ Reniguiire di najc di nuzejceni diidx lo

Esteban, sa'csi nasin_uduxhni, luxh cayacnäj Sprit D_xan xten Diosni. ¹¹ Dxejcti baquilreni sgaii niguii ni di gac xpejn Jesús, te räjpreni:

—Biejn diaagnu caniyaj Esteban toMoisés näjza Dios.

¹² Scree gujc bache'chreni rebejn näjza rebejn ni ruluii leii näjza rebengool. Dxejcti bachagsa'reni, gunaazreni Esteban. Huinärenini lo reguxhtis xten Israel. ¹³ Dxejcti biädnäreni reniguii nani baquilreni te guniireni didx-xhii. Räjp reniguiire:

—Entis rniyaj Esteban leii xten toMoisés näjza guidodxanre. ¹⁴ Abiejnza diaagnu gunii Esteban: “Jesús nazareno sutzujl guidoro, suchaazani leii nani baniidx toMoisés loonu.”

¹⁵ Dxejcti guiraa rebejn ni sobga' ro'c bahuiireni lo Esteban, bahuiireni rujn lojni si'c rujn loj te angl xten Dios.

7

Diidx ni basule' Esteban lo rebixhojz

¹ Dxejcti räjp te bixhojz nani rnibee lo Esteban:

—¿La gulii si'c guniilu, ä?

² Räjp Esteban lojreni:

—Colgucuadajg rextidxä, guejbtu dad, näjza resa'ä. Xtioznu ni sacduxh, ni rnibee, baluiloj lo toxtadgoldoonu Abram che guläjzni Mesopotamia, che gajdni chaläjz nen guedx Harán. ³ Räjp Dios loj toAbram: “Birii lajdxtu, basa'n guiraa resa'lu. Huij cadrotis guluiä lojlu” ⁴ —räjp Esteban—. Dxejcti birii toAbram lajdx reCaldeos. Huiläjzni guedx Harán. Che gujt xtadni, biädnä Dios toAbram nez ree, cadre rbääznu naj. ⁵ Di Dios nuzalajz nicla tla' yuj cadre suu te ni' toAbram. Niluxh räjp Dios sudeedni yujga lo rexajg toAbram, jiannäjreni yujga che guet toAbram. Niluxh nicla gajd xi'n toAbram chu dxejc. ⁶ Stee huält räjp Dios lo toAbram: “Rexi'nlu, rexagdoolu, siläjzreni si'c benzijt. Ladxbejn gacreni mos, ro'c susacsí bejnreni si'cti tajp gayuu ijz.” ⁷ Räjp Dios: “Narä sunä castiigw rebejn ni gusacsíreni che najcreni mos. Narä cuää rexagdoolu ro'c, te ree guzuxhijbreni loä nen guejdxre”, si'c räjp Dios ⁸ —räjpza Esteban—. Dxejcti si'c bia'n Dios diidx con toAbram, gunibee Dios gutiuug Abram lagajc laani, te chuni bee; ni'c najc te seen xten diidx ni bia'n Dios con Abram. Guyu' te xi'n toAbram, ni laa Isaac. Che guyu'ni xhujn dxej, basälza toAbram beegani si'c te seenza. Sigajcza bennäj Isaac xi'nni Jacob. Sigajcza bennäj Jacob guitzubitio'p rexi'nni nani najc rexpengoldoo xpen Israel.

⁹ Räjp Esteban:

—Guitzubiteb rexi'n Jacob guyu' te yälrudxojn lo bejtzreni José. Dxejc bato'reni José lo te ben Egipto. Dxejc Dios goptzu'tz José. ¹⁰ Che gudejd José trabajwduxh, gucnäj Diosni. Badeed Dios yäl_unasin_uduxh lojni. Bejn Dios bichagljaz rei Faraón José. Badeed rei Faraón gujcn gubernadoor xten Egipto. Gunibeeza José guira'ti xhixten reiiga.

¹¹ Räjpza Esteban:

—Che bidzujn dxej gujc te gubijn, guiraa nen reguedx Egipto näjza guiraa nen reguedx Canaán, trabajwduxh cadejd guiraa rebejn. Xhet guyu'di xhi niajw retoxtadgoldoonu. ¹² Che biejn diajg xtadgoldoonu Jacob yu' xhi gaureni nen reguejdx xten Egipto, ro'c baxhalni rexi'nni, bica'reni xhi gaureni te huält. ¹³ Che huijreni stehuält, dxejc bazäbdiidx José lojreni laani najc bejtzreni. Biembeeza Faraón resa' José. ¹⁴ Dxejcti baxhal José diidx jiääd xtadni Jacob, näjza guiraa resa'ni, cuääzreni Egipto. Najc rebejn_ga si'cti gayonbitzubigaii bejn. ¹⁵ Si'c gujc te huij Jacob guedx Egipto. Ro'c guläjzni,

ro'c gujtni. Ro'c gujtza retoxtadgoldoonu. ¹⁶ Dxejcti huinäreni rextzujtreni loj Siquem te biga'tzsacreni neñ baa nani gusii toxtadgolnu Abram lo rexi'n Hamor neñ guedx Siquem.

¹⁷ Räjpe Esteban:

—Che bidzungajxh dxej, si'c diidx ni bia'n Dios con toxtadgoldoonu Abram, bidalduxh rexpengoldoonu neñ guedx Egipto. ¹⁸ Dxejcti guyu' te xreii Egipto ni di gan guiraa redzunsac'c nani bejn toxtadgoldoonu José. ¹⁹ Reiiiga basgueeni rexpengoldoonu, basacsínireni, trabajwduxh bateedni rexpengoldoonu. Gunibee reiiiga basälreni guiraa rebáz niguii te di laareni, te guetreni. ²⁰ Neñ redxejga, gojl Moisés. Che gujc Moisés báz, te báz daani, saru rujn lojni, huinäälajz Diosni. Gułaani choñ bäii rolizni. ²¹ Dxejc huisälrenini, te guzojb xtidx Faraón. Dxejc lagajc xindxa'p Faraón bidxälni Moisés, cua'nini baslaanini si'c xi'nni. ²² Bisieed Moisés guiraa ni najn rebeñ Egipto. Gunisa'cni diidx, bensa'cni dzuun.

²³ Räjpe Esteban:

—Che guyu'ni tiuu ijz, banaj lajzni resa'ni ni najc xpejn Israel, huijni cadro rbäjzreni. ²⁴ Dxejc bahuiini casacsí te beñ Egipto te beñ sa'ni. Sas bagu'tni beñ Egipto. ²⁵ Bejn Moisés xhigab pet sacbee resa'ni cayacnäj Diosni te guslaani rexpejn. Luxh di resa'ni niacbee si'c. ²⁶ Che bara yääl, bahuii Moisés cadilnäj sa'reni tiop xpen Israel. Räjpe Moisés lojreni: “Colcuedxi, Dad. Lagajc sa'tu cadilnäjtu. ¿Xhicuent rdijltu?” si'c gunii Moisés, te na'cru tilnäj sa'reni. ²⁷ Dxejcti nani cayunniälajzga, balanaani Moisés, räjpni loj Moisés: “¿Chu baniidx yälrnibee lojlu te jiädnibeelu nuure? ²⁸ ¿La rlajzlu ju'tlu narä si'c bagu'tlu beñ Egipto naiti?” —räjpni—. ²⁹ Che biejn diajg Moisés rediidxga, baxunni, huijni zijt. Huiläzsjcni guedx Madián. Ro'c bachnaani, guyu' tiop xingaanni.

³⁰ Räjpe Esteban:

—Che gudejd tiuu ijz, bidzujñ te dxej cansajni nez lo reyubijdz ni naga' guideb gabi dajn ni laa Sinaí. Ro'c bahuiini te bajl neñ te yaguejch. Neñ bajlga baluiloj angl xten Dios lo Moisés. ³¹ Bidxeloduxh Moisés che bahuiini si'c. Dxejcti gubigni te rlajzni nuhuisa'cni yajgga. Dxejc biejn diajgni gunii Dios, räjpni lo Moisés: ³² “Narä nacä Xtios rextadgoldoolu, narä nacä Dios xten Abram, nájza xten Isaac nájza xten Jacob.” Dxejcti gucsez Moisés sa'csi bidxebduxhni, diruni nuhuisa'c yajgga. ³³ Dxejcti räjp Dios lojni: “Gulää xcura'chlu. Yuj cadro suga'lu najc dxan, sa'csi narä yu'ä ree. ³⁴ Abahuiä xho cagusacsí rebeñ Egipto rexpeneä. Abiejn diagä xho roonreni. Naj abiälä te guslaä rexpeneä. Gudaa naj, suxhalälu chäälü Egipto.”

³⁵ Räjpe Esteban:

—Dios badeed yälrnibee lo Moisés nani baze' retoxtadgoldoonu che räjpreni: “¿Chu baniidx yälrnibee lojlu te jiädnibeelu nuure?” Baxhal Dios Moisés te guinibeeni xpejn Dios, gucnájza Dios Moisés baslääni rexpejn neñ nación Egipto si'c gunii angl xten Dios che baluilojni lo Moisés neñ yaguejchga. ³⁶ Gulää Moisés rebejnğa. Ganiddoo bejn Moisés redzunro, yälrdxeloj neñ nación Egipto nájza ro' nisdoo ni laa nisdoo xniaa. Tiuu ijz cuansaj retoxtadgoldoonu neñ yubijdzroga, ro'c bejnza Moisés redzunro, remilagwr. ³⁷ Lagajc Moisésre gunii xtidx Dios che räjpni loj rexpejn Israel: “Sibe Dios lo rexajgtu te niguii ni najc sigac narä. Siniini xtidx Dios. Colgusoob xtiidxni.” ³⁸ Lagajc Moisés guyunäj rebejn neñ yubidzro. Xangl Dios guninäj Moisés neñ dajn xten Sinaí. Dxejcti badeed Moisés rediidx ni gunibee Dios lo retoxtadgoldoonu. Laareni basa'nreni diidxga loonu.

³⁹ Räjpe Esteban:

—Niluxh di retoxtadgoldoonu nusoob rextidx Moisés. Di rlazjreni guinibee Moisésreni. Canaduxhlajjreni nación Egipto. ⁴⁰ Che sää Moisés dajn Sinaí, räjpreni loj Aarón bejtz Moisés: “Benchee banäjb gac xtiooznu, te nidreni loonu, te chanajlnurení. Chu gan con Moisésre ni baluui nezyuj che gulääni nuure guejdx reEgipto.” ⁴¹ Sas bencheereni te banäjb ni najc si'c te gonbáz. Dxejcti bagu'treni guidxaa te badeedreni rejnga lo banäjb te bazuxhijbreni lojni. Bibalazduxhreni sa'csi abencheereni banäjbga. ⁴² Dxejcti gubicaj Dios loj rexpejn Israel sa'csi bejnreni si'c. Basaan Dios gojnreni gubijdx, näjza bäii, näjza rebal xhaguibaa. Gujcní si'cni caj lo guijtz ni bejn reniguii nani bacuaa rextidx Dios. Räjp Dios:

La'tu beñ Israel, cheni cuansajtu tiuu ijz nez lo reyubijdz,

¿la par narä bagu'ttu guidxaa, ä?

¿La loä baniidxtu xtiejnreni, ä?

⁴³ Xho gacni si'c, räjp Dios.

Cuansanäjtu te yu' najcw guiid cadro chu te banäjb.

Neñga guyu' banäjb ni laa Moloc, nani najtu najc xtiostu.

Gojnzatu balbäze' xten xtiostu ni laa Remfán.

Redios ni bencheetistu reni'c gojntu.

Ni'cni sibää la'tu ree guxhalä la'tu stelaad guedx Babilonia.

⁴⁴ Guniiru Esteban, räjpni lojreni:

—Neñ reyubijdz gojp retoxtadgoldoonu te yu' najcwni guiid. Gujcní xquidooreni. Ro'c guninäjreni Dios. Benchee retoxtadgoldoonu yu' najcw guiidga si'cni guinibee Dios che baluuiini lo Moisés xhoni gacni. ⁴⁵ Che gujt Moisés, Josué guinibee lacuaa toMoisés, huinäni retoxtadgoldoonu nación Canaán. Batzujlreni yuro ni najcw guiid te näj ni'c huinäreni Canaán. Gulää Dios rebejn ni guläjz neñ reguedx Canaán. Dxejcti bia'n retoxtadgoldoonu neñ reguejdxga. Bazuxhijbreni lo Dios neñ yuguiid ni najc xquidooreni che gojlli xtiemp reii David. ⁴⁶ Huinäljz Dios David. Räjp David lo Dios: “Rlazä gunä te guidoo par guejblu, Dios xten nuure, rexpejn Israel.” ⁴⁷ Dxejcti di Dios nusoob xtidx David. Alga Salomón, xi'n David, ni'c benchee xquidoro Dios. ⁴⁸ Naj di Dios guiquiin te yu' nani runchee bejn. Scree bacuaa te niguii nani gunii xtidx Dios. Räjp Dios:

⁴⁹ Si'c najc te yagxhilsa'c cadro rnibee reii, si'c najc xhaguibaa cadro rbeä.

Si'c te bancw cadro rsiuj ni' reii, si'c najc guedxliuj nani bencheä.

Dina guiquinä guncheetu te xyu'ä.

Dina guiquinä te lajt cadro gusilazä, räjp Dios.

⁵⁰ ¿La et naädi benchee guiraa nani ruhuiitu?, räjp Dios.

⁵¹ Räjp Esteban lojreni:

—Te beñ nadduxh najctu. Ditu jiu xtidx Dios. Niäu lastootu, niäuza diajgtu. Di'tu chanälajz xtzuun Sprit Dxan xten Dios, dizani cuääz neñ lastootu. Si'c bejn retoxtadgoldootu, si'cza rujntu. ⁵² Basacsí retoxtadgoldootu guiralií reniguii nani gunii xtidx Dios. Nicla tejni direni niu. Bagu't retoxtadgoldootu guiraa reniguii nani gunii siääd te niguidxan xten Dios. Naj abiääd niguidxanga, Jesucrist laani, luxh la'tu huinäntuni lo guxhtis te gunibeetu gujtni. ⁵³ La'tu biannäjtu leii nani gunii reangl xten Dios loj Moisés, luxh la'tu ditu nucuadiajg rediidxga.

Bagu'treni Esteban

⁵⁴ Che biejn diajgreni rextidx Esteban, bidxe'chduxhreni, rauya' läjreni sa'csi rdxe'chreni lo Esteban. ⁵⁵ Rbäjz Sprit Dxan xten Dios neñ lastoo Esteban, ni'cni bahuitzu'tzni xhaguibaa, ro'c bahuini yälrdimbichasejz xten Dios. Bahuiizani suga' Jesucrist xladbee Dios. ⁵⁶ Räjp Esteban lojreni:

—Colhuilaa. Narä cahuiä xhaguibaa cadre yu' Dios, ruhuiäza loj Xi'n Dios nani gujc Niguii; ani suga' xladbee Dios.

⁵⁷ Guredxaduxhreni basäuzareni diajgreni. Dxejcti baxunreni bixa'treni yejc Esteban. ⁵⁸ Dxejc gudobyujrenini, gulääreni Esteban neñ guejdxga. Ro'c bacuaareni guij yejc Esteban. Che cagucuaareni guij yejcní, guläyalreni xhajbreni; te niguii ni laa Saulo biannäj xhajbreni. ⁵⁹ Lañ ni cagucuaareni guij yejcní, gunii Esteban loj Jesucrist räjpni:

—Guejblu, Dad Jesucrist, cua' narä.

⁶⁰ Dxejcti biajb Esteban, bazuxhijbni, guredxa'ni räjpni:

—Dad Jesucrist, na'c gudzuublu dojre yejc rebejnre, na'c gucuaquiylureni. Gulujxsi guniini si'c, gujtni.

8

Saulo basacsí rexpejn Jesucrist

¹ Rbaduxh lajz Saulo bagu'treni Esteban.

Lagajc dxejga gusloj gudejd rexpejn Jesucrist trabajwduxh neñ guedx Jerusalén. Dxejcti bire'ch rexpejn Jesucrist. Biunejzreni ro'c sääreni nez guiraa reguedx Judea näjza nez guiraa reguedx Samaria. Xtebtis reapost bia'n Jerusalén, direni nire'ch.

² Reniguii nani sanälajz Dios huicua'tz Esteban. Cayonduxhreni sa'csi riareni gujt Esteban. ³ Biäädza Saulo, guixe-guixee basacsíni rebejn nani huililajz xtidx Dios. Biu'ni rolizreni, gunaazni reniguii näjza regunaa te basäunireni neñ latzguiib.

Basule' rexpejn Jesucrist xtidx Dios nez región Samaria

⁴ Che bire'ch rebejn nani huililajz xtidx Dios, basule'reni xtidx Dios nez cadrotis sääreni. ⁵ Tej rebejnnga laa Felipe. Siini nez te guedx Samaria. Ro'c basule'ni xtidx Dios. Räjpni:

—Jesús najc Crist nani cabäjztu jiäd.

⁶ Ro'c bachagsa' rebejn bacuadiajgreni rextidx Felipe, bahuiizareni redzunro, remilagwr nani bejn Felipe. ⁷ Gaii bejn yu' bendxab neñ lastooreni. Che gunibee Felipe guirii rebendxab lastoo rebejnnga, guredxa' rebendxabga, dxejcti biriireni neñ lastoo rebejnnga. Yu'za xhidajl bejn nani digacdiru guiniib, yu'za reni rajc ni'reni, naareni. Con xcälrnibee Jesucrist basiajc Felipe guiraa rebejnnga. ⁸ Sa'csi gujc si'c, bibalazduxh guiraa rebejn neñ guejdxga.

⁹ Guyu' te niguii ni laa Simón neñ guejdxga. Bisieedni bejnni xhidajl redzuun yälbidxaa, basgueeni rebenguejdxga. Bidxeloduxh rebenguejdx lojni. Räjpni lo rebejn rutru chu stee bejn ni najc maazru beñro lojni. ¹⁰ Luxh guiraa rebejn, rebuuux, rebengool, rebenrajp, rebenproob bacuadiajgreni xtidx bidxaaga, räjpreni:

—Laani rajpni yälrnibee xten Dios.

¹¹ Xchero basgueeni rebejn, bidxelojreni rextzunyälbidxaani. Guiraa rebejn huililajz xtiidxni. ¹² Dxejcti baluii Felipe xcuent xcälrnibee Dios, näjza xcuent Jesucrist. Xhidajl rebenguejdxga huililajz rediidx nani gunii Felipe. Dxejcti birobnisreni, niguii näjza gunaa. ¹³ Nägajcza Simón huililajz rediidxga dxejc gurobniszani. Dxejc guyunäj Simón Felipe. Che bahuii Simón lo redzunro, remilagwr nani cayujn Felipe, bidxeloduxh Simón.

¹⁴ Che biejn diajg reapost ni yu' guedx Jerusalén huililajz reben Samaria xtidx Dios, baxhalreni Pedr näjza Juan ro'c. ¹⁵ Che bidzujn guiro'preni guejdxga, gunabreni lo Dios xcuent rebejn ni huililajzga te gudeed Dios Sprit Dxaan xtenni lojreni, ¹⁶ sa'csi gajd Sprit Dxaan xten Dios jiädläjz neñ lastooreni. Che huililajzreni, gurobnisreni te gucbee rebejn chuni'c najc

rexpejn Jesucrist. ¹⁷ Dxejc batzuub Pedr nájza Juan naareni yejc tejga renani ahuililajz xtidx Dios, dxejc badeed Dios Sprit Dxi xtenni biädläjz ni neñ lastooreni.

¹⁸ Che bahuii Simón biädläjz Sprit Dxi xten Dios lastoo rebejn ni batzuub reapost naani yejcreni, rlajz Simón nudeedni meel loj reapost, ¹⁹ räjpni lojreni: —Colguniidx yälrnibee loä te si'cza gudzubä naä yejc rebejn, te jiu' Sprit Dxi xten Dios neñ lastooreni.

²⁰ Dxejcti räjp Pedr lojni:

—iSunitloj xmeellu con luj! Xho gunlu xhigab siilu Sprit Dxi xten Dios nani rudedxlia' Dios. ²¹ Digacdi gunlu dzuun ni riennu, sa'csi xhet laadi najc lastoolu nez loj Dios; yu' dojl neñ lastoolu. ²² Basie'ch lajzlu, badzucaj rexhigab guiidx xtenlu. Guredx-gunab lo Dios, top susiäjł lajz Dios xtojllu ni bejnlu neñ lastoolu. ²³ Naj narä nanä ruguilazduxhlu, luxh runduxhlu xhigabguiidx.

²⁴ Dxejcti räjp Simón lo guiro'preni:

—Colnab loj Dios xcuentä te na'c sacä si'cni caniitu.

²⁵ Che gulujxti bijreni diidx xcuent ni bahuilojreni bejn Jesucrist, che gulujx basule'reni xtidx Jesucrist loj reben Samaria, gubisacreni Jerusalén.

Felipe nájza te dade' ni siääd nación Etiopía

²⁶ Dxejcti biääd te xangl Dios, räjpni lo Felipe:

—Huij lo nezyuj ni rii guedx Jerusalén, ni rij nez guedx Gaza. Nezyujga rdej lo reyubijdz.

²⁷ Sä'ti Felipe. Che bidzujñni lo nezyujga, bidxaagni te dade' ni siääd nación Etiopía. Najcni te eunuco, najczani xcuxhtis reina Candace. Laani rgucheeni guiraa xmeel reinaga. Biääd dade'ga guedx Jerusalén te sagajñni Dios. ²⁸ Siädbisacni lajdxni. Sobga'ni neñ te gare't saruduxh, cayolni xtidx Isaías, nani bacuaa xtidx Dios agujc xchero. ²⁹ Dxejcti räjp angl xten Dios lo Felipe:

—Gubig cuä' gare'tga, guninäj dade'ga.

³⁰ Che gubig Felipe cuä' gare'tga, biejn diajgni cayol dade'ga rextidx Isaías. Dxejcti räjp Felipe lojni:

—¿La racbeelu ni caj lo guijtzi nani cayollu, ä?

³¹ Dxejcti räjp dade'ga lojni:

—¿Xho gacheäni palga rut gusule'dini loä?

Sas räjp dade'ga lo Felipe chä'pni neñ gare'tga.

³² Cadro cayol dade'ga neñ guijtzi ni caj xtidx Dios rnii scree:

Di xiil cuedxa' che rinä bejnni cadro guetni;

dxitis raa xiil che ruhuajrenini.

Si'c te xiil najc niguiire,

xhet rniidini mase rusacsíduxhrenini.

³³ Basacsíduxhrenini.

Reguxhtis ni niujn yälguxhtisni xhet laliidi bejnreni.

Xhet si'cti nunyäjł gunreni.

¿Xho guiniinu yu' xpejñni?

Ni abagu'trenini. Diruni guibajn lo guedxliuj.

³⁴ Dxejcti gunabdiidx beñ Etiopía, räjpni lo Felipe:

—Gunilaa loä, chuni'c ruzä't niguii nani bacuaa reguijtzre, ¿la ruzä'tni lagajc laani o la ruzä'tni ste'ca bejn, ä?

³⁵ Gusloj basule' Felipe rediidx nani abil dade'ga. Dxejcti basule'ni rediidx xcuent Jesucrist. ³⁶ Lal ni sääreni lo nezyuj, bidzujñreni te lajt cadro yu' nis. Dxejc räjp dade'ga lo Felipe:

—¡Bahuii, ree yu' nis! ¿Xhi rudxojn tiobnisä?

³⁷ Dxejc räjp Felipe lojni:

—Palga rililajzlu xtidx Dios neñ lastoolu, sajc tiobnislu.

Dxejc räjp dade'ga lo Felipe:

—Rililazä Jesús najc Crist Xi'n Dios.

³⁸ Dxejc gunibee dade'ga gusudxi gare't, sas biäjt guiro'preni, biu'reni neñ nis, ro'c batiobnis Felipe dade'ga. ³⁹ Che biriireni neñ nis, huinä Sprit Dxan xten Dios Felipe ste'ca lajt. Dxejc diru dade'ga nuhuii lo Felipe. Sä'ti dade'ga lajdxni, cabalazduxhni. ⁴⁰ Dxejcti chela gucbee Felipe abidzujñni guedx Azoto. Baluizani xtidx Dios neñ guiraa reguejdx che bidzujñlini guedx Cesarea.

9

Huililajz Saulo rextidx Jesucrist (Hch. 22:6-16; 26:12-18)

¹ Lałtis cagusacsí Saulo rexpejn Jesucrist. Rlajzni ju'tni guiraareni, ni'c huijni lo bixhojz nani rnibee, ² gunabni gac te guijt chanäni lo reguidoo neñ guedx Damasco te palga guidxälñi reni najc xpejn Jesucrist neñ reguidooga, niguii sigac gunaa, guliibnireni, jiädnänireni guedx Jerusalén te jiäureni. ³ Lał sasajni lo nezyuj, asiäddzũngajxhni guedx Damasco, basaniya' te bal xhaguibaa, basanijni guideb gabi cadre siädsaj Saulo. ⁴ Dxejc biajbni lo yuj, biejn diajgni te xse' bejn nani canii lojni:

—Saulo, Saulo, ¿xhicuent rusacsílu narä, näjza rexpeña?

⁵ Räjp Saulo lojni:

—¿Chuluj Dad?

Räjpni lo Saulo:

—Narä nacä Jesucrist, nani cagusacsíduxhlu. Niluxh lagajc luj cadejdllu trabajw si'c rajc te gon ni rucuaní' yejc caru'ch.

⁶ Bidxebduxh Saulo, racsejsni räjpni:

—Dad, ¿xhini'c rlajzlu gunä?

Dxejc räjp Jesús loj Saulo:

—Huistie, biu' guedx Damasco. Ro'c suluii te niguii xhini'c gunlu.

⁷ Rebejn ni siädnä Saulo sugadxireni, bidxebbreni sa'csi biejn diajgreni te xse' bejn, luxh rut lojdi bahuiireni. ⁸ Che huistie Saulo lo yuj, baxhalni lojni, niluxh di lojni jien. Dxejc gunaazreni ñaani, sanärenini guedx Damasco. ⁹ Ro'c guyu'ni choñ dxej, natiä'p balojni, dini niä', dizani niajw.

¹⁰ Guedx Damasco rbäjz te xpejn Jesucrist ni laa Ananías. Baluiloj Jesucrist loj Ananías lo te bacal, räjp Jesucrist lojni:

—Ananías.

Dxejc räjp Ananías lojni:

—Anaree Dad.

¹¹ Räjp Jesucrist lojni:

—Huistie te chäälü lo nezyuj ni laa Ladbee cad rbäjz Judas. Ro'c guiniab-diidxlu con te niguii ni laa Saulo, beñ Tarso. Cabejdx, canabni loä ñaj. ¹² Lo bacal abahuiini siääd te niguii ni laa Ananías te gutzuubni ñaani yejcní te fiini stehuält.

¹³ Dxejcti räjp Ananías lojni:

—Dad, abiejn diagä xho basacsí niguiiga rexpejnlu neñ guedx Jerusalén.

¹⁴ Luxh rebixhojz ni rnibee abadeed guijt lojni te guiniaazni ree guiraa rebejn nani rbedx-rniab lojlu, chanänireni jiäureni.

¹⁵ Dxejcti räjp Jesucrist lojni:

—Huij, narä aguleäni te gunni xtzunä. Suluiini xtidxä loj rebenzijt nani digac xpen Israel, näjza loj reni rnibee renacion, näjza loj rexpejn Israel.
¹⁶ Narä suluiä lo Saulo trabajwduxh ni tedni te jädnajlni narä.

¹⁷ Dxejcti säa Ananías, bidzujn ni ro yu' cadro rbäzlaa Saulo. Batzuubni naani yejc Saulo. Dxejcti räjp Ananías loj Saulo:

—Betzä Saulo, Jesucrist ni rnibee, nani baluiloj lojlu lo nezyuj cheni siädlu, lagajc laani baxhalni narä te filu stehuält, te jädläjzsa Sprit Dxaan xten Dios nen lastoolu.

¹⁸ Lagajc dxejc bitejb si'c xmelbäjl yec baloj Saulo, biacgajc balojni, bahuisa'cni stehuält. Dxejc huistieni, gurobnisgajcni. ¹⁹ Dxejc gudajwni, guc nadaanni stehuält. Xchej guyunäj Saulo rexpejn Jesucrist nen guedx Damasco.

Gusloj basule' Saulo xtidx Dios nen guedx Damasco

²⁰ Dxejcti gusloj basule' Saulo xtidx Dios nen reguidoo xten rexpejn Israel, räjpni:

—Jesucrist najc Xi'n Dios nani gujc Niguii.

²¹ Che biejn diajgreni xtiidxni, bidxelojreni, räjp lo sa'reni:

—¿La xhet laadi niguiire ni rusäu rexpejn Jesucrist nen latzguiib guedx Jerusalén, ä? Lagajcza dee bidzujn ree te guliibni rexpejn Jesucrist te chanänireni guedx Jerusalén lo rebixhojz.

²² Dxejcti gusutzu'tz Saulo guniini xtidx Dios. Basacajnni rexpejn Israel nani rbäjz Damasco sa'csi basule'pacni Jesús najc Crist nani rnibee.

Baxun Saulo guedx Damasco

²³ Che gudejd xhidajl dxej, bachagsa' rexpejn Israel te nugu'treni Saulo.
²⁴ Dxejcti gucbee Saulo xhi xhigab bejnreni. Dxej, yääl cabäjzreni Saulo ro' guiraa renezyuj ni rdzujn guejdxga te ju'trenini. ²⁵ Dxejcti che gojl te yääl basäl rexpejn Jesucrist Saulo nen te dximro, basiäjtreni dxijmga nez ro' te padeer ni dejd gabi guejdxga. Basiäjtrenini nez dejtz padeerga, te si'c baxunni guejdxga.

Bidzujn Saulo guedx Jerusalén

²⁶ Che bidzujn Saulo guedx Jerusalén, rlanjzni nuchaagni loj reni rililajz xtidx Jesucrist, niluxh guiraareni bidxeybrenini sa'csi direni gan ahuililajzni xtidx Dios. ²⁷ Dxejcti huinä Bernabéni lo reapost, bijni diidx xcuent Saulo. Räjp Bernabé lojreni:

—Baluiloj Jesucrist lo Saulo loj nezyuj. Guninä Xtioznu Saulo loj nezyuj, ni'cni gusutzu'tz Saulo basule'ni xtidx Jesucrist guedx Damasco.

²⁸ Dxejc bia'n Saulo guedx Jerusalén, bidxaagni lo rexpejn Jesucrist.
²⁹ Dxejcti gusutzu'tz Saulo gusloj bijni xtidx Jesucrist lo rebejn. Dxejcti gudilnäjä Saulo rexpejn Israel nani rnii didx griegw. Laareni rdxechduxhreni, rlanjzreni nugu'treni Saulo sa'csi direni nichagljajz xtidx Jesucrist. ³⁰ Che gucbee rexpejn Jesucrist si'c, huinäreni Saulo guedx Cesarea, ro'c gulääreni Saulo, baxhalrenini guedx Tarso.

³¹ Dxejc guredxi lajz guiraa renani huililajz xtidx Dios nen reguedx Judea, nen reguedx Galilee, näjza nen reguedx Samaria, sa'csi diru Saulo nusacsí rexpejn Jesucrist, luxh guc xhidajlrurenini. Basoobreni xtidx Jesucrist, bisieedrurenini rextiidxni, gucnäjza Sprit Dxaan xten Diosreni.

Biajc Eneas

³² Che gusloj sahuui Pedr guiraa renani huililajz xtidx Dios, huihuiizani rexpejn Jesucrist nani yu' guedx Lida. ³³ Ro'c bidxälni te niguii ni laa Eneas.

Agujc xhujn ijz naga' niguiiga cayacxhuuni. Abixu'n tiejxhni, digacdiru guiliini.

³⁴ Dxejcti räjp Pedr lo Eneas:

—Eneas, cagusiajc Jesucrist guejblu. Huistie, guläs xta'lu.

Lagajc dxejc biajcn, huistietini.

³⁵ Guiraa rebejn ni rbäjz guedx Lida, näjza reben ni rbäjz guedx Sarón, bahuiireni abiajc niguii ni cayacxhuu. Dxejc xhidajlreni nen reguejdxga huililajz xtidx Dios.

Gubañsac Dorcas

³⁶ Nen guedx Jope yu' te gunaa ni laa Tabita; rniizarenini Dorcas con xtidx griegw. Gunaaga huililajz xtidx Dios, rudeedzani xhi rquiin rebenproob, najczani huenduxh loj chutis bejn. ³⁷ Gucxhuu gunaaga, dxejc gujtni. Che gulujx bahuajz rebejn togoolga, huitixhrenini nen te yu' ni najc jiaa yejc sa'ni. ³⁸ Sa'csi gajxh guedx Jope tre' guedx Lida, luxh biejn diajg rexpejn Jesucrist ro'c yu' Pedr, baxhalreni tiop dade' saxii Pedr. Räjp redade'ga loj Pedr:

—Bejn huen salu chonnu Jope nanajga.

³⁹ Dxejc sanägajc Pedr redade'ga. Che bidzujnreni, huinäreni Pedr nen yu' cadro naga' togunaaga. Ro'c cayonduxh guiraa regunabiuud, baluiireni lo Pedr guiraa rexhajbreni nani benchee Dorcas, ni badeed Dorcas lojreni che nabajnni. ⁴⁰ Dxejcti gunibee Pedr birii guirarenini nen yu'. Dxejc bazuxhijbni, guredx-gunabni loj Dios. Dxejc gubiréni bahuiini loj togoolga, räjpni:

—Tabita, huistie.

Dxejcti baxhal gunaaga balojni; che bahuiini loj Pedr, gurejni. ⁴¹ Dxejc gunaaz Pedr ñaani, basuliinini, dxejcti gurejdx Pedr regunabiuud näjza sgaii reni najc rexpejn Jesucrist. Baluiini gunaaga lojreni te bahuilojreni agubañsacni. ⁴² Gucbegajc reben guedx Jope xhini'c gujc, dxejcti xhidajl rebejnnga huililajz xtidx Jesucrist. ⁴³ Xchejza guyu' Pedr ro'c, guläjzni rolijz dade' ni laa Simón, nani ruscoodz guijd.

10

Pedr con Cornel

¹ Guedx Cesarea guyu' te niguii ni laa Cornel. Rnibeeni te gayuu resoldaad lo te cuaa ni laa Italiano. Cornel najc benzajt, dini gac ben Israel. ² Bensacduxh najc Cornel, näjza guiraa resa'ni, sacruduxh rusoobreni xtidx Dios. Rudeedni gojn lo reben proob xten Israel. Guixe-guixee rbejdx, rniabni lo Dios. ³ Te dxej, si'cti rcachon gudxej, si'c lo bacal bahuiini loj xangl Dios, räjpni loj Cornel:

—¿Conlu Cornel?

⁴ Che bahuii Cornel xangl Dios, bidxejbni, bidxelojni, räjpni lojni:

—¿Xhini'c, Dad?

Dxejcti räjp angl xten Dios lojni:

—Che rniilu lo Dios, riejn diajg Dios xtiidxlu, che rudeedlu meel lo reben proob, ruhuii Dios ni rujnlu, ni'cni rnalajz Dios luj. ⁵ Naj baxhal tiop niguii chää guedx Jope te chaxiireni Simón Pedr. ⁶ Rbäjzni rolijz te dade' ni laa Simón nani ruscoodz guijd. Rolijz Simón sojb gajxh ro' nisdoo. Simón Pedr gusule' xhini'c nanab gunlu.

⁷ Che sii angl xten Dios, gule Cornel tiop mos xtenni näjza te xsoldaadni nani sanälajz Dios. ⁸ Dxejc bij Cornel diidx lojreni xcuent ni gusajcni, dxejc baxhalni redade'ga guedx Jope.

⁹ Che bara yääl, sääreni lo nezyuj. Asiäddzungajxhrenei guedx Jope, pet si'cti läidxejni. Lagajc orga huä'p Pedr yecyu' te guininäjni Guejb Dios. ¹⁰ Calanduxh Pedr, rlajzni gauni. Laļ ni cayujnreni xhi gauxhuejni, gusloj canixcalni. ¹¹ Bahuiini bixal xhaguibaa, bahuiizani biäjt te bariadro nani naliib guidap xi'ni. Siädjiätchäiini gajxh nez loj Pedr. ¹² Neñ bariaadga yu' guiraa reman ni yu' lo guedxliuj nani rsianäj guidap ni'ni, näjza renani rxeeb si'c bäl, näjza renani rutajt. ¹³ Gunii Dios lo Pedr, räjpni lojni:

—Pedr, huisu te ju'tlu man gaulu.

¹⁴ Dxejc räjp Pedr lojni:

—Na'c Dad. Nunc gauä sa' remandxuudxga, abia'a dina gauä reman nani rnii xleiilu najc mandxuudx.

¹⁵ Gunisac Dios loj Pedr, räjpni:

—Na'cru guiniilu nacdXuudx reman nani abasia.

¹⁶ Che gujc choñ huält gujc si'c, huä'psac bariaadga xhaguibaa. ¹⁷ Laļ ni cayujn Pedr xhigab xhichani'c säloj nani bahuiini, bidzujñ reniguii ni baxhal Cornel ro' yu'ga, sa'csi agunabdiidxreni caro rbäjz Simón nani ruscoodz guijd.

¹⁸ Che bidzujñreni rolä'ga canabdiidxreni la ro'c rbäjz te dade' ni laa Simón Pedr. ¹⁹ Laļ ni cayujn Pedr xhigab xcuent ni bahuiini, gunii Sprit Dxan xten Dios lojni, räjpni:

—Bahuii, choñ dade' caguiillu. ²⁰ Biäjt yejc yu're te jinälureni. Na'c gunlu xhi stee xhigab, sa'csi lagajc narä baxhaläreni lojlu.

²¹ Dxejcti biäjt Pedr jiaaga, bidzujñni cadro suga' redade'ga, räjpni lojreni:

—Narä nacä ni caguiiltu. ¿Xhi siäädту?

²² Räjp reniguiiga lo Pedr:

—Cornel, nani rnibee te gayuu soldaad, te bensa'c, te bejn ni rajñ Dios, te bejn ni sanälajz rexpejn Israel, laani baxhal nuure lojlu, sa'csi räjp angl xten Dios lojni, jiopxiinu luj te jiejn diajgnu xtiidxlu.

²³ Dxejcti gurejdx Pedr rebejn ga, biu'reni neñ yu'. Ro'c bia'nreni te guxhijñ. Che bara yääl, Pedr näjza sgaii ben Jope ni najc xpejn Jesucrist, sanä redade' ni baxhal Cornel.

²⁴ Che bara yääl, bidzujñreni guedx Cesarea. Abatojp Cornel resa'ni näjza rexamigwni rolijzni. Cabäjzreni guidzujñ Pedr. ²⁵ Che bidzujñ Pedr ro yu', huichagloj Cornelni, bazuxhijbni lo Pedr. ²⁶ Dxejc gunaaz Pedr ñaani, guläsnini, räjpni lojni:

—Huisulii, sa'csi narä nacä te niguiitis sigajc najclu.

²⁷ Cayuiireni diidx, biu'reni neñ yu'. Che biu'ni bahuii Pedr nadxagsa' rebejn neñ yu'. ²⁸ Räjp Pedr lojreni:

—Anajntu xhi caj lo leii xten rexpejn Israel: digacdi guchaag te xpejn Israel loj benzijt nani digac xpejn Israel, digacdiza jiu'ni rolijzreni. Niluxh agunii Dios loä lo te bacal, te gacbeä digacdiru jiuä releiire. Abaluu Dios narä sajc guchagsa'ä chutis bejn. ²⁹ Ni'cni, che gurejdxtu narä biälgacä. Naj rniabdidxä, ¿xhicuent gurejdxtu narä?

³⁰ Dxejcti räjp Cornel loj Pedr:

—Gudajp dxej si'cti rcachon gudxej, cabedx-canabä lo Dios rolizä chela baluiloj te niguii najcw te ladmol ni rdimbicha'. ³¹ Najni loä: “Cornel, che rbedx-rniablu lo Dios, riejn diajg Dios xtiidxlu, che rudeedlu meel lo reben prob, racbee Dios, di lajzni jiäl luj. ³² Ni'cni naj baxhal tiop dade' chäa guedx Jope te chaxiireni Simón Pedr nani rbäzlaa rolijz Simón ni ruscoodz guijd. Rolijzni sojb gajxh ro' nisdoo. Che guidzujñni, laani gusule'ni xtidx Dios lojtu.” ³³ Dxejc baxhalä chu biädxilu. Xquixtiostelu biäädлу. Naj

anadxagsa'nu ree nez loj Dios te jiejn diajgnu rextidx Dios ni baniidxni lojlu guiniilu loonu.

Basule' Pedr xtidx Dios rolijz Cornel

³⁴ Dxejcti räjp Pedr lojreni:

—Naj gucbeliä tebloj rinälajz Dios guiraa bejn; rebenzijt sigajc rexpejn Israel. ³⁵ Niluxh rinälajz Dios chutis beñ guedxliuj nani ruzuxhijb lojni, nani rusob rextiidxni, nani laaca nabajn. ³⁶ Badeed Dios xtiidxni loj rexpejn Israel, basule' Dios biääd Jesucrist te gac chanälaaznu Dios te cuedxilajznu, sa'csi Jesucrist rnibee guideb guedxliuj. ³⁷ Che gulujx baluii Juan ni rutiobnis xcuent yälrobnis, dxejc gusloj basule' Jesucrist xtidx Dios nez reguedx Galilee. La'tu najntu xho bire'ch xtidx Jesucrist guideb nez nen reguedx Judea. ³⁸ Nancheetu xho badeed Dios yälrnibee loj Jesucrist, beñ Nazare't. Badeedza Dios Sprit Dxiän xtenni te cuääzni nen lastooni. Nancheetu xho bejn redzunro, remilagwr, basiajcni rebejn nani caguteed bendxab trabajwduxh. Redzunroga bejn sa'csi bennäj Diosni dzuun. ³⁹ Bahuiloonu guiraa redzuun ni bejn Jesucrist nen reguedx Israel näjza guedx Jerusalén. Bacuaa rexpejn Israel Jesucrist lo cruzj, ro'c gujtni. ⁴⁰ Dxejcti che biojn dxej, guläs Dios Jesucrist lo rebenjut, gubansacni, badeed Dios yälrnibee lojni te gujc biädluiloj Jesucrist loonu. ⁴¹ Di Jesucrist nululoj loj chutis bejn. Lojtis renani agule Dios gutie'ch diidx gubansac Jesucrist lo rebenjut, loj reni'c baluilojni. Nuure nadxagnu loj reni gule Dios. Bidaunänuni, bidunnäänuni che gubansacni lo rebenjut. ⁴² Baxhalni nuure chatie'chnu diidx loj guiraa rebejn, chosule'pacnu Dios gule Jesucrist te gacni juejz xte rebenbajn näjza xte rebenjut. ⁴³ Galooli bacuaa renani gunii xtidx Dios lo guiitz, räjpreni: “Guiraa rebejn ni chalilajz xtidx Jesucrist sudzucaj Dios xtojreni.”

Biädlajz Sprit Dxiän xten Dios nen lastoo rebenzijt

⁴⁴ Lañ ni canii Pedr rediidxga, biädläjz Sprit Dxiän xten Dios nen lastoo renani huililajz xtiidxni. ⁴⁵ Bidxeloj guiraa rexpejn Israel nani huinä Pedr sa'csi biädläjz Sprit Dxiän xten Dios nen lastoo renani najc benzijt. ⁴⁶ Gucebereni biu' Sprit Dxiän xten Dios lastoo rebenzijt sa'csi bejn Sprit Dxiän guniireni stee didxsaj nani gajdreni guisieed, calä'pzareni xpala'n Dios. ⁴⁷ Dxejcti räjp Pedr lo rexamiigwni:

—Chu laa ni gudxojn yälrobnis lo rebejnre, ni sigajc biädläjz Sprit Dxiän xten Dios nen lastoonu, abiädläjzni nen lastoo rebejnre.

⁴⁸ Dxejcti gunibee Pedr gurobnisreni te gacbee bejn najcreni xpejn Jesucrist. Dxejcti gunabreni loj Pedr jia'nni ro'c tiop-chon dxej.

11

Basule' Pedr xho biädlajz Sprit Dxiän xten Dios lastoo rebenzijt lo rexpejn Jesucrist nen guedx Jerusalén

¹ Reapost, näjza renani huililajz xtidx Jesucrist nen reguedx Judea, biejn diajgreni huililajz rebenzijt ni digac xpejn Israel xtidx Dios. ² Che bidzujn Pedr guedx Jerusalén, rexpejn Israel nani rlanj chu guiraa rexpejn Jesucrist bee si'cni bejn toAbram, gudilnäjreni Pedr. ³ Räjpreni lo Pedr:

—¿Xhicuent biu'lu rolijz benzijt nani xhet yu'di bee si'c nuure? ¿Xhicuent gudaunäjlorene, ä?

⁴ Dxejcti basule' Pedr diidx xho gujc huijni loj rebenzijt:

⁵ —Yu'ä guedx Jope. Cabedx-canabä lo Dios, dxejc si'c gunixcalä, bahuiä bixal xhaguibaa, siädjiäjt te bariadro, naliib guidap xi'ni. Siädjiätchäini nez loä. ⁶ Che bahuisa'cä, neŋga yu' guiraloj reman ni yu' lo guedxliuj nani rsianäj

guidap ni'ni, renani rbäjz nen dajn, renani rxeeb si'c bäl, näjza renani rutajt. ⁷ Dxejcti biejn diagä naj Dios loä: “Pedr, huisu. Bagu't man gauu.” ⁸ Dxejcti räpä: “Digacdini Dad. Nicla tej gadna gauä te man nani rnii lei xtenlu najc mandxuudx.” ⁹ Dxejc gunisac Dios loä: “Na'cru guiniilu nacdXuudx recos nani abasia Dios.” ¹⁰ Che gujc choñ huält gunii Dios si'c, huä'psac bariaadga xhaguibaa. ¹¹ Lagajc orga bidzujñ choñ dade' ro yu' cadre yu'ä. Guedx Cesarea biriireni, biädxireni narä. ¹² Dxejc gunii Sprit Dxiän xten Dios loä: “Huinä reniguiire. Na'c gun tiop lajzlu.” Dxejcti huinä xho'p beñ Jope, dade' nani rililajz xtidx Jesucrist. Che bidzujñ guedx Cesarea, biu'nu rolizj Cornel. ¹³ Basule' Cornel diidx loonu xho baluiloj te angl xten Dios lojni lagajc rolizjni. Räjp angl xten Dios lojni: “Baxhal tiop dade' chää guedx Jope te chaxiireni Simón ni rniireni Pedr. ¹⁴ Laani siniini xtidx Jesucrist te gacbeelu con resa'lu xhini'c nanab gunlu te guslaa Dios la'tu lo rextojltu.” ¹⁵ Che gusloj cagusule'ä xtidx Dios lojreni, biu' Sprit Dxiän xten Dios nen lastooreni si'c biu'ni lastoonu galooli. ¹⁶ Dxejcti banaj lazä rextidx Dad Jesucrist che najni: “Juan abatiobnis con nistis, biädla narä suxhalä Sprit Dxiän xten Dios te cuääzni nen lastootu.”

¹⁷ Dxejc räjpza Pedr:

—Palga badeed Dios Sprit Dxiän xtenni lojreni si'c baniidxni Sprit Dxiän xtenni loonu che huililajznu xtidx Jesucrist, ¿chu narä? te niäpä lo Dios: “Na'c gudeedlu Sprit Dxiän xtenlu lojreni.”

¹⁸ Che biejn diajg reben Jerusalén rediidxga, biäuu ro'reni, dirureni nidilñäj Pedr. Alga gulä'preni xpala'n Dios, räjpreni:

—Näjza rebenzajt nani digac rexpejn Israel abasaan Dios gusiechlajzreni te guibanñajreni Dios par tejpas.

Rexpejn Jesucrist ni yu' guedx Antioquía

¹⁹ Che gujt Esteban bire'ch renani huililajz rextidx Jesucrist. Bire'chreni lo yuj Chipre ni re' lo nisdoo, lo reguedx Fenicia, näjza lo guedx Antioquía sa'csi cadejdreni trabajwduxh. Basule'reni rextidx Jesucrist lojtis rexpejn Israel. ²⁰ Lojreni nadxaag gaii beñ Chipre, näjza gaii beñ Cirene. Redee bidzujñ guedx Antioquía. Ro'c gusloj caniireni lo beñzajt nani rnii didx griegw. Basule'reni lo rebenzajtga guiraa xcuent Jesucrist. ²¹ Guinä Diosreni caniireni xtiidxni. Xhidajl rebejnğa huililajz xtidx Jesucrist, basobreni xtiidxni.

²² Che biejn diajg rexpejn Jesucrist ni yu' guedx Jerusalén rililajzreni, baxhalreni Bernabé guedx Antioquía. ²³ Che bidzujñ Bernabé guedx Antioquía, bibalazduxhni che bahuiini xho cayunnäj Dios rebejnğa. Dxejcti balijdx Bernabéreni: gutijp lajzreni gusoobreni xtiidxtis Jesucrist. ²⁴ Beñsa'c najc Bernabé. Rililazduxhni xtidx Jesucrist. Racnäjduxh Sprit Dxiän xten Diosni. Xhidajl rebejn huililajz xtidx Jesucrist guejdxga.

²⁵ Che birii Bernabé guejdxga, huijni guedx Tarso satiilni Saulo. ²⁶ Che bidxälni Saulo, huinäni guedx Antioquía. Ro'c bia'nreni tebijz, bachagsa'reni renani huililajz te baluiireni xtidx Jesucrist lo xhidalduxh bejn. Ganid beñguejdxga gulälaj “Cristianos” renani rililajz xtidx Jesucrist.

²⁷ Nen redxejga birii gaii dade' nani rnii xtidx Dios. Guedx Jerusalén biriireni, bidzujñreni guedx Antioquía. ²⁸ Huisulii te dade'ga ni laa Agabo. Guinä Sprit Dxiän xten Diosni te guniini siäd te gubijn guideb guedxliuj. Luxh gujc gubijnğa nen reizj ni gunibee reii Claudio ni sajru. ²⁹ Dxejcti rexpejn Jesucrist ni rbäjz guedx Antioquía bejn xhigab cade tejreni gudeed meel chää lo rexpejn Jesucrist ni rbäjz nen reguedx Judea. ³⁰ Batojpreni

meel, baxhalrenini lo rebengool ni rnibee rexpejn Jesucrist ro'c. Saulo näjza Bernabé huinä meelga che huijreni Judea.

12

Gujt Jacob, biäu Pedr neñ latzguiib

¹ Neñ redxejga, trabajwduxh bateed reii Herodes gaili rexpejn Jesucrist. ² Gunibeeni gujt Jacob betz Juan, biru' guejn. ³ Che bahuii Herodes bibalazduxh rexpejn Israel sa'csi bagu'tni Jacob, gunibeeni gunazgajcreni Pedr. Dee gujc neñ redxe lanij che rajwreni yätxtiil ni di saguij. ⁴ Che gunaazreni Pedr, biäuni neñ latzguiib. Gunibee Herodes biääd tajp cuaa soldaad cuanäjreni ro' latzguiib. Tapgaj soldaad cuanäj ro' latzguiibga cade xho'p or. Bejn Herodes xhigab cuääni Pedr te guetni nez loj rexpejn Israel che ted lanij. ⁵ Yu'ti Pedr neñ latzguiib, dxejcti durtis cabejdx, canab rexpejn Jesucrist lo Dios xcuent Pedr.

Gulää Dios Pedr neñ latzguiib

⁶ Bidzujnti dxe bispr dxej ni rlajz Herodes nibää Pedr nez loj rexpejn Israel. Yäälga nagayejs Pedr galäii tiop soldaad. Caden naliib guiro'p naa Pedr. Stiop soldaad canäj ro' latzguiib. ⁷ Chela baluiloj te angl xten Dios, bianij te bajl nani basanij neñ latzguiib. Dxejcti gunaazni xhajcw Pedr, basniibnini te gubajjni. Räjpn lo Pedr:

—Basquejnga, huistie.

Dxejcti bixec recaden, bitejbreni naa Pedr. ⁸ Räjpn xangl Dios lo Pedr:

—Gojt xhajblu, baläj xcura'chlu.

Si'c bejn Pedr, dxejc räjpn xangl Dios lo Pedr:

—Gojt xhablajzlu, gudanajl narä —räjpn.

⁹ Biriitini latzguiib sanajlni angl xten Dios. Niluxh dini gun xhigab guliipac nani bejn xangl Dios. Bejn xhigab pet canixcalni. ¹⁰ Gudejdreni nez loj te soldaad, gudedgajcreni nezloj steeni, dxejc bidzujnreni ro' puertguiib xten latzguiib nani caj lo nezyuj ni rdejd galäii guejdxga. Xtebca bixal puertroga, biriireni gusajreni tebezyuj. Dxejcti te squiin gunitloj xangl Dios. Xtebtis Pedr sasaj lo nezyuj. ¹¹ Dxejc si'cni gubajln Pedr, bejn xhigab:

—Naj sii nanä baxhal Dios te xanglni baslaa narä ladznäa Herodes te digacdi gun rexpejn Israel nani rlajzreni gunnäjreni narä.

¹² Che gucbee Pedr xhi gusajcni, huijni rolijz Marii, xnan Juan ni rniireni Marcw. Ro'c nadxagsa' xhidajl rexpejn Jesucrist, cabedx-canabreni lo Dios xcuent Pedr. ¹³ Cagusejz Pedr rolä', dxejc gubig te dxa'p ni laa Rode, bacuadijgni ro lä'. ¹⁴ Che biembee Rode xse' Pedr, sa'csi bibalazduxhni, biallajzni nuxhalni ro lä'. Alga baxunni biusacni neñ yu', räjpn lojreni:

—Pedr suga' ro lä'.

¹⁵ Dxejcti räjpreni lo Rode:

—Yeiclucayajc.

Dxejcti duurtis gunii dxape'ga suga' Pedr ro lä'. Dxejcti räjpreni loj Rode:

—Xho gacni Pedr. Pet biejn diajglu gunii xangl Dios ni rcanäj Pedr.

¹⁶ Dxejcti laltis cagusejz Pedr ro lä'. Che baxhalreni ro lä' bidxeloduxhreni bahuiireni lo Pedr. ¹⁷ Dxejcti bazääb Pedr naani te na'cru jieyreni. Dxejc bij Pedr diidx xho baxhal Dios ro' latzguiib. Dxejc räjpn:

—Colchaye'tz lo Jacob näjza lo rexpejn Jesucrist guiraa ni gusacä nayääl.

Dxejcti birii Pedr ro'c, huijni ste'ca lajt.

¹⁸ Che bara yääl, rsildooru, bieiduxh resoldaad sa'csi direni gan xho gujc birii Pedr neñ latzguiib. ¹⁹ Gunibee Herodes huitiilreni Pedr, gunabdiidxzani lo resoldaad xho gujc birii Pedr, dxejc gunibeeni gujt resoldaad ni cuanäj

latzguuib che birii Pedr. Dxejcti birii Herodes reguedx Judea, xchej huijia'nni guedx Cesarea.

Gujt Herodes

²⁰ Bachechduxh rebeñ Tiro nájza rebeñ Sidón Herodes, ni'cni diruni gusaan guto' rebeñ nez cadro rnibeeni xhi gau rebeñ Tiro nájza rebeñ Sidón. Ni'c biääd xhidajlreni te guiniabreni jiajl lajzni, te na'cru guidxe'ch Herodes lojreni. Abenxgaareni xamiigwreni Blasto, mos ni yu' lo reii Herodes, mos ni sajcrú lo guiraa rexmos Herodes. Guninäj Blasto Herodes xcuentreni te na'cru guidxehnäj Herodes rebeñga. ²¹ Basoobtini te dxej te guininäjnirení. Dxejga gojt Herodes xhajib reini, gurejni lo xyacxhil reini. Dxejcti gusloj caniini didxsa'c loj rebeñga. ²² Guredxa' rebeñ räjpreni lojni:

—Huenduxh najc diidxre. Guejblu najc te dios, xhet xtiidxdi niguii najc diidxre.

²³ Lagajc dxejc biääd te angl xten Dios, bejnii gusloj cayacxhuu Herodes, gudajw rebisiujg Herodes, gujtni sa'csi basaanni gunii rebeñ najcni te dios, sa'csi dini niliä'p xpala'n Dios.

²⁴ Xhidajl beñ bieñ diajgni xtidx Dios, huililajzreni xtidx Dios.

²⁵ Che gulujx badeed Bernabé nájza Saulo meel ni batojp rebeñ Antioquía lo rebeñgool, biriireni guedx Jerusalén. Sanäreni Juan ni rniireni Marcw lo guedx Antioquía.

13

Gule Sprit Dxañ xten Dios Bernabé nájza Saulo

¹ Lo rexpeñ Jesucrist ni rdxaañ sa' guedx Antioquía guyu' gaii niguii ni gunii xtidx Dios, nájza gaii niguii ni rusule' xtidx Dios loj guiraa rexpeñ Jesucrist. Loj redee nadxañ Bernabé, náj Simón ni rniireni Negr; náj Lucio, beñ Cirene; náj Manaén ni gulanäj reii Herodes gujcní si'c bejtzni; nájza Saulo.

² Bidzujñ te dxej cagucua'nreni lañ ni cabedx-canabreni lo Dios, dxejc räjp Sprit Dxañ xten Dios lojreni:

—Colcue Bernabé nájza Saulo te gunreni dzuun ni rlazä gunreni.

³ Che gulujx bacua'nreni, che gulujxza guredx-gunabreni lo Dios, batzúbreni ñaareni yejc guiro'preni, te si'c baxhalreni Bernabé nájza Saulo te guluiireni xtidx Dios ste'ca lajt.

Guiró'preni baluii xtidx Dios lo rebeñ Chipre

⁴ Baxhal Sprit Dxañ xten Dios Saulo nájza Bernabé guedx Seleucia. Ro'c biu'reni neñ barcw, sääreni nez yuj ni tre' galäii nisdoo, ni laa Chipre. ⁵ Che bidzujñreni Chipre, biu'reni guedx Salamina. Ro'c basule'reni xtidx Dios neñ guiraa rexquidoo rexpeñ Israel. Náj Marcw gucnäjreni. ⁶ Che cuansajreni guideb yuj Chipre, bidzujñreni guedx Pafos. Ro'c bidxañreni te niguii ni laa Barjesús. Najcni te bidxaa, najczani te xpeñ Israel. Cagusgueeni rebeñ guejdxga, räjpni xtidx Dios caniini, niluxh dini gac xtidx Dios. ⁷ Bidxaare nu'ch lo rexpeñ Sergio Paulo, nani najc gubernadoor xten Chipre. Nasinduxh Sergio Paulo. Gurejdxni Bernabé nájza Saulo, sa'csi rlanjni jieñ diajgni xtidx Dios. ⁸ Dxejcti Barjesús, ni laaza Elimas, bidxagdijñni guiro'preni sa'csi di rlanjni chalilajz Sergio Paulo xtidx Dios. ⁹ Saulo, nani laaza Pabl, bahuitzu'tz loj Barjesús. Batijp Sprit Dxañ xten Dios lastoo Pabl, räjpni loj Barjesús:

¹⁰ —Rusgueduxhlu rebeñ, najclu beñlatsiaj, beñguidxduxhlu, najclu xi'n Satanás, beñdxab ni rnibee. Rdxehnäjzalu guiraa recossa'c xten Dios. ¿Guc cuäáz guxhiidlu xtidxlii Jesucrist te di chalilajz beñ xtidx Jesucrist? ¹¹ Naj siääd xcastiigw Dios yejclu. Xhidajl dxej sicäy lojlu, xhetliidi filu —räjp Pabl.

Gujcsi räjpni si'c, bicäigajc lojni. Dxejctiru cuansajni caguiilni chu guiniaaz naani guluiini canejz chääni. ¹² Che bahuui Sergio Paulo xhi gusajcni, huililajzni xtidx Dios, sa'csi bidxeloduxhni xcuent xcäl_ruluii Dios.

Bidzujñ Pabl näjza Bernabé guedx Antioquía xten distrit Pisidia

¹³ Che baluux Pabl näjza resa'ni xtzuunreni guedx Pafos, biu'reni neñ barcw, gudejdreni lo nisdoo, sääreni guedx Perge neñ estad Panfilia. Che bidzujñreni guejdxga, gubisac Juan, ni rniireni Marcw, Jerusalén. ¹⁴ Dxejcti birinäj Pabl resa'ni guedx Perge, sääreni guedx Antioquía neñ distrit Pisidia. Dxejc te dxe sabd, dxej ni rusilajz rexpejñ Israel, biu'reni neñ xquidoo rexpejñ Israel, ro'c gurejreni. ¹⁵ Che gulujx bil te dade' reguijtz xten Dios ni laa leii näjza reprofe't, baxhañ reguxhtis xten guidoo chu huigajñreni, räjpreni lo Pabl näjza Bernabé:

—La'tu sa'nu, palga rajptu te diidx ni gulijdx rebejñre, colguiniini.

¹⁶ Dxejc huisulii Pabl, guläsni naani bejnñi seen lo rebejñ te cuadiajgreni xtiidxni. Räjp Pabl lojreni:

—Colcuadiajg, la'tu rexpejñ Israel, guiraatu ni rajñ Dios. ¹⁷ Galooli gule Xtios rexpejñ Israel retoxtadgoldoonu. Luxh che guläjzreni nación Egipto, bidalduxh retoxtadgoldoonu. Gucnäjdexh Diosreni bejnñi remilagwr, te guläänireni guedx Egipto. ¹⁸ Tiuu ijz guläjzreni lo reyubijdz. Xhidajñ huält direni nusoob xtidx Dios, niluxh empac gucnäjza Diosreni. ¹⁹ Guyu' gajtz nación guläjz neñ reyuj ni laa Canaán. Dios bejn gunitloj reguejdxre, te gudisni reyujga loj retoxtadgoldoonu. ²⁰ Dxejcti badeed Dios reniguii ni gujc juejz, gunibeereni rebejñ. Tajp gayugarol ijz gunibeereni rexpejñ Israel. Samuel nani gunii xtidx Dios gujc lult juejz. ²¹ Dxejcti gunab rexpejñ Israel te reii lo Dios te guinibee reiiga lojreni. Badeedti Dios Saúl xi'n Cis, sa' toBenjamín. Gunibeeni tiuu ijz. ²² Che badzucaj Dios Saúl, badeedni gunibee toreii David. Räjp Dios: “Agucbeä David xi'n Isaí rujñ tejsi xhigab con narä. Susoobni xtidxä sujñni guiralii ni rlazä gac.”

²³ Räjpza Pabl:

—Galooli bia'n diidx lo rexagdoo David guxhañ Dios te bejñ ni gudzucaj xtojñnu, ni guslaa nuure lo dojl. Naj aguzojb diidxga. Jesucrist najc bejñga, rudzucajni xtojñnu, ruslaani nuure lo dojl. ²⁴ Che gusloj cagulijdx Juan rebejñ, baluiini nanabpac gusiechlajz rexpejñ Israel, tiobnisreni te jia xtojñreni. ²⁵ Niluxh guxii riäädx guluux Juan dzuun ni badeed Dios gunni che räjpni lo rebejñ: “¿Chu rujntu xhigab nacä narä? Dina gacä Crist nani bia'n diidx guxhañ Dios. Colhuii, detzä siääd tej ni sacduxhru loä; nicla gac surloä te cuää xcura'chni.”

²⁶ Räjpza Pabl:

—Rniä lojtu sa'ä, rexagdoo toAbram, näjza lo chutis ni rajñ Dios, loonu baxhañ Dios xtiidxni ni rusule' xho rudzucaj Jesucrist xtojñnu, xho ruslaani nuunu lo dojl. ²⁷ Rebejñ Jerusalén, näjza renani rnibeereni, direni niembee Jesucrist nani rnibee, dizareni niacbee diidx xcuent Dios nani bacuaa reniguii ni gunii xtidx Dios agujc xchero, luxh rolreni xtidx Diosga gasob sabd. Niluxh che bagu'treni Jesucrist, guzobj xtidx Dios ni caj lo guijtzga. ²⁸ Balijdxreni Pila't ju'tni Jesucrist, luxh xhet bejndini te guetni. ²⁹ Che bagujc guiraa ni caj lo guijtz xcuent Jesucrist, gulätreni Jesucrist lo cruzj, bacua'tzrenini neñ baa cuä' te guilaj. ³⁰ Dxejcti guläs Dios Jesucrist lo rebengut. ³¹ Balti huält baluiloj Jesucrist lo reexamigwni nani biädñajñi nez rexyuj Galilee, renani biädñajñani nez guedx Jerusalén. Bahuilojreni gubañsac Jesucrist lo rebengut, te naj rusule'reni diidx xcuent Jesucrist.

³² 'Naj siopnānu xtidx Diosre lojtu te guibalajztu. Agujc xchero bia'n Dios diidxre con retoxtadgoldoonu. ³³ Gulās Dios Jesucrist te huile' diidxga par nuure, rexagdooreni. Agujc xchero gunii Dios te diidx ni caj neñ Salmo ni bacuaa toDavid. Lo Salmo ni rojp räjp Dios: “Luj najclu xi'nä. Nadxej guleälu te guinibeelu.”

³⁴ Räjpza Pabl:

—Dxejcru stee lajt caj xcuent ni gulās Diosni lo rebeņgut te nuncru guetni. Scree bacuaa te niguii, räjp Dios: “Sunidxä recossa'c lojlu si'c ni bia'nä diidx con toDavid.” ³⁵ Ni'cni bacuaaza toDavid neñ stee Salmo ni gunii Dios, guniini: “Dipaclu gusaan gudx tiejxh Xi'nlu nani sanälajzlu.” ³⁶ Che gulujx gunibee toDavid lo retoxtadgoldoonu, si'cni badeed Dios gunni, dxejc gujtni. Biga'tznäjni retoxtadgoldooni. Niluxh guyujdx tiejxh toDavid. ³⁷ Niluxh gulās Dios Jesucrist lo rebeņgut, ni'c di tiejxhni niujdx. ³⁸ Ni'cni colyabee, la'tu resa'ä, Jesucristre, bejñ ni caniä xcuentni, laani rudzucajni rextojlñu. ³⁹ Chutis ni rililajz xtidx Jesucrist ruslaa Jesucristni loj guiraa rextojlñi nani digacdi guibicaj mascä rusoobni guiralii ni caj lo leii xten toMoisés. ⁴⁰ Col̄susin̄ te na'c sajctu recos ni caj lo guijt̄z ni bacuaa te niguii nani bacuaa xtidx Dios:

⁴¹ Col̄huilaa, la'tu ni ruxhiznäj xtidxä col̄guidxeloj, col̄nitloj, sa'csi naj ni nabajntu sunä te dzunro, te milagwr nez lojtu, niluxh dipac lajztu chalii, mascä jiääd chu gusule'pacni lojtu.

⁴² Gulujxti xtidx Pabl, biunejz rebejñ. Che birinäj Pabl Bernabé biädñi rebejñre lojreni, räjpreni:

—Jiädsactu ste xmaan te gusule'rutu rediidxre loonu.

⁴³ Che care'ch rebejñga, xhidajl rexpejñ Israel, näjza xhidajl rebenzijt nani rusoob xtidx Dios si'c rujn rexpejñ Israel, birinajlreni Pabl näjza Bernabé. Dxejc balijdxreni rebejñ ni siädñajlreni, räjpreni lojreni chanuutis chalilajzreni didxlii xcuent Jesucrist.

⁴⁴ Che gojlti stee sabd, dxej ni rusilajz rexpejñ Israel, xhidalduxh rebeņguejdx bire' te gucuadiajgreni guinii Pabl xtidx Dios. ⁴⁵ Che bahuii rexpejñ Israel guiraa rebejñ ni bire', bidxechlajzreni, gucnadareni. Dxejc gusloj cadxagdijl rexpejñ Israel Pabl. Che rniini te diidx, laareni rniireni “didxxhiini”. Caniyajzareni Pabl näjza Bernabé, caguereni lojreni. ⁴⁶ Luxh di Pabl niclaza Bernabé nidxejb. Gusutijptisreni, räjpreni lo rebejñ:

—Nungäj̄l ganid lojtu guiniinu xtidx Dios, sa'csi la'tu najctu rexpejñ Israel. Niluxh ditu chalilajz xtidx Dios, lagajc la'tu caniitu digacdi guibanñajtu Dios par tejpas. Ni'c sibiré loonu, te guiniinu xtidx Dios lo rebenzijt ni digac xpejñ Israel. ⁴⁷ Sa'csi si'c agunibee Xtiosnu. Scree caj xtidx Dios lo guijt̄z:

Suxhaätu te guluiilu rextidxä lo rebenzijt ni digac xpejñ Israel, te chalilajz rebejñga xtidxä, te laareni lo xtoj̄lreni, cadrotis yu'reni lo guedxliuj, räjp Dios.

⁴⁸ Che biejn diajg rebenzijt rediidxre, bibalazduxhreni, gulä'preni xpala'n xtidx Dios. Renani gule Dios galooli huililajz xtidx Dios. Xhidajl najcreni. ⁴⁹ Bire'ch xtidx Dios guideb nez reguejdxga. ⁵⁰ Dxejc rexpejñ Israel balijdx regunaa ni sajcu, näjza reniguii ni sajcu neñ guedx Antioquía, te bidxechnäjreni Pabl näjza Bernabé, barilaagwreni Pabl näjza Bernabé te biunejzreni guedx Antioquía. ⁵¹ Dxejcti Pabl näjza Bernabé gubijb guxhuj ni'reni si'c te seen te gacbee rebejñ xhet laadi bejnreni. Sä'tireni guedx Iconio.

⁵² Baspaa Dios lajz rexpejn Jesucrist guedx Antioquía xten Pisidia. Bazutijpza Sprit Dxaan xten Dios lastooreni.

14

Guyu' Pabl náj Bernabé guedx Iconio

¹ Che bidzujn Pabl nájza Bernabé guedx Iconio, biu'reni xquidoo rexpejn Israel. Basule'reni xtidx Dios lo rexpejn Israel nájza lo rebenzajt. Xhidajl rebejnnga huililajz xtidx Dios. ² Niluxh sgaii rexpejn Israel nani di chalilajz xtidx Jesucrist balijdx rebenzajt te bidxechnäjäreni rebejn nani huililajz xtidx Jesucrist. ³ Ni'cni bia'n Pabl nájza Bernabé lo guejdxga balti dxej. Gusutzu'tz guiro'preni guniireni xtidx Jesucrist. Badeed Dios bejnreni redzunro, remilagwr xcuent xcälrnibee Dios te bahuii bejn cayacnäjä Diosreni. ⁴ Guyu' tiop cuaa bejn nen guejdxga. Gala' guejdxga huililajz xtidx Dios nani gunii Pabl nájza Bernabé, ⁵ dxejc sgala' guejdxga bacuadiajg xtidx rexpejn Israel. Dxejc bire' te cuaa rexpejn Israel, nájza benzajt, nájza reguxhtis, rlajzreni nidxagdijlreni reapost, rlajzarenen nucuaarenen guij yejc Pabl nájza Bernabé. ⁶ Dxejc gucbeerenen xhi rlajzrenen gunrenen, ni'c baxunrenen ro'c huijrenen nez reguedx Licaonia, ro'c bidzujnrenen guedx Listra, guedx Derbe, nájza reguejdx ni re' nejzga. ⁷ Che bidzujnrenen ro'c, cadrotis huijrenen basule'reni xtidx Dios.

⁸ Guedx Listra guyu' te niguii ni digacdi sa, che gojllini racxhuu ni'ni. ⁹ Cagucuadiajg niguiiga xtidx Pabl. Che bahuii Pabl lojni, gucbee Pabl rililajz niguiiga xtidx Dios, rililajzzani sajc gusiajc Diosni. ¹⁰ Dxejcti dip gunii Pabl lojni, räjpni:

—¡Huisulii!

Dxejcti huisuyälni, gusajni. ¹¹ Che bahuii rexpejn Licaonia xhi bejn Pabl, lagajc xtiidxrenen guniirenen, räjprenen lo sa'reni:

—¡Redios abiädluiloj loonu si'c niguii!

¹² Gulälajrenen Bernabé Júpiter, si'c laa tej rextiosrenen. Dxejcti Pabl gulälajrenen Mercurio, si'c laa stee rextiosrenen, sa'csi laanen rniirunen lo guiro'prenen. ¹³ Dxejcti te bixhojz xten xquidoo Júpiter cua' tiop gon najl guii guejnrenen. Biädnäni regonga ro' xquidoo Júpiter ni suga' ro' guejdxga. Rebejn nájza bixhojz rlajzrenen nugu'trenen regon te ganrenen Bernabé nájza Pabl si'c rajnrenen rextiosrenen. ¹⁴ Che biejn diajg reapost xhi cayajc, batiäjsrenen tla' xhajbrenen si'c te seen direnen guichagljajz xhi cayujn rebejnnga. Ruxunrenen bidzujnrenen lo rebejn, räjprenen lo rebejn:

¹⁵ —Colcuadiajg xtiidxnu. ¿Xhicuent cayujn guejbtu recosre? Ni lagajc sabejntu najcnu, lagajc bejn guedxliuj najcnu. Rusule'nu xtidx Dios lojtu te lacuaa ruzuxhijbtu lo redios ni runchee bejn, guzuxhijbtu lo Gueb Dios ni nabajn par tejpas, ni benchee xhaguibaa nájza guedxliuj, nájza nisdoo, nájza guiralii ni yu' lojrenen, nenrenen, ¹⁶ Galoo basaan Diosga gun reben guedxliuj si'ctis ni rlajzrenen. ¹⁷ Huen najc Dios, rudeedni nisguij, rudeedni rajc xhi rajw rebejn, rdxaj xque'renen, rbaa lajzrenen. Ni'cni riembeepacnu yu' Dios.

¹⁸ Xhidajl diidx guniirenen te chäii bejnrenen gaan guredxi rebejn, sa'csi rlajzpac rebejn nugu'trenen regon.

¹⁹ Dxejcti bidzujn gaii xpejn Israel siädrenen guedx Antioquía nájza guedx Iconio. Baquuilrenen reben Listra te gucuaarenen guij yejc Pabl. Bacuaarenen guij yejc Pabl, gudobxhajxhrenen guläärenen ro' guejdxga, sa'csi naarenen agujtni.

²⁰ Dxejc laj ni suga' rexpejn Jesucrist guideb gabi cadro naga' Pabl, huistieni, biusacni guejdxga. Che bara yääl, huinäni Bernabé säärenen guedx Derbe.

²¹ Che bidzujnrenen guejdxga, basule'renen rextidx Dios lo rebejnnga. Xhidajlrenen huililajz xtidx Dios. Dxejc gubi'renen, biu'renen guedx Listra, nájza guedx

Iconio, nājza guedx Antioquía. ²² Baliidxreni rebejn nani huililajz xtidx Dios, gucnājreni rebejn ga te batiplajz rebejn ga, rājpreni lo rexpejn Jesucrist:

—Colsnaj lajztu xtidx Dios. Susacsí rebejn la'tu, sidejdtu trabajw te jiu'tu cadro rnibee Dios.

²³ Dxejcti gule reapost gaii dade' ni najc bengool te fiireni rexquidoo xpejn Jesucrist. Che gulujx bacua'nreni, laḷ ni guredx-gunabreni lo Dios, basadiidxreni rebejn, rājpreni: “Gacnāj Jesucrist la'tu ni huililajz xtiidxni.”

Gubisac guiro'preni guedx Antioquía xten Siria

²⁴ Che gudejd Pabl nājza Bernabé distrit Pisidia, bidzujnreni estad Panfilia. ²⁵ Basule'reni xtidx Dios lo reben Perge, dxejcti biriireni ro'c sääreni guedx Atalia. ²⁶ Che bidzujnreni guejdxga, biu'reni nen barcw, gudejdreni lo nisdoo te bidzujnreni stee guejdx ni laaza Antioquía. Ni'c najc guejdx ni biriireni che sääreni. Lo guejdxre yu' rexpejn Jesucrist ni gunab lo Dios xcuentreni, gacnāj Diosreni, baxhaḷreni Pabl nājza Bernabé chasule'reni xtidx Dios nen guiraa reguejdx. Naj abaluux Pabl nājza Bernabé dzuunga. ²⁷ Che bidzujnreni guejdxga, bachagsa' rexpejn Jesucrist. Dxejcti bijreni diidx lo rebejn ga guira'ti ni bennāj Dios laarenī, nājza xho badeed Dios huililajz rebenzajt nani digac rexpen Israel. ²⁸ Xchej biannājreni rexpejn Jesucrist ro'c.

15

Bidxagsa'zarenī nen guedx Jerusalén

¹ Nen redxejga bidzujn gaii dade' ni siääd nez Judea, caguluiireni rexpejn Jesucrist, rājpreni lojreni:

—Palga ditu gusaḷ bee si'c gunibee toMoisés, di Dios guslaatu lo xtojltu.

² Che biejn diajg Pabl nājza Bernabé rediidxga, bidxagdijlreni redade'ga. Dxejc gule rexpejn Jesucrist Pabl nājza Bernabé nājza sgaii rexpejn Jesucrist chääreni guedx Jerusalén te guininājreni reapost nājza rebenḡool te guidon xho gac xcuent beega.

³ Huisunejz rexpejn Jesucrist ni najc ben Antioquía Pabl nājza rebejn ni sanājreni, sääreni guedx Jerusalén. Gudejdreni reguedx Fenicia, nājza reguedx Samaria. Cadrotis gudejdreni bijreni diidx lo rexpejn Jesucrist ahuililajz rebenzajt xtidx Dios. Bibalazduxh rexpejn Jesucrist che biejn diajgreni rediidxga.

⁴ Che bidzujnreni guedx Jerusalén, huichagloj rexpejn Jesucristreni. Dxejcti bij Pabl nājza Bernabé diidx lo reapost, lo rebenḡool nani rnibee rexpejn Jesucrist, nājza lo rexpejn Jesucrist, guiraa redzunro nani cayunnāj Diosreni.

⁵ Dxejc huisulii gaii refarisee ni ahuililajz xtidx Dios, rājpreni lojreni:

—Che chalilajz rebenzajt xtidx Dios, nanab churenī bee, nanabza gusobreni leii xten toMoisés.

⁶ Dxejcti bachagsa' reapost nājza rebenḡool nani rnibee rexpejn Jesucrist, te don xho gunreni. ⁷ Huisulii Pedr, rājpreni lojreni:

—Guejbtu, resa'ä, anajntu xho bejn Dios gubalti ijz. Gule Dios narä lo guiraanu te gusule'ä xtidx Dios loj rebenzajt, te chalilajzreni xtidx Dios.

⁸ Luxh Dios, nani numbechee lastoo guiralii bejn, badeed seen huililajzpac rebenzajt xtiidxni. Badeed Dios Sprit Dxan xtenni lojreni si'c te seen te gachee bejn najcreni xpejn ni. Sigac baniidxni Sprit Dxan xtenni loonu galoo, si'cza badeednini lo rebenzajt. ⁹ Sigajc rinälajz Dios nuunu, sigajcza rinälajzni rebenzajt. Che huililajz rebenzajt xtiidxni, basia Dios lastooreni. ¹⁰ Naj ¿xhicuent rusieedtu Dios, ä? Di niajcdi nisianāj retoxtadnu releiiga, digacdiza chosanājnu releiiga naj. ¿Xhicuent rlaajztu chasanāj rebenzajt releiiga? ¹¹ Xhet

si'cti gacni sa'csi Dios ruslaa nuure lo xtojnu che rililajznu xtidx Jesucrist, luxh si'cza ruslaani rebenzijt lo dojl che rililajzreni xtidx Jesucrist —räjp Pedr.

¹² Che gulujx gunii Pedr, dxitis gurej rebejn, bacuadiajgreni xtidx Bernabé, xtidx Pabl. Guiro'preni bijreni diidx xho cayujn Dios redzunro, remilagwr nez lo rebenzijt.

¹³ Che gulujx gunii guiro'preni, xhet guniidi rebejn. Jacobtis räjp lojreni: —Sa'ä, colcuadiajg xtidxä. ¹⁴ Agunii Simón ni rniireni Pedr lojtu xho ganiddoo baxhal Dios laani lo rebenzijt te gurejdx Dios rexpejn ni ni nadxaag lo rebenzijt. ¹⁵ Luxh si'cza caj lo guijtz. Agujc xcheroduxh bacuaa reniguii nani gunii xtidx Dios, che räjpni:

¹⁶ Sidzujn dxej ni guibisacä.

Sunä guzuxhijb guiraa rebejn nez loä si'c bazuxhijb rexpejn Israel che gubajn toDavid.

Si'c gunä,

¹⁷ te jiadgajn rebejn narä te gacä Xtiosreni,

näjza guiraa rebenzijt nani najc rexpenä jiadgajn narä,

¹⁸ si'c räjp Dios nani galooli baluiloj guiraa redzuunre.

¹⁹ Dxejcti räjp Jacob lojreni:

—Dee najc xhigab ni runä. Na'cru gusieednu rebenzijt ni cagusiechla-jzreni, renani salilajz xtidx Dios. ²⁰ Gucuaanu te guijtz, jie'tznu lo rebenzijt: Na'c gaureni xhi cos ni basuj bejn loj rebanäjb, sa'csi dinu chalilajz xcuent rebanäjb. Na'cza guesnäjreni bejn ni di gac chäälni, na'cza gaureni bääl nani gurerejn, na'cza gaureni rejn. ²¹ Dee gucuaanu te di guche'chreni xpejn Israel sa'csi nen guiraa reguejdx galooli yu' rexpejn Israel nani rol leii xten toMoisés gasob sabd —räjp Jacob.

²² Che biejn diajg reapost näjza rebengool nani rnibee, näjza guiraa rexpejn Jesucrist xtidx Jacob, bichagljazreni xtiidxni. Dxejcti gulereni tiop sa'reni chanä Pabl näjza Bernabé guedx Antioquía. Gulereni Judas ni rniireni Barsabás näjza Silas. Guiro'preni najc bejn ni sajcro loj rexpejn Jesucrist.

²³ Dxejcti bejnreni guijtz huinäreni. Bacuaaren rediidxre:

“Nuure reapost, näjza rebengool ni rnibee, näjza rexpejn xquidoo Jesucrist ruxhalnu xtixtios lojtu, resa'nu nani rbäjz guedx Antioquía näjza estad Siria näjza estad Cilicia. ²⁴ Rucuaanu guijtzre sa'csi biejn diaagnu birii gaii resa'nu ree biädsieedreni la'tu con xtiidxreni, cayu'tu yärsia' sa'csi najreni lojtu nanab chutu bee si'c gunibee toMoisés, guibajnzatu si'c rnii leii xten toMoisés. Xhet nuudinu gunibeenu jiadniireni si'c. ²⁵ Ni'cni biennu xhigab guxhalnu lojtu tiop dade' ni gulenu loj resa'nu te chanäreni Bernabé näjza Pabl, nani sanälaaznu. ²⁶ Agajc balti huält rljazreni nugu'treni Bernabé näjza Pabl, luxh direni guidxejb gusule'reni xtidx Jesucrist. ²⁷ Naj ruxhalnu Judas näjza Silas lojtu. Laareni susule'za guiraa rediidxre lojtu. ²⁸ Tejsi najc xhigabnu con Sprit Dxan xten Dios. Di rlaaznu gutaalrunu leii ni chasanäjtu. Releitis nani nanab rusoobnu rucuaanu lojtu. ²⁹ Na'c gautu xhicos ni basuj bejn lo rebanäjb, sa'csi dirunu chalilaaz xcuent rebanäjb. Na'cru gautu rejn, na'cza gautu bääl nani gurerejn, na'cza guesnäjt nani digac chäältu. Palga gusoobtu recosre, laaca cayujntu. Sacrü guibajntu. Sujiannäjtu Dios.”

³⁰ Dxejcti basadiidx rexpejn Jesucrist Judas näjza Silas huinäreni Pabl näjza Bernabé guedx Antioquía. Che bidzujnreni ro'c batojpreni guiraa rebejn nani huililajz xtidx Dios te bilreni guijtzga lojreni. ³¹ Che biejn diajg rexpenzit Jesucrist diidx ni caj lo guijtzga, bibalazduxhreni sa'csi gulecdxi diidxga lastooreni. ³² Dxejcti basule' Judas näjza Silas xtidx Dios lojreni, sa'csi rudeed Dios xtiidxni loj guiro'preni. Xhidajl diidx guniireni te balijdxreni

rexpejn Jesucrist. Lacti gulecdxi rediidx ni guniireni lastoo guiraa rexpejn Jesucrist. ³³ Ro'c bia'nreni xchej, dxejcru cuäjb rexpejn Jesucrist gubi'reni te gudeedreni xtixtios loj reni baxhalreni.

³⁴ Dxejc Silas bejn xhigab jia'nni ro'c. ³⁵ Luxh Pabl näjza Bernabé bia'n guedx Antioquía. Guiro'preni baluii, basule'reni xtidx Dios loj rebejn. Guyu'za sgaii dade' ni gucnäjreni.

Huihuisac Pabl rexpejn Jesucrist nen guiraa reguejdx

³⁶ Che gudejd xhidajl dxej, räjp Pabl lo Bernabé:

—Do'o guibi' lo guiraa reguejdx cadre basule'nu rextidx Dios te chohuiinu don xho yu' rexpejn Jesucrist.

³⁷ Niluxh Bernabé rlanj chanäreni Juan ni laa Marcw. ³⁸ Naaddi Pabl chääni, sa'csi birii Marcw lojreni che guyu'reni nez Panfilia, diruni nisianäj Pabl näjza Bernabé. ³⁹ Dxejc gudildiidxreni. Gubicajtireni lo sa'reni. Ni'c sanä Bernabé Marcw, biu'reni nen barcw, sääreni Chipre ni re' galäi nisdoo. ⁴⁰ Dxejcti Pabl gule Silas te sanänini. Badeed rexpejn Jesucrist xtixtios lojreni, räjpreni gacnäj Diosreni. ⁴¹ Laḷ ni sasajreni gudejdreni guiraa reguedx Siria näjza guiraa reguedx Cilicia, ro'c gucnäjreni guiraa rexpejn Jesucrist, basule'rurenireni xtidx Jesucrist lojreni.

16

Huinä Timoteu Pabl näj Silas

¹ Bidzun̄sac Pabl näjza Silas reguedx Derbe näjza Listra. Ro'c bidxaagreni te xpen̄ Jesucrist ni laa Timoteu. Xnanni najc beñ Israel ni huililajz xtidx Jesucrist. Xtadni najc beñ griegw. ² Didxsa'ctis rnii rexpen̄ Jesucrist ni yu' Listra näjza Iconio xcuent Timoteu. ³ Rlanj Pabl chanäni Timoteu. Dxejcti basäl Pabl bee Timoteu te gujcn̄i si'c xpen̄ Israel, te xhet naadi rexpejn̄ Israel, sa'csi guiraaren̄i nanchee xtad Timoteu najc beñ griegw. ⁴ Che bidzujñreni cade tej reguejdx, basule'reni xtidx reapost näjza rebengool nani rnibee xpen̄ Jesucrist guedx Jeurusalén, te gusoob rexpejn̄ Jesucrist diidx ni bacuaaren̄i lo guijtz. ⁵ Bazutijp xtidx Dios lastoo renani huililajz xtidx Jesucrist. Guixee guixee xhidajlru bejn̄ huililajz xtidx Dios xcuent Jesucrist.

Lo te bacal̄ gunii te niguii lo Pabl

⁶ Che gudejdreni distrit Frigia, näjza estad Galacia, di Sprit Dxan xten Dios nusaan nusule'reni xtidx Jesucrist nen̄ reguedx Asia. ⁷ Bidzujñtiren̄i gajxh estad Misia. Dxejc rlanjreni nijreni estad Bitinia, niluxh di Sprit Dxan xten Dios nusaan nijreni ro'c. ⁸ Ni'c gudejdtiren̄i stelaad estad Misia, bidzujñreni guedx Troas. ⁹ Te yääl si'c lo te bacal̄ bahuii Pabl suga' te beñ Macedonia. Canabduxh niguiiga lo Pabl, räjpni:

—Gudaa ladxä, estad Macedonia, te gacnäjl̄u nuunu.

¹⁰ Che bara yääl ni gunixcal̄ Pabl, gudilgajcnu te barcw te chonnu estad Macedonia, sa'csi gucbeenu Dios najc nani caguxhal̄ nuure te guluiini xtiidxni lo reben̄ Macedonia. Narä, Lucas, ni cagucuaä rediidxre, gusanää Pabl näjza Silas.

Che guyu' Pabl con Silas guedx Filipos

¹¹ Biu'tinu nen̄ barcw ro' guedx Troas. Bidzun̄nu Samotracia, te yuj ni re' nen̄ nisdoo. Che bara yääl bidzun̄nu guedx Neápolis. Ro'c biriinu nen̄ barcw, ¹² bionnu guedx Filipos, guejdx nani sajcru lo estad Macedonia. Guedx romanni. Ro'c bia'nnu tiop chon̄ dxej. ¹³ Che gojl sabd, dxej ni rusilajz rexpejn̄ Israel, biriinu guejdxga bionnu ro' te gueuu, sa'csi biennu xhigab ro'c jiääd rexpejn̄ Israel te guininäjreni Dios. Ro'c gurejnu, guniinu lo renane' nani

bire' ro'c. ¹⁴ Lojreni nadxaag te nane' ni laa Lidia, te benzijt ni digac xpejn Israel. Guedx Tiatira siäädni. Ruto'ni ladmuraad ni sacduxh. Rajn gunaaga Dios si'c rajn rexpejn Israelni. Bacuadiajgni xtidx Jesucrist ni cagusule' Pabl. Guenä j Dios nane'ga te huililajzni xtiidxni. ¹⁵ Birobnisni, näjza guiraa reni rbäjz rolijzni. Dxejc guniini loonu:

—Palga ruhuiitu guliä rililazä xtidx Dios, coltaa rolizä te ro'c cuääztu.

Lacti gunab nane'ga nuunu, ni'c huijia'nnu rolijzni.

¹⁶ Te dxej cheni sionnu cadro rrinäj bejn Dios, bidxaag nu te dxa'p nani yu' te bendxab nen lastooni. Rajp rexpaxhuaanni melduxh sa'csi rusule' dxa'p ga recos ni gajd gac. ¹⁷ Birinajl dxa'p ga Pabl näjza nuure. Rbedxa' dxape'ga, räjpni:

—Reniguiire najc xmos Dios nani rnibee guideb guedxliuj. Ruluiireni loonu xho laanu lo xtojlnu —räjp dxape're.

¹⁸ Balti dxej birinajl dxape'ga nuure, entis caniini rediidxga lo rebejn. Lacti basieed dxape'ga Pabl, ni'c gubiréni, räjpni lo bendxab ni yu' nen lastoo dxape'ga:

—Xcuent xcälrnibee Jesucrist rniä lojlu: “Birii nen lastoo dxape'ga.”

Lagajc dxejc birii bendxab nen lastoo dxape'ga.

¹⁹ Che bahuii rexpaxhuaan dxape'ga diru dxape'ga gun gaan melro, gunaazreni Pabl näjza Silas. Dxejcti gudobxhaxhrene guiro'preni nez roguüi cadro suga' reguxhtis. ²⁰ Che bidzunnä jreni Pabl näjza Silas lo reguxhtis, räjp rexpaxhuaanni lo reguxhtis:

—Reniguiire najc xpejn Israel. Cayujnreni bie j lo guejdxre.

²¹ Caguluiireni garenca leii nani digacdi gusoobnu sa'csi najcnu ben roman.

²² Dxejcti bidxehnäj rebejn Pabl näjza Silas. Gunibee rejuejz gulääreni xhajt Pabl, näjza xhajt Silas, te batiäjlni baar guideb tiejx guiro'preni.

²³ Che gulujx gudinduxhrene Pabl näjza Silas, biäuren neñ latzguiib. Dxejcti räjp reguxhtis lo reguixhajg:

—Colgapdzu'tzreni, di gusaantu guiriireni.

²⁴ Basäl guixhajgreni neñ latzguiib. Guyu' ni'reni neñ te baräjd ni sojb gueed te di guxunreni.

²⁵ Garolyääl guninä j Pabl näjza Silas Dios, gusloj cayolreni dij ni rliä'p xpala'n Dios. Bie jn diajg guiraa rebejn ni yu' neñ latzguiib cayolreni. ²⁶ Chela gujc te xuduxh, basniib guideb latzguiibga. Bixal guiraa repuert, birucya' guiraa recaden, bixal ro' rebaräjd cadro naaz ni'reni. ²⁷ Che gubajn guixhajg ni canäj latzguiib, bahuiini naxhal latzguiib, gulääni spaad xtenni, te rlanjni nugu'tni lagajc laani, sa'csi naani abadxun reni niäu neñ latzguiib. ²⁸ Dxejc guredxa' Pabl, räjpni lo guixhajgga:

—Na'c gunlu si'c. Bahuii, guiraliinu suga'nu ree.

²⁹ Dxejc gunibee guixhajg biäd te bajl te biu'ni neñ latzguiib. Racsejsni biädni bazuxhijbni nez lo j Pabl näjza nez lo j Silas. ³⁰ Dxejcti gulää guixhajgreni neñ latzguiib. Gunabdiidxni räjpni lo jreni:

—iColguinii, dade'! ¿Xhini'c nanab gunä te guslaa Dios narä lo dojl?

³¹ Räjp Pabl näjza Silas lo guixhajg:

—Huililajztis xtidx Dios xcuent Jesucrist, luj näjza guiraa reni yu' rolijzlu, te guslaa Diostu lo dojl.

³² Basule' Pabl näjza Silas rextidx Dios lojni näjza lo j guiraa rebejn ni yu' rolijzni. ³³ Lagajc dxejc, garol yääl, huinä guixhajgreni gudiibni dejtzreni cadro batiuug baarreni. Dxejcti batiobnisreni guixhajg näjza guiraa reni yu' rolijzni. ³⁴ Dxejc huinä guixhajgreni rolijzni, ro'c badeedni xhi gudajwreni.

Laani näjza guiraa reni yu' rolijzni bibalazduxhreni sa'csi huililajzreni xtidx Dios.

³⁵ Che bara yääl, baxhal reguxhtis stiop guixhajg räjpni lo guixhajg nani cuanäj latzguiib:

—Baslaa reniguiiga.

³⁶ Dxejcti huiye'tz guixhajgga lo Pabl, räjpni:

—Anaj reguxhtis guslaätu. Naj colchäj, gacnäjä Dios la'tu, saru chäätu.

³⁷ Niluxh räjp Pabl loj reguixhajg:

—Nuure najczanu beñ roman. Batiäjreni baar detznu nez loj guiraa rebejn. Nicla niniabdiidxreni la yu' xhi dojl biennu. Basäureni nuure neñ latzguiib. Leii xten roman di gusaan gac rebeñ roman si'c. Luxh najrlajzreni guslaareni nuure xhiga'tz. ¡Dinu guirii si'c! Lagajc laareni sujiädslääreni nuunu.

³⁸ Che huiye'tz reguixhajg diidxga lo reguxhtis, bidxebduxhreni che biejn diajgreni beñ roman najc Pabl näjza Silas. ³⁹ Dxejcti biääd reguxhtis, gulääreni Pabl näjza Silas, gunabreni jäjllajzreni. Gunabduxhreni lo Pabl näjza Silas; räjpreni:

—Coljiunejz guejdxre.

⁴⁰ Che biriireni neñ latzguiib, huijreni rolijz Lidia. Baliidxreni rexpejn Jesucrist, gulecdxireni lajz rexpejn Jesucrist. Dxejc biunejzreni guejdxga.

17

Cadxecluduxh guiraa rebeñ Tesalónica

¹ Che gudejdreni reguedx Anfípolis, näjza guedx Apolonia, bidzujnreni guedx Tesalónica cadre yu' te xquidoo rexpejn Israel. ² Ro'c basule' Pabl xtidx Dios si'c ni rujnpacni. Chon sabd, dxej ni rusilajz rexpejn Israel, basule'ni xtidx Dios lojreni. ³ Basule' Pabl xtidx Dios ni caj lo guijtza ni bacuaa reniguii ni gunii xtidx Dios galooli. Caj lo guijtza: “Nanab ted Crist trabajwduxh, guetni, niluxh sibansacni lo rebengut.”

Dxejc räjp Pabl lojreni:

—Ruiä lojtu diidx xcuent Jesús; lagajc Jesúsre najc Crist —räjpni.

⁴ Yu' rexpejn Israel huililajz xtidx Dios, gusanäjreni Pabl näjza Silas. Näjza xhidalduxh beñ griegw nani rajn Dios näjza xhidajl reguna griegw ni sajrcu huililajz xtiidxni. ⁵ Luxh yu' rexpejn Israel ni di chalilajz, ni bidxechlajz. Batie'reni gaii beñploj, beñlatsiaj, bejnreni bieje nez galäii. Biu'reni rolijz Jasón caguilreni Pabl näjza Silas te cuääreni guiro'preni nez lo rebejn.

⁶ Niluxh che direni nidxäl Pabl näjza Silas, alga Jasón gulääreni näjza gaii renani rililajz xtidx Dios, sanääreni redee lo reguxhtis, cabedxa'reni:

—Reniguiire ni abejn bieiduxh guideb guedxliuj abidzujnreni laadxnu,

⁷ luxh badeed Jasón rolijzni jia'nreni. Direni gusoob leii xten César, najreni yu' stee reii ni laa Jesús.

⁸ Che biejn diajg reguxhtis näjza rebejn diidxre, guyu'reni yärsia'. ⁹ Cua' reguxhtis meel lo Jasón näjza lo reexamigwni. Räjp reguxhtis sudedsacreni meelga che jii Pabl näjza Silas, jiunejzreni lo guejdxga. Dxejcti baslaareni Jasón näjza reexamigwni.

Che guyu' Pabl con Silas guedx Berea

¹⁰ Che biu' guxhijn, baxhalgajc rexpejn Jesucrist Pabl näjza Silas ste guejdx ni laa Berea. Che bidzujnreni guejdxga, biugajczeni xquidoo rexpejn Israel.

¹¹ Hueenru najc rebeñ Berea loj rebeñ Tesalónica, sa'csi rbaali lajzreni bacuadiajgreni xtidx Pabl ni guniini xcuent Jesucrist. Guixe-guixee bilreni guijtza cadre caj xtidx Dios te gucbeerreni la guli rextidx Pabl. ¹² Xhidajl

rexpejn Israel nájza xhidajl ben griegw ni sajcro, gunaa sigajc niguii, huililajz xtidx Dios. ¹³ Che guchee rexpejn Israel ni rbájz guedx Tesalónica caguluui Pabl xtidx Dios guedx Berea, biädreni guedx Berea. Che bidzujreni lo guejdxga bejnreni bieju ro'c. ¹⁴ Dxejcti baxhal rexpejn Jesucrist Pabl, huijni ro' nisdoo. Niluxh Silas nájza Timoteu bia'n guedx Berea. ¹⁵ Dxejcti rebejn ni guzanáj Pabl huinänini guedx Atenas. Ro'c räjp Pabl lo rebejn ni biädnäni gudeedreni diidx lo Silas nájza Timoteu jädgajcreni lojni. Dxejcti rebejn ni sanä Pabl gubisac guedx Berea.

Guyu' Pabl guedx Atenas

¹⁶ Laḷ ni guläjz Pabl guedx Atenas, guyuduxhni yärsia' sa'csi bahuiini rajn guiraa rebejn rebanäjb nani runchee lagajc bejn. ¹⁷ Ni'c nen xquidooreni gudildiidx Pabl rexpejn Israel nájza rebenzajt ni rajn Dios si'c rajn rexpejn Israelni. Guixe-guixee gudildiidxni chutis bejn ni re' lo guii. ¹⁸ Dxejcti biäd gaii bejn lojni. Yu' reni roḷduxh guijtz ni bacuaa epicúreos, yu'za renani roḷduxh guijtz ni bacuaa estoicos, gudildiidxreni Pabl. Yu' reni räjp lo sa'reni:

—¿Xhicha guinii bejnre loonu? Entis naxhal ro'ni.

Yu'zaren i räjp lo sa'reni:

—Pet calä'pni xpala'n tiop dioscoob.

Si'c guniireni sa'csi biejn diajgreni bazä't Pabl “Jesús” nájza “Resurreccion”, ni säloj yälgubansac lo rebenjut. ¹⁹ Dxejcti gunaazreni Pabl sanärenini nez dajn ni laa Areópago. Ro'c yu' si'c te jusgaad. Räjpreni lo Pabl:

—Rlaaznu gacheenu xhi diidx ruluiilu, ²⁰ sa'csi rujylu diidx nani dinu jiacbee. Ni'cni bejn huen, basule' diidxre loonu te gacheenu xhi sälojreni —räjpreni.

²¹ Reben Atenas nájza rebenzajt ni yu' ro'c ruteedreni redxej rniireni didxcoob lo sa'reni, o rucua diajgreni didxcoob. Ni'cpac rchaglaajzreni.

²² Galäii Areópago huisulii Pabl, räjpni lojni:

—Colcuadiajg guejbtu, ben Atenas. Abahuiä xho randuxhtu xhidajl banäjb.

²³ Che siädsä lo guejdxre, bahuiä lo rexpänäjbtu. Bahuiäza loj te piään cadro caj rediidxre: “Dios ni dinu jiembee.” Narä ranä Diosga. Rumbeä Diosga nani rajntu mase ditu gumbeeni. Susule'ä xtiidxni lojtu.

²⁴ Räjp Pabl:

—Diosre benchee guedxliuj nájza guiralii ni yu' lo guedxliuj, sa'csi rnibeeni xhaguibaa nájza guedxliuj. Di Diosre cuääz lo piään niclaza nen reguidoo ni runchee bejn. ²⁵ Diza Diosre guiquin chu gacnäjni sa'csi lagajc Diosre rudeed yäl nabajn, yäl nadaan, nájza guiralii nani rquii reben guedxliuj.

²⁶ Räjp Pabl:

—Guiralii reben guedxliuj najc rexagdo tejsi gunaa nájza tejsi niguii. Desde galooli gunibee Diosga bal ijz chu renacion, nájza cati gunibee renacionga. ²⁷ Benchee Dios guiraa reben guedxliuj te quiilreni Dios te chalilajzreni xtiidxni. Luxh suga' Dios gajxh cadetejnu, ²⁸ sa'csi Dios rujn nabajnu lo guedxliuj, runiidxni rsiaanu lo guedxliuj, runiidxzani rdajlru xcäl nabannu lo guedxliuj. Laaca bacuaa rexpenajntu: “Najcnu xi'n Dios, sa'csi benchee Diosnu.” ²⁹ Ni'cni, sa'csi najcnu xi'n Dios, di nungäjḷ jienu xhigab najc Dios si'c rebanäjb ni nac-chee pla't, o guij, o yajg si'ctis ni runchee bejn rexpänäjbtu. ³⁰ Nen redxej ni di bejn niembee Dios, diza Dios niujn castiigwreni. Niluxh naj gunibee Dios gusiechlajz guiraa rebejn, ³¹ sa'csi abasoobni te dxej cheni gac Jesús juejz lo guiraa reben guedxliuj. Agule Diosni gacni juejz, sa'csi rumbechee Jesucrist chu najc benguijdx, chuza najc bensac. Rnili Jesucrist rediidx ni najc guliitis. Guläs Dios Jesucrist, baspansacnini lo rebenjut, te gacheenu rajp Jesucrist yälrnibee lo guiraa recos.

³² Che biejn diajg rebejn̄ga gubansac Jesucrist lo rebengut yu' reni baxhiznäj xtiidxni. Yu'za reni räjp:

—Sucuadiajgrunu xcuent ni rusule'lu.

³³ Dxejcti birii Pabl lojreni. ³⁴ Yu'za reni huinajlni, huililajzreni xtidx Dios. Lojreni nadxaag te dade' ni laa Dionisio ni najc te juejz lo Areópago; näjza te nane' ni laa Dámaris. Guyu'za sgaii bejn̄ ni huililajz.

18

Guyu' Pabl guedx Corinto

¹ Biriiti Pabl guedx Atenas, huijni guedx Corinto. ² Ro'c bidxaagni te dade' ni najc bejn̄ Israel, ni laani Aquila. Ponto najc lajdxni. Biädgajni ro'c, biriini Roma, sa'csi gunibee rei Claudio guirii guiraa rexpejn̄ Israel guedx Roma. Birinäj Aquila Priscila chäälni. Biriireni Italia, biäädreni guedx Corinto. Bihuii Pablreni, ³ sa'csi lagajc dzuun ni rujnreni rujnzani. Tejsi lajt guläjzreni te bejn̄ jionreni tejsi dzuun. Runcheereni yuguijd. ⁴ Gasob sabd, dxej ni rusilajz rexpejn̄ Israel, basule' Pabl xtidx Dios nen̄ xquidoo rexpejn̄ Israel. Rlajzni chalilajz rexpejn̄ Israel näjza bejn̄ griegw ni digac xpejn̄ Israel diidx ni rniini xcuent Jesucrist.

⁵ Dxejcti birii Silas näjza Timoteu Macedonia. Che bidzujn̄reni guedx Corinto, gusloj rusule'tis Pabl xtidx Dios guixe-guixee, guniliini lo rexpejn̄ Israel:

—Jesús najc Crist ni runloj rexpejntu guxhal̄ Dios.

⁶ Dxejc bidxehnäj rexpejn̄ Israelni, guniyajzaren̄i xtiidxni. Dxejcti gubijb Pabl xhajbni si'c te seen diruni jiuren̄i, caguro'nniren̄i. Räjpzani lo rexpejn̄ Israel:

—Lagajc la'tu rajptu dojl̄ nittu lo Dios. Xhet dojldi rapä narä. Aguniä xtidx Jesucrist lojtu. Naj lo rebejn̄ nani di gac bejn̄ Israel gusule'ä xtidx Jesucrist —räjpn̄i.

⁷ Dxejcti biriini lojreni, huijni rolijz Justo, te bejn̄ ni rajn̄ Dios si'c rajn̄ rexpejn̄ Israelni. Rolijzni sojb cuä' xquidoo rexpejn̄ Israel. ⁸ Crisp, ni rnibee xquidoo Israel, huililajz xtidx Jesucrist. Huililajzza guiraa reni rbäjz rolijzni. Xhidajlza bejn̄ Corinto huililajz xtidx Jesucrist, dxejcti birobnisreni. ⁹ Gojl̄ te yääl gunii Dios lo te bacal̄, räjpni lo Pabl:

—Na'c guidxejblu. Guniitis, na'c gusäulu ro'lu, ¹⁰ sa'csi narä suganää luj. Rut gacdi gun latsiajlu. Aguleä xhidalduxh bejn̄ lo guejdxre te gacreni xpenä —räjp Dios.

¹¹ Ni'c bia'n Pabl ro'c tebizgarol. Baluini xtidx Dios lojreni.

¹² Che gujc Galíon gubernadoor xten Acaya, tejsi xhigab bejn̄ rexpejn̄ Israel bidojpreni te gunaazreni Pabl. Sanäreni Pabl jusgaad cadro yu' Galíon.

¹³ Räjpreni lo Galíon:

—Niguiire caguluii rebejn̄ ganreni Dios garenca mood, xhet si'cti ni caj lo xleiinu —räjpreni.

¹⁴ Agojl̄ ninii Pabl, che räjp Galíon lo rexpejn̄ Israel:

—Palga gulanni o bagu'tni te bejn̄, dxejc yu' xtojlni te gucuadiagä xtiidxtu.

¹⁵ Per la'tu cadxe'chtu xcuent diidx, xcuent laj bejn̄, xcuent ni caj lo leii xtentu. Gubernadoor narä, xho gucuadiagä diidxga. Lagajc la'tu colchahuii xho guntu yälguxhtis —räjp Galíon.

¹⁶ Gunibee Galíon barilaagw resoldaad rexpejn̄ Israel. ¹⁷ Dxejc gunaaz reGriegw Sóstenes nani rnibee xquidoo rexpejn̄ Israel. Batiäjln̄reni baar dejtz Sóstenes nez ro' jusgaad xten Galíon. Niluxh nicla niu Galíonreni.

Chon̄ huält huihui Pabl rexpejn̄ Jesucrist

¹⁸ Bia'nti Pabl Corinto xchej. Dxejc badeed Pabl xtixtios lo rebejn nani huililaz xtidx Jesucrist, biriini ro'c. Sanäni Priscila näjza Aquila, biu'reni neñ barcw te siireni nez estad Siria. Dxejc ganid gudejdreni guedx Cencrea, cadre bahuaj Pabl yejcn si'c te seen yu' xhi diidx bia'nni con Dios. ¹⁹ Che bidzujñreni guedx Éfeso, basa'n Pabl Priscila näjza Aquila ro'c. Biu' Pabl xquidoo rexpejn Israel, ro'c bachaagni diidx con rexpejn Israel. ²⁰ Dxejcti che gunabreni jia'n Pabl ro'c xchej, naaddini jia'nni. ²¹ Badeedni xtixtios, räjpni lojreni:

—Nungäjlpac chatedä laniro guedx Jerusalén. Siälsacä ree palga gusaan Dios jialä.

Biusacni neñ barcw, biriini guedx Éfeso. ²² Che bidzujñni guedx Cesarea, biriini neñ barcw, huijni guedx Jerusalén. Che bidzujñni, guniini xchan lo reapost näjza lo rexpejn Jesucrist. Dxejc huijni guedx Antioquía xten Siria. ²³ Che gudejd balti dxej, biriini guejdxga, gudejdni guideb estad Galacia näjza guideb distrit Frigia. Neñ cade tej reguejdxga, balijdxni rexpejn Jesucrist te gutijpru lajzreni.

Baluu Apolos xtidx Dios neñ guedx Éfeso

²⁴ Neñ redxejga, te dade' ni laa Apolos bidzujñ guedx Éfeso. Najcni xpejn Israel, gojlni guedx Alejandría xten Egipto. Lacti rajc rnisa'cni, nanduxhzani xtidx Dios. ²⁵ Nanduxhni xtidx Dios xcuent Jesucrist. Laaca basule'ni xtidx Dios, guideb xcälñabajñni rinälajzni Dios. Niluxh xcuent Jesucrist najntisni yälrobnis xten Juan. ²⁶ Nicla nidxejb Apolos gusloj caniini neñ guidoo xten rexpejn Israel. Che biejn diajg Priscila näjza Aquila xtiidxni, huinärenini rolizreni. Ro'c basule'rureni xtidx Dios nani gajdni gan. ²⁷ Dxejc, sa'csi abejñ Apolos xhigab chääni reguejdx ni tre' nez Acaya, bacuaa rexpejn Jesucrist guiitz lo rexpejn Jesucrist ni yu' neñ reguejdxga te gacnäjreni Apolos. Gucnäduhx Apolos rebejn nani badeed Dios huililajz xtidx Dios neñ reguejdxga, ²⁸ sa'csi gunilii Apolos nez loj guiraa rebejn xhet laadi rnii rexpejn Israel. Di niajcdi nuzejc rexpejn Israel diidx lo Apolos sa'csi ganax con xtidx Dios ni bacuaa reniguii ni gunii xtidx Dios galoo basule'ni: “Jesús najc Crist nani cayunlojtu guxhañ Dios.”

19

Guyu' Pabl guedx Éfeso

¹ Lañ ni guyu' Apolos guedx Corinto, huij Pabl xhidajñ reguejdx neñ región Asia, dxejcti bidzujñni guedx Éfeso cadre bidxaagni gaii bejn nani huililajz xtidx Dios. ² Gunabdiidx Pabl lojreni:

—Che huililajztu xtidx Dios, ¿la biädlajz Sprit Dxan xten Dios neñ lastootu, ä?

Räjpreni lojni:

—Nicla gajd diajgnu jiejn la yu' te Sprit Dxan xten Dios.

³ Räjp Pabl lojreni:

—¿Xho birobnistu, pues?

Räjpreni lojni:

—Birobnisnu si'cni baluu Juan tiobnis bejn.

⁴ Dxejcti räjp Pabl lojreni:

—Guliica bastiobnis Juan che basiejch lajz rebejn xtojñreni. Räjpza Juan lo rebejn: “Colchalilajz xtidx bejn ni siääd detzä.” Bejn ni basä'tni najc Jesucrist —räjp Pabl.

⁵ Che biejn diajgreni rextidx Pabl birobnisreni te gacbee rebejn najcreni xpejn Jesucrist. ⁶ Che batzuub Pabl naani yejcreni, biu' Sprit Dxaan xten Dios nen lastooreni. Dxejc gusloj caniireni garen-garen didxsaj. Guslojza caniireni diidx ni badeed Dios lojreni. ⁷ Si'c tzubitio'p dade' gusajc si'c.

⁸ Si'c chon bäii, guixe-guixee gunii Pabl rextidx Dios, basule'ni xcuent xcälrnibee Dios loj rebejn nen xquidoo rexpejn Israel. Dini nidxejb guniini loj rebejn.

⁹ Dxejc guyu' reni gucnajd, dirureni nililajz xtidx Dios. Che gusloj caniyareni xtidx Dios lo rebejn, biunejz Pabl ro'c sanäni rexpejn ni rililajz xtidx Jesucrist. Sanä Pablreni te bidxagsa'reni ro scueel xten mastr Tiranno. Ro'c bidxagsa'reni te guixe-guixee basule' Pabl xtidx Dios lojreni. ¹⁰ Tiop ijz bejn Pabl si'c, ni'c guiraa rebejn ni rbäjz Asia biejn diajgreni xtidx Dios. Rexpejn Israel sigajc reben griegw biejn diajgreni xtidx Dios. ¹¹ Gucnäj Dios Pabl bejni xhidajl dzunro, remilagwr. ¹² Ni'cni biääd bejn ca'reni baii, ca'reni tla' lajd te guxheebreni relajdga lo Pabl. Dxejcti rinäreni relajdga lo rebejn ni racxhuu, luxh riagajc rebejn ni racxhuuga, rigajcza rebendxab lastoo renani yu' bendxab.

¹³ Dxejcti guyu' gaii bejn Israel nani entis rcansaj, direni cuäaz tejsi guejdx. Najcreni bejn ni rbää bendxab lastoo rebejn. Bejn redee xhigabcoob, naareni cuääreni bendxab xcuent laj Jesucrist, ni'cni räjpreni lo renani yu' bendxab nen lastooni:

—Xcuent xcälrnibee Jesucrist nani ruluii Pabl rnibeenu guiriilu nen lastoo bejnga —räjpreni.

¹⁴ Guyu' gajdz xi'n Esceva, te bejn Israel, nani sajcro lo rebixhojz. Rujn redee dzuun rbääreni rebendxab nen lastoo rebejn. ¹⁵ Che gunii rexi'n Esceva loj bendxabga si'c, räjp bendxab ni yu' nen lastoo bejnga lojreni:

—Rumbeä Jesucrist, rumbeäza Pabl. ¿La'tu, chu la'tu? Dina gumbeä la'tu.

¹⁶ Dxejcti bixa't niguii nani yu' bendxab nen lastooni yejc rexi'n Esceva, gudinduxhnireni, basäl'ta'nireni, batiäjsni xhajbreni. Dxejcti baxunreni biriireni nen yu'ga, bidxälguijdxzarenen biräsyä' xhajbreni. ¹⁷ Dxejcti guiraa reben Éfeso, rexpejn Israel sigajc bejn griegw, gucbee xho bennäj bendxab reniguiiga. Bidxebduxh rebejnga, luxh huä'p xpala'n Jesucrist.

¹⁸ Xhidalduxh reni huililajz xtidx Dios biääd lo rexpejn Jesucrist. Cacäjpreni guiraa recos xhet laadi nani rujnreni. ¹⁹ Xhidajl reni najc bidxaa biädnä reguijtz cadro caj yäl'najn xten rebidxaa. Dxejcti base'creni reguijtzga nez loj guiraa rebejn. Bejnreni cuent lacti meel saj reguijtzga. Sajcreni tiubitzuu mił melpla't. ²⁰ Xhidalduxh rebejn huililajz xtidx Dios. Batijp Dios lastoo rexpejni. Gulä'p guiraareni xpala'n Dios.

²¹ Che gulujx recosre, bejn Pabl xhigab chääni guedx Jerusalén, niluxh tedxgaani reguejdx ni re' nez Macedonia näjza Acaya, bejnzeni xhigab, naani:

—Che ahua'a Jerusalén, nanabza cha'a guedx Roma.

²² Ni'cni baxhal Pabl Timoteu näjza Erasto, tio'p renani racnäjni, huijreni Macedonia, luxh laani bia'nni Asia.

Bidxebduxh reben Éfeso

²³ Nen redxejga, guyuduxh rebejn yärsia' sa'csi baluii Pabl xtidx Dios. Direni nichaglajz care'ch xtidx Dios. ²⁴ Te dade' ni laa Demetrio runchee ni'ch pla't xten banäjb ni laa Diana, ni najc banäjb xten guejdxga. Demetrio näjza guiraa replateer ni rujn ni'ch xten Diana runduxhreni gaan meel ro'c.

²⁵ Gurejdx Demetrio guiraa replateer ni rujn reni'chga, räjpni lojreni:

—Colcuadiajg, la'tu resa'ä: najntu rbäanu melro lo dzuun ni riennu. ²⁶ Abahuiitu niguiire ni laa Pabl. Abiejnza diajgtu xtiidxni. Räjpnj lo rebejn: “Xhet diosdi najc reni racchee con naa bejn.” Guedx Éfeso näjza guideb nación Asia cagusiejchni lajz bejn, xhidalduxh bejn salilajz xtiidxni. ²⁷ Ni'c ries nitloj xtzuunnu palga diru bejn sii ni'ch ni riencheenu. Luxh riesza diru bejn jädgajñ Diana neñ xquidoro Diana. Naj reben Asia, näjza guiraa reben guedxliuj randuxh Diana, banäjb ni sajcro, niluxh palga diru rebejn gan Diana, pet sinitlojni —räjpni.

²⁸ Che biejn diajg replateer xtiidxni, bidxe'chduxhreni, guredxa'reni räjpreni:

—Sacduxh Diana xtios reben Éfeso.

²⁹ Guideb guejdx guyu' biey. Dxejcti ruxunreni bidxagsa'reni lo yuj cadro rajc rexjuntreni. Gunaazreni Gayo näjza Aristarco, ben Macedonia ni rinajl Pabl. ³⁰ Rlajz Pabl niu'ni cadro bidxagsa' rebejn, niluxh di rexpejn Jesucrist nusaanni. ³¹ Gaii guxhtis ni rnibee Asia, sa'csi najcreni xamijgw Pabl, baxhalreni diidx lo Pabl, räjpreni:

—Na'c chäalu cadro nadxagsa' rebejnğa —räjpreni.

³² Lo rebejn ni re'ga, yu' reni rbedxa' tej diidx, sgaiireni rbedxa' garenca diidx. Te bieiduxh cayajc. Xhidalduxh rebejnğa nicla gan xhicuent bidxagsa'reni. ³³ Dxejcti gulää rexpejn Israel te dade' ni laa Alejandro lo reben xhidaalga, te guiniini lo rebejn. Dxejcti basääbni naani lo rebejn te gac dxi rebejn. Rlajz Alejandro guiniini xcuent rexpejn Israel loj guiraa rebejn, te di guidxe'chreni lo rexpejn Israel. ³⁴ Niluxh che gucbee rebejn najc Alejandro ben Israel, tiop or guredxaduxhreni, räjpreni:

—Sacduxh Diana xtios reben Éfeso.

³⁵ Dxejcti biääd secretaar xten guejdxga lo rebejn, gunibeeni guc dxi rebejn, te räjpni lojreni:

—Colcuadiajg, la'tu ben Éfeso, caguidxäjñ te ben guedxliuj ni di gacbee reben guedx Éfeso rajñpac Diana, nani xhaguibaali bitejb lo guedxliuj. ³⁶ Sa'csi rediidxre najc gulii, nungäjñ cuedxitu, na'c guntu recos guiidxre. ³⁷ ¿Xhicuent gunaaztu reniguii ni siädnätu ree? Direni gac gubaan ni rbajn recos guidoo, dizareni niniyaj xtiosnu. ³⁸ Naj palga rlajz Demetrio näjza rebejn ni najc plateer chale'c quej, naxhal jusgaad, suga' reguxhtis. Ro'c suchale'creni xquejreni. ³⁹ Niluxh palga yu' xhi stee, nanab gac te junt xte rebenguejdx si'c ni caj lo xleinu. ⁴⁰ Ries jii xquejnu lo gubier, naareni bidojpnü te guidxagdilñu gubier. ¿Dxejca'? ¿Xhi jie'tznu xcuent ni bidxagsa'nu ree?

Dxejcti räjpni:

—Agojl, coljiunejz.

⁴¹ Che gunii secretaar si'c, bire'ch rebejn, biunejzreni ro'c.

20

Huihuisac Pabl rexpejn Jesucrist ni yu' Macedonia näjza Grecia

¹ Che bire'ch rebejn, gurejdx Pabl rexpejn Jesucrist biääd lojni, te bali-jdxnireni. Badeedni xtixtios lojreni. Sä'tini nez reguedx Macedonia. ² Guiraa reguejdxga cadro gudejñi, baliidxni rexpejn Jesucrist, basule'runi xtidx Dios lojreni. Dxejc säani reguedx Grecia. ³ Che bidzujñni Grecia, bia'nni ro'c chon bäii. Dxejcti niu' Pabl neñ barcw te nijni reguejdx Siria. Niluxh che biejn diajgni cabäz-xhiga'tz rexpejn Israelni te guiniaazrenini, gunaazni nezyuj, gubi'ni nez Macedonia. ⁴ Huinäni Sópater, xi'n Pirios, te ben guedx Berea; näj Aristarco näjza Secondo, ben guedx Tesalónica; näj Gayo, ben

guedx Derbe; näj Timoteu; näj Tíquico näjza Trófimo, beñ Asia. ⁵ Guiraa redee gunijd loonu, huiläjzreni nuure guedx Troas. ⁶ Guedx Filipos bidxaag Pabl narä, Lucas. Ro'c gudejdnu lanij xten rexpejn Israel che rajwreni yätxtiil ni di saguij. Biriitinu guejdxga, biu'nu neñ barcw te sonnu nez guedx Troas. Gaii dxej gusaanu neñ barcw, dxejc bidzunu guedx Troas. Ro'c bia'nnu gajdz dxej.

Baluii Pabl xhidalduxh xtidx Dios lo rexpejn Jesucrist guedx Troas

⁷ Che gojl dumingw, primer dxej xman, bidxagsa'nu te bidaunu yätxtiil si'c gudaunäj Jesucrist rexpejn pacni galoo che gajdni guet. Abejn Pabl xhigab guira yääl guiriini guejdxga. Che biu' guxhijñ, gusloj cagusuleduxh Pabl xtidx Dios, huinuuni si'cti garolyäälli. ⁸ Yu' cadre bidxagsa'nu najc jiaa yejc stiop yu'. Xhidalduxh balgandeel cagusanij ro'c. ⁹ Sobga' te bi'n ni laa Eutico ro' te bentaan. Lañ ni cagusuleduxh Pabl xtidx Dios lo rebejn, gunaaz bacal bi'nga, gudiejsni, bitejbni lo yuj desde yu' ni riojn pis. Che huiläsrenini, agujtni. ¹⁰ Dxejcti biäjñ Pabl lo yuj cadre bitejb bi'nga. Bazuxhijb Pabl cadre naga' bi'nga, gudäznini. Dxejcti räjp Pabl lojreni:

—Na'c chutu yärsia'. Agubañsacni. Baspajñ Diosni.

¹¹ Dxejcti huäpsac Pabl lo yujiaaga. Ro'c bidaunu yätxtiil si'c gudaunäj Jesucrist rexpejn pacni galoo che gajdni guet. Gunii Pabl lojreni xchejru, che bianijli lo guedxliuj. Dxejc biunejzñi. ¹² Xhetliidiru rajcñi bi'nga nani gubañsac, nani guläs Pabl. Bibalazduxhreni, huisa'nrenini rolijzñi.

Biu'nu neñ barcw, bionnu guedx Mileto

¹³ Gunijdnu lo Pabl. Biu'nu neñ barcw, sonnu guedx Asón, te ro'c guidxaagu Pabl, sa'csi abejñ Pabl xhigab ni'ni jiini guejdxga, ro'cli jiu'ni neñ barcw. ¹⁴ Che bidxaag Pabl nuunu guedx Asón, biu'ni neñ barcw, sonnu lo nisdoo te bidzunu guedx Mitilene. ¹⁵ Neñ barcw biriinu ro'c. Che bara yääl, gudejdnu yuj ni re' lo nisdoo ni laa Quío. Che bara stee yääl, bidzunu guedx Samos. Guedx Trogilio basilaaznu. Che bara stee yääl, bidzunu guedx Mileto. ¹⁶ Di rlanj Pabl jiu'nu guedx Éfeso, diza rlanjni chunu Asía xchej, sa'csi riojb lajzñi guidzunu guedx Jerusalén te ro'c tedni redxe lanij ni laa Pentecostés.

Guedx Mileto guninäj Pabl reni rnibee xpejn Jesucrist ni yu' guedx Éfeso

¹⁷ Che guyu'nu guedx Mileto, baxhañ Pabl diidx lo rexpejn Jesucrist ni yu' guedx Éfeso, gurejdxñi reni rnibee. ¹⁸ Che bidzujñreni lo guejdxga, räjp Pabl lojreni:

—Lagajc la'tu najntu xho nabañä nez lojtu, dxejli ni bidzunä, nabannää Dios. ¹⁹ La'tu najntu xho runä xtzuun Jesucrist guixe-guixee, guideb xcälñadipä. Dina niliä'p ä xpala'nä. Najntu xho ronä che di bejn chalilajz xtidx Jesucrist. Che rlanj rexpejn Israel nugu't narä, gudedä trabajwduxh. ²⁰ La'tu najntu xho baluiä lojtu guiralii rextidx Dios ni najc huen par la'tu. Che nadxagsa'tu baluiä xtidx Dios lojtu, näjza rolijz cade tejtñ huiluiä xtidx Dios lojtu. ²¹ Basule'ä xtidx Dios lo rexpejn Israel näjza lo rebenzijt ni di gac xpejn Israel. Röpä lojreni nanab gusiechlajzreni, gusa'nreni xtojñreni, nanab chalilajzreni xtidx Jesucrist te gudzucaj Dios xtojñreni. ²² Naj cadedä te laad guejdx xtentu, sia'ä guedx Jerusalén, sa'csi caguxhañ Sprit Dxan xten Dios narä cha'ä guedx Jerusalén. Dina ganä xhi sacä ro'c. ²³ Niluxh nanä cade tej reguejdx cadre rdedä rnii Sprit Dxan xten Dios loä sidedä trabajwduxh, siäuä neñ latzguiib guedx Jerusalén. ²⁴ Niluxh dina guidxebä, dizana chanälazduxhä xcälñabañätis, te guluxä dzuun nani baniidx Jesucrist

gunä. Lo dzuun ni baniidx Jesucrist nanab chaye'tzä lo guiraa rebejn sibicaj xtojłreni palga chalilajzreni xtidx Dios xcuent Jesucrist —räjp Pabl.

²⁵ Räjpzani:

—Naj agucebä dirutu fisac loä, la'tu nani basule'ä xcälrnibee Dios lojtu. ²⁶ Rniliäpac lojtu, xhet dojłdi rapä palga yu' te bejn ni di chalilajz xtidx Dios, ni di Dios gudzucaj xtojłni. ²⁷ Xhetliidi biäädxdı loj rextidx Dios ni basule'ä lojtu. Dina nucua'tzä nicla tej xtiidxni xcuent xho rlajz Dios guibañnu. ²⁸ Colga'p lagajc la'tu si'c ra'p baxhtoor xiil, si'c colga'p guiraa rebejn nani rililajz xtidx Dios sa'csi Sprit Dıan xten Dios abaniidx dzuunga guntu, ni'cni abixe' xtiejn Jesucrist lo cruzj te gac gudzucaj Dios xtojłreni. ²⁹ Anancheä che rutdiru narä, siäd bejn nani rlajz chalilajzı ste'ca diidx, na'c chalilajzı niclaza jıutu rebejnğa. Rusgueetisreni la'tu. Sutie'chreni la'tu lo sa'tu si'c rutie'ch cuyo't rexiil. ³⁰ Su'za lagajc sa'tu ni guinii didx-xhii lojtu te gunreni gusaan rexpejn Jesucrist xtidx Dios, te chanajłreni redee ni rusguee. ³¹ Colhıui te di gusgueereni la'tu. Di jıäl-lajzı choñ ijz, dxej yääl basule'ä xtidx Dios, ronäli balıdxätu, sa'csi sanälazätu.

³² Räjpa Pabl:

—Asia'are, rusa'nätu ladznäa Dios, gacnäj Dios la'tu. Sutıjp xtidx Dios lastootu, te xca'tu guiraa ni bia'n diidx guniidx Dios lojtu, näjza loj guiraa ni abejn Dios beñsa'c, nani najc xpejnı. ³³ Dina niniabä meel, niclaza xhabä che baluiä xtidx Jesucrist lojtu. ³⁴ Anajntu lagajc narä benä dzuun con ñä te bio' xhi gudaunäa reexamıgwä. ³⁵ Si'c benä te filojtu xho guntu dzuun te gacnäjtu sa'tu ni xhet rajpdi, te guınaj lajzı xtidx Jesucrist che najni: “Huenru guıeednu lo bejn quela xcaxlia'nu xhi cos” —räjpni.

³⁶ Che gulujx gunii Pabl rediidxga, bazuxhibnäjni rebejnğa, guredx-gunabni lo Dios. ³⁷ Dxejcti ronduxh guıraareni gudäazreni guejn Pabl, bachagro'renini. ³⁸ Guc-huınduxh lajzreni dxejc sa'csi räjp Pabl dirureni fisac lojni. Dxejcti huısa'nrenini lo barcw.

21

Huij Pabl guedx Jerusalén

¹ Che basa'tınu rexpejn Jesucrist ro'c, biu'nu neñ barcw, sionnu te lii nejz lo yuj ni laa Cos, ni tre' lo nısdoo. Che bara yääl, bidzunnu lo xyuj Rodas ni tre'za lo nısdoo. Ro'c biriınu sionnu neñ barcw nez guedx Pátara.

² Che bidzunnu ro' guejdxga, bidxälnu te barcw ni sää nez reguedx Fenicia. Dxejc biu'nu neñ barcwga te chonnu ro'c. ³ Bahuiınu lo yuj Chipre ni tre' lo nısdoo, xladbäjcwınu tre' yujga, bıeednu te laad. Sıontınu nez Siria, ro'c bidzunnu guedx Tıro cadro gule'creni cargw ni nuu barcwga. ⁴ Ro'c bidxälnu rexpejn Jesucrist. Biannänureni gajdz dxej. Baluii Sprit Dıan xten Diosreni te guniıreni lo Pabl, räjpreni:

—Na'c chäälu guedx Jerusalén.

⁵ Che baza' gajdz dxej, biınejznu guejdxga. Dxejc guzaj renıguıı, regunaa, näjza rexi'nreni biriınu guejdxga. Ro' nısdoo bazuxhıjbnu te guredx-gunabnu lo Dios.

⁶ Che abazadiidxnu sa'nu, nuure biu'nu neñ barcw, biädla laareni gıbisacreni rolıjzreni.

⁷ Biriıtinu guedx Tıro. Che bidzunnu ro' guedx Tolemaıda, gulujx xpıajnu biäjtnu neñ barcw. Dxejc bıohuiınu rexpejn Jesucrist ni yu' guejdxga, biannänureni tejtis yääl. ⁸ Che bara yääl, biriınu guejdxga, sonnu guedx Cesarea. Che bidzunnu guejdxga, bıonnu rolıjz Felipe, te dade' ni rusule' xtidx Dios lo bejn. Felipe gujc tej lo gajdz nıguıı nani gudis xhi gudajw rexpen

Jesucrist nani xhet rajpdi guedx Jerusalén. Rolijzni huijia'nnu. ⁹ Yu' tajp xindxapxteb Felipe. Dios badeed diidx guiniireni lo bejn. ¹⁰ Xhidajl dxej guläjznu roliz Felipe. Laḷ ni dxunnu ro'c, bidzujn te niguii ni laa Agabo, biriini nez Judea. Ruzanij Dios xcäriejnmi te guiniini xtidx Dios.

¹¹ Che bidzujn ni loonu, cua' Agabo xsindoor Pabl, baliibni lagajc reni'ni näjza reñaani, najni loonu:

—Anaj Sprit Dxan xten Dios: “Scree suliib rexpejn Israel ni yu' guedx Jerusalén niguii ni najc xtenni sindoorre te guteedrenini ladzḡaa rebenzajt.”

¹² Che biejn diaagnu rediidxga, nuure näjza reben ro'c, gunabduxhnu lo Pabl na'c chääni guedx Jerusalén. ¹³ Dxejc naj Pabl loonu:

—¿Xhicuent roontu? ¿Xhicuent runhuiintu lazä? Xhet najcdi jiäuä nen latzguiib, xhet najcdi palga nungälä guetä guedx Jerusalén xcuent Jesucrist —räjp Pabl.

¹⁴ Che naaddi Pabl gusiechlajzni, xhetru guniidinu lojni. Räjptisnu lojni:

—Sugac nani rläjztis Dios.

¹⁵ Che gudejd redxejga, bilucheenu rehxixtenu, biriinu guejdxga, sontinu guedx Jerusalén. ¹⁶ Gaii rexpejn Jesucrist ni najc beḡ Cesarea huisa'n nuure guedx Jerusalén. Ro'c huinäreni nuure roliz te dade' ni laa Mnasón, beḡ Chipre, yuj ni tre' lo nisdoo. Laani galooli huililajzni xtidx Dios. Huijia'nnu rolizni, ro'c gulääznu.

Huihui Pabl Jacob

¹⁷ Che bidzunnu guedx Jerusalén, bibalazduxh rexpejn Jesucrist sa'csi siopnu ro'c. ¹⁸ Che bara yääl huinänu Pabl lo Jacob näjza lo renani rnibee guidoo xten rexpejn Jesucrist. ¹⁹ Dxejc gudääz Pablreni, bijni diidx xcuent tebgaj redzuun nani badeed Dios bejnmi che guyunäjni rebenzajt nani di gac xpejn Israel, te biejn diajgreni xtidx Dios. ²⁰ Che biejn diajgreni xtidx Pabl, gulä'preni xpala'n Dios, räjpzarenmi lo Pabl:

—Guejblu, sa'nu, anajnlulacti xhidalduxh xpejn Israel yu' nani rililajz xtidx Jesucrist luxh rapdaduxhreni leii xten toMoisés. ²¹ Abiejn diajg rebejnre xcuentlu. Abiejn diajgreni garenca ruluiilu guiraa rexpejn Israel nani rbäjz nen reguejdx xten rebenzajt, ruliidxlurenmi na'c gusälrenmi bee rexi'nrenmi, na'cza chazanäjrrurenmi rexcostumbrnu. ²² ¿Xhini'c jiennu? Siejn diajgreni abidzujnlu ree, dxejc suchagsa'renmi te jiädrenmi lojlu. ²³ Naj gunlu nani guiniinu lojlu. Yu' tajp resa'nu ree nani basa'nrenmi diidx lo Dios. ²⁴ Huinärenmi, näjza luj bejn si'ctis gunrenmi si'c ni caj lo leii xten toMoisés, te gaclu naya nez lo Dios. Luj quiixlu guiraa ni banijtrenmi, te che abasa'tu guiraa ni nanab gac sajg guigaj yejctu si'c te seen te gachee guiraa rebejn abasoobtu leii. Dxejcti gan guiraa rebejn didx-xhii najc rediidx ni biejn diajgreni xcuentlu. Te gacheerenmi laaca rusooblu xleii toMoisés. ²⁵ Biädla rebenzajt nani huililajz xtidx Jesucrist, xhet najcdi, sa'csi abacuaanu lojrenmi, rie'tznu lojrenmi: na'c gautu recos nani gule'c bejn si'c gojn loj banäjb, na'c gautu rejn, niclaza bääḷ nani gurerejn, na'c guesnäjt nani di gac chäältu.

Gunaaz rexpejn Israel Pabl

²⁶ Che bara yääl, huinä Pabl guidap niguiiga, bejnrenmi si'c caj lo xleii toMoisés, biu'renmi nen xquidoo rexpejn Israel te huiye'tzrenmi lo bixhojz nen guidoo xhi dxej jiädnä tejpgarenmi te man te ju't rebixhojz remanga lo Dios.

²⁷ Si'c nanab gunrenmi gajdz dxej. Che ameer guiza' redxejga, bahuii rexpejn Israel ni siädä Asia lo Pabl nen guidoroga. Gunaazrenmi Pabl, dxejcti gusloj cayujnrenmi biejy, ²⁸ guredxa'renmi räjprenmi:

—¡Coltaa xpejn Israel! ¡Coltaa te gacnäjtü nuure! ¡Bahuilaare! Niguiire najc nani rniyaj rexpejn Israel cadrotis rijni. Rulijdxni bejn te di chazanäjrureni xleii toMoisés, riye'tzni lo bejn xhet sajcdi xquidoronure. Colhuilaa xho siädnäni ree bejn griegw, benzijt ni di gac xpejn Israel, te gundxuudxni xquidoronu —räjpreni.

²⁹ Si'c caniireni sa'csi te huält bahuiireni sanä Pabl Trótimos lo nezyuj. Trótimos najc te benzijt ni siääd guedx Éfeso. Naj cayujnreni xhigab laa niguiiga ni siädnä Pabl nejn xquidoro rexpejn Israel.

³⁰ Guideb guejdxga guyu' yärsia', bire' beñguixhuj, bixa'treni yejc Pabl, gunaazrenini, gudobxhaxhreni Pabl, gulägajcneni nejn guidoroga. Biäugajc repuerto xten guidoro. ³¹ Lal ni cayujnreni xhigab ju'trenini, yu' chu huiye'tz lo nani rnibee resoldaad ni caya'p guejdxga, räjpreni:

—Cayajc te bieiduxh nejn guejdxre.

³² Guredxgajc comandant resoldaad näjza gaii capitán, ruxunreni bidzujnreni cadre tre' rebejn. Che bahuii rebejn lo comandant näjza resoldaad, guläzj caguijnreni Pabl. ³³ Dxejcti gubig comandant lo Pabl, gunibeeni baliib resoldaad naa Pabl con tiop cadenguuib. Dxejcti gunabdiidxni lo Pabl, räjpni:

—¿Chu luj? ¿Xhini'c bejnlu?

³⁴ Lo rebejn xhidaalga yu' rexpejn Israel ni guredxa' tej diidx, yu'za reni guredxa' ste'ca diidx. Di comandant niujn gan niacbeeni xhicuent cayajc biey sa'csi cabedxa' guiraa rebejn. Dxejc gunibeeni chanä resoldaad Pabl cadre rbäzreni. ³⁵ Che bidzunäj resoldaad Pabl ro' scaleer ni caj ro'c, biireni Pabl te bejnreni gan biunäjreni Pabl, sa'csi nialazduxh rebejn rlazjreni nugu'treni Pabl.

³⁶ Siädnajl guiraa rebejn Pabl, rbedxa'reni:

—Colgugu'tni.

³⁷ Che agojl jiu' Pabl nejn yuro xten resoldaad, räjpni lo comandant con diidx griegw:

—Rlazä guiniä tiop diidx lo guejblu.

Räjp comandant lo Pabl:

—¡An rniilu xtidsaä! ³⁸ An dilu gac niguii ni siääd nación Egipto, nani gudilnä j gubier, nani huinä lo reyubijdz tajp mil niguii nani rugu't bejn.

³⁹ Dxejc räjp Pabl lojni:

—Narä nacä te bejn Israel, te bejn Tarso xten Cilicia. Sacduxh guejdxga lo reguedx Cilicia. Canabä gun guejblu te hueen, gusaan guejblu guiniä lo rebejnre.

⁴⁰ Dxejc cuäjb comandant guinii Pabl lo rebejn. Lal ni suga'ni lo scaleer basäab Pabl naani lo rebejn te gucdxireni. Che aguredxi rebejn, gusloj Pabl canii lojreni didxsaj hebreo, räjpni:

22

¹ —Guejbtu beñgool, guejbtu resa'ä, näjza la'tu dade'. Gucudiajgtu rextidxä —räjpni.

² Che biejn diajgreni caniini didx hebreo, dxidujru guzuj rebejn. Räjp Pabl lojreni:

³ —Narä nacä te xpejn Israel. Guedx Tarso xten Cilicia golä. Reepac gulaä. Lo Gamaliel bisiedä guijtz. Baluisa'cni narä guiragajc releii xten retoxtad-goldoonu. Guideb xtipä basobä ni gunibee Dios. Gucä si'cpac ni najctu naj. ⁴ Dxejcti bidxechduxhä loj renani huililajz xtidx Jesucrist, bagu'tazareni. Balibä xhidajl bejn, niguii näjza gunaa, con cadenguuib. Basäuäreni nejn

latzguiib. ⁵ Bixhojz ni sajcrü näjza guiraa rebeḡool ni sajcrü neḡ xquidootu, sajç guinii xhini'c benä. Laareni baniidxreni guiitz loä. Ni'c huinää lo rexpejḡ Israel ni yu' guedx Damasco, cadre hua'a te niniazä rebejḡ nani huililajz xtidx Jesucrist. Benä xhigab jiädnääreni guedx Jerusalén te jiäuren i neḡ latzguiib, te gusacsíreni rebejḡga.

*Gunii Pabl xho huililajz ni xtidx Jesucrist
(Hch. 9:1-19; 26:12-18)*

⁶ Räjzani:

—Dxejç hua'a guedx Damasco. Läidxejti ameer guidzunä guejdxga, chela bazanij te balro guideb gabi narä. Xhaguibaali siäd bajlga. ⁷ Biabrloä lo yuj, dxejç biejn diagä te se' ni canii loä, najni: “Saulo, Saulo, ¿xhicuent rusacsílu narä näjza rexpeḡä?” najni. ⁸ Dxejçti räpä lojni: “¿Chuluj, Dad?” Najni loä: “Narä nacä Jesucrist ni siäd Nasare't, nani cagusacsíduxhlu.” ⁹ Rebejḡ ni sanää bahuiloj bajlga, bidxejbreni, niluxh di diajgreni niejn xse' nani gunii loä. ¹⁰ Räpä lojni: “Dad, ¿xhini'c gunä?” Dxejçti najni loä: “Huistie, huij guedx Damasco. Ro'c sinii te dade' lojlu guiraa ni guinibeä gunlu.” ¹¹ Bastujxh bajlga loä, diru loä nieḡ, ni'cni gunaaz resa'ä ḡä, sontinu guedx Damasco.

¹² Räjç Pabl:

—Guejdxga guläz te niguii ni laa Ananías. Rusoobni guiraa releii xten toMoisés. Guiraa rexpejḡ Israel rnii nadalajz lo dade'ga. Biäd Ananías loä. ¹³ Cuä'ä guzujni najni loä: “¿Saulo, betzä, bahuisac!” Lagajç dxejç biajç loä, bahuiä lojni. ¹⁴ Naj Ananías loä: “Xtios retoxtadgoldoonu agulelu. Gule Dios luj te jiejn diajglu rediidx ni rlanjz ni gunlu, te filojlu Jesucrist, Xindxan Dios, te jiejnza diajglu rextiidxpac Jesucrist. ¹⁵ Loj guiraa bejḡ susule'lu guiraa ni bahuiilu näjza nani biejn diajglu. ¹⁶ ¿Xhicuent sojbtislu ro'c? Basquejḡ, huistie te tiobnislu. Huililajz xtidx Jesucrist, gurejdx lo Dios te gudzucajni rextojllu.”

Gunii Pabl xhicuent baluiini xtidx Dios lo rebenzijt

¹⁷ 'Che gubi'ä guedx Jerusalén, biu'ä neḡ guidoro xten rexpejḡ Israel te guredx-gunabä lo Dios. Laḡ ni cabedx-canabä lo Dios, astoo gunixcalä, ¹⁸ dxejç bahuiä lo Jesucrist. Najni loä: “Basquejḡ, birii guedx Jerusalén sa'csi di rebejḡ chalilajz xtidxä ni gusule'lu lojreni.” ¹⁹ Narä räpäza lojni: “Dad, anajnreni xho biu'ä guiraa reguidoo, gunazä guiraa rebejḡ nani huililajz xtiidxlu, gudinduxhäreni, basäuäreni neḡ latzguiib. ²⁰ Che bacuaaren i gui jyejç Esteban nani gunii xtiidxlu, ro'c guzuä, cuäbä bejnreni si'c. Go'pä xhajb xten renani bagu't Esteban laḡ ni bacuaaren i gui j.” ²¹ Dxejçti naj Jesucrist loä: “Huij. Suxhalä luj zitduxh. Chäälu lo guiraa rebenzijt ni di gac xpejḡ Israel.”

Bia'n Pabl neḡ rolijzro xten resoldaad

²² Bacuadiajç guiraa rebejḡ laḡ ni gunii Pabl rediidxga, dxejçti guredxa'reni, räjpreni:

—Colgu't niguiiga. Di nunyäjḡ guibajḡruni.

²³ Sanuutis cabedx'a'reni. Gulääreni xcamangwreni, cacuaazaren i yuyol jiaa. ²⁴ Dxejçti gunibee comandant lo resoldaad, räjpni:

—Colchanä Pabl neḡ yuro xtennu. Ro'c colquiin Pabl te guiniini didxgulii, te gabeenu xhicuent rbedxaduxh rebejḡ lojni.

²⁵ Sanätireni Pabl. Entis baliibreni ni', ḡä Pabl con duguijd te niguijnrenini che gunabdiidx Pabl lo capitán, räjpni:

—¿La rajç rguijntu te beḡ roman che gajdtu gacbee xhi dojḡ bejn i, ä? Et si'cti caj lo xleiilu.

²⁶ Che biejn diajç capitán xtiidxni, bidxejbni, huijni lo comandant, räjpni lojni:

—Colnati xhi gunnäjlu dade're, sa'csi najcni beṅ roman.

²⁷ Biädguxun comandant lo Pabl, räjpni:

—¿La guli najclu beṅ roman, ä?

Räjp Pabl lojni:

—Guliini.

²⁸ Dxejcti räjp comandant:

—Narä badedä xhiroob meel te nacä beṅ roman.

Dxejcti räjp Pabl lojni:

—Narä che goläli nacä beṅ roman.

²⁹ Che biejn diajg resoldaad nani niguijn Pabl si'c, baslagajcreni reduguijd ni naliib ni', naani. Che biejnza diajg comandant najc Pabl beṅ roman, bidxejbni sa'csi gunibeeni biliib Pabl.

Basule' Pabl diidx xcuentni lo rebixhojz nani rnibee rexpejn Israel

³⁰ Che bara yääl, rlajz comandant gacbeeni xhicuent rlajz rexpejn Israel ju't Pabl. Ni'c gunibeeni jääd rebixhojz ni sajcro näjza reguxhtis xten guidoro. Dxejcti biädnäni Pabl, bazujnini nez loj guiraa rebejn ni bire' ro'c.

23

¹ Rdxelodzu'tz Pabl lo rebejn ni tre' ro'c laṅ ni räjpni lojreni:

—Narä gusule'ä tiop diidx lo guejbtu, beṅ Israel, sa'ä. Guideb ni nabaṅä ruzobä xtidx Dios. Di lastoä guidxejb nez lo Dios —räjp Pabl.

² Che biejn diajg Ananías, bixhojz ni sajcro, xtidx Pabl, bidxechduxhni, gunibeeni lo renani suga' gajxh lo Pabl ca'preni ro' Pabl.

³ Räjp Pabl lo Ananías:

—Sigajcza ca'p Dios ro'lu, beṅguijdx. Ro'c sobga'lu te gunlu yälguxhtis si'cni caj lo leii. ¿Xhicuent rujnlu nani rnii leiiga di nungäjl gun bejn? ¿Xhicuent gunibeelu guda'preni ro'ä? —räjp Pabl.

⁴ Reni suga' cuä' Pabl räjp lo Pabl:

—¿La dilu gacbee laa bixhojz ni sajcro xten Dios? Na'c guiniyajluni.

⁵ Dxejcti räjp Pabl lojreni:

—Rexamigwä, dina niacheä caniä lo bixhojz ni sajcro, sa'csi nanä agunii Dios: “Na'c guiniyajlu reni rnibee xpejnlu.” Si'c caj lo guiitz ni bacuaa reni gunii xtidx Dios.

⁶ Gucbee Pabl tiop cuaa najc reni tre' ro'c. Yu' reni najc beṅ saducee, yu'za reni najc beṅ farisee. Dxejc guredxa' Pabl räjpni lojreni:

—Sa'ä, narä nacä te beṅ farisee, xi'nza te beṅ farisee narä. Rililazä sibansac bejn lo rebeṅgut, ni'c cabe'creni xquejä ree.

⁷ Entis guniini si'c lojreni, chela gusloj caniireni lo sa'reni. Tiop cuaa gujcreni, gala' refarisee, sgala' resaducee. ⁸ Di lajz resaducee chalii sibansac rebeṅgut, dizareni chalilajz yu' rexangl Dios, dizareni chalilajz yu' aim xten bejn. Niluxh refarisee rililajz guiraa rediidxga. ⁹ Guyu' te bieiro. Dxejcti huisulii gaii farisee nani najn leii, gusloj caniduxhrene, räjpreni:

—Di niguiire gac beṅguijdx. Palga gunii te angl xten Dios o te togool lojni, alga Dios tilnäjnu, dxejc sidxechnäj Diosnu.

¹⁰ Che gusloj cabedxaduxhrene lo sa'reni, bidxejb comandant, andi ju'treni Pabl, caxha'treni yejcn. Dxejcti gunibeeni biäjt resoldaad cadre suga' Pabl. Guideb xtijpreni gulääreni Pabl galäii rebejn ga huinäsaacreni neṅ yuro xtenreni.

¹¹ Che biu' guxhijn, baluiloj Jesucrist lo Pabl, guzujni cuä'ni, räjpni lojni:

—Batijp lajzlu, na'c guidxejblu, Pabl. Si'cni basule'lu xtidxä guedx Jerusalén, sigajcza nanab gusule'lu xtidxä guedx Roma.

Rexpejn Israel bejn xhigab nugu'treni Pabl

¹² Che bara yääl, bachagsa' gaa xpejn Israel, bejnreni xhigab nugu'treni Pabl. Räjpreni lo sa'reni:

—Na'c guidaunu, na'cza guidaunu nis che guigu'tlinu Pabl —räjpreni.

¹³ Si'cti tiuu niguii bia'n diidxga. ¹⁴ Bidzujnreni lo rebixhojz näjza rebengool, räjpreni lojreni:

—Abia'nnu diidx, xhet guidaudinu, xhetza guidaudinu palga dinu guigutx-gaa Pabl —räjpreni—. ¹⁵ Naj la'tu näjza guiraa rebengool ni rnibee rexpejn Israel, colguxhal diidx lo comandant te guixee jädnäni Pabl lojtu. Colyejn si'c ni rlajztu jiejnru diajgtu diidx xcuent Pabl. Che jädnä comandant Pabl ree, nuure sugu'tnuni lo nezyuj che gajdni guidzujn ree —räjpreni reniguiiga.

¹⁶ Niluxh biejn diajg xi'n bisiajn Pabl cabäzxhiga'tz reniguiiga te ju'treni Pabl, huijni royuro xten resoldaad. Che bidzujn, biu'ni räjpreni lo Pabl rediidx ni biejn diajgni. ¹⁷ Dxejcti gurejdx Pabl te capitán, räjpreni lojni:

—Huinälaa bi'nre lo comandant te gäbni te diidx lojni.

¹⁸ Huinäti capitán bi'nga lo comandant, räjpreni lo comandant:

—Pabl, nani niäu nen yuro xten resoldaad, gunab loä jädnälaä bi'nre lo guejblu te guiniini te diidx lo guejblu —räjpreni.

¹⁹ Dxejc gunaaz comandant naa bi'nre, huinäni te laad cadro rut jiejni diajgni xtiidxreni, dxejc räjpreni lojni:

—¿Xhini'c rlajzlu guiniilu loä?

²⁰ Dxejc bazejcn diidx, räjpreni loj comandant:

—Abia'n te cuaa xpejn Israel diidx siniabreni lo guejblu jädnä guejblu Pabl ro jusgaad guixee. Sujnsireni si'c ni rlajz jiejnru diajgreni diidx xcuent Pabl.

²¹ Na'c chalilajz guejblu xtiidxreni. Tiu niguii sibäzxhiga'tz cuä' nezyuj te ju'treni Pabl. Abia'nreni diidx direni gau, dizareni yä palga direni jutxgaa Pabl. Naj cabäzjtisreni guxhal guejblu diidx sinä guejblu Pabl ro jusgaad.

²² Che biejn diajg comandant diidxga, basaanni sii bi'nga rolijzni, rəpxgaani lojni:

—Rut lojdipac gäblu guniilu diidxre loä.

Huij Pabl lo Pels ni najc gubernadoor

²³ Dxejcti gurejdx comandant tiop capitán, räjpreni lojreni:

—Colgutojp tiop gayuu soldaad, chää guedx Cesarea näjza gayonbitzuo soldaad ni bijb cabaii, näjza tiop gayuu soldaad ni ca' spaad. Rcagaa guxhijn guiriireni ree. ²⁴ Colquiil tiop cabaii cuib Pabl te xhet gacdi Pabl cheni chanätuni lo gubernador Pels —räjpreni.

²⁵ Dxejcti bejn comandant te guiitz chanäreni lo gubernadoor.

²⁶ Loj guiitzga rnii scree: “Gubernador Pels, nani sacduxh. Narä, Claudio Lisias, ruxhalä xtixtios lo guejblu. ²⁷ Rediidxre rucuaä lo guejblu. Gunaaz rexpejn Israel niguiire, luxh paru dina nidzunga'cä con resoldaad, nugu'treni. Che guceä najcni bejn roman, guläänuni ro'c. ²⁸ Rlazä ni-aceä xhi quej rbe'creni, ni'c huanääni lo junt xten rexpejn Israel ni rnibee guidoro. ²⁹ Dxejc guceä requej ni rbe'creni najc ganax xcuent leii xtenreni, niluxh xhet bejndini te nungäj guetni, niclazä nanab jäuni nen latzguiib.

³⁰ Che baxhalreni diidx loä cabäzxhiga'tz rexpejn Israelni te ju'treni dade're, baxhalga'cäni lo guejblu. Agunibeäza jädle'c rexpejn Israelre xquejreni lo guejblu. Ni'ctis rniä lo guejblu”, si'c caj lo guiitz ni bejn comandant.

³¹ Che biu' guxhijn, huixii resoldaad Pabl sanäreni guedx Antípatris si'cni gunibee comandant gunreni. ³² Che bara yääl, gubi' resoldaad nani guzaj ni'reni. Resoldaad ni bijb cabaii guzanäj Pabl guedx Cesarea. ³³ Che bidzujn

redes Cesarea, badeedreni xquijtz comandant lo gubernadoor, huinázareni Pabl lojni te biembeenini. ³⁴ Che gulujx bilni guijtzga, gunabdiidxni lo Pabl:

—¿Caro siáadlu?

Che gucbeeni siáad Pabl Cilicia, ³⁵ rájpní lo Pabl:

—Guidzujnsi rexpejn Israel ni cadxechnáj luj, sucuadiaggacá xtiidxlu —rájp gubernadoor.

Gunibeeni ga'p resoldaadni neñ yuro xten Herodes.

24

Gunii Pabl xtiidxni lo Pels

¹ Gudejdti gaii dxej, dxejc bidzujn Ananías, bixhojz ni sajcro, nájza gaii rebengool xten guidoro, nájza te dade' ni laa Tértulo ni gunii xcuentreni. Gusloj cabe'cni xquej Pabl lo gubernadoor. ² Che biädnäreni Pabl, gusloj Tértulo cabe'c xquej Pabl lo gubernadoor. Rájpní lo gubernadoor:

—Xquixtioste guejblu dxiduxh nabañnu. Cayacnäduhx guejblu laadxnu con redzunsacduhx ni cayujn guejblu. ³ Xquixtiosduhx guejblu, gubernadoor Pels, xcuent guiraa redzunsac'c ni rujn guejblu guira nejz. ⁴ Luxh na'cru gusieednu guejblu, gucuadiaglaa guejblu tiop diidx. ⁵ Agucbeenu xho najc niguiire. Benguidxduhxni. Cadrotis rijni rujnni biey lo rexpejn Israel. Laani rnibee te cuaa ni laa nasareñ, nalajznu rebejn nani rililajz xtidx Jesucrist ni biáad guedx Nasare't. ⁶ Rlajzlini nuxhiñni xquidoronu, ni'c gunaaznuni. Niennu te junt te lagajc nuure niennu yälguxhtisni si'cni caj lo xquijtznu. ⁷ Niluxh bidzujn comandant Lisias nájza resoldaad. Diptis badzucajreni niguiiga ladzñaanu. ⁸ Laani gunibeeni lo guejblu jiáad reni rbe'c xquejni. Naj lagajc guejblu saj guiniabdiidx lojni te gacbee guejblu guli guiraa requej nani rbe'cnu xcuentni —rájp Tértulo.

⁹ Dxejcti guiraa rexpejn Israel ni suga' ro'c rájp guliica xtidx Tértulo. ¹⁰ Dxejcti bejn gubernadoor seen lo Pabl te guiniini. Baze'c Pabl diidx, rájpní lojni:

—Rbaaliza lazä guze'cä diidx lo guejblu, sa'csi anana agujc xchero lacti huen rujn guejblu yälguxhtis nación Israelre —rájp Pabl—. ¹¹ Gutzbitio'p dxejtis bidzunä guedx Jerusalén te saganä Dios. Najn rebejn xhi dxej biu'ä Jerusalén, guyasi guniidxreni diidx. ¹² Nicla tej dina nichagdila bejn neñ guidoro. Nicla tej dina niunä biey neñ reguidobäz, nicla ro nezyuj. ¹³ Agule'creni quej xtenä lo guejblu, niluxh nicla tej redzuunga dina niunä. Di gacdi guluipacreni lo guejblu guli najc xtiidxreni. ¹⁴ Rniliäpac lo guejblu: Ranä Xtios retoxtadgoldoonu. Jesucrist baluii xho gansa'cnu Dios. Rililazä rextiidxni. Xhidalduxh rexpejn Israel rniyaj xho basule' Jesucrist gan bejn Dios. Ruzobä guiraali releii xten toMoisés. Rililazä guiraa rextidx Dios ni bacuaa reni gunii xtidx Dios. ¹⁵ Rililazä xtidx Dios si'c rililajzza rebejnre xtidx Dios. Si'c ni najnreni, si'cza nanä sidzujn te dxej che guibañsac rebengut, rebenguijdx sigajc rebensa'c. ¹⁶ Ni'cni racbeä laaca nabañä guiraa dxej, di lastoä guidxeyb, nicla nez loj bejn niclaza nez loj Dios, sa'csi rut rajcdi guiliäs dixhii xcuentä.

¹⁷ Rájpní lo Pabl:

—Agujc xchej yu'ä zijt, lajdx garenca bejn, naj gubinää meel ni baxhal reben nejzga te gudedäni lo rebejn ni xhet rajpdi. Biädnääza gojn xtenä gudedäni lo Dios. ¹⁸ Ni'c sanää guidoro. Ro'c bidxäjl rexpejn Israel ni siáad Asia narä. Agucnayaä si'c ni rnibee xleiiinu. Xhet benxhidajldi suganää, xhetza bieydi cayunä. ¹⁹ ¿Con rebejnga naj? Te cue'creni quej lo guejblu palga yu' xhini'c rdxechnäjreni narä. ²⁰ O guiniiza redee palga yu' xhini'c et laadi

benä che suga'ä nez loj junt xten guiraa rebixhojz ni rnibee näjza rebengool lo guedx Jerusalén —räjp Pabl—. ²¹ Tejtis diidx guniä che suga'ä galäiireni, guredxa'a räpä lojreni: sa'csi rililazä sibansac guiraa rebejn lo rebengut, ni'c biädnätu narä lo rebejnre —si'c guniä lojreni.

²² Che biejn diajg Pels xtidx Pabl näjza sa'csi najne'ni xcuent diidx nani baluii Jesucrist, basoobni stee dxej guidxagsac sa'reni räjpni lojreni:

—Che jiädli comandant Lisias dxejc gunä yälguxhtis —räjp Pels.

²³ Dxejcti gule Pels te capitán ni rnibee te gayuu resoldaad ga'p Pabl. Niluxh räjpni lojni gusaanni gun Pabl nani rlanjzitsni gunni. Na'cza gudxojnni jiäd rexamigwni te fiireni lojni.

²⁴ Che gudejd balti dxej, gubi' Pels, biädnäni chäälni Drusila. Drusila najc beñ Israel. Dxejc gurejdx Pels Pabl te gusule'ru Pabl xtidx Jesucrist. ²⁵ Gunii Pabl xho nanab guibansa'c bejn nez loj Dios si'c ni gunibee Dios guibajn bejn. Nanabza gacbee bejn na'c gun bejn cos guijdx, sa'csi sidzujñ dxej gac Dios juejz loj guiraa rebejn te fiini xhi bejnreni. Racslesli Pels tant bidxejbni biejn diajgni diidxga. Räjpni lo Pabl:

—Huij naj. Sibedxsacälu che latä stee —räjp Pels.

²⁶ Naa Pels sudeed Pabl meel lojni te guslaanini, ni'c masru guet-guejt gurejdxnini te guninäjnini. ²⁷ Si'c gudejd tiop ijz. Dxejc birii Pels gubernadoor. Dxejcti biu' Porció Festo, gujcní gubernadorcoob. Niluxh Pels rlanjz chanälajz rexpejn Israelni, ni'c basa'nni niäusijc Pabl.

25

Gunii Pabl xtiidxni lo Festo

¹ Che biu' Festo gujcní gubernadorcoob xten reguejdxga, bia'nni guedx Cesarea choñ dxej. Dxejc biriini ro'c sääni guedx Jerusalén. ² Che bidzujñni guejdxga, rebixhojz nani rnibee näjza reniguii ni sajcro lo rexpejn Israel biäd lo Festo. Gusloj cabe'creni xquej Pabl lojni. Gunabduxhreni lo Festo ³ sa'csi rlanjzreni gunni te huen laareni, guinibeeni jädnäreni Pabl guedx Jerusalén. Si'c gunabreni, sa'csi abenxgaareni xhigab cuäzxhiga'tzreni te ju'treni Pabl lo nezyuj.

⁴ Dxejcti räjp Festo lojreni:

—Suniaü Pabl guedx Cesarea. Di gaclaa guibi'ä guedx Cesarea. ⁵ Suchää reniguii ni sajcro lo sa'tu guedx Cesarea, te ro'c cue'creni xquej Pabl loä, don la yu' xhi dzunguijdx bejnni —räjpni.

⁶ Che gudejd si'cti tzuu dxej, gubi' Festo guedx Cesarea. Che bara yääl, gurejni lo yagxhil xten gubernadoor, gunibeeni biäd Pabl lojni. ⁷ Che bidzujñ Pabl lojni, biäd rexpejn Israel nani biäd guedx Jerusalén ro'c. Guzujreni guideb gabi Pabl. Gule'creni xhidalduxh xquej Pabl, luxh di niajcdi nuluiireni guliipac xtiidxreni.

⁸ Dxejcti räjp Pabl lojreni:

—Nicla tej latsiaj dina niunä, dina niunä latsiaj loj leii xtenu, dizana niunä latsiaj lo guidoro ni sojb guedx Jerusalén, dizana niunä latsiaj loj xgubier César.

⁹ Dxejcti Festo, sa'csi rlanjzni guiliäsni xpala'nni loj rexpejn Israel, räjpni lo Pabl:

—¿La sisiajlu guedx Jerusalén te cue'c rexpejn Israel xquejlu ro'c nezloä, ä?

¹⁰ Dxejcti räjp Pabl lojni:

—Naj suga'a loj guejblu, ni gule reií César. Guejblu rnibee guiraa reguejdxre. Ree nungäjñ cue'creni xquejä lo guejblu, xhet guedx Jerusaléndi. Ananchee guejblu xhet latsiajdi benä lo rexpejn Israel. ¹¹ Palga nacä te

benguijdx, o palga yu' xhi latsiaj benä te nungäj] guetä, xho dina xcäbä guetä. Palga xhet latsiajdi benä nani canii rexpejn Israel benä, dxejc rutliidi sajc guteed narä ladznaareni. Suchale'creni xquejä lo César nani najc reii xten reben roman —räjp Pabl.

¹² Che guninäj Festo reguxhtis xten xquidoro rexpejn Israel, räjpni lo Pabl: —Luj gunablu chäällo loj reii César. Mbaj. Sijlu lo reii César —räjp Festo.

Huixiireni Pabl huinärenini lo reii Agripa

¹³ Che gudejd balti dxej, bidzujn reii Agripa näjza chäälno Berenice guedx Cesarea. Biädhuiireni gubernadoor Festo. ¹⁴ Che guyu'reni ro'c xchej, bij Festo diidx lo Agripa xcuent Pabl. Räjp Festo lojni:

—Ree niäusijc te niguii ni laa Pabl ni basa'n Pels. ¹⁵ Che guyu'ä guedx Jerusalén, rebixhojz ni rnibee näjza rebengool xten rexpejn Israel gule'c xquejni loä. Rlajzreni guinibeä guetni. ¹⁶ Röpä lojreni: “Di leii xten nación roman gusaan guet te bejn palga di bejn jädxgaa te guiniireni nez lojpacni xhi bejn niguiiga, te guzejcza niguiiga diidx xcuent requej, te guiniini la guliireni.” ¹⁷ Ni'cni che biäd rexpejn Israelga lo guejdxre, che bara yääl guregacä lo yagxhil xten gubernadoor. Dxejc gunibeä huixiireni Pabl guzuj nez loä. ¹⁸ Benä xhigab pet yu' xhi cosro bejn. Luxh che gusloj cabe'creni xquejni, gucbegacä xhet latsiarodi bejn Pabl. ¹⁹ Alga cadilnäjrenini xcuent xleiireni, xcostumbrreni. Guniizarenini xcuent te niguii ni laa Jesucrist. Agujtni, niluxh canii Pabl gubañsacni lo reben gut. ²⁰ Guxii nanä xcuent sa' diidxre, ni'cni gunabdidxä lo Pabl top sicäjbni chanääni guedx Jerusalén te ro'c cue'c rexpejn Israel xquejni. ²¹ Dxejc che gunii Pabl lojpac reii César chale'c rexpejn Israel xquejni, ni'c gunibeä jäusijcni la] ni gac guxhaläni lo César —räjp Festo.

²² Dxejcti räjp Agripa lo Festo:

—Narä rlazäza jiejn diagä xtidx niguiiga —räjp Agripa.

Dxejcti räjp Festo lojni:

—Guixee gucuadiajglu xtiidxni —räjpni.

²³ Che bara yääl, biäd Agripa näjza Berenice, luxh sucheduxhreni. Näjza recapitán ni sajcru näjza rebejn ni sajcru lo guejdxga biu'reni nen yuro xten Festo. Dxejc gunibee Festo biäd Pabl. ²⁴ Dxejcti räjp Festo lo guiraa reni re' nen yuro:

—Reii Agripa näjza guiraa rebejn ni tre' ree, colcuadiajg. Colhuii lo niguiire. Reni rnibee xpejn Israel guedx Jerusalén näjza guejdxre agule'c xquejni loä, canabduxhreni guetni. ²⁵ Niluxh narä rchaloä xhet bejndini te nungäj] guinibeä guetni. Luxh lagajc laani gunabni chääni te gac César juejz lojni, ni'c runä xhigab guxhaläni lojni. ²⁶ Naj dina ganä xhini'c gucuaä lo guijtz te guxhaläni lo César ni rnibee narä. Ni'c biädnää niguiire nez lo guiraatu, ganid nez loj guejblu, reii Agripa, filaa guejblu te gaxäjsi che aguiniini xtiidxni lo guiraanu, sidxälä xhi diidx gucuaä lo guijtz ni chää lo César. ²⁷ Narä runä xhigab di nungäj] guxhalä niguiire ni niäu latzguiib lo César palga di gacdi gusule'ä xhi quej xcuentni cabe'c rexpejn Israel loä.

26

Gunii Pabl rextiidxni lo reii Agripa

¹ Dxejcti räjp Agripa lo Pabl:

—Gunilaa xtiidxlu loonu.

Dxejcti guläs Pabl naani, gusloj cagusule'ni diidx lojreni. Räjpni:

² —Reii Agripa, rbalazduxhä sa'csi sajc gusule'ä diidx lo guejblu, sa'csi naj suze'cä diidx xcuent guiraa requej ni gule'c rexpejn Israel. ³ Sa'csi guejblu

nanduxh xcuent guiraa releii xten rexpejn Israel. Najnza guejblu xhicuent rdxagdijl sa'reni. Ni'c rniabduxhä na'c jieed guejblu gucuadiaglaa guejblu guiraa rextidä.

⁴ Räjpa Pabl:

—Guiraa rexpejn Israel nanchee xho nacä che gucäli biuux guedx Jerusalén. Galooli najc guedx Jerusalén ladxä. ⁵ Galooliza numbeereni narä, malaii guicäjpreni gucä te farisee nani bazobduxhru xleinu si'cni rililajznu. ⁶ Naj suga'a ree, rlanjreni jäüä sa'csi rililazä diidx nani bia'n Dios con retoxtadgoldoonu. ⁷ Guitzubiop cuaa rexpejn Israel huililajz siliäs Dios guiraa rebeņgut te guibaņsacreni. Ni'cni bazuxhijbreni lo Dios dxej-yääl. Naj rniliä lo guejblu reii Agripa, sa'csi rililazä siliäs Dios guiraa rebeņgut te guibaņsacreni, ni'cni rlanjreni gusäurenä narä. ⁸ Palga abejn Dios xhigab guiliäsni guiraa rebeņgut te guibaņsacreni, ¿xhicuent di lajztu chalii xtidx Dios?

⁹ Räjpa Pabl:

—Narä benäza xhigab galoo nanabpac guidxe'chä loj rexpejn Jesucrist ni siäd Nazare't, ni'c batedäreni trabajwduxh basäuäreni neņ latzguiib. ¹⁰ Guiraa recosre benäza guedx Jerusalén. Baniidx rebixhojz ni rnibee guiitz loä te basäuä rexpejn Jesucrist neņ latzguiib. Che biäreni neņ latzguiib, narä gule'cä xquejreni te gujtreni. ¹¹ Balti huält basacsiduxhäreni lagajc neņ reguidobäz te niniyajreni Jesucrist. Luxh basacsiduxhäreni, hua'a guideb nez reguedxzijt te ro'c huisacsíä rexpejn Jesucrist.

(Hch. 9:1-19; 22:6-16)

¹² Räjpa Pabl:

—Ni'c sa'a nez guedx Damasco, ca'a guiitz ni baniidx rebixhojz ni rnibee. ¹³ Rniliä lo guejblu, reii, si'cti läidxej, bahuiä te bajl ni siäd xhaguibaali. Rsanijruni loj gubijdx. Basanijni guideb gabi cadre suga'a näjza reni sanää. ¹⁴ Che biabrloonu lo yuj, biejn diagä xse' te ni canii loä con didx hebreo: “Saulo, Saulo, ¿xhicuent rusacsílu narä näjza rexpenä? Che rusacsílu narä, lagajc luj rdejdlu trabajw, si'c te gon ni rucuaní' yejc garu'ch.” ¹⁵ Dxejcti räpä lojni: “¿Chu luj Dad?” Dxejc najni loä: “Narä nacä Jesucrist nani cagusacsíduxhlu. ¹⁶ Huistie, gusulii. Narä baluiloä lojlu sa'csi rlazä gaclu te xpenä. Aguleälu te gusule'lu lo rebejn guiraa ni bahuiilu nadxej, näjza guiraa recos ni churu guluiä lojlu. ¹⁷ Naj suxhalälu loj rexpejn Israel näjza lo rebeņzijt nani di gac xpejn Israel. Che gusacsí rexpejn Israel näjza rebeņzijt luj, sacnäduxhälu, te di ju'treni luj. ¹⁸ Gacnää lastooreni te che jiejn diajgreni xtidä, chalilajzrenini, diru xcäriejnreni gac nayääl, sianij xcäriejnreni. Dxejc dirurenä gusoob xtidx Beņdxab ni rnibee rebeņdxab, sa'csi susoobreni xtidx Dios. Che chalilajzreni rextidä, sudzucaj Dios xtojreni. Dxejcti suchaag Diosreni loj renani anajc beņnaya sa'csi basoobreni xtidx Dios, huililajzreni xtidä.”

¹⁹ Räjpa Pabl:

—Ni'cni rniliä lo guejblu, reii Agripa, cayunä si'cni naj Jesucrist loä gunä che baluilojni loä. ²⁰ Gunixgaä xtiidxni lo rebeņ Damasco. Räpä lojreni: “Colgusiechlazj, colgusoob xtidx Dios. Colyujn dzunsa'c te gacbee rebejn abasiechlazjtu, arusoobtu xtidx Dios.” Si'cza guniä lo rebeņ Jerusalén, näjza lo rebejn ni yu' reguedx Judea, näjza lo rebeņzijt ni di gac xpejn Israel. ²¹ Sa'csi benä si'c, gunaaz rexpejn Israel narä neņ guidoro, rlanjreni nugu'treni narä. ²² Naj racnäj Dios narä, naj sanuutis cagusule'ä rediidxga lo guiraatis bejn. Loj rebejn ni xhet rajpdi sigajc loj rebejn ni rapduxh. Rusule'ätis nani caj lo guiitz nani bacuaa toMoisés näjza guiraa reniguii nani gunii xtidx Dios. Laarenä galooli guniireni xcuent xhini'c gac naj. ²³ Najreni sidejd

Crist trabajwduxh, sugu'trenini. Niluxh sa'csi ganiddoo laani guibaṅsacni lo rebēngut, ganiddooza laani suluiini loj rexpejṅ Israel nājza loj guiraa rebēnzijt guliipac xtidx Dios, sibaṅsac bejṅ lo rebēngut, si'c ni guniini galooli.

Di Agripa nililajz xtidx Jesucrist

²⁴ Laḷ ni canii Pabl rediidxga lojreni, dip gunii Festo, rājṅni lo Pabl:

—Pabl, yejclu cayajc. Pet sa'csi nanduxhlu guijtz ni'c cayajc yejclu.

²⁵ Dxejcti rājṅ Pabl lojṅni:

—Rniliä lo guejblu dad gubernador Festo, xhet rajcđi yecä. Ganax didxlii caniä. ²⁶ Ree suga' reii Agripa. Laani nancheeni guiraa rediidxre, ni'c guyasi caniä rediidxre lojṅni, dizana guidxebä sa'csi anajṅni guli guiraa ni gujc, sa'csi xhet xhiga'tzdi gujcreni. ²⁷ Guejblu reii Agripa, ĺla rililajz guejblu xtidx reniguii nani bacuaa xtidx Dios, ä? Naṅcheä rililajz guejblu diidxga —rājṅ Pabl.

²⁸ Dxejcti rājṅ Agripa lo Pabl:

—Tuche'nsi riäädx gunlu gan chalilazä xtidx Jesucrist te gacä xpeṅ Dios.

²⁹ Rājṅ Pabl lojṅni:

—Xhet najcđi palga guxii o xhidajl cayäädx, narä canabä guniidx Dios chalilajz guejblu xtiidxni si'c rililazä xtiidxni, nāgajcza guiraa reni cacuadiajg xtidxä te gactu si'c nacä, niluxh xhet nājdi resa' cadēṅre —rājṅ Pabl.

³⁰ Dxejcti huisu Agripa, Festo, Berenice, nājza rebejṅ ni sobganājreni. ³¹ Che gubigreni stelaad, rājṅreni lo sa'reni:

—Niguiire xhet bejṅdini te guetni, xhetza bejṅdini te jiäuni.

³² Dxejcti rājṅ Agripa lo Festo:

—Paru dini niniab chääni lo César, sajc nuslaanuni.

27

Birii Pabl sää nez guedx Roma

¹ Basoobtireni dxej ni niu'nu neṅ barcw te chonnu Italia. Dxej bateedreni Pabl nājza sgaii bejṅ nani niäüza lo capitán ni laa Julio. Rnibee Julio te gayuu soldaad, najcreni te cuaa ni laa Augusto. ² Nājza te dade' ni laa Aristarco guzaj, siäädni guedx Tesalónica xten Macedonia. Biu'nu neṅ barcw ro' guedx Cesarea. Barcwga siääd guedx Adramitio. Biriitinu, najc xhigab teednu nez reguejdx nani yu' ro' nisdoo lo reyuj xten Asia. ³ Che bara yääl guläjz barcw ro' guedx Sidón. Huenduxh gujc Julio con Pabl, basaanni bihuii Pabl rexamigwni ni yu' guejdxga te bahuiireni Pabl, badeedreni xhi rquiinni. ⁴ Che säasac barcw lo nisdoo, bideednu stelaad Chipre, yuj ni tre' lo nisdoo, sa'csi säab te beduxh, ni'c naga' Chipre xladbājgwnu, te guxiiru rda' bej loonu. ⁵ Che sonnu neṅ barcw, bideednu xnisdoo reguedx Cilicia nājza xnisdoo reguedx Panfilia, te bidzūṅnu ro' guedx Mira xten Licia. ⁶ Ro'c bidxäjł capitán xten resoldaad stee barcw ni siääd guedx Alejandría. Agojł chää barcwga Italia. Bateedtini guiraanu lo barcwga. ⁷ Balti dxej chäigaj sonnu lo nisdoo. Trabajwduxh bidzūṅnu lo nisdoo ro' guedx Gnido, sa'csi entis cabi' beduxh nez cadre sonnu. Ni'c trabajwduxh bideednu xladbājgw yuj Creta ni tre' lo nisdoo xladbeenu. Gudejdnu guedx Salmón. ⁸ Dxejcti chäiduxh sonnu neṅ barcw lo nisdoo nez cuä' yu Creta; si'ctis gujc bidzūṅnu te lajt ro' nisdoo ni laa Buenos Puertos cadre guxii säab bej. Gajxh ro'c tre' guedx Lasea. ⁹ Agujc balti dxej cayaclaanu, luxh agudejdza dxej ni rucua'n rexpejṅ Israel, guxii riäädx chaa ijz. Rebäire di bejṅ chää neṅ barcw sa'csi yuduxh riesgw lo nisdoo, ni'c balijdx Pabl rebejṅ, ¹⁰ rājṅni lojreni:

—Rexamigwä, runxgaä bis guejbtu, palga chonnu neñ barcw chanuunu xnejznu, sajc te liädxduxh. Sinitloj cargw, sibijxh barcw, luxh silo' xhidajl bejn, —räjpni.

¹¹ Niluxh di capitán xten resoldaad niu xtidx Pabl. Biuruni xtidx nani rusaj barcw näjza xtidx baxhuaan xten barcw. ¹² Luxh sa'csi lajtga dini gajc huen tedreni rebäi naľduxh, bejnreni xhigab hueenru guiriinu ro'c te chonnu guedx Fenice ni tre'za lo yu Creta, sa'csi di bej guibiduxh ro'c. Hueenru ro'c guilääznu ted rebäinajl, rajpreni.

¹³ Ni'c che gusloj cabi' te bebäz nez lad sur, naareni pet xhet najcdi guiriinu lo nisdoo con barcw. Dxejc baslaareni barcw, sontinu ro' nisdoo gajxh cuä' Creta. ¹⁴ Niluxh di niaclaa gusloj te nisguipeduxh birii nez redajn xten Creta. ¹⁵ Gunaaz bejga barcw, diru gacdi gusajrenini. Basa'ntireni sanä bejga barcw cadrotis rlajzni. ¹⁶ Siädgobiuj barcw te canuu. Che bidzunnu stelaad te yuje' ni tre' lo nisdoo ni laa Clauda, guxiiru cabi' beduxhga. Dxejcli bejnreni gaan guläsreni canuu neñ barcw. ¹⁷ Che basälnu canuu neñ barcw, cua'reni gaii duro te baliibreni barcwro, bateedreni gaii duu xque' barcw te na'c guibilni. Cadxejbreni te di chachu' barcw lo yujxh ni laa Sirte ni yu' neñ nisdoo. Ni'c guläjtreni ladro ni rniaaz bej te rusajni barcw, gudixhreni lajdgä neñ barcw. Sanäti beduxhga barcw cadrotis rlajzni. ¹⁸ Che bara yääl caguscuä' beduxh barcw lo nisdoo. Sas basälreni che'n cargw lo nisdoo te bicharu barcw. ¹⁹ Ni riojn dxej, lagajc laareni basälreni lo nisdoo guiraa xtrast barcw. ²⁰ Che agujc balti dxej niäu lo gubijdx, diza rebale' nienu xhaguibaa sa'csi laltis cayajb nisguipeduxhga, biennu xhigab guiraanu sejtneu. ²¹ Xchero rut rlajzdi gau. Dxejc gusuj Pabl galäi rebejn räjpni lojreni:

—Rexamigwä, paru nucuadiajg guejbtu xtidxä, na'c niriitu xyuj Creta, di liädxre niajc, dizanu nidejd trabajwduxhre. ²² Niluxh colcuedxi lastootu. Niclatej bejn ni siääd lo barcw di guet. Barcwtis sinitloj. ²³ Nacä te xpejn Dios, runä xhitis ni rnibeeni gunä. Nayääl biädsuj te xangl Dios cuä'ä, ²⁴ najni loä: “Na'c guidxejblu Pabl. Nanabpac chäälü lo reii César. ¡Bahuilaa! Abasalajz Dioslu reni siädnälu; nicla tej reni yu' neñ barcwre di guet”, najni loä. ²⁵ Ni'cni caniä lo guejbtu, na'c guidxejbtu. Narä rililazä xtidx Dios. Rililazä sisiojlb xtidx Dios si'c ni naj xangl Dios loä. ²⁶ Niluxh yu' cadre chalaj barcw lo yujxh neñ nisdoo gajxh lo te yuje' ni tre' neñ nisdoo —räjp Pabl.

²⁷ Si'cti tiop xman balanaa beduxhga barcw nezre, nezrec lo nisdoo ni laa Adria. Pet garol yääl ni bejn reniguii ni ruzaj barcw xhigab abidzujn barcw gajxh lo yuj, ²⁸ ni'c bastejbreni te guib lo duu xhajn nisdoo, te barexhreni ro'c, dxejc gucbeereni najc nisdoo jäät si'cti galbitzubixho'p metr. Che guzaj barcw stelabäze', bastesacreni guib con duu xajn nisdoo, dxejc gucbeereni ro'c najc nisdoo jäät si'cti galbigajdz metr. ²⁹ Dxejc bidxejbreni te di chalaj barcw yejc reguij. Bacuaatireni tajp guibro si'c guench ni naliib te caden te ru'reni neñ yujxh te ruscuääzreni barcw, te jia'nni tejsi lajt. Dxejc rlajzreni malaii jianijga lo guedxliuj. ³⁰ Dxejcti gulät remos canuu lo nisdoo cayujnsireni si'cni chastejbreni stee guench guib lo nisdoo, niluxh rlajzreni guxunreni guidon la sajc guidzujnreni ro' nisdoo. ³¹ Dxejcti räjp Pabl lo capitán näjza lo resoldaad:

—Palga di redee jia'n neñ barcw, di gacdi guslaatu xcäl nabajntu —räjpni.

³² Dxejcti batiugya' resoldaad duu ni naaz canuu te bitejbni lo nisdoo, sanäti nisdoo canuuga. ³³ Che gusloj cayanij, gunibee Pabl, räjpni lojreni:

—Nadxej rajc tiop xman gajdte gues, gajdzatu gau. ³⁴ Naj coltajw te gac guixoobtu lo nisdoo. Na'c guntu xhigab guettu, nicla tej xquidxejcti di nitloj.

³⁵ Che gulujx gunii Pabl si'c, cua'ni yätxtiil, badeedni xquixtios lo Dios nez loj guiraareni. Dxejc gula'nini, gusloj cayajwnini. ³⁶ Dxejc bibaa-lajzreni, näjza laareni gusloj cayajwreni. ³⁷ Nuunu najcnu tiop gayuu gayonbitzubixho'p bejn ni yu' neñ barcwga. ³⁸ Che agujc gudajwreni, basälreni triuu lo nisdoo te bicharu barcw.

³⁹ Che bianisac, direni niembee yujga, niluxh bahuiireni cadro rdzujn te gueubäz ro' nisdoo cadro yu' xhiroob yujxh ro' nisdoo. Rlajzreni nusiureni barcw ro'c. ⁴⁰ Dxejcti baslaareni guidap guench guuib ni naaz barcw, bia'nreni guideb caden neñ nisdoo, baxheczareni yajg ni ruzaj barcw, guläszareni ladro nez delant barcw te balanaa bej barcw. Badzuréreni barcw sääreni nez ro' nisdoo. ⁴¹ Sas biu'reni te lajt cadro rdxagsa' tiop cuaa nis. Ro'c huilaj yejc barcw neñ yujxh neñ nisdoo, digacdiru guiniibni. Dxejcti gusloj cabijl dejtz barcw sa'csi sanuutis caguijn nisdoo detz barcw. ⁴² Dxejcti rlajz resoldaad nugu't repres te di guixoobreni lo nis guxunreni. ⁴³ Niluxh di rlajz capitán xten resoldaad guet Pabl, ni'c dini nusaan nugu't resoldaad repres. Gunibee capitán ganiddoo renani rajc rxoob lo nis guitiäjs lo nisdoo te guidzujnreni lo yujxh. ⁴⁴ Dxejcti birinajl rebejn ni digacdi guixoob lo nis, naazreni barajd o te la' yajg ni gula' detz barcw. Si'c gujc bidzujn guiragajc rebejn lo yujxh ro' nisdoo. Nadaanreni bidzujnreni lo yujxhga.

28

Bidzujn Pabl lo yuj ni laa Malta ni re' lo nisdoo

¹ Che bidzujn nu lo yuj ni tre' lo nisdoo, biembeenu yujga najc ni laa Malta. ² Gucnäj rebejn ro'c nuure, gule'creni guiboo bahuiireni nuure sa'csi cayacnalduxh, cayajbza nisguij. ³ Ca' Pabl te däaz yajg, sale'cnini lo guiboo, chela biriyäl te bäl nialajz neñ yajgga. Saa gudauya'ni naa Pabl. ⁴ Che bahuii reben Malta li najl bäl nialajzga cayauya' naa Pabl, gusloj cayajbreni lo sa'reni: —Pet rugu'tni bejn ni'c mase bejn ni gaan lo nisdoo siguijxni xtojlni, sejt ni naj.

⁵ Gubijb Pabl naani dxejcti bitejb bälga lo guiboo. Xhet gujcdi naa Pabl. ⁶ Dxejc reben ro'c cabäjz fiireni la sisiäguij naa Pabl o laa sejt ni. Xchero bidxelojreni. Che bahuiireni xhet gujcdini, gusloj bejnreni ste'ca xhigab, räjpreni lo sa'reni:

—Pet dios najcni.

⁷ Gajxh ro'c naga' xyuj te dade' ni laa Publio ni najc xcubernadoor Malta. Biojia'nnu rolijzni choñ dxej. Huenduxh gujc dade'ga, baniidxni guiraa ni biquiinnu. ⁸ Naga' xtad Publio cayacxhuuni, yu'ni xliaa, cayajczani yobrejn. Huihuii Pabl ni. Guredx-gunab Pabl lo Dios, dxejc batzuub Pabl naani yejcn, basiacgajcnini. ⁹ Che gucbee reben guejdxga abasiajcn beñ racxhuuga, bidzunnäjreni beñ racxhuu lo Pabl, basiajcn Pabl guiraareni. ¹⁰ Ni'c banidx-xliaareni xhidalduxh xhicos, luxh che biriinu ro'c, baniidxreni guiralii recos ni biquiinnu neñ barcw.

Bidzujn Pabl guedx Roma

¹¹ Agujc choñ bäii yu'nu ro'c che biu'nu neñ te barcw ni siäd Alejandría. Lagajc ro'c bateed barcwga rebänajl che rsiäb beduxh. Yejc barcwga caj tiop figuur xten tiop biuux ni laa Cástor näjza Pólux, rexingancua'ch dios ni laa Zeus. ¹² Biriinu Malta sonnu neñ barcw nez guedx Siracusa. Ro'c bia'nnu choñ dxej. ¹³ Dxejcti biusacnu neñ barcw, sonnu lo nisdoo cheni bidzunlinu guejdx ni laa Regio. Che bara yääl, gubi' te bej birii lad sur. Biusacnu neñ barcw. Bara yääl bidzunnu guedx Puteoli. ¹⁴ Ro'c bidxaagnu gaii xpejn Jesucrist. Najreni loonu:

—Coljiannäj nuunu —najreni.

Bia'nnu ro'c gajdz dxej. Dxejc biriinu guejdxga, ni'nu sonnu nez guedx Roma. ¹⁵ Che gucbee rexpejn Jesucrist ni yu' guedx Roma siopsaanu nez Roma, biädreni guedx Foro de Apio näjza stee guejdx ni laa Tres Tabernas, ro'c bidxaagreni nuure. Che bahuii Pabl lojreni, guzutijp lastooni, badeedni xquixtios lo Dios. ¹⁶ Che biu'nu guedx Roma, bateed capitán repres ladznaa comandant, niluxh basaanni cualaa Pabl te yu' cadre cuääzni. Tejtis soldaad biannäj Pabl.

Baluii Pabl xtidx Dios lo reben Roma

¹⁷ Che gudejd chon dxej, gurejdx Pabl reni rnibee lo rexpejn Israel. Che bidxaag sa'reni cadre yu' Pabl, räjpni lojreni:

—Guejbtu reexamigwä, resa'ä, xhetliidi nani xhet laadi benä lo rexpejn Israel, dizana nibälazä xleii toMoisés. Niluxh basäureni narä neñ latzguiib guedx Jerusalén, dxejcti bateedreni narä ladznaa reroman. ¹⁸ Che biejn diajgreni xtidxä, rlanj reguxhtis roman nuslaa narä sa'csi xhet benädi te nugu'treni narä. ¹⁹ Niluxh naaddi rexpejn Israel guslaareni narä, gunabätis lojpac reii César jiädle'creni quej ni cabe'creni xcuentä. Niluxh narä xhet xquejdi rexpejn Israel cue'cä. ²⁰ Ni'cni guredxä la'tu te fiä lojtu, te guininää la'tu, sa'csi rililazä lagajc si'c rililajz xpejn Israel sibansac rebenjut, ni'c nalibä cadenre.

²¹ Dxejcti räjpreni lojni:

—Nicla tej guitz gajd reguxhtis xten reguedx Judea guxhal loonu xcuentlu, gajdza rexpejn nu ni bidzujn ree jiädsan diidx xhet laadi bejnlu. ²² Rlanjnu jiejn diajgnu xtiidxlu, don xhi naalu, sa'csi racbeenu xhidajl lajt rniyajreni redixcoob xten Jesucrist —räjpreni.

²³ Guletireni te dxej guidxagsa'reni. Che bidzujn dxejga, bidxagsa' xhidalduxh bejn neñ yu' cadre rbäjz Pabl. Guideb dxej basule' Pabl xtidx Dios lojreni. Basule'ni xho rnibee Dios lojreni. Con rediidx ni caj lo xleii toMoisés näjza diidx ni bacuaa reniguii nani gunii xtidx Dios basule'ni Jesús najc Crist nani galooli cabäjz reben Israel jiäd. ²⁴ Yu' reni huililajz xtidx Pabl, yu'za reni di nililajz xtiidxni. ²⁵ Sa'csi di niajcdi niujnreni tejsi xhigab gusloj siireni. Ganiddoo räjp Pabl lojreni:

—Guliica naj toIsaías che badeed Sprit Dxaan xten Dios rediidxre guniini, räjpni lo rextadgoldoonu:

²⁶ Huij, gunii lo rebejnre, scree gojz lojreni:

Siejn diajgtu xtidxä, niluxh ditu gacbeeni.

Suhuiitu nani runä luxh ditu gumbee xhini'c ruhuiitu.

²⁷ Agucnajd lastoo rebejnre sa'csi di rlanjreni chalilajzreni xtidxä.

Direni cuadiajg xtidxä sa'csi di rlanjreni jiejn diajgreni diidx ni guliipac.

Rusäuzareni balojreni te di fiireni, te di lajzreni chalii.

Ni'cni direni gusiechlajzreni te gusaan gunreni dojl te gudzucaj Dios xtojreni.

²⁸ Räjp Pabl lojreni:

—Colgacbee. Najli sisiule' xtidx Dios lo rebenzajt ni di gac xpejn Israel te gusiejch lajzreni, te gudzucaj Dios xtojreni. Rniliäpac lojtu, sililajzreni rextidx Dios.

²⁹ Che gulujx gunii Pabl rediidxga lojreni, ensilaareni gusloj cadxagdijl sa'reni lal ni sääreni.

³⁰ Tiop ijz guläjz Pabl guejdxga neñ yu' ni cualaani. Biuni guiralii rebejn ni biäd rolizni. ³¹ Lo guiraa rebejn ga basule'ni xho rnibee Dios lojreni. Bijzani diidx xcuent redzuun nani bejn Jesucrist. Di lastooni nidxejb, rutza badxojndi guniini.

Guijtz Nani Bacuaa Pabl Lo Rebeņ Roman

Rucuaa Pabl lo rebeņ guidoo neņ guedx Roma

¹ Narä, Pabl, nacä te xmos Jesucrist, laani gule narä te gusule'ä xtidx Dios loj rebeņ.

² Agujc xchero bia'n Dios diidx loj renani basule' xtiidxni, suniidxni diidxre loonu, luxh diidx ni bia'n Dios caj lo guiitz xten reprofe'tga. ³ Rediidx ni rusule'ä najc xcuent Jesucrist, Xi'n Dios, ni najc xagdoo toreei David xcuent tiejxhni. ⁴ Xcuent Xsprit Dxaan Dad Jesucrist, najcni Xi'npac Dios. Badeed Dios yälrnibee lojni, ni'cni gubaņsacni lo rebeņgut. ⁵ Laani gucnäjni narä, guleni narä te gusule'ä xtiidxni te guzobdiajgtu, te chalilajz rebeņ ni rej guideb guedxliuj xtiidxni. ⁶ Luxh nadxaagtu loj rebeņ ni guleni te chalilajzreni xtiidxni.

⁷ Ruxhalä guiitzre lojtu ni yu' guedx Roma, guiraatu ni sanälajz Dios ni bibeetu gactu beņdxan. Gacnäj Dios ni najc Xdadnu näjza Dad Jesucrist la'tu, guscuecdxireni lajztu.

Rlajz Pabl chää guedx Roma

⁸ Ganidtoo rudedä xquixtios loj Dios con laj Jesucrist xcuent guiraatu, sa'csi guideb guedxliuj rujy beņ diidx xcuent xcälrlilajztu. ⁹ Lagajc Dios anajn xho rniabä guet-guejt xcuent la'tu lojni. Narä runä xtzuun Dios guideb lastoä, rusule'ä diidx xcuent Xi'nni Jesucrist. ¹⁰ Sanuutis canabä lojni, top sajc jädhuiä lojtu si'cni rlazä gunä agujc xchejli. ¹¹ Sa'csi rlazduxhä fiä lojtu, te gacnäätu, te gulidxä la'tu xhi te xtidx Dios te sudzu'tzrutu lo xtiidxni. ¹² Nalajznu, te gustioobnu lajz sa'nu xcälrlilajz xtidx Dios xten sa'nu.

¹³ Rebetzä rlazä gacheetu balti huält benä xhigab jädhuiä lojtu, luxh gajd gacdi jäälä. Rlazä jädhuiä lojtu te chalilajz xhidajlru beņ xtidx Dios sigajcni salilajzreni guiralajt cadre hua'a loj rebeņ ni di gac xpeņ Israel. ¹⁴ Nungäjlpac gusule'ä xtidx Dios loj rebeņ nani rni garen-garen didxsaj, sigajc loj rebeņ griegw, loj renani nayääl, sigajc loj rebeņ najn. ¹⁵ Rbaali lazä suga'a naj, te gusule' xtidx Dios näjza lojtu ni yu' guedx Roma.

Xcälrnibee xtidx Dios

¹⁶ Sa'csi dina guituiä xcuent xtidx Dios, sa'csi najcni yälrnibee xten Dios te guslaani lo dojl chutis beņ nani rlazj chalilajz xtiidxni, ganidtoo reni najc rexepeņ Israel, dxejcti näjza rebeņ ni di gac xpeņ Israel. ¹⁷ Sa'csi xtidx Dios rusule' xho nanab chalilajz te beņ te gacni te beņsa'c nez lo Dios sa'csi huililajzreni xtiidxni. Lo xtidx Dios caj scree: "Palga rililajz te beņ xtidx Dios, najcni te beņnaya nez lo Dios, nabaņnäjni Dios xcuent xcälrlilajzreni."

Rextojl beņ

¹⁸ Xcälrdxe'ch Dios nani yu' xhaguibaa siajbni yejc rebeņ nani gun dojl, nani rlazj gun cosguijdx, nani di gusaan guisieed sabeņreni didxguli. ¹⁹ Sa'csi anancheereni nani sajc gan beņ xcuent Dios, ni'cni najnreni rajpreni dojl, sa'csi ruluipac Dios na'c gunreni dojl. ²⁰ Cheni birixtiejli guedxliuj, recos nani di gacdi fii beņ xcuent Dios, si'c xcälrnibeeni ni najc par tejpas, si'c xtujxh xtenni, huenliisi ruzeņreni sa'csi ruluilojreni recos ni ruzeņ nani benchee Dios. Guiraa reni'c ruluiloj najcni Gueb Dios ni rajp yälrnibee par tejpas, ni'c di gacdi guiniireni loj Dios direni niembee xhini'c rlazj Dios gunreni. ²¹ Ni'cni, mase biembeereni Dios, direni niliä'p xpala'nni te ganreni Gueb Dios, dizareni nudeed xquixtios lojni. Alga gualajz gujcreni, bicäjy

xcäriejnreni, naareni hueen najc gunreni si'ctis ni jiajb yejcreni, si'cni rsia' lajzreni nen lastooreni. ²² Caniireni nanduxhreni, per direni gan, nayäälreni. ²³ Gulälazreni xcälrdimbicha' Dios ni najc tejsi par tejpas, te bazuxhijbreni nez loj rebanäjb ni benchee naareni, ni najc guiraa ni rujn lojni si'c rujn lo te niguii ni rnitloj, näjza guiraa ni najc si'c reman ni rutajt, näjza guiraa ni najc si'c reman ni yu' tajp ni'ni, näjza ni najc si'c rebäjl.

²⁴ Ni'cni gulälaz Diosreni, basaanni gunreni si'ctis ni rlajzreni. Bejnreni dojl con resa'reni. ²⁵ Sa'csi ahuililajzreni didx-xhii lacuaa nililajzreni xtidxlii Dios, ruzuxhijbza'reni nez loj recos ni benchee Dios, lacuaa guzuxhijbreni loj Dios nani benchee guiraa rexhicos, Dios nacle' par tejpas. Sugacni si'c.

²⁶ Ni'cni gulälaz Diosreni, subia'nreni lo xcällatsiajreni, lo yälxtujy xtenreni. Diru regunaa guesnäy niguii, lagajc sagunaareni resnäjreni. ²⁷ Sigajcza reniguii gulälaz regunaa, rujnreni dojl con lagajc saniguiireni. Luxh lagajc laareni siguijxreni latsiaj ni rujnreni.

²⁸ Luxh sa'csi di rlajzreni jiureni Dios, basaanti Dios suyu' cosguijdx tis xcäriejnreni, te chanuutisreni lo xcällatsiajreni, rujnreni recos ni xhet laadi. ²⁹ Guidxareni dojl, näjza cosguijdx, näj yälruguilajz xhixten sa'reni; rugu'treni bejn, rujnreni yälrsiäblajz, rucuanäjreni resa'reni, rusgueereni sa'reni, rdx-echnäjreni sa'reni, rniizaren i didxxhii. ³⁰ Rniyaj sa'reni, rdxechreni lo Dios, gualajzreni, dipacreni guitujy, rliä'preni lagajc xpala'nreni, entis latsiacooob rbäxtiejreni, gualajzreni lo xcuzajnreni, ³¹ nadduxhreni, xheti xcäriejnreni, xhet sajcdi xtiidxreni ni ria'nreni lo sabejnreni, direni chanälajz sa'reni si'cni nungäjl gacni, dizaren i gulaslajz sa'reni. ³² Luxh mase agucbeereni gun Dios yälguxhtis lojreni, najnzaren i nungäjl guetpac renani rujn recosre, nicla jiureni, rujnreni guiraa recosguijdxre, luxh rbaali lajzreni richunäjreni rebejn ni rujnza recosguijdxga.

2

Dios rujn yälguxhtis con didxguliipac

¹ Ni'cni, ¿canejz chäätu, la'tu beñguedxliuj? Chutis luj ni rgubeelu sabejnlu, lagajc si'c cubeezaren i luj, lagajc xcuent ni'c sajclu yälguxhtis, sa'csi luj rgubeelu sabejnlu, lagajcza luj rujnlu lagajc dojlga. ² Nancheenu sujn Dios yälguxhtissa'c loj renani rujn sa' dojlga. ³ Ben guedxliuj ni rgubee loj renani rujn dojl, luxh sigajcza rujnlu, ¿la rujnlu xhigab sidedcaj gun Dios yälguxhtis lojlu xcuent xtojllu, ä? ⁴ O ¿la rbälazlu ni rujn Dios, najcni huenduxh, lacti guroob najc xcälrulaslajzni, rapduxhzani pasens? ¿La dilu gan dee najc ni gacnäjl gu siechajzlu te guibicajlu lo dojl, ä? ⁵ Luxh sa'csi nadduxhlu, di lastoolu guigoodz te gusiechajzlu, cagutajllu yälguxhtis ni gaclu che guidzujn dxej ni gun Dios yälguxhtis loj reben guedxliuj, ⁶ siguijx Dios loj tejgatu xcuent dzuun nani bejn tejgatu. ⁷ Loj rebejn nani rlajztisreni guibañsa'c, ni gusoob xtiidxni, sudeed Dios yälñabajn par tejpas sa'csi gudiilreni xhaniduj näjza go'preni xpala'nreni loj Dios, rlajzreni guibajnreni loj Dios par tejpas. ⁸ Luxh sidxe'ch Dios, sidxe'chduxhni loj renani sanälajz lagajc laareni, nani di jiu xtidxguliini, alga rusoobreni reyällatsiaj, redidxguijdx. ⁹ Guiraa reben guedxliuj ni rujn dojl sidejd trabajwduxh näjza sac-huin lastooreni; ganid rexpén Israel, dxejcti näjza reben griegw. ¹⁰ Loj guiraa rebejn nani rujn coshueen, sudeed Dios xhaniduj, näjza bala'n, näjza yälrbecdxi lastooreni, ganid rexpén Israel, dxejcti näjza reben griegw.

¹¹ Sa'csi tebloj najc guiraasi rebejn nez loj Dios. ¹² Guiraa rebejn nani bejn dojl, luxh direni niembee xleii Dios, sinitlojreni sin leiiga; guiraa reni biembee xleii Dios, lagajc con leiiga sujn Dios yälguxhtisreni xcuent xtojlni.

13 Xhet ganaxdi renani rucuardiajgtis xleii Moisés najc bennaya nez loj Dios; rebejn ni rusoobpac rexleii toMoisés, reni'c najc bennaya loj Dios. 14 Yu' xhidal bejn ni di gumbee xleii toMoisés, dizareni gac rexpən Israel, rujnreni recos ni caj lo leii. Najnreni xhini'c najc cos sa'c. Ni'cni lagajc xcäriejnreni najc si'c leii par laareni. 15 Recossa'c ni rujnreni ruluiloj nezyusa'c ni yu' lastooreni. Xcäriejnreni ruluiloj xhini'c loj guiraa nani rujnreni najc cos sa'c, xhini'c najc dojl. 16 Guiraa recosre sajc che guidzujn dxej ni gun Dios yälguxhtis guiraa rexhigabxhiga'tz ni yu' lastoo rebejn. Jesucrist gac juejz lojreni, dxejc sisiojb guiraa rediidx ni cagusule'ä lojtu.

Rexpən Israel näj xleii toMoisés

17 Luj ni laalu xpen Israel, ni rniilu sanäpaclu xleii toMoisés, rniduxhlu najclu xpen Dios, 18 rniilu nancheezalu xhini'c rlajz Dios gunlu, anajnzalu xhini'c najc hueenru sa'csi bisiedsa'cpaclu leii. 19 Rchalolu sajc guluiilu nezyusa'c lo rebejn nani najc si'c lotiä'p, sajc guzanijlu xcäriejn reni nacäy xcäriejnreni. 20 Rchalolu najclu maestr lo renani nayääl, najczalu maestr lo rebiuux, sa'csi nansa'clu leii, luxh lojni caj guiraa yäl'najn näjza guiraa didxguliipac. 21 Ni'cni rniä lojlu, luj ni caguseed xtee bejn, ¿xhicuent dilu guseed lagajc luj? Luj ni rusule'lu diidx na'c cuan bejn, ¿xhicuent rbajnlu? 22 Luj nani rniilu na'c guesnäjni te ni di gac chääl'ni, ¿la resnäjlu nani di gac chäällu, ä? Rdxechlu xcuent rebanäjb, ¿xhicuent rbääl'ni xhicos nejn xquidoo rebanäjb, ä? 23 Luj rlajzlu chä'p xpala'nlu sa'csi najnlu leii, ¿la rusanxtujylu Dios sa'csi dilu gusoob xtidx leiiga, ä? 24 Bahuii xho rebejn nani di gac xpen Israel rniyajreni Dios sa'csi la'tu ditu gusoob xtiidxn, rujntu dojl, sigajc ni caj lo xtidx Dios.

25 Palga la'tu chutu bee si'cni caj lo leiiga, palga gusoobtu guiraa diidx ni caj lo leii, laaca. Luxh palga ditu gusoob guiraliipac xtidx leiiga, xlia'si guyu'tu bee, sa'csi rujntu dojl. 26 Ni'cni palga te bejn ni di chu beega, luxh rusoobni guiraliipac xtidx leiiga, ¿la di gacdi guchaagni cuent najcni si'c te nani yu' beega, ä? 27 Bejn nani di chu beega, luxh rililajzni guiraliipac xtidx leiiga, sujnni yälguxhtis la'tu sa'csi mase yu'tu beega, luxh nanduxhtu leiiga, ditu gusoob xtidx leiiga, alga rujntu dojl. 28 Sa'csi xhet guiraadi rebejn ni yu' beega najc rexpən Israel, luxh di beega ni ru' bejn gun gusoobpac bejn xtidx leiiga. 29 Najcpac te xpen Israel nani najcni nejn lastooni, nani yu' bee lastooni, rusoobpacni xtidx Dios xcuent Sprit xtenni, dini gunni sa'csi najctisni costumbr. Dios ni siliä'p xpala'n'ni, xhet bejndi.

3

1 ¿Xhini'c sacnäj te bejn najcni te rexpən Israel, ä? O ¿xhi sajc chuni beega?
 2 ¡Empac sacduxhni! Ganidtoo, sa'csi loj rexpən Israel badeed Dios xtiidxn.
 3 Mase yu' renani di nililajz diidxga, ¿la ni'cni xhet sajcdi diidx ni bia'n Dios loj rexpejn'ni, ä? 4 ¡Xho gacni si'c! Diostis najc guliipac, guiralii bejn rusguee. Scree caj lo xtidx Dios:

Lagajc xtiidxlu suluii laaca rujnlu,
 te che gaclu yälguxhtis,
 nicla tej xtojllu di guidxäjl.

5 Palga xcällatsiajnu ruluiiru najc Dios huenduxh, ¿xhini'c guiniinu dxejc? Palga gun Dios yälguxhtis nurnu, dxejc tednu trabajwduxh, ¿la rujnni latsiaj loonu, ä? (Caniä si'c te bejn guedxliuj naj.) 6 ¡Xho gacni si'c! Paru najcni si'c, ¿xho mood gun Dios yälguxhtis loj rebejn guedxliuj?

7 Paru redidx-xhii ni rniä riliä'pru xpala'n Dios näjza xtidxliini, ¿xhicuent gunni yälguxhtis narä si'c te bejndojl? 8 Yu'za bejn ni canii didx-xhii, najreni

cayäjpnu lo rebejn: “Coļyejn cosguijdx te guiluilojni recoshuen.” Per rebejn ni canii si'c sidzujn dxej gacreni yälguxhtis.

Guiraanu najcnu bendojl

⁹ ĴDxejca'? ĴLa najcnu benhuenduxhru lojreni, ä? Dini gac; tebloj abile'cnu yälquij xten rexpən Israel con rebejn ni di gac xpen Israel, sa'csi guiraareni yu'reni lo dojl. ¹⁰ Si'cni caj lo guiitz:

Ruti te beṅsa'c, nicla tejni.

¹¹ Ruti te bejn ni racbee,
ruti chu tej nani rguuil Dios.

¹² Guiragajcreni abirii lo xnejz Dios,
teblojsi xhet sajcdireni.

Ruti chu tej ni rujn cossa'c, nicla tejni.

¹³ Ro'reni rii ganax didxguijdx,
najcni si'c te baa ni naxal,
rusgueereni con lujdxreni,
didxlatsiaj rii ro'reni najcni si'c benen ni yu' ro' te bälñialajz.

¹⁴ Ro'reni entis cague,
entis canii didxrdxe'ch lo sa'reni.

¹⁵ Ni'reni ruxunli saxhe' xtiejn sa'reni.

¹⁶ Cadrotis rijreni rujnreni latsiaj,
ruteedreni sa'reni trabajw.

¹⁷ Direni gumbee nezyuj ni ruscuecdxilajz.

¹⁸ Niclaza guidxelojreni Dios.

¹⁹ Racbeenu najc rediidx nani caj lo xleii Dios par rebejn ni rnibee leii lojreni, te jäüu ro' guiralii rebejn, te guiraa reben guedxliuj gacbeereni yu' xtojlneni nez loj Dios. ²⁰ Sa'csi mase gusoob bejn guira'ti diidx ni caj lo leii, di leiiga gudzucaj xtojlni bejnğa, sa'csi leiiga najc nani guluii dojl ni yu' nen lastooni.

Ruslaa Dios lo dojl xcuent yälñililajz xtiidxni

²¹ Naj ruluii Dios stee mood guibicaj xtojlnu, nani di gac mood ni caj lo xleii toMoisés. Luxh galooli gusloj canii Dios xcuent nezyujre, cajni lo reguijtz xten leii näjza lo reguijtz ni bejn rebejn nani gunii xtidx Dios galoo. ²² Stee mood najc scree: Chutis ni chalilajz xtidx Jesucrist, sajc naya lastooni nez loj Dios; si'c sajc garaliiza nani salilajz, sa'csi tebloj najcnu nez lojni. ²³ Sa'csi guiralii rebejn guedxliuj abanijt lo Dios, direni guiga' guidzujnreni lo xnezyuj Dios. ²⁴ Niluxh balaslajz Dios nuunu, banidxxlia'ni loonu yälñabannaya nez loj Dios sa'csi Jesucristis gudijx yälguxhtis xten dojl che baxhe'ni xtiejn ni lo cruzj te badzucaj xtojlnu. ²⁵ Baxhal Dios xi'nni, Jesucrist, te cuajni lo cruzj nez loj rebejn te si'c gudijxni guiraa rextojlni chutis bejn ni rililajz xtidx Dios xcuent xtiejn Jesucrist. Si'c bejn Dios te guluiini xho guibannaya bejn lojni. Galoo gojptis Dios pasens rebejn, dini niujn yälguxhtis rextojlneni, ²⁶ sa'csi acanajn Dios gac gunni yälguxhtis redojlğa, te si'c guiluini xcälñayani nez loj guiraa rebejn, te Diospac gunnaya nez lojni chutis ni rililajz xtidx Jesucrist.

²⁷ Ni'cni Ĵcon yälñaro? ĴCon yälñindaan? ĴXhet sajc dini! ĴXhi leii rudzucaj xtojlnu? ĴLa leii najc ni rnii jiennu dzunsa'c, ä? ĴDini gac si'c! Yu' tejtis leii ni rudzucaj dojl, nani rnii chalilajztis bejn xtidx Jesucrist. ²⁸ Dxejc sajc guiniä lojtu chutis bejn sajc gac naya nez loj Dios sa'csi rililajzni xtidx Jesucrist, xhet sa'csi rujnni redzunsa'c ni caj lo leii.

²⁹ ĴLa najc Dios Xtiooztis rexpən Israel, ä? ĴLa dini gac näjza Dios xten rebejn ni di gac xpen Israel? ĴXho dini gac! Najcni Dios xten guirop cuaa bejn.

³⁰ Ruti chu stee Dios, tejtis Dios yu'. Ruslaani lo dojl rebejn ni guyu' bee sa'csi

huililajzreni xtiidxni, sigajcza ruslaani lo dojl rebejn ni xhet beedi guyu' sa'csi huililajzreni xtiidxni. ³¹ ¿La rudzucajnu leii sa'csi rililajznu, ä? Ajndi. ¡Xho gacni si'c! Alga basoobnu xtidx leiiga che huililajznu xtidx Jesucrist.

4

Xcälirililajz toAbram

¹ ¿Xhini'c sajc guiniinu xcuent toxtadgoldoonu, Abram? ² Paru niajc toAbram beñnaya nez loj Dios por redzuun ni bejn, pet sajc guibalazduxhni, per xhet nez lojdi Dios. ³ ¿Xhini'c caj lo xtidx Dios? Caj rediidxre:

Huililajz toAbram xtidx Dios,

ni'c bachaag Dios cuent najcni te beñnaya nez lojni.

⁴ Meel nani rca' te bejn ni rujn te dzuun, meelga najc ni riäjl xca'ni, xhet rcaxlia'dinini. ⁵ Luxh nani rililajztis xtidx Dios ni ruslaa bejn lo dojl, lacuaa naani yu' xhi dzuun sajc gunni te guibicaj xtojlni, bejnga najc te beñnaya nez loj Dios, sa'csi huililajzni xtiidxni. ⁶ Sigajcza naj toDavid, chicbaa bejn nani ruhaag Dios cuent najcni te beñnaya luxh di niqtiin niujnni redzuun ni caj lo leii. Räjpn:

⁷ Chicbaa renani abaslaa Dios lo xtojlni, renani abiäuu loj xtojlni.

⁸ Chicbaa bejn nani diru Dios gun cuent xtojlni.

⁹ ¿La sajc guiniini chicbaa rebejntis nani guyu' bee, ä? ¿La et näjdiza renani di niu' bee, ä? Sa'csi rniinu: “ToAbram gujc te beñnaya nez loj Dios sa'csi huililajzni xtidx Dios.” ¹⁰ Guc bidxaag cuent najcni te beñnaya nez loj Dios ¿che gajdni chu bee, ä? O ¿Laa che guyu'ni bee? Bidxaagpac xcuentni che gajdni chu bee. ¹¹ Dxejcti guyu'ni bee si'c te seen xten yälñaya sa'csi huililajzni xtidx Dios che gajdlni chu bee te gacni xtad guiraa renani rililajz lañ ni xhet beedi yu'reni, te näjza laareni guidxaag cuent najcreni beñnaya nez loj Dios, ¹² te gaczani xtad guiraa renani yu' bee ni huililajzta xtidx Dios si'c huililajz toAbram cheni gajdni chu bee.

Diidx ni bia'n Dios rsiojb xcuent yälirililajz

¹³ Bia'n Dios diidx loj toAbram näjza loj rexagdooni, xca'ni guedxliujre si'c yälñasa'c xteni. Xhet sa'csi gusoobni xtidx leii xca'nini, sica'nini sa'csi najc toAbram te beñnaya nez loj Dios sa'csi huililajzni xtidx Dios. ¹⁴ Sa'csi paru renani rusoob xtidx leiiga najc nani xca' yälñasa'cga, xlia'si chalilajz bejn xtidx Jesucrist, luxh xhetza sajcdi diidx nani bia'n Dios loj toAbram. ¹⁵ Che yu' te leii, luxh yu' chu di gusoobni, dxejc rdxe'ch Dios loj bejn. Cadro xheti leii, xhetiza xtojlni.

¹⁶ Ni'cni balaslajz Dios nuunu, te sudzu'tz diidx ni bia'nni loj toAbram, te guiraa rexagdooni ni rililajz sica' yälñasa'c, xhet xtebtis renani sasanäj xleii toMoisés, nägajcza renani rililajz xtidx Dios si'c huililajz toAbram, nani najc xtad guiraanu nani chalilajz xtidx Dios. ¹⁷ Si'cza caj lo xtidx Dios, caj rediidxre: “Abenä gaclu xtad xhidal renación.” Si'c bia'n Dios diidx loj toAbram, Gueb Dios nani gudeed yälñabajn loj rebengut, nani rnii xcuent recos nani gajd gac ascanu ala najcni.

¹⁸ Anajn toAbram naganduxh soob diidx ni bia'n Dios con laani, luxh laani empac huililajzni, ni'c gujcn xtad xhidajl nación, te gusojb xtidx Dios ni guniini che räjpn: “Scree gac xhidajl rexagdoolu.” ¹⁹ Di toAbram nunijt xcälirililajzni, mase ayu'ni tegayuu ijz, najnni anajcni bengool, luxh sigajcza Sara abengool diru xi'nreni chu. ²⁰ Dini niun-tio'p lajzni xcuent rediidx nani bia'n Dios con laani, alga gusutijpruni huililajzni xtiidxni, gulä'pni xpala'n

Dios, badeedni xquixtios lojni. ²¹ Anajnni rajp Dios yäl̄rnibee te gunni guiraliini nani bia'n diidx gunni. ²² Ni'c bachaag Dios cuent najcni te beñnaya nez lojni sa'csi huililajzni xtidx Dios.

²³ Xhet xtebtisdi xcuent toAbram cuaj rediidxre: “Bidxaag cuent najcni te beñnaya nez loj Dios sa'csi huililajzni xtidx Dios”, ²⁴ näjza xcuentnu cuajni, sa'csi che chalilaaznu xtiidx nani baspañsac Xtað Jesucrist loj rebengut, sidxaag cuent najcnu beñnaya nez loj Dios. ²⁵ Bacuaareni Jesucrist lo cruzj te gudijxni rextojl̄nu nez loj Dios, luxh gubañsacni lo rebengut, te gac gacnu beñnaya nez loj Dios.

5

Xhi rsiajc bejn che najcreni beñnaya nez loj Dios

¹ Ni'cni che rililajznu xtidx Dios rudzucaj Jesucrist xtoj̄l̄nu rajcnu beñnaya nez loj Dios, ni'cni ruscuecdxini lajznu. ² Sa'csi gujt Jesucrist, sa'csi gubañsacni lo rebengut xcuent nuurnu, che rililajznu xtidx Dios xcuent Jesucrist, rulaslajz Dios nuurnu, ni'cni rbalajznu, rajpnu yäl̄nabaj̄n, su'pacnu lo xcäl̄rdimbicha' Dios. ³ Luxh xhet ni'ctis, sajza guibalaaznu che tednu trabajw, sa'csi najnnu trabajwga sujn jia'pnu pasens. ⁴ Luxh che rajpnu pasens rajcnu te benguyaj̄l̄ru; che anajczanu benguyaj̄l̄, rililazsa'crunu. ⁵ Luxh yäl̄rililazsa'cnu dini gusanxtujy, sa'csi yäl̄sanäl̄ajz ni rajp Dios ruchaj lastoonu sa'csi neñ lastoonu rbäjz Xsprit Dxan xten Dios ni baniidxni loonu.

⁶ Lañ ni xhetliidi sajcdi jiennu lagajc xcuentnu te guibicaj xtoj̄l̄nu, che basa' dxej biäd Jesucrist te gujtni lo cruzj xcuent rebendoj̄l̄. ⁷ Guliipacni, naganduxh guidxäl̄ni te bejn ni xcäjb guet lacuaa te bejn ni laaca rujnni. Per sidxäjl̄ te bejn ni xcäjb guet lacuaa te beñsa'c. ⁸ Luxh Dios baluiloj xcäl̄rinäl̄ajzni xcuent nuurnu sa'csi lañ ni yugajcnu lo dojl̄, gujt Jesucrist lo cruzj xcuentnu. ⁹ Aticaxh ñaj ni najcnu beñnaya nez loj Dios sa'csi baxhe'ni xtejn̄ni te gubicaj xtoj̄l̄nu, ñaj sidedcaj gacnu xcäl̄guxhtis Dios. ¹⁰ Palga lañ ni rdxe'chnu lo Dios, basiäj̄l̄ni lajzni xcuentnu sa'csi gujt Xi'nni lo cruzj, ñaj ni abiäj̄l̄ lajzni, suslaani nuure lo dojl̄ sa'csi gubañsac Xi'nni loj rebengut. ¹¹ Luxh xhet ni'ctis, sibalaznäj̄nu Dios xcuent Dad Jesucrist, sa'csi xcuentni ara'pnu yäl̄rbedxi lajzni nez loj Dios.

Adán con Dad Jesucrist

¹² Ni'cni, xcuent tejtis niguii biu' dojl̄ lo guedxliuj, luxh xcuent dojl̄ biädza yäl̄gujt, gudejdti yäl̄gujt loj guiraa rebejn̄, sa'csi guiraa rebejn̄ bejnreni dojl̄. ¹³ Cheni gajd xleii toMoisés chu lo guedxliujre, alabejn rebejn̄ dojl̄, per di niajcdi nucuaquijni rebejn̄ sa'csi xheti leii. ¹⁴ Luxh empac gujt rebejn̄ neñ redxej ni gubaj̄n toAdán hasta redxej ni gubaj̄n toMoisés, mase direni niujn lagajc dojl̄ nani bejn̄ toAdán; luxh ruluiloj yu' chu stee bejn̄ nungäj̄l̄ jiäd.

¹⁵ Luxh nani runidx-xlia' Dios dini gac si'c najc xtoj̄l̄ toAdán. Dini gac si'c sa'csi palga xcuent dojl̄ ni bejn̄ toAdán, gujt xhidalduxh bejn̄, cuantimaaz ñaj sunidx-xlia' Dios yäl̄nabaj̄n par tejpas loonu por xcäl̄rulaslajz Dios, nägajc por xcäl̄rulaslajz Dad nani laa Jesucrist. ¹⁶ Luxh nani runidx-xlia' Dios loonu dini gac si'c yäl̄runij̄t ni biäd loonu xcuent dojl̄ ni bejn̄ toAdán; sa'csi xcuent tejtis dojl̄ga biäd yäl̄guxhtis xten Dios, sa'csi guiraliiza rebejn̄ guedxliujre yu' lo dojl̄, per xcuent nani banidx-xlia' Dios, nalajznu, gujt Xi'nni Jesucrist lo cruzj, ni'c gujc sa'csi yuduxhtej dojl̄, te xcuent ni bejn̄ Jesucrist sajz gac bejn̄ beñnaya nez loj Dios. ¹⁷ Palga xcuent dojl̄ ni bejn̄ tejsi bejn̄ga gunibee yäl̄gujt lo guiraa bejn̄, cuantimaaz lo yäl̄nabaj̄n par tejpas sinibee guiraa reni rca' xcäl̄rulaslajz Jesucrist näjza renani rcaxlia' lojni yäl̄racnaya nez loj Dios.

18 Ni'cni sigajc ni biääd yälguxhtis lo guiraa reben guedxliuj xcuent dojl ni bejn tejsi niguii, sigajcza sa'csi basoob stee niguii xtidx Dios, xhidäl bejn gujc beñnaya nez loj Dios, cua'reni yälñabajñ par tejpas. 19 Nalajznu sigajc ni banijt xhidalduxh bejn nez loj Dios xcuent tej niguii ni di nusoob xtidx Dios, sigajcza xhidalduxh bejn sajc beñnaya nez loj Dios xcuent tej niguii ni basoob xtiidx Dios. 20 Ni'cni badeed Dios xleii toMoisés, te guzenru dojl. Niluxh cadro guyuduxh dojl, ro'c nanabza chuduxhru xcälñulaslazduxh Dios, 21 te sigajc ni gunibee dojl guyu' yälgujt, sigajcza guinibeeru xcälñulaslaz Dios te jia'cnu beñnaya nez loj Dios, te xca'nu yälñabajñ par tejpas xcuent Xi'nni, Dad Jesucrist.

6

Agujtnu lo dojl per nabannäjnu Jesucrist

1 ¿Xhini'c guiniinu, ñaj? ¿La sajc guidxunrunu lo dojl te tioobru xcälñulaslaz Dios, ä? 2 ¡Gurniälöjtu gacni si'c! Nuurnu najcnu si'c te bengut lo dojl sa'csi rililajznu xtidx Dios; ¿xhoxh gac guibajñrunu lo dojl? 3 ¿La ditu gan, che gurobnisnu con laj Jesucrist, najcni si'c ni ñajza nuurnu gujtnu si'c ni gujt Jesucrist? 4 Sa'csi che gurobnisnu bigatznäjnuni si'c lo yälgujt, te sigajcni huäjs Jesucrist lo yälgujt xcuent xcälñibeer Dios, sigajcza ñaj nuurnu sajc guidxunnu lo te yälñabañcoob.

5 Sa'csi palga gujcnu tejsi con laani lo xcälñujtni che birobnisnu, sigajcza sajcnu tejsi con laani lo yälñabañsac lo rebeñgut. 6 Ni'cni xcärienbiejwnu cuaj lo cruz con laani, te badzucajni rextöjlnu, te di gacdiru guinibee dojl loonu. 7 Sa'csi nani agujt, di gacdiru guinibee dojl lojni. 8 Palga nuurnu agujtnu con Jesucrist, rililaaznu sibañsaczanu con laani. 9 Sa'csi nadonpacnu gubañsac Jesucrist loj rebeñgut, ni'c diruni guet, diru yälgujt ga'p yälñibeer lojni. 10 Che gujt Jesucrist, gujtni xcuent dojl, luxh diru gacdi guinibee dojl laani par tejpas; ñaj ni gubañsacni, nabajñni nez loj Dios. 11 Ni'cni la'tu colguchaag cuent najctu si'c te bengut lo dojl, luxh nez loj Dios, colguchaag cuent nabannäjtu Jesucrist.

12 Ni'cni na'c gusaantu guinibee dojl tiejxhtu te guntu si'ctis ni rlaiz tiejxhtu. 13 Na'cruza gusaantu jiajb guideb lagaa tiejxhtu lo dojl te guntu cosguijdx. Maazru hueen colgudeed tiejxhtu lo Dios si'c te bejn nani gubañsac lo rebeñgut, ñajza colgudeed guideb lagaa tiejxhtu te guntu recoshueen si'c ni rlaiz Dios guntu. 14 Sa'csi diru dojl guinibee lojtu, sa'csi dirutu chu loj xleii toMoisés, sa'csi yu'tu lo xcälñulaslaz Dios.

La'tu najc si'c remos

15 ¿Xho gacni ñaj? ¿La sajc jienrunu dojl ñaj ni dirunu chu lo leii sa'csi yu'nu lo xcälñulaslaz Dios, ä? ¡Xho gacni si'c! 16 La'tu nansa'ctu palga yu'tu si'c te mos loj te lam te gusobdiajgtu xtiidxni, najcactu xmos bejn nani rusoobtu xtiidxni. Ni'cni, palga gusoobtu xtidx dojl, ni'c najc xlamtu, ni'c siädñä yälgujt lojtu. Palga gusoobtu xtidx Dios, ni'c najc xlamtu. Dxejc sajctu beñnaya nez loj Dios. 17 Xquixtios lo Dios, galoo gujctu xmos dojl, per ñaj guideb lastootu basobdiajgtu xtidxcoob Dios, huililajztu xtiidxni ni basule'nu lojtu. 18 Luxh agulaatu lo dojl, biädjiajctu xmos Dios lo dzunsa'c. 19 Narä cagusule'ä diidx con sa' didx guyasire sa'csi gajdtu gacbesa'c xho najc xnezyuj Dios. Che gujctu xmos dojl, guideb lagaatu bejntu dojl, bejntu latsiaj, luxh ni'c satajltis latsiaj ni bejntu. Naj ni najctu xmos Dios lo dzunsa'c, guideb lagaatu colyejnru dzunsa'c, te si'c sidajlru dzunsa'c ni guntu sa'csi najctu beñnaya nez loj Dios.

²⁰ Sa'csi che gujctu xmos dojl, di rextidx Dios guinibee la'tu. ²¹ Naja', ¿xhini'c bejntu gaan che gujctu xmos dojl, bejntu recos ni rtuinäjtu naj? Ni xnezyuj recosga rdzujñ lo yälgujttis. ²² Per naj, sa'csi agulaatu lo dojl, abiu'tu najctu xmos Dios, sujntu sajctu beñnaya nez loj Dios, luxh xnezyuj recoscoobre rdzujñ lo yälñabannäj Dios par tejpas. ²³ Xcälrajx xten dojl najc yälgujt, per nani runidx-xlia' Dios najc xcälñabannäj Dios par tejpas xcuent ni bejn Jesucrist xtadnu.

7

Yälrluui ni rudeed yälguchnaa

¹ Caniä lojtu ni najñ xleii toMoisés. ¿La ditu gan, resa'ä, xleii toMoisés rnibee loj te bejn guideb nabajñni lo guedxlijre? ² Najcni si'c te gunaa nani bachñaa te niguii. Nanabpac cuäznäjni chäälni guideb nabajñni. Si'c rnibee leiiga. Palga guet chäälni, diru gacdi guinibee leiiga lojni xcuent chäälni. ³ Ni'cni, lañ ni nabajñ chäälni gunaaga, palga cuäznäj gunaaga ste'ca niguii, cayujñni dojl sirilajni gunaguijdx. Palga agujt chäälni gunaaga, agulaani lo leiiga, sajç guchnaani stee niguii, xhet dojl di cayujñni, dizani guirilaj gunaguijdx.

⁴ Ni'cni la'tu, rebetzä, sigajcza agulaatu lo leiiga, sa'csi najcni si'cni gujctu si'c beñgut lo leii che gujt Jesucrist lo cruzj, te naj sajç jiu'tu lo ste'ca bejn, loj lagajç Jesucrist nani gubansac loj rebegut te sajç jiennu redzunsac ni rlazj Dios jiennu. ⁵ Sa'csi lañ ni gubajñnu lo yälñabanbiejwga, lagajç rediidx nani rñii leiiga di gacdi gun bejn, lagajç recosga rlazj gun tiejxhnu, luxh si'c sozaatisnu lo xnezyuj yälgujt. ⁶ Naj abiriinu lo leiiga, sa'csi agujtnu lo leiiga nani gunibee loonu galoo. Naj con xpriitcoob ni yu' neñ lastoonu yu'nu lo Dios, xhet con xcärienbiejwdi ni gojpnu che nanab gusoobpacnu leii.

Redojl nani yu' tiexhä

⁷ ¿Xhixhni'c guiniinu naj? ¿La dojl najc leii, ä? ¿Xho gacni si'c! Palga dina niembeä xhi caj lo leiiga, dizana niacheä cayunä dojl. Dina niacheä cayunä dojl che rlazä xca'a xhixten ste'ca bejn palga dina niolä lo leii rediidxre: “Na'c chuguij lajzlu rehxixten bejn.” ⁸ Ni'cni lagajç diidx ni caj lo leiiga bejn guyuguij lazä rehxixten bejn sa'csi nancheä najcni dojl. Paru xheti leii, xhetiza dojl, agujtni. ⁹ Galoo gubanä xhet leiidi nanä, luxh che biääd diidx ni rnibee leii, gucheä xhini'c najc dojl, dxejç banitä lo Dios, si'c ni gutä. ¹⁰ Luxh baxhañ Dios leiiga loonu te jiuäni, te xca'ä yälñabajñ, luxh alga bazenni benä dojl, banitä nez loj Dios, gutäti dxejç. ¹¹ Con leiiga, basguee dojl narä, bejñni narä si'c te beñgut nez loj Dios.

¹² Ni'cni, leii najc dxan, näjza rediidx ni caj lo leiiga najc dxan; hueen najcni, didxgului najcni. ¹³ ¿Dxejca'? ¿La nani najc te coshueen huinä narä lo yälgujt, ä? ¿Xho gacni si'c! Dojl najc ni huinä narä lo yälgujt. Te si'c xcuent leiiga ni nasa'c, jienlojni dojlpac najc dojl sa'csi bagu'tni narä con te coshueen, te lagajç rediidx ni caj lo leiiga jienloj lacti latsiaj najc dojl.

¹⁴ Sa'csi nadonnu leiiga najc xtidx Dios, luxh narä nacä te beñ guedxliujre, nacä xmospac dojl. ¹⁵ Sa'csi dina gacheä xhini'c runä. Dina gunä recos nani rlazä gunä, alga cayunä latsiaj nani dipacna rlazä gunä. ¹⁶ Naj palga narä runä latsiaj nani dipacna rlazä gunä, lagajcza ni'c ruluii hueenca najc leii. ¹⁷ Naj, diruni gac narä ni cayujñ latsiaj, sa'csi yu' dojl neñ lastoä, ni'c ni cayujñ runä latsiaj. ¹⁸ Sa'csi narä nanä neñ lastoä, nalajznu lo tiexhä, xhetliidi cossa'c di yu'; sa'csi rlazä gunä cossa'c, per dina gacdiipä te gunäpac recossa'cga. ¹⁹ Sa'csi dina gunä redzunsac nani rlazä gunä, alga latsiaj nani

diru rlazä gunä, ni'c runä. ²⁰ Ni'cni palga runä latsiaj nani diru rlazä gunä, xhet narädi runäni, dojl ni yu' tiexhä, ni'c ni cayujn runä latsiaj.

²¹ Ni'cni narä, nani rlazä gunä redzunsac, rdxälä leiire: yu'pa dojl tiexhä. ²² Sa'csi neñ lastoä, rlazäpac gusobä diidx xten xleii Dios. ²³ Luxh ruhüiä garenca leii yu' guideb lagaa tiexhä, ruchagdijl ni leii ni yu' xcärienä, ru-teedzani narä ladznäa xleii dojl nani yu' guideb lagaa tiexhä.

²⁴ ¡Proobza narä! ¿Chuni'c gusläa tiexhä ni nungäj! guet xcuent dojl? ²⁵ ¡Xquixtios loj Dios sa'csi Dad Jesucrist sajc gusläa nuurnu lo dojl! Ni'cni con xcärienä rusobä xtiidx Dios, yu'ä lo xleii Dios, niluxh tiexhä rlazj gusoob xtiidx dojl, chuni lo xleii dojl.

8

Yäl nabajñ ni najc xcuent Sprit Dxan xten Dios

¹ Ni'cni naj rut rajcdi rbe'c xcälquij renani ahuililajz xtidx Jesucrist, renani diru jiu gunreni latsiaj ni rlazj gun tiejxhrene, alga riurureni rujnreni ni rnibee Sprit Dxan xten Dios ni rbäjz neñ lastooreni. ² Sa'csi leii xten Sprit Dxan xten Dios ni rudeed yäl nabajñ xcuent Jesucrist, abasläani narä lo yäl rnibee xten xleii dojl näjza yälgujt. ³ Sa'csi nani di niajcdi niujn leibiejw, sa'csi dini niajc nadip lo rebenguedxliuj te gacreni beñnaya nez loj Dios, ni'c bejn Dios che baxhalni Xi'nni Jesucrist, si'c te beñ guedxliujre xcuent dojl, te bejn ni yäl guxhtis lo dojl ni rnibee tiejxh bejn. ⁴ Te si'c gac xcäl guxhtis xten leibiejw lo tiejxh nuurnu, renani dirunu gusoob nani rlazj gun tiejxhnu, sa'csi naj rbajñnu si'c ni rnibee Sprit Dxan xten Dios ni yu' neñ lastoonu.

⁵ Sa'csi renani rusoobtis nani rlazj gun tiejxhrene, rujntisreni xhigab xcuent redojlga, luxh renani rusoob xtidx Sprit Dxan xten Dios rujntisreni xhigab xcuent nani rlazj Dios gunreni. ⁶ Sa'csi renani yu'tis yejcreni nani rlazj gun tiejxhrene, sejtreni, sinijtreni; luxh renani yu'tis yejcreni nani rnii Sprit Dxan Dios, reni'c sibecdxilajzreni, sica'reni yäl nabajñ lo Dios par tejpas. ⁷ Te xcäriejn nani riutis ni rlazj gun tiejxh bejn rdxe'ch Dios lojni sa'csi dini gusoob xleii Dios, luxh nicla gac gunnini. ⁸ Renani nabajñtis te gunreni latsiaj ni rlazj gun tiejxhrene di Dios guibalaznäjreni.

⁹ Luxh la'tu dirutu gun si'ctis ni rlazj gun tiejxhtu, ni'cni rujntu si'c ni rlazj Sprit Dxan xten Dios guntu, palga rbäjz ni neñ lastootu. Palga yu' chu tejtü ni di Sprit Dxan cuääz neñ lastooni, di ni'c gac xpejñni. ¹⁰ Palga rbäjz Jesucrist neñ lastootu, agujt tiejxhtu xcuent dojl, xpirttu nabajñ sa'csi anajctu beñnaya nez loj Dios. ¹¹ Luxh palga neñ lastootu rbäjz Sprit xten nani baspañsac Jesucrist loj rebengut, lagajc nani baspañsac Jesucrist lo rebengut suspañsac tiexhnu ni nabajñ lo guedxliujre xcuent Xpirtni nani yu' neñ lastoonu.

¹² Ni'cni rebetzä, najcnu bejn ni cuaj di'n, xhet lojdi tiexhnu te jiennu si'c ni rlazj gun tiexhnu. ¹³ Sa'csi palga cayujntu si'c ni rlazjtis gun tiejxhtu, sejtpectu. Palga nabajñtu xcuent Sprit Dxan xten Dios ni rbäjz neñ lastootu, sibälaztu latsiaj ni rlazj gun tiejxhtu, sibaññajtu Dios par tejpas.

¹⁴ Sa'csi guiraa renani rulüi Sprit Dxan xten Dios guiraa reni'c najc rexi'n Dios. ¹⁵ Naj ditu nica' te sprit xten te mos te chusactu lo yälrdxejb, alga cua'tu sprit xten ni najc si'c te bisiäjb ni cua' bejn si'c xi'npacni, naj najcnu xi'nni, ni'cni sajc gäbnu lojni: "Guejblu, Xtadä." ¹⁶ Sa'csi lagajc Sprit Dxan xten Dios rulüi loj xpirtnu, najcpcnu xi'n Dios. ¹⁷ Luxh palga najcnu rexi'nni, sica'zanu yäl nasa'c lo Dios, tejsi yäl nasa'c con Dad Jesucrist, palga guliini tednu lagajc trabajw ni gudejdni xcuent xtiidxni, te tejsiza siliä'p xpala'nnu con laani.

¹⁸ Sa'csi narä runä xhigab re TRABAJW ni cadej dnu nen redxejre, digacdi gun tebloonureni con yälrdimbicha' nani churu guihuiinu. ¹⁹ Sa'csi guiraa recos nani benchee Dios lo guedxliujre, cabäzreni, yuduxhreni gaan fiireni dxej che gululoj Dios chuni'c najc rexi'nni. ²⁰ Guiraa recos ni gulecxtiej Dios lo guedxliujre, xlia'si gujcreni, xhet sa'csi si'c rlaizdi recosga, per sa'csi si'c bejn Dios, ni cabäzjtis ²¹ guslaapacni guiraa recos ni bencheeni lo guedxliujre lo xcälrnibee yälgujt, yälrnitloj, te dxejc sajc jiu'ni lo yälrbedxi xten xcälrdimbicha' xten rexi'n Dios. ²² Guiraa recos ni gulecxtiej Dios lo guedxliujre entis roonreni, guira dxej rdejdreni trabajw, si'c rdejd te gunaa trabajw che rajl xi'nni. ²³ Luxh xhet nani tre'tis lo guedxliujdi, näjza nuunu ni yu' Sprit Dxan xten Dios nen lastoonu, roonzanu cabäaznu dxej cheni xca' Dios nuure si'c rexi'nni, cheni guscoobzani tiexhnu. ²⁴ Sa'csi xcälrlililaaznu ni rbäaznu, ni'c bejn gulaanu luxh yälrbäz ni guyasi rien, di ni'c gac yälrbäz, sa'csi çchu laa ni cuäaz xcuent te cos ni ala bahuiini? ²⁵ Palga cabäaznu xcuent te cos ni gajdnu guihuii, rbaali laaznu, rsiudzu'tznu rbäznu guihuiinu gacni.

²⁶ Sigajcza racnäj Sprit Dxan xten Dios nuure cadre xheti yälrutijp laaznu sa'csi nicla guidonnu xho mood riäj guiniab bejn lo Dios. Luxh lagajc Sprit Dxan ni yu' lastoonu rniabni lo Dios xcuent nuure con yälrbedxnen nani nicla gajd bejn gäb con diidx xho najcni. ²⁷ Dios, nani rula'tz lastoonu, nanchee xhini'c rniab Sprit Dxan xtenni xcuent nuurnu, sa'csi rniabni si'cpac ni rlaiz Dios guiniabnu xcuent rexpejn pac Dios.

Siennu gaanpac loj guira'ti

²⁸ Nadoncheenu guira'ti ni rsiajc rebejn ni sanälajz Dios, reni agule Dios te gunreni xtzuunni rsiajcrenini te gun Dios gac recosga par xcäl'nasa'creni. ²⁹ Sa'csi renani biembee Dios galooli, reni'c gule Dios cheni gajdli guirixtiej guedxliujre, te gacreni si'c ni najc Xi'nni; te gacza Xi'nni ganid loj guiraa ni najc famil xten Dios. ³⁰ Renani guleni galooli, reni'c gurejdxni; renani gurejdxni, bejnzani najcreni bejnaya nez loj Dios; renani bejnni najcreni bejnaya nez loj Dios, gulä'pzani xpala'nreni.

³¹ çXhixhni'c guiniinu xcuent dee? Palga yu' Dios xlaadnu, çchuxh ni'c najc ni gun gaan loonu? ³² Dios nani di nudxojn Xi'nni, nani cuäjb cuaj Xi'nni lo cruzj te gujtni, te gudijxni xcuent xtojlnu, çxho dini guniidx loonu xcuent Xi'nni guira'ti nani rquiinnu, ä? ³³ çChuni'c sajc cue'c xhi xcälquij reni agule Dios nez lo Dios, ä? Ni lagajc Dios najc nani rni najcnu bejnaya nez lojni. ³⁴ çChuni'c najc nani cue'c xhi xcälquijnu nez lo Dios? Jesucrist najc nani gujt por nuure, luxh et ni'ctis. Laani gubansaczani loj rebengujt, luxh naj sobga'ni xladbee Dios cadre rnibeeni; laazani cabejdx canabni lo Dios xcuentnu. ³⁵ çChuni'c sajc gudzucaj nuurnu lo yäl'sanälajz xten Jesucrist: trabajw, o yälxliajs, o yälrusacsí, o yälrliaan, o yälxhabääl, o yälrdxejb, o te spaad, ä? Nicla tejni. ³⁶ Si'c ni caj lo guijt ni caj xtidx Dios:

Xcuentlu, sa'csi najcnu xpejnlu caye'tnu guixe-guixee.

Ruchaagreni cuent najcnu si'c xiil ni aguro' te ju't bejnni.

³⁷ Luxh loj guiraa recosre, sujnpacnu gaan xcuent nani sanälajz nuure, sa'csi sacnäjpacni nuure. ³⁸ Sa'csi anancheä nicla yälgujt, niclza yäl'nabajñ, nicla rexangl Dios, niclaza renani rnibee, nicla recos ni yu' naj, niclaza recos nani churu gac, niclaza yäl'milaagwr, ³⁹ nicla jiaroduxh, niclaza jäjtpac, niclaza xhitis cos ni guc-chee, nicla tej redee di gacdi gudzucaj nuurnu lo xcäl'sanälajz Dios, yäl'sanälajz ni rajpza Dad, Jesucrist.

9

Dios agule reben Israel

¹ Caniä didxguliipac lojtu sa'csi rililazä xtidx Jesucrist. Dina guiniä didx-xhii. Sprit Dxaan xten Dios caguluii xcärienä laaca rniä; ² cayac-huinduxh lastoä, sanuutis yälxliajsga. ³ Sa'csi narä rlazä malaii sajc lagajc narä nitlöä lo Dios te sajc gacnää resa'ä lo guedxliujre, rexpejn Israel. ⁴ Sa'csi laareni najc xagdoo toIsrael, luxh laareni nungäjäl gacreni si'c xi'npac Dios. Gubannäj Diosreni. Bia'n Dios didx con laareni. Basa'n Dios xleii Moisés lojreni. Bazuxhijbreni nez lo Dios nen guidoo. Sica'reni reyäl'nasa'c xten Dios palga jiureni xtiidxni. ⁵ Laareni najc rexagdoo xten toxtadgoldoonu ni gubajn agujc xhero. Jesucrist gujca xagdoo xten toIsrael che gojlni si'c te bejn guedxliuj. Laani najczani Dios loj guiraanu. Suchä'p xpala'nni par tejpas. Sugacni si'c.

⁶ Luxh dini gac si'cni abanijt xtidx Dios nani bia'nni loj toIsrael. Sa'csi xhet guiraadi rebejn ni najc xagdoo toIsrael najc xpejn pac Israel. ⁷ Diza guiraa reni najc rexagdoo toAbram gac xi'nguliipacni sa'csi räjp Dios lo toAbram: “Rexagdodoolu nani guigab najc reni gac xagdoo Isaac.” ⁸ Ni'cni xhet guiraadi rexagdoo toAbram najc rexi'n Dios, xtebtis renani chalilajz xtiidxni, reni'c najc xi'nni. ⁹ Sa'csi bia'n Dios diidx loj toAbram: “Stebijz, lagajc bäiire guibisacä, te dxejc chu te xi'n Sara.”

¹⁰ Xhet diidxtisga gunii Dios. Guniizani lo toRebeca, che nuxi'nni cua'ch, xi'n chääl'ni, toxtadgoolnu Isaac. ¹¹ Ni'cni ansde gaal rexi'nni, ansde niujnreni te dzunsa'c o te dzunguijdx, te soobpac xtidx Dios xcuent chuni'c cueni lo guiro'p rebäzre, xhet sa'csi bejndireni dzunsa'c, per sa'csi agule Diosni, ¹² ni'c räjp Dios lo toRebeca: “Xingangaloolu gac xmos xinhuinlu.” ¹³ Si'cza caj lo guijt rediidxre: “Sanälazä Jacob, niluxh bidxchnää Esau.”

¹⁴ ¿Xhini'c guiniinu naj? ¿Xhet laadi rujn Dios, ä? ¿Xho gacni si'c! ¹⁵ Sa'csi räjp Dios loj toMoisés: “Sulaslazä chutis bejn nani rlazä gulaslazä, sacnää chutis bejn nani rlazä gacnää.” ¹⁶ Ni'cni dini gac xcuent ni rlazj rebejn gac, dizani gac xcuent nani rujn rebejn. Rajctisni si'c rlazj Dios nani rulaslazj bejn. ¹⁷ Ni'cni caj lo guijt xten Dios che gunii Dios xcuent Faraón: “Narä benä gujclu reii xten Egipto te guluiloj xcälrnibeä, te guiliä'p bejn xpala'nä guideb guedxliujre.” ¹⁸ Rulaslazjni rebejn nani rlazjtisni, runnadipzani lastoo bejn nani rlazjtisni.

¹⁹ Naj la'tu siniitu loä: “¿Xhicuent rucuaquijni bejn? ¿Chuni'c sajc sudzu'tz nez loj nani rlazjni gac, ä?” ²⁰ ¿Chuxh luj, bejn guedxliuj, te jieinäjlu Dios? Xhixh säjb te gues loj nani bencheeni: “¿Xhicuent bejnlu narä scree?” ²¹ Gurniälojlu. Bejn nani runchee guejs, ¿la di gacdi gunni si'ctisni rlazjni con bajnga, ä? ¿La di gacdi guncheeni te guesa'c nägajca te guesyuj ni xhet sirbdi con lagajc bajnga?

²² ¿Xhiru najc, palga Dios rlazjni guluilojni xho rujni yälguxhtis, näjza rlazjni guluilojni xcälrnibeeni, gopnäjni pasens renani nungäjäl gac yälguxhtis, te nitlojzareni, ä? ²³ Bejni si'c te guluilojni lacti sajc xcälrdimbicha'ni loj renani galooli guleni chú lojni lo xcälrdimbicha'ni. ²⁴ Lagajc nuurnu najcnu reni aguleni; xhet xtebtis loj rexpen Israel guleni nuurnu, näjza loj rebejn ni di gac rexpen Israel guleni nuurnu. ²⁵ Cajza lo guijt ni bacuaa Oseas: Renani di gac xpenä, reni'c cuälä “xpenä”.

Luxh nani dina ninälazä, sinälazäni.

²⁶ Dxejcti lagajc cadro räjpreni lojreni:

“Ditu gac rexpenä”,

lagajc ro'c säjpreni lojreni:

“La'tu najctu xi'n Dios ni nabajñ par tejpas.”

²⁷ Cajza lo guijtz ni bacuaa Isaías: “Mase najc xhidajl rexpē Israel si'c najc yujxh ni tre' ro' nisdoo, guxii gac reni laa lo dojl. ²⁸ Sa'csi susoobpac Dad, Dios xtiidxni xcuent xcālguxhtis rebeñ guedxliuj, luxh siojbza gunnini.” ²⁹ Guniiza Isaías, xcuent nani churu gac, bacuaani:

Palga di Dios ni yu' xhaguibaa nusa'n gaii xagdoob rebeñ tiemp, niajcnu si'c gujc Sodoma nājza Gomorra, reguejdx ni gunitloj.

Xtidx Dios nāj rexpē Israel

³⁰ ¿Xhini'c sajc guiniinu nāj? Rebeñ nani di gac xpē Israel, direni niguiil xho gacreni beñnaya nez loj Dios, niluxh agujcreni beñnaya nez loj Dios sa'csi huililajzreni xtidx Jesucrist. ³¹ Luxh rexpē Israel, mase sanuutisreni lo xleii Moisés ni ruluii xho gac beñ beñnaya nez loj Dios, banijtreni, direni niujn gaan nusoobreni guideb leiiga. ³² ¿Xhicuent gujcnu si'c? Sa'csi direni nililajz xtidx Dios, alga rlanjreni guntisreni dzuun xten leii, naaren si'c gacreni beñnaya nez lo Dios. Ni'cni gulaj ni'reni lo guij ni rutienta' beñ, nalajznu direni nililajz xtidx Dios xcuent Jesucrist. ³³ Si'cza bacuaa Isaías, rājpn:

Aguleä te beñ lo guedx Sión ni gac si'c te guij cadre rtiäjñ ni' beñ, te guij ni rusälta' beñ.

Chutis tej nani chalilajz xtiidxni, dini jianxtujy.

10

¹ Rebetzä, rlazduxhä chalilajz rexpēä xtidx Dios. Rniabduxhä lo Dios te guslaanireni lo xtojñreni. ² Narä rniäpac nancheä ruzuxhijb rexpē Israel lo Dios, niluxh direni gumbesa'c xhini'c rlanj Dios gunreni. ³ Sa'csi direni niacbee xcuent xho rajc te beñ te beñnaya nez loj Dios, ni'c rlanjreni gunreni dzuun si'c ni caj lo leii te gacreni beñnaya nez loj Dios, ni'cza direni nusoob xtidx Dios te gacreni beñnaya nez lojni. ⁴ Abasoob Jesucrist xtidx Leii, ni'cni che chalilajz beñ xtidx Jesucrist, anajcreni beñnaya nez loj Dios.

⁵ ToMoisés bacuaa rediidxre: “Chutis ni rlanj gac beñnaya nez loj Dios sa'csi rusoobni xtidx leii, nanab gusobsa'cpacni diidxga guideb nabajñni lo guedxliujre.” ⁶ Xcälñayareni nez loj Dios sa'csi rililajzreni xtidx Jesucrist, rnii scree: “Na'c guiniitu neñ lastootu, ¿chuni'c chä'p xhaguibaa?” nalajznu, te jädñäsacni Jesucrist loj guedxliuj. ⁷ Na'cza gäbni: “¿Chuni'c jiajt gabijl?” (nalajznu te chaxiini Jesucrist loj rebeñgut). ⁸ ¿Xhini'c rniini nāj? Rniini: “Diidxga suga' gajxh ro'tu, neñ lastootu.” Nalajznu, diidx xcuent yärlililaaz nani cagusule'nu lojtu. ⁹ Rniinu lojtu, palga guiniitu con ro'tu, Jesucrist najc Dad loonu, palga chalilajztu baspañsac Dios Jesucrist loj rebeñgut, suslaani la'tu lo dojl. ¹⁰ Sa'csi con lastooni rililajz biniet xtiidxni, ni'c rajcni beñnaya nez loj Dios; luxh che rcäjpza biniet con ro'ni, Jesucrist rnibee loonu, ruslaa Diosni lo dojl.

¹¹ Sa'csi rnii xtidx Dios scree: “Chutis ni rililajz xtidx Dad Jesucrist, dini jianxtujy.” ¹² Sa'csi guiraa rebeñ najc tebloj nez lojni, rexpēñ Israel sigajc rebeñzajt, sa'csi lagajc laani najcni Dad lo guiraareni, rulaslazduxhni guiraa renani rbedx-rniab lojni. ¹³ Lo xtidx Dios caj rediidxre: “Chutis ni rbedx-rniab lo Dad, silaani lo xtojñni palga rililajzni xtidx Dios.” ¹⁴ ¿Xho gac guiniabreni lo Dad, palga direni chalilajz xtiidxni? ¿Xho gacza chalilajzreni xtiidxni, palga gajd diajgreni jieñ xtiidxni? ¿Luxh xho jieñ diajgreni xtiidxni palga rut rusule'di diidxga lojreni, ä? ¹⁵ Luxh ¿xhoza gusule'reni diidxga palga rut guxhaldireni? Si'cni caj lo guijtz: “Chipza saru najc ni' renani riädñä diidx xcuent cossa'c, yälrbedcxi lajz rebeñ.”

¹⁶ Xhet guiraadireni rusoob xtiidxni, sa'csi guniiza toIsaías: “Dad, ¿chuni'c chalilajz xtiidxnu?” ¹⁷ Rililajz bejn xtidx Dios che rucua diajgrendi diidxga; rucua diajgzareni che yu' chu rusule' xtidx Jesucrist.

¹⁸ Naj arniä: Gajdpac diajgrendi jiejn xtiidxni, o ¿la babiejn diajgrendi, ä? Pues abiejn diajgrendi, sa'csi lo xtidx Dios caj scree:

Abire'ch xse'reni guideb guedxliuj,

abidzujnza rextiidxrendi lo guiraa reguejdx ni tre' lo guedxliujre.

¹⁹ Rniäza: Dipac rexpén Israel niacbee, o ¿la gucbeerendi, ä? Galooli gunii toMoisés rediidxre:

Sunä gudxojuentu xcuent rebejn ni di gac te guejdx,

con te guejdx nani di gacbee suche'chä la'tu.

²⁰ Diza toIsaías nidxejb guniini rediidxre:

Renani di niguiil narä, bidxäjl narä,

baluiloäza loj renani di niniabdiidx narä.

²¹ Guniiiza toIsaías xcuent rexpén Israel:

Desde galooli, dxej-yääl basgaä naä lo rebejn ga te niureni xtidxä,

luxh najcreni bejn ni di gusoob diidx, rutzureni didxnaj.

11

Rexpén Israel nani gulaa lo dojl

¹ Arniä: ¿La agulälaz Dios rexpén Israel, ä? ¡Xho gacni si'c! Ni lagajc narä nacä te xpen Israel, te xagdoo toAbram, nadxagä lo resa' toBenjamín. ² Di Dios nibälaz rexpejn ni, xpen Israel nani guleni galooli che gajdli guirixtiej guedxliuj. O ¿la dilu gacbee xhi caj lo xtidx Dios cadre rnii xcuent Elías, xho gunabduxh Elías didxnaj lo Dios xcuent rexpén Israel, ä? Räjpn scree: ³ “Dad, abagu'treni guiraa reniguii nani gunii xtiidxlu, abatzujlreni rexquidoolu, xtebtis narä bia'nä, luxh naj rlajzrendi ju'treni narä.” ⁴ Luxh, ¿xhini'c räjp Dios lojni? Räjpn: “Abalucheä gajdz mil bejn nani gajd guzuxhijb nez loj Baal.” ⁵ Si'cza naj, abia'n te chinae' rexpén Israel nani agule Dios xcuent xcälrulaslajz ni. ⁶ Dxejc palga ruslaani nuure lo dojl xcuent xcälrulaslajz ni diruni gac sa'csi yu' xhi dzuun biennu te nuslaani nuure lo dojl. Paru si'c najcni diru xcälrulaslajz Dios gac yälrulaslajz.

⁷ ¿Dxejca'? Di rexpén Israel nidxäl nani caguiilreni, luxh rebejn nani agule Dios, ni'c bidxäl ni, luxh ste cuaareni, aguyalajzrendi. ⁸ Gujcn si'c caj lo xtidx Dios:

Bascäy Dios xcäriejnreni, näjza balojni di jien,

lo dxe najli di diajgrendi jiejn.

⁹ Guniiiza toDavid, scree caj lo xtidx Dios:

Sugun xmex lanijreni jiajbreni,

te gac guiga'reni,

sugacni si'c guij ni rulani' bejn, te gacreni yälguxhtis.

¹⁰ Suguscäy Dios balojreni te na'c fisa'creni,

sujie't dejtrendi, sutedreni trabajwduxh par tejpas.

Yälruslaa lo dojl xten bejn ni di gac xpen Israel

¹¹ Naj rniabdiidxä: ¿La biajb rexpén Israel te gunijtreni par tejpas, ä? ¡Xho gacni si'c! Sa'csi biajb rexpejn Israel, ni'cni gojl biääd yälruslaa lo dojl lo bejn ni di gac xpen Israel, te si'c guisiäblajz lajz rexpén Israel laareni lo dojl. ¹² Palga xcuent dojl ni bejn xpen Israel gojp reben guedxliuj xcäl'nasa'c Dios, palga xcuent yälrunijx xten rexpén Israel guyu' xcäl'nasa'c Dios par rebejn ni di gac xpen Israel, aticaxh chu xcäl'nasa'creni che gusoob xpen Israel xtidx Dios.

¹³ Naj caniä lojtu ni najc bejn ni di gac xpejn Israel. Gule Dios narä te gusule'ä xtiidxni lojtu, ni'cni caläpä xpala'n xtzunä, ¹⁴ te don xho gunä te guisiäblajz reben ladxä ni najc xpen Israel, te si'c chalilajzreni xtidx Jesucrist. ¹⁵ Palga gulecdxireni lajz reben guedxliuj con Dios sa'csi gulälaz rexpem Israel xtidx Jesucrist, aticaxh che chalilajz rexpem Israel rextidx Jesucrist, sibansac renani najc si'c bengut. ¹⁶ Palga tla' cojb najc hueen, guideb cojbga najc hueen. Sigajcza najc te yajg; palga xlobaani najc hueen, guidebni najc hueen.

¹⁷ Rexpem Israel najcreni si'c te yajg oliib; palga gutiuugreni te naa yajgga, dxejc ro'c guquidreni naa ste'ca yajg te guibajnni con xtiejn yajg oliibga. ¹⁸ Ni'cni, na'c gactu guyalajz lo renaapac yajgga. Colgusnaj lajztu, xhet la'ditu ni rudeed yäl'nabajn lo xlobaa yajgga, lobaaga ni runiidx yäl'nabajn lojtu.

¹⁹ Dxejc colguinii: "Batiuugreni naapac yajgre, te gujc biguidä cuä' yajgga." ²⁰ Guliipacni, biru' naapac yajgga sa'csi direni nililajz xtidx Dios luxh la'tu biguidtu cuä' yajgga sa'csi huililajztu xtiidxni. Na'c gactu guyalajz, colguidxerb, ²¹ sa'csi palga di Dios nutedbia renaa yajgga, diza Dios gutedbia la'tu. ²² Bahuii j lacti hueen najc Dios! Luxh lacti niälajzzani; con renani banijt najcni niälajz, luxh lacti rulaslajz Dios la'tu palga chanuu jiutu xtiidxni. Palga ditu jiu xtiidxni, näjza la'tu sudzucaj Dios. ²³ Luxh sigajcza reni bidin, palga di chanuu cuälazreni xtiidxni sajc suquidsac Diosreni lo yajgga. ²⁴ Luxh la'tu najctu benzijt, najctu si'c naa te yagoliib ni xtebca gulejn nen dajn. Luxh batiuugni la'tu te baquiidni la'tu lo te yagoliib ni najc yagsa'c ni readuxh oliib lojni, mase xhet si'cti najc olibguijxhga, jaticaxh rexpem Israel ni banijt najc si'c naapac xten yagolibsa'cga ni bidin, palga chalilajzpacreni xtidx Dios, suquidsac Diosreni loj yajg ni najc xtenpacreni!

Che laapac rexpem Israel lo dojl

²⁵ Rebetzä, rlazä gacheetu xcuent te diidx nagajn, te di naatu nanduxhtu. Dee najc didx nagajnga: yu' rexpejn Israel ni guc najd lastooreni te direni nililajz xtidx Dios, hasta guisa' redxej ni chalilajz rebenzijt xtidx Dios. ²⁶ Dxejcti siliaapac guiraa rexpem Israel lo dojl che chalilajzreni xtidx Dios, sa'csi si'c caj lo xtidx Dios, cadre caj rediidxre:

Nani ruslaa sajc ben guedx Siön,
luxh sudzucajni xtoj renani najc xagdo to Jacob.

²⁷ Dee najc diidx ni bia'nä con laareni,
che gudzucaä xtojreni.

²⁸ Naj, najcreni xcontraar Dios sa'csi rdxe'chreni xcuent xtidx Jesucrist, te chalilajztu; niluxh Dios sanälajzreni sa'csi si'c abia'nni diidx con retoxtadgoldooreni. ²⁹ Sa'csi rut rajc di rudzucaj nicla yäl'nasa'c ni rudeed Dios, niclaza yäl'rbejdx xten Dios. ³⁰ La'tu galoo ditu nusoob xtidx Dios. Naj rulaslajz Dios la'tu sa'csi gulälaz rexpem Israel xtiidxni. ³¹ Sigajcza naj direni gusoob xtidx Dios, niluxh si'c najcni te gulaslajz Diosreni sa'csi balaslajzzani la'tu. ³² Dios basaan biajb guiraanu lo dojl, te si'c sajc gulaslajz Dios guiraanu.

³³ j Lacti guroob najc yäl'nasa'c xten xcäl'najn, xcäl'racbee xten Dios! Nicla tej bejn guedxliuj di gacbee guiraa rexcäl'guxhtisni, rudliidiza najn rexnezyujni.

³⁴ Si'c caj lo guijt: "¿Chuni'c gucbee xcäriejn Dios? ¿Chuni'cza abaluini? Rutliidi. ³⁵ O ¿chuni'c badedxgaa te xhi cos lojni, te quixsacnini lojni, ä? Rutliidi." ³⁶ Sa'csi loj Dios siäd guira'ti, luxh laani bencheeni guira'ti par lagajcza laani. Suguliä'pnu xpala'nni par tejpas. Sugacni si'c.

12

Yäl'nabajn rliä'p xpala'n Dios

¹ Ni'cni rulidxä la'tu rebetzä, sa'csi rulaslajz Dios nuure, colgudeed xcäl_nabajntu lo Dios te gac guiba_nsa'ctu si'cni rlajz Dios. Dee najc yälraj_npac Dios si'c ni nungäjl gan_tu Dios. ² Na'c rujntu lagajc xhigab ni rujn reben guedxliuj, colguscoob re_xhigabtu te guidxaapac xmoodtu te si'c guluii Dios xhini'c rlajzni guntu, nalajznu xhini'c najc hueen, xhini'c rdxag_lajz Dios, xhini'cza najc laapac.

³ Sa'csi balaslajz Dios narä, ni'c rusule'ä xtiidxni loj tejgatu, rniä lojtu, na'c guiliä'ptu lagajc xpala'ntu, naatu sajcrutu loj sa'tu. Col_yejn xhigabsa'c, te laaca gac xhigabtu, si'cni baniidx Dios lo tejgatu xho chalilajztu xtiidxni. ⁴ Sa'csi sigajc najc tiejxhnu, yu' xhidäl la'ni, luxh tejgareni rujn xtzuun-xtzuunreni, ⁵ sigajcza nuure nani rililajz xtidx Jesucrist, najcnu xhidajl, najcnu si'c tejsi tiejxh lo Jesucrist, mase tejganu rujn xtzun-xtzuunnu, tejsi najcnu.

⁶ Luxh sa'csi tejganu rajpnu garen-garen dzuun xcuent yäl_rulaslajz ni baniidx Dios loonu, sujienu rextzuunnu screeza: nani rajc rniä xtidx Jesucrist, suguiniini, si'c ni najc xcäl_rililajzni; ⁷ nani rajc racnäjä sa'ni, sugacnäjni; nani rajc ruluii xtidx Dios, suguluiini; ⁸ nani rajc gulijdx resa'ni, sugulijdxnireni, nani rajc rudedxlia' xhixtenni lo sa'ni, saru sugudeedni xhixtenni; nani rajc rnibee lo sa'ni, suguinibeeni con yäl_nadolajz; nani rajc rulaslajz resa'ni, sugulaslajzni con yäl_rbalajz.

Xho nanab guiba_nnu lo xnezyuj Dios

⁹ Colchanälajzpac resa'tu, na'c gunsitu si'cni rinälajztureni. Colcuälaz redzun-guijdx, col_yejntis redzunsä'c. ¹⁰ Colchanälajz resa'tu si'c rinälajz bejn rebejtzni. Colguiliä'p xpala'nreni.

¹¹ Col_yejn dzunsa'c, na'c cuedxitu. Col_yejn xtzuun Jesucrist con guideb xtijtu, guideb xcäriejntu.

¹² Colguibalajz sa'csi ahuililajztu xtiidxni. Colcuedx_i lajztu che tedtu trabajw. Colcuedx-colnabtis lo Dios guideb nabajntu.

¹³ Colgacnäjä rebejn nani rililajz xtidx Dios; sacru col_nii loj ni riädhuuitu.

¹⁴ Colguinii didxsa'c xcuent renani rusacsí la'tu, na'c gudzubdetureni.

¹⁵ Colguibalaznäjä renani rbalajz, col_yonnäjä renani roon.

¹⁶ Col_yejn tejtis xhigab con resa'tu, na'c gactu guyalajz, colguchaag loj reben nadolajz. Na'c guchalotu najctu ben_nanduxh.

¹⁷ Na'c gudzu'tu dzunguijdx loj renani rujn dzunguijdx lojtu. Col_yejn recossa'c nez loj guirasi bejn. ¹⁸ Cadrotis saj_cni, dxitis colguiba_nnäjä guiraa rebejn. ¹⁹ Rebetzä, na'c guntu xhigab lagajc la'tu gudeedtu xten renani rujn dojl lojtu, sa'csi lagajc Dios gun yäl_gxhtis lojreni, ni'cni caj lo xquijtzni scree: "Narä gunä yäl_gxhtis, narä quixä lojreni si'c naj Dad, Dios." ²⁰ Näjza: "Palga calaan nani rdxe'ch lojtu, colgudeed xhi gauni, palga cayojlni, colgudeedza xhi yäni, te si'c jianxtiujni." ²¹ Na'c gusaantu gun redzunguijdx gaan lojtu, col_yejn gaan lo dzunguijdx con recossa'c ni rujntu.

13

¹ Guiraatu nanab jiutu xtidx renani rnibee lojtu. Sa'csi xheti te yäl_rrnibee nani di Dios nudeed, luxh guiraa reyäl_rrnibee ni yu' lo guedxliujre, lagajc Dios gule'creni. ² Ni'cni renani di gusoob xtidx renani rnibee, xtidx Dios cabälazni. Luxh renani rujn si'c, lagajc laareni xcaquijreni dojl, sujn Dios yäl_gxhtis lojreni. ³ Renani rnibee di guchejb renani riu xtiidxreni, ruchejbreni renani najc bejn guijdx ni di jiu xtiidxreni. Palga di rlajztu guidxejbtu reguxhtis, bejntis dzunsa'c, dxejcti guiliä'preni xpala'ntu sa'csi rujntu dzunsa'c. ⁴ Reguxhtis rujnreni lojtu xtzuun Dios te guiba_nsa'ctu. Palga guntu dzunguijdx, colguidxejb, xhet xlia'di ca'ni spaad, sa'csi najcreni nani rujn xtzuun

Dios te gunreni yälguxhtis, te quixpac renani rujn dojl. ⁵ Ni'cni nanab jiuu rextiidxreni, xhet ganaxtis sa'csi rujnreni yälguxhtis lojtu, näjza te ga'ptu te xcäriejnasa'c, te xcäriennaya. ⁶ Ni'cni colquijx lojreni nani riäjl xca'reni sa'csi renani rnibee najc xmos Dios, luxh ni'cpac najc xtzuunreni.

⁷ Colgudeed lo guiraa bejn nani riäjl xca'reni. Colquiix loj renani nazääbtu; colquijx impuest loj ni riäjl xca'ni; colchanälajz renani riäjl chanälajztu; colguiliä'p xpala'n renani riäjl chä'p xpala'reni. ⁸ Na'c xcajlu di'n loj nicla tej bejn, di'ntis xten yälrinälajz sa'ni, sa'csi nani rinälajz xpisiñni, bejnnga abasoob xleii Dios. ⁹ Sa'csi lo xleii Dios caj scree: “Na'c guesnäjl bejn ni di gac chäällu, na'c ju'tlu, na'c cuanlu, na'c gusgueelu, na'c chuguij lajzlu xhixten resa'lu.” Luxh palga yu' xhi stee leii rsa'ni con leii ni rnii: “Chanälajzlu resa'lu si'c sanälajzlu lagajc luj.” ¹⁰ Nani rajp yälsanälajz, dini gun latsiaj lo resa'ni. Ni'cni yälsanälajz rusoo releii ni caj lo xtidx Dios.

¹¹ Colyejn guiraa redee, sa'csi anajntu xho najc redxej ni nabajñnu naj, anajntu alagojl or guibajñnu lo bacal sa'csi abidzungejxhru dxej che laanu neñ dojl lo dxej che huililajznu. ¹² Aguxhiñduxh, asiädgajxh bianij. Ni'cni cuääz jiennu redzuun gujdx ni rajc lo xcäy, te jientisnu redzunsac ni rajc rdxee, lo bianij. ¹³ Guibansa'cnu si'c riäjl guibajñ rebejn rdxee, na'c guibañnu lo yälrä', niclaza lo yälbiejy, na'c guidiesnäjn bejn ni di gac chäälnu, na'c ga'pnu rebis, na'c guidxagdilñnu resa'nu, na'c chuguij lajznu xhixten resa'nu. ¹⁴ Ni'cni colca' xcälrnibee Jesucrist te na'c guntu redojl ni rlajz gun tiejxhtu.

14

Na'c guiniyajtu rebejztu

¹ Colñii didxdoo lo rebejn nani di gumbesa'c xtidx Dios, na'c tilnäjtoreni. ² Sa'csi yu' reni rililajz nani sajc gaureni guira'ti xhi cos, niluxh nani gajd sutijp lo yälirilajz, ganaxtis berduur rajwni. ³ Nani rajw guira'ti, na'c guidxechnäjni nani di gau guira'ti; luxh nani di gau guira'ti, na'cza guiniyajni nani rajw sa'csi Dios aguleza bejnnga. ⁴ ¿Chuxh luj te guiniyajlu lo xmos te bejn, ä? Sugäb lagajc xlamñni lojni la laaca rujñni o la xhet laadi rujñni. Luxh sujñni laaca sa'csi Dad Jesucrist sujn sutijp lastooni.

⁵ Tej bejn naa sajcu tej dxej lo stee dxej, dxejc ste'ca bejn rchalo guiraa redxej najc tebloj. Xhet najcdi, tejsa bejn sugunpac lagajc xhigabni. ⁶ Nani rapda te dxej, rujñnini te guiliä'pni xpala'n Dios, luxh nani di gunni, rliä'pzani xpala'n Dios sa'csi dini gapda te dxej. Luxh nani rajw guira'ti, rajwni te rliä'pni xpala'n Dios, sa'csi rudeedzani xquixtios lo Dios; nani di gau guira'ti, nez lo Dios dini gau, rliä'pzani xpala'n Dios, rudeedzani xquixtios lo Dios.

⁷ Sa'csi nicla tejnu dinu guibajñ xcuentcanu, nicla tejzanu dinu guetxcuentcanu. ⁸ Palga nabaannu, nabaannu xcuent Dad Jesucrist; palga guetnu, rejtzanu xcuent Dad, Jesucrist. Ni'cni palga nabaannu, o palga guetnu, lañtis najcnu rexpen Dad, Jesucrist. ⁹ Ni'cni gujt Jesucrist, ni'cni gubansaczani, te sajc gacni Dad xten rebengut, näjza Dad xten rebejn nani nabajñ.

¹⁰ Dxejc luj, ¿xhicuent cubeelu bejtzlu, ä? O ¿xhicuent rdxe'chlu rhuilu lojni, ä? Ni guiragajcnu tednu nez loj Jesucrist cadre cueni te gunni yälguxhtis loonu. ¹¹ Sa'csi scree caj lo xtidx Dios:

Si'ctis ni nabañä, rniliäpac lojtu, räjp Dad Dios,
guiraa reben guedxliuj suzuxhijbreni loä,
luxh guiragajc ro'reni sicäjp narä nacä Dad Dios.

¹² Ni'cni guiraanu, tejganu sudeednu cuent loj Dios xcuent nani biennu.

Na'c guzällu bejtzlu

¹³ Ni'cni na'cru cubeenu sa'nu. Maazru hueen jiennu xhigab neñ lastoonu xhetliidi jiennu ni gun jiajb resa'nu lo dojl. ¹⁴ Narä nanä, racbeäpac guira'ti najc hueen. Jesucrist Xtadnu baluii narä si'c. Luxh palga yu' chu tej ni rchalo dini gac hueen, par laatisni dini gac hueen. ¹⁵ Palga la'tu guntu gac-huin lajz te sa'tu sa'csi yu' xhi rajwtu, dirutu chasanäj xnezyuj yälsanälajz. Na'c gunlu gunijt te sa'lu xcuent nani rajwlu, sa'csi agujt Jesucrist xcuentni. ¹⁶ Ni'cni na'c gusaanlu guiniyajreni nani najc te cos hueen par luj. ¹⁷ Sa'csi xcälrnibee Dios dini gac xcuent yälrajw, niclaza xcuent yälrä'; xcälrnibee Dios najc xcuent te yäl'nabannya nez loj Dios, näjza yäl'rbedxilajz con yäl'rbalajz xcuent Sprit Dxan xten Dios. ¹⁸ Sa'csi nani rujn si'c lo xtzuun Jesucrist, bejnğa rchaglajz Dios, luxh rebeñ guedxliuj rniiza didxsa'c xcuent sa' bejnğa.

¹⁹ Ni'cni chanuutis guidiilnu recos nani rujn chu yäl'rbedxilajz, näjza nani rujn racnäjnu resa'nu te tioobrureni loj xnezyuj Dios. ²⁰ Na'c guntu nit xtzuun Dios xcuent ni rajwtu. Guliicani guira'ti ni rajw bejn najc naya, niluxh palga gautu te cos nani gun jiajb bejtzlu neñ dojl, ni'c najc xhet laadi. ²¹ Hueen najc na'c gautu bääl, na'cza yätu bin, na'cza guntu jiajb sa'lu neñ dojl. ²² Nani rililajztu, ni'c colyajp xcuentcatu nez loj Dios. Chicbaa nani di cubee lagajc laani xcuent recos nani rniini laaca najcni. ²³ Luxh palga guntio'p lajz te bejn xcuent nani rajwni, sigubeeni lagajc laani, sa'csi dini gau xcuent yäl'rililajz, sa'csi xhitis ni di gac xcuent yäl'rililajz, lagajc ni'c najc dojl.

15

Huinälajz sa'lu

¹ Nuurnu ni agusutijpnu lo yäl'rililajz nanab gacnäjnu resa'nu nani gajd chalilazsa'c. Di gacdi guibantisnu xcuentcanu. ² Tejganu nanab chonälaaznu resa'nu lo xcäl'nabansa'cni te gacnäjnu chalilajzrureni. ³ Sa'csi nicla Jesucrist dini nibajn xcuentcani, luxh si'cni caj loj xtidx Dios: “Redidxyaj ni guniyajreni lojlu biajbreni yecä.” ⁴ Guiraa rediidx ni cuaj lo guijtz galooli, cuajreni te guluiireni nuurnu te ga'pnu yälsutijp näjza yäl'rustioblajz te gacza guibääznu lo xtidx Dios. ⁵ Dios rusutijp lajznu, Dios rutioob lastoonu. Rniabä loj Diosga gacnäjni guntu tejtis xhigab xten Jesucrist con resa'tu. ⁶ Te dxejcti tejtis gac xse'tu guiliä'ptu xpala'n Dios, Xtad Jesucrist.

Gusule' xtidx Dios loj rebenzijt

⁷ Ni'cni colca' resa'tu, renani ahuililajz xtidx Dios sigajc cua' Jesucrist nuure te guiliä'pnu xpala'n Dios. ⁸ Sa'csi narä rniä lojtu, biääd Jesucrist te gujcn si'c te mos loj rexpen Israel te baluiini xcuent didxguli xten Dios te gusojb rediidx nani bia'n Dios loj retoxtadgoldoonu, ⁹ näjza par rebenzijt, te guiliä'preni xpala'n Dios sa'csi baluilojni xcäl'rulaslajz Dios lojreni, si'c ni caj lo xtidx Dios:

Ni'cni siliä'pä xpala'nlu nez loj rebenzijt,
soläza dij lojlu.

¹⁰ Dxejcti stee lajt rniini:

La'tu benzijt, colguibalaznäj rexpenä rexpejn Israel.

¹¹ Stee lajt cajza:

Guiraatu, rebenzijt, colguiliä'p xpala'n Dad,
suguliä'pza guirali rebejn xpala'nni.

¹² Stee huält guniiza Isaías scree:

Siricaj te xagdoo toIsaí,
näjza te ni chäs te guinibeeni loj rebenzijt,
laani cabäjz rebenzijt.

¹³ Naj rniabä lo Dios ni rudeed yärbäzljajz, te laani gacnä j guibalajztu, cuedcxilajztu, sa'csi salilajztu, te tioobru yärbäzljajz ni rajptu sa'csi Sprit D xan xten Dios yu' neñ lastootu, luxh laani rajpni yälrnibee.

¹⁴ Luxh xcuent la'tu rebetzä, anancheä nabañsa'ctu nasin duxhtu, arajcza rulijdxtu sa'tu, ¹⁵ luxh lo j guijtze bacuaä gaii didxnaj xcuent tiop-choñ cos, te gusnaä lajztu. Runä si'c xcuent yälrulaslajz ni baniid x Dios loä ¹⁶ te gacä xpen Jesucrist ni rusule' diid x lo j rebenzijt. Ni'cni cagusulesa'cä xtidx Dios lojreni, te xca' Dios rebenzijt si'c te gojn ni rudedä, sa'csi agujcreni beñnaya sa'csi rbäjz Sprit D xan neñ lastooreni.

¹⁷ Ni'cni xcuent Jesucrist abidxälä xhicuent guiniduxhä didxro xcuent recos ni najc xten Dios. ¹⁸ Sa'csi dina guiniä diid x xcuent xhi stee cos, ganaxtis xcuent xho gucnä j Jesucrist narä, luxh xcuent ni'c basoob rebenzijt diid x, huililajzreni xtiid xni sa'csi bie jn diajgreni xtiid xni, bahuiizareni rextzuunni, ¹⁹ con yälmilaagwr xten redzunro, resenro, ni guj c con xcälrnibee Sprit D xan xten Dios. Ni'cni lo gued x Jerusalénli, näjza guideb gabi ro'c, lo gued x Ilírico, guiraa nejzga abasule'ä xtidx Jesucrist. ²⁰ Si'cza guyu'ä ganduxh gusule'ä xtidx Dios xhet cadro ahuisule'direni xtidx Jesucrist, alga ganax cadro gajdreni gumbee Jesucrist, te na'c gunä dzuun cadro guslo j cayujn ste'ca be jn dzuun. ²¹ Te gacni si'cni caj lo guijt z:

Renani rutliidi bij diid x xcuentni, suhuiipacreni lojni,

luxh renani gajdpac diajgreni jie jn xtiid xni, sacbecheereni xtiid xni.

Rujn Pabl xhigab chääni gued x Roma

²² Ni'cni balti huält badxojn Dios narä jiädhuiä lojtu. ²³ Luxh naj sa'csi abaluxä xtzunä guideb nezree, näjza sa'csi agujc balti ijz rlazduxhä jiädhuiä lojtu, ²⁴ naj che cha'a España siädhuiäpac lojtu. Che tedä, jiädhuiäpac contu te ganid guibalaznää la'tu, dxejcti gacnä jtu narä te cha'a España. ²⁵ Naj sia'a gued x Jerusalén te chanää xcoobr rexpe jn Dios ni yu' ree lo j rebe jn ro'c. ²⁶ Sa'csi rebe jn Macedonia näjza reben Acaya rlazjpacreni guxhalreni te coobr lo j rebenproob ni yu' lo reni huililajz xtidx Dios neñ gued x Jerusalén. ²⁷ Bejnreni xhigab hueen gunreni si'c, luxh guli'careni, sa'csi yu' xhi nazääbreni lojreni sa'csi rebe jn Jerusalén najc reni baxhal xtidx Jesucrist lojreni, naj laaca rujnreni cayacnä jreni reben Jerusalén con xhixtenreni. ²⁸ Ni'cni che chasa'nä meel lojreni dxejc tedä lajdxtu, jiädhuiä contu, dxejc cha'ä España. ²⁹ Luxh ananä che jiälä lojtu, li guidxa lastoä xcälnasa'c xtidx Jesucrist guidzunä lojtu.

³⁰ Rebetzä, rniabduxhä lojtu xcuent xtidx Dad Jesucrist näjza xcuent xcälrinä lajz Sprit D xan xten Dios, colguidxagsa'tu, te colgacnä j colcuedx-guiniabtu lo Dios xcuentä. ³¹ Colnab lo Dios te guslaani narä lo j reben Judea nani di gusoob xtiid xni te saru gun reben dxan ni yu' Jerusalén te xca'reni ni chanää lojreni. ³² Te cabaa lazä guidzunä lojtu, sa'csi rlazjpac Dios jiälä lojtu, te la jni yu'ä lojtu siälyuä, susilazäza con la'tu. ³³ Dios ni rbecdxilajz be jn gacnä j guiraatu. Sugacni si'c.

16

Ruxhalni xtixtios lojreni

¹ Colgacnä j bisia jnnu Febe. Nane're be jn dzunduxh neñ guidoo ni tre' Cencrea. ² Colca'ni xcuent Dad, Jesucrist, si'cni riä j l gun be jn gacnä j renani rililajzpac xtidx Dios. Colyacnä jni lo xhitis nani guiquiinni, sa'csi laani gucnä duxhni xhidal rebe jn, nägajcza narä gucnä jni.

³ Ruxhalä xtixtios lo Priscila näjza lo Aquila, ni racnäj narä lo xtzuum Jesucrist. ⁴ Laareni nicäjpreni niejtreni xcuentä, ni'c rudedä xquixtios lojreni, luxh xhet narätis, näjza guiraa rebejn ni yu' lo rexquidoo rebenzijt. ⁵ Ruxhalä xtixtios loj resa'ä ni rdxagsa'reni rolijz Priscila näjza Aquila. Ruxhalä xtixtios loj Epeneto, ni sanälazduxhä, ni gujc benganiid ni huililajz xtidx Jesucrist nen guedx Acaya. ⁶ Ruxhalä xtixtios lo Marii nani benduxh dzuun lojtu. ⁷ Ruxhalä xtixtios loj reben ladxä ni laa Andrónico näjza Junias; laareni guyunäj narä nen latzguiib, najcreni benro loj reapost. Ganid laareni huililajz xtidx Jesucrist, dxejcti huililazä.

⁸ Ruxhalä xtixtios loj Amplias, ni sanälazä xcuent Jesucrist. ⁹ Ruxhalä xtixtios loj Urbano, ni runnäj nuurnu xtzuum Jesucrist. Ruxhaläza xtixtios loj Estaquis, ni sanälazä. ¹⁰ Ruxhaläza xtixtios loj Apeles, ni abadeed balti seen rililajzpacni xtidx Jesucrist. Ruxhaläza xtixtios loj guiraa ni tre' rolijz Aristóbulo. ¹¹ Ruxhaläza xtixtios lo Herodiön ben ladxä, näjza loj resa' Narciso nani ahuililajz xtidx Jesucrist. ¹² Ruxhaläza xtixtios loj nan Trifena näjza nan Trifosa, guiro'preni cayujn xtzuum Jesucrist. Ruxhaläza xtixtios loj nan Pérsida, sanälazäni, abenduxhni xtzun Jesucrist. ¹³ Ruxhaläza xtixtios lo Rufo nani agule Dios, näjza lo xnanni, sa'csi gujcn si'c xnanäza. ¹⁴ Ruxhaläza xtixtios loj Asíncrito, näjza lo Flegonte, näjza lo Hermas, näjza lo Patrobas, näjza lo Hermes, näjza lo rebetzä ni yunäjreni. ¹⁵ Ruxhaläza xtixtios loj Filólogo, näjza lo Julia, näjza lo Nereo con bisiajnni, näjza lo Olimpas näjza guiraa rexpen Dios nani yunäjreni ro'c.

¹⁶ Colye'tz xchan loj resa'tu. Guiraa rexquidoo Jesucrist ruxhal xtixtios lojtu.

¹⁷ Rebetzä, rniabduxhä lojtu ga'ptu cuidaad xcuent renani rujn biejy te guilia' sa' bejn, nani rlanj guntu guiraloj nani najc garenca loj yälruluii ni bisieedu, colguibicaj lojreni, ¹⁸ sa'csi sa' rebejn ga direni gun xtzuum Jesucrist. Laareni rlanjztsreni gunreni si'c rlanj tiejxhrene; rniireni didxdoo, diidx ni rgudxguel diajg bejn te rusgueereni lastoo rebejn nani di susin. ¹⁹ Guiranejz abire'ch diidx xcuent xho rusobsapactu xtidx Jesucrist, ni'cni rbaa lazä, ni'cni rlazä gactu nasiñduxh xcuent recoshueen, luxh si'c báz xhet ganditu xcuent recosguijdx. ²⁰ Luxh Dios nani ruscuecdxilajz bejn siojb guta'cwni bendxab xhan ni'tu. Gacnäj Dad Jesucrist la'tu.

²¹ Timoteu nani racnäj narä lo dzuun, ruxhal xtixtios lojtu. Lucio, Jasón, näjza Sosípater, ben ladxä, ruxhalza xtixtios lojtu.

²² Najrä Tercio, ni cagucuaä guijtzre xcuent Pabl, ruxhaläza xtixtios lojtu xcuent Jesucrist.

²³ Ruxhalza Gayo xtixtios lojtu. Rbääznu rolijzni, luxh rudeedzani rolijzni guidxagsa' reben guidoo. Ruxhalza Erasto, ni najc tesoreer xten guejdxre, xtixtios lojtu, sigajcza bejtznu ni laa Cuarto.

²⁴ Gacnäj Dad Jesucrist la'tu. Sugacni si'c.

Rediidx lult xten Pabl

²⁵ Colguiliä'p xpala'n nani sajc gusudzu'tz la'tu loj xtiidxni nani basule'ä, näjza loj xtidx Jesucrist xcuent rehxigab ni naga'tz galooli, ²⁶ naj abaluiloj rediidxga lojtu; näjza xcuent ni bacuaa reprofet galooli; si'c najc diidx ni bia'n Gueb Dios ni nabajn par tejpas loj rexpejn, agusule'ni loj guiraa reben guedxliuj, te gusoobreni diidx sa'csi rililajzreni xtiidxni, ²⁷ colguiliä'p xpala'n ni najc tejtis Dios ni nanduxh. Suguiliä'pnu xpala'n Dios xcuent Jesucrist. Guiliä'pnu xpala'n Dios par tejpas. Sugacni si'c.

Guijtz Ganid Ni Bacuaa Pabl Lo Guidoo Xten Guedx Corinto

Bacuaa Pabl te guijtz lo guidoo xten guedx Corinto

¹ Narä Pabl nacä apost xten Jesucrist sa'csi agule Dios narä te gusule'ä xtiidxni. Narä näjza Sóstenes ni najc bejtznu lo xtidx Dios rucuaanu guiitzre lojtu ² ni ahuililajz xtidx Dios, ni yu' neñ guidoo xten guedx Corinto. La'tu agule Jesucrist, abasiani lastootu sa'csi ahuililajztu xtiidxni. La'tu näjza guiraa rebejn ni ahuililajz rextidx Jesucrist loj guideb guedxliuj, najctu xpejn Dios, ni najc Dad xten guiraanu. ³ Rniabnu lo Dios ni najc xtadnu näjza lo Dad Jesucrist, gacnäjreni la'tu, guscuecdxireni lajztu.

Abaniidx Dios xhidajl dzunsa'c xcuent Jesucrist

⁴ Rudedätis xquixtios lo Dios xcuentu, xcuent yälrlulaslajz xten Dios ni cua'tu xcuent Jesucrist, ⁵ te xcuentni acua'zatu guiraa dzunsa'c, te gusule'tu xtiidxni, näjza te gachesa'ctu xtiidxni; ⁶ sigajcza con xcäl'nabansa'ctu baluiitu huililajzfactu xtidx Dios xcuent Crist. ⁷ Ni'cni xhetliidi cayäädxditu loj redzunsa'c ni runiidx Dios, la' ni ganduxh yu'tu cabäjztu guibisac Jesucrist lo guedxliuj. ⁸ Laani susutijpni lajztu dxejli ni guibisac Dad Jesucrist loj guedxliuj, te rutliidi gac cue'c xhi te quej xcuenttu. ⁹ Rusoobpac Dios xtiidxni. Laani gurejdxni la'tu te jiu'tu lo xnejz Xi'nni Jesucrist ni najc Dad xtenu, te sanäjtni.

Rlia' sa'reni neñ guidoo

¹⁰ Rulidxä la'tu, rebetzä, xcuent Xtad Jesucristnu, colyejn tejsi xhigab te na'c la' sa'tu, saru guibannäjtu sa'tu, colyejn tejsi xhigab, colga'p tejsi xcäriejn. ¹¹ Sa'csi agucbeä xcuenttu, betzä ni huililajz xtidx Dios. Tej resa' Cloé biädsa'n diidx loä xcuenttu, yu' yälrdijl lojtu. ¹² Rlazä guiniä scree lojtu sa'csi yu'reni rnii: “Narä nacä te rexpejn Pabl”, näjza: “Narä nacä te rexpejn Apolos”; näjza: “Narä nacä te rexpejn Pedr”, yu'zareni rnii: “Narä nacä xpejn Crist.” ¹³ ¿La rujntu xhigab nala' sa' Crist, ä? ¿La cuaj Pabl lo cruzj xcuent xtojltu, ä? o ¿La gurobnistu con laj Pabl, ä? ¹⁴ Rudedä xquixtios lo Dios dina nutiobnisä nicla tejtü, xtebtis Crispo näjza Gayo, ¹⁵ te rut naadi con laä batiobnisäreni. ¹⁶ Abanaj lazä batiobnisä resa' Estéfanas. Di lazä guinaj la yu' chu stee bationnisä. ¹⁷ Di Crist nuxha' narä te gutiobnisä. Baxha'ni narä te gusule'ä rextiidxni xcuent xho gun bejn te laareni lo dojl, xhet con didxnanduxhdi, te di gudzucaä loj dzunroduxh ni bejn Jesucrist che gujtni lo cruzj.

Crist najc xcäl'milaagwr näjza xcäl'najn Dios

¹⁸ Rediidx ni rniinu xcuent Jesucrist xcuent xho gujtni lo cruzj te guslaani rebejn lo dojl najcni te diidx ni xhet sajcdi lo rebejn ni canijt sa'csi direni chalilajz xtiidxni. Luxh loj rebejn ni ruslaa Dios lo dojl najc rediidxga xcäl'milaagwr Dios. ¹⁹ Scree caj loj rexquijtz Dios:

Narä sutzulä yäl'nasiñ xten rebenajñ,

sudzucaäza xcäl'nadxällajz, xhigab rebejn ni nadxällazduxh.

²⁰ ¿Con bejn ni nanduxh? ¿Con bejn ni rucuaa, ni najc maestr? ¿Con bejn ni ruchagduxh diidx xcuent recos guedxliujre, ä? ¿La et abejndi Dios najc guiraa yäl'nasiñ xten guedxliuj si'c nayällajz nez loj Dios, ä? ²¹ Ni'cni loj xcäl'nasiñ Dios, di rebejn guedxliuj niembee Dios con xcäl'nasiñ guedxliujre, ni'c bichaglaiz

Dios con yälrusule' diidx ni rniireni nayäl_lajz, con ni'c baslaani lo dojl rebejn ni huililajz xtiidxni xcuent Crist.

²² Rexpejn Israel r_lajzpacreni fireni remilaagwr; rebejn griegw rguuil yäl_nanduxh. ²³ Niluxh nuurnu rusule'nu diidx xcuent xho cuaj Jesucrist lo cruzj, niluxh loj rexpejn Israel najc diidxre si'c te guiro ni chalani' bejn, luxh loj rebenzijt xhet sajcdi rediidxre. ²⁴ Niluxh loj rebejn ni gule Dios chalilajz rediidxre, rexpejn Israel sigajc loj rebenzijt, rediidxre najczani yäl_milaagwr najczani yäl_nasiñ xten Dios. ²⁵ Sa'csi xcäl_nayääl xten Dios si'c rchalo rebejn ni'c najc nasiñduxhru loj xcäl_nasiñ xten reben guedxliuj; luxh xcäl_rniaj xten Dios sacduxhruni loj guiraa xcäl_nadaan reben guedxliuj. ²⁶ Colhuiu la'tu, betzä ni ahuililajz xtidx Dios, xho gule Dios la'tu, colyejn xhigab guxiitu najctu ben nasiñ loj reben guedxliuj, guxiiza rajptu yäl_rnibee, guxiizatu najctu bejn ni agojl guiga'tu beñsa'c. ²⁷ Niluxh agule Dios rebejn ni xhet nanduxhdi te gusanxtujyni rebejn ni nanduxh, aguleza Dios rebejn ni guxii rnibee te gusanxtujyni rebejn ni rnibeduxh. ²⁸ Agule Dios rebejn ni di guiga' beñro, näjza rebejn ni rut riudi, reni rut najcdi, te gusanxtujyni rebejn nani najc guiraa reni'c. ²⁹ Te nicla tej bejn digacdi guiliä'p lagajc xpala'nni nez loj Dios. ³⁰ Lagajc Dios abachaag la'tu loj Dad Jesucrist; baxhalzani Jesucrist loonu te basaniñni xcäriejnnu te ga'pnu yäl_nasiñ xten Dios, te guibañsa'cnu nez loj Dios, te gacnaya lastoonu, näjza te quiixni rextojl_nu. ³¹ Si'c bejn Dios te soob xtiidxni cadro caj scree:

Ni r_lajz guinii didxro, suguiliä'pni xpala'n dzuun ni bejn Jesucrist.

2

Rediidx xcuent Crist ni cuaj lo cruzj

¹ Ni'cni cheni biädsule'ä xtidxlii Dios lojtu, rebetzä, dina niädniä didxnajn lojtu, niclaza didxnagajn, xhet si'cti basule'ä xtidx Dios xcuent Crist. ² Cheni guyu'ä lojtu, benä xhigab dina niädniä xhi stee diidx lojtu, biädsule'ätis diidx xcuent Dad Jesucrist, ni cuaj lo cruzj. ³ Bidzunä lojtu guideb rdxagä, guideb racditä sa'csi cadxebduxhä. ⁴ Cheni basule'ä diidx lojtu, dina niniä didxro xten yäl_nasiñ xten guedxliuj, alga guniä xtiidx yäl_nasiñ xten Sprit D_xan xten Dios näjza xcäl_rnibee Dios, ⁵ te di gac xcäl_rililajztu xcuent yäl_nasiñ xten guedxliujre, te gac xcäl_rililajztu xcuent yäl_rnibee xten Dios.

Rumbee bejn Dios xcuent ni ruluii Sprit D_xan xten Dios

⁶ Rniizanu lo sa'nu ni aguyajl lo xtidx Dios rediidx xten yäl_nasiñ xten Dios, per te yäl_nasiñ ni di gac xcäl_nasiñdi guedxliuj, niclaza xten reni rnibee lo guedxliujre, sa'csi sidzujñ dxej sinitlojreni. ⁷ Niluxh che rniinu yäl_nasiñ xten Dios, rniinu diidx ni rut rachextebdi, xcuent xho gac guidzunnu cadro yu' Dios xhaguibaa. Cheni gajdli gac guedxliuj, rapcheeni yäl_nasiñxhiga'tz xtenni. Baluiinini loonu te guibañnäänuni lo xcäl_rdimbicha' xtenni. ⁸ Nicla tej reni rnibee lo guedxliujre gajd gacbee recosre niluxh paru niacbeerenini, direni nucuaa lo cruzj Dad Jesucrist nani rajp xcäl_rdimbichaduxh. ⁹ Najcni si'cni caj lo rextidx Dios cadro rnii:

Recos ni gajdpac baloj bejn fii,

nani gajdpacza diajg bejn jiejn;

nani gajdpacza jiu' lo xhigab bejn, guiraa recosga abaluchee Dios par rebejn ni chanälajzni.

¹⁰ Niluxh abaluii Diosreni loonu con Sprit D_xan xten Dios, sa'csi laani basule'nireni loonu. Sprit D_xan xten Dios rachesa'c guiraa rexhigab, näjza recos xhiga'tz xten Dios.

¹¹ Loj reben guedxliuj ħchuni'c racbee rehxigab ni rujn bejn? Lagajc sprit xten bejn ni yu' nenni racbee xhi xhigab cayujnni. Sigajcza rut racebedi rehxigab xten Dios; Sprit Dxantis xten Dios racebeni. ¹² Luxh nuurnu dinu nica' yäl'najn xten guedxliuj, alga cua'nu Sprit Dxan ni siäd lo Dios te gacbeenu rehxicos ni abasalajz Dios loonu. ¹³ Nuurnu rniizanu xcuent recosga, xhet diidxdidi ni ruluii xcäl'najn guedxliujre, diidxtis ni baluii Sprit Dxan xten Dios loonu. Si'c ruluiinu rediidxga loj rebejn ni rbäjz Sprit Dxan xten Dios nen lastooreni.

¹⁴ Niluxh reni di chalilajz xtidx Dios, direni gacbee rehxigab xten Sprit Dxan xten Dios, sa'csi laareni xhigabyäältis rchaloreni xcäl'nasiñ Dios. Di gac diza gabeereni rehxigabga, sa'csi Sprit Dxan xten Diostis rajc ruluii lo bejn rehxigab xtenni. ¹⁵ Rebejn ni ahuililajz xtidx Dios, rula'tzreni guira'ti ni ruluii Sprit Dxan xten Dios lojreni. Luxh rebejn ni ahuililajz rutliidi rula'tzdireni. ¹⁶ Sa'csi scree caj lo xtidx Dios: “ħChuni'c agucee xho najc xhigab xten Dios te gac guluiini Gueb Dios, ä?” Nicla tej bejn. Niluxh nuurnu rajpnu lo xcäriejnmu xhigab xten Crist, nalajznu racebeenu rextiidxni.

3

Reni rujn dzuun lo Dios

¹ Rebetzä, di niajcdi niniä redidxnagajn lojtu si'c ni rniä loj rebejn ni rajp yäl'nasiñ xten Sprit Dxan xten Dios, basule'ä ganaxtis didx guyasi lojtu, sa'csi najctu beñ guedxliuj o biuxbäz ni guxii racebeni xcuent Crist. ² Basule'ä ganax didxguyasi lojtu si'c rudeed bejn le'ch lo te biuxbäz lacuaa gauni bääl. Dina niniä lojtu guiraa rextidx Dios ni nanab gacbeetu, sa'csi gajd gacdi gacbeetuni, niclaza naj gajd gacdi gacbeetuni, ³ sa'csi nabansijctu si'c nabajn reben guedxliuj laltis runembiidtu, rdexchlajztu lo sa'tu, ħla ditu gacbee nacsijctu si'c beñ guedxliuj, ä? ħLa laltis nabajntu si'c nabajn reben guedxliuj ni di gumbee xtidx Dios, ä? ⁴ Sa'csi cheni rnii tejni: “Narä nacä te xpejn Pabl”, dxejcti steeni rnii: “Narä nacä te xpejn Apolos”, ħla xhet cayujnditu sigajctis ni rujn rebejn guedxliuj, ä?

⁵ ħChuni'c najc Pabl? ħChuni'c najc Apolos? Nuurnu najctisnu xmos Dios ni basule' xtidx Dios lojtu te huililajztu, luxh cade tejnu riennu dzuun ni runiidx Dios jiennu. ⁶ Ganid basule'ä xtidx Dios lojtu, dxejc biäd Apolos te gucnäjzani gucbeerutu xtidx Dios, niluxh lagajc Dios najc ni cagusanij xcäriejntu te gacbesa'ctu xtiidxni. ⁷ Ni'cni nicla ni rusulexga diidx, niclaza nani racnäj raceberu bejn rediidxga xhet sajcdireni; Diostis sajc nani rusanij xcäriejn rebejn. ⁸ Nuurnu najcnu si'c rexmos ni rujn dzuun lo yuj. Tejsi najc nani rbe'c binij näjza nani rga' nis, niluxh Dios rguijx tejganu dzuun nani riennu. ⁹ Nuurnu najcnu si'c remos ni runnäj Dios dzuun. La'tu najctu si'c yuj cadre cayajc xtzun Dios, si'c te yu' ni cayunchee Dios. ¹⁰ Narä nacä si'c te maestr albañil. Baniidx Dios dzuun loä, gucnäjni narä te casuä reguij lo yujre, te naj ste'ca bejn quixh basuu yejcti. Niluxh tejga ni chanuu gun dzuun lojga, suga'pni cuidaad xho guiliäsni padeerga. ¹¹ Sa'csi di gacdi gusujreni garenca cimient loj nani najc-xga, ni najc Jesucrist. ¹² Naj palga guiliäs bejn te padeer yejc cimientga con oor, con pla't, con guij ni sacduxh, o con baräjd, guixhtriuu, o balag biquii, ¹³ sidzujñ dxej sien xho najc dzuun ni bejn tejga bejn. Sa'csi siäd fis guiboo ni guluiloj dzuunga, sa'csi lagajc guibooga guluiloj dzuunga, xho najcni. ¹⁴ Palga yu' reni bejn te yusa'c yejc cimientga, luxh dini chec lo guibooga, sudeed Dios lo bejn ga ni riäjñ xca'ni sa'csi bejnni yusa'c. ¹⁵ Niluxh palga chec ni bejnni yejc cimientga xhet xca' dini, xcäl'nabajntisni di nit, luxh xtzuunni sejc.

¹⁶ ¿La ditu gan la'tu najctu xquidoo Dios, luxh nen lastootu rbäjz Sprit Dxi xten Dios, ä? ¹⁷ Palga yu' chu gutiexhät xquidoo Dios, sunitloj Diosni par tejpas, sa'csi xquidoo Dios najc dxan, luxh la'tu najctu guidooga.

¹⁸ Nicla tejtü na'c gusgueetu lagajc la'tu. Palga yu' chu rujn xhigab nanduxhni xcuent yäl_nasiñ xten guedxliujre, nanabpac gacni si'c te bejn ni xhet najndi te xca'ni yäl_nasiñ xten Dios te guliipac gacni te beñnajn, te beñ nasin. ¹⁹ Sa'csi yäl_nasiñ xten guedxliuj xhet sajcdi nez loj Dios. Lo rexquijtz Dios caj scree: “Dios rujn rga' reni rajp yäl_nasiñ xten guedxliuj lagajc xcuent xcäl_rusgueereni ni rujn lagajc xcäl_nadxällajzreni.” ²⁰ Ste'ca lajt caj scree: “Nanchee Dios xho najc xhigab ni rujn rebejn ni rajp xcäl_nasiñ guedxliujre, luxh xhetliidi sajcdi nez loj Dios.” ²¹ Ni'cni na'c guiliä'p bejn xpala'n te bejn guedxliuj. Sa'csi loj tejpgatu abaniidx Dios guira'ti rexhicos najc xtengatu, ²² palga najcni Pabl, o Apolos, o Pedr, o guedxliuj, o yäl_nabajn, o yäl_gujt, o recos ni yu' naj, o recos ni churu gac, guiraareni najc xtentu. ²³ La'tu najctu xten Crist, luxh Crist najc Xi'n Dios.

4

Xtzuun reapost

¹ Ni'cni la'tu nanab fiitu loonu si'c rexmos Dad Jesucrist ni rajp rexhigabxhigat'z xten Dios te gusule'nureni lojtu. ² Mbaj pues, te bejn ni cahuii te dzuun nanab gusoobreni diidx, gunreni te dzunsa'c. ³ Niluxh guxii runä xhigab gula'tztu narä, o gula'tz chutis guxhtis lo guedxliujre narä; nicla lagajc narä dina gunduxhä xhigab xho nacä nez loj Dios. ⁴ Entis rbedxi xcärienä, per xhet xcuent ni'c di sajcdi guiniä xheti xtolä, Dad Jesucrist najc nani rula'tz narä, rhuilojni xho nacä. ⁵ Ni'cni la'tu na'c gucuaquijtu bejn che gajd guidzujn dxej; colcuäjz jiäd Jesucrist dxejc laani sibääni lo bianij guiralii ni naga'tz lo nacäy, luxh suluilojzani xhi xhigab yu' nen lastoo tejpga rebejn, dxejc lo tejpganu sudeed Dios ni nungäj_l xca'nu.

⁶ Rebetzä, xcäl_nasa'ctu caniä rediidxre lojtu. Caniä xcuent Apolos näjza narä, si'c te yäl_ruluii te fiitu xho riennu te na'cza guntu recos ni xhet caj di lo rexquijtz Dios, te na'cza guiliä'ptu xpala'n tejtü lo resa'tu, la_l ni cabälaztu steeni. ⁷ Sa'csi ¿chuni'c rni najclu beñsa'cru lo ste'ca bejn?, o ¿xhini'c rajplu ni di Dios nuniidx lojlu? Luxh palga cuaxlia'luni, ¿xhicuent lagajc luj rliä'plu xpala'ntu, lascanu rut baniidxdi lojlu recos ni rajplu?

⁸ Rujntu xhigab rajptu xhidajl cos, naatu najctu ricwduxh, rchalotu najctu reii, dirutu guiquiin nuurnu. Malaii guli najcpactu reii te näjzanu guinibenäjnu la'tu. ⁹ Niluxh runä xhigab gule Dios reapost si'c rebejn ni xhet sajcdi. Najcnu si'c rebejn ni gunibeereni guet. Nez loj reben guedxliuj näjza nez loj rexangl Dios najcnu si'c reben ni rdedlojtis bejn lojreni. ¹⁰ Nuurnu najcnu beñnayääl xcuent Crist, niluxh la'tu rchalotu racbeduxhtu rextidx Crist. Nuurnu najcnu bejn ni xhet nadipdi, niluxh la'tu najc beñdanduxh. Rliä'p rebejn xpala'ntu, ni'c rbälazreni nuurnu. ¹¹ Cadeednu trabajwduxh naj, rliaannu, riojlnu, xho rniaj xhajbnu, rdil_näj rebejn nuurnu, luxh xheti roliznu. ¹² Rdxaggu riennu dzuun lagajc naanu te guidxäl_nu xhi guidaunu. Che rguereni loonu, rniabnu lo Dios xcuentreni. Che rusacsí rebejn nuurnu, rientisnu huant. ¹³ Che rniyajreni nuurnu, rulidxnäänureni didxdo. Rujnreni xhigab najcnu si'c guijxh xten guedxliujre, ruhuiireni loonu si'cni xhet sajcdinu.

¹⁴ Dina gucuaä rediidxre te gusanxtuiyätu. Rucuaä rediidxre te gulidxätu si'c rexi'nä ni sanälazä. ¹⁵ Palga ga'ptu tzuu mi_l bejn ni guluiitu rediidx xten

Crist, ruti stee xtadtu; narä gucä xtadtu, ganid narä basule'ä rextidx Dios lojtu. ¹⁶ Ni'cni rulidxä la'tu, colyejn si'cni ruhuiitu runä.

¹⁷ Ni'cni baxhalä Timoteu lojtu, najcni si'c xi'nä ni sanälazä, ni rusoob diidx xcuent Crist. Laani susnajni lajztu xho mood nabanä lo yäl nabajñ xten Jesucrist, sigajcni ruluiä neñ reguidoo guiraasi lajt. ¹⁸ Yu'tu ni acayajc guyalajz, naatu pet dina guibisacä lojtu. ¹⁹ Cabäzä jiädhuiätu, palga si'c rlanj Dios, dxejc sacbeä chuni'c najc rebejn ni cayajc guyalajz, fiä xhipacni rujnreni, xhet xtiidxtisreni gacbeä. ²⁰ Sa'csi xcälñibee Dios xhet ganaxtis xcuent diidx najcni, näjza dzuun ni rujnreni ruluiloj xcälñibee Sprit Dxan xten Dios ni rajpreni. ²¹ ¿Xho rlanjzatu guidzunä lojtu, ä? ¿La sidzunä si'c te dad ni ca' te baar te quinätu o la guidzunä yäl rinälajz näjza yäl nadolajz te gulidxätu, ä?

5

Xho nanab gunnäjtu te bejn ni rujn falt lo sa'ni

¹ Agucbeä yu' tejtü ni ahuililajz xtidx Dios, cua'ni si'c chääl ni te gunaa ni gujc chääl xtadni. Dee najc te dolduxh nani nicla reni di chalilajz xtidx Dios direni gun. ² Luxh la'tu gujctü guyalajz lacuaa niac-huin lastootu; te bejn nani bejn dojlga, riäjñ nibäätuni nez lojtu. ³ Mase ruti narä ro'c, lastoä suganäj la'tu. Alabenä xhigab xhini'c jiennäjnu bejn ga ni bejn dolduxhga, sigajc ni niunä paru suga'ä ro'c. ⁴ Con laj Dad Jesucrist, che abidxagsa'tu, luxh alastoä suganäj la'tu, con xcälñibee Dad Jesucrist, ⁵ abenä xhigab gutednu bejn ga ladzñaa beñdxab te ted tiejxhni trabajw, niluxh sprit xten ni laani neñ dxej ni jiädsac Dad Jesucrist lo guedxliujre.

⁶ Di guchaag guiliä'ptu xpala'ntu xcuent dzuun ni rujntu. ¿La ditu gan te dojl najc si'c tudxe'n cojb ni ruslaj, rusaguijni cojb cadre ru'chni, ä? ⁷ Colgudzucaj cobyujxhga, te guibajntu te yäl nabannayacoob si'c te cobyä, sa'ni racchee yätxtiil ni xheti levaduur yejñi par lanij xten pascw. Arajptu yäl nabannaya sa'csi agujt Jesucrist sigajc gujt te xile' lo lanij pascw te badzucajni rextojñnu. ⁸ Si'c nanab jiennu lanij xten pascw con yätxtiil ni xheti levaduur yejñi, nalajznu con yäl guliipac neñ lastoonu, xhet yätxtiildi ni yu' cobyujxhga yejñi, nalajznu na'c gunlu latsiaj.

⁹ Lo stee guijt abacuaä lojtu, na'c guchaagtu reben ni runnäj cosguijdx bejn ni di gac chäälreni. ¹⁰ Niluxh xhet caniädi xcuent reben guedxliuj ni rujn cosguijdx con bejn ni di gac chäälreni, niclaza xcuentdi rebejn ni rchaglaztej meel, niclaza rebejn ni najc gubaan, niclaza rebejn ni riu rebanäjb. Paru si'c gacni, nanab jiunejztu guedxliujre. ¹¹ Niluxh narä bacuaä guijtza lojtu te na'c guchagsa'tu te bejn nani rñi ahuililajzni xtidx Dios, luxh rujnruni cosguijdx con bejn ni di gac chääl ni, o rchaglaztej ni meel, o riuni rebanäjb, o rniyaj sa'ni, o rsiojzni, o rusgueeni bejn te rca'ni xhi xten ni. Rniäza lojtu, nicla gaunäjtu sa' bejn ga. ¹²⁻¹³ Sa'csi narä di gacdi gunä yäl guxhtis loj rebejn ni gajd chalilajz xtidx Dios. Gunti Dios yäl guxhtis lojreni. La'tu nungäjñ guntu yäl guxhtis loj rebejn ni ahuililajz xtidx Dios. Ni'cni colgudzucaj beñdojlga lojtu.

6

Na'c chäätu loj rebeñdojl te gunreni yäl guxhtis lojtu

¹ Palga tejtü ni ahuililajz xtidx Dios rlanj cue'c xquej stee sa'tu, ¿xhicuent chale'ctu xquejni loj rebeñdojl te gunreni yäl guxhtis lojtu? ¿Xhicuent ditu guiniab yäl guxhtis loj rebejn ni ahuililajz xtidx Dios, ä? ² ¿La ditu gan, rebejn ni ahuililajz xtidx Dios sujñ yäl guxhtis lo reben guedxliuj, ä? Palga la'tu sujntu yäl guxhtis lo reben guedxliuj, ¿la di gacdi guntu yäl guxhtis lo sa'tu lo recosbäz

lacuaa chäätu loj rebendoj te gunreni xcälguxhtisreni lojtu, ä? ³ ¿La ditu gan sienzanu yälguxhtis lo rexangl Dios, ä? ;Aticaxh jiennu yälguxhtis loj recos baze' xten sa'nu lo yälnabajnre! ⁴ Palga la'tu cadilnäj sa'tu xcuent recos xten guedxliujre, ¿xho mood chäälu loj rebendoj ni rut najcdi loj xquidootu, te naareni lojtu xhini'c guntu, ä? ⁵ Rniä rediidxga lojtu te guitujytu. ¿La ruti nicla tej bennasiñ loj guiraatu ni sajc gun yälguxhtis lo resa'tu, ä? ⁶ ¿Xhicuent rile'c te bejn ni rililajz xtidx Dios xquej bejtzni ni rililajzza, luxh rijreni nez loj reguxhtis ni di chalilajz xtidx Dios?

⁷ Mbaj naj, guliipacni alabanijtto sa'csi yu' yälrdilnäj sa'tu; colgutijp lajzto rebejn ni rujn dojl lojtu. Maazru huen colgusaan sucua'reni xhixtentu. ⁸ Per dee, alga lagajc la'tu runnijttu loj lagajc resa'tu, luxh rca'tu xhixten lagajc resa'tu.

⁹ O ¿la ditu gan reben dojl dipacreni jiu' lo xcälrnibee Dios, ä? Na'c gusaantu gusgueereni la'tu; nicla te resa' dee di jiu' lo xcälrnibee Dios: guiraa reni richagtoo regunaa; guiraa reni rajñ rebanäjb; reni resnäjb bejn ni di gac chäälni; reniguii ni rungunaa; reni najc biräax; ¹⁰ reni najc gubaan; reni rsiäblajz xhixten bejn; reni rsiojz; reni rniyaj; reni rusguee bejn te rca'reni xmeel bejn. Nicla tej sa' redee di jiu' lo xcälrnibee Dios. ¹¹ Yu'zatu ni gujc si'c galoo, niluxh naj abasia Dios lastootu, naj anajctu bennaya nez loj Dios sa'csi abiällajz Dios xtojltu xcuent Jesucrist, näjza xcuent Sprit Dxan xtenni. La'tu anajctu rexpejnni.

Tiejxhnu najc xquidoo Dios

¹² Guliini sajc gunä xhitis ni rlazä gunä, niluxh xhet guiraadini najc hueen par narä. Narä sajc gunä si'ctis ni rlazä, niluxh dina gusanä guinibee nicla tej xhi cos narä. ¹³ Guliini najc yälrajw par xque'ni, luxh xque'ni najc par yälrajw, niluxh sidzujñ dxej sunitloj Dios guiro'preni. Per tiejxhnu di gac par jiennu cosguijdx con bejn ni di gac chäälnu. Tiejxhnu najc par Dios, luxh Dios najcza par tiejxhnu. ¹⁴ Luxh naj lagajc Dios guläs Dad Jesucrist lo rebeñgut, siliäszeni nuurnu con xcälrnibeduxhni.

¹⁵ ¿La ditu gan teygatu najc si'c te la' tiejxh Crist sa'csi ahuililajzto rextiidxni, ä? Palga tiejxhnu najc xten Crist, ¿la sajc gudeednuni loj te gunadxab, ä? ;Gurniälojlu jiennu si'c! ¹⁶ ¿La ditu gan cheni guchaagni te gunadxab rajcni tejtis tiejxh con laani, ä? Loj rexquijtz Dios caj: “Guirao'preni sajc si'c tejtis bejn.” ¹⁷ Niluxh nani rudeed lastooni lo Dios anajczani tejtis con laani sa'csi rbäjz Sprit Dxan xten Dios neñ lastooni.

¹⁸ Colguibicaj lo dojl ni rujn bejn con nani di gac chäälni. Xhitis stee dojl ni rujn bejn najcni lo jiaa tiejxhni, niluxh dojl ni runnäjn bejn ni di gac chäälni najc dojl lagajc neñ tiejxhni. ¹⁹ O ¿la ditu gacbee tiejxhtu najc xquidoo Sprit Dxan ni abaniidx Dios te cuääzni neñ lastoonu, ä? Ni'cni di gacdi guinibeetu lagajc la'tu. ²⁰ Agudijx Jesucrist xtojlnu con xtiejnni lo crujz, ni'cni nanab jiennu dzunsa'c nani guiliä'p xpala'n Dios con tiejxhnu näjza Xpirtnu.

7

Yälrujijdx xcuent yälruchnaa

¹ Naj gudzu'ä diidx lojtu xcuent ni gunabdiidxtu cheni bacuaatu guijtz loä. Guliini hueen najcni na'c guchnaa te niguii. ² Niluxh sa'csi yu' xhidajl reni richunäj chutis gunaa, suga'p tejga reniguii chäälpacni; sigajcza suga'p tejga regunaa chäälpacni. ³ Nanab niguii guchaagni chäälni che rlajz chäälni, sigajcza gunaa nanab guchaagni chäälni che ni si'c rlajz chäälni. ⁴ Di gunaa guinibee lagajc tiejxhni, sa'csi chäälni rnibee tiejxhni. Sigajcza di niguii guinibee lagajc tiejxhni, sa'csi chäälni rnibee tiejxhni. ⁵ Na'c gusuni' tejtto

lo chäälni. Maazru hueen coljia'n diidx na'c guchagsa'tu te xcheje' te cuedx-guiniabtu lo Dios. Che luux cuedx-guiniabtu lo Dios, guchagsacs'a'tu te na'c guquil bendxabtu chunäjtu ste'ca bejn.

⁶ Rniä rediidxre lojtu te ni rlajz guchnaa sajc guchnaani, niluxh dina guiniä lojtu, nanabpac guchnaatu. ⁷ Narä rlazä maläii sajc gac guiraa bejn si'c ni nacä. Dios abadeed loj tejga bejn xho mood guibajnni. Yu'reni sajc guibajñ tej mood, yu'zareni sajc guibajñ garenca mood.

⁸ Loj rebeñ xteb näjza loj regunabiuud rniä, hueen najc na'c guchnaareni, gacreni si'c narä. ⁹ Niluxh palga di gacdi cue'cdxi lajzreni, suguchnaareni. Maazru huen guchnaareni te na'c guntisreni xhigab rlajzreni guchaagreni te niguii o te gunaa.

¹⁰ Loj rebeñ ni abachnaa, rniä rediidx ni basa'n Dad Jesucrist loonu: "Na'c guro'n gunaa chäälni." ¹¹ Niluxh palga guro'n te gunaa chäälni, na'c guchnasacni, o maazru hueen gusiäjlni diidx guibisacni lo chäälni. Sigajcza te niguii na'c guro'nni chäälni.

¹² Naj rediidx ni guiniä najc xhigab xtenä, xhet diidxdi ni basa'n Jesucrist loonu. Scree rulidxä la'tu. Palga yu' te niguii ni rililajz xtidx Dios, luxh chäälni di chalilajz xtidx Dios, luxh rlajz gunaaga cuäznäjni niguiiga, na'c guro'n niguiigani. ¹³ Palga yu' te gunaa ni rililajz xtidx Dios, luxh di chäälni chalilajz xtidx Dios, niluxh rlajzni cuäznäjni gunaaga, na'c guro'n gunaaga chäälni. ¹⁴ Palga yu' te niguii ni di chalilajz xtidx Dios, luxh chäälni rililajz xtiidxni, palga hueen nabanäj sa'reni, hueen najc yäl'ruchnaaga nez loj Dios. Sigajcza palga yu' te gunaa ni di chalilajz xtidx Dios luxh chäälni rililajz xtiidxni, palga hueen nabanäjsa'reni, hueen najc yäl'ruchnaaga nez loj Dios. Palga dini gac si'c, di Dios gunle' rexi'nreni, per naj abenle' Dios rexi'nreni. ¹⁵ Palga chäälni te gunaa o chäälni te niguii ni di chalilajz xtidx Dios luxh rlajzni guilia' sa'ni con chäälni ni ahuililajz xtidx Dios, sujiizani. Nani rililajz xtidx Dios diruni ga'p por cuäznäjni chäälni ni di chalilajz xtidx Dios, niluxh gurejdx Dios nuurnu te cuedcxini lajznu. ¹⁶ Sa'csi ¿xho najnlu, gunaa, la suslaa Dios chäällu lo dojl xcuentlu, ä? O ¿xho najnlu, niguii, la suslaa Dios chäällu lo dojl xcuentlu, ä?

¹⁷ Si'ctis ni baniidx Jesucrist lo tejganu, si'ctis ni gule Dios tejganu, si'c suguibajnnu. Si'cza rulidxä gunrenini neñ guiraa reguidoo. ¹⁸ Palga tej niguii rililajz xtidx Dios, luxh yu'ni bee tiejxhni, xhet najcdini. Palga stee niguii chalilajz xtidx Dios, luxh xheti bee tiejxhni, xhet najcdizani. Sujia'nni si'cni najcni. ¹⁹ Xhet najcdi la yu'ni bee o xhet beedi yu'ni. Tejtis ni nanab gunni, gusoobni rediidx ni gunibee Dios. ²⁰ Tejgani jia'n si'cni najcni cheni gurejdx Diosni. ²¹ Palga najclu te mos ni guziireni te gunlu dzuun, dxejc huililajzlu xtidx Dios, na'c chulu yärsia' xcuent ni'c. Palga sajc gudzu'lu meel lo xlamlu, badzu'zani te gaclu te bejn ni rut rnibeedi. ²² Sa'csi nani najc te mos ni guziireni te gunni dzuun che huililajzni xtidx Dios, diruni gac te mos ni bio' nez loj Jesucrist, niluxh te bejn ni rut rnibeedi che rililajzni xtidx Dios, anajcni mos ni guzii Dios, najcni xmos Dios. ²³ Guzii Cristtu con xtiejnni, ni'c na'c gusaantu guinibee bejn la'tu te gac guntu xtzun Dios. ²⁴ Rebetzä, colchanuu gactu si'ctis ni najctu che gurejdx Dios la'tu, palga najctu mos ni guziireni, o te bejn ni rut rnibeedi.

²⁵ Redxa'p ni gajd guchnaa, di Jesucrist ninibee xhini'c nanab gunreni. Gule Dios narä te gusule'ä xtiidxni. Naj gulidxäreni sa'csi nanä xtidx Dios, luxh racnäjzani narä. ²⁶ Runä xhigab hueen najc palga di reniguii guchnaa sa'csi siääd yäl'naganduxh lo guedxliujre. ²⁷ ¿La alabachnaalu, ä? Na'c guro'nlu chäällu. ¿La alabaro'nlu chäällu, ä? Na'c chaxiilu chäällu. ²⁸ Palga guchnaalu, xhet dojldi rujnlu. Palga guchnaa te dxa'p, dizani gun dojl. Niluxh reni

ruchnaa sidejdreni trabajw lo yäl_nabaj_nre. Ni'cni rniä na'c guchnaatu sa'csi di rlazä tedtu trabajw.

²⁹ Rebetzä, rlazä guiniä lojtu rediidxre: Guxiiru dxej guibaj_nnu lo guedxliujre, ni'cni reni abachnaa na'c gunreni xhigab xtentis yäl_ruchnaa, te gac gunreni xtzuun Dios. ³⁰ Luxh reni cayoon, nanab gunreni si'cni xhet cayoodireni; reni rbalajzreni, nanab gunreni si'cni xhet cabaadi lajzreni; reni rzii xhicos, nanab gunreni si'cni xhet rajpdireni; ³¹ näjza reni rujn recos lo guedxliujre, nanab gunreni si'cni dini gunni, sa'csi recos ni rhuiinu lo guedxliujre, alacanitlojreni.

³² Narä rlazä na'c chutu yärsia'. Rebejn ni gajd guchnaa, riureni rextzuun Dios, näjza xho guspaareni lajz Dios. ³³ Renani abachnaa riureni recos guedxliujre te guspaani lajz chäälni, ³⁴ tiop najc xhigabni xcuent recos nani gunni. Sigajcza najc te gunaa ni abachnaa con tejni gajd guchnaa. Sa'csi te gunaa ni gajd guchnaa riuni rextzuun Dios te gacreni gunadxan nez loj Dios con tiejxhreni näjza con lastooreni. Niluxh regunaa ni abachnaa riureni recos guedxliujre, näjza xho guspaani lajz chäälni.

³⁵ Rniä rediidxre par xcäl_nasa'ctu, xhet gudxonädi la'tu, te gunrutu redzunsac, te chanälazsa'ctu Dios.

³⁶ Palga yu' chu te niguii lojtu ni rujn xhigab, maazru hueen guchnaa xindxa'pni sa'csi acayajcni gunagool, dini gun dojl, sajc gudeednini guchnaani. ³⁷ Palga steeni dini gun xhigab si'c nanab gunni, sajc gunni si'ctis ni rlajzni palga abejnpacni xhigab nen lastooni di xindxa'pni guchnaa, hueenza najc si'c. ³⁸ Ni'cni nani rudeed xindxa'pni guchnaa, hueen rujnni, sigajcza nani dini gudeed xindxa'pni guchnaa, laacaza rujnni.

³⁹ Te gunaa ni abachnaa, rajpni por guiban_näjni chäälni guideb nabajn chäälni. Palga guet chäälni, jianxtebni stehuält, dxejc sajc guchnaani chutis niguii ni rlajzni, palga najcni tej ni ahuililajz xtidx Dios. ⁴⁰ Narä rchaloä maazru guibaa lajzni palga dini guchnaa. Si'c najc xhigab ni runä, luxh rilipac lazä cayacnäj Sprit Dxaan xten Dios narä.

8

Yälrajw ni ruzujreni lo rebanäjb

¹ Rniä lojtu xcuent reyälrajw ni ruzujreni lo rebanäjb. Guliini guiraanu rajpnu yäl_najn xcuent recosga. Niluxh yäl_najn rujn rajc bejn guyalajz. Luxh yäl_rinä_lajz sa'ni, ni'c rujn racnäjnu resa'nu. ² Palga yu' chuni'c rujn xhigab nanduxhni, rusgueeni lastooni sa'csi cayääd_xru gacbeeni si'c ni nanab gacbeeni. ³ Palga yu' chu sanälajz Dios, Dios anumbee bejnga.

⁴ Ni'cni, xcuent reyälrajw ni risujreni loj rebanäjb, anancheenu xhet sajcdi rebanäjb ni yu' lo guedxliuj, ruti stee Dios; tejtis ni najc Gueb Dios. ⁵ Masque yu' reni rniireni najc “dios” xhaguibaa o loj guedxliuj, luxh yu'za xhidajl “dios” näjza xhidajl lam ni rnibee, ⁶ per nuurnu nadonnu yu' tejtis Gueb Dios, Dad nani benchee guiraa recos, luxh lojtisni nabaj_nnu. Rajpnu tejtis Dad ni rnibee loonu, ni'c najc Jesucrist. Xcuent xcäl_rnibeeni guc-chee guiraa recos loj guedxliuj, luxh nuurnu nabaj_nnu xcuent Jesucrist.

⁷ Niluxh xhet guira'ti bejn najn yu' tejtis Dios. Yu' rebejn ni ahuililajz xtidx Dios abia'reni rajpneni rebanäjb, luxh rajwzareni reyälrajw lascanu guzujni loj banäjb sa'csi nacä_jyru xcäriejnreni, ni'cni et laadi ria'n lastooreni, rxhi_nza xcäriejnreni. ⁸ Xhet xcuent xhi rdaudinu sajc guiba_nsa'crunu lo xnejz Dios. Xhet sajcdi palga guidaunu o palga dinu guidaun. ⁹ Col_natiro xhi rujntu te na'c guntu jiajb te bejn lo dojl nani gajd chalilazsa'c xtidx Dios. ¹⁰ Palga te bejn ni gajd chalilazsa'c xtidx Dios fini cayajwlu reyälrajw ni guzuj lo rebanäjb,

luxh luj najclu te beñnajn, sa'csi dee gajd gacbesa'c rextidx Dios, ¿la di lajzni gac nadip te nájza laani chatajwni yälrajw ni guzuj lo rebanäj? ¹¹ Niluxh luj, xhet dojlđi cayujnlu, per bejtzlu ni gajd chalilazsa'c xtidx Dios, sixijñni, luxh najcni bejtzlu sa'csi nájza par laani gujt Dad Jesucrist lo cruzj. ¹² Si'cza che rujnlu dojl lo bejtzlu, runnajlu lajzreni sa'csi gajd xcäriejnreni jiansa'c, luxh si'c cayujnzalu dojl lagajc lo Crist. ¹³ Ni'cni, palga narä runä riabsac betzä lo dojl xcuent ni rauä, hueenru dirunä gauä yälrajw ni gun jiajb betzä lo dojl stehuält.

9

Xhi sajc gun te apost

¹ ¿La dina gacä te bejn ni rut lojdi yu'ä? ¿La xhet apostdi narä? Ni abahuiä lo Dad Jesucrist, abasule'ä rextiidxni lojtu, ni'c huililajztu xtiidxni. La'tu najctu xtzunä ni runä lo Dios. ² Yu' reni di gumbeeni narä si'c te apost, niluxh la'tu abiembesa'ctu narä sa'csi ahuililajztu rextidx Jesucrist ni abasule'ä lojtu. Ni'c ruluiloj guliipac nacä te apost.

³ Diidx ni rniä scree loj reni di chalilajz nacä apost najc scree: ⁴ ¿La di riäjl xca'ä guiraa ni runiidxtu gauä nájza ni runiidxtu yä'ä? ⁵ ¿La digacdiza gapä te chälä ni ahuililajz xtidx Dios dxejc chanääzani sigajc rujn guiraa reapost, nájza rebetzhuin xten Dad Jesucrist nájza Pedr? ⁶ O ¿la xtebtis Bernabé nájza narä di gacdi cuääz jiennu dzuun te guidaunu laj rusule'nu xtidx Dios? ⁷ ¿Chuni'c rajc soldaad luxh lagajc laani siini xhi gauni? O ¿chuni'c rusuj yaguub luxh dini gau ninejxh ni rcaj lojga, ä? O ¿chuni'c rajp gaii dxib, luxh dini yä le'ch ni rudeedreni, ä? ⁸ Na'c guntu xhigab lagajc xcuentä caniä rediidxre lojtu, sa'csi náj loj xleii toMoisés caj diidx xcuent recosre. ⁹ Loj reguijtz xten xleii toMoisés caj rediidxre: “Na'c gusällu guijxh ro' gon che cayo'tni yejc triuu.” ¿La guniitis Dios rediidxre sa'csi riuni regon, ä? ¹⁰ ¡Dini gac! Xcälñasa'cnu guniini rediidxga, sa'csi bejn ni rujn dzuun lo niaa nájza nani rusia triuu riäjl gunlojni xca'ni te yälñasa'c ni rajc lo xniaani. ¹¹ La'tu najctu si'c te yuj cadre gule'cnu binij sa'csi basule'nu rextidx Dios lojtu, ¿la rujntu xhigab dzunro najc gacnäjtu nuurnu tudxene', ä? ¹² Palga racnäjtu ste'ca bejn ni ruluiitu, nungäjlrü gacnäjtu nuurnu.

Niluxh gajdnu guinii si'c lojtu sa'csi di rlaizdinu guidxoonnu chalilazsa'ctu rextidx Dios, ni'c chotipnu lajznu guiraa retrabajw ni cadeednu. ¹³ La'tu najntu reni rujn dzuun neñ guidoro rajwreni rebääl ni risa'nreni lo Dios, sigajcza reni rujn dzuun lo dxan cadre risa'nreni xpääl reguidxaa lo Dios, nájza laareni rajwreni rebäälga. ¹⁴ Si'cza gunibee Dad Jesucrist loj reni gusule' xtidx Dios, xca'reni xhi gaureni lagajc loj reni rililajz xtiidxni. ¹⁵ Niluxh gajdpacna gunä si'c, xhetza caca'ädi. Dizana gucuaä rediidxre lojtu naj te guniidxtu xhi xca'a. Hueenru guetä te na'c gudzucaj te bejn yälrbalajz ni rapä xcuent dzuun ni runä lo Dios.

¹⁶ Narä dina gapä xhicuent guiliä'pä xpala'nä che rusule'ä xtidx Dios. Sa'csi si'c nanabpac gunä, sa'csi probe'za narä palga dina gusule'ä xtidx Dios. ¹⁷ Palga gunä dzuunre sa'csi rdxaglazäpac gunäni yu' xhi guniidx Dios loä. Mase runäni con yälrigaan, empac Dios agule narä te gusule'ä xtiidxni. ¹⁸ ¿Xhini'c najc xcuent ni xca'ä, ä? Che gusule'ä xtidx Dios lo chutis bejn, ligaj gusule'äni, te di gusule'ä xtiidxni te guniidx rebejn xhi guniidxreni xcuent xtzunä, mase si'c riäjl gunreni.

¹⁹ Rut xmosdi nacä, luxh lagajc narä benä xhigab gacä si'c te mos te gunä gaan chalilajz xhidajl bejn xtidx Dios. ²⁰ Cheni yu'ä loj rexpejn Israel, runä si'cni rujnreni te gunä gaan chalilajzreni rextidx Dios. Che rlažäza guiniä loj

reni nabajñ loj xleii to Moisés, dxejc runä si'c rujnreni te gunä gaan chalilajzreni rextidx Dios, niluxh diruna guibanä lo leiiga. ²¹ Stee lajt cadre rlazä gunä gaan reni di guibajñ lo xleii to Moisés, runä si'c rujnzareni, mase empac nabanä lo xleii Dios sa'csi rusobä diidxni basa'n Crist. ²² Cheni yu'ä loj reni guxii rililajz xtidx Dios, racäza si'c ni najcreni te gunä gaan chalilazsa'creni. Narä runä sigajc rujnreni, te si'c gunä gaan chalilajz xhidajlreni xtidx Dios. ²³ Runä guira'ti xcuent xtidx Dios ni rusläa bejn lo dojl, te xca'zanu, narä näjza rebejn ni ahuililajz xtidxä, yälñabajñ par tejpas.

²⁴ Anajntu che ru' te lanij, che ruxun reniguii, guiraareni ruxun, niluxh tejtis ni rca' ni ruzalajzreni. Colguxunza nez lo Dios te gunzatu gaan. ²⁵ Guiraa reni rlajz guxun rapdareni tiejxhrene te ga'p tiejxhrene yälñadip, yälñadaan. Luxh laareni ruxunreni si'c te gunreni gaan te cos ni di gaclaa agunitlojni. Niluxh nuurnu ruxunnu te guniidx Dios loonu nani dipac nitloj. ²⁶ Narä dina guxunä si'cni dina ganä caro cha'ä, dizana gucuaä si'c te bejn ni rucuanäj te balaa, o cayäätisni lo bej. ²⁷ Niluxh narä runä rajc tiexhä si'c xmosä te na'c gunni si'ctis ni rlajzni, te gunni nani rlajz Dios te di cheni abasule'ä xtidx Dios loj xhidajl bejn, gusanxtujy tiexhä narä.

10

Yälñulijdx lo xcuent rebanäjb

¹ Rebetzä, di rlazä jiällajztu ni gusajc retoxtadgoldoonu. Gusajreni xpalaa te za gudejzareni galäii nisdoo ni laa Nisdo Xniaa. ² Gudejdrene xpalaa te za näjza gudejdrene galäii nisdoo; ni'c najc si'c te yälñobnis sa'csi sanajlreni to Moisés. ³ Sigajcza guiraareni gudajw tejtis yälñrajw ni baxhal Dios xhaguibaali. ⁴ Guiraaazareni gu' nis ni badeed Dios, Dios bejn birii nisga cuä' te guilaj. Luxh Xpriet Crist gusanäjreni cadrotis säareni nez lo reyubidzroga. Luxh con xcälñibeeni birii nis loj guilajga, Crist najc si'c guilaj ni huinärene. ⁵ Dios bidxechnäj xhidajlreni, ni'c xhidajlreni gujt nez lo reyubijdzga.

⁶ Guiraa rediidxga najc te yälñulijdx loonu, te na'c guichagljaznu jiennu lagajc redojl ni bejn retoxtadgoldoonu. ⁷ Na'cza gantu rebanäjb si'c ni bejn baltireni; acaj lo rexquijtz Dios xcuentreni: "Rebejn ni guyaa lajz gurejreni te gu'reni, gudajwreni, dxejctiru huisureni te gusloj caguijtreni." ⁸ Na'c chunäjnu stee bejn di gac chäältu si'c bejnreni, ni'cni gujt galbichon milreni tejtis dxej. ⁹ Na'cza guche'chnu Dios con rextojlñu si'c bejn balti rebejnğa, ni'cni gujtreni sa'csi gudauya' bälreni. ¹⁰ Na'cza chamojmtu xcuent ni rujn Dios si'c ni bejn rebejnğa xcuent ni bejn Dios, ni'cni baxhal Dios angl xten yälñujt bagu't xhidajlreni.

¹¹ Guiraa redee gusajc retoxtadgoldoonu te rulijdxni nuurnu, cuajzareni lo guijtz te guluii rediidxga nuurnu xho riäjl jiennu, nuurnu ni nabajñnu neñ redxej naj. ¹² Ni'cni chutis ni rujn xhigab nabansa'cni nez loj Dios, sudzu'tzni te di jiabsacni. ¹³ Xheti te trabajw ni cadejdtu nani gajd ted chutis bejn. Niluxh di Dios cuälaztu, dini gusaan tedrutu dzunduxh nani digacdi guntu huant, suniidx Dios yälñadip yälñadaan lojtu te che tedtu trabajw sidxältu xho guibicajtu lo dzunduxhga, te gutiplajztu.

¹⁴ Ni'cni rniä lojtu, rebetzä nani sanälazä, colbicaj lo yälñrajñ xten rebanäjb. ¹⁵ Rniä lojtu si'c lo te beñ nasin, te beñnajn: colgulatzsa'c rextidxä don la laaca najcreni. ¹⁶ Che rdaunu xchej xten Dad Jesucrist najcni te seen nabannäänu Jesucrist. Che rdunnu neñ co'p, rnaalajznu gudijx Dad Jesucrist xtiejnñi xcuent xtojñu lo cruzj. Che rdaunu yätxtiil, sälojni anajcnu tejtis xcuent tiejxhni ni badeedni cuaj lo cruzj xcuentnu. ¹⁷ Sa'csi yu' tejtis yätxtiil,

mase najcnu xhidajl, najcnu si'c tejsi tiejxh sa'csi tejsi yätxtiil rdaunu che rauxchejnu xchej xten Dad Jesucrist.

¹⁸ ¡Bahuii xho rujn rexpejn Israel! Rajwreni xpääl reguidxaa ni rilereni lo Dios lo dxan nen guidoo, ni'c najcreni tejsi con guiraa rebejn nani rujn sigajc rujnreni. ¹⁹ ¿Xhixhni'c rlazä guiniä, naj? ¿La caniä yu' xhi sajc gojn nani gule'c bejn lo banäjb, ä? O ¿la yu' xhi sajc banäjbga, ä? ²⁰ Xhet sajcdireni. Narä caniä lojtu dee: Recos nani rbe'c rebenzijt lo rebanäjb, lo reben dxab cabe'crenini, et lojdi Dios. Luxh narä dina rlazä gactu tejsi con rebejn nani rbe'c lo reben dxab, te di chachunäzatu reben dxab. ²¹ Sa'csi digacdi yätu co'p ni rusnaj laaznu ni bejn Dad Jesucrist lo crujz nāgajcza co'p nani rudeedreni lo reben dxab. Digacdiza guidaunu xchej xten Dad Jesucrist nāgajcza xchej ni rudeedreni lo reben dxab. ²² O ¿la rlaznu guche'chnu Dad Jesucrist, ä? ¿Xhixh maazru nadipnu lojni, ä? ¡Gurniä lojtu!

Colyejn guira'ti te chä'p xpala'n Dios

²³ Guliicani, sajc jiennu xhitis ni rlaznu jiennu, niluxh xhet guira'ti ni rlaznu jiennu najc hueen par nuurnu. Guira'ti najc laaca, niluxh yu' reni di gacnaj gustioobnu lo xcälrlilajz Dios. ²⁴ Na'c guntu xhigab quiiltistu lagajc xcäl'nasa'ctu; maazru hueen quiilzatu xcäl'nasa'c xpisintu. ²⁵ Coltajw xhitis bääl ni rdo' lo guii, na'c guiniabdiidxtu caro siädni te di gacnaj xcäriejntu. ²⁶ Lo xtidx Dios caj rediidxre: “Sa'csi guideb guedxliuj näjza guiraa ni tre' lo guedxliuj najc xten Dios.”

²⁷ Palga jädgajñ te bejn ni di chalilajz xtidx Dios luj jädtaunäjlni luxh acuäjblu chääl, huija, gudajw xhitis ni cue'cni nez lojlu, na'c guiniabdiidxlu te di gacnaj xcäriejnlu. ²⁸ Palga yu' chu naa lojlu: “Dee najc bääl ni bile'cnu lo rebanäjb”, na'c gauluni, didi gunni gunijt dade'ga ni gunii si'c lojlu te di gacnajza xcäriejn chutis. ²⁹ Dina guiniä xcäriejnlu, didi gunnaji xcäriejn stee dade'ga; mbaj naj, ¿xhicuent riäjł gula'tzreni narä sa'csi rajc runä guira'ti porsiracnaj xcäriejn ste'ca bejn, ä? ³⁰ Palga rudedä xquixtios lo Dios nani runiidx xhi rauä, ¿xhicuent rniyajreni narä ni rauä, luxh abadedä xquixtios lo Dios? ³¹ Ni'cni palga gautu, o palga yätu o xhitis ni rujntu, colyujñ guira'ti te chä'p xpala'n Dios. ³² Na'c guche'chtu nicla rexpejn Israel niclaza rebenzijt, niclaza rexpejn xquidoo Dios. ³³ Sigajcza runä narä, runä guira'ti ni ruspaalajz rebejn, dina quilä xcäl'nasa'cätis, alga rguilä xcäl'nasa'c xhidalduxh bejn, te laareni lo dojl sa'csi ahuililajzreni xtidx Dios.

11

¹ Colyejn si'cni runä narä, sigajcza narä runä si'cni rujn Jesucrist.

Xho riäjł gun regunaa nen xquidoo Dios

² Rliä'pä xpala'ntu sa'csi lo guira'ti rnaj lajztu narä, rnajza lajztu rediidx nani baluiä lojtu, sudzu'tztu rusoobtu rediidx sigajcni baluiäreni lojtu. ³ Narä rlazä gacheepactu Jesucrist najc nani rnibee lo niguii, dxejtiru niguii rnibee gunaa si'c rnibee Dios Jesucrist. ⁴ Chutis te niguii ni yu' xhumbreel yejñi lañi cabedx-canabni lo Dios o lañi caguluiini xtidx Dios, laani rusanxtujyni yejñi. ⁵ Palga yu' te gunaa ni dini gusäu xpäiini yejñi che cabedx-canabni loj Dios o che caniini xtidx Dios, rusanxtujyni yejñi sa'csi najcni sigajc najc te gunaa ni abigaj yejñi. ⁶ Palga di te gunaa gusäu xpäiini yejñi suguigaj yejñi. Palga najcni te xtujy guigaj yejñi, sugusäuni xpäiini yejñi. ⁷ Di guchaag gusäu te niguii yejñi sa'csi najcreni si'c xtuxh Dios, näjza xcälrdimbicha' Dios. Niluxh regunaa najc si'c xcälrdimbicha' niguii. ⁸ Sa'csi di niguii nirixtiej cuä' gunaa; gunaa najc ni birixtiej cuä' niguii. ⁹ Xhetza xcuent gunaadi guc-chee

niguii; gunaa najc ni guc-chee xcuent niguii. ¹⁰ Ni'cni nanab jiäu yejc gunaa nen guidoo si'c te seen lo rexangl Dios yu' chu rnibeereni. ¹¹ Niluxh nez lo Dios nicla niguii niclaza gunaa digacdi guiban xtebreni. ¹² Sigajc galoo birixtiej gunaa cuä' niguii, sigajcza naj gunaa najc nani ruu bäz; luxh Diostis najc nani runchee guira'ti rebejn.

¹³ Colyejn lagajc xhigabtu naj, ¿la laaca najcni cuedx-guiniab te gunaa lo Dios laḷ ni xhet niäudi yejcn, ä? ¹⁴ Loj reben guedxliuj guiraa reniguii rgaj yejcreni, sa'csi najcni te xtjuj guigaduxh xquidxejcreni. ¹⁵ Niluxh regunaa hueen najc rga' xquidxejcreni te rusäuni yejcn. ¹⁶ Palga yu' chu tilidi dx cuent rediidx nani cania lojtu, nanab gacbeeni si'ctis riennu, si'ctisza rujnreni nen guiraa rexquidoo Dios.

Xho ruxhinreni xchej Dad Jesucrist

¹⁷ Rediidxre ni cagucuaä lojtu, direni guilia'p xpala'ntu, sa'csi che rdxagsa'tu nen xquidoo Dios, lacuaa laaca cuetu, xhet laadi rujntu. ¹⁸ Rnixgaä dee: Abiejn diagä che re'tu lo xquidoo Dios, rlia'tu lo sa'tu rajctu tiop cuaa; luxh riliica lazä rediidxre. ¹⁹ Pet naatu nanab guntu si'c te gacbeetu churenic sanälajzpac Dios, churenic sajcro lo xtzuun Dios. ²⁰ Ni'cni che rdxagsa'tu, dini gac te cuetu lo xmex xchej Dad Jesucrist, ²¹ sa'csi che agule'creni xchej lo mex, tejga bejn rlajz xcaxgaa xhi gauni, dxejc yu' reni agudxadoo xque'reni, agusozzaren, laḷni yu' stee cuaa bejn calaan, gajdreni gau. ²² ¿Xho mood? ¿La xheti rolijztu cadre gac gautu, yätu, ä? O ¿la rbälazlu xquidoo Dios, ni'c rusanxtujy lu rebejn ni xhet räjpdi, ä? ¿Xhini'c guinia lojtu naj? ¿La naatu guilia'pä xpala'ntu xcuent nani rujntu, ä? ¿Gurnialojtu guilia'pä xpala'ntu!

Xchej Dad Jesucrist

(Mt. 26:26-29; Mr. 14:22-25; Lc. 22:14-20)

²³ Baluiloj Dad Jesucrist loä lagajc nani baluia lojtu xcuent xho bejn ni guxhijn che gudaunäjni rexpejn ni te xchej xten pascw, guxhijn ni gudo'ni. Cua'ni yätxtiil, ²⁴ dxejc che abadeedni xquixtios lo Dios, gula'ni yätxtiilga, räjpni lojreni: “Colgajw, dee najc tiexhä ni gudedä guet xcuenttu. Scree guntu te guinalajztu narä.” ²⁵ Si'cza bennäjni co'p che gulujx gudajwreni, räjpni lojreni: “Ni yu' nen co'pre najc si'c xtienä; che ju'treni narä, sixe' xtienä xcuenttu, si'c te seen xten didxcoob ni gusa'n Dios loj rebejn ni aguleni. Scree guntu te guinalajztu narä.” ²⁶ Che gautu yätxtiilga, che yätu nen co'pga, ruluilosactu xhi bejn Jesucrist che gudijxni xcuent rextojḷnu lo cruzj; si'cza colyujn dxejli ni guibisacni lo guedxliujre.

Xho riäjl gac xchej Dad Jesucrist

²⁷ Ni'cni rniä lojtu, chutis tejtü ni rajw yätxtiil, ni rä'za co'p xten xchej Dad Jesucrist, palga dini gusoob xtidx Dios, rujn ni dojl, najcni si'cni lagajc laani bagu't Jesucrist, baxhe'zani xtiejn ni. ²⁸ Niluxh sugula'tz tejtatu lagajc lastooni don la yu' xhi dojl bejn ni, dxejcti sajg gauni yätxtiil, yäni co'p xten xchej Dad Jesucrist, sa'csi abaxhobdojḷni. ²⁹ Chutis bejn ni gau, ni yä xchej Dad Jesucrist, luxh dini gula'tz lagajc lastooni xhicuent gauni, yäni xchej Dad Jesucrist, lagajc laani rujn ni jiajb xcälhaj Dios yejcn. ³⁰ Ni'cni lacti resa'tu racxhuu, xhet nadaanreni, luxh yu'zaren agujt. ³¹ Ni'cni nanab finu xho najcnu, guiniabnu lo Dios gudzucajni rextojḷnu te didi tednu trabajw. ³² Niluxh che rdejdn trabajw, rdejdnuni te na'c tednu trabajwduxh si'c ted reben guedxliuj che gacreni yälguxhtis xten Dios.

³³ Ni'cni rniä lojtu, rebetzä, che guire'tu te gautu xchej, colcuäjz resa'tu. ³⁴ Palga yu' chu tejtü ni calaan, sugauni lagajc rolijzni, te di gun Dios yälguxhtis lojtu. Guiraa rexhistee cos, che jäälä ro'c fiä don xho gacsa'cni.

12

Dzuun ni rudeed Sprit Dxan xten Dios lo tejga ni rililajz

¹ Rebetzä, rlazä gacbeetu xcuent dzuun ni rudeed Sprit Dxan xten Dios lo tejganu.

² La'tu najntu che gajdtu chalilajz xtidx Dios, rajntu chutis banäjb ni di gacbee, ni naatis bejn gantu. ³ Ni'cni rlazä gacbeetu naj, nicla tejtü ni yu' Xsprit Dxan Dios neñ lastooni sajc guinii: “Xhet sajcđi Jesucrist.” Luxh rut rajcđi rnii: “Jesucrist najc Dadbid baxhuaannu”, palga di Xprit Dxan Dios cuääz neñ lastooni.

⁴ Mbaj naj. Yu' xhidajl dzuun ni rudeed Dios loj rebejn ni huililajz xtiidxni, niluxh tejsi najc Xsprit Dxan Dios ni rujn dzuunga nen lastoo guiragajcnu. ⁵ Yu'za balti cuaa dzuun nani riennu, niluxh tejsi najc Xtadbid baxhuaannu. ⁶ Yu' xhidajl mood rajc dzuun, niluxh tejsi Dios rujn dzuunga lastoo guiralii bejn. ⁷ Tejga bejn ruluiloj garen-garen xtzüun Sprit Dxan xten Dios, niluxh guira'ti redzuunga najc te gacnäjreni guiraanu. ⁸ Lo tej bejn rudeed Sprit Dxan yäl_nasin, lo steeni rudeed lagajc Sprit Dxanga yäl_nnajn. ⁹ Lagajcza Sprit Dxanga rudeedzani yäl_rililajzro lo tejni, dxejc lo steeni rudeedza lagajc Sprit Dxanga yäl_rnibee te rusiajcni yäl_rracxhuu. ¹⁰ Loj stee bejn rudeedzani yäl_rnibee te gunni milaagw; loj stee bejn rudeedni yäl_rriembee te sajc guinixgaani xcuent recos ni churu gac; lo steeni rudeedni yäl_nasin te gumbeeni chu najc Sprit guliipac, näjza chu najc sprit ni rusguee. Lo stee bejn rudeedzani guiniini garen-garen redidxsaj; loj stee bejn rudeedzani yäl_rracbee te rajc rniini loonu xhini'c gunii bejn ni rnii garen-garen redidxsaj. ¹¹ Niluxh tejsi najc Sprit nani rujn guiraa redzuunre, racnäjni rujn tejganu xtzüunni si'ctis ni rlajzni.

Guiraanu najcnu te la' tejsi tiejxh

¹² Sigajc ni najc tiejxhnu tejsi, mase yu' xhidajl la' xteni, tejgareni te la' tejsi tiejxh, sigajcza najc rebejn nani huililajz xtidx Jesucrist. ¹³ Guiraanu, mase najcnu rexpejn Israel o ben griegw, mase najcnu mos o mastr, gurob-nisnu con laj Sprit Dxan che huililajznu xtidx Dios, te gujcnu si'c tejsi tiejxh, luxh tejsi Sprit Dxan xten Dios biäd_läjz neñ lastoonu.

¹⁴ Sa'csi tiejxhnu dini gac tejsi la', najcni balti la'. ¹⁵ Paru naa ni'nu: “Sa'csi dina gacä te naa, ni'cni dina gacä te la' tiejxhre.” ¿Xhixh porsı ni'c dini gac tla' tiejxhga, ä? ¿Gurniälojlu! ¹⁶ Palga diajgnu naa: “Dina gacä te baloj, ni'cni dina gacä te la' tiejxhre.” ¿Xhixh porsı ni'c dini gac tla' tiejxhga, ä? ¿Gurniälojlu! ¹⁷ Palga guideb tiejxhni niajc te baloj, ¿xhi cojn niejn diajgni? Palga guideb tiejxhni niajc te diajgni, ¿xhi cojn chuxhi'ni? ¹⁸ Mbaj naj, ni'c basoob Dios guiraa rela' te guc-chee tiejxhnu si'ctis ni rlajzni gacni. ¹⁹ Paru niajc guidebni si'c tejtis la'ni, ¿xho niajcpacni te tiejxhni dxejc? ²⁰ Niluxh naj ensilaani yu' xhidajl la' te najcni tejsi tiejxhni.

²¹ Te balojnu di gac gäbni lo naanu: “Dina guiquinälu”, niclaza bitiuycjni di gac gäbni lo ni'ni: “Dina guiquinälu.” ²² Chucala lapacreni rquuinru nani ruzeñ lascanu xhet sajcđireni. ²³ Luxh retla'ga nani rchalonu guxii sajcđireni, reni'c maazru sajc. Luxh reni rtuinäanu, niguii sigajc gunaa, reni'c riapdarunu. ²⁴ Biätla sgaii la' tiejxhnu nani rlui saruru, reni'c di guiquiin gapdanuni. Niluxh abenchee Dios tiejxhnu si'c, te gapdaru bejn retla' nani lascanu guxiiru sajc. ²⁵ Bejn ni si'c te di chu yäl_rdijl lo retla' tiejxhnu, te guiraa retla'ga gacnäj sa'reni. ²⁶ Ni'cni che et laadi yu' te la' tiejxhnu guidebni ru' et laadi. Sigajcza che guiliä'pnu xpala'n te la' tiejxhnu, guideb tiejxhnu rbalajz.

²⁷ Ni'cni guiraanu najcnu si'c tiejxh Jesucrist. Tejganu najc te la' tiejxhni. ²⁸ Luxh abadeed Dios yäl̄rnibee lo tejganu lo xquidooni te gunnu xtzuun-xtzuunni. Ganidtoo guleni reapost; ni rojpga guleni rebejn ni rnii xtidx Dios; ni riojn̄ga, guleni rebejn ni ruseed; dxejcti guleni reni rujn remilagwr, reni rusiajc beṅracxhuu, reni racn̄aj, reni rnii garen-garen redidxsaj. ²⁹ Et guiraadi rexpejn Jesucrist najc apost. Et guiraadizareni rniireni xtidx Dios. Et guiraadireni rajc ruseed. Et guiraadizareni rajc rujn remilagwr. ³⁰ Et guiraadireni rajc rusiajc rebeṅracxhuu. Etza guiraadireni rajc rnii garen-garen didxsaj, et guiraadireni rajc rnii xhi säloj redidxsajga. ³¹ Nanab guideb lastootu r̄lajztu guniidx Dios reyäl̄rnibee ni najc maazru hueen lojtu. Niluxh narä guluiä lojtu te nezyuj ni najc hueenru loj guiraareni.

13

Yälsanälajz

¹ Palga guiniä guiraloj xtidxsaj rebejn, o xtidx rexangl Dios, luxh dina chanälazä rebejn, rubejtis xtidxä si'c te tamboor o te platii. ² Palga sajc guiniä xtidx Dios xcuent recos ni churu gac, luxh racbesa'cä guiraa recos xhiga'tz xten Dios, näjza guiralii yäl̄nasin xten guedxliujre, palga rapä yäl̄rililazduxh te gac gäpä lo redajnre, "col̄guibicaj", luxh rbicajreni, niluxh xhet sanälazädi rebejn, rut nacädi. ³ Palga gudedä guiraa rehxixtenä nani rapä te gau rebejn ni xhet rajpdi; palga gudedä tiexhä te checni, luxh xhet sanälazädi rebejn, xlia'si gunä guiraa redzuunga.

⁴ Rebejn ni rajp yälsanälajz cabäjzreni, najczareni beṅsa'c, direni säblajz xhi xten sa'reni, direni guschä'p lagajc xpala'nreni, direni gac guyalajz. ⁵ Direni gun recos ni di guchaag, dini quüil xcäl̄nasa'ctisni, dini guidxe'ch, dini jiu redojl̄ ni rujn bejn lojni. ⁶ Nani rajp yälsanälajz dini guibalajz che rujn stee bejn dojl̄, alga rbaa lajzni che laaca rujn bejn. ⁷ Nani rajp yälsanälajz rujn huant xhitis cos, rililajzni hueen xcuent xhitis cos, sanuutis cabäjzni, rajc rdejdn̄i xhitis trabajw.

⁸ Yälsanälajz dipacni nitloj. ¿La rniireni xtidx Dios xcuent recos ni churu gac, ä? Sidzujn dxej sibäjz rediidxga. ¿La rajc rnii bejn garen-garen redidxsaj, ä? Sidzujn dxej siacdx̄i redidxsajga. ¿La yu' yäl̄najn? Sidzujn dxej sinitlojpacni. ⁹ Sa'csi naj guxilii racbeenu, guxilii xtidx Dios xcuent recos ni churu gac rajc rniinu, ¹⁰ niluxh che jiädsac Jesucrist ni rajp guiralii yäl̄najn, sinitloj xcäl̄nandxucnu.

¹¹ Che gucä biuux, guniä si'c biuux, benäza xhigab si'c biuux, niluxh che bidzunä lo yäl̄bengol, gunitloj rehxigab biuux ni benä galoo. ¹² Sa'csi naj rhuiinu si'c loj te guihuaajn ni nacäjy, luxh che guibaṅnäänu Dios xhaguibaa, suhuisa'cnu si'cni ruhuii bejn che suga'ni loj sa'ni cahuiinini. Naj racbeenu re'cti rec, niluxh dxejc sacbesa'cnu si'cpacni numbee Dios nuure. ¹³ Niluxh naj ria'n yäl̄rililajz näjza yäl̄rbäzljajz, näjza yälsanälajz. Lo guidxon̄ redee, sajcr̄u yäl̄rinälajz.

14

Renani rnii rediidx

¹ Ganiddoo col̄quiil yäl̄rinälajz, col̄nabza lo Dios te guniidxruni xhi stee dzuun, niluxh col̄yeynru te xca'tu yäl̄rnibesa'c te gusule'tu xtidx Dios. ² Che rnii te bejn garenca diidx ni di rebejn gacbee, rniini lo Diostis, et lojdi rebejn, sa'csi rut racbeedi xtiidxn̄i, mase caniini cosro, cosxhiga'tz nani ruluii Sprit Dxan xten Dios guiniini. ³ Niluxh bejn ni rusule' xtidx Dios, rustioobni xcäl̄rililajz bejn ni rulijdxni, ruspaani lajz nani rac-huin lajzni. ⁴ Che rnii te

bejn garenca didxsaj ni rut racbeedi, lastootisni rustioobni, niluxh bejn nani rusule' xtidx Dios xcuent recos ni churu gac, laani rustiobruni lastoo guiraa rebenguidoo.

⁵ Narä rlazä maläii rajc rnii guiraatu garen-garen diidx, niluxh hueenru gac gusule'tu xtidx Dios. Maazru sajc nani rajc rusule' xtidx Dios loj nani rnii garenca diidx palga di gacdi gusule'ni lo rebejn xhini'c caniini. ⁶ Mbaj naj betzä, che jiälä lojtu, palga guiniä garenca diidx lojtu, ¿xhi gacnäjni la'tu? Hueenru guiniliä xcuent te cos ni abaluiloj Dios loä, o xcuent te yäl'najn, o xcuent te xtidx Dios, o xcuent te yäl'ruliii.

⁷ Ni ruhuiinu xho najcza reinstrument ni rol bejn si'c te bizej, o te harp; palga di bejn gołsa'creni, ¿xho jiennu gacbeenu xhi dij cayol'reni, ä? ⁸ Sigajcza lo guerr; palga direni goł cornet dippac, ¿xho gacbeereni agojl chatijl'reni, ä? ⁹ Sigajcza la'tu, palga ditu guinisa'c didxsaj nani racbee bejn, ¿xho gunreni gacbeereni xhini'c caniilu, ä? Xlia'si guiniilu, lo bejtis sää xtiidxlu. ¹⁰ Yu' xhidalduxh didxsaj lo guedxliuj, luxh xheti tejni nani xheti xnejzni. ¹¹ Niluxh palga dina gacbeä didxsaj ni rniireni loä, nacä si'c te benzijt loj nani canii loä, sigajcza sajc nani caninä narä. ¹² Ni'cni la'tu ni rlanjtu xca'tu yäl'nibee xten Sprit Dxaan te guntu xhi redzuun, col'guejs, col'nab lojni xhidajl dzuun te gacnäjtu tioobru xcäl'rilibilajz rexpən guidoo.

¹³ Ni'cni palga yu' te bejn ni rnii garenca didxsaj, suguniabni loj Dios yäl'nibee te gac gusule'ni diidx ni rniini lo rebejn. ¹⁴ Palga cuedx-guiniabä lo Dios con te didxsaj ni dina gacbeä, lastoätis ni calä'p xpala'n Dios, niluxh xcärienä xhet cayacbeedini. ¹⁵ ¿Xho ricajni dxejc? Siniab xspritä näjza xcärienä lo Dios; sol' xspritä näjza xcärienä dij. ¹⁶ Palga dini gac si'c, xsprittislu calä'p xpala'n Dios con ste'ca didxsaj, niluxh bejn nani cacuadiajg di gacdi gacnäjnulu guiliä'pni xpala'n Dios, sa'csi dini gacbee xhini'c rniilu. ¹⁷ Hueenza calä'plu xpala'n Dios, per stee bejnga dini tioob loj yäl'rilibilajz. ¹⁸ Rudedä xquixtios lo Dios maazru rajc rniä garen-garen diidx loj guiragajctu. ¹⁹ Niluxh neñ guidoo maazru rlazä guiniä con xcärienä gaiitis diidx nani gacbeetu, nani guluii la'tu, loj tzuu mił diidx nani guiniä con xspritä ni ditu gacbee.

²⁰ Rebetzä, na'c rujntu xhigab si'cni rujn rebiuux, xcuenttis cosguijdx nanab gacnayatu si'c biuxbäz, per colyejn xhigab si'c te bengool. ²¹ Scree caj lo xleii toMoisés: “Mase guiniä lo rebejn con garenca diidx näjza xtidx benzijt, nicla si'c direni gacuadiajg xtidxä”, naj Dad baxhuaannu. ²² Ni'cni regaren-garen didxsaj najc si'c te seen lo renani gajd chalilajz xtidx Dios, et lojdi rebejn ni arililajz xtidx Dios. Niluxh yäl'rusule' xtidx Dios xcuent recos ni churu gac, ni'c najc te seen loj renani ahuililajz xtidx Dios, xhet lojdi renani gajd chalilajz xtidx Dios. ²³ Palga re'tu neñ guidoo dxejcti caniiu garen-garen diidx ni rut racbeedi, dxejc guidzujn tej ni di gan xtidx Dios, siniini guiraatu rajc yejctu. ²⁴ Palga re'tu neñ guidoo, dxejcti guiraatu cagusule'tu xtidx ni baniidx Dios lojtu, che jiu' tej ni di gan xtidx Dios, sacbeeni xhini'c caniiu, sacbeeni yu' xtojlni, ²⁵ sienloj rexhigab xhiga'tz ni yu' neñ lastooni, dxejcti siabrojni suzuxhibni lo Dios, siniabni lo Dios, siniizani guliipacni suga' Dios galäiitu.

Colyejn guira'ti xnez-xnejzni

²⁶ ¿Xho ricajni naj, betzä? Che guire'tu neñ guidoo suxca' tejpgatu tebgaj te salm, te xtidx Dios ni guluiini, te diidx ni baluiloj Dios lojni, te diidx con garenca diidx, nägajcza te ni gusule' xhi säloj diidxga. Colyejn guiraa ni rujntu te tioob xcäl'rilibilajz renani ahuililajz xtidx Dios. ²⁷ Palga yu' renani rnii con garenca diidx, sugunii tio'p-choñ bejn, niluxh tebgajreni, dxejcti sugusule'

steeni xhi säloj ni rnii tejgareni. ²⁸ Palga rut rajcdi gusule' rediidxga, na'c guiniireni con garenca diidx nen guidoo, suguinixtebreni lo Dios. ²⁹ Si'cza renani rusule' diidx ni rudeed Dios lojreni, suguinii tio'p-choñ bejn, niluxh tebgajreni, te cuadiajg stiop xchoñreni donnu la laaca caniireni. ³⁰ Palga guluiloj Dios te cos loj te bejn ni sobga' cacuadiajg, sucuedxisijcni, dxejcu suguiniini. ³¹ Sa'csi guiraatu sajc gusule'tu tebgajtu didx ni baniidx Dios lojtu te gac guisieedu, te tioob lastoo guiraatu lo yälirililajz. ³² Rudeed Sprit Dxan xten Dios yälñajn loj reni rusule' diidx ni rudeed Dios lojreni te acanajnreni che riäjil guiniireni o che riäjil cuedxireni, ³³ sa'csi Dios najc te Dios ni rujn guira'ti xnejz-xnejzni, dini gun bieju, niluxh rbecdxini lastoo bejn nen guiraa reguidoo xten rebejn ni ahuililajzpac xtiidxni. ³⁴ Sucuedxi regunaa nen reguidoo, sa'csi di gacdi gusule' te gunaa xtidx Dios. Nanab gunreni si'c caj lo leii gunreni, gucuadiajgreni xtidx Dios ni rusule' reniguii lojreni. ³⁵ Palga rlanjreni gacbeerureni, suguiniabdiidxreni loj chäälni che guibi'reni rolizjreni, sa'csi sianxtujy gunaaga palga guiniini nen guidoo.

³⁶ Colgacbee et la'ditu guläxtiejditu rextidx Dios, luxh etza xtebtis lojtu biäädni. ³⁷ Palga yu' tejtü ni rchalo rajc rniini diidx ni rudeed Dios lojni, o palga rchaloni abadeed Xpriet Dxan xten Dios te dzunro lojni, sugacbeepacni dee: guiraa rediidx ni cagucuaä lojtu, rucuaäni sa'csi si'c gunibee Jesucrist gucuaäni. ³⁸ Palga yu' chu tejtü ni di chalilajz rapä xcälñrñibee Jesucrist, rutza jiudi xtiidxni.

³⁹ Ni'cni, rebetzä, colyejnru te gusule'tu diidx ni runiidx Dios lojtu, na'c gudxojtntu renani rniiza garenca didxsaj. ⁴⁰ Luxh guira'ti nani rujntu, colyensa'cni, xnejz-xnejzni.

15

Gubañsac Jesucrist lo rebeñgut

¹ Naj rniä lojtu betzä, colgusnaj lajztu xtidx Dios ni basule'ä lojtu, nani huililajztu, loj nani sutijptu, ² näjza colgusnaj lajztu diidx xcuent ni badzucaj Dios xtojltu che huililajztu, palga sanuu sutijptu lojni, te di xlia'si huililajztu diidxga.

³ Lojtu ganiddoo basule'ä rediidx ni sajcu ni bisiedä, basule'ä xho gujt Jesucrist lo cruju, bixe' xtiejnri te badzucajni rextojlñu, sigajc ni caj lo xtidx Dios gac. ⁴ Basule'äza xho biga'tzni, dxejc ni rion dxej guläs Diosni, gubañsacni si'cni caj lo xtidx Dios gacni. ⁵ Cheni gubañsacni, baluilojni lo Pedr, dxejctiru loj guitzubito'p rexpejnñpacni, ⁶ dxejcti baluilojni lo gabixh gaii gayuu bejn ni tre' tejsi lajt. Xhidajlreni nabañsajc, niluxh yu'za reni agujt. ⁷ Dxejcti baluilojni lo Jacob, dxejctiru loj guiraa reapost.

⁸ Dxejcti lultpac baluilojzani loä, luxh alagudejd ruluilojni lo rexpejnñni dxejc. ⁹ Narä guxiiru sacä loj guiraa reapost, niclaza nungäjil cuälajreni narä apost sa'csi basacsä rexpejnñ xquidoo Dios. ¹⁰ Balaslazduxh Dios narä, ni'c narä nacä si'c ni nacä naj. Luxh et xlia'di balaslajzni narä. Narä benäru dzuun loj guiraareni, niluxh xhet narädi ni benä dzuun, sa'csi xcälñrñulasajz Dios cayacñäj narä. ¹¹ ¿Xhiru najcni palga naräni o palga laareni? Empac cagusule'nu xtidx Dios, luxh la'tu salilajztu xtiidxni.

Xho gubañsac rebeñgut

¹² Mbaj naj, palga nuurnu cagusule'nu diidx xcuent ni gubañsac Crist loj rebeñgut, ¿xhicuent yu'tu ni rnii, xheti yälrbañsac loj rebeñgut? ¹³ Palga xheti yälrbañsac lo rebeñgut, dxejc nicla Crist di nibañsac lo rebeñgut. ¹⁴ Luxh palga di Crist nibañsac loj rebeñgut, ¡xlia'si najc diidx nani basule'nu! ¡Xlia'siza najc

xcärlililajztu! ¹⁵ Luxh et ni'ctis. Abiga'nu sa'csi rusgueenu rniinu baspansac Dios Jesucrist loj rebengut, luxh dini nuspansacni loj rebengut, palga guliini di bejn guibansac loj rebengut. ¹⁶ Niluxh palga di rebengut chäs, niclaza Crist di nibansa'c lo rebengut. ¹⁷ Luxh palga di Jesucrist nibansac loj rebengut, xhet sajcdi xcärlililajztu, sanuutistu loj xtojltu. ¹⁸ Sigajcza aguniyt rebengut nani huililajz xtidx Jesucrist. ¹⁹ Palga naj ni nabajntisnu loj guedxliujre cabääznu Jesucrist, lo guiraa reben guedxliuj nuurnu najcnu rebejn ni riäjł jiaduxhtej guiraa reni ruhuii loonu.

²⁰ ¡Per dini gac si'c! Guliipacni gubansac Jesucrist loj rebengut. Laani guc ganiddoo loj guiraa rebengut ni gubansac, luxh laani dini niejt par tejpas. ²¹ Sigajcni biääd yälgujt loonu xcuent tejtis niguii, sigajcza biääd yärbansac lo rebengut loonu xcuent tejtis niguii. ²² Sigajc xcuent te niguii ni laa Adán biääd yälgujt, sigajcza xcuent Jesucrist biääd yärbansac loj rebengut. ²³ Tejganu xcuent-xcuentnu; Jesucrist gujc ganiddoo, dxejcti guiraa reni najc rexpejñni che jιάdsacni lo guedxliujre, guiraareni suspansacni. ²⁴ Che agujc ni'c, dxejcti siääd dxe lult che gudedsacni yälnibee lo Dios Xtadni, che abadzujłni guiraa reyälnibee, guiraa reyälguxhtis, guiraa reyälmilagwr. ²⁵ Nungäjłpac guinibee Jesucrist cheni gunli Dios gaan loj guiraa reni rdxe'ch lojni, quixhnireni detz ni'ni. ²⁶ Lult ni rdxe'ch lojni ni gunitlojni najc yälgujt. ²⁷ Lo xquijtz Dios caj: “Agudixhni guira'ti detz ni'ni te guinibeenireni.” Che rniini si'c huenliisi gacbee bejn di gacdi guinibee Jesucrist Dios, sa'csi Dios badeed lojni xhini'c guinibeeni. ²⁸ Che acanibee Jesucrist guiraali recos, dxejcti sudeedni guideb yälnibee loj Xtadni Dios, te xtebtis Dios guinibee guira'tipac.

²⁹ Palga rujntu xhigab di bejn guibansac loj rebengut, ¿xhi gun rebejn nani robnis xcuent rebengut? Palga di bejn guibansac lo rebengut, ¿xhicuent rutiobnisreni la'tu xcuent rebengut?

³⁰ ¿Xhicuentza rdxunnu lo casionduxh guira'ti or? ³¹ Rniliäpac lojtu, rebetzä, caläpä xpala'ntu xcuent Jesucrist Xtadnu ni cayun xtzunni lojtu. Ni'cni guniä lojtu, guira dxej rguuilreni narä te ju'treni narä. ³² Palga benä xhigab si'c te niguii guedxliuj che bacuanää reniguii ni najc si'c man nialajz lo guedx Éfeso, ¿xhi gaan benä? Palga di bejn guibansac loj rebengut, do'o jien si'c ni caj lo guijtz: “Do'o guidau, do'o guidun, sa'csi guixee empac sejtnu.”

³³ Na'c gusaantu gusgueereni la'tu, palga sachaaglu lo benguijdx näjza luj sajclu benguijdx. ³⁴ Basaniy xcäriejnlu si'cni nanab gunlu. Bascuääz dojl ni rujnlu sa'csi yu' balti bejn ni dipac gumbee Dios. Te guitujytu ni'c rniä diidxre lojtu.

Xho guibansac rebengut

³⁵ Naj yu' reni rniabdiidx: “¿Xho rbansac bejn loj rebengut? ¿Xhoza gac tiejxhneni?” ³⁶ ¡Chip nayäällu! Che rbe'clu te binij, di gäjł guiliejn palga di xhobga guet, nalajznu, palga dini guechduu. ³⁷ Luxh che rbe'clu, dilu cue'c gäjłga si'cni rlajzlu gacni, alga rbe'clu xhob o triuu o ste'ca binij, ³⁸ niluxh Dios rujn rliejñni, rustioobni gäjłga, lo tejga gäjł rudeedni xpalajgni o tiejxhni, si'ctis ni rlajzni. ³⁹ Xhet guiraadi retiejxhneni najc tebloj. Yu' bääł xten bejn, yu'za bääł xten reguidxaa, yu'za bääł xten reman xhaguibaa, yu'za bääł xten rebäjł. ⁴⁰ Sigajcza yu' tiejxh rebajł xhaguibaa, tiejxh rexten guedxliujre. Niluxh yäłrdimbicha' xten rebajł xhaguibaa najc tej, dxejc yäłrdimbicha' guedxliuj najc ste'ca. ⁴¹ Bicha' xte gubijdx najc garen lo xten bäii, sigajcza xpicha' rebal xhaguibaa najc garen-garenza lo sa'reni. ⁴² Sigajcza yärbansac loj rebengut; che guet bejn rga'tz tiejxhni luxh rujdxni, rnitlojni. Luxh che guibansacni loj rebengut, garenca gac tiejxhni, diruni gudx, anabajñni par

tejpas. ⁴³ Che rga'tzni, rujn bejn xhigab xhetru gacnäjdi tiejxhga, niluxh che guibansacni, lacti sacru, lacti sajc tiejxhga. Che rga'tzni, xhetru sajcdi gunni, luxh che guibansacni, anadipduxhni. ⁴⁴ Che rga'tz tiejxhnu, najcni xten guedxliujre, luxh che chäsni najcni te tiexhcoob ni runiidx Dios. Ni'cni yu' te tiejxhni ni siääd lo guedxliuj, yu'za te tiejxhni ni siääd xhaguibaa.

⁴⁵ Si'cza caj lo xtidx Dios: "Nigui galooga ni laa Adán, bejn Dios gujcni te bejn nabajn." Niluxh Adán ni biääd lult, Jesucrist najc Sprit ni runiidx yäl_naba_ncoob loonu. ⁴⁶ Ganid najc yäl_naba_jn xten guedxliujre, dxejctiru yu' te yäl_naba_ncoob xhaguibaali. ⁴⁷ Sigajcza niguii galooga najc bejn guedxliujre, niluxh ni rojp niguii ni biääd najc bejn xhaguibaali. ⁴⁸ Benchee Dios Adán con yuj, najcni bejn guedxliuj. Xhaguibaali biääd Jesucrist, najcni bejn xhaguibaa. ⁴⁹ Sigajcni najcnu si'c bejn guedxliujre, sigajcza sajcnu sigajc najc bejn ni yu' xhaguibaa.

⁵⁰ Naj guiniä rediidxre lojtu betzä, di gac ted tiejxhnu ni najc bääl näjza rejn xhaguibaa cadre yu' Dios. Tiejxhnure nani sinitloj di gacdiza xca'ni stee tiejxh ni najc par tejpas. ⁵¹ ¡Colhuii! Rlazäza gacheetu te didx-xhiga'tz; xhet guiraadinu guet, niluxh sidxaa guiraa retiejxhnu ⁵² tera't bäzlule', si'c cheni rdinya' guzii, che jiel lult trompe't, dxejc sibansac rebengut, säjsreni guideb tiexhcoobreni ni najc par tejpas. Luxh näjza tiejxhnu sidxaa. ⁵³ Sa'csi tiejxhnu ni najc xten guedxliuj nanab guidxaani te ga'pnu tiejxhnu ni najc xten xhaguibaa, sa'csi tiejxhnu ni najc xten guedxliuj rejtne, niluxh tiejxhnu ni najc xten xhaguibaa di gacdi guetne, najcni par tejpas. ⁵⁴ Niluxh che tiejxhnu ni najc xten guedxliuj abidxaa te ga'pnu tiejxhnu ni najc xten xhaguibaa, näjza che tiejxhnu ni sajc guet abidxaa te ga'pnu tiejxhnu ni di gacdi guet, ni najc par tejpas, dxejc sisiojbe xtidx Dios ni caj scree: "Yälgujt agunitloj sa'csi bejn Jesucrist gaan lojni. ⁵⁵ Yälgujt, ¿xho gac gunlu gaan naj, ä? Yälgujt, ¿Con xcäl_nayanlu naj, ä?" ⁵⁶ Xcäl_nayan xten yälgujt najc dojl. Xcälrnibee dojl najc leii. ⁵⁷ Niluxh rdeednu xquixtios lo Dios, nani runiidx te yälrnibee loonu te jiennu gaan lo yälgujt xcuent Dad Jesucrist.

⁵⁸ Ni'cni rebetzä ni sanälazduxhä, colchanuutis, colsudzu'tz lo xtidx Dios, na'c guidxajgtu guntu xtzuunni, sa'csi anancheetu xhet xlia'di najc dzuun ni runiidx Dios riennu.

16

Meel ni guire' par rexpejn Dios

¹ Xcuent meel nani guire' par rebejtznu, colyejnne sigajcni räpä gun reben rexquidoo Galacia. ² Casob dumingw, nalajznu ganid dxej xmaan, tejgatu colcuää te meel yejc nani rujntu gaan nen te xmaan, colcucheeni, te na'c gutie'tu meel che jiälä. ³ Te che guidzunä, guxhalä meelga, näjza tiop-choñ guijtz chanä chutis bejn ni cuetu chasa'nni guedx Jerusalén. ⁴ Palga laaca cha'aza, sajcza chänäreni narä.

Xhigab ni bejn Pabl chääni biaj

⁵ Guidzunä lojtu che agudedä reguedx Macedonia, sa'csi sidedä nejzga galoo ni jiälä ro'c. ⁶ Dxejcti pet siannää la'tu, pet saclaä, sidedä guiraa rebäi najl ro'c, te gacnäjtu narä che cha'a cadrotis cha'a. ⁷ Sa'csi di rlazä jiädhuiätu te ladejtzi, rlazä jiannää la'tu xchejpac, palga gusaan Dad Jesucrist gunä si'c. ⁸ Niluxh sia'nä guedx Éfeso, te ro'c tedä lanij ni rusnaj lajz bejn che biääd Sprit Dxan xten Dios. ⁹ Sa'csi ro'c yu' xhidajl bejn nani rlazj guisieed xtidx Dios, niluxh ro'c yu'za xhidajl reni rdxe'ch loä.

¹⁰ Palga guidzujn Timoteu lojtu, saru colhuiini, te na'c chuni yärsia' la l ni yunäjni la'tu, sa'csi cayujnne xtzuun Dios sigajc runä narä. ¹¹ Na'c gusaantu

chu tej ni cuälazni, colcuedxni lajzni, dxejc colgusunejzni, te jiädhuiini narä ree, sa'csi ree cabääznu laani con rebejtznu.

¹² Niluxh xcuent bejtznu Apolos, räpäza lojni niäädpacni lojtu con rebejtznu, niluxh di rlaizpacni niäädni naj. Per siäädcani dxejtis ni gac jiäädni.

Rextixtios lult ni ruxhalni

¹³ Col̄susiñ, col̄sudzu'tz lo yäl̄rililajz xten Dios, col̄yejn dzuun si'c niguii, col̄yajc bēndaan. ¹⁴ Xhitis ni rujntu col̄yejn̄ni con yäl̄rinälajz.

¹⁵ La'tu rebetzä, anajntu xcuent rexfamil̄ Estéfan̄as, nani ganid huililajz xtid̄x Dios nez regued̄x Acaya, najntu xho racnäd̄uxh̄reni rebejtznu nani huililajz xtid̄x Dios ro'c. Naj rniabd̄uxh̄ä lojtu, ¹⁶ col̄gusoob xtid̄x rebejn̄ga, näjza xtid̄x guiraa rebejn̄ ni racnäj rexpejn̄ Dios, ni rujnza xtz̄uun Dios.

¹⁷ Rbalazä bidzuj̄ñ Estéfan̄as, näjza Fortunato, näjza Acaico, sa'csi laareni bejn̄reni par narä nani di niajcd̄i niujntu sa'csi rutitu. ¹⁸ Gulecd̄xireni lazä näjza lajz̄tu, ni'cni, i col̄jiu sa' rebejn̄ga!

¹⁹ Rebeñ xquidoo Dios nez regued̄x Asia ruxhal̄ xtixtios lojtu. Aquila näjza chääl̄ni Priscila näjza rebejn̄ ni re' rolijz̄reni ruxhal̄z̄areni xtixtios lojtu.

²⁰ Guiraa rebejtznu ruxhal̄ xtixtios lojtu. Col̄guinii tejpgatu lo sa'tu: "Xchan, gacnäj Dios la'tu."

²¹ Narä Pabl, ruxhal̄ä xtixtios lojtu, lagajc narä benä relet̄rre.

²² Palga yu' chu tejt̄u ni di chanälajz Dad Jesucrist, sunitlojni. ¡Dad Jesucrist, guda!

²³ Gacnäj xcäl̄rulaslajz Jesucrist guiraatu. ²⁴ Yäl̄rinälajz ni rapä xcuent Jesucrist suchunäj̄ni la'tu. Sugacni si'c.

Stee Guijtz Ni Bacuaa Pabl Lo Guidoo Xten Guedx Corinto

Ni rojp guiitz ni bacuaa Pabl lo guidoo xten guedx Corinto

¹ Narä Pabl nacä apost xten Jesucrist sa'csi si'c rlazj Dios te gusule'ä xtiidxni. Narä näjza Timoteu, ni najc bejtznu lo xtidx Dios, rucuaanu guiitzre lojtu rexpejn xquidoo Dios ni yu' guedx Corinto, näjza loj guiraa rexpejn Dios ni rbäjz nez guiraa reguedx Acaya. ² Rniabnu lo Dios ni najc Xtadnu näjza lo Dad Jesucrist, gacnäjreni la'tu, guscuecdxireni lajztu.

Trabajw ni gudejd Pabl

³ Guiliä'pnu xpala'n Dios Xtad Jesucrist, nani rulaslazj nuurnu, nani rustoolajz nuunu. ⁴ Che rdejdnun trabajw, rbecdxini laaznu te rajcza rbecdxinu lajz renani cadejd trabajw con lagajc yälrbecdxilajz ni baniidx Dios loonu. ⁵ Sigajc ni rdedduxhnu trabajwduxh ni gudejd Jesucrist sa'csi rusule'nu xtiidxni, sigajcza rbecdxiduxh Jesucrist laaznu. ⁶ Palga rdeednu trabajw, najcni te gustolajz la'tu, te laatu lo dojl. Palga ruscuecdxi Dios lajznu, si'c rujnni te cuedxilajztu te guntu huant che tedtu lagajc trabajw ni cadejznanu. ⁷ Rinudzu'tz yälrunloj ni rajpnu xcuent la'tu, sa'csi nadonnu palga rdejdtu lagajc trabajw ni cadejdnun, suscuedcxni Dios lajztu sigajcni ruscuedxini laaznu.

⁸ Rebetzä, rlazä gacheepactu lacti trabajwduxh bideednu nez reguedx Asia, tudxe'nsi dinu nien huant, sa'csi gudedcaj trabajwga, acasislinu. Trabawduxhtejni, benä xhigab sujnni gaan, sugu'tni nuurnu. ⁹ Gulicanu, alabiennu xhigab sejtpacnu. Niluxh dee gusajcnu te bisieednu na'c chaliilajznu lagajc nuurnu, alga chaliilajznu Dios nani ruspañsac rebengut. ¹⁰ Sa'csi Dios baslaa nuure lo yälgujtgä, luxh sinuutis guslaani nuurnu lo yälgujt. Salilazduxhnu Diosre suslaaruni nuurnu, ¹¹ sa'csi cayacnäjtu nuurnu, cabedxcanabtu lo Dios xcuentnu. Dxejcti palga xhidajl bejn cabedxcanab lo Dios xcuentnu, xhidajlzareni sudeed xquixtios lo Dios xcuentnu xcuent xcalrulaslazj Dios ni baniidxni loonu.

Xhicuent di Pabl nij guedx Corinto

¹² Dee najc nani ruspaä laaznu: rbedxi xcäriejnun, ni'c ruluii loonu laaca nabajnnun, con yälndolajz riennu si'cni rnibee Dios; xhet sa'csi rajpnu xcalnajn reben guedxliujdi, alga sa'csi racnäj Dios nuure. Si'cpac nabajnnun lo guedxliujre, luxh maazru che yu'nu lojtu. ¹³ Cacaanu lojtu rediidx ni sajc goltu, ni sajc gacheetu, luxh cabäzä sachbesa'ctu guiragajc rediidx ni gucuaä, ¹⁴ lagajc si'cni agucbeetu mase gaii xtiidxnu, cabäzä guibaa lajztu xcuent nuurnu, sigajcni guibaa lajznu xcuent la'tu nen dxej ni jääd Dad Jesucrist.

¹⁵ Ni'cni ganiddoo benä xhigab niädhuiä la'tu te nibalajztu tio'p huält. ¹⁶ Nalajznu, benä xhigab nidedä ro'c che sa'a reguedx Macedonia, dxejcti stehuält cheni guibi'ä Macedonia, niädhuisacä la'tu ro'c te niacnäjtu narä te nia'a Judea. ¹⁷ ¿Xhaa dina niunsa'cä xhigab che benä xhigabre? ¿La rchalotu runä xhigabä si'c te ben guedxliuj nani runtiop lajzni, nani tejsi diidx rniini "sia'ä" nägajcza "dina cha'a", ä? ¹⁸ Dios guluii lojtu guliica rniä lojtu, dinu guinii tejsi diidx "sia'ä" nägajc "dina cha'a". ¹⁹ Xi'n Dios, Jesucrist nani bisule'nu lojtu narä näjza Silvan, näjza Timoteu dini guntio'p lajzni, dini guinii tejsi diidx "sunäni" näj "dina gunäni", niluxh laani guiraa xtiidxni najc "sunäpacni". ²⁰ Si'cza guiraa rediidx ni bia'n Dios loonu xcuent Jesucrist

najcreni “sunäpacni”; näjza xcuent laani najcreni “sugacni si'c” par nuurnu, te chä'p xpala'n Dios xcuent nuurnu. ²¹ Dios cagusudzu'tzza nuure näjza la'tu lo xtidx Jesucrist, agulezani nuurnu te jiennu xtzuunni. ²² Abacuaazani xseenni loonu, ni'cni baniidxi Sprit Dxan xtenni te cuääzni neñ lastoonu.

²³ Rbedxä loj Dios gacbeeni xhi yu' lastoä, guliipacni te diruna gutalä xcälñajtu, ni'c dina niälsacä guedx Corinto. ²⁴ Di rlajznu guinibeenu xho chalilajztu, alga rlajznu gacnäänutu lo dzuun te guibaa lajztu; guliipac agusudzu'tztu lo xcälñililajztu.

2

¹ Niluxh lagajc xcuent xcälñasa'cä benä xhigab dina jiädhuisacä la'tu che cayac-huin lazä. ² Sa'csi palga narä siädyenä gac-huin lajztu, ¿chuni'c gun guibaa lazä? La'tistu, nani benä gac-huin lajzni. ³ Ni'cni lagajc xcuent ni'c bacuaä lojtu, te che jiälä lojtu, di rebejn gunhuin lazä nani riäjñ guspaa lazä. Luxh nancheä palga narä guibaa lazä, nägajc la'tu sibaaza lajztu. ⁴ Che bacuaä guijtzga lojtu, lacti xhigabduxh benä, binduxhä; xhet te gac-huindi lajztu, alga te gacbeetu yälñsanälazduxh ni sanälazä la'tu.

Yälñrusiäjñ lajz ni yu' par nani bejn falt

⁵ Palga yu' chu tej ni cayujñ cayac-huin lazä, xhet xtebtis lazä cayunhuinni näjza lajztu cayunhuinni guxi diidxi guiniä sa'csi di rlazä guntu xhigabduxh. ⁶ Alabasacsiduxh xhidajñ bejn dade'ga, na'cru gusacsítuni naj. ⁷ Naj colñsiäjñ lajztu xcuent xtojñni, colñcuedxi lajzni didi gac-huinduxhtej lajzni. ⁸ Ni'cni rniabä lojtu, colñchanälajz bejnre si'c ni huinälajztuni galoo. ⁹ Bacuaxgaäza lojtu te gacbeä laa susoobtu xtidxä. ¹⁰ Naj renani jiäjñ lajztu xtojñni, näj narä siäjñ lazäni. Sigajcza narä, nani basiäjñ lazä, palga yu' xhi basiäjñ lazä, benäni xcuent xcälñasa'ctu, nez loj Jesucrist, ¹¹ te di gun beñdxab gaan nuure, sa'csi anajñnu xho najc latsiaj ni rujñ beñdxab.

Guyu' Pabl yärsia' che bidzujñni guedx Troas

¹² Che bidzunä guedx Troas, te gusule'ä xtidx Jesucrist, bejn Dad Jesucrist rutliidi badxojñdi narä, ¹³ niluxh guyuduxhä yärsia' sa'csi dina nidxälä Tito, bejtznu. Ni'cni basadidxi gacäreni, sa'äti nez reguedx Macedonia.

Jesucrist rujñ riennu gaan

¹⁴ Xquixtios lo Dios nani con Jesucrist racnäj nuurnu te dipacnu gunijñ, empac rujntisnu gaan, luxh con nuurnu guiraa nejz ruluilojñi xhi saru najc gumbeepac bejn xtidx Dios. ¹⁵ Sa'csi najczanu si'c te guxh xten yalnejxh xten Jesucrist lo Dios nez loj renani chalilajz xtidx Dios näjza nez loj rebejn nani canijñ sa'csi naadireni chalilajzreni xtiidxi. ¹⁶ Loj reni di chalilajz xtiidxi, najcnu si'c te guxh ni rugu't, loj renani rililajz xtiidxi, najcnu si'c guxh xten yalnejxh ni rudeed yälñnabañcoob. ¿Chu laa ni racbee sa' recosga? ¹⁷ Sa'csi dinu gac si'c najc xhidajñ bejn nani rusule' xtidx Dios te gunreni gaan meel. Nuure rusulesa'cnu xtidx Dios sa'csi rinälazpacnu Jesucrist luxh si'c ni gunibee Dios, si'c rusule'nu, rusule'nu diidxi con xcälñracnäj Jesucrist nez loj Dios ni cahuii xhini'c riennu.

3

Diidxi nacoob ni basa'n Dios loonu

¹ Che rniinu rediidxi, ¿la rchalotu canisacnu didxi sa'c lagajc xcuentnu, ä? Yu'reni ca' guijtz ni rnii najcreni beñsa'c. ¿La rlajzzatu guiluiinu lojtu sa' guijtzga, o guiniabnu guntu sa' guijtzga xca'nu, ä? ² La'tu najc si'c xquijtznu ni rnii xho najcnu. Lastoopacnu acuajtu. Guiraa rebejn rajc rhuii xho

huililajztu xtidx Dios sa'csi basule'nu xtiidxni lojtu. ³ Huenliisi rluijoj najctu si'c xquijtz Jesucrist, luxh nuurnu bizule'nu xtiidxni lojtu. Xhet con tintdi cuaj rediidxga, xhet lojdiza guij cuaj diidxga, Sprit Dxan xten Dios ni nabajn bacuaa rextidx Diosga, bacuaanireni lastootu.

⁴ Nadoncheenu redee, ni'cni xcuent Crist dinu guidxejb nez loj Dios. ⁵ Di gacdi jien xtebnu xhitis dzuun ni riennu, riennuni sa'csi laa Dios ni racnäj nuurnu. ⁶ Laani runiidx yäl'nadaan loonu. Nuurnu najcnu mos xten xtidx-coobni ni bia'nni con nuurnu. Luxh didxcoobga dini gac si'c xleii toMoisés ni bacuaareni lo guij, sa'csi xleii biädnä dojl, dxejc gujtnu. Niluxh didxcoobga ni rusule'nu biädnä Sprit Dxan xten Diosni, luxh runiidxni yäl'nabañcoob loonu. ⁷ Leii baluui yu' xtoj bejn, riäj guetreni. Xhidajl seen guyu' che bacuaa Dios rediidxga lo guij. Luxh di niajcdi nuhüi rexpejn Israel loj Moisés, bidxejbreni sa'csi rdimbicha' lojni, luxh sanuu cayuui yäl'rdimbicha'ga. ⁸ Palga si'c gujc che biäd leii, aticaxh naj su'ru xcäl'rdimbicha' xleii Sprit Dxan xten Dios, ni najc redidxcoob nani abasule'nu. ⁹ Palga xleii toMoisés ni baluuijoj yälgujt xcuent dojl biädnä yäl'rdimbicha', aticaxh naj yu' xcäl'rdimbicha' xtidxcoob Dios ni rudzucaj dojl. ¹⁰ Naj dirunu fii xcäl'rdimbicha' xleii toMoisés sa'csi xtidxcoob Dios rdimbicha'ru par tejpas. ¹¹ Palga yäl'rdimbicha' nani biuui bianisesduxhni tera't, stee yäl'rdimbicha're ni najc par tejpas sidimbichasesduxhni.

¹² Luxh ni'c runiidx yäl'rbedcxi lajznu, dipacnu guidxejb che rusule'nu xtidxcoob Dios. ¹³ Dinu gac si'c toMoisés, ni basäu tla' lajd lojni te di fii rexpejn Israel cayuui yäl'rdimbicha' ni guyu' lojni. ¹⁴ Niluxh bicäy xcäriejnreni; lo dxej najli che riel xleii toMoisés, najcni si'cni yu' xhi lajd rusäuu lastooreni, rudxojn gacbeereni, te di chalilajzreni, xtidx Jesucristtis rajc rudzucaj lajdga. ¹⁵ Lo dxe najli che roreni xleii toMoisés, najcni si'cni ruscäy te lajd xcäriejnreni. ¹⁶ Lo xtidx Dios rnii scree: “Niluxh che gusiechlajz te bejn, gudzuréni nez loj Dad, sibicaj lajdga”, nalajznu sacbeeni xtidx Dios. ¹⁷ Dad Jesucrist najc Sprit luxh cadre yu' Sprit xten Dios badzucaj Diosni lo xleii toMoisés. ¹⁸ Niluxh nuure dinu gusäu lajd lojnu, didi guscäjyni xcäriejnnu. Nuure najcnu si'c te guihujn cadre rdimbicha' xtuxh Dad Jesucrist, luxh chäi-chäi cadxaanu cayajcnu si'c najcni näjza caca'nu xcäl'rdimbicha' Jesucrist, sa'csi si'c cayujn Sprit Dxan xtenni.

4

¹ Ni'cni sa'csi agule Dios nuure te gusule'nu xtiidxni, sa'csi balaslajzzani nuure, dipacnu jäxhan. ² Ni'cni rbälaznu recos ni rajc xhiga'tz, sa'csi rusanxtyjreni. Dizanu gusguee, dizanu guchaa xtidx Dios, niluxh rniinuni si'cpacni najcni, te si'c ruhüi guiraa bejn rsiaapacnu lo xnezyuj Dios. ³ Niluxh palga yu' chu dipac gacbee rextidx Dios nani rusule'nu, najctisreni rebejn nani ala canitloj par tejpas, ⁴ sa'csi abascäy beñdxab ni rnibee guedxliujre xcäriejnreni, si'cni rujnni lo rebejn nani di chalilajz xtidx Jesucrist, te na'c fiireni xcäl'rdimbicha' xtidx Dios ni rnii xcuent xhanij xten Jesucrist, ni najc xtujxh Dios. ⁵ Che rusule'nu xtidx Jesucrist, dinu guiliä'p lagajc xpala'nnu, rliä'pnu ganaxtis xpala'n Dad Jesucrist. Nuure najcnu xmostu xcuent Jesucrist. ⁶ Che benchee Dios guedxliuj, guniini: “Lo xcäy suguirii te bajl ni gusanij.” Lagajc Diosga abasanij lastoonu te baniidxni bajl ni najc yäl'riembee xcäl'rdimbicha' Dios nez loj Jesucrist.

Xho guibanu con yäl'rililajz

⁷ Nuurnu najcnu si'c te guesyuj, xhet sajcdinu, niluxh guidxanu te yäl'nasacduxh, ni najc xtidx Dios xcuent Jesucrist, te guiluuijoj xcäl'nasa'c xten xcäl'rnibee Dios lacuaa xhisi te yäl'nadipbäz xtennu. ⁸ Rdeednu trabajw guira

nejz, niluxh dinu gunijt yälrunloj. Mase di jien xho jiennu, dinu chu yärsia'.
⁹ Rusacsireni nuure, niluxh di Dios cuälaznu, rguijnreni nuure, dizareni ju't nuure. ¹⁰ Cadrotis rionnu rusacsireni nuure si'c basacsireni Jesucrist, te si'c neñ tiejxhnu guluilojzani yäl'nabansac loj rebengut xten Jesucrist. ¹¹ Cadrotis rionnu rlanjreni ju'treni nuure sa'csi rusule'nu xtidx Jesucrist te si'c za neñ tiejxhnu guluilojzani xcäl'nabajn Jesucrist loj reben guedxliujre. ¹² Ni'cni rujn yälgujt dzuun loonu, per yäl'nabajn cayujn dzuun lojtu.

¹³ Sa'csi rajpnu lagajc xsprit xten yäl'rillilajzga, sigajc ni caj lo xtidx Dios: "Huillilazä ni'cni basule'ä diidx." Sigajc za nuure, huillilaaznu xtidx Dios, ni'cni rusule'nuni. ¹⁴ Sa'csi nadonnu lagajc nani baspan'sac Jesucrist loj rebengut, lagajc za laani gun guiban'sacnu con Jesucrist te gunni sunäjnu la'tu nez lojni. ¹⁵ Rsiajcnu guiraa ni rsiajcnu te xcuenti la'tu gudeedru bejn xquixtios lo Dios, te guiliä'pruzareni xpala'nuni xcuent yäl'rulaslajz ni sanuutis care'ch lo xhidajl bejn.

¹⁶ Ni'cni dinu gunijt yälrunloj, per mase tiejxhre acayujxh, guixe-guixee cagustioob Dios spritnu. ¹⁷ Retrabajw ni cadeednu lo yäl'nabajnre rdedgajczeni, niluxh rujnreni ga'pnu te yäl'rindimbichaduxh ni gajdnu guidon, ni najc par tejpas. ¹⁸ Dinu fiitis renani ruzeñ lo guedxliujre sa'csi sinitloj reni'c, alga cayenloonu renani di guzeñ, sa'csi renani di guzeñ najczeni par tejpas.

5

¹ Aracbeenu tiejxhnu najc si'c te yu' xten xaimnu lo guedxliujre, sidzujn dxej sinitlojni, nalajznu sejt tiejxhnu, suniidx Dios te tiejxhnu xten xhaguibaa nani di nitloj, nalajznu dini guet par tejpas. ² Guliicani, lałni dxunnu neñ tiejxhre, rbedxneñnu rdeednu trabajw, ni'cni rlanjnu maläi agojl guidxaa tiejxh guedxliujre te xca'nu te tiexhcoob ni siääd xhaguibaa. ³ Te si'c che acua'nuni, diruni gac si'cni suxhabääl xaimnu, sa'csi abicoob tiexhnu. ⁴ Lałni dxunnu neñ tiejxhre rbedxneñnu, rdeednu trabajw, sa'csi di rlaaznu suxhabääl xaimnu, rlanjnu gacwnu tiexhcoobnu, te tiejxhre nani cayejt, sidebnäjni tiexhcoob ni siääd xhaguibaa. ⁵ Nani benchee nuure parpac dee najc Dios, lagajc nani runiidx Sprit Dxan xteni loonu si'c te seen sujnpacnini.

⁶ Ni'cni dinu guidxeb, sa'csi nadonnu lałni nabajnnu lo guedxliujre, di gacdi guibajnnu xhaguibaa loj Dadga. ⁷ Sa'csi nabajnnu xcuent nani rililajznu, xhet xcuentdi nani rajc rhuiinu. ⁸ Ni'cni rniä nabajnnu dinu guidxeb, rchaloonu hueenru guisa'nnu tiejxhnu lo guedxliujnure, te choläznäanu Jesucrist xhaguibaa. ⁹ Ni'cni tejtis najc xhigabnu, palga lo guedxliujre o xhaguibaa, rlanjztisnu jiennu renani gun guibaa lajzni. ¹⁰ Sa'csi guiraanu riäjł suunu nez loj yagxhiil cadre gun Jesucrist yälguxhtis, te tejganu guica'nu xcuent nani biennu lo guedxliuj, palga dzunsa'cni, o palga dzunguidxni.

Diidx xcuent yäl'becdxi lajzni

¹¹ Luxh sa'csi rdxejbnu (nalajznu rucuaadiaagnu xtidx) Dad Jesucrist, ruliidxnu rebejn te chalilajzreni xtiidxni. Luxh Dios najn xho nabajnnu; maläi näjza lo xcäriejntu guluiloj xho nabajnnu. ¹² Dinu guiliä'p lagajc xpala'nnu lojtu stehuält, rniinu rediidxga lojtu te guibalajzntu xcuentnu, te ga'ptu xhi diidx gusejctu lo rebejn ni rchaglajztis ruhuii xho rien bejn, direni gacbee xhi yu' neñ lastooreni. ¹³ Palga najcnu si'c bejn ni rajc yejcreni, si'c najcnu par Dios, palga najcnu si'c bejn ni nasa'c xcäriejnnu, najcnuni par la'tu. ¹⁴ Sa'csi sanälazduxh Jesucrist nuure, ni'c rusoohtisnu xtiidxni, sa'csi nancheenu gujt tejtis par guiraanu, ni'c najcni si'cni agujt guiraanu nez loj Dios. ¹⁵ Luxh Jesucrist gujt xcuent guiraa rebejn, te renani rililajz xtiidxni,

na'cru guibajñreni xcuenttis laareni, alga guibajñpacreni xcuenttis Jesucrist nani gujt, nani gubañsac xcuent laareni. ¹⁶ Ni'cni nuure dinu fii lo bejn si'cni najczeni lo guedxliujre. Galoo biembeenu Jesucrist si'cni gujçni che gubajñni lo guedxliuj, niluxh ñaj et si'cti riembeenuni. ¹⁷ Ni'cni chutis bejn, palga rililajzni xtidx Jesucrist, sujnnini te beñcoob, diruni guichagljaz gunruni nani rajc lo guedxliuj, alga guichagljazni gunni xtzun Dios.

¹⁸ Guiraa dee siäd lo Dios, nani basiäjł lajzni xcuent Jesucrist, dxejcti baniidxni loonu rediidx xcuent xcälrusiäjł lajzni te gusule'nu rediidxga, ¹⁹ nalajznu, nanab gusule'nu diidxre: Dios guyunäj Jesucrist, cagusiäjł lajzni con rebeñ guedxliuj, te xca'nireni, sa'csi diruni gudzuub xtojł reni ahuililajz xtiidxni lo xcuentreni. Dxejç gule Dios nuure te gusule'nu rediidxpacre lo rebeñ. ²⁰ Ni'cni sio'pnu te guiniinu xtidx Jesucrist, najcni ascanu lagajc Dios canabduxh lojtu che rniabduxhnu lojtu, colgusiäjł lajztu, colyajc tejsi con Dios. ²¹ Di Jesucrist niujñ nicla tej dojl, niluxh sa'csi sanälajz Dios nuunu, xcuentnu bejn Dios gujç Jesucrist si'c te beñdojl che gule'cni guiraa rextojł guedxliuj yejç Jesucrist che cuajni lo cruzj. Si'c gujçni te sajc ga'pnu xcälñaya, xcälñasa'c Dios xcuent Jesucrist.

6

¹ Ni'cni rniabnu lojtu, jia'cnu tejsi lo xtzun Dios, na'c cuälaztu xcälñacñäj Dios; palga guntu si'c, xlia'si cua'tuni. ² Sa'csi loj xtidx Dios caj scree:

Dxej nani riäjł gunäni, bacuadiagä xtiidxtu,
dxej che gubicaj xtojłtu gucnää la'tu.

¡Coljiejñ! Ñaj najc te tiempsa'c,

coljiejñza, ñaj najc dxej ni guibicaj xtojłtu.

³ Na'c jiennu nicla tej ni gun guidxe'ch lajz bejn, didi guiniireni xhet laadi najc xcälñrusule'nu. ⁴ Niluxh lo guira'ti dzuun ni riennu, guluilojnu lo rebeñ najcnu xmos Dios; gacnu nadolajz; jiennu huant che rusacsíreni nuure; che rdejndu trabajw; che di jien xho jiennu; ⁵ che rguijñreni nuure; che rusäureni nuure neñ latzguiib; che rdejndu lo bieiduxh; che rdajł xtzunnu; che re'ch bacal yääl; che rucua'nnu; ⁶ guluilojza najcnu xmos Dios xcuent xcälñabansa'cnu lo Dios; näjza xcälñansa'c xtidx Diosnu; näjza yälñajc nadolajz; sa'csi laaca riennu lo sa'nu; näjza sa'csi rbäjz Sprit Dxan xten Dios neñ lastoonu; näjza xcuent yälñälajzpac bejn; ⁷ näjza xcuent didxguliipac; näjza lo xcälñnibeduxh Dios; ca'zanu si'c te madxed xcälñaya Dios, ca'nuni guropñaanu, ladbee, näjza ladbäjgw. ⁸ Ruluilojzanu najcnu xmos Dios palga chä'p xpala'nnu, o palgaza jianxtujynu; palga guiniireni didxsa'c xcuentnu, o palgaza guiniyajreni nuunu; palga naareni najcnu beñrusguee, mase najcnu bejn ni rnii didxlii. ⁹ Palga rut rłajzdi gumbee nuunu, o palga guira'ti bejn numbee nuunu; acayejtnu, niluxh bahuii, anu anabajñ; rusaan Dios rguijñreni nuure, niluxh dinu guet; ¹⁰ najcnu si'c bejn ni yu' xliajs, niluxh rbalaaznu; najcnu si'c bejn ni xhet rajpdi, luxh riennu gapduxh bejn; najcnu si'c bejn ni xhet rajpdi, niluxh rajpnu guiraloj.

¹¹ Lojtu, beñ Corinto, aguniliinu lojtu guiragajc rediidx ni yu' neñ lastoonu. ¹² Xhetliidi diidxdi bacua'tznu lojtu, niluxh pet cacuatx lajztu diidx ni nanab guiniitu loonu. ¹³ Ñaj narä rulidxä la'tu si'c ruliidx te Dad rexi'nni: ¡Colguinii loonu rediidx ni yu' neñ lastootu!

Najcnu si'c xquidoo Dios ni nabajñ

¹⁴ Na'c guchaagtu lo rebeñ nani di chalilajz xtidx Dios, sa'csi di gacdi gunteblojtu dzuun sa'csi tejni rłajz gun dzunsa'c, steeni rłajz gunni dzunguijdx, ¿xho gac sanäj bajł xcäjy, ä? ¹⁵ O ¿xho gac sanäj Jesucrist beñdxab ni laa Satanás,

ä? O çxho gac sanäj te bejn nani rililajz xtidx Dios te bejn ni di chalilajz xtidx Dios, ä? ¹⁶ çXhixh tebloj najc xquidoo Dios con rebanäjb, ä? Ni nuunu najcnu xquidoo Dios ni nabajn, lagajc si'cni gunii Dios galoo:

Cuazä neñ lastooreni, sisanääzareni.

Narä sacä Xtiosreni, laareni sajcreni rexpeneä.

¹⁷ Ni'cni colrrii galäiireni, colguibicaj lojreni, te laad colcuääz, si'c naj Dios:

Te gac xca'ätu, na'c fałtu recosdxuudx.

¹⁸ Dxejc la'tu sajctu rexinganä, rexindxa'pä,

luxh narä gacä xtadtu,

si'c naj Gueb Dios ni rajp guiralii yälrnibee.

7

¹ Ni'cni, la'tu ni sanälazä, sa'csi abia'n Dios diidxre loonu, do'o guisia xcäriejnnu, lastoonu näjza tiejxhnu, do'o cuäcaj guiraa rehxigabguijdx, guiraa redojl, te gac sanu lo rexnezyudxan Dios con xcälrdxejb Dios.

Xho basiejch lajz reben Corinto

² çColchanälajz nuunu neñ lastootu! Xhet latsiajdi biennu lojtu. Rut baxhındinu. Rutza basgueedinu. ³ Dina guiniä rediidxre te cue'cä xquejtu; ni aguniä lojtu galooli, la'tu yu'tu neñ lastoonu palga tejsi guetnu, o palga tejsi guibajnrnu. ⁴ La'tu nadip lazä, rniduxhä didxsa'c xcuenttu lo bejn, rbedxi lastoä, rbalazduxhä loj guiraa retrabajw ni cadeednu.

⁵ Ni'cni che guyu'nu reguedx Macedonia, di niajcdi nusilajznu sa'csi guiralajt cadejdnu trabajw, xcuent yälrdijl ni guyu' guideb gabinu, xcuentza yälrdxejb ni guyu' lastoonu. ⁶ Niluxh Dios ni racnäj rebejn ni rac-huin lajzreni, gucnäj nuure, sa'csi che bidzujñ Tito guredxi lastoä. ⁷ Luxh xhet sa'csi bidzujñtis Tito, näjza sa'csi gulecdxitu lastoo Tito, näjza sa'csi biädnäni diidx xho yu'tu, xho rlajztu fiitu narä, xho yu' xliajs lastootu xcuent xtojltu, xho rlazduxhtu guntu si'cni guniä lojtu, ni'cni bibalasduxhäru.

⁸ Acananä guc-huin lajztu che biltu guiitz ni bacuaä lojtu, niluxh di lazä niac-huin mase che baxhaläni guc-huin lazä, sa'csi naj nanä mase bejn guiitzga guc-huin lajztu, xhet xchejdi guc-huin lajztu. ⁹ Niluxh naj rbalazä, et sa'csi guc-huindi lajztu, alga sa'csi guc-huin lajztu te basiejch lajztu xcuent xtojltu, sa'csi guc-huin lajztu si'cni rlajz Dios, te di yu' xhi gunijttu xcuent nuunu. ¹⁰ Sa'csi yälrac-huin ni ruxhal Dios loonu rujn rusiejch lajznu, te ruslaa Dios nuurnu lo dojl ni'cni rbaalazä che bejn ni si'c. Niluxh yälrac-huin xten guedxliuj dini gun gusiejch lajz rebejn rextojlreni, alga rujni nitloj bejn tejpas. ¹¹ La'tu bejntu huant xliajs ni baxhal Dios si'cni rchaglajz Dios gac. Naj çcolhuui gan! çLacti xhi cossa'c bejn ni par la'tu! Bejn ni bahuisa'cpactu xhini'c gujc, te gac gusulegajctu xcuentni; dxejc bejn ni bidxe'chtu, näjza bejn ni bidxejbtu, ni'cni basaantu dojlga, dxejcti bejn ni rlajzpactu nuhuiitu loä, bejn zani guyu'tu yärsia' xcuentä, bejn zani rlajztu guntu yälguixhtis bejn nani bejn dojlga. Guiraa redee baluiloj et la'ditu bejn dojl. ¹² Ni'cni, che bacuaä guiitzga, dina nucuaäni loj bejn ni bejn dojlga, niluxh bacuaä guiitzga lojtu te guiluiloj xcälrsia'tu ni rajptu xcuent narä nez loj Dios. ¹³ Ni'cni aguredxi xcäriejnnu.

Naj aguredxi xcärienä, bibalazduxhäru xcuent xcälrbalajz Tito, sa'csi bi-coob, bisilajz xpřitni xcuent guiraatu. ¹⁴ Sa'csi palga yu' xhi didxsa'c ni räpä lojni xcuenttu, ditu nusanxtujy narä nez lojni. Niluxh sigajcni guniinu ganax didxgulii, sigajcza najc guiraa redidxsa'c xcuenttu ni guniä loj Tito, guliipacni. ¹⁵ Ni'cni maazru sanälajzni la'tu, che rnaj lajzni xho basoobtu

diidx, xho bejntu cua'tuni che bidzujn_{nu}, racejslitu cadxejbtu. ¹⁶ Naj rbaalazä sa'csi loj guira'ti la'tu nadip lazä.

8

Saru rudeedreni meel

¹ Naj bejtznu, rlazjznu guiniinu lojtu xho badeed Dios xcäl_rulaslajzni lo reben Macedonia ni huililajz xtidx Dios. ² Mase gudedduxh_{reni} trabajw, bibalajz_{reni}, mase xhetliidi gojpre_{ni}, badeedreni meel si'c te be_n ni rajp. ³ Narä caniliä lojtu, badeedreni xmeel_{reni} si'cni gojpre_{ni}, luxh badeedr_{reni} loj ni naa be_n saj_c gudeedreni. ⁴ Gunabduxh_{zaren}i loonu guisa_{annu} gudeedreni xmeel_{reni} te gacnä_{jreni} rexp_en Dios. ⁵ Niluxh dire_{ni} niuj_n si'cni biennu xhigab gun_{reni}. Ganiddoo badeedreni lagajc laare_{ni} loj Dad Jesucrist, näjza loonu si'cni rnibee Dios gac. ⁶ Sa'csi batie' rexp_en Macedonia meel, ni'c naj räpä loj Tito chanuupacni gutie'ni meel lojtu si'cni gunii Tito lojtu galoo. ⁷ Rujntu xhidajl dzunsa'c. Rililazsa'ctu xtidx Dios; rnisa'ctu xtidx Dios; rajptu yäl_{naj}n; rchaglajz_{pactu} guntu dzuun; rinälajz_{tu} nuunu, ni'cni na'c gusa_{antu} tedcaj gunzatu dzunsa'cre, nalajznu, gudeedtu meel.

⁸ Dina guiniä lojtu colyuj_npacni; narä rlazätis gacbeetu xho rbaalajz reni rudeed meel te guluiloj don la gului sanälajz_{paczatu} rexpe_n Dios. ⁹ Sa'csi la'tu anumbecheetu rulaslajz Dad Jesucrist, te mase najcni ri'cw, rajpni guiraa xhixten Dios, xcuentu guj_{cni} si'c te be_n ni xhet rajpdi, te xcuentni ga'ptu guiraa rehxixten Dios xhaguibaa.

¹⁰ Narä siniä lojtu xhi xhigab runä, par lagajc xcäl_{nasa}'ctu. Gudebijzli ganiid la'tu guslojtu bejntu dzunsa'cre, luxh rbaali lajz_{tu} rlazz_{pactu} guntuni. ¹¹ Naj colchanuu, colguluux dzuunga si'cni guslojtu cayujntuni. Naj te luux dzuunga colgudeed si'cni rajptu. ¹² Sa'csi palga rlazz_{duxh} te be_n gudeed lo Dios, laaca najc gudeedni si'ctis ni rajppacni. Di Dios guiniab gudeed be_n nani dini ga'p. ¹³ Dina guiniä gudeedtejt_u te tedtu trabajw te gapduxh stee be_n, alga te gacteblojtistu. ¹⁴ Nani rajprulu naj ni'c colgudeed te gusalojtu ni cayääd_{xreni}, te stee dxej nani rajpre_{ni} laare_{ni} saj_c suniid_{xzaren}i te gusalojreni nani cayääd_{xtu} te si'c gacni tebloj. ¹⁵ Sa'csi lo xtidx Dios caj scree: "Te be_n nani batopduxh yäl_{nasa}'c, xhet bia'ndiru, dxejcti nani guxii batojp yäl_{nasa}'c, xhet biääd_{xdi}."

Tito näjza rexcomanieerni

¹⁶ Xquixtios lo Dios nani rudeed lo Tito lagajc yärsia' ni rapä narä par la'tu. ¹⁷ Sa'csi cuäjbni gunni nani gunabä lojni gunni. Luxh sa'csi rlazz_{duxh}pacni gunni xtzuun Dios, naj lagajc laani bej_{nni} xhigab jädhuiini lojtu te luux dzuunre.

¹⁸ Caguxhal_{nu} xtee bejtznu chanä Tito. Guiraa rebej_n guidoo rnii didxsa'c hueen xcuent bej_{nre} sa'csi laaca rusule'ni xtidx Dios. ¹⁹ Ni'ctis aguleza reben guidooni te chunäj_{ni} narä te gacnä_{jni} narä lo xtzuun Dios nani cayennu te guiliä'pni xpala'n Gueb Dad Jesucrist, te guluilojza lacti rlazz_{pacni} jiennu xtzuunni. ²⁰ Ni'cni rlazä jäpdaduxh_{nu} te di chu tej ni guiniyaj nuure xcuent melrore ni chosa'nnu lo rexpe_n Dios. ²¹ Sa'csi narä riuduxhä runä nani najc laaca, et ganax nez lojdi Jesucrist, näjza loj rebej_n.

²² Con guiro'p redee, caguxhal_{zanu} stee bejtznu, nani agujc balti huält bihuiinu xho ruj_{nni}, te bahuiipacnu rlazz_{pacni} gunsa'cni xhidajl dzuun, luxh naj rlazz_{r_{uni}} gunsa'cni redzuunga sa'csi nadip lajz_{ni} la'tu. ²³ Palga yu' chu guiniabdiidx xcuent Tito, colyejt_z lojni laani najc nani cayunnä_j narä dzuun lojtu. Dxejcti xcuent stio'p bejtznu, laare_{ni} najcre_{ni} xquixhajg reguidoo, rliä'pzaren_i xpala'n Jesucrist. ²⁴ Ni'c na'c guidxejbtu che yu'tu lo rebej_n

reguidoo guluiipactu loj rebejn̄ga xho sanälajztu, näjza redzuun ni rujntu ni'c rniinu ganax didxsa'c xcuenttu.

9

Meel par rebejtznu

¹ Ni'cni dina gucuaäru lojtu xcuent dzuunre, nalajznu, yälracnäj rexpejn̄ Dios, ² sa'csi anancheä rlaizpactu guntuni, luxh xcuentpac ni'c agulä'pä xpala'ntu loj reben̄ Macedonia, räpä lojreni la'tu, reben̄ Acaya, gudebijzli batie'tu meel, luxh sa'csi bejntu si'c, xhidajlza reben̄ Macedonia biniib te badeedzarenı meel. ³ Ni'cni abaxhalä rebejtznu lojtu, te di xlia'si gulä'pä xpala'ntu xcuent dzuunre, te acabäjlzitu gudeedtu xmeeltu, sigajc ni agunixgaä lojtu. ⁴ Didi che jädnää reben̄ Macedonia jiophuiinu la'tu, xhet rajpditu, dxejc jianxtuyä narä, näjza la'tu. ⁵ Ni'cni benä xhigab, nanabpac jädxгаа rebejtznu, jädhuiireni la'tu, te fiireni don xho gac xcuent meelro ni galooli bia'n diidx gudeedtu, te abatiexgaatu nani gusalajztu sa'csi rlaizpactu gudeedtuni, xhet sa'csi rniinu riäjl̄pac gudeedtuni.

⁶ Rniliä lojtu, nani guxii rbe'c, guxiiza yäl̄nasa'c guiliäsni, niluxh nani rbe'c xhidajl̄ binij, xhidajlza yäl̄nasa'c guiliäsni. ⁷ Tejgatu col̄huii don lacti sajc gudeedni, dxejc si'c sugudeedni si'cti ni rlaizni, na'c gun tiopdi laizni, etza sa'csi riäjl̄pac gudeednini, sa'csi Dios sanälajz bejn̄ ni rbaali laizni rudeedni meel lojni. ⁸ Luxh Dios sajc guniidxru xcäl̄racnäjni lojlu, te si'c guixe-guixee sajplu xhidajl̄ guiraloj rehxixtenlu, te ga'plu xhitis ni rquiinlu loj guira'ti xtzunsa'clu. ⁹ Sa'csi lo xtidx Dios caj scree:

Abadeduxhni loj reben̄ ni xhet rajpdi luxh redzunsa'c ni rujnni, najcreni par tejpas.

¹⁰ Dios nani rudeed binij ni rbe'c nani rujn̄ dzuun loniaa, laani suniidxzani yätxtiil te guidaunu, lagajc Diosga suniidx, sutajlza binij cue'ctu, lagajc laani sustioobnini te gacduxh yäl̄nasa'c xten xtzunsa'ctu. ¹¹ Te si'c ga'ptu lacti yäl̄nasa'c te gac gudeedzatu xhiroob. Luxh xcuent xtzuunnu, meel ni ruxhal̄tu loj rexpejn̄ Dios sujn̄ gudedduxhrene xquixtios lo Dios. ¹² Sa'csi che racnäjtı rebejtznu, dinu guideed ganaxtis ni rquiinrene, rujnzanu rudeedrurenı xquixtios lo Dios. ¹³ Che racnäjtı sa'tu si'c, ruluilojtu lacti rusoobtu xtidx Dios si'cni ahuililajztuni, ni'cni siliä'preni xpala'n Dios xcuent xcäl̄racnäjtı, nalajznu xcuent meel ni badeedtu lojreni, näjza loj guiraareni. ¹⁴ Dxejcti laareni sixedx-siniabzarenı lo Dios xcuenttu, sinälazduxhrene la'tu sa'csi runidxduxh Dios xcäl̄racnäjni lojtu. ¹⁵ ¡Xquixtiosi Dios sa'csi baniidxni yäl̄nasa'cduxhtej loonu!

10

Yäl̄rnibee ni rajp Pabl sa'csi najcni apost

¹ Lagajc narä, Pabl, rniabduxhä lojtu, con guiraa didxdoo, guiraa didxsa'c xten Crist, (narä ni nac beñnadolajz che biälä lojtu, niluxh che suga'a zijt lojtu, dxejc nacä beññialajz). ² Narä canabä lojtu, col̄guibansa'c te che jädhuiä lojtu, dina gacä nialajz dizana guiniä redixnaj ni abenä xhigab guiniä loj gaii bejn̄ nani rniü nabañä si'c te beñguedxliuj. ³ Guliicani najcnu beñguedxliuj, niluxh dinu gucuanäj sa'nu guiib nani rca' beñ guedxliuj che rcuaareni. ⁴ Sa'csi reguiib ni rca'nu te guidiisa'nu direni gac sa' guiib ni rca' beñ guedxliuj. Nuunu rucuaanu con xcäl̄rnibee Dios te riennu gaan loj guiraa rexcäl̄rnibee guedxliujre. ⁵ Ni'cni cagutzujl̄nu guiraa rehxigabguijdxrene, näjza nani rchaloreni najc xhigabro nani rlaizrene guiniyajrene yäl̄rumbee Dios, luxh caca'nu guiralii rehxigabnu cagutednurenı ladzñaa Jesucrist te gusoobnu

rextidx Jesucrist. ⁶ Cabääztisnu te gunnu yäl̄guxhtis loj chutis bejn̄ ni dini gusoob xtidx Dios, che abasoob guiragajctu xtidx Dios.

⁷ La'tu cahuiitu redzuun ni rien̄. Palga yu' chu tejt̄u ni rchaloni najcni xpejn̄ Crist, sugunsa'cni xhigab, fiini xho najc lastooni, dxejcti sugacheep-acni sigajcni ahuililajzni xtidx Jesucrist, sigajcza nuure ahuililajznanuni. ⁸ Sa'csi mase guiliä'päru xpala'nä xcuent yäl̄rnibee ni rapä, ni baniidx Dios te gustiobä xcäl̄rililajztu, et te guxhinädi la'tu, nicla si'c dina guituiä. ⁹ Dina rlazä guchalotu rlazä guchebä la'tu con rexquitzä. ¹⁰ Sa'csi rniireni: "Lo rexquijztni caj didxnagajn̄, didxnialajz, niluxh che suga'ni laapacni, xheti xcäl̄siudzu'tzni, luxh xho rniaj diidx ni rniini." ¹¹ Luxh ni rii si'c, sugacheep-acni dee: si'cni najcnu con rextiidxnu che rucuaanu lojtu che yu'nu zijt̄, sigajcza najcnu che suganäjpacnu la'tu.

¹² Dinu gun xhigab najcnu tebloj loj rebejn̄ ni runnaro lagajc laareni. Niluxh reni'c rchaloreni si'c sa'csi ruhuiireni xho najcreni cuä' stee lagajc sa'reni. Che rujnreni si'c, nayääl xcäriejnreni. ¹³ Nuure dinu gunnarotej lagajc nuurnu, niluxh riennu si'cni nungäj̄l̄ jiennu, xcuent yäl̄rnibee ni baniidx Dios loonu te jiennu dzuun cadro yu'litu. ¹⁴ Ni'cni dinu nidedcaj xcäl̄rnibeenu che bio'pnu lojtu, sa'csi baniidx Dios yäl̄rnibee loonu ganiddoo nuunu gusule'nu xtidx Jesucrist lojtu. ¹⁵ Dinu niennaro lagajc nuurnu xcuent xtzun ste'ca bejn̄, ascanu lagajc nuunu biennuni. Cabääznu tioobru xcäl̄rililajztu, te gac jienrunu dzuun lojtu, si'ctis gal̄ jiennuni. ¹⁶ Te gacza gusule'nu xtidx Jesucrist ste'ca lajt̄ ni ria'n zijtru lo guejdx cadro yu'tu, na'cza gunnaronu lagajc nuunu xcuent dzuun ni bejn̄ ste'ca bejn̄.

¹⁷ Sa'csi nani rlazj gacnaro, suguiliä'pni xpala'n Dad Jesucrist. ¹⁸ Sa'csi et nani rliä'p lagajc xpala'ndini ni ria'n hueen nez loj Dios, niluxh bejn̄ ni rliä'p Jesucrist xpala'nni, ni'cni rbalaznäj Dios.

11

Pabl näjza rebejn̄ ni rniisi najcreni apost

¹ Maläi chanunäsijctu narä laj̄ ni guiniä gaii didxnayäle', niluxh asanunäjtu narä. ² Randzu'ä la'tu con yäl̄randzu' ni baniidx Dios, sa'csi abia'n diidx gutedä la'tu ladzṅaa Jesucrist te xca'ni la'tu. Rlazä gactu beṅnaya chäätu lojni, si'c te dxa'p che ruchṅaani te bi'n, rut bahualdini. ³ Niluxh rdxebä didi gusguee beṅdxab la'tu si'c ni basguee bäl̄ Eva con xcäl̄nadxällajzni. Didi gunni guichaa xhigabtu, guibicajtu lo xtidx Jesucrist luxh naj laaca rajṅpactu Jesucrist, guideb lastootu. ⁴ Sa'csi la'tu cagutipduxh lajztu che riädni ste'ca bejn̄ lojtu xtidx stee Jesús nani digac nani bisule'nu lojtu; o che naareni xca'tu stee sprit̄ ni digac nani acua'tu; o che naareni chalilajztu ste'ca diidx nani najc garenca lo xtidx Dios ni ahuililajztu. ⁵ Narä runä xhigab dina gacä bejn̄ ni guxiiru sajc loj guiraa reapost.

⁶ Mase di gacdi guinisa'cä, xhet yäl̄najndiza cayädxä; niluxh ni'c huenliisi rlui loj guiraa rediidx ni abaluiä lojtu, guiraa redzuun ni abenä ro'c.

⁷ O ¿la benä te dojl̄ guyu'ä lojtu si'c te beṅ nadolajz, te gactu beṅroru, sa'csi xhetliidi cua'ädi xcuent ni basule'ä xtidx Dios lojtu? ⁸ Cua'ä meel ni baniidx garenca guidoo loä che guyu'ä lojtu, te benä xtzun Dios lojtu. ⁹ Che guyu'ä lojtu guyu' xhi biquinä, niluxh xhet cua'ädi lojtu, dina nutalä xtzunutu. Sa'csi che biääd rebejznu ni siääd Macedonia, baniidxreni guiraa ni biquinä. Loj guiraa redee dina nutalä xtzunutu, luxh si'c sinuu gunä. ¹⁰ Guideb didxlii xten Jesucrist ni yu' neṅ lastoä, rniliä rut sajcdi gudzucaj xcuent xho yuä lojtu, ni'cni care'ch didxroga lo guiraa reguedx Acaya. ¹¹ ¿Xhicuent rniä si'c? ¿Laa sa'csi dina chanälazä la'tu, ä? ¿Xho gacni si'c! ¿Dios anajn̄ lacti sanälazä

la'tu! ¹² Niluxh nani rungacä, lagajc ni'c sinuu gunä, te gudxonä renani rlanj gacnaro, renani rlanj naa rebejn najcreni si'cpac najcnu, niluxh direni gac. ¹³ Direni gac apost, laareni rusgueereni, rujnsireni si'c ni najcreni apost xten Jesucrist, luxh rut najcdireni. ¹⁴ Luxh xho dini gac si'c, ni lagajc bendxab ni laa Satanäs ruluiloj si'c te xangl Dios ni rdimbicha' te rusgueeni bejn. ¹⁵ Ni'cni na'c guidxelojtu palga näjza rexmos bendxab riääd, rujnsireni si'c bejn ni rujn dzunsa'c, niluxh sinitlojreni par tejpas xcuent ni rujnreni.

Rdejd Pabl trabajw sa'csi najcni te apost

¹⁶ Rnisacä lojtu, na'c guntu xhigab yecä cayajc, niluxh palga si'c rujntu xhigab, colgusaanza guiniä si'c te ni rajc yejcnä te guiniäza didxro lagajc xcuentä. ¹⁷ Diidx ni rniä dina guiniäni xcuent xcälrnibee Dios, alga rniäni si'c te ni rajc yejcnä, lala redidxro ni rniä xcuent lagajc narä. ¹⁸ Sa'csi lacti bejn yu' ni rniä didxro xcuent redzuun ni rujnreni lo guedxliujre, sigajcza siniä didxro xcuent lagajc narä. ¹⁹ Ni la'tu, sa'csi nasinduxhtu, sanunäjtu rebejn ni rajc yejcnä. ²⁰ La'tu sanunäjtu chutis ni rnibee lojtu si'c te lam, o rusguee la'tu te rbajnreni xhi xtentu, o rujnni runxlia'tu xtzuunni o rliä'preni lagajc xpala'reni, o rga'preni lojtu. ²¹ Mase rtuiyä guiniäni, dipac niajcdi niniä diidx lojtu te niacä si'c najc rebejnga. Niluxh loj xhitis nani runnaroreni, (canisicä si'c te benayääl) narä sajcro gunnaröä.

²² ¿La najcreni xpejn hebreos? Sigajcza narä. ¿La najcreni xpejn Israel? Sigajcza narä. ¿La najcreni xajg toAbram? Sigajcza narä. ²³ ¿La najcreni xmos Jesucrist? Narä nacäruni lojreni. Naj rniä si'c te bejn ni rajc yejcnä. Abenäru dzuun lojreni, agudijnrurenä narä loj ni gudijnreni laareni, abasäururenä narä nejn latzguuib, nicla gac guigab bal huält gudijnreni narä; baltiza huält ameer nietä. ²⁴ Gaii huält gudijn rexpejn Israel narä, tejga huält batiäjlneni duguijd detzä galbitzubigaa huält. ²⁵ Chon huält bahuajcwreni narä garo't; stee huält bacuaareni guij yecä; chon huält biäaz barcw cadro sa'ä loj nisdoo; teb dxej, teb yääl guyu'ä lo nisdoo. ²⁶ Huaduxhä biaj, lacti bixun riesgw xcuentä lo gueuu, xcuent regubaan, xcuent rebenladxä, xcuentza rebenzajt. Bixunza riesgw nejn reguedxro, näjza nez lo reyubijdz, näjza lo nisdoo, näjza xcuent rebejn ni rusguee, rniisireni najcreni bejtznu lo xtidx Jesucrist. ²⁷ Abenduxhä dzuun, agudedduxhä trabajw, balti yääl dina niesä, balti huält gulanä, biolä, balti huält xheti xhi niauä; agudedäza yälnduxh; guyu' huält xhetiza xhabä.

²⁸ Luxh xhet loj redeetis rdedä trabajw; guixe-guixee di lastoä cuedxi xcuent yärsia' ni ru'ä xcuent reben guidoo ni huililajz xtidx Dios. ²⁹ Che rdxajg tejtü, näjza narä rdxagä. Palga tejtü riajb lo dojl, narä ruduxhä yärsia' xcuentni. ³⁰ Palga nanab gunnaröä lagajc narä, sunäni xcuent rediidx nani ruluiloj xcälrdxagä. ³¹ Dios ni najc Xtað Jesucrist, nani riäjlni guiliä'p xpala'nni par tejpas, ananchee dina gusgueä la'tu. ³² Che guyu'ä guedx Damasco, gubernadoor nani guyu' ro'c, najcni xpejn rei Aretas, gunibee gojp rexcuxhtisni guejdxga te niniaazreni narä te nisäurenä narä nejn latzguuib. ³³ Niluxh basiäjtneni narä nejn te dximro nez ro' te padeer ni rdejd gabi guejdxga, te si'c gulaä ladznäarenä.

12

Dios baluiloj lo bacal

¹ Mase riäjlni guiniäni, xhet gunädi gaan guiniä didxro lagajc xcuentä ni'cni rlanzä chanuu diidx, guiniä xcuent rebacal näjza xcuent nani baluiloj Dios loä. ² Numbeä te niguii ni ahuililajz xtidx Jesucrist. Gutzudaj ijz huijni guibaa ni riojnga, dina ganä laa guideb tiejxhni huijni, o la ganax xspritni huij,

Diostis najn. ³ Diostis najn la guideb tiejxhni, o ganax xpřitni, niluxh nanä xho huij niguiiga, ⁴ guläs Diosni cadro yu'pac Dios, luxh ro'c biejn diajgni didx-xhiga'tz, didxroduxhtej, nani di gacdi guinii beñ guedxliuj. ⁵ Xcuent sa' niguiiga sajc guiniä didxro, didxsa'c, niluxh xcuent lagajc narä, di gacdi guiniäni; siniätis diidx ni ruluiloj xcälrdxagä. ⁶ Mase rlazä guiniä didxro, didxsa'c xcuent lagajc narä, dini gac didxnayääl, sa'csi guliicazani. Niluxh dina guiniäni te di guntu xhigab nacä beñroru loj ni rhuiitu runä o nani riejn diajgtu rniä.

⁷ Baluiloj Dios xhidalduxh cosroduxh loä, niluxh te na'c gacä beñnaro, basaan Dios gusloj guyuguijdx tiexhä, si'c te guejch huääz tiexhä, ni baxhal beñdxab xten Satanäs te gusacsini narä te di gacä te beñnaro. ⁸ Choñ huält agunabä lo Jesucrist xcuent ni'c, te guibicajni. ⁹ Niluxh laani najni loä: “Yälracnä j ni gunidxä salduxh luj, sa'csi ruzensa'cru xcälmlagwrä che xheti yälrutiplajz te bejn.” Ni'cni hueenru guiniä didxro sa'csi xhet yälrutiplazädi rapä, te guzeñ xcälrnibee Jesucrist lastoä. ¹⁰ Ni'cni rbedxilazä xheti xcälrutiplazä, rbedxizalazä rniyajreni narä, näjza che caquinä guiraloj, näjza che rdedä trabajw xcuent Jesucrist, sa'csi che xheti xcälrutiplazä, dxejc runiidx Dios yälñadip, yälñadaan loä.

Yu' Pablyärsia' xcuent guidoo ni yu' Corinto

¹¹ Agucä si'c te beñnayääl, lagajc la'tu bejntu nacä si'c. La'tu riäjł niniitu didxro, didxsa'c xcuentä, sa'csi gajdpac biädxädi, nadxagä loj reapost ni sajcro mase rut nacädi. ¹² Redzuun ni benä lał ni guyu'ä lojtu, benäni si'c te ni najcpac apost, huinuutis benäni guideb nadolajz näjza reseñ, näjza remilagwr. ¹³ ¿Xhi benä lojtu te naatu runä xhigab guxiiru sajctu loj guiraa reguidoo? Nani benätis najc dee: dina nutalä xtzuuntu, nalajznu dina niniabä niacnäjtü narä si'c gucnäj narä reguidoo ni yu' garenca lajt. ¡Colsiäjł lajztu narä dojlre!

¹⁴ Naj cayunä xhigab jiädhuiätu, naj gacni choñ huält siälä. Di quilä xhixtentu, alga lagajc la'tu rguilä. Di rlazä gutalä xtzuuntu. Di riäjł cuchee rebiuux meel par xcuzajreni. Reguzajñ ni riäjł cuchee meel par rexi'nreni. ¹⁵ Xhet najc di gunitä guiraa nani rapä, näjza lagajc narä sujiuxä, te laa xaimtu lo dojl. Palga chanälazäru la'tu, ¿la guxiiru chanälajztu narä, ä?

¹⁶ Niluxh mase si'c najcni, di narä nutalä xtzuuntu. Empac yu'reni canii basgueä la'tu sa'csi nadxällazä. ¹⁷ ¿Xhixh naatu cua'ä xhi xtentu sa'csi baxhalä rebejtznu lojtu, ä? ¹⁸ Che baxhalä Tito, rapä lojni chanääni stee bejtznu te jiädhuiireni la'tu. ¿Xhixh cua'ni xhi xtentu, ä? Xhixh et tejsi xhigab biennu, tebloj biennu dzuun guiro'pnu che guyu'nu lojtu.

¹⁹ Lałni cayoltu guiraa rediidxre, cayujntu xhigab canabnu jiäjł lajztu, niluxh xhet si'cdini. Caniinu rediidxre nez loj Dios, caniizanu con xcälracnä j Jesucrist te si'c tioobrutu lo xtidx Dios, rebetzä nani rinälazä. ²⁰ Sa'csi rdxebä andi che jiädhuiätu fiä ditu gac si'cni rlazä gactu, dxejctiru la'tu suhuiizatu dizana gacä si'cni rlajztu gacä. Rdxebä andi yu'tu ni cadijł, ni ruguij lajzni xhixten sa'ni, ni cadxe'ch lo sa'ni, ni cala' lo sa'ni, ni caniyaj sa'ni, ni cagutajł diidx lo sa'ni; ni cayunnaro lagajc laani, ni cayujnza bieje. ²¹ Rdxebä andi che jiädhuiätu stehuält, gusanxtujy Dios narä xcuenttu. Rdxebäza sonduxhä xcuent xhidajltu nani abanijt, bejntu dojl galoo, luxh gajdtu gusiechljajztu xcuent xtojłtu. Yu'tu ni di guibanñaya, resnäjtü bejn ni di gac chäältu, yu'za balti dojl rujntu.

13

Lult yälñulijdx xten Pabl

¹ Naj gac choñ huält siädhuiä la'tu. Guira'ti quej nanab cue'creni con xtidx tio'p o choñ bejn ni najnpac xhi dojl bejn teygani. ² Mase ruti narä ro'c, arnixgää lojtu lagajc diidx ni guniä che guyu'ä lojtu ni barojp biälä lojtu, luxh rniä loj renani abejn dojl, näjza loj guiraatu, palga jiälsacä, diruna gulaslazätu nicla tejtü, ³ sa'csi rlanjtu fiipactu la guli runiidx Jesucrist yälrnibee loä te guiniä xtiidxni. Luxh Jesucrist dini guisisni xcuenttu, niluxh laani rustioobruni xtiidxni neñ lastootu. ⁴ Guliicani che cuajni lo cruzj, gucni si'c te bejn nani casis, niluxh naj nabajñni sa'csi rapduxhni xcälrnibee Dios. Näjza nuure rsia'cnu si'c te bejn nani casisnäjä laani niluxh nabaññäjnu laani xcuent xcälrnibee Dios ni baniidxza Dios xcuenttu.

⁵ Colñinäj lastootu lagajc la'tu, colñhui la guliipac ahuililajztu xtidx Dios; colñhuisa'c xho najc lastootu. ¿La ditu gacbee rbäjz Jesucrist neñ lastootu, ä? Palga rutini, rusqueetu lastootu, ditu nililajztu xtidx Dios. ⁶ Narä rlazä gacbeetu, dinu nusguee lastoonu, ahuililajzpacnu xtidx Dios. ⁷ Rniabä loj Dios na'c guntu cosguijdx, xhet te guiniidi bejn didxsa'c xcuentnu, alga te la'tu guntu recossa'c, mase guiniireni et laadi cayunä narä. ⁸ Sa'csi xhetliidi rajcdi riennu te nitloj didxguli, xcälrnibeenu najc te gusule'nu didxlii. ⁹ Ni'cni rbaa lajznu che casisnu, niluxh la'tu nadip, nadaantu; rbejdx-rniabzanu lo Dios guiza' xcälrililajztu lo xtidx Dios. ¹⁰ Rucuaä reguijtzre lojtü che gajdna jiälä, te che jiälä na'c tilnäätu si'cpacni nungäj tilnäätu xcuent yälrnibee ni baniidx Dad Jesucrist loä, te gac tioobrutu lo xtidx Dios, xhet te nitditu.

¹¹ Ni'cni rbejtznu, colñguibalajz, colñhui guisa' xcälrililajztu, colñcuedxi lajztu, colñyennäj sa'tu tejsi xhigab, dxitis gubajñ. Dios xten yälñinälajz näjza yälñrbedcxi lajz chunäj la'tu. ¹² Colñii: "Xchan" lo resa'tu. ¹³ Guiraa rebejtznu nani ahuililajz ruxhal xtixtios lojtü.

¹⁴ Yälñracnäjä xten Dad Jesucrist, näjza yälñrinälajz xten Dios, näjza yälñracnäjä xten Sprit Dxan chu neñ lastootu. Sugacni si'c.

Te Guijtz Lo Reben Gálatas

Pabl rucuaa guijtz loj reben guidoo nez región Galicia

¹ Narä, Pabl, nacä apost xten Jesucrist. Xhet rebejn̄di baxhal narä, xhetza bejn̄di gule narä. Lagajc Jesucrist näjza Xtradni Dios ni yu' xhaguibaa, nani guläs Jesucrist loj rebengut, laareni agulereni narä. ² Narä, näjza guiraa resa'nu nani yunäj narä, rucuaanu guijtzre lo reben guidoo ni yu' nez reguedx Galicia. ³ Xca' guejbtu xcälracnäj Dios con xcälrbexilajz xten Dios xtradnu näjza xten Dad Jesucrist. ⁴ Lagajc laani cuäjbni gujtni te guslaani nuure lo dojl̄ xten guedxliuj guijdxre, si'cni gunibee Xtradnu, Gueb-Dios. ⁵ Chä'p xpala'n Dios par tejpas. Sugacni si'c.

Xhetdi xhi stee didxcoob ni sajc guslaa nuure

⁶ Rdxeloduxhä lacti riojb cabälaztu Dios ni gurejdx la'tu con xcälrinälajz Crist, luxh naj cagusoobtu ste'ca diidx. ⁷ Xhetdi stee diidx ni sajc guslaa nuure lo dojl̄. Yu'reni rlajz gusiejchreni lajztu con ste'ca diidx, rlajzreni guchaareni xtidx Jesucrist. ⁸ Niluxh palga jiäd chu jiädliui lojtu ste'ca diidx ni ruslaa bejn̄ lo dojl̄, niluxh di diidxga gac si'c najc diidx nani abaluiinu lojtu, bejn̄ga agubibdeni, chutis najcnu, mase naräni, mase te xangl Dios ni jiäd xhaguibaali. ⁹ Si'c ni guniä lojtu, si'c rnisacä lojtu naj: Pal yu' chu jiädliui lojtu ste'ca diidx ni ruslaa bejn̄ lo dojl̄, luxh di diidxga gac si'c najc diidx nani abaluiinu lojtu, bejn̄ga agubibdeni.

¹⁰ ¿Xhi naatu? ¿La rlazä guinisa'c bejn̄ xcuentä o la rlazä guinisa'c Dios xcuentä, ä? ¿La rlazä guspaä lajz bejn̄, ä? Paru rlazä guspaä lajz bejn̄, digacdi gacä xmos Jesucrist.

Xtzun Pabl

¹¹ Colyabee sa'ä, diidx ni ruslaa bejn̄ lo dojl̄ nani abasule'ä lojtu di diidxga gac xhigab bejn̄ guedxliuj. ¹² Xhet lojdi bejn̄ guedxliujdi cua'äni, rutza baluiidini loä, niluxh lagajc Jesucrist baniidx xtiidxni loä.

¹³ Anajntu xho gucä, xho gubanä galoo che rusobätis rexleii toMoisés. Dxejc basacsíduxhä reben guidoo ni huililajz xtidx Jesucrist, si'c benä te rlazä nitlojreni. ¹⁴ Loj reni rusob xleii toMoisés narä cagusobäru xtiidxni, nanduxhäru loj guiraareni. Loj rebejn̄ nani sadxagä ladxä, maazru sanälazä xcostumbr retoxtadgoldoä. ¹⁵ Dios gule narä, guleni narä cheni nuuli xnanä narä, gurejdxni narä sa'csi sanälajzni narä. ¹⁶ Dxejc bibalajz Dios baluilojni Xi'nni Jesucrist loä te guiniä xtiidxni xcuent xho ruslaani bejn̄ lo dojl̄ loj reni di gac xpejn̄ Israel. Che gujc si'c rut lojdi huiye'tzä. ¹⁷ Niclaza nia'ä guedx Jerusalén loj reni ganid gujc apost loä. Alga hua'a nez reguedx Arabia, dxejcti gubisacä guedx Damasco.

¹⁸ Che agudejd si'cti choñ ijz, dxejcru hua'a guedx Jerusalén te biembeä Pedr, dxejc biannäni tzun-gubijdx. ¹⁹ Niluxh dina nuhuiä loj chu stee apost ro'c. Lojtis Jacob, betzhuin Jesucrist bahuiä. ²⁰ Rniliä nez lo Dios, dina guiniä didx-xhii, rediidx ni cacuaä najc guliipac.

²¹ Dxejcti hua'a reguejdx xten Siria näjza Cilicia. ²² Resa'nu ni yu' neñ xquidoo Crist guideb nez reguedx Judea, direni gumbee narä. ²³ Riejntis diajgreni: “Bejn̄ nani basacsíduxh nuure agujc xchej, abejn̄ga caguluiini xcuent lagajc xcälirililajz nani galoo rlajzni nunitlojni.” ²⁴ Dxejc rliä'preni xpala'n Dios sa'csi huililazäza xtiidxni.

2

Bidxaag Pabl loj reapost

¹ Che agudejd tzudaj ijz, dxejcru hua'a guedx Jerusalén con Bernabé, nájza Tito huinānu. ² Gunii Dios loä, gunibeeni cha'a ro'c te gusule'ä xho huililajz rebejn ni di gac xpejn Israel xtidx xcuent Jesucrist ni ruslaa lo dojl. Niluxh lojtis reni rnibee guidoo basule'ä diidx, te di xlia'si benä dzuun, o te di xlia'si gunāru dzuun. ³ Sanää Tito, te bejn griegw ni di gac xpejn Israel. Nicla lojni direni niäjb chuni bee si'c caj lo leii xten Moisés. ⁴ Niluxh gaii bejn ni rujnsi si'cni najcreni sa'nu, bidxaagreni loonu te gula'tzreni xho rajnnu Dios. Rdxechreni sa'csi nuunu, rexpejn Jesucrist, dinu jienru si'c ni bejn retoxtadgoldoonu. Laareni rlajzreni guxhiidreni nurnu, rlajzreni gusoobnu rextiidxreni. ⁵ Dipacnu nicäjb nucuadiajgnu xtiidxreni, sa'csi rlaaznu chanuu chalilajztu xtidx Jesucrist nani ruslaa bejn lo dojl.

⁶ Niluxh reni sajc, nalajznu reni rnibee reben guidoo ro'c, xhet te didx-coobdi guniireni loä. (Luxh par narä xhet najcdi mase bensajcreni, sa'csi Dios runtebloj guiraa bejn.) ⁷ Luxh bahuiireni abaniidx Dios xtidx Jesucrist loä, luxh rusule'äni loj rebenzijt te guibicaj xtojlneni, sigajcni rusule' Pedr xtidx Jesucrist loj rexpen Israel nani rujnpac si'c ni caj lo leii. ⁸ Lagajc Dios nani badeed bejn Pedr dzuun xte apost loj rexpen Israel, lagajcza Diosre baniidx gunä dzuun, te gacä apost loj rebenzijt nani di gac xpejn Israel.

⁹ Ni'cni Jacob, Pedr, nájza Juan nani najc bejroru nen guidoo xten Jesucrist, gucbeereni laa Dios ni cayacnäj narä. Dxejc baniidxreni naareni loä náj lo Bernabé si'c te seen rbalajzreni, te chonnu guiro'pnu loj rebenzijt. Niluxh laareni chanuureni gusule'reni loj rexpen Israel. ¹⁰ Gunabtisreni loonu gacnäjnu rebejn ni xhet rajpdi, luxh ni'cza rlazä gunä.

Pabl gudilnäj Pedr lo guedx Antioquía

¹¹ Che biääd Pedr lo guedx Antioquía, gudilnääni, sa'csi abejnni dojl xhet laadi cayujnni. ¹² Galoo gudaunäjni rebenzijt, luxh che bidzujn gaii xpejn Israel ni baxhal Jacob, dxejcti gubicajni lo rebenzijt, diruni niaunäjreni sa'csi bidxejbni rexpejn Israel ni ru' bee ni bidzujn ro'c. ¹³ Dxejcti sigajcza bejn guiraa rexpejn Israel ni nadxaag Pedr, gujcreni sigajc Pedr, runtio'p lajzreni, naareni gusgueereni. Näjli Bernabé bejn si'c. ¹⁴ Luxh che bahuiä direni gun si'cpacni najc xtidx Jesucrist, dxejc rapä loj Pedr nez loj guiraa reben guidoo: "Palga luj najclu te xpejn Israel, luxh nabajnlü si'c rebenzijt ni digac xpejn Israel, xhet si'cni ni caj loj leii, ¿xhicuent rlajzlu guinibeelu guibajn rebenzijt si'c rexpejn Israel nani rusoob xleii to Moisés?"

Nungäj chalilajz rexpejn Israel, sigajc guiraa bejn, te guibicaj xtojlneni

¹⁵ Nuure najcnu rexpejn Israel cheni gojllinu; dinu gac bendojl si'c najc rebenzijt. ¹⁶ Anadonnu rut chu tejt bejn sajc guibicaj xtojlni che gunni si'cni caj lo leii, sa'csi nanab chalilajznu xtidx Jesucrist. Ni'cni biolilaaznu xtidx Jesucrist te jia xtojlnu sa'csi rililajznu, xhet sa'csi riennu si'cni caj loj leii. Di gacdi jia xtojlni bejn xcuent yälrusoob xleii to Moisés.

¹⁷ Palga la ni rlajznu jia xtojlnu xcuent xcälirililajz xtidx Jesucrist, ruhuiinu cayenrunu dojl, la sajc guiniinu: Jesucrist rului rienrunu dojl, ää? ¡Xho gacni si'c! ¹⁸ Palga rlazä gunsacä redzuun nani abarö'nä, lagajc narä rapä dojl nacä bejn dojl. ¹⁹ Niluxh xcuent leii, anacä si'c bengut: digacdiru guinibee leii narä sa'csi naj nabanä lo xnejz Dios. Luxh lagajc leii bejn nacä si'c bengut che gucbeä di gacdi gusobä guiraa ni caj lo leiiga. ²⁰ Najcni si'cni gutnää Crist lo cruzj. Naj xhet narädi ni nabanä, laa Crist ni nabajn nen lastoä. Yäl nabajn ni nabanä naj lo guedxliujre nabanä sa'csi rililazä xtidx Xi'n Dios nani rinälajz

narä luxh gujtni te gudijxni xtolä. ²¹ Dina cuälazä xcäl_rulaslajz Dios. Paru sajc gudzucaj leii xtoj_l bejn te gacreni bennaya nez loj Dios, dxejc xlia'si gujt Jesucrist.

3

Yäl_rililajz rusia dojl

¹ Chipsa nayäältu beñ Galacia! ¿Chu bascäyту te di cuadiajgtu xtidx Jesucrist? Ni nez lojpactu bisule'nu diidx xho cuaj Jesucrist lo cruzj. ² Tejtis diidx rlazä guiniitu loä. ¿La cua'tu Sprit Dxan xten Dios sa'csi bejntu si'cni caj lo leii, ä? o ¿la sa'csi huililajztu diidx ni biejn diajgtu? ³ Chipsa nayäältu. Acua'tu Sprit Dxan xten Dios dxejcti naj rlanjtu guntu ni riajbtis yejctu guntu. ⁴ ¿La xlia'si gudejdtu trabajw? Chugan la gulii xlia'sini. ⁵ Che runiidx Dios Sprit Dxan xtenni lojtu, che rujnni milaagwr nez lojtu, ¿xho rujnnini? Dini gunni sa'csi rujntu si'cni caj lo leii, rujnnini sa'csi rililajztu xtiidxni ni riejn diajgtu.

⁶ Huililajz toxtadgoldoonu Abram xtidx Dios, ni'cni cua' Diosni si'c te bejn nani naya lastooni. ⁷ Ni'cni colyabee dee: renani rililajz xtiidx Dios najc xi'n toAbram. ⁸ Galooli najn Dios xcuent yäl_rililajz susia Dios lastoo rebenzijt, ni'c räjpni lo Abram: “Guiralii reben_guedxliuj sacle' xcuentlu.” Diidxre cuaj lo guijtz ni gujc galooli, cadre caj xtidx Dios. ⁹ Ni'cni reni rililajz naj agucnäj Diosreni sigajc gucnäjni toAbram nani huililajz.

¹⁰ Guiraa reni rlanj guibajñreni gunreni si'cni caj lo leii, agubibdereni sa'csi scree caj lo leii: “Guiraa reni digunpac si'cni caj lo reguijtz xten leii, sucuibdereni.” ¹¹ Niluxh huenliisi rien rut nayadi nez loj Dios xcuent leii, sa'csi dee najc xtidx Dios: palga rililajz te bejn xtidx Dios, najcni te bennaya nez lo Dios, nabañnäjni Dios xcuent xcäl_rililajzni. ¹² Leii dini naa chalilajz bejn te xca'ni yäl_nabajñ. Scree caj lo leii: “Nani gunpac si'cni caj loj reguijtz xten leii, ni'c nanab guibajñ lojpac leiiga.”

¹³ Jesucrist badzucaj nuure loj yäl_rbibde xten leii. Laani gubibdeni xcuentnu sa'csi xtidx Dios naj: “Anabibde te bejn ni naj_l loj te yajg.” ¹⁴ Scree gusajc Jesucrist te gusojb diidx ni räjp Dios loj toAbram, sacnäjni guiraa rebenzijt; näjza te guiraanu ni chalilajznu xtidx Jesucrist xca'nu Sprit Dxan xten Dios.

Leii näj diidx ni bia'n Dios loj toAbram

¹⁵ Betzä, naj gusä'tä te diidx xcuent beñ guedxliuj. Cheni rujn bejn te guijtz te jia'n diidx lo stee bejn, mase bejntis najceni, che abacuaani lajni lo guijtzga, rut sajcdi gudzucaj guijtzga. Rutza sajcdi gucuaaru diidx lojni che anajcni. ¹⁶ Luxh anajnnu badeed Dios xtiidxni loj toAbram näjza loj xagdooni. Dini ninii “rexagdooni” si'c loj xhidajlreni, guniini lo tejtis xagdooni, luxh laani najc Jesucrist. ¹⁷ Diidx ni rlazä guiniä najc scree: Diidx nani bia'npac Dios loj toAbram gunii Diosni che cayäädx tajp gayuu galbitzuu ijz gudeedni leii lo Moisés te laani gudeednini loj rexpejn Israel. Niluxh di leiiga nuchaa diidx ni bia'n Dios loj toAbram, la_ltis sajcdi. ¹⁸ Paru naquiiin leii te xca' bejn erens, dxejc xhet erensdi cua' Abram lo Dios. Niluxh basa'n Dios erens lojpac Abram sa'csi bia'nni diidx lojni galooli.

¹⁹ ¿Xhicuent badeed Dios leii loj Moisés? Badeed Dios leii sa'csi benduxh rexpejn Israel dojl, te gacheereni xho najc xtoj_lreni, la_l ni jiääd nani najc xagdoon toAbram. Sa'csi bia'n Dios diidx con laani sigajc con toAbram. Rexangl Dios badeed leii loj toMoisés, te laani gujc si'c te bejn ni rusiäj_l diidx. ²⁰ Te ni rusiäj_l diidx xhet par tejtis bejn_di najcni, niluxh Dios tejtis najc.

Xcuent leii

²¹ ¿La garenca najc xleii Moisés lo diidx ni basa'n Dios loj toAbram, ä? ¿Xho gacni si'c! Paru nica'nu te leii ni rajc rudeed yäl_nabaj_n, dxejc sii xcuent leiiga nica' bejn yäl_nabannaya. ²² Niluxh loj reguijtz xten Dios caj diidx ni rni: Guiraa bejn niäuu nen dojl, te reni chalilajz xtidx Dios si'c huililajz toAbram, reni'c xca' xcäl_rililajz diidx xcuent Jesucrist si'cni bia'n Dios diidx loj toAbram.

²³ Che gajd xcäl_rililajz xcuent Jesucrist jiäd, dxejc basäuu leii nuure nen dojl, cabäjtisnu guiricaj xcäl_rililajz xcuent xtidx Dios. ²⁴ Ni'cni anajc leii si'c xmastrnu te guluiini nuure nezyuj nez lo Dad Jesucrist te gusiani xtoj_nnu con yäl_rililajz xtiidxni. ²⁵ Niluxh naj sa'csi arajpnu yäl_rililajz xcuent xtiidxni, dirunu guiquiin te mastr, nalajznu leii.

²⁶ Guiraatu najctu xi'n Dios xcuent yäl_rililajz xtidx Jesucrist, ²⁷ sa'csi guiraatu ni gurobnistu loj xtidx Jesucrist, najctu rexpejn Jesucrist. ²⁸ Naj rutiru rexpen Israel niclaza rebenzijt, niclaza mos, niclaza bejntis, niclaza niguii, niclaza gunaa, sa'csi guiraanu najcnu tebloj nez lo Jesucrist. ²⁹ Palga najcnu xpejn Jesucrist, dxejc guliipac najcnu xi'n toAbram, dxejc sica'nu yäl_nasa'c ni abia'n diidx gudeed Dios loj Abram.

4

¹ Mbaj naj. Nani xca' yäl_nasa'c, che najcni biuux, najcni sigajc te mos, mase xtenni gac guiraa xhixten xtadni. ² Yu' chu te bejn ruhuiini, yu'za chu rnibee xhixtenni cheni agurooblini, cheni guidzuj_n dxej xca'ni ni gudeed xtadni. ³ Sigajcza nuure che gacnu si'c biuux guyu'nu gacnu mos loj releii, rnibeeni xhini'c digacdi jie_nnu lo guedxliuj. ⁴ Niluxh che bisa' dxej ni basoob Dios, baxha_l Dios Xi'npacni. Xi'n te gunaa goj_ni, loj rexpejn Israelza biädjiäjl_ni, basoobni leii xten toMoisés. ⁵ Si'c gujc te xcasacni reni rusoobpac leii, te xca'ni nuure gacnu si'c te xpisiäjbni.

⁶ Luxh sa'csi anajctu xi'nni, ni'c baxha_l Dios Sprit xten Xi'nni te cuääzni nen lastoonu. Laani rniini lo Dios xcuentnu: “Guejblu, Xtadnu.” ⁷ Ni'c dirunu gac mos, sa'csi anajcnu xi'nni. Luxh palga najcnu xi'nni, suniidxza Dios yäl_nasa'c loonu xcuent Dad Jesucrist.

Rulijdxni na'c gacsac bejn mos

⁸ Che gajdtu gumbee Dios najctu mos xten rebanäjb ni rajntu si'c Dios luxh dipacreni gac Dios. ⁹ Luxh naj anumbeetu Dios o naj anumbee Dios la'tu, xho chachusactu loj redzuun ni guyu'tu galoo che gujctu mos xten rebanäjb. ¹⁰ Cayutistu redxej, rebäii, retie_mp, reijz. ¹¹ Naj rdxebä andi xlia'si gudedä trabajw baluiätu.

¹² Rniabduxhä lojtu betzä, colyajc si'c narä, sa'csi narä ahuililazä xtidx Jesucrist sigajc la'tu. Xhetza xhi dzunguijdxdi bejntu loä che guyu'ä lojtu. ¹³ La'tu anajntu galoo che basule'ä diidx xcuent Jesucrist lojtu, benäni sa'csi racxhuu tiexhä. ¹⁴ Dizatu nuze' niclaza nibälajztu narä xcuent yäl_racxhuu ni rajc tiexhä, alga si'c te xangl Dios, si'c lagajc Jesucrist cua'tu narä. ¹⁵ ¿Con yäl_rbalajz xtentu ni gojptu dxejc? Niluxh rniä lojtu, paru niajc nibäätu balojtu, nuniidxtuni loä dxejc, si'c niujntu. ¹⁶ Naj ¿la rdxe'chtu loä sa'csi caniä didxlii lojtu, ä?

¹⁷ Naj yu' gaii bejn nani rujnsi si'cni sanäreni leii rujnsireni si'cni rinälajzreni la'tu. Niluxh rlajzreni gudzucajreni la'tu te gusaantu xtidxä, te chanajltu laareni, te jiutu xtiidxreni. ¹⁸ Laaca chanälajz bejn sa'ni, niluxh na'c gusgueeni, na'cza che suganääsi la'tu chanälajztu narä. ¹⁹ Rexi'nä, xcuent la'tu cadedä trabajwduxh si'c te gunaa ni rajl xpäzni, luxh sinuu sidedä trabajw cheni arbäjpac_li Jesucrist nen lastootu. ²⁰ Maläii gac jiälä lojtu lagajc naj te

gac guiniä xhi stee diidx. Niluxh naj zijt yu'ä, dina gacbeä xhi xhigab gunä xcuenttu.

Diidx xcuent Agar näj Sara

²¹ Colguinii loä, la'tu ni rlanj gun si'cni caj lo leii, ¿la ditu gacbee, la di diajgtu jiejn xhini'c caj lo leii, ä? ²² ¡Coljiejn! Scree caj loj leii: guyu' tio'p xi'n toAbram. Tejní najc xi'n gunaa ni najc xmos Sara. Steeni najc xi'n cháälpacni. ²³ Niluxh xi'n xmosni gojl sa'csi lagajc laani bejni xhigab si'c chu xi'nni. Luxh xi'n cháälpacni gojl sa'csi si'c bia'n Dios diidx loj Abram. ²⁴ Diidx xcuent regunaare najc si'c diidx ni ruluii. Regunaare najc si'c tio'p diidx ni bia'n Dios. Agar najc mos, mosga najc si'c diidx ni bia'n Dios con Moisés lo dan Sinaí. Rexi'n mosga guyu' te gacreni mos lo leii. ²⁵ Agar najc si'c dan Sinaí nez lo reguejdx xten Arabia. Luxh guedx Jerusalén najc si'c dan Sinaí, sa'csi naj ro'c najc cadre re' rexpén Israel con rexi'nreni, sanäreni leii. ²⁶ Niluxh di guedx Jerusalén ni yu' guibaa gac si'c mos, luxh nuurnu najcnu xi'nni. ²⁷ Scree caj loj xtidx Dios: Bibalajz, luj gunaa ni gajd xi'nlu chu, guredxa', bibalajz, luj ni gajdlu ted trabajw ni rdejdx gunaa che rajl xi'nni. Sa'csi su'ru xi'n gunaa nani gulälajz cháälni quela xi'n gunaa ni gudiesnäjä cháäl stee gunaaga.

²⁸ Mbaj naj, rebetzä, nuure, sigajc Isaac, najcnu xi'n toAbram nani chu si'cni bia'n Dios diidx loj toAbram. ²⁹ Che gojl xi'n gunaa ni najc mos, ni gojl sa'csi lagajc laani bejn xhigabga, bidxagdijlñi xi'n cháälpac Abram nani gojl xcuent diidx ni bia'n Dios loj Abram. Sigajcza najcni naj. ³⁰ ¿Xhi caj lo reguijtz? “Barilaagw gunamos näj xi'nni, te di xca' xi'n gunamos yälñasa'c xtenlu si'c ni xca' xi'n gunaa nani najc cháälpaclu.” ³¹ Naj nuure, betzä, dinu gac si'c xi'n gunamos te chunu lo leii. Nuurnu najcnu si'c xi'n gunaa nani najc cháälpac toAbram.

5

Colguzutijp lajztu lo yälñililajz xtidx Dios

¹ Colgusutijp lajztu lo xtidx Dios nani baniidx Jesucrist loonu sa'csi guliipac gulää Jesucrist nuure ladzñaa leii, badzucajni xtojñnu che huililajznu xtiidxni, ni'cni na'cru gusiejch lajztu te gacsactu mos ladzñaa leii.

² Narä Pabl rniä lojtu, palga la'tu chutu bee si'cni caj lo leii, dxejc xlia'si chalilajztu xtidx Jesucrist. ³ Rniäza stehuält, guiraa bejn nani rlanjpac chu bee, nanab gunni si'cpac ni caj lo leii. ⁴ Palga rlanjtu guntu redzuun ni caj lo leii te guibicaj xtojñtu, dxejc agubicajtu lo Jesucrist, agubicajzatu lo xcälñracnäjä Dios. ⁵ Niluxh nuure xcuentpac Sprit Dxan xten Dios rililajznu gudijx Jesucrist xtojñnu lo cruzj, cayenloonu jiädsacni te guniidxni yälñansa'c par tejpas loonu. ⁶ Sa'csi loj reni rililajz xtidx Jesucrist xhet sajcdi chu bejn bee, xhetza sajcdi na'c chu bejn bee, nani sajc najc chalilajz bejn xtidx Dios. Yälñililajzga rujñ guibañsa'cnu te chonälajznu resa'nu.

⁷ La'tu laaca sasajtu. ¿Chu badxojñ gusoobtu xtidxlii Dios? ⁸ Xhet Diosdi ni guletu badxojñditu. ⁹ Anajntu tudxe'nsi cobgulaj rusaguijñi yätxtiil; si'c te cobgulajga najc te niguii ni caguluiitu xtidx leii. ¹⁰ Rialilazä xtidx Dad Jesucrist, ni'c nadiplazä la'tu; ananä ditu chalilajz stee diidx. Niluxh bejn ni cagusguetu susacsí Diosni, chutis najcni.

¹¹ Narä rebetzä, paru narä caguluiä chutu bee, si'c ruluii rexpejn Israel, ¿xhi xcuent rusacsí rexpejn Israel narä? Paru si'c caguluiä, dirutu chalilajz gudijx Jesucrist xtojñnu lo cruzj. Luxh si'cpacza rlanjreni. ¹² Rebejn nani cagusguetu caniireni chutu bee, ¡malaiiza gutiuugreni tejpas lagajc tiejxhreni!

¹³ La'tu rebetzä, agurejdx Diostu loj xtiidxni te chalilajztu Jesucrist ni ruslaa bejn lo dojl. Colhuixгаа na'c xca'tistu rediidxga dxejcti guntu si'ctis ni rlaiz tiejxhtu, si'ctis ni riajbza yejctu. Colgacnäj sa'tu con yälrinälajz, tejni sigajc steeni. ¹⁴ Sa'csi guiraa diidx ni caj lo leii con tejtis diidxre rsiojbni: “Chanälajztu sa'tu sigajc rinälajztu lagajc la'tu.” ¹⁵ Palga rdijltu, rauya'tu sa'tu, rajwtu sa'tu, jcolnatiro! Andi lagajc la'tu gunijttu sa'tu.

Nani rchaglajz rebejn näj yälnabajn ni rudeed xtidx Dios

¹⁶ Rniä lojtu, colguibajn si'c ruluii xtidx Dios näjza Sprit Dxaan xtenni, te si'c na'c guibajntu si'ctis ni rlaiz tiejxhtu, si'c ni najctis xhigabtu. ¹⁷ Sa'csi ni najc xhigab xten bejn rdxe'ch loj xhigab Sprit Dxaan xten Dios. Sigajcza xhigab xten Dios dini gac tebloj con xhigab xte bejn. Rudxoijntu loj sa'tu, ni'cni digacdi guntu dzuun ni rlaiztu guntu. ¹⁸ Luxh palga cagulijdx Sprit Dxaan la'tu, dxejc dirutu quiquiiin guntu si'c ni caj lo leii.

¹⁹ Guyasi jiembee bejn xhireni'c najc redzuun ni rujn rebejn nani di gumbee xtidx Dios. Dee najc redzuunga: yälrusguee chääl bejn, yälrusguee chääl sa'reni, yälrusguee sa'ni che ruchaag sa' te dxa'p con te bi'n loj redolguijdx, guiraa redolguijdx ni rujn niguii con gunaa, ²⁰ yälrajn rebanäjb, yälbidxaa ni rujn daan bejn, yälrdxechlajz loj sa'ni, yälrchagdijl sa'ni, yälneyedx lo sa'ni, yälrdxecha', yälriu lagajctis laani, yälrlia' lo sa'ni, yälrchaag lo te cuaa bejn. Najza sa' dzunguijdxre rujnreni: ²¹ yälrdxe'ch laiz, yälругu't sa'ni, yälrsiojz, yälrauxha't, näjza guiraa dojl sa' redee. Sigajc ni balidxä la'tu xhi dxejga rulidxä la'tu naj. Nani rujn sa' redojlre direni jiu' loj xcälrnibee Dios xhaguibaa.

²² Niluxh xtzuun Sprit Dxaan xten Dios najc yälrinälajz sa'ni, yälrbalajz lastooni, yälrbedxi laizni, yälrbedcxi laiz sa'ni, yäl'najc bensa'c lo chutis bejn, yäl'nagodzlajz, yälrlilajz, ²³ yäl'nadolajz, yälrnibee lastooni lo ni rlaiz gun tiejxhni. Xheti te leii ni rudxojn gun bejn sa' redzuunre. ²⁴ Niluxh renani ahuililajz xtidx Jesucrist, abatio'nreni guiraa redolguijdx ni rlaiz gun tiejxhni. ²⁵ Palga rbäiz Sprit Dxaan nen lastoonu, do'o guibajn si'c rnibee Sprit Dxaan guibajntu.

²⁶ Na'c guiliä'pnu lagajc xpala'nnu, na'c guidxech laiznu lo sa'nu, na'c gunembiidnu sa'nu.

6

Colgacnäj sa'tu

¹ Sa'ä, palga chu tejtü ni abiajb nen dojl, lagajc la'tu nani aracbeetu xtidx Dios colgulijdx bejnga, colgacnäjni te guiriini nen dojl. Colnii lojni nadolajz, nasinlajztu lagajc la'tu didi che guidon nägajcza la'tu jiajbntu nen dojl. ² Colhuui xhi rquiiin resa'tu, colgacnäjreni te si'c gusoobtu guiraa rediidx ni najc leii xten Jesucrist.

³ Sa'csi nani rujn xhigab sacduxhni, yu'za chu najcni, niluxh rut najcdini, rusgueeni lagajcsi laani. ⁴ Tejgatu colcube xho najc xtzuuntu te fiitu la laaca najcni, dxejcti sajz guiliä'ptu lagajc xpala'ntu. Dxejc ditu quiquiiin chu stee bejn guiliä'p xpala'ntu. ⁵ Sa'csi tejga bejn susule'ni diidx lo Dios xhini'c bejnni.

⁶ Nani casieed xtidx Dios nanab gacnäj bejn nani ruluiini, gudeedni tudxe'n xhixtenni loj nani ruluiini.

⁷ Na'c gusgueelu lagajc luj. Dios digacdi guigueeni, ni'c guira'ti dzuun ni rujn bejn lagajcza ni'c xca' bejn. ⁸ Paru te bejn gun dzuun xcuenttis tiejxhni, dxejc che guidzujn dxej xca'ni yäl'nasa'c, sinitloj tiejxhni, dizani jiu' loj xcälrnibee Dios. Palga te bejn gun dzuun xcuent Sprit ni badeed Dios lojni, che gal yäl'nasa'c, sica'ni yälnabajn par tejpas. ⁹ Ni'cni na'c guidxajgnu jiennu

dzunsa'c te che guidzujñ dxej ni xca'ni yälñasa'c, xca'zanu te yälñasa'cro.
¹⁰ Ni'cni nanab lañ ni sajcni, gacñäjnu chutis bejñ, ganiddoo resa'nu ni ahuililajz.

Yälñulijdx näjza xtixtios

¹¹ Colñhuilaa lacti reletrduxh cacuaä lojtu con ñaäpac. ¹² Guiraa reni rdxaglaz gun ni rlajztis tiejxhni, laa reni'c ni rlajz chutu bee, tedi tedreni trabajw xcuent ni cuaj Jesucrist lo cruzj. ¹³ Lagajc reni ru' bee direni gun si'cni caj lo leii, niluxh rlajzreni chutu bee te guibaa lajzreni sa'csi bejnreni gaan guyu' beega tiejxhtu. ¹⁴ Luxh narä dilazä guibaa lo sa' recosga; rbaatis lazä sa'csi gujt Jesucrist, cuajni lo cruzj, te gudijxni rextojñnu. Ni'cni par narä xhetru xhi cos-guijdxdi yu' lo guedxliujre, diruna guichaglazä gunä redolñguijdx xten guedxliujre. ¹⁵ Che ahuililajz te bejñ xtidx Jesucrist, xhetru sajcdi chu bejñ bee, xhetza sajcdi na'c chu bejñ bee. Nani sajctis najc gacni si'c te beñcoob lo xtidx Jesucrist. ¹⁶ Guiraa renani nabajñ si'cni ruluii xtidx Jesucrist sibedxi lajzreni xcuent xcälñulaslaz Dios. Näjza rexpeñ Israel nani ahuililajz xtidx Jesucrist sibedxi lajzreni.

¹⁷ Na'cru guche'chtu narä sa'csi redib ni yu' tiexhä najc si'c te seen narä anacä te xmos Jesucrist.

¹⁸ Rebetzä, gacñäj Dad Jesucrist guiragajctu con Sprit Dxan xtenni. Sugacni si'c.

Te Guijtz Lo Reben Efesios

Bacuaa Pabl lo reben guidoo nen guedx Éfeso

¹ Narä, Pabl, nacä apost xten Jesucrist sa'csi si'c rlajz Dios. Cacuaä guijtzre loj rebejn nani huililajz xtiidxni, loj reni rujn si'cpac rniini nen guedx Éfeso. ² Xca'tu yälracnäj, yälrbexi lajz xten Xtadnu Dios, näjza xten Dad Jesucrist.

Rusule' Pabl xtidx Jesucrist

³ Rliä'pnu xpala'n Dios, Dad näj Xtad Jesucrist. Dios racnäj nuure, xcuent Crist runiidxni guiraa reyälracnäj xca' lastoonu, astoo yu'lanu xhaguibaa. ⁴ Laani gule nuure, che gajdli guirixtiej guedxliujre, te gacnu xpejnni, te guibanayanu nez lojni con yälrinälajz. ⁵ Sigajcza anungäj l xca'ni nuure te gacnu si'c xi'npacni sa'csi abiääd Jesucrist te guslaani nuure nen dojl, si'c ni gunibee Dios sa'csi balaslajzni nuure. ⁶ Gucnäj Dios nuure te guiliä'pnu xpala'n Dios, sa'csi lagajc laani acua'ni nuure, abejnni nuure tejsi con xi'nni ni sanälajzni. ⁷ Laani baslaani nuure nen dojl xcuent xtiejnni, laani badzucajni xtojnu xcuent xcälruslaslajzni ⁸ nani banidxduxhni loonu. Guideb yälnejn, guideb xcäriejn ⁹ basule'ni loonu xhigab xhiga'tzni xcuent redzuun ni rlajzni gunni, xhigabza ni bejnni galooli. ¹⁰ Luxh sidzujn dxej sisiojbpac xhigab ni bejn Dios. Che guidzujn dxejga sutojp Dios guiraali, sudeedni guinibee Jesucrist guira'ti ni yu' xhaguibaa, sigajc recos ni yu' lo guedxliuj.

¹¹ Arajpnu te xcäl'nasa'c Jesucrist, sa'csi galooli bejn Dios xhigab guniidxni yäl'nasa'cga. Lagajc Dios benchee guira'ti ni yu', luxh rujnpacni nani abejnni xhigab najc laaca gunni ¹² te guiliä'p bejn xpala'n xcäl'nibeeni xcuentnu, nani ganiddoo biolilaaznu xtidx Jesucrist. ¹³ Näjza la'tu, che biejn diajgtu redidx guli, rediidx ni ruslaa bejn lo dojl, dxejc huililajztu xtidx Jesucrist, dxejc gujczatu tejsi con laani. Dxejc cua'tu Sprit Dxaan xten Dios, ni'c najc si'c seen ahuililajztu, si'cni bia'n Dios diidx. ¹⁴ Baniidx Dios Sprit Dxaan xtenni te cuääzni nen lastoonu, te ni'c najc seen xca'nu yäl'nasa'c nani guniidx Dios che abaluuxni xtzuunni, nalajznu guslaani guiraa rexpejnni te guiliä'preni xpala'nni lo xcäl'nibeeni.

Rniab Pabl gudeed Dios yälnejn loj renani ahuililajz

¹⁵ Ni'cni näjza narä, sa'csi abiejn diagä xho rililajztu xtidx Dad Jesucrist näjza xho sanälajztu guiraa rexpejn Jesucrist, ¹⁶ dina gusanä gudedä xquixtios lo Dios xcuent la'tu. Rnaduxh lazä la'tu che rniabä lo Dios. ¹⁷ Rniabä lo Xtios Dad Jesucrist, xtadni ni rnibee xhaguibaa, guniidxni lojtu te yäl'nanduxh, te yäl'ruluiloj recos xhiga'tz te gacbeduxhrutu xcuent Gueb Dios. ¹⁸ Rniabäza lo Dios jianij xcäriejntu te gacbeetu xhini'c najc speranza xten yäl'racrejdxtu lo xtiidxni, te gacbeetu lacti saru, lacti sajc yäl'nasa'c ni gudeed Dios lo Jesucrist näjza loj rexpejnni, ¹⁹ te gacbeezatu lacti gurobduxh najc yäl'nibee nani rajpni nez loonu nani ahuililajz xtiidxni. Guiraa redee rului lacti nadip najc yäl'nibee xten Dios. ²⁰ Lagajc yäl'nibeere bejn dzuun par Jesucrist. Con yäl'nibeere baspajn Dios Jesucrist lo reben gut, te gurejni xladbee Dios cadre rnibeeni xhaguibaa. ²¹ Maazru sajcn lo chutis gubier, lo chutis yäl'nibee, lo xhitis yäl'nadip, lo chutis ni rnibee; maazru sajcn lo chutis nani abibee te guinibee, sigajc naj, sigajc nen redxej ni churu jääd. ²² Niluxh badeed Dios guira'tini ladznaa Jesucrist, laazani bejn bibee Jesucrist gunibeeni lo guiraa xhixten xquidooni. ²³ Reben guidooore najc si'c tiejxh xten Jesucrist, luxh

sigajc rudeed Dios guiralii loj Jesucrist, sigajcza rudeed Jesucrist guiralii loj rebejn ni najc xquidooni.

2

Ruslaa Dios nurnu sa'csi rinälajzni nurnu

¹ Laani baniidxni yäl**n**abajn lojtu che najctu si'c be**n**gut nez loj Dios sa'csi rujntu dojl. ² Galoo gubajntu lo dojl, entis lo xnez guedxliujre guzajtu, biutu xtidx be**n**dxab nani rnibee guedxliujre. Sprit xtenni rujn dzuun ne**n** lastoo rexi'nni nani di gucuadiajg xtidx Dios. ³ Luxh galoo, näj nuure nadxaagnu lojreni, biennu si'c ni rlajz tiejxhnu. Dxejc biennu si'ctisni rlajz tiejxhnu, si'ctisni biajb xhigabnu. Nungäjl guidxe'ch Dios loonu, sigajc bidxe'chni loj guiraa rebe**n** guedxliuj. ⁴ Niluxh balaslajz Dios nuure. Con xcäl**s**anälazduxhni huinälajzni nuure. ⁵ Mase anajcnu be**n**gut lo dojl, laani baniidxni yäl**n**abajn loonu. Rajpnu yäl**n**abajnre con Jesucrist. Sa'csi balaslajzni nuure bas**l**aani nuure ne**n** dojl. ⁶ Baspa**n**sacni nuure con Jesucrist; sigajcza bejn**n**i cuenäjnu Jesucrist xhaguibaa, ⁷ te ne**n** redxej ni churu jääd, gululoj**n**i lacti sajc xcäl**n**asa'c xten yäl**r**ulasajzni, ni'c sanälajzni nuure, najcni huenduxh loonu por Jesucrist. ⁸ Sa'csi rulasajz Dios nuure, ni'c bas**l**aani nuure ne**n** dojl che huililajznu xtiidxni. Luxh et sa'csi yu' xhi biennu; dee najc nani banid**x**lia' Dios loonu. ⁹ Xhet xcuent xhi dzunsa'c**d**i ni biennu, te di chu tejt**u** gac nayedx**l**ajzdi. ¹⁰ Dios najc ni benchee nuure. Sigajcza con Jesucrist bejn**n**i gacnu be**n** ni rujn dzunsa'c nani galooli agunibee Dios jienpacnu.

*Yäl**r**bedxilajz ni rajpnu por Jesucrist*

¹¹ Ni'c col**s**naj lajz**u** xho gujct**u** galoo. Ditu niajc rexpe**j**n Israel. Rniireni la'tu be**n**z**i**jt' sa'csi dit**u** chu bee si'c ru' rexpe**j**n Israel. Sa'csi lagajc con **n**aareni rusäl**r**eni bee. ¹² Dxejc suga'tu dit**u** gumbee Jesucrist. Zijt yu'tu loj rexpe**j**n Israel, najctu be**n**z**i**jt. Nicla gumbeetu redi**i**dx ni bia'n Dios loj rexpe**j**n Israel. Ditu niunloj gus**l**aa Dios la'tu lo dojl, dizatu niembee Gueb Dios lo guedxliujre. ¹³ Niluxh **n**aj ayu'tu lo Jesucrist, la'tu ni guyu' zijt lo Dios galoo. **N**aj agubigt**u** lo Dios sa'csi abia xto**j**ltu con x**t**iejn Jesucrist. ¹⁴ Jesucrist najc ni r**e**bc**d**xi lajznu. Laani bejn guj**c** rexpe**j**n Israel tejsi con rebe**n**z**i**jt. Laani badzucajni redzuun xten leii te guj**c** rexpe**j**n Israel tejsi con rebe**n**z**i**jt. ¹⁵ Lagajc con tiejxh Jesucrist ni go**j**l lo crujz banij**t**ni redzuun xten leii nani bejn bidxe'ch rexpe**j**n Israel lo rebe**n**z**i**jt. Lagajc laani bejn**n**i bidxagsa'reni te gujcreni tejsi che huililajzreni xtiidxni, gujcreni te be**n**coob. Dxejc gulec**d**xini lajznireni. ¹⁶ Con yäl**g**ujt ni guj**t**ni lo crujz badzu'ni guiro'pre**n**i lo Dios te gujcreni tejsi. Si'c gulä**j**z rdx**e**chnäj sa'reni.

¹⁷ Cajza lo guijt**z** redi**i**dxre:

Biäädni te basule'ni xho ga'p rebe**j**n yäl**r**bedxi lajz rebe**j**n ni suga' zijt lo Dios nä**j**za reni suga' gaj**x**h lo Dios.

¹⁸ Laani bejn sajc jiu' guiro'p cuaa be**j**n lo Dios con tejsi xhigab, nä**j**za tejsi Sprit. ¹⁹ Ni'cni dirutu gac be**n**z**i**jt, be**j**n ni rut numbeedi. Anajctu tejsi con rexpe**j**ni, najczatu sa' rexpe**j**n Dios. ²⁰ La'tu najctu si'c te yuro. La'tu najctu si'c padeer xten yu'ga. Reapost nä**j**za reprof**e**'t najc si'c cheni birix**t**iej yu'ga. Jesucrist najc si'c guiro ni gusuj squi**n** yu'ga, guij ni sajcru, sa'csi Jesucrist rnibee. ²¹ Cayunsa'c Dios yu'ga, cayajc yu'ga con la'tu, caroobni te gacni xquidod**x**an Jesucrist. ²² Sigajcza la'tu nä**j**za rexpe**j**n Israel ni huililajz najctu tejsi con Jesucrist. Cagustioobtu guidooga te ne**n**ni cuääz Sprit Dxan xten Dios.

3

Pabl nungäj̄l chanä xtidx Dios lo rebenzjijt

¹ Ni'cni yu'ä neñ latzguiib, narä, Pabl sa'csi cagusule'ä Jesucrist, te jiädnää xtiidxni lojtu, najctu benzjijt. ² Pet abiejn diajgtu lacti hueen najc Dios baniidxni dzuunre loä, jiädnää xtiidxni lojtu. ³ Dios baluiini xhigab-xhiga'tzni loä (si'cni bacuaä lojtu galoo). ⁴ Che gołtu guiitzga, sacbeetu cati ananä rehxigabxhiga'tz xten Jesucrist. ⁵ Xhigab-xhiga'tzre di bejn niembee galoo, niluxh ñaj Sprit Dxan xten Dios abaluiinini loj reapost ñajza loj reprofe't. ⁶ Dee najc xhigab-xhiga'tzga: por rediidx xcuent Jesucrist ni ruslaa bejn neñ dojl rujn Dios gac reni najc benzjijt tejsi con reni najc xpen Israel, guidxaag sa'reni, gacreni tejsi bejn. Guiro'preni xca' yálnasa'c si'c bia'n Dios diidx.

⁷ Narä nacä te apost xten dzuun ni baniidxni, por xcäl_rulaslajz Dios ni cuaxlia'ä. Dios baniidx dzuunre loä con xcäl_rnibeduxhni. ⁸ Luxh masä guxiiru sacä lo guiraa rexpejni, loä baniidxni xcäl_racñajni te lo rebenzjijt gusule'ä xtiidxni, nalajznu redidxcoob xcuent xcäl_nasa'c Jesucrist, ⁹ te gusule'ä lo guiraa bejn rehxigabxhiga'tz nani bacua'tz Dios lojnu galooli. Dios benchee guiralii ni yu'. ¹⁰ Si'c gujc te ñaj jien guiralii yäl_nanduxh xten Dios. Reni najc xpejn_pacni neñ xquidooi guluii yäl_najnre lo rexangl Dios, loj reni rnibee xhaguibaa. ¹¹ Galooli bejn Dios xhigabre par tejpas, ni'cni biääd xtadnu Jesucrist te guzobj xhigab ni bejn Dios. ¹² Con Jesucrist dinu guidxejb guibignu, guiniabnu lo Dios sa'csi ahuililajznu xtiidxni. ¹³ Na'c gac-huin lajztu sa'csi cadedä trabajw xcuenttu. Colguibalajz; dee najc xcäl_nasa'ctu.

Xcälsanälajz Jesucrist

¹⁴ Ni'cni ruzuxhibä nez loj Xtad Dad Jesucrist ¹⁵ nani badeed lajni lo guiraa reni yu' xhaguibaa ñajza reni yu' lo guedxliuj, ¹⁶ rniabä loj Dad xhaguibaa gutijpni lastootu con yäl_rnibee xcuent Sprit Dxan xtenni, sa'csi yuduxh xcäl_nasa'cni lo xcäl_rdimbicha'ni xhaguibaa. ¹⁷ Rniabäza lo Dios te jiädälajz Jesucrist neñ lastootu sa'csi ahuililajztu. Te che agusudzu'tztu, agusutijptu lo yäl_rinälajz ¹⁸ dxejc sajc gacbeetu sigajc guiraa rexpejn_pacni lacti gulajg, lactiza siool, lacti jiät, lactiza jiaa najc yäl_sanälajz xten Jesucrist. ¹⁹ Te gumbeezatu xcälsanälajz Jesucrist ni najc gurobduxhtej, digacdi guichalonuni. Te chaza lastootu, ñajza xcäriejntu con guiraa rexcäl_nasa'c Dios.

²⁰ Dios rnibeduxh. Sajc gunidxduxhruni loj xhitis ni rniabnu lojni, loj recos ni riennu xhigab. Con Sprit Dxan ni rujn dzuun neñ lastoonu suniidxni reyäl_nasa'c. ²¹ Loj Diosre coldeed xquixtios. Colguiliä'p xpala'nni neñ guidoo xcuent Dad Jesucrist guira dxej, par tejpas. Sugacni si'c.

4

Por Sprit Dxan nadxaag sa'nu

¹ Narä yu'ä lojtis Jesucrist te rsule'ätis xtiidxni. Ni'cni rniabä lojtu, guibajntu si'cni nungäj̄l, si'cni bejnzatu xhigab cheni gurejdxni la'tu. ² Colguibajn con yäl_nalaslajz, ñajza yäl_nadolajz, colcuedxi lajztu. Colyujn huant resa'tu con yäl_rinälajz sa'ni. ³ Colhuii te guidxaag sa'tu gactu tejsi con Sprit Dxan ni ruscuedxilajztu. ⁴ Si'c tejsi tiejxh najcnu loj Jesucrist, tejsiza najc xhigabnu con laani, tejsiza najc yäl_runloj ni rajptu xcuent diidx nani gurejdxtu. ⁵ Rajptu tejsi Dad, tejsi yäl_rililajz, tejsi yäl_robnis, ⁶ tejsi Dios, tejsi Xtad guiraanu nani rnibee guira'ti lo guiraanu.

⁷ Lo tejanu abaniidxni dzuun si'ctis bejn Jesucrist xhigab guniidxni lo tejanu. ⁸ Ni'cni caj lo reguijtz: Che huä'pni xhaguibaa, cadre rnibeeni,

abejnni gaan loj guiraa yälrnibee,
dxejcti badeedni dzuun lo rexpejn ni lo guedxliuj.

⁹ ¿Xhi säloj cadre caj, “huä'pni”? Dee säloj ganid biäjt ni maazru jäät lo guedxliuj. ¹⁰ Lagajc nani biäjtga, lagajc laani huä'pni jiaaru lo guiraa rexpahuibaa te saj guinibeeni guibaa näjza guedxliuj. ¹¹ Lagajc laani badeedni xtuun tejgareni. Yu'reni badeedni gac apost, yu'reni badeedni gac profe't, gaiireni badeedni gusule' xho rusläa xtiidxni bejn lo dojl, sgaiireni badeedni gac si'c ni ga'p reben guidoo, sgaiireni badeedni guluii rexpejn ni. ¹² Guiraa redee badeedni te guluiireni rexpejn Jesucrist, te gunreni dzuun te gustajreni rebejn ni gac xquidoo Jesucrist. ¹³ Nungäj] gac dzuunre che guidzujnli dxej ni nadxaag-sa'nu guiraanu loj yälrlilajz, che guidzujnli dxej riembesa'cnu Xi'n Dios, dxejc anajcnu benguyajl lo xtiidxni, si'c te ni aguroob loj xcälrnibee Jesucrist. ¹⁴ Dirunu gac si'c rebiuux ni tera'tsi rusiejch lajz ni, rucua diajgreni xtidx chutis bejn, mase xhitis diidx ruluiini. Dxejc riajbreni lo redidx-xhii xten bejn nani rusguee, nani cabäjtis gusguee bejn. ¹⁵ Maazru hueen chonuunu loj redidxlii xten Jesucrist con yälrinälajz te tiobnu lo guiraa recos xten nani rnibee, lagajc Jesucrist. ¹⁶ Loj Jesucrist nazdzu'tz guiraa rexpejn ni, te si'cni nazdzu'tzsa'reni sääreni, najcreni tejsi loj tiejxh Jesucrist, racnäj sa'reni segun xhi dzuun rujn tejgareni, casieedruren i te cayajc xhidajlru rebejn ga con yäl sanälajz.

Te yäl nabañcoob con Jesucrist

¹⁷ Laa ni'cni rniä rniabäza con laj Dad Jesucrist na'cru guibajntu si'c nabajn rebejn nani di gumbee Dios. Laareni rujn si'ctis ni riajb yejcreni. ¹⁸ Nayääl xcäriejnreni, direni ga'p xcäl nabajn Dios sa'csi nadduxh lastooreni. ¹⁹ Redee che gucnajd xcäriejnreni gusloj bejnreni guiraloj yälrtujy, guiraa redojl ni di nungäj] gunreni. ²⁰ Niluxh la'tu xhet si'c di bisieedu loj Jesucrist. ²¹ Palga abiejn diajgtu xtiidxni, niluxh abaluiini lojtu didxlii ni siädnä Jesucrist, ²² colgusaan yäl nabañyujxh ni gojptu: Lo yäl nabañyujxhga rujn bejn si'ctis ni rlajz ni. Dxejcti si'c runijtni la'tu lo Dios. ²³ Colgusiejch lajztu, colgusia xcäriejntu, ²⁴ te gactu beñcoob nani bejn Dios, colchanuu te yäl nabañsa'c, te yäl nabañya xten xtidxliini.

²⁵ Colguoro'n diidx-xhii, colnii didxlii lo resa'tu sa'csi tejsi najcnu guiraanu.

²⁶ Che guidxe'chtu, na'c guntu dojl. Na'c gusaantu chu xcälrdxe'chtu guideb dxej che chääzli gubijdx. ²⁷ Na'c gusaantu jiu' beñdxab neñ lastootu.

²⁸ Nani rilajn, na'cru cuanni. Laaca gunni dzuun con ñaani te gunni te dzunsa'c nani gudeed meel lojni te gac gacnäjzani rebejn nani xhet rajpdi.

²⁹ Na'c gusaantu guirii nicla tej didxguijdx ro'tu. Colnii ganax didxsa'c te gacnäjni guisieed reni rucua diajg xtiidxtu. ³⁰ Na'c guntu gac-huin lajz Sprit Dxan xten Dios. Laani najc te seen xten Dios najctu xpejn Dios, ni'c rbäjz ni neñ lastootu che guidzujnli dxej ni chäätu lo Dios.

³¹ Colguoro'n yäl nabañdxuudx xtentü, näj yälrdxe'ch, näj yälrdxagdij] sa'ni, näj yälrbexa', näj yälrgue. Colguibicaj lo guiraa redojlga, na'c gactu benguijdx.

³² Nungäj] gactu huen loj resa'tu, colgulasajz resa'tu, colsiäj] lajztu con resa'tu ni rujn dojl lojtu si'c rsiäj] Dios lajz ni rextojltu xcuent Dad Jesucrist.

5

Xho nanab guibajn rexi'n Dios

¹ Colguibajn si'c nabajn Dios, sa'csi najctu xi'nni nani sanälajz ni. ² Colchasanäj yäl sanälajz sigajcni huinälajz Jesucrist nuure cheni badeedni lagajc laani lo

Dios, cuajni lo cruzj, gujtni. Laani gujcni si'c gojn, gujczani yälrbibyaal ni bidxaglazj Dios.

³ Nicla gusä'ttu yälrusguee chääl bejn, nicla redoļ dxuudx, niclaza yälšanälaztej xhixtentisni. Nicla gusä'ttuni lo sa'tu, sa'csi xhet si'c di nungäļ gun bejn ni naban-naya. ⁴ Sigajcza colcuälaz diidx ni rujn xtujy, näjza didxnajd, näjza didxnaj nani digac laaca. Colgudeedtis xquixtios lo Dios. ⁵ La'tu anajntu nicla tej ni rusguee chälbejn, nicla tej bendxuudx, nicla tej ni sanälaztej xhixtentisni, nicla renani rajn rebanäjb, nicla tej reni'c di xca' yäl'nasa'c loj Jesucrist, dizareni jiu' lo xcälrnibee Jesucrist, xcälrnibee Dios. ⁶ Na'c gusaantu gusguee bejn la'tu con diidx ni xhet sajcdi sa'csi xcuent redzuunga riääd xcälrdxe'ch Dios loj rebejn ni di gusoob xtiidxni. ⁷ Na'c guntu sigajc rujnreni.

⁸ Galoo nacäyjtis xcäriejntu gubajntu, luxh naj abasanij Jesucrist xcäriejntu. Colguibajn si'c nungäļ guibajn nani abianij xcäriejnni. ⁹ Sa'csi nani abianij xcäriejnni rujn dzunsa'c, rniini didxgulii. ¹⁰ Colguisieed xhini'c rchaglazj Dios. ¹¹ Na'c guntu redzundxuudx nani rujn reni nacäy xcäriejnreni, coltilnä j reni rujn sa' dzunguijdxga. ¹² Sa'csi te xtujyli najc jieinu diidx xcuent xtzuunreni ni runxhiga'tzreni. ¹³ Niluxh guiraa sa' redzuunre ni rdilnä jnu, huenliisi sien xhi najcreni, suzen ni lo xpianij Jesucrist. Sa'csi guira'ti ni ruzen najc nianij. ¹⁴ Ni'cni caj loj reguijtz, räjp Dios:

Gubajn, huistie luj ni rejslu.

¡Huistie lo doļ, luj ni naga'lu lo doļ si'c bengut,

te gusanij Jesucrist xcäriejnlu!

¹⁵ Colhuii, colsin, na'c guibajntu si'c te bejn nani di gacbee, colguibajn si'c bejn nani yu' xcäriejnni. ¹⁶ Coltedsa'c redxej sa'csi nen redxjre ganax cosguijdx rujn bejn. ¹⁷ Ni'cni na'c guibajntu si'c rebejn nani di gacbee, colyacnasin, te gacbeetu xhini'c najc ni rlajz Dad xhaguibaa guntu. ¹⁸ Lacuaa yätu nejp nani runijt bejn, colgapchee Sprit Dxan xten Dios nen lastootu. ¹⁹ Colnii loj resa'tu rediidx nani gunii rebejn tiemp gulä'preni xpala'n Dios, colyelza redij xten Dios, con reyälriel colguiliä'p xpala'n Dios nen lastootu. ²⁰ Di jiäl lajztu gudeedtu xquixtios lo Dios xtadnu con laj Dad Jesucrist.

Xho guibannä j sa' rexpejn Jesucrist

²¹ Sa'csi rajntu Jesucrist, colgusoob xtidx sa'tu.

²² Lojtu, regunaa ni abachnaa, rniä scree: Colgusoob xtidx chäältu si'c rusoobzatu xtidx Dad Jesucrist. ²³ Sa'csi niguii rnibee gunaa si'cni rnibee Jesucrist xquidoo ni, niluxh laazani ruslaani rexpejn guidoo ni lo redoļ, najcreni si'c tiejxhni. ²⁴ Ni'cni, sigajc rusoob reben guidooga nani rnibee Jesucrist gunreni, sigajcza nungäļ gusoob regunaa ni abachnaa nani guinibeetis chäälreni gunreni.

²⁵ Lojtu, reniguii ni abachnaa rniä scree: Colchanälajz chäältu sigajc ni huinälajz Jesucrist rexpen guidoo ni, badeedni lagajc tiejxhni loj Dios cheni cuajni lo cruzj por laareni ²⁶ te basiani xtojļ rexpejn guidoo ni, te gujcreni te bencoob, abidiib lastooreni con xtiidxni si'c rdiib te cos con nis ²⁷ te che xca'ni rexpen guidoo ni, najcreni te guidoo ni sajcro, te guidoo nani xheti xtojļni, te guidoo nani sugadzu'tz, te guidoo xhet xhi riäädxdi, najcni te guidoya, xheti xhi xtojļdini. ²⁸ Sigajcza, te niguii nani abachnaa nungäļ chanälajz chäälni sigajc sanälajzni lagajc tiejxhni. Nani sanälajz chäälni sanälajz lagajc laani. ²⁹ Ruti chu te bejn ni rbälaz tiejxhni; alga rajpni tiejxhni ruyaanni tiejxhni sigajc rajp Jesucrist rexpen guidoo ni. ³⁰ Najczanu tejsi loj tiejxh Jesucrist, loj xpäälni, loj rextzujtni. ³¹ “Ni'cni che guchnaa te niguii rusa'nni xtadni,

xnanni, te xca'ni gunaa, te gac guiro'preni si'c tejsi bääl, si'c tejsi bejn.”³² Dee najc te diidx xhiga'tzduxh; li te “¿chuj?” najcni. Niluxh narä rniä xcuent Jesucrist con rexpenguiooni.³³ Niluxh nanabpac chanälajz tejgatu chäältu sigajc sanälajztu tiejxhtu. Dxejcti gunaa ga'pzani xpala'n chäälni.

6

¹ Lojtu biuux, rniä scree: Colgucuaadiajg xtidx Jesucrist, colgusoob xtidx xtadtu sa'csi ni'c sajc nez loj Dios. ² Colga'p xpala'n xtadtu, xnantu, sa'csi ni'c najc didx galoo xten leii nani runiidx xhi xca'tu palga gusoobtu diidxga; ³ “Te saruduxh guibajntu xchero lo guedxliujre.”

⁴ La'tu, Dad ni najc guzajn, na'c guntu guidxe'ch rexi'ntu lojtu. Colguslaareni con yälñaj, colgulijdxreni con xtidx Jesucrist.

⁵ La'tu ni najc mos, colgusoob xtidx xlamtu lo guedxliujre, colcuadiajg xtiidxni, xhet xhi steedi xhigabdi guntu neñ lastootu. Colyejn xtzuunni si'cni najc xtzuun Jesucrist. ⁶ Colyejn xtzuunni, niluxh xhet che suga'tisreni, cahuiireni, parsi jiansa'ctu lojreni. Maazru hueen guntu dzuun si'c xmos Jesucrist; colyejn guira'ti si'cni rujntu xtzuunpactu; si'cni rlajz Dios. ⁷ Colyujn xtzuunni guideb lastootu si'c xmos Jesucrist, et si'cdi xmos beñ guedxliuj. ⁸ Anajntu dzunsa'c ni gun tejgatu, lagajcza xcuent ni'c xca'tu loj Dad Jesucrist, mase najctu mos o mase rutlojdi yu'tu.

⁹ Lojtu, relam, rniä scree: Sigajcza colyujn lojreni. Colgusaan yälrusacsí, sa'csi anajntu yu' xlamtu xhaguibaa, luxh tebloj najc guiraa rebejn nez lojni.

Nani gacw rexpejn Jesucrist lo guerr

¹⁰ Didx lult ni rniä, sa'ä, najc scree: Colsutijp lo xcälracnäj Jesucrist, colsudzu'tz lo xcälñadip xcälñibeeni. ¹¹ Colgajcw xhabguiib xten Dios te gac sudzu'tztu lo reyälrusguee xten beñdxab. ¹² Sa'csi xhet beñ guedxliujtis cadilñajnu. Cadilñajzanu reguxhtis xte yälçäy, näjza reyälñibee, rebejn nani rnibee loj reyälçäyire, näjza rexangl beñdxab nani rnibee bej xten guedxliujre. ¹³ Ni'cni colca' guideb lad-guiib xten Dios nani runiidxni loonu te gac sudzu'tznu neñ dxej ni guideednu trabajwduxh, te che agudejdni, lahtis sisiudzu'tznu. ¹⁴ Colsudzu'tz pues. Xque'tu colguliib sindoor-guiib ni najc xtidx Jesucrist, colgajcw gamangw-guiib ni najc rextzunsa'c xten Dios ni rujntu. ¹⁵ Colcuuaa gurach-guiib ni'tu (ni'c najc xtidx Jesucrist ni ruscuecdxi lajztu). ¹⁶ Colca' escud-guiib ni najc yälñililajz te con yälñililajz xtidx Dios di beñdxab gun gaan gusguee la'tu con rextidx-xhiini. ¹⁷ Colca' yälñililajz xten Dios lo dojl si'c te xhumbrel-guiib chu yejctu; colca'za lans xten Sprit Dxan xten Dios ni najc xtidx Dios. ¹⁸ Colñab lo Dios guiraa dxej; colñab lojni con Sprit Dxan xtenti; colsusintis; na'c jieedtu guiniabtu lo Dios xcuent guiraa xpejñni. ¹⁹ Colñabza lo Dios por narä te guniidx Dios diidx cheni gal guiniä, te na'c guidxebä guiniä che guluiä didx-xhiga'tz xten yälñililajz bejn lo dojl. ²⁰ Xcuent rediidxga ni yu'ä neñ latzguiib, caduä con caden. Ni'cni colñab lo Dios te na'c guidxebä guiniä rediidxga si'cpacni säbyäjl guiniäni.

Lult xtixtios

²¹ Niluxh te gacbeetu xho sasaj rextzunä, nägajcza xho yu'ä narä, Tíquico, sa'nu ni sanälajznu, ni runsa'cza xtzun Dad Jesucrist, siääd lojtu te gusule'ni diidx. ²² Laapacni ruxhalä lojtu, te gacbeetu xho yu'nu, te si'c guscuecdxini lajztu.

²³ Rniabä yälñbedxilajz par resa'nu, näjza yälñililajz con yälñililajz xten Dios Xtadnu näjza xten Dad Jesucrist. ²⁴ Gacnäj Dios guiraa reni di gusguee, reni sanälajzpac Dad Jesucrist. Sugacni si'c.

Te Guijtz Lo Rebeņ Filipos

Latzguiib yu' Pabl bacuaani loj rebeņguidoo xten guedx Filipos

¹ Pabl nājza Timoteu, nani najc rexmos Jesucrist, rucuaanu guijtzre lo guiraa rexpejn Jesucrist nani rbājz guedx Filipos, loj rebeņ nani ruluuı xtidx Dios neņ reguidoo nājza loj rediaconos. ² Gacnāj Dios la'tu con yälbedxi-lajz xten Xtadnu nājza xten Dad Jesucrist.

Rniab Pabl lo Dios xcuent rebeņ nani rililajz

³ Che rnaj lazä la'tu, rudedä xquixtios lo Dios. ⁴ Che rniabä lo Dios, rbaa lazä rniabä lo Dios xcuent la'tu, ⁵ sa'csi abidxaag sa'nu lo xtidx Jesucrist che guslojli huililajzta hasta najli. ⁶ Anancheä Dios nani gusloj cayunsa'c dzuun neņ lastootu, lagajc laani suluxsa'c dzuunga dxejli ni jiäd Jesucrist. ⁷ ¿Xhiru xhigab nungäjł gunä? Ni rapä la'tu neņ lastoä sa'csi cayacnäjtu narä neņ latzguiib luxh rsiudzu'tztu riye'tztu lo beņ, guliı najc rediidx nani rusule'ä xcuent Jesucrist nājza la'tu rusule'tu rediidxga. ⁸ Dios nanchee xho rbanäätu, xho sanälazä guiraatu lo xcälšanälajz Jesucrist. ⁹ Rniabä lo Dios te tioobru xcälrinälajzta nāj xcälnajntu nāgajc churu xcäriejn guiraatu, ¹⁰ te cuetu nani najc dzunsa'c te si'c guibaņ nayatu, te na'c ga'ptu nicla tej dojl cheni jiäd Jesucrist. ¹¹ Te guidxa lastootu yälñasa'c xten te yälñabaņsa'c ni runiidx Jesucrist, te guspaa lajzta Dios, guiliä'ptu xpala'nni.

Jesucrist najc xcälñabaņä

¹² Rlazä gacheetu betzä: guiraa nani gusacä ni'c cayacnāj guire'chru xtidx Jesucrist. ¹³ Ni'c guiraa rebeņ, renani yu' jusgaad sigajc renani yu' garenca lajt, anajnreni niäuä latzguiib xcuent Crist. ¹⁴ Xhidajlru resa'nu cheni gucbeereni yu'ä latzguiib, gusudzu'tzru lajzreni, direni nidxejb, guniirureni xtidx Dios.

¹⁵ Guliica yu' reni rusule' xtidx Jesucrist sa'csi rdxe'ch lajzreni, rdxe'chzarenı loä. Yu'za reni rusule' xtidx Jesucrist sa'csi laaca najc xhigabreni. ¹⁶ Yu'reni rusule' xtidx Jesucrist sa'csi rdxe'chreni, xhet sa'csi laaca najc xhigabreni, alga rujnreni xhigab gustioobrureni trabajw nani tedä neņ latzguiib. ¹⁷ Niluxh yu' reni rusule' rediidxga sa'csi sanälajzreni Jesucrist. Anajnreni yu'ä latzguiibre te gusule'äru guliipac najc xtidx Jesucrist. ¹⁸ Niluxh ¿xhiru najcni? Palga rujnsireni laaca o palga guluiipac laaca najc xhigabreni rusule'reni xtidx Crist; rbaa lazä sa'csi care'ch xtiidxni niluxh sibaaru lazä. ¹⁹ Ananä laaca guiriä loj guiraa recosre sa'csi canabtu lo Dios xcuentä. Luxh xcälracnäj Sprit xten Jesucrist ²⁰ rujn runloä, rbäzäza dina jianxtuiä. Ni'cni dina guidxebä guiniä, si'cni runäpac, sigajcza runä naj te gac guiliä'pä xpala'n Jesucrist con tiexhä palga guibaņä o palga guetä. ²¹ Sa'csi palga guibaņä, su'ä lo Jesucrist; luxh palga guetä sunäru gaan. ²² Palga guibaņäru lo guedxliujre, sajcru gunä xtzuun Dad Jesucrist, ni'cni dina gacheä xhnic cueä xca'ä. ²³ Nagajn najcni par narä cueä lo guiro'preni. Te lajt runä xhigab: malaiı guetä te cha'a cadre yu' Jesucrist sa'csi ni'c najc hueenru par narä. ²⁴ Niluxh stee lajt nancheä nungäjł guibaņäru lo guedxliujre xcuent la'tu. ²⁵ Niluxh narä racbeäpac siannäaru la'tu, su'äru lojtu te chanuurutu lo xtidx Jesucrist, te guibalajzta lo yälrililajz, ²⁶ te guibalajzrutu xcuentä loj Jesucrist che guibisacä lojtu stehuält.

²⁷ Colhuiitis guibajntu si'cpac ni rniı xtidx Jesucrist, te palga jiädhuiätu o palga ruti narä, jiejn diagä sugadzu'tztu, rujntu tejsi xhigab, nadxaag sa'tu

rujntu tejsi dzuun con yälrlilajz xten xtidx Jesucrist. ²⁸ Na'c guidxejbditu renani rdxe'ch lojtu. Laareni huenliisi rusen agunijtreni ni'c rdxe'chreni, ni'cni la'tu huenliisi rusen agulaatu nen dojl si'c baniidx Dios, ni'cni ditu guidxe'ch. ²⁹ Sa'csi lojtu abaniidx Jesucrist chalilajztu xtiidxni. Niluxh xhet ni'ctis; nägajcza tedtu trabajw xcuent laani. ³⁰ Cadejdtu lagajc trabajw ni cahuiitu gudedä luxh naj riejn diajgtu cadedsicä trabajwga.

2

Xcälñalaslajz näjza xcälguobduxh Jesucrist

¹ ¿La ruspaa Jesucrist lajztu? ¿La racnäy xcälñälajztu la'tu? ¿La yu' Sprit Dxan xtenni con la'tu? ¿La yu' xcälñälajzni näj xcälñalajzni lastootu? ² Palga yu'ni, colguspaa lazä, colyejn tejsi xhigab con narä, colga'p lagajc yälñälajzga, colguidxaag sa'tu, colyejn tejsi xhigab. ³ Na'c guntu nicla tej dzuun sa'csi cayutu lagajc la'tu, na'cza guntu dzuun te chä'p xpala'ntu. Colyejn xtzuuntu con yälñalaslajz, colhuii loj sa'tu si'c benroru lojtu. ⁴ Na'c jiu chu tejtü lagajctis xhixtenni, coljiu tejgatu xhixten sa'ni.

⁵ Colga'p lagajc sa' xhigab nani gojpza Jesucrist ⁶ nani mase najcni sigajc Dios, dini niniazdzu'tz xcälñibe Dios, ⁷ alga basa'nni te laad yälñibe nani rajpni con Xtradni Dios te gujcn mos cheni gojlni lo guedxliujre. Gujcn si'ctis te bejn. ⁸ Che gujcn si'ctis ben guedxliuj, gujcn ben nadolajz, ben nasobdiidx. Basoobni xtidx Dios, gujtni lo crujz, luxh yälrejt lo crujz najc te yälrtuiduxh. ⁹ Ni'cni baspañsac Diosni, gule'cni Crist te lajt ni najc jiaaru, badeedza Dios sajru lajni lo laj guiraa relaj ni rusä't bejn. ¹⁰ Luxh che jiejn diajgreni laj Jesucrist, suzuxhijb guiraa reni yu' xhaguibaa, guiraa reni yu' lo guedxliuj, näjza guiraa reni yu' nez nen yuj. ¹¹ Te guiraareni gacbeepac, guiniizareni: “Jesucrist najc Dad”, te si'c chä'pduxh xpala'n Xtradnu Dios.

Rexpejn Jesucrist najc si'c bajl ni rusani lo guedxliuj

¹² Ni'cni, resa'ä ni sanälazä, sigajcni rusoobtu xtidxä cheni suganää la'tu, sigajcza colgusoob xtidxä naj ni yu'ä zijt, colhuii tejgatu xho gac laatu nen dojl, colyajc bejn ni rusoob diidx con yälrdxejb. ¹³ Sa'csi Dios najc ni rujn dzuun nen lastootu te rajc rujntu xhigabsa'c, dxejc racnäyzani la'tu te rajc rujntu si'cni rlanjni.

¹⁴ Loj guira'ti ni rujntu, na'c gusmojmütu, na'cza gun tiop lajztu, ¹⁵ te rut gucuaquijditu, te gactu bejn ni ruchaag chutis bejn, gactu xi'n Dios, bejn nani xhet xtojldini yu' laj ni tre'tu loj rebenguijdx ni rujn redzundxuudx. Nez lojreni gactu si'c te bajl ni rdimbicha' si'c rebalxhaguibaa che nacäy, ¹⁶ sa'csi arapdzu'tztu xtidx yälñabajn ni runiidx Crist nen lastootu te guspaatu lazä dxej cheni jääd Jesucrist, sa'csi xhet xlia'di gujc xtzunä, xhetza xlia'di cayunä dzuun naj. ¹⁷ Mase lagajc xtienä guixe' te guiza' te gojn ni xca' Dios xcuent xcälrlilajztu, rbaa lazä, sibalaznääza la'tu. ¹⁸ Sigajcza colguibaa lajztu, colguibalaznäy narä.

Timoteu con Epafrodito

¹⁹ Nez loj Dad Jesucrist cayunloä guxhalgacä Timoteu lojtu te näjza narä guibaa lazä che agucebeä xho yu'tu nejzga. ²⁰ Sa'csi rutru rapädi nani rujn tejsi xhigab, tej ni guliipac gun dzuun, jiupacni la'tu. ²¹ Guiraa rebejnre rujntis xtzuuncareni, direni jiu gunreni xtzuun Jesucrist. ²² Niluxh la'tu anajntu xho rujn Timoteu; si'c racnäy te bi'n xtradni, si'cza racnäjni narä lo xtidx Jesucrist. ²³ Ni'cni rlazä guxhaläni te jädhuiini la'tu, fixgaäsi don xho sasaj xcuentä ree. ²⁴ Cabäzäza nez lo Dad Jesucrist don la näjza narä sajl jädhuigacätu.

²⁵ Niluxh rchaloä nanabpac guxhalä bejtznu Epafrodito ni najc sa'a loj dzuun, loj retrabajw ni cadejdnu. Lagajc la'tu baxhaltuni te jiuni narä, fiini xhini'c rquinä. ²⁶ Laani rlazduxhni fiini lojtu, lacti cayu'ni yärsia' sa'csi gucbeetu gucxhuuni. ²⁷ Guliica gucxhuuni cuentro, ameer niejtni, niluxh Dios balaslajzni laani, luxh xhet laatisni, balaslajzzani narä te di nidedäru loj yälñahuinlajz ni yu'ä ree. ²⁸ Ni'cni rlazä guxhalgacäni te guibalajztu che fisactu lojni, näjza te na'cru gac-huinlazä xcuent la'tu. ²⁹ Colca'ni con yälrbalajz si'c bejtztu lo xtidx Dios, sigajcza colyejn reni najc sigajc laani. ³⁰ Xcuent xtzuum Jesucrist ameer niejtni, dini niu xcälñabajntisni te bejnni redzuun nani di najcdi niujntu lagajc la'tu xcuentä.

3

Te yälñabansa'cpac

¹ Naj rebetzä, colguibalajz nez lo Dad Jesucrist. Xhet najcdi gucasacä lagajc rediidx nani abacuaä lojtu, sa'csi sacnäjni la'tu. ² Colnati renani najc si'c bä'cw. Colnatiza rebejn nani rujn dzun gujdx. Colnatiza reni ru' bee tiejxhtisreni luxh xlia'si rujnreni si'c. ³ Renani guliipac yu' bee najc nuure nani ahuililajz xtidx Dios, rienzanu xtzuumni si'cni rlanjzni sa'csi ayu' Sprit Dzan xtenni nen lastoonu. Rbalaaznu sa'csi najcnu xpejn Dad Jesucrist, xhet xcuentdi redzuun ni rujn tiejxhnu. ⁴ Narä sajcza guibalazä xcuent ni rujn tiexhä. Palga yu' chu tej ni rbalajz, narä rbalazäru ⁵ sa'csi guyu'ä bee che guyu'ä xhujn gubijdx; narä nacä te rexpejn Israel; narä nacä tej rexpejn toBenjamín, nacä te hebreo, luxh xtadä najc te bejn hebreo; xcuent leii nacä te farisee. ⁶ Basobduxhä guirali rextidx Dios ni caj lo leii ni'cni basaciduxhä rexpen Jesucrist; xcuent yälñabansa'c xten leii, xhetliidi xtolä yu'; basobdu'tzä xtidx leii. ⁷ Niluxh naj rediidx nani galoo benä xhigab sacduxh, naj xhet sajcdini sa'csi sanälazä Jesucrist. ⁸ Niluxh maazru runä: runä xhigab xhet sajcdi guiraa nani rapä, sa'csi maazru sacduxh yälriembe Jesucrist ni najc Dad xtenä. Xcuent Jesucrist gulälazä guira'ti, guira'ti najc si'c guixbiujy nez loä te gunä gaan Jesucrist, ⁹ te chu'ä lojni, xhet xcuentdi xcälñabansa'cä ni najc xcuent leii, alga xcuent yälñabansa'c ni najc xcuent xcälñabansa'cä ni najc xcuent leii, alga xcuent yälñabansa'c ni najc xcuent xcälñabansa'cä ni najc xcuent leii, alga xcuent yälñabansa'c ni najc xcuent xcälñabansa'cä ni najc xcuent leii. ¹⁰ Ni'cni rlazä gumbeäru Jesucrist loj yälñabee ni rajpni sa'csi huistie gubansa'cni sacni loj rebengut, te gumbeäru retrabajwduxh ni gudejdni, te ganä xho gunä ni rlanjz Dios si'c gucbee Jesucrist, bejnzani ni rlanjz Dios che gujtni. ¹¹ Te gac guidzunä lo yälguibansac loj rebengut te xca'ä yälñabajn par tejpas lo Dios.

¹² Dizana guiniä “abenä gaan” o “anacä beñsa'c”, alga sanuätis te gunä gaan yälñabajn nani cua'ä lo Jesucrist. ¹³ La'tu rebetzä, dipacna gunä cuent alabenä gaan, niluxh tejtis nani runä, riallazä nani agudejd, rusgää naä si'cni guiniazä nani churu gac. ¹⁴ Si'cni sanuutis ruxun bejn te gunni gaan xhi guzalajzni, si'cza sanuutis cayunä dzuun nani baniidx Jesucrist loä, te che abenä gaan dzuunga sica'ä ni guzalajzni, nalajznu sibejdx Dios narä cha'a loj Jesucrist.

¹⁵ Guiraanu nani ahuililajznu, nanab jiennu lagajc xhigabga, niluxh palga la'tu guntu ste'ca xhigab, rchaloä lagajc Dios suluilojni lojtu xcuent ni et laadi cayujntu.

¹⁶ Naj, cadrotis abidzunnu lo nani abiembeenu, sigajcza nanab guibansijcnu, chanuutis gusoobnu rediidxga; nungäjñ guibajnnu loj rediidxre, jiennu tejsi xhigab.

¹⁷ Rebetzä, coltanajl narä, colyejn si'c runä narä, colhuiiza rebejn nani nabajn si'c nabanä. ¹⁸ Xhidajl huält aguniä lojtu, naj ronäli rnisacä lojtu, yu' xhidajl reni rdxe'ch lojtu, rniyajreni nani bejn Jesucrist che gudijxni

xtojlnu lo crujuj. ¹⁹ Redee che luux xnezyujreni sinitlojreni, sa'csi xtioozreni najc yälrausa'c; luxh rbaali lajzreni rujnreni dzun xtujy; luxh riutisreni xcäl'nasa'c guedxliujre. ²⁰ Niluxh nuure, xhaguibaali najc laadxnu, luxh ro'cli cabääznu jiääd nani ruslaanu neñ dojl, nalaaznu lagajc Dad Jesucrist. ²¹ Laani suchaani tiexhnu ni rajpnu lo guedxliujre, te gac tiexhnu sigajc najc tiejxhni lo xcälrnibeeni. Sujnni dee con yälrnibeduxh ni rajpni te rnibeeni loj guirali'ti, guiraa nejz.

4

Colguibalajztis xcuent Dad Jesucrist

¹ Ni'cni rniä lojtu, rebetzä nani sanälazä, lojtu ni rlazä fisacä, lojtu ni ruspaalazä, lojtu ni najc yäl'nasa'c xtenä, col'sudzu'tz loj xtidx Jesucrist.

² Rniabduxhä lo Evodia näjza lo Síntique, rulidxäreni gunreni tejsi xhigab xcuent Dad Jesucrist. ³ Sigajcza rniabä lojlu betzä, ni runnäjä narä dzuun, gucnäj regunaare ni bennäj narä dzuun, bideednu trabajw xcuent xtidx Jesucrist. Gucnäjza Clemente näjza guiraa reni bennäj narä dzuun; alajreni caj neñ reguijtz xten yäl'nabajn par tejpas.

⁴ Colguibalaznäjtis Dad Jesucrist; stehuält rniä: colguibalajz. ⁵ Sugabee guiraa rebejn xho najc xcäl'nabajntu lo xtidx Dios. Asiäddzungajxh dxej xten Dad Jesucrist.

⁶ Na'c guidxejbtu, col'nabtis lo Dad guira'ti, colgudeedza xquixtios lojni laḷ ni cabedx-canabtu lojni. ⁷ Dios guniidx xcäl'rbedxilazduxhni, nicla guntu xhigab lacti najc yäl'rbedxilajzga. Yäl'rbedxilajzga ga'p lastootu näjza xcäriejntu loj Dad Jesucrist.

Colyejn xhigabsa'c

⁸ Mbaj naj, deetis guiniä lojtu rebetzä, sa'tis rediidxre gusaantu chu loj rexhigabtu: guiraa ni najc guliipac; guiraa rediidx ni nanab guiliä'pni xpala'nni, guira'ti nani nacsac; guira'ti nani naya; guira'ti nani najc saru; guira'ti nani rapsa'c xpala'n lajni; näj palga yu' xhi dzuun ni nacsac'pac, o palga yu' xhi te diidx ni sajc guiliä'p xpala'nni, xcuent guiraa reni'c colyejn xhigab. ⁹ Nani bisieedtu, nani cua'tu, nani biejn diajgtu, nani bahuiitu benä, ni'c guntu te Dios ni rbedxilajz, laani jiannäjni la'tu.

Gojn xten reflipenses ni xca' Pabl

¹⁰ Rbaduxh lazä nez loj Dad Jesucrist sa'csi banasac lajztu gacnäjtü narä. Guliini; galooli rlaiztu niacnäjtü narä, luxh di niajcdini. ¹¹ Dinä guiniä si'c sa'csi yu' xhi cayädxä, sa'csi abisiedä guibaali lazä loj xhitis ni rapä. ¹² Sajc guibanä che guxii rapä; sajc guibanä che xhidal rapä; abisiedä guibanä xhotis: sajc gauduxhä, sajcza guilianä; sajc gapä xhidajl xhixtenä, sajcza tedä trabajw. ¹³ Guira'tini sajc gunä sa'csi Jesucrist racnäjä narä. ¹⁴ Niluxh xhet najcdi; laaca dzuun bejntu che bejntu xhigab gacnäjtü narä laḷ ni cadedä trabajw.

¹⁵ Gacbee guejbtu, dad filipenses, che gusloj caguluiä xtidx Jesucrist lojtu, cheni biriä reguedx Macedonia, nicla tej guidoo di niacnäjä narä, la'tistu gucnäj narä. ¹⁶ Cheni yu'äli guedx Tesalónica, baxhalḷtu meel loä tej-tio'p huält. ¹⁷ Niluxh narä di rlazä xca'ätis xhixtentu ni guniidxtu, nani rlazä najc tioobru xcäl'nasa'ctu nez lo Dios xcuent dzuun ni rujntu ruxhalḷtu meel loä. ¹⁸ Naj acua'ä guiraa ni baxhalḷtu, arapä xhidajl, arapduxhä sa'csi acua'ä nani biädnä Epafradito baxhalḷtu loä, te gojn ni rlianejxh si'c guxhyaal, te dzunsa'c ni rchaglaiz Dios. ¹⁹ Dios xtenä guniidx lojtu guiraa nani riäädx xca'tu, si'ctisni

rajpni reyäl̄nasa'cduxh xhaguibaa con Dad Jesucrist. ²⁰ Colguiliä'p xpala'n Dios xtadnu guixe-guixee par tejpas. Si'c gacni.

Lult xtixtios

²¹ Coldeed xtixtios lo guiraa rebejn̄ ni abia lastooni nez loj Dad Jesucrist. Rebejznu ni yu' ree näj narä ruxhal̄nu xtixtios lojtu. ²² Guiraa reben̄ree ni abia lastooni nez loj Dad Jesucrist ruxhal̄ xtixtios, niluxh ruxhal̄ru resa' César xtixtios lojtu.

²³ Suga'p xcäl̄racnäj Dad Jesucrist lastootu. Sugacni si'c.

Te Guijtz Lo Rebeņ Colosas

Bacuaa Pabl loj rebeņ guidoo ni yu' guedx Colosas

¹ Narä, Pabl nacä te apost xten Jesucrist. Dios gule narä. Narä näjza bejtznu Timoteu ² cagucuaanu reguijtzre loj rebeņ Colosas nani nabannaya rujnreni si'cpacni rlajz Dios, näjza reni najc bejtznu lo xtidx Jesucrist. Xca'tu yälracnäjä näjza yälrbedxilajz xten Dios xtdanu.

Rniab Pabl gudeed Dios yälñajn xtenni

³ Rdeednu xquixtios lo Dios xtdad Dad Jesucrist rniabnu lojni xcuenttu guixe-guixee. ⁴ Abiejn diajgnu xho rililajztu xtidx Dad Jesucrist, näjza xho sanälajztu rebeņ ni ahuililajz xtidx Jesucrist, ⁵ sa'csi cabäjäztu xca'tu reyälñasa'c ni yuchee xhaguibaa par la'tu. Laa xcuent reni'c ni biejn diajgtu cheni bacuadiajgtu xtidxlii Jesucrist xcuent yälñusa'c lo dojl. ⁶ Laa rediidxga ni abiääd lojtu sigajc ni bire'chni guideb lo guedxliuj, luxh cayac xhidajlru rebeņ ni cayacbee diidxre, asalilajzreni diidxga, sigajc guzajctu la'tu. Cheni biejn diajgtu xtidx Jesucrist, dxejc biembeeatu guliipac najc xcälñulaslajz Dios. ⁷ Sigajcza bisieedtuni lo Epafra, ni sanuutis cayacnäjni nuure lo dzuun. Laani najc te beñsa'c, yu'ni lojtu cayujnpacni xtzuun Jesucrist lacuaa nuure. ⁸ Laani abasule'ni diidx loonu xho sanälajz sa'tu sa'csi nabajñ Sprit Dxan xten Dios neņ lastootu.

⁹ Laa ni'cni dxejli nani biejn diajgnu diidxre xcuenttu, di cuäaz cabedxcanabnu lo Dios, canabnu gacheduxhtu xho rlajz Dios guntu, guniidxni guiraa yälñajn näjza gusanijni xcäriejntu ¹⁰ te guibajntu si'cni nungäjñ guibajñ bejñ ni sanajñ Dad Jesucrist, te guspaatu lajzni lo guiraa redzuun. Chanuzatu gunrutu guiraa redzunsac näjza jianijru xcäriejntu xcuent yälñiembee Dios. ¹¹ Tioobrutu loj xcälñadip, xcälñabee Dios te guibaa lajztu gusutiplajztu, cue'cdxilajztu loj xhitis ni sajctu. ¹² Guibalajznu guideednu xquixtios loj xtdanu Dios nani basudzu'tz nuure te xca'nu yälñabajñ par tejpas sigajc guiraa rebeņ nani ahuililajz xtiidxni yu'reni lo xpianijni. ¹³ Laani abaslaani nuure loj xcälñabee yälñacäjä, abateedni nuure lo xcälñabee xi'nni ni sanälajzni. ¹⁴ Laa xi'nni ni baslaa nuure neņ dojl cheni baxhe'ni xtiejñni, gujñni lo cruzj, dxejc gudijñni rextojñnu.

Gubisacnu loj Dios xcuent xcälgujñ Jesucrist

¹⁵ Rut rajcđi ruhuu lo Gueb-Dios, niluxh xi'nni najc si'cpac najc Dios; si'cpac rujñ lojni. Laani guyu'ni galodoo luxh rnibeeni lo guiralii ni yu' lo guedxliuj. ¹⁶ Por laani benchee Dios guiralii ni yu' xhaguibaa ni yu'za lo guedxliuj, renani ruzen sigajc renani di guzen: rereii, näjza reni rnibee loj rexangl Dios, näjza reni rnibee loj rexangl beñdxab, nägajcza reyälñabee xten reguixhajj, sigajczani loj regubier, lo reguxhtis ni rajp yälñabee, guiraani guc-chee por laani, näjza par laani. ¹⁷ Alanabajñ Jesucrist galooli, che gajđli guirixtiej guedxliuj. Por laani yu' guira'ti ni yu'. ¹⁸ Laani najc nani rnibee guidoo, nalajznu rebeņ nani ahuililajz xtiidxni. Laani najc ni guläxtiej guira'ti. Ganiddoo laani huäjs lo rebeņgut te rnibeeni. Loj guira'ti ni yu' laatisni najc nani sajñ guinibee. ¹⁹ Sa'csi bidxaglajz Dad Dios ga'p Jesucrist guiralii yälñabee nani najc xten Dios, ²⁰ por lagajcza Jesucrist badzu' Dios guira'ti ni yu', guibi'reni lojni, reni yu' lo guedxliuj sigajc reni yu' xhaguibaa, sa'csi abiäjñ-lajzni, aguredxi lajzni sa'csi bixe' xtiejñ Jesucrist lo cruzj.

²¹ Luxh la'tu gujctu si'c benzijt lo Dios sa'csi galoo rdxe'chtu lo Dios nen las-tootu xcuent redzunguijdx nani bejntu. ²² Niluxh naj abiäj-lajz Dios abadzu' Jesucrist la'tu, agucnayatu gubi'tu lo Dios xcuent xtiejn Jesucrist ni baxhe'ni lo cruz cheni gujtni. Ni'c bejn ni te che suutu nez lojni, xhetiru xtojltu, xhet xhi guiniidi Dios lojtu sa'csi anayapactu. ²³ Niluxh riäj chanuu sudzu'tztu, cuedxitu lo yälirililajz. Na'c gusaantu chu gusiejch-lajztu te cuälaztu xtidx Jesucrist nani abiejn diajgtu. Rediidxga abasule'zanu loj guiraa rebejn ni re' lo guedxliujre. Luxh lagajc narä, Pabl rusule'ä diidxga sa'csi parpac ni'c gule Dios narä.

Dzuun guidoo najc xcuent Pabl

²⁴ Naj rbalazä cadedä trabajw xcuenttu sa'csi retrabajw ni cadedä lagajc narä cagusa' nani cayäädx lo retrabajw xten Crist xcuent guidoo, nalajznu rebejn ni ahuililajz xtiidxni, ni najc si'c tiejxh Jesucrist. ²⁵ Ni'c nacä te bejn ni rusule' diidx nen guideoga. Dzuunga baniidx Dios gunä par xcäl'nasa'ctu te gusule'äpac guiragajc xtidx Dios, ²⁶ te gacbeenu rehxigabxhiga'tz nani najc xhiga'tz galododuxh niluxh naj abaluuini redidx-xhiga'tzre loj rexpejn. ²⁷ Lojreni bejn Dios xhigab guluiini reyäl'nasa'c xten yälrdimbicha' xten redidx-xhiga'tz ni cagusule'ni loj rebenzijt. Yälxhiga'tzre säloj Jesucrist rbäjz nen lastootu ni'c runlojtu chaläjztu lo yälrdimbicha' xten Dios.

²⁸ Rusule'nu diidx xcuent Jesucrist, ruliidxnu guiraa rebejn, guideb yäl'najn ruluiinu te guisa' yäl'najn xten guiraa rebejn xcuent Jesucrist che guidzujnreni nez loj Jesucrist. ²⁹ Xcuent dzuunre guideb xtipä runä dzuun con guiraa yälrnibee nani runiidx Jesucrist narä.

2

¹ Rlazä gacbeetu lacti cadedä trabajw xcuentu, näjza xcuent reni yu' guedx Laodicea, näjza xcuent guiraa reni gajd gumbee narä. ² Te tioob lastoo guiraatu sa'csi abidxagsa' lastootu lo yäl'sanälajz, näjza te ga'ptu guiraa reyäl'nasa'c ni rajp bejn che rachesa'creni xtidx Dios. Te gumbeezatu guiraa redidx-xhiga'tz xten Dios xtadnu näjza Dad Jesucrist. ³ Nen lastoo Dios näjza lastoo Jesucrist naga'tz guiraa reyäl'nasa'c xten guiraa reyäl'najn, guiraa yäl'numbee. ⁴ Dee rniä lojtu te di gusguee chu gusgueetu con rediidx-xhii. ⁵ Te palga ruti narä ro'c, canaj lazä la'tu, cabaa lazä cahuiä laaca cayujntu, sugatzu'tztu loj yälirililajz xten Jesucrist.

⁶ Ni'cni sigajc ni huililajztu xtidx Jesucrist, sigajcza colchasanäj Jesucrist. ⁷ Col'sudzu'tz lo Jesucrist si'c rsiobdzu'tz xlobaa te yajg. Col'sudzu'tz lo yälirililajz xten Jesucrist si'c ni abisieedu. Colguedduxhru xquixtios lo Dios.

Yäl'nabancoob ni rudeed Jesucrist

⁸ Col'huii, na'c gusaantu guxhiid bejn xcäl'irililajztu con xtiidxtisreni näjza rediidx nani xhet sajcdi, si'c najc xtidx reben galoo, näjza si'c najc diidx xcuent xhigab xten reben guedxliuj, di rediidxga gac si'cni rlanj Jesucrist.

⁹ Sa'csi guiralii ni najc Dios, lagajc ni'c najc Jesucrist, niluxh yu' tiejxh Jesucrist. ¹⁰ Xhet cayäädxd lo yäl'nabajn xten Dios ni rajptu sa'csi najctu tejsi con Jesucrist. Laani rnibee guiraa reyäl'guxhtis, guiraa reyälrnibee ni yu' guira lajt. ¹¹ Sa'csi huililajztu Jesucrist aguyu'tu bee, niluxh xhet beedi nani rusäl bejn con naareni, alga xpee Jesucrist, ni najc yäl'rusia xtojltu bejn sa'csi rusaan bejn redzunguijdx, rujnreni tejsi xhigab con Jesucrist. Si'c najc xpee Jesucrist. ¹² Cheni gurobnistu najcni si'cni agujttu ni'c biga'tztu con Jesucrist, najczani si'cni gubansactu con laani sa'csi huililajztu rajp Dios yälrnibee nani gulässac Jesucrist lo rebengut. ¹³ Che najctu si'c bengut lo dojl, näjza sa'csi di bee niu' tiejxhtu, dxejcli baniidx Dios yäl'nabajn par tejpas lojtu con Jesucrist,

badzucajni guiraa rextoj_lnu. ¹⁴Dios badzucaj guiraa releii nani basä_{uu} nuure nen_l dojl, badzucajnini lojni, sa'csi bacuaanini lo cru_{jz}, cadre gudijx Jesucrist guiralii rextoj_lnu. ¹⁵Cheni gujt Jesucrist lo cru_{jz} bejn_{ni} gaan loj reyäl_guxhtis näjza guiraa reyäl_rnibee xten be_{nd}xab näjza rexspritni. Basanxtujnireni nez loj guiraa rebejn. Laani bejn_{ni} gaanreni cheni cuajni lo cru_{jz}.

Colquiiil recos ni najc xten xhaguibaa

¹⁶Nicla tejt_u na'c cubee sa'ni xcuent reyäl_rrajw näjza reyäl_{rä}, niclaza xcuent redxe lanij näjza rexchej rebäicoob, näjza redxej ni rusilajz_{ni}. ¹⁷Guiraa redee najc si'csi te balaa xten nani churu jääd, te guluiireni ni rujn balaaga, nalajznu ni'c najc Jesucrist. ¹⁸Na'c gusaantu gudzucaj bejn_l xcäl_nasa'ctu te gunreni gactu nadolajz, te ga_{ntu} reangl. Sa' bejn_{ga} richu' loj nani gajdreni fii; rchaloreni najcreni be_nro xcuent lagajc xhigabreni. ¹⁹Laareni direni chanajl Jesucrist nani rnibee, nani rujn roobru tiejxh_{ni}, nalajznu rexpejn_{ni}, sa'csi lojni rca'reni ni rquii_n lastooreni, te ruchaagni sa' te_jgareni si'c nadxaquid bääl cuä' dzu_jt lo tiejxh bejn, te gacreni tejsi con Dios.

²⁰La'tu agujttu con Jesucrist, abiriitu lo re_xhigab xten guedxliujre. Naj xh_icuent guibajntu sigajctis nabaj_n rebejn nani di gumbee xtid_x Jesucrist, ä? xh_icuent rusoobtu rediid_x ni caj lo releii? Loj releii caj sa' diid_xre: ²¹“Di chahuallu dee, di gaulu ni'c, di ca_nlu dec.” ²²Luxh guiraa redee rnitloj che runnäjnini dzuun. Luxh guiraa sa' leiiga najc diidxtis nani ruluii bejn. ²³Guluiicani sa' releiiiga rien asdoo ruluiireni yäl_nanduxh, luxh che rusoob bejn releiiiga rchaloreni raj_nreni Dios, rchaloreni rac nadolajzreni, rusacsireni lagajc tiejxh_{reni}. Niluxh xlai'si rujnreni guiraa redzuunga, sa'csi sanuutis rujnreni si'ctisni rlajz tiejxh_{reni}.

3

¹Palga anabansactu con Jesucrist, colquiiil reyäl_nasa'c ni yu' xhaguibaa cadre sobga' Jesucrist xladbee Dios. ²Colyejn xhigab xcuenttis reyäl_nasa'c ni yu' xhaguibaa, na'c guntu xhigabtis xcuent reni yu' lo guedxliuj. ³La'tu anajctu si'c be_ngut loj reyäl_nasa'c ni yu' lo guedxliuj, luxh yäl_nabaj_n ni rajptu naj, yäl_nabaj_{nga} naga'tz con Dios xcuent Jesucrist. ⁴Che guluiilosac Jesucrist ni najc xcäl_nabajntu, dxejc näjza la'tu suluiilojtu con laani lo xcäl_rdimbicha'ni.

Yäl_nabanbiejw con yäl_nabancoob

⁵Colcuälaz redzunguijdx xten guedxliuj nani rujntu, yäl_rusguee gunaxteb, yäl_rujn recosdxuudx, recos ni rdxag_{lajz} tiejxhtu, re_xhigab-guijdx, yäl_rsiäb-lajz xhi xten bejn, guiraa redee rujn runij_t bejn lo Dios sigajc rujn bejn che raj_n bejn rebanäjb. ⁶Guiraa redzuunga rujn riäd xcäl_rdxe'ch Dios yejc renani rujn sa' redzuunga. ⁷Näjza la'tu bejntu sa' redzunguijdxga galoo cheni guyu'tu lo sa' yäl_nabaj_{nga}. ⁸Niluxh naj näjza la'tu colgusaan recosre; nalajznu yäl_rdxe'ch, yäl_rruche'ch sa'ni, yäl_rujn latzsiaj sa'ni, yäl_rniyaj sa'ni, näjza rediid_x-dxuudx ni rniitu. ⁹Na'c gusgueetu resa'tu, sa'csi nanab gusaantu nani bejntu cheni guyu'tu loj redzunguijdx. ¹⁰Colyajc te be_ncoob, ni guixeguixee cayanijru xcäriejn_{ni}, te gumbesa'ctu Dios, te gactu sigajc najc Dios ni benchee be_nguedxliuj. ¹¹Lo yäl_nabancoobre rutiru be_nzi_jt, niclaza xpe_n Israel, rutiza rebejn ni ru'bee, niclaza bejn ni di chu bee; rutiza be_nzi_jt, niclaza bejn ni siäd zitduxh; rutiza mos, niclaza bejn nani di chu lo bejn, sa'csi che rililajz te bejn xtid_x Jesucrist najcni tebloj con guiraa reni rililajz xtid_x Jesucrist; guiraareni najc xpejn Jesucrist.

¹²Naj agule Dios la'tu te gactu xpejn_{ni} nani gac naya, nani sanälajz_{ni}, colguibaj_n con yäl_rulaslajz, na'c guidxe'chtu, colyacnadoo con yäl_nadolajz, colniiza nadolajz. ¹³Colyujn huant, na'c guidxe'chtu loj sa'tu, palga yu' chu

sa'tu rdxe'ch loj sa'ni, colgusiäj-lajztu sigajcni basiäj-lajz Dad Jesucrist lojnu xcuent rextojlnu. ¹⁴ Che abejntu guiraa recosre, colguilru yälsanälajz nani rusa' loj guiraa recosre. ¹⁵ Xcälrbexilajz Dios guinibee neñ lastootu, sa'csi parpac ni'c gurejdxni la'tu, te gaczatu tejsi con rexpejn Jesucrist. Colgudeed xquixtios loj Dios.

¹⁶ Xtidx Jesucrist chuduxh neñ lastootu con guiraa yälnejn, te guluiitu, te gulijdxte tejga resa'tu con redij nani gulä'p toDavid xpala'n Dios, näjza redij nani roltu, näjza redij nani rliä'p xpala'n Dios. Redijga golnu te guideednu xquixtios lo Dios neñ lastoonu. ¹⁷ Guira'ti nani guntu, sigajc rediidx ni rniitu, sigajcza redzuun ni rujntu, colyejn guiraani con laj Dad Jesucrist, coldeed xquixtios lo Dios xtadnu con laj Jesucrist.

Xho nanab guibajn te famil ni najc xpejn Jesucrist

¹⁸ Regunaa nani abachnaa, colgusoob xtidx chäältu sa'csi si'c rlanj Dad Jesucrist. ¹⁹ Reniguii nani abachnaa, colchanälajz chäältu, na'c guidxechnäjtureni. ²⁰ Reni najc biuux, colgusoob xtidx xtadtu loj guira'ti, sa'csi si'c rchagljaz Dad Jesucrist. ²¹ Reni najc Dad, na'c guche'chtu rexi'ntu, didi gac-huin lajzreni. ²² Reni najc mos, colgucuaadijg xtidx xlamtu lo guedxliujre loj guira'ti xtzuunni. Na'c gunsa'ctu dzuun che cahuiitisreni si'c rujn renani ruspaa lajz bejntis. Con yälndolajz colyejn dzuun sa'csi sanälajztu Dios. ²³ Guira'ti nani guntu, colyejnmi guideb lastootu si'c xtzuun Dios, et si'c xtzuundi rebejntis. ²⁴ Anajntu lo Dad Jesucrist sica'tu yäl'nasa'c ni najc yäl'nabajn par tejpas, sa'csi loj Dad Jesucrist rujntu dzuun. ²⁵ Niluxh nani rujn recosguijdx, lagajc xcuent recosguijdxga gudeed Dios lojni, sa'csi tebloj rujn Dios guiraa rebejnguijdx.

4

¹ Renani najc lam, coldeed loj rexmostu nani riäj xca'reni sa'csi anantu näjza la'tu rajptu xlamtu xhaguibaa.

² Colchanuu colnab lo Dios, colsusin che rniabtu lo Dios. Colgudeed xquixtios lo Dios. ³ Colnabza lo Dios con nuure te gacnäj Dios narä gusule'ä xtidx Jesucrist, te gusule'ä redidx-xhiga'tz xten Crist. Xcuent ni'cza yu'ä neñ latzguiib. ⁴ Colnab lo Dios te guyasi gusule'ä rediidxga si'cni riäj guiniä.

⁵ Colguibanšin loj rebejn nani di gumbee xtidx Jesucrist, colgusule' diidx cheni riäj guiniitu lojreni. ⁶ Rextiidxtu nanab gacni si'c rchagljaz Dios, saruduxhza gac xtiidxtu te gacheetu xho riäj gudzu'tu diidx loj tejegareni.

Lult xtixtios

⁷ Tiquico, bejtznu ni sanälajznu, ni runsa'c dzuun, ni najc xmos Dad Jesucrist, laani gusule'ni diidx lojtu xcuent guiraa rextzunä. ⁸ Ruxhaläni lojtu te gacheepactu xho yu'ä, te guspaani lajztu. ⁹ Laani jiädnäzani Onésimo nani najc te betznu ni sanälajznu. Laani najc tej resa'tu. Laareni gusule'zareni guira'ti nani cadeednu ree.

¹⁰ Aristarco, nani yunäj narä neñ latzguiib, ruxhalni xtixtios lojtu näjza Marcw, betz prim xten Bernabé (abacuaä lojtu xcuentni, xho guntu, palga jiädhuiini la'tu, sacru colhuiini). ¹¹ Näjza Jesús nani laaza Justo, ruxhal xtixtios lojtu. Laatisreni najc rexpejn Israel nani cayacnäj loj dzuun xten xcälrnibee Dios. Laareni ruspaa lazä. ¹² Epafras, ni najc te sa'tu, ruxhal xtixtios lojtu, luxh rniabduxhni xcuenttu lo Dios te sudzu'tztu guntu guiragajc ni rlanj Dios guntu. ¹³ Narä rniliä xho rdzuun Epafras xcuent la'tu, näjza xcuent rebejn ni yu' guedx Laodicea, näjza guedx Hierápolis. ¹⁴ Lucas, doctoor ni sanälajznu, näjza Demas ruxhalzareni xtixtios lojtu.

¹⁵ Coldeed xtixtios loj rebejtznu nani yu' guedx Laodicea, näjza loj Ninfas, näjza lo rebejn nani re' rolijzni. ¹⁶ Cheni agulujx bilu guijtzre, colguxhalni te

jielni nen guidoo xten guedx Laodicea, dxejcti colyelza guijtznani baxhalä lo reben guedx Laodicea. ¹⁷ Colye'tz loj Arquipo: “Bahuisa'c xtzuum Dad Jesucrist nani cua'lu lojni. Bensa'c dzuunga.”

¹⁸ Lagajc narä Pabl rucuaä xtixtiosre con lagajc naä, con lagajc xleträ. Colgusnaj-lajztu narä yu'ä latzguiib. Gacnäj Dios la'tu. Sugacni si'c.

Guijtz Ganid Lo Rebeņ Tesalónica

Bacuaa Pabl con reexamigwni lo guidoo guedx Tesalónica

¹ Narä, Pabl, näjza Silvan, näjza Timoteu cacuaanu guiitzre lojtu, resa'nu ni yu' guidoo lo guedx Tesalónica, reni yu' lo Dios Xtradnu näjza lo Dad Jesucrist. Guspaa Dios näjza Jesucrist lajztu, guscuedxizareni lajztu.

Xho huililajz beņ Tesalónica xtidx Dios

² Guet-guejt rdeednu xquixtios lo Dios xcuent guiraatu, rnaduxhza laaznu la'tu cheni rbejdx rniabnu lo Dios. ³ Ruzä'tnu lo Dios xtradnu xho rujntu dzuun sa'csi rililajztu xtidx Dios; näjza xho runduxhtu dzuun te racnäjtü sa'tu ni xhet rajpdi sa'csi rinälajztu Dios; näjza xho rutip lajztu cabäjztu guibi' Dad Jesucrist lo guedxliuj. ⁴ Bejtznu, racbeenu sanälajz Dios la'tu, laani aguleni la'tu. ⁵ Sa'csi che basule'nu xtidx Dios lojtu, et ganax diidxtis gujcn, niluxh xcälrnibee Sprit Dxan xten Dios neņ lastootu bejn gucbeepactu diidx ni najc didxlii. Nanchesactü xho gujcnu che guyu'nu lojtu. Si'c baluiinu la'tu te guibaṅsa'ctu.

⁶ Sigajcni nabañnäjnu Dad Jesucrist sigajcza gusloj cua'tu xmoodnu, basobzatu diidx guideb xcälrbalajz Sprit Dxan xten Dios ni baniidxni lojtu, mase gudejdtu trabajw. ⁷ Si'c gujcn te baluiitu loj guiraa reni rililajz nez Macedonia näjza nez Acaya xho nungäjł gac. ⁸ Ni'c abire'ch xtidx Dios, xhet nejzdi Macedonia näjza Acayatis, bire'chza diidx guira nejz. Ro'c najnreni xho sanälajztu Dios, ni'c xhetru nanabti guiniinu lojreni. ⁹ Alga lagajc laareni rujyreni diidx xho guyu'nu lojtu; nägajcza xho basaantu gojntu rebanäj b te rajntu Dios ni nabajnpac ni najc guliipac. ¹⁰ Rujyzareni diidx xho cabäjzzatu guibisac Jesucrist lo guedxliuj. Laazani najc Xi'n Dios ni guläs Dios lo rebeņgut, Jesucrist ni rusłaa nuurnu lo xcälrdxe'ch Dios ni churu siäd.

2

Xhi bejn Pabl neņ guedx Tesalónica

¹ Naj lagajc la'tu najntu, bejtznu, et xlia'di bio'pnu lojtu. ² Et najntu xho gudéreni loonu, basacsíreni nuurnu guedx Filipos. Niluxh mase gudejdtu trabajw, gusutijpnu lo Dios, xhet bidxejbtinu basule'nu xtidx Dios lojtu, mase gudejdtu trabajwduxh. ³ Sa'csi dinu nulijdx la'tu con didx-xhii, niclaza didx-dxuudx, niclaza diidx ni rusguee. ⁴ Sa'csi rsoobnu xtidx Dios basannäjni nuurnu xtiidxni, ni'c rusule'nu xtidx Dios. Dinu guinii diidx te jiansa'cnu lo bejn, rniinu diidx te jiansa'cnu lo Dios ni ruhuii lastoonu. ⁵ Anajntu xho basule'nu xtidx Dios. Nicla tej dinu ninii xhi stee diidx ni xhet sajcdi lojtu. Dizanu nusule' xtidx Dios te xhiga'tz niennu gaan xhi nica'nu. Dios nanchee xcuent ni riennu. ⁶ Dizanu nidiil guiliä'p bejn xpala'nnu, niclaza la'tu, niclaza chu stee bejn, mase nungäjł niennu niacbeetu rajpnu yälrnibee sa'csi baxhał Jesucrist nuurnu. ⁷ Niluxh guc nadolajznu che guyu'nu lojtu, cuanäjnu la'tu si'c rcanäj te naņ rexpäzni. ⁸ Sa'csi huinälazduxhnu la'tu, biennu xhigab xhet ganaxdi xtidx Dios guiniidxnu lojtu, näjza lagajc xaimnu guniidxnu te guseednu la'tu xtidx Dios sa'csi sanälazduxhnu la'tu. ⁹ Bejtznu, la'tu rnalajztu xho biennu dzuun te biennu gaan xcäl'nabaannu. Biennu dzuun dxej-yääl, te di niednäjtü nuurnu lał ni basule'nu xtidx Dios lojtu.

¹⁰ Lagajc la'tu nancheetu, sigajc nanchee Dios, laaca biennu che guyu'nu lojtu: gujcnu bejn ni rañduxh Dios, gujcnu beñdxojn, gujcnu beṅsa'c. ¹¹ Anajntu

xho baliidxnu la'tu, xho bascuecdxinu lajztu si'c runnäj te dad rexingaanni. ¹² Guiraa dee biennu, te guibansa'ctu si'c nungäjl gun reni najc xi'n Dios, lagajc Dios ni gurejdx la'tu te chunäjtuni lo xcäl'rnibeeni näjza lo xcäl'rdimbicha'ni.

¹³ Ni'cni rdedduxhnu xquixtios lo Dios sa'csi che biejn diajgtu xtidx Dios ni basule'nu lojtu, cua'tuni si'c xtidx Dios xhet si'c xtiidxdi beñ guedxliuj. Niluxh gulii xtidx Diosni, sa'csi rusiani lastoo renani rililajz. ¹⁴ Bejznu, dxejcti bejntu lagajc si'c rujn rebejn xquidoo Dios neñ reguedx Judea reni najc xpen Jesucrist; luxh gusajctu lagajc ni gusajcreni, basacsí reben lajdxtu la'tu. Sigajcza birinajl rexpē Israelreni. ¹⁵ Rexpē Israel bagu't Dad Jesucrist, si'cza bagu'treni lagajc rexprofe'treni, renani bacuaa xtidx Dios, barilaagwzarenu nuurnu. Direni chanälajz Dios, dizarenu gusaan chanajl rebejn Jesucrist. ¹⁶ Che rlanjnu gulijdxnu reni digac rexpē Israel, te näjza laareni laareni lo dojl, direni gusaan, si'ctis cagutajlreni xtojlni. Niluxh naj abiaädpac yäl'rdxe'ch xten Dios vejcreni.

Rlanj Pabl nihuisacni ro'c

¹⁷ Bejznu, mase biriinu ro'c, naj dirunu guihuii lojtu, rnalazduxhnu la'tu, batijp lajznu jio'pnu ro'c, rlazduxhnu fisacnu lojtu. ¹⁸ Rlanjnu nio'pnu, narä, Pabl xhidal huält rlazä niälä, niluxh beñdxab di nusaan. ¹⁹ ¿Xhini'c najc xcäl'rbääznu, xcäl'rbalajznu, xcäl'racnaronu? Lagajc la'tu gactuni che suunu nez loj Jesucrist che jädsac Dad Jesucrist. ²⁰ La'tu najc ni ruspaa lajznu ni rliä'pza xpala'nnu nez lo Dios.

3

¹ Dxejc, che dirunu nutijp lajznu, biennu xhigab bianxtebä guedx Atenas. ² Dxejc baxhalä Timoteu, bejznu nez loj Jesucrist, te biädhuiini la'tu, sa'csi laani najcni te xpen Dios ni runnäj nuurnu dzuun, rniini xtidx Jesucrist, te guscuecdxini lajztu, guzudzu'tzni xcäl'rililajztu. ³ Te nicla tejtu di guidxejb che jääd reyälhuin sa'csi la'tu anajntu agule Dios nuurnu ni'c sidejdnu trabajw. ⁴ Cheni yusijcnu lojtu, rnixgaanu lojtu sidejdnu trabajw; niluxh si'cni agusojb diidxga naj. ⁵ Ni'cni diruna nutiplazä, baxhalä chu jädnä diidx xho najc xcäl'rililajztu, sa'csi cadxebä andi abasguee beñdxab la'tu, luxh xlia'si biennu dzuun guyu'nu lojtu.

⁶ Naj agubi' Timoteu, biädhuiini la'tu. Biadnäni ganax didxlii xho sanuu rililajztu xtidx Jesucrist, xho rinälajztuni, näjza sanuutis rnalajztu nuurnu, rlanjzatu fiitu loonu, sigajcza nuurnu rlanjznu fiinu lojtu. ⁷ Ni'cni, betznu, masä riäädx xhixtenu, masä rdeednu trabajw, rbalajznu sa'csi la'tu sanuutis rililajztu xtidx Dios. ⁸ Naj laaca rdxunnu sa'csi racbeenu sudzu'tztu nez loj xtidx Dad Jesucrist. ⁹ Xhocha gac guideednu xquixtios lo Dios xcuent guiraa näj xcuent yäl'rbalajz ni yu' lastoonu xcuent la'tu nez lo Dios. ¹⁰ Dxejyäl rniabnu lo Dios gusaanni jiophuiinu la'tu te gusa'nu guiraa rediidx ni cayäädx gacheetu xcuent xcäl'rililajztu.

¹¹ Rniabnu lo Xtradnu Dios, näjza lo Dad Jesucrist, gacnäjreni nuurnu te gac jiophuiinu la'tu. ¹² Rniabzanu lo Dad Jesucrist, gunni gustiobruni lastootu te ga'prutu yäl'rinälajz loj resa'tu näjza loj guiraa rebejn, si'cni rinälajznu la'tu, ¹³ te gunni sudzu'tz lastootu, na'c ga'ptu dojl nez lo Xtradnu Dios, che jääd Jesucrist näjza guiraa rexpejn ni xhaguibaali.

4

Guibajnu si'c rchaglajz Dios

¹ Naj, rebejtznu, rniabduxhnu lojtu, ruliidxnu la'tu con laj Dad Jesucrist, guibajntu si'cni baluiinu la'tu nungäj̄l guibajntu te guspaatu lajz Dios, te si'c chanuutis guibaṅsa'ctu nez lo Dios.

² La'tu, anajntu rediidx ni baluiinu lojtu con xcäl̄rnibee Dad Jesucrist. ³ Lagajc Dios rlajz nayatis guibaṅsa'ctu, na'c gun niguii dojl̄ guesnäj̄ gunaa ni di gac chääl̄ni, sigajcza na'c guesnäj̄ gunaa niguii ni di gac chääl̄ni. ⁴ Tejgatu gantu xho guibaṅnäj̄tu chääl̄tu nayatis näj̄za xpala'nni. ⁵ Xhet si'c ni rujndi regunadxab näj̄za reniguii, nicla si'c ni rujn rebejn̄ ni di gumbee Dios. ⁶ Rut chutejditu gusguee bejtzni lo redzunguijdxre, sa'csi Dios susacsi guiraa rebejn̄ ni rujnza redojl̄re, ni'cni abiniinu lojtu, agunixgaanu diidxre lojtu. ⁷ Sa'csi Dios gurejdxni nuurnu te guibajntu lo yäl̄nabaṅnaya xtenni, xhet lo yäl̄nabaṅdxuudxdi. ⁸ Ni'cni bejn̄ ni di gucua diajg rediidxre, dini gac xtiidx te bejn̄ ni dini cuadiajg, xtiidxpac Dios ni dini cuadiajg, Dios nani abaniidx Sprit Dxan xtenni loonu.

⁹ Ditu guiquiin gucuaäru diidx xho chanälajztu resa'tu, sa'csi lagajc Dios abaluiitu xho chanälajztu resa'tu. ¹⁰ Luxh rinälajztu guiraa reni rililajz, guiraa reni siäd̄ guideb nez Macedonia. Ni'cni rniabnu lojtu bejtznu, chä'pru xcäl̄rinälajztu. ¹¹ Colgutijp lajztu, dxitis col̄guibaj̄n, col̄jiu xtzunucatu, lagajc naatu col̄yejn̄ dzuun si'cni agunibeenu guntu. ¹² Te fii rebejn̄ ni di chalilajz laaca nabaṅsa'ctu, näj̄gajcza te xhet jiäd̄dxdi xhi rquiintu.

Xho gac che jiädsac Jesucrist lo guedxliuj

¹³ Bejtznu, rlajznu gacbeetu xcuent rebengut te di gac-huin lajztu si'c rujn rebejn̄ ni di chalilajz xtidx Dios. ¹⁴ Si'c ni rililajznu gujt Jesucrist, dxejc gubaṅsacni, sigajcza rililajznu suspaṅsac Dios guiraa reni nagayejs nen̄ baa, renani huililajz xtidx Jesucrist. Luxh che guibi' Jesucrist, siäd̄nänireni.

¹⁵ Xcuent xcäl̄rnibee Jesucrist rniä lojtu, nuurnu ni nabajntu che jiädsac Jesucrist, dinu nid loj reni nagayejs nen̄ baa. ¹⁶ Sa'csi lagajc Dad Jesucrist siäjt lo guedxliujre, sivedxa'ni, siejnza xse' guixhajg ni rnibee, sivedxa'za trompet xten Dios. Dxejc sibaṅxga reni nagayejs nen̄ baa, reni huililajz xtidx Crist. ¹⁷ Dxejc nuure ni nabaṅsijcnu sidxaagnureni nen̄ rebäj̄ te lo bej chachagloonu Dad. Si'c chonnu cholaznäj̄nuni par tejpas. ¹⁸ Ni'cni rniä lojtu, col̄cuedxilajz sa'tu con rediidxre.

5

¹ Niluxh xcuent redxejga, reijzga, xhet riquiinditu gucuaäni lojtu, ² sa'csi la'tu anansa'ctu sidzuj̄n dxej ni jiäd̄ Jesucrist cheni rut cayunlojdini, sigajc che riäd̄ te gubaan yääl. ³ Che canii bejn̄: “laaca dxunnu, dxunsa'cnu”, chela gacbeereni acadiejdreni trabajw si'c che rdzuj̄n yäl̄nayan te gunaa che rajl xi'nni, luxh digacdi guxun̄reni lojni. ⁴ Niluxh bejtznu, di gac nayääl̄tu te di che xhet cayunlojditu dxej xten Jesucrist, guidzun̄xhiga'tz dxejga si'c gubaan. ⁵ Sa'csi guiraatu najctu beṅsa'c nabajntu lo bianij, lo rdxee, dinu gac beṅguijdx, dinu guibaj̄n lo yääl, lo yäl̄rcäj̄y. ⁶ Ni'cni di nungäj̄l guidiesnu si'c rejs stecuaa bejn̄, ni'cni nungäj̄l sunasinnu na'cza jiennu redojl̄ ni rlajz tiejxhnu. ⁷ Reni rejs, rejsreni yääl, reni rsiojz, rsiojzreni yääl. ⁸ Niluxh nuure nabajntu lo rdxee, ni'cni nanab na'c jiennu si'c, riäj̄l xca'nu yäl̄rililajz näj̄za yäl̄rinälajz si'c rca' soldaad gamangw guuib ni rajcwni, ni rusäuu lastooni. Riäj̄lza guiläzdzu'tznu sa'csi yäl̄rusläa lo dojl̄ najc si'c xhumbrel-guib ni ru' yejc soldaad ni rusäuu yejcn̄i. ⁹ Sa'csi di Dios nibe nuurnu te chonnu gabijl, alga guleni nuurnu te xca'nu yäl̄nabaj̄n ni rudeed xi'nni, Jesucrist. ¹⁰ Sa'csi gujt Jesucrist lacuaa nuurnu, te guibaṅnäj̄nuni masä nabajntu lo guedxliujre o

nagayejsnu neñ baa che guibi'ni. ¹¹ Ni'cni, colguspaa lajz sa'tu, tejtú sigajcza steetu, sigajcni cayujntu ñaj.

Rulijdx Pabl resa'ni

¹² Bejtznu, rniabduxhnu lojtu, colhuiduxh reni ruluii xtidx Dios lojtu, sa'csi agule'c Dadreni te guinibeereni, te gulijdxreni la'tu. ¹³ Riäjłza chanälazduxhtureni xcuent dzuun ni rujnreni. Colcuedxi con resa'tu.

¹⁴ Rulijdxnu la'tu, bejtznu, colgulijdx reni najc benlatsiaj; colsudzu'tz lajz reni guxii rbalajz lo xnez Dios; colgacnäj reni di gumbesa'c xtidx Dios, colcuedcxi lajz guiraasi bejñ.

¹⁵ Colhuii di chu tejtú gunza dolguijdx lo rebejñ ni rujn dolguijdx. Laaca guntu ganax dzunsa'c lo sa'tu, sigajcza lo chutis bejñ.

¹⁶ Colguibalajztis guideb nabajntu. ¹⁷ Na'c cuääz guiniitu lo Dios. ¹⁸ Mase xhitis rsiajctu, coldeed xquixtios lo Dios, sa'csi si'c rlajz Dios gun reni rililajz Jesucrist.

¹⁹ Di cuälaztu xtidx Sprit Dxi xten Dios ni rniini neñ lastootu. ²⁰ Na'c cuälaztu xtidx reni rni xtidx Dios xcuent nani churu gac. ²¹ Colquiil guiraa rediidx, coljiannäjti rediidx ni najc didxsa'c. ²² Colbicaj lo guiralii dolguijdx.

²³ Lagajc Dios, Dios ni rbecdxi lajztu, gusiapac lastootu, te cucheeni xaimtu, näj lastootu, näjza tiejxhtu, te na'c guntu dojl ni di riäjł guntu te cuääztu dxej ni guibisac Dad Jesucrist. ²⁴ Dad ni gurejdx la'tu rujnza guiraa ni rniini, ni'c sujnzani guiraa redzuunre.

Ruzadiidxnireni

²⁵ Bejtznu, colñab lo Dios xcuent nuurnu.

²⁶ Colgudeed xtixtios lo rebejtznu ni yu' ro'c.

²⁷ Con laj Dad Jesucrist rnibeä, gołtu guiitzre loj guiraa rebejtznu.

²⁸ Gacnäj Dad Jesucrist la'tu. Sugacni si'c.

Guijtz Ni Rojp Lo Reben Tesalónica

Rucuaanu guiitzre lojtu, rexpén Jesucrist ni rbäjz guedx Tesalónica

¹ Narä Pabl, näjza Silvan näjza Timoteu, cacuaanu guiitzre lojtu, rebejtzn ni yu' guidoo lo guedx Tesalónica, reni yu' lo Dios Xtdnu näjza lo Dad Jesucrist. ² Gacnäj Dios Xtdnu näj Dad Jesucrist la'tu, guscuecdxizareni lajztu.

Gun Dios yälguxhtis loj rebendoj che guibi' Jesucrist lo guedxliuj

³ Bejtzn, rudeednu xquixtios lo Dios xcuenttu, si'c riäjł jiennuni, sa'csi xcälřililajztu siädroobru, näjza yälřinälajz ni rajp tejgatu näjza sa'tu siädroobruni. ⁴ Ni'cni rliä'pnu xpala'ntu neñ reguidoo xten Dios. Rbaa lajznu sa'csi rsiudzu'tztu sanuutis rililajztu xtidx Dios mase rdejdtu trabajw, rusacsı bejntu. ⁵ Dee ruluiipac xcälřguxhtis Dios najc laaca, ni'c rnii Dios riäjł jiu'tu lo xcälřnibeeni sa'csi cadejdtu trabajw xcuent yälřnibeega.

⁶ Sa'csi rujn Dios xhigab riäjłza quix reni bateedtu trabajw xtojłreni, ni'c suteedzani reni'c trabajw. ⁷ Niluxh la'tu ni cadejdtu trabajw, sujn Dios gusilaznäjtu nuure che guluiiloj Jesucrist, siriini xhaguibaa siädñäjni rexanglni ni sajc, ni rnibeduxh. ⁸ Lo te balduxh siädñi, dxejc guisloj susacsıduxhni reni di gan Dios, dizareni gusoob xtidx Dad Jesucrist nani rudzucaj dojl. ⁹ Guiraareni sidejdreni trabajw, par tejpas agunijtreni, zijt chureni lo Dios, lo yälřdimbicha' xten xcälřnibeeni. ¹⁰ Che jiäd Dad guiriini xhaguibaa, dxejga siliä'p rexpejñni xpala'nni, sidxelojza renani huililajz laani näjza la'tu, sa'csi huililajztu diidx ni basule'nu che guyu'nu lojtu.

¹¹ Ni'c rniabtisnu lo Dios por la'tu, rniabnu lo Dios guinaj lajzni nabajntu si'c riäjł guibajñ reni guleni. Rniabzanu guniidx Dios lojtu guntu guiraa redzunsac'c ni rchaglajz Dios guntu, gacnäjzani la'tu con xcälřnibeeni te guntu redzuun ni rujntu sa'csi rililajztu. ¹² Te chä'p xpala'n laj Dad Jesucrist si'cni nabajntu, te laani guiliä'pzani xpala'ntu, xcuent yälřinälajz xten Dios näjza Dad Jesucrist.

2

Benđolduxh

¹ Naj, rniabduxhnu lojtu bejtznu, xcuent dxej ni jiäd Jesucrist, dxej ni guidojpzanu lojni, ² na'c chugajtu yarsia'. Na'cza gusaantu guchejbreni la'tu con diidx ni ruluii te bejñ ni najc profet, nicla con diidx ni rnii stee bejñ lojtu, niclaza con diidx ni naareni lojtu caj loj te guiitz ni naareni baxhałnu lojtu, cadre caj "dxej ni guibi' Jesucrist abidzujñ". ³ Na'c gusaantu gusguee bejñ la'tu xcuent rediidxre. Che gajd dxejga guidzujñ, su' bejñ ni sibälaz xtidx Dios, dxejc suluiloj beñlatsiaduxh, xi'n nani sinitloj par tejpas. ⁴ Bejñre siliä'p lagajc xpala'nni, sidxe'chni lo guiraa ni sanä laj Dios, näjza xhitis ni rajñ bejñ, te cueni neñ xquidoo Dios, guluiilojni si'c lagajc Gueb Dios.

⁵ ¿La di lajztu guisaj cheni guyusicä lojtu, rniä rediidxre lojtu, ä? ⁶ Naj la'tu anajntu xhini'c ruscuääzni, te na'c guiricajni ansde guisa' redxej xtenni. ⁷ Te yälřhiga'tz najc dzunlatsiaj ni alacayajc lo guedxliuj, cayäädxtis guibicaj nani caguscuääzni galäiini. ⁸ Dxejc suluiloj beñlatsiaduxhre. Niluxh Dad Jesucrist, sugu'tnini con bero'ni, che guibi' Jesucrist lo guedxliuj xpianijni sujn nitlojni. ⁹ Beñlatsiaduxhre najc si'cpac najc beñdxab. Che guidzujñni, guidzujñni si'c te bejñ nani rnibee, sujñni seen, sujñzani milagrw ni rusguee.

¹⁰ Con xcällatsiaj bejnre susgueeni guiraa renani alagunijt lo Dios sa'csi direni nicäjb ninälajzreni didxlii ni nuslaareni nen dojl. ¹¹ Ni'cni susaan Dios jääd te yälrusgueduxh te chalilajzreni didx-xhii. ¹² Te gabijl jii guiraa renani di nicäjb nililajz didxlii, alga bidxagljazreni yällatsiaj.

Reni gule Dios guirii nen dojl

¹³ Niluxh nuurnu riäjł gudeedtisnu xquixhtios lo Dios por la'tu, bejtznu, ni sanälajz Dad Jesucrist. Rudeednu xquixhtios sa'csi galooli gule Dios la'tu te guslaani la'tu lo dojl, xcuent Xsprit Dxanni ni rusia lastootu, näjza redidxlii ni huililajztu. ¹⁴ Ni'cni che biejn diajgtu diidx ni basule'nu lojtu, gurejdx Dios la'tu, te xca'zatu xcälrdimbicha' Jesucrist.

¹⁵ Naj bejtznu, colchanuu, colsudzu'tz, na'cza jäällajztu rediidx ni balijdxnu la'tu che guyu'nu ro'c, näjza rediidx ni bacuaanu lo guijt ni baxhalnu lojtu. ¹⁶ Lagajc Dad Jesucrist, näj Dios Xtadnu, ni sanälajz nuurnu, ni ruscäjn lajznu par tejpas, ni baniidx xcälrbääznu racnäjni nuunu, ¹⁷ guspaani lajztu, gusudzu'tzni la'tu lo guiraa redidxsa'c ni guiniitu näjza redzuunsa'c ni guntu.

3

Colnab lo Dios xcuent nuurnu

¹ Bejtznu, colnab lo Dios xcuent nuurnu te chanuu guire'ch xtidx Dad Jesucrist, te che gusoob bejn diidxga chä'p xpala'n diidxga, sigajcni gujcní con la'tu. ² Colnabza lo Dios xcanäjni nuurnu te di tednu ladznaa rebenlatsiaj, rebenguijdx, sa'csi xhet guiraadi bejn rajp yälirilajz. ³ Dios rusooob xtiidxni, susudzu'tzni la'tu, sacnäjzani la'tu te di sactu dolguijdx. ⁴ Abascuedxi Dios lastoonu xcuenttu sa'csi anancheenu cayujntu guira'ti nani gunibeenu guntu, luxh si'cza sinuu gusoobtu xtiidxnu. ⁵ Canabä lo Dad Jesucrist guniidxni gacheerutu xcälsanälajz Dios, canabäza colcuedcxi lajztu si'cni bejn Crist che gudejdní trabajw.

Nanab jiennu dzuun

⁶ Bejtznu, con laj Xtad Jesucristnu, rnibeenu guibicajtu lo chutis te sa'nu ni ricanzajtis, ni di rlajz gunni dzuun. Guibicajzatu loj reni di guibajñ si'cni baluiinu riäjł guibajñtu. ⁷ La'tu anajntu xho riäjł guibajñtu, chanuutu guntu si'cni riennu nuure. Najntu nuurnu dinu nicanzaj che guyu'nu lojtu sa'csi biennu dzuun. ⁸ Dizanu nidauxlia' xcu'n chu tejtú; guiraani bidiixnu, biennu dzuun dxej-yääl, te di nutaalnu xtzuum chu tejtú. ⁹ Masä nungäjł niniabnu niacnäjtu nuurnu, dinu niniabni; alga biennu dzuun te baluiinu xho chanuutu. ¹⁰ Cheni guyu'nu lojtu, gunibeenu scree guntu: Chutis ni di rlajz gun dzuun di riäjł xca'ni xhi gauni. ¹¹ Aguniireni loonu baltitu ricanzajtis, direni gun dzuun, alga rihuiireni xhi cayujñ rebejn. ¹² Rulijdxnu rebejnre, rnibeenureni con laj Xtad Jesucristnu: colcuedcxi, colyejn dzuun te gautu.

¹³ Bejtznu, na'c guidxajgtu guntu dzunsa'c. ¹⁴ Palga yu' chu tejtú di gucuadiajg xtiidxnu ni caj lo guijtze, colhuui chuni'cni te na'c guchaagtuni, te guitujyni. ¹⁵ Niluxh na'c ga'ptuni si'c ni rdxe'ch lojtu, colguliidxni si'c bejtztu.

Rusadiidxnireni

¹⁶ Gueb Dios xten yälrbexi, guscuedcxi lajztu guixe-guixee, masä xhitis sajctú. Jiannäj Dad Jesucrist guiraatu.

¹⁷ Narä, Pabl cacuaä xtixtiosre con naäpac si'c runä lo guiraa rexquitzä, scree rucuaä. ¹⁸ Gacnäj Xtad Jesucrist guiragajctú. Sugacni si'c.

Guijtz Ganid Lo Timoteu

Pabl rucuaa te guijtz lo Timoteu

¹ Narä Pabl, nacä te apost xten Jesucrist, rucuaä guijtzre lojlu. Nacä apost sa'csi si'c gunibee Dios ni ruslaa nuurnu lo dojl näjza Dad Jesucrist nani cholääznu. ² Timoteu, luj najclu si'cpac xinganä lo yärlililajz. Xtdnu Dios näjza Xtd Jesucristnu gacnäjl, gulaslajzreni luj, guscuecdxireni lastoolu.

Pabl rulijdx xcuent reni ruluu diidx-xhii

³ Che sia'ä reguedx Macedonia, gunibeä jia'nlu guedx Éfeso te gulijdxlu gaii bejn te na'c guluiireni garenca diidx, ⁴ te na'c jiutejreni rexcuent reben_{ti}emp, te na'cza jiuduxhreni chu gujc rexpengoldooreni, sa'csi di rediidxre gacnä j guiroobru lastooreni si'c rustioob yärlililajz lastoonu. Naj rnibeä si'c chanuu gulijdxlu rebejn.

⁵ Rulijdxnu bejn te ga'preni yälrinäajz sa'reni. Ganid nanab gacnaya lastooreni, nanab ga'preni xhigabsa'c, nanabza chalilajzpacreni. ⁶ Yu'reni abaro'n rediidxre, riejtis ro'reni saniduxhreni diidx ni xhet sajcdi. ⁷ Rlajzreni gacreni bejn ni najn leii, niluxh niclaza laareni direni gacbee xhi säloj ni rniireni, niclaza xhi säloj rediidx ni ruluireni, räjpreni, 'didxliipac dee'.

⁸ Anajnnu leii xten Dios najc sacduxhni, palga jiennu si'cni rniipacni. ⁹ Najnnu di leii gac par be_nsa'c, najcni par reni najc be_nlatsiaj ni di jiu leii xten Dios, näjza reni di gusoob diidx; par reben_{ti} guiidx, näjza reben_{ti}dojl; par reni di jiu Dios, näjza reni rusguee; par reni rugu't xtdni, xnanni, näjza guiraa reni rugu't bejn; ¹⁰ par reni resnä j te gunaa ni digac chäälreni, näjza reni resnä j lagajc saniguiireni; par reni rbajn bejn; reni rnii didx-xhii; reni rnii didx-xhii si'c didxle' parsi rusguee sa'reni; näjza bejn ni rujn xhitis xhi xtee dzuun ni digac dzunsa'c, ¹¹ nalajznu sa' redzunsa'c ni rulijdx xtidx Dios-le', diidx ni ruslaa lo dojl. Narä biannä diidxre.

Rudeedni xquixtios lo Dios sa'csi rulaslajznini

¹² Rdedä xquixtios lo Dad Jesucrist ni runiidx yälrnibee narä sa'csi najnni nasobdidxä, ni'cni guleni narä gunä xtzuunni. ¹³ Luxh galoo guniyaäni, birinalä xpejn_{ni}, basacsä'reni. Niluxh Dios balaslajz narä, sa'csi dina niacheä xhini'c cayunä, sa'csi gajdna chalilazä. ¹⁴ Niluxh lacti guroob gujc yälracnä j xte Xtdnu, guideb yärlililajz, nä j yälsanälajz ni rajp Jesucrist.

¹⁵ Diidxre najc guliduxh, nanab chalilajzpac_{tuni}: Jesucrist biääd lo guedxliujre te guslaani reben_{ti} dojl; lo reben_{ti} dojl narä nacäru be_ndo_lduxh. ¹⁶ Ni'cni balaslajz Dios narä, mase nacä be_ndo_lduxh lo guiraareni, te ganid con narä guluiini xho rbä jz Jesucrist te chalilajz bejn xtiid_{xni}, te filoj reni churu chalilajz xtiid_{xni} te ga'preni yälnabajn par tejpas. ¹⁷ Dios najc reii, reii ni di guet, reii ni di guzen, laatisni najc Gueb Dios ni nanduxh, ni'cni colguiliä'p xpala'nni, colgaj_nni guideb guibajntu näjza par tejpas. Si'c gacni.

¹⁸ Xi'nä, Timoteu, dee najc yälrulijdx ni runidxä lojlu te gucuaasa'clu si'c te soldaad ni abisieed, sigajc ni gunii reprofet xcuentlu galoo. ¹⁹ Di gunijtlu yärlililajz, bejnza xhigabsa'c, sa'csi yu'reni abaro'n xtidx Dios, ni'c abanijtreni yärlililajz. ²⁰ Si'c gusajc Himeneo nä j Alejandro, luxh abatedä'reni ladznäa be_ndxab te guisieedreni na'c guiniya'reni Dios.

2

Ruluini xho guiniabreni lo Dios

¹ Rulidxälu ganiddoo cuedxlu, guiniablu lo Dios, gudeedlu xquixtios lo Dios xcuent guiraa rebejn. ² Guiniabzalu xcuent rerei näj guiraa reni rnibee lo guedxliujre, te gac guibanxinu, te gac chanuunu xnez Dios, te saru guibajnnu. ³ Sa' yälrniabga najc laaca, luxh si'c rdxaglazj Dios ni ruslaa nurnu lo dojl guiniabnu lojni. ⁴ Dios rlazj laa guiraa bejn lo dojl, rlazzzani gacbeepacreni xtidxliini. ⁵ Yu' tejtis Dios, näjza tejtisza nani rusiäj diidx lo Dios näjza loj reben guedxliuj. Laani najc Jesucrist ni gujca niguii. ⁶ Jesucrist gujt lo cruzj te gudixni redojl xten guiraanu ni tre' lo guedxliuj. Dee gujche gojl dxej ni gule Dios. ⁷ Dios gule narä te gacä apost te gusule'ä xtiidxni, yälirilajz näjza didxlii lo reni di gac xpejn Israel. Si'c ni rlazj Jesucrist rniä didxlii, dina guiniä diidx ni rusguee.

⁸ Ni'cni rlazä guiraatis lajt guiniab rebejn lo Dios, saru guiliäs naareni, gusaanreni yälrdxe'ch, na'c gunreni bieje. ⁹ Si'cza regunaa, saru gacwreni xhajbreni, na'c gacreni gunaroxhi, cuedxireni. Xhet si'c di regunaa ni entis rsiucheduxh con oor o perl o ladsajc, rajc guichniil yejcn te guidxeloj bejnreni. ¹⁰ Masru ruchaag gunreni si'cni rchalglajz Dios, si'c riäj gun guiraa regunaa ni yu' lo Dios. ¹¹ Riäj dxitis gucua diajg regunaa xtidx Dios ni rusule' reniguii. ¹² Dina xcäbä gusule' te gunaa diidx lo guiraa rebejn, niclaza guinibeeni lo reniguii, dxitis cueni lo rebejn ni cagucua diajg diidx nani cagusule'ni. ¹³ Sa'csi ganid benchee Dios Adán, dxejctiru bencheeni Eva. ¹⁴ Luxh et Adandi basguee benxab, benxab basguee gunaaga, dxejc biajbni nen dojl. ¹⁵ Niluxh siliaa regunaa, palga jiuren xtuunreni si'c nan, palga chanuu chalilajzreni xtidx Dios, palga chanälajzreni sa'reni, palga chutisreni lo Dios, gaczareni gunasa'c cuedxireni.

3

Xho riäj gac reni rnibee

¹ Dee najc didx gulii: palga rlazj te niguii ga'p dzuun xten Dios, gusule'ni xtidx Dios, guinibeeni rebejn, te dzunsa'c najc ni rlazjni gunni. ² Ni'cni, ni rlazj gac nani rnibee, riäj guibansa'cni te na'c chu xhicuent guiniyaj rebejn. Riäj gacni chääl tejtis gunaa, riäj susinni, gacni te bensa'c, cuedxini, te guibansa'cni. Riäjza di gudxojni rolijzni guidzuj bejn, nägajc riäj gacni te bejn ni nansa'c te guluiini. ³ Na'c gacni te bengu, nicla te ni rdxagdijl bejn, na'cza gacni te nani rsia' lajzni ga'pni xhidajl meel, riäj cuedxi lajzni, na'c chanälajzni meel. ⁴ Riäj guinibesa'cni rolijzni, saru gunni te gusoob rexi'nni xtiidxni. ⁵ Sa'csi palga di te bejn gan xho guinibeeni lagajc rolijzni, aticaxh gac ga'pni guidoo xten Dios. ⁶ Di riäj guinibee te bencoob nani entis huililajz, te di guschä'pni xpala'nni sas jiajbni lo lagajc xcälhaj Dios ni biajb benxab. ⁷ Luxh riäjza guinii reni di chalilajz xtidx Dios laaca najcni, te na'c jianxtujyni, te na'cza jiajbni ladznaa benxab.

Xho riäj gac reni rcanäj nen guidoo

⁸ Si'cza rediaconos riäj gacreni bejn ni yu' xcäriejnreni, nanab gunreni si'cpac ni rniireni, na'cza soozreni, na'c xca'reni meel ni direni niunsa'c gaan. ⁹ Riäj gapdzu'tzni rediidx nagajn xten yälirilajz, ni'c nanab gac naya lastooreni. ¹⁰ Riäj fixgaatu xho nabajreni. Palga nabaansa'creni, rutza gacdi gucuaquidireni, sajg gacreni diacono. ¹¹ Regunaa ni rlazj gac diaconas riäjza chu xcäriejnreni, na'c güireni diidx ni di guchaag, na'c soozreni, gacreni gunasa'c, cuedxireni, gunreni si'cpac ni rniireni lo guira'ti dzuun. ¹² Riäj gac

rediacono cháäl tejtis gunaa. Riäjł guinibesa'cni rexi'nni náj guiraa reni yu' rolizni. ¹³ Sa'csi rediaconos ni runsa'c xtzuunni, sanälajz bejnreni, dizareni guidxejb rsiudzu'tz lastooreni lo xcärlililajz xtidx Jesucrist.

Gurobduxh najc yälxhiga'tz xten Jesucrist

¹⁴ Caciaä diidre lojlu, niluxh rlazä jiadhuigaä la'tu. ¹⁵ Luxh palga gaclaä, anajnlü xho riäjł guibajñ bejn roliz Dios, nalajznu xquidoo Gueb Dios ni nabajñ par tejpas. Guidoore rniadszu'tz nájza rulüüru didxlii xten Dios. ¹⁶ Rdxeloyaduxh guiralii bejn yälxhiga'tz xten xcälñajn Dios:

Dios biääd lo guedxliuj si'c te beñguedxliuj,
 Sprit Dxiän xten Dios gunii beñdxanni;
 bahüü rexangl Dios lojni;
 basule'reni xtiidxni lo rebejn ni di gac xpejn Israel;
 guira lajt huililajz bejn xtiidxni;
 huäjsni lo xcälrdimbicha' Dios xhaguibaa.

4

Reni rbicaj lo xnezyuj Dios

¹ Aguniipac Sprit Dxiän siääd redxej che chu reni guro'n yärlililajz, sucuadijgreni xtidx rebejn ni rusguee náj xtidx rebeñdxab, ² niela jiureni rniireni didx-xhii ni rusguee, sa'csi xhetiru xcäriejnreni, anajcni si'c najc cadre rudxuj te guiblaa: xhetru racbeedini. ³ Sulüü rebejnre na'c guchnaa bejn, sulüüzareni na'c gau bejn guiralaj, niluxh Dios bejnpac redee te xca' rebejn ni rililajz, ni racbeeza didxlii, te gudeedreni xquixtios lo Dios. ⁴ Guiralii reni benchee Dios najc laaca, di riäjł cuälaznu xhi rca'nu che rudeednu xquixtios lo Dios. ⁵ Sa'csi xtidx Dios náj yälrbedx-rniab lo Dios runsa'c guira'ti.

Te ni runsa'c xtzuun Jesucrist

⁶ Palga susnajlu lajz rebejznu rediidxre, sajclu te mossac xten Jesucrist, luxh si'c sisieedrüzalu diidx xten yärlililajz, náj yälrluisa'c ni sanuulu. ⁷ Na'c jiulu ni rniü regunaroyeüü ni xheti xtzuunni. Bisieed sudzu'tz lastoolu lo xtidx Dios. ⁸ Guxii sajç guinibduxh bejn te gusutiipni tiejxhni. Niluxh sacduxhru cucheeni xtidx Dios neñ lastooni, sa'csi racnäjni bejn lo yälñabajñre nájza lo yälñabajñ ni najc par tejpas. ⁹ Dee najc didxlii, riäjł chalilajz guiraatuni. ¹⁰ Ni'c riennu dzuun, rdeednu trabajw, sa'csi cabäjnzu Gueb Dios ni nabajñ, ni rusläa bejn lo dojl, ganiddoo renani rililajz xtiidxni.

¹¹ Sajplu guinibeelu soob rediidxre, nájza gulüülu rediidxre. ¹² Di gusaanlu cuälazreni luj sa'csi najclu bi'n; riäjł gaclu te ni suu te fii guiraa reni rililazsa'cpac xho rniilu, xho nabajñlu, xho sanälajzlu sa'lu, xho rililajzlu, nájza xho rajplu xhigabsa'c. ¹³ Lał ni guidzunä ro'c, bil xtidx Dios lo rebejn, balijdxreni, balüüza xtidx Dios lojreni. ¹⁴ Di gusaanlu reyälñajn ni baniidx Dios lojlu cheni basuj rebeñgool ñaareni yejclu por xtidx Dios, guniireni diidx xcuent nani churu gac.

¹⁵ Guet-guejt basnaj lajzlu rediidxre, biusa'c rediidxre, te gac fii guiraareni xho sanuulu lo xtidx Dios. ¹⁶ Gopdzu'tz lagajç luj nájza rediidx ni rulüülu; guzudzu'tz lo guiraa rediidxre, te si'c laalu lo dojl, te laaza reni rucudiadj xtiidxlu.

5

Xho guibanñajnu reni rililajz

¹ Na'c quidxa'lu loj te bengool; guninäjni si'c xtađu, balijdx rebi'n si'c bejt-zlu, ² balijdx renanbengool si'c xnanlu, balijdx redxap steeb si'c rebisiajnlu con rehxigabsa'c.

³ Gucnäj rebiuud ni guliipac rquiin chu gacnäjreni te chu xhi gaureni. ⁴ Niluxh palga yu' chu biuud yu' xi'nni o xajgni, suguisiedxgaareni guibañayareni lo xnez Dios, te quiixreni di'n ni nasääbreni lo xtađreni, näj xnanreni ni baslaareni, sa'csi ni'c najc laaca, rdxaglađza Diosni. ⁵ Gunaa ni najcpac biuud, abia'n xtebni, ni'c rbäjtisni lo Dios, dxej-yääl rbejdx-rniabni lo Dios. ⁶ Niluxh biuud ni nabajñ cadedgustisni najc si'c te ni agujt neñ dojl. ⁷ Basule' rediidxre lojreni te rut gucuaquijdireni. ⁸ Palga yu' chutej ni di gacnäj resa'ni, lagajc reni rbäjz rolijzni, ni'c agulälaz xtidx Dios, beñguijdxru najcni lo rebejñ nani di chalilajz xtidx Dios.

⁹ Di gucuaalu laj rebiuud lo guijtz te gacnäjtuni palga gajdni chu gayojñ ijz. Riäjlza gac biuudga te gunaa ni gubañña'sa'c chäälni. ¹⁰ Riäjlza gumbée bejñni xcuent redzuns'a'c ni rujñni; palga baslaani rexi'nni, palga badedlaani rolijzni gues beñ zijt, palga gudiibni ni' rexpejñ Dios te si'c guzeñ xcälñadolajzni, palga racnäjni reni rdejd trabajw, palgaza riuni rujñni guira'ti redzuns'a'c.

¹¹ Niluxh na'c gucuaalu laj biuud ni yu' guxiiru ijz sa'csi che guichaglađzreni te niguii, siällajzreni diidx ni bia'nreni lo Jesucrist, te rlađzni guchñasacreni. ¹² Dxej siu'reni neñ dojl sa'csi rbälazreni rediidx ni bia'nreni che galoo bejnreni xhigab ninuureni lo xtzuum Dios. ¹³ Dxej sia' lojreni xhet gundireni, rijreni rolijz bejñ ricuereni. Luxh malaii ni'ctis gunreni. Niluxh rliászareni didxxhii, richu'reni lo xhitis, rniizareni diidx ni di guchaag guiniireni. ¹⁴ Ni'cni rlađä rebiuud ni najc dxa'pru guchñaareni stehuält, chu xi'nreni, fisa'creni rolijzreni te na'c guiniyajreni rebejñ ni rdxe'ch lojnu. ¹⁵ Sa'csi yu' gaii biuud ni alagubicađ lo xnez Dios sanajlreni beñdxab.

¹⁶ Pal yu' tej resa'nu ni najc sa'ni te biuud, riäjł gacnäjnini, na'c gusaanni gutajłni xtzuum guidoo, te si'c guidoo sađc gacnäj rebiuud ni rquiinpac chu gacnäjreni.

¹⁷ Rebengool ni rnibesa'c guidoo, riäjł chanälajzrutureni näj gudeedrutu guiraa nani rquiinreni, si'c najc reni rusulesa'c xtidx Dios, rulidxxa'creni la'tu con xtidx Dios. ¹⁸ Sa'csi lo xtidx Dios caj scree: “Na'c gusällu guijxh ro'gon che rusiani triuu”; si'cza caj stee diidx: “Riäjł gax bejñ ni rujñ dzuun.”

¹⁹ Na'c cucuadiajglu xtidx tej ni rucuaquij te bengool palga ruti tio'p, choñ testiigw. ²⁰ Niluxh reni sanuu rujntis dojl, riäjł gulijdxlureni nez loj reben guidoo, te näjza laareni guidxejbreni. ²¹ Nez loj Dios, nez loj Dad Jesucrist, nez lojza reangl ni gule Dios, rulidxxduxhälu chanuulu lo rediidxre, na'c jiurulu tej bejñ lo sa'ni. Bejñ tebloj loj guiraa rebejñ. ²² Na'c gusiojb lađzlu gusujlu ñaalu yejç te bejñ, te gacni beñ guidoo palga gajdni guisieed guibañsa'cni lo xnez Dios sa'csi lagajç yejçlu jiajb rextojłni. Gubicađ lo guiraa dolguijdx.

²³ Na'cru yälu ganax nis. Gu'za tudxe'n bin sa'csi racxhuu xque'lu, näjza sa'csi yu'ru rexcälracxhuulu.

²⁴ Yu' bejñ ruzengajç rextojłni ni'c rajcni castiigw, niluxh yu' bejñ ni di xtojłni guzeñgajç. ²⁵ Sigajçsa redzuns'a'c ni rujñ bejñ; yu'reni ruzengajç, niluxh mase dini guzeñgajç, digacdi jianxhiga'tzni, sidzujñ dxej suzeñni.

6

¹ Reni najc mos riäjł cuadiajgreni xtidx xlamreni, te na'c guiniyaj rebejñ lađ Dios niclaza xtidx Dios ni rusule'nu. ² Palga yu' remos ni najc xlamni te nani rlilajz, na'c cuälazreni rextiidxni sa'csi najcni bejtzn lo xcälrlilajz Jesucrist.

Riäjł gunsa'crureni xtzuunni, sa'csi najcreni sa'ni loj yäl_rililajz xten Dios, luxh sanälajzarenini. Rediidxre baluii, basule'.

Yäl_nabaŋsa'c näjza te lastoo ni rbedxi

³ Palga yu' chu ruluii garenca diidx, diidx ni digac didxsa'c, si'c najc xtidx Jesucrist, näjza xhet si'c diidxdi ni ruluii xho guibaŋsa'c bejŋ, ⁴ bejŋga rlajz guiliä'p lagajc xpala'nni, niluxh xhet najndini. Si'c te yälguijdx yu'tis yejcnı yälguiniab diidx, yälrdıldiidx. Luxh redee rujn rdxe'ch lajzreni, rujnni rdxe'ch bejŋ lo sa'ni, rujnni rniyaj bejŋ, rujnzani di bejŋ guinisa'c lo sa'ni. ⁵ Rujnzani rdıl_näj bejŋ sa'ni. Guiraa redee gun bejŋ ni aguxhijŋ xcäriejnni, bejŋ ni diru ga'p didxlii. Rchaloreni sujnreni ganduxh xcuent rediidx ni ruluiireni. Gubicaj lo sa' bejŋre. ⁶ Niluxh yäl_nabaŋsa'c näjza te lastoo ni rebedxi, redee sa'cduxh. ⁷ Sa'csi xhet biopnädinu lo guedxliujre, luxh sigajcza xhet sajcdi chonänu che guetnu. ⁸ Niluxh palga rajpnu xhi gaunu, xhi gajcwnu, con ni'c riäjł guibalaaznu. ⁹ Niluxh reni rlajz ga'p xhidalduxh meel, riajbreni lo xhigab guijdx, rujnzareni xhidajł dzuun ni xhet sajcdi, ni rujn daan, ni rusiääz bejŋ lo yäl_ruxhiŋ, lo yäl_rnitloj. ¹⁰ Sa'csi yäl_rinälajzni meel najc xlobaa guiraa redzunguijdx. Yu'za bejŋ ni rlazduxh ga'pni meel, rusaanreni xcäl_rililajz Dios, dxejc lagajc laareni rujn rdedduxhreni trabajw.

Dzun-huen xten yäl_rililajz

¹¹ Niluxh luj, bejŋ xten Dios, baxu'ŋ lo guiraa dee, te chanuulu lo xcäl_xhigabsa'clu näjza yäl_nabaŋsa'clu; te chanajllu yäl_rililajz näjza yäl_sanälajz; te chanuulu lo yäl_rbecdxi lajz näjza yäl_nadolajz. ¹² Benduxh dzuun xcuent yäl_rililajz Jesucrist, gunazdu'tz yäl_nabajŋ ni najc par tejpas. Ni'cni gurejdx Dioslu, luxh aguniilu rililajzlu xtidx Dios nez loj xhidajł bejŋ, te anancheereni. ¹³ Naj rulidxälu nez loj Dios ni rudeed yäl_nabajŋ lo guiraa ni yu' lo guedxliujre, näjza nez loj Jesucrist, ni basule' xtiidxni nez lo Poncio Pila't, ¹⁴ rnibeä guzobsa'clu guiraa rediidx ni rniä lojlu, na'c guchaaluni, te na'c guiniyajreni luj naj niclaza cheni jiäd Xtad Jesucristnu. ¹⁵ Sidzujŋ dxejga nani agunii Dios guidzujŋni. Dios ni najc le' sujŋ scree sa'csi laatisni najc Dios, najcni reii xten rereii, rnibeezani reni rnibee. ¹⁶ Laatisni dini guet, nabajŋni lo bianij cadro rut rajcdi rbig. Nicla te bejŋ gajd fiı lojni, niclaza gac fiıreni lojni. Xtebtis laani riäjł ga'p rebejŋ xpala'nni. Laani rajp yäl_rnibee par tejpas. Sugacni si'c.

¹⁷ Baliidx reni rajp xhidajł xhixtenni lo guedxliujre, na'c guschä'preni xpala'nreni, niclaza chanälajzreni xhixtentisreni. Huenru chanälajzreni Dios ni nabajŋ, ni runiidx loonu guiralii xhixtennu ni rquiinnu te guibalajznu. ¹⁸ Baliidxreni gunreni dzunsa'c, gundajŋreni dzunsa'c, gacnäjreni reni xhet rajpdi, cuenäsa'creni sa'reni. ¹⁹ Si'c ga'preni yäl_nasa'c ni guzudzu'tzreni che jiäd Jesucrist, te guiniaztzu'tzreni yäl_nabajŋ par tejpas.

Rulijdxni Timoteu

²⁰ Timoteu, cuanäj ni rniä lojlu. Na'c jiulu didxguijdx ni yu' lo guedxliujre, niclaza didx-xhii, niclaza rediidx ni rusguee, ni rbälajreni 'yäl_najŋ'. ²¹ Sa'csi yu' reni sanuu yäl_najŋre ni'c banijtreni lo Dios xcuent yäl_rililajz. Gacnäj Dios luj. Sugacni si'c.

Guijtz Ni Rojp Lo Timoteu

Stee guijtz ni baxhal Pabl loj Timoteu

¹ Narä Pabl, nacä apost xten Jesucrist. Dios gule narä, xcuent yäl**na**bajñ ni gudeed Dios loj reni yunäj Jesucrist, si'c ni bia'n diidx. ² Cacuaä guijtzre lojlu, Timoteu, xi'nä lo yäl**ri**lilajz. Rinälazä luj. Rniabä lo Xtradnu Dios näj lo Dad Jesucrist gacnäj luj, gulaslajzreni luj, guscuecdxireni lajzlu.

Rusule'ni xcuent Jesucrist

³ Rnaj lazälu che rniabä lo Dios dxej-yääl. Dxejc rdedä xquixtios por luj lo Dios. Naya xcärienä yu'ä lo Dios, runä xtzuunni si'c bejnza rextadgoldoä. ⁴ Rnaj lazä xho biinlu, ñaj rlazä fiä lojlu te guibalazä. ⁵ Rnaj lazäza yu'pac yäl**ri**lilajz lastoolu si'cni guyu'ni galoo lastoo xmañlu Loida dxejcru lastoo xnanlu Eunice si'cza yu' yäl**ri**lilajzga lastoolu ñaj.

⁶ Ni'cni rniä lojlu ñaj, si'cni rcanäj bejñ rodäj te di juiini, si'cza cuanädu**x**h reyäl**na**jñ ni baniid**x** Dios lojlu cheni basuä ñaä yejclu. ⁷ Sa'csi di Dios nuniid**x** te lastoo ni rdxejb loonu, baniid**x**ni te lastoo ni rsiutijp, baniid**x**ni te lastoo ni rinälajz, baniid**x**zani yuduxh xcäriejñnu. ⁸ Na'c guitujy**lu** guiniilu rediid**x** xten Xtrad Jesucristnu, na'cza guituinäj**lu** narä sa'csi yu'ä neñ latzgui**ib** xcuent Jesucrist. Näj luj gudejd trabajw ni siääd xcuent yäl**ru**sule' xtid**x** Dios si'ctis gacnäj Dios luj. ⁹ Dios ni gulää nurnu neñ do**jl**, gurejdx nurnu te guiba**ñ**sa'cnu lojtisni. Gurejdxni nuurnu xhet sa'csi biennu dzun**sa**'c, alga sa'csi si'c r**la**jzni laani, sa'csi balaslajzni nuurnu xcuent Jesucrist galooli che gajdli guncheeni gued**x**liuj. ¹⁰ Niluxh cheni biääd Jesucrist ni badzuc**aj** rextoj**ñ**nu lo gued**x**liu**re**, baluiloj yäl**ru**laslajzga. Jesucrist banitloj yäl**ri**nibee xten yäl**gu**jt. Xtiid**x**ni, ni rusule' xho rbic**aj** do**jl**, balu**ii** yäl**na**bajñ, näjza yäl**na**bajñ par tejpas.

¹¹ Dios gule narä te gacä te ni rusule' xtiid**x**ni, te gacäza te apost, näjza te bejñ ni ruluii loj reni di gac xpejñ Israel. ¹² Ni'cni rdedä trabajw xcuent guiraa rediid**x**re. Niluxh dina guituiy**ä**, sa'csi narä nanä chu xtiid**x** huililazä, nancheä laani sajc gapdzu'tz**ni** dzuun ni baniid**x**ni loä dxejli cheni guibi'ni.

¹³ Chanuu guluiilu redid**x**sa'c ni banid**x**ä lojlu. Gubajñza lo yäl**ri**lilajz näj lo yäl**sa**nälajz ni rajpnu sa'csi yu'nu lo Jesucrist. ¹⁴ Cuanädu**z**'tz reyäl**na**jñ ni baniid**x** Dios lojlu näj Sprit Dxan xtenni ni rbäjz neñ lastoonu.

¹⁵ Anajñlu guiraa reni siääd regued**x** Asia gulälaz narä; lo redee nadxaag Figelo näj Hermógenes. ¹⁶ Dad Jesucrist gacnäj reni yu' rolijz Onesíforo sa'csi balti huält biädspaani lazä, dini nitujy sa'csi yu'ä neñ latzgui**ib**. ¹⁷ Che bidzujñni gued**x** Roma, gudiilpacni narä te bid**x**äl**ni** narä. ¹⁸ Dad Jesucrist gulaslajz laani che guidzujñ dxej ni guibi' Jesucrist. Luj anajñlu balti dzunsa'c bejñni che guyu'ni gued**x** Éfeso.

2

Te ni runsa'c xtzuun Jesucrist

¹ Ni'cni xi'nä, guzutijp sa'csi rulaslajz Jesucrist luj, racnäjñilu. ² Rediid**x** ni abiejñ diajglu guniä nez loj xhid**al** bejñ lagajc rediid**x**ga guniini lo rebejñ ni rililajzpac, loj rebejñ ni sajc guluiiza diid**x**ga lo stecuaa bejñ.

³ Batijp lajzlu ted**ñ**äjlu narä trabajw si'c te soldadsa'c xten Jesucrist. ⁴ Di te soldaad gun dzuun ni bejñni che gajd**ni** gac soldaad. Rujñni xtzuun bejñ ni guleni gacni soldaad, te si'c guspaani lajz bejñga. ⁵ Sigajc**za**, ni rguij**t** digacdi xca'ni yäl**na**sa'c palga dini quitsa'c si'c riäj**l** quitni. ⁶ Bejñ ni rujñ dzuun loniaa

nanab xca'ni xcäl'nasa'cni ganidoo. ⁷ Bejn xhigab xcuent ni rniä lojlu, dxejx sujn Dios gacheelu guiraani.

⁸ Basnaj lajzlu Jesucrist, te xagdo to David ni huäjz lo rebeñgut. Dee najc xtidx Dios ni rudzucax dojl, si'c ni rusule'ä lojlu. ⁹ Ni'cni cagutipä lazä cadedä trabajw, caduä caden si'c te bejn ni bagu't sabejnni. Niluxh digacdi xcadu xtidx Dios. ¹⁰ Ni'cni cadedä trabajwre te gacnäã reni agule Dios te näjza reni'c chalilajx xtiidxni te guibajxreni lo bianij xten Jesucrist par tejpas.

¹¹ Guliiduxh najc diidxre;

palga agujtnu con laani, sibannäjzanu laani.

¹² Palga rdejdnun trabajw, sinibenäjzanu laani.

Palga dinu guicä'p numbeenuni, dizani guicä'p numbeeni nuurnu loj Xtadni Dios.

¹³ Mase dinu chanuu lo xtiidxni, laani susoobni xtiidxni sa'csi digacdi cuatzajzni diidx lagajc laani.

Te bejn nani abia xtzuunni

¹⁴ Basnaj lajz rebejn xcuent rediidxre, gunibee lojreni nez lo Dad Jesucrist na'c til'diidxreni sa'csi sa' diidxga xhet sajcdini, ruxhintisni reni riendiajgni.

¹⁵ Batiyp lajzlu te guidzujnlu lo Dios si'c te bejn ni runsa'c dzuun, xheti xhicuent guitujyulu, sa'csi ruluisa'cpaclu xtidxliitis Dios. ¹⁶ Gulälaz yäl'rnijay näjza xhidalduxh diidx ni xhet sajcdi, sa'csi renani rucuadajg rediidxga riajbrureni lo redolguijdx. ¹⁷ Luxh diidx ni ruluiireni suxhingajcni lastoo bejn si'c rxhinlajz tiejxh bejn. Ni'c casiajc Himeneo näj Fileto. ¹⁸ Abanijtreni lo didxlii. Caniireni ala huäjs bejn lo rebeñgut. Si'c cagusiejchreni lajz gaii rebejn ni rililajz. ¹⁹ Niluxh xtidx Dios rsiudzu'tzni si'c te guij nani nadipduxh, luxh rajpnu diidxre si'c te seen: "Dad guibaa anumbee guiraa reni najc xpejnni"; näjza "Nanab guibicajreni lo redolguijdx, guiraa reni ahuililajx xtidx Jesucrist."

²⁰ Neñ te yuro, xhet ganaxdi cos or näjza cos plat yu'. Yu'za cos yajg näj cos bajn; yu'reni najc parsi te laniro, yu'za reni rquiin guixe-guixee. ²¹ Sigajcza te bejn ni rlajz gun dzuunro xten Dios, riäj'l guibicajni loj redolguijdx ni xhet sajcdi. Dxejcti Dad Jesucrist sacnäjni te gunni redzunro xtenni.

²² Gubicaj lo redzunguijdx ni rujn rebejn, huinuu yäl'nabansa'c, yäl'rililajz, yäl'sanälajz, gulecdxiza lajzlu näj reni rujn xtzuun Dios, naya lastooreni rbedx-rniabreni lo Dios. ²³ Na'c jiulu rediidx ni ruluii rebejn guedxliuj. Anajnlun rediidxga rujn rdil'näj rebejn sa'ni. ²⁴ Niluxh te xmos Dad guibaa di riäj'l guchaagni reni rdijl; riäj'l gacni bensa'c loj guiraatis bejn. Riäj'lza guluisa'cni; riäj'lza gutip lajzni che xhet laadi rujn bejn lojni. ²⁵ Guideb yäl'nadolajz guluiilu reni rdxe'ch loj rediidx ni ruluiilu. Cuääzlu gaxäjsi gusiejch lajzreni gun Dios gacheereni didxgulii, ²⁶ te jianij xcäriejnreni te guiriireni ladzña beñdxab, te gunreni ni rlajztis Dios.

3

Xho gac rebejn neñ redxelult

¹ Nanab gacheelu neñ redxelult sidzujn dxej tedtu trabajw. ² Sa'csi su' bejn ni chanälajz lagajctis laani, ni rinälajz xmeeltisni, bejn ni rniyaduxhtis, bejn ni rchaglaiz chä'p xpala'ntisni, bejn ni rniyaj Dios; su' bejn ni di gusoob xtidx xtadreni, su' bejn ni di gudeed xquixtios lo Dios, su' bejn ni najc beñguijdxtis.

³ Neñ redxelultga su'za bejn ni di chanälajz sa'ni, bejn ni di lajzni jiäj'l, bejn ni rusgueduxh; bejn ni digacdi guscuaääz dolguijdx ni rujnreni; bejn ni gualazduxh; bejn nani ru'o'n guira'ti dzunsa'c. ⁴ Neñ redxelultga su' bejn ni ruto' sa'reni; bejn ni di guidxejb gunreni ni riajbtis yejcreni, bejn ni rchalosi

najczeni be_nsacduxh; be_n ni rchag_lajzru gun nani rchag_lajz tiejxh_reni lacuaa chanälajz_reni Dios. ⁵ Ne_n redxelult su' be_n ni najc si'c be_nguidoo, ascanu rusoob_reni xtid_x Dios, niluxh naadireni xca'reni yäl_nadip näj yäl_rnibee xten Jesucrist ni ruchaa lastoo be_n.

Na'c guchaaglu rebe_nga, ⁶ sa'csi loj sa' be_nre yu' reni richu' rolijz be_n, sasgueer_reni regunanayääl ni rujn dojl. Regunaare rinuu ruj_reni ni r_lajztis tiejxh_reni, rujn_reni guiral_loj. ⁷ Rebe_nre rsiedduxh didxcoob, niluxh di didxlii xten Jesucrist jiu' yej_reni. ⁸ Sigajcni gujc Janes näjza Jambres ni bidxe'ch loj Moisés, sigajcza najc rebe_nre, cadxechnäj_reni didxlii xten Jesucrist, najczeni be_n ni aguxhij_n xcäriejn_reni, luxh direni gacbee xtid_x Dios, direni ga'p yäl_rililajz. ⁹ Niluxh direni chanuu xchej, sa'csi huenliisi suhuii guiraa rebe_n najczeni be_nguijdx. Si'cza gusajc guiro'p reni bidxe'ch loj Moisés.

Pabl r_nibee sudzu'tz Timoteu

¹⁰ Luj sanuutislu lo nani rusule'ä, näj xho naba_nä, näj xhicuent runä dzuunre, lo xcäl_rililazä, lo xcäl_nadolazä, lo xcäl_sanälazä, näjza xho batip lazä. ¹¹ Najnlu xho basacsí_reni narä gudedäza trabajw ladz_naa rebe_n ne_n reguejdx xten Antioquía, guedx Iconio, näjza guedx Listra. Gudedä trabajw niluxh Dios bas_laa narä loj guiraa retrabajwga. ¹² Guliduxh guiraa reni r_lajz chutis loj Jesucrist sidejpac_reni trabajw. ¹³ Niluxh rebe_nguijdx näj reni rusguee, sinuutis_reni redol_guijdx, sinuuru gusgueer_reni be_n, luxh susgueeza be_n laareni.

¹⁴ Luj huinuu guzudzu'tz loj ni abisieedlu, nani ahuililajzzalu, luj anajnlu chuni'c baluiini lojlu. ¹⁵ Cheni biuuxlilu racbeelu xtid_x Dios, ni ruluiilu xho guiriilu ne_n dojl te xca'lu yäl_nabaj_n par tejpas sa'csi rililajzlu xtid_x Jesucrist.

¹⁶ Guiraa rediid_x xten Dios ni caj lo guijt_z, lagajc Dios baniid_xni te xcajni lo guijt_z.

Guiralii xtid_x Dios najc laaca te guluii nuurnu xhini'c najc didxlii,

te gacbeenu xhi najc didx-xhii,

te gacbeezanu xho riäl_l guiba_nsa'cnu.

¹⁷ Te susi_n niguii ni najc xpej_n Dios,

te gac gunni guiraa redzunsac'c ni riäl_l gunni.

4

¹ Rulidxälu nez lo Dios näjza nez lo Dad Jesucrist ni jääd si'c rei te gunni yäl_guxhtis loj reni nabaj_n näjza loj reni agujt; rniäza dee lojlu: ² basule' xtid_x Dios, gususi_n lo Dios mase xhitis or. Baluii rebe_n dojl, gudil_näj reni di r_lajz guzobdiid_x xtid_x Dios, balidxnäj resa'tu xtid_x Dios. ³ Sa'csi sidzuj_n dxej di rebe_n guidxag_lajz gucuadiajg yäl_rluisa'c; alga diid_x ni najc lagajc si'c najc xhigab_reni r_lajz_reni jiendiajg_reni, ni'cni siguiil_reni xhidajl be_n ni ruluii te guisieed_reni ganax ni r_lajz_reni gucuadiajg_reni. ⁴ Susäuureni diajg_reni te di jiendiajg_reni xtidxlii Dios; alga xhitis diid_x gucuadiajg_reni. ⁵ Niluxh luj huinuutis lo xtid_x Dios, batiplajz yäl_huin, guniitis xho rudzucaj Dios rext_loj_reni, be_nsa'c xtz_uunlu.

⁶ Sa'csi narä suga'ä ree te ju'treni narä, asiäddz_ungajxh dxej ni guetä. ⁷ Agulujx bacuaä si'c te soldaad ni huicua_sa'c lo guer, agulujx xnezyuä, gopdzutzä yäl_rililajz. ⁸ Naj cabäzä xca'a yäl_nasa'c ni guniid_x Dad xhaguibaa, suniid_xni yäl_naba_nsa'c. Dad najc juejz ni runsa'c yäl_guxhtis. Niluxh xhet loätis guniid_xni yäl_naba_nsa'c. Sudeed_nini loj guiraa rebe_n ni catiplajz cabäz_reni dxej cheni guibisac Jesucrist.

Rediid_x ni räjpni lojtis Timoteu

⁹ Basaaga lajzlu jiädhugajlu narä; ¹⁰ sa'csi abasa'n Demas narä. Sanälajzruni redzuun xten guedxliujre, naj sääni guedx Tesalónica. Baxhalä Crescent sää lo reguejdx ni re' nez Galacia. Baxhalä Tito sää guedx Dalmacia. ¹¹ Xtebtis Lucas suganäj narä. Gudiil Marcw te jiädnäluni sa'csi sajc gacnäjni narä lo xtzun Dios. ¹² Tíquico baxhalä sää guedx Éfeso. ¹³ Cheni jiäädlu, jiädnälu ca'p ni basa'nä guedx Troas rolijz Carpo, näj rexlibrä; di jiälza lajzlu rexquitzä. ¹⁴ Alejandro, ni najc gubetzguiib, basacsíduxhni narä. Dios quiixni sigajcni bejnni. ¹⁵ Luj bahuii te di gunni xhi gunni luj sa'csi rdxecheduxhni lo xtidx Dios ni rusule'nu.

¹⁶ Galoo che bazecä diidx lo reguxhtis, rut gucnäjdi narä; guiraareni gulälazreni narä. Rniabä lo Dios na'c guchagcuentni nani bejnreni. ¹⁷ Niluxh Dad ni yu' xhaguibaa gucnäj narä, baniidxni yälñadip te gujc guniä guiraa xtidx Dios te biejn diajg reni digac xpen Israel xtidx Dios. Luxh gucnäj Dios narä gulääni narä ladzñaareni, si'c ro' te beedz. ¹⁸ Suslaani narä loj guiraa redolguijdx, saptzu'tzni narä, sigucheezani narä te chunääni lo xcälñibeeni xhaguibaa. Lojni coldeed xquixtios, colgañduxhni par tejpas. Sugacni si'c.

Rudeedni xtixtios lo reexamigwni

¹⁹ Badeed xtixtios lo Prisca näjza lo Aquila näjza loj resa' Onesíforo. ²⁰ Erasto bia'n guedx Corinto, niluxh basa'nä Tróximo guedx Mileto sa'csi cayacxhuuni. ²¹ Jiädgajlu ansde guisloj rebäinajl. Eubulo, Pudente, Lino, Claudia, näjza guiraa rebejznu ni yu' lo Jesucrist ree, ruxhalreni xtixtios lojlu.

²² Dad Jesucrist chunäj xaimlu. Dios gacnäj guiraatu. Sugacni si'c.

Te Guijtz Lo Tito

Bacuaa Pabl lo Tito

¹ Narä Pabl, nacä xmos Dios, apost xten Jesucrist, te gacnäã guiroobru xcärlililajz reni agule Dios, te gacheezareni didxlii ni rusia xcälnabajnnu. ² Cayunlojzanu yälnabajn par tejpas nani Dios, ni digacdi guinii didx-xhii, bia'nni diidx guniidxni cheni gajdli guedxliuj guirixtiej. ³ Niluxh che bidzujn dxej ni agulexгаа Dios, laani baluiini xtiidxni. Si'cza baniidxni xtiidxni loã te gusule'äni si'c gunibee Xtiosnu ni ruslaa nurnu neñ dojl. ⁴ Cacuaã guijtzre lojlu, Tito, xi'nä lo yärlililajz ni ria'pnu xcuent Jesucrist. Rniabä lo Dios Xtadnu näj lo Dad Jesucrist ni rbää nuurnu neñ dojl, gacnäjreni luj, gulaslajzreni luj, guscuecdxizareni lajzlu.

Dzuun ni rujn Tito guedx Creta

⁵ Che basa'nälu lo yuj ni tre' lo nisdoo, ni laa Creta, basa'nälu te guluuxlu dzuun ni di niajldi nuluxä ro'c, näjza te cuelu rebengool loj reguidoo neñ tejpga reguejdx si'cni gunibeä gunlu. ⁶ Gule bengool ni nabansa'c, te na'c guiniyaj bejnreni, nanab gacni chääl tejtis gunaa, riäjzla chalilajz rexi'nni, na'c guibajnreni si'ctisni rlajz tiejxhreni, jiureni xtidx xtadreni. ⁷ Niguii ni rnibee guidoo rcanäj rehxixten Dios, ni'cni riäjł ga'pni te yälnabanya. Na'c gacni te bennajd, na'c gacni te bennadxecha', na'c gacni bengü, na'c gacni te bejn ni rdxagdił bejn, na'cza xca'ni meel ni dini niunsa'c gaan. ⁸ Nanab gacni te bejn ni rudedlaa rolijzni jia'n beñ biooz, riäjzla chanälajzni dzunsa'c, gac nasiñni, chu xcäriejnmi; guibansa'cni nez lo Dios, sigajcza nez lo rebejn, guibanayani nez lo Dios, na'c gunni nani rlajztis tiejxhni. ⁹ Riäjł chanuutisni lo didxlii ni bisieedni te gac gulidxnäjzani bejn xtidx Dios, te guzejcni diidx lo rebejn ni rniyaj xtidx Dios.

¹⁰ Yu' xhidajł benguijdx, bejn ni rnii diidx ni xhet sajcdi, näjza xhidajł bejn ni rnii didx-xhii ni rusguee. Näjza lo rexpeñ Israel ni riuduxh leii yu' sa' bejnre. ¹¹ Sa' redee ni nanab jiäu ro'ni, sa'csi rusgueerene xhidalro sa'reni, ruluiireni ni di riäjł guluiireni te gunreni gaan meel.

¹² Te niguii ni siäd lagajc lajdxreni guniini xcuent lagajc reben lajdxni: "Rebejn ni najc cretenses rniuduxhrene didx-xhii, niälajzzeneni. Rlajzreni gausa'creni niluxh di rlajzreni gunreni dzuun." ¹³ Niluxh guliini, ni'cni gudilnäjreni, te chalilazsa'creni xtidx Jesucrist, ¹⁴ te na'cruza gucuadiajgreni rediidx ni rdxällajz rexpeñ Israel, niclaza rediidx ni rnibee bejn ni gulälaz didxlii.

¹⁵ Loj renani rujn xhigabya, guira'ti najc naya, niluxh loj reni di chalilajz, ni xhet nayadi najc xhigabreni, guira'ti nacdXuudx, xcäriejnlireni nacdXuudx.

¹⁶ Naj rujnsireni si'cni numbereni Dios, niluxh ni rujnreni huenliisi ruzen direni nililajz, najcreni benguijdx, direni jiu xtidx Dios, digacdi gunreni nicla tej dzunsa'c.

2

Rulijdx Pabl Tito guluisa'cni rebejn

¹ Niluxh luj guniitis rediidx ni ruluisa'c. ² Baluii rebengool gac benya, bejn ni yu' xcäriejnmi, bejn ni rumbee xhini'c najc dzunsa'c, xhini'c najc dzunguijdx, bejn ni rajpza yärlililajz, yälsanälajz, näjza ni rbecdxi lajzni. ³ Sigajcza, regunagool, nanab guibajnreni si'c te ni yusa'c lo Dios, na'c guiniireni diidx ni di riäjł guiniireni, na'cza soozreni. Riäjł guluiireni redidxsa'c

⁴ te guluiireni regunaa dxa'p chu xcäriejnreni, chanälajzreni chäälreni näj rexi'nreni. ⁵ Gacreni nasin, guibanayareni, xcanäsa'creni rolijzreni, gacreni bensa'c gusoobreni xtidx chäälreni, te rut guiniyajdi xtidx Dios.

⁶ Sigajcza gojz lo rebi'n riäjł chu xcäriejnreni. ⁷ Luj guzuj te fiireni xho riäjł gun bejn dzunsa'c. Che guluiilureni, saru baluii guiraa reni riäjł guluiilu. ⁸ Didxsa'c gunii te rut gacdi guiniyaj diidxga, te si'c guitujy chutis ni rlazj guidxe'ch lojtu te xhet xhi didxguijdxdi gac guiniireni xcuentlu.

⁹ Baliidx remos te gusoobreni xtidx xlamreni, te gunsa'creni dzuun, na'c guzejcreni diidx lo rexlamreni. ¹⁰ Na'c cuanreni alga guibanasa'creni te guluii xcäl nabajjreni lacti sacduxh xtidx Dios ni basłaa nuurnu nen dojl.

¹¹ Sa'csi abiääd xcäl racnäj Dios, abiädnäni yälrusłaa nen dojl lo guiraa rebejn. ¹² La xcäl racnäj Dios ni ruluii nuurnu gusa'nnu redzunguijdx, näjza dzuun xten guedxliujre te guibanasa'cnu, te chonälajznu Dios lo guedxliujre. ¹³ Ruluiizani nuurnu cuääznu guidzujj dxej ni soob xtiidxi ni basa'nni loonu xcuent dxej che jiääd Gueb Dios näj Xtađ Jesucristnu ni rusłaa nuurnu lo dojl. ¹⁴ Laani gujtni te gusłaa ni nuurnu lo guiraa redolguijdx, te basiani nuurnu te gacnu xpejnni, gaczanu te bejn ni rdxaglajz rujn dzunsa'c.

¹⁵ Diidxre gunii, baliidx, basule' si'c te bejnajn. Di gusaanlu cuälazreni luj.

3

Ni riäjł gun reni rililajz

¹ Basnaj lajz rebejn gusoobreni xtiidxi rebejn ni rnibee näjza reguxhtis, gusoobreni xtiidxi reni, xcäjbzarenı gunreni xhitis dzunsa'c. ² Na'c guiniyajreni bejn, cuedxireni, gaczarenı bensa'c, saru gac nadolajzreni loj chutis bejn.

³ Sa'csi galoo sigajcza xheti xcäriejnnu, dizanu gusoob xtidx Dios; basguee bejn nuurnu, yu'tisnu lo guiraasi dolguijdx näjza lo ni rchaglajztis rujn tiejxhnu, nabajntisnu lo dolguijdx, rudxonlajznu, rdxe'ch bejn loonu, rdxe'chzanu lo sa'nu. ⁴ Niluxh che baluiloj xcäl rulaslajz näjza xcäl rinälajz Dios ni rusłaa nuurnu näjza reben guedxliuj lo dojl, ⁵ dxejc basłaa Dios nuurnu lo dojl, xhet sa'csi yu'di xhi dzunsa'c biennu, alga sa'csi balaslajzni nuurnu. Basłaa Dios nuurnu lo dojl sa'csi bidiib lastoonu, te biäjt xtojłnu te najcnu bencoob, sa'csi bascoobza Xsprit Dxan xten Dios xcäriejnnu. ⁶ Baniidxi Dios cuääzpac Xsprit Dxanni nen lastoonu xcuent ni bejn Jesucrist ni basłaa nuurnu, ⁷ te sa'csi rujn Dios cuent najcnu bensa'c sa'csi abadzucajni xtojłnu, naj sica'nu xcäl nasa'cnu ni cabääznu, nalaaznu yäl nabajj par tejpas.

⁸ Dee ni najc guliipac, ni'cni rlazä chanuutislu guiniilu rediidxre loj rebejn, te rebejn ni rililajz xtidx Dios gunduxhreni ganax dzunsa'c. Rediidxre najc laaca, sacduxhreni loonu. ⁹ Naj basaan rediidx ni najc xlia'si, rediidx ni gunii reben galoo, yälrdiidx xcuent xleii toMoisés sa'csi guiraa rebieyga xhet sajcdini, xhetza huendi rujnreni.

¹⁰ Palga yu' te bejn ni gun la' sa' reben guidoo, gunii lojni tej o tio'p huält. Palga dini jiejn, colcuääni lojtu. ¹¹ Sa'csi anajntu sa' bejnğa abaro'nni, agulälazni didxlii, lagajc xtojłni sujn nitni.

Diidxi ni bacuaani lojtis Tito

¹² Che guxhalä Artemas o Tíquico lojlu, gudahuiipac narä lo guedx Nicópolis. Ro'c abenä xhigab tedä rebäinajł. ¹³ Gucnäduxh licenciaad Zenas näjza Apolos, badeed guiraa ni rquiinreni te chanuurenı xpiajreni, te xhet jiäädxdireni. ¹⁴ Suguisieedza resa'nu gunreni dzunsa'c te gacnäjreni che guiquiinnurenı, te na'c guibajjreni xlia'si.

Ruxhalni xtixtios

¹⁵ Guiraa reni yunäj narä ruxhal xtixtios lojlu. Badeedza xtixtios loj resa'nu lo yälirililajz. Dios gacnä j guiraatu. Sugacni si'c.

Te Guijtz Lo Filemón

Rucuaa Pabl guijtz lo Filemón

¹ Narä, Pabl, yu'ä neñ latzguiib sa'csi rniä xtidx Dad Jesucrist. Narä näjza bejtznu Timoteu cagucuaanu guijtzre lojlu, Filemón, ni sanälazduxhnu sa'csi najclu sa'nu lo xtzun Dios. ² Rucuaazanu guijtzre lo Apia, bisiajnnu lo yälirililajz, näj lo Arquipo ni racnäj nuurnu lo dzuunre, näjza loj rebenguidoo ni rchagsa' rolijzlu. ³ Dios Xtadnu näj Dad Jesucrist gacnäj la'tu, guscuedxireni lajztu.

Xcälsanälajz näj xcärlililajz Filemón

⁴ Rudedä xquixtios lo Dios xcuent luj che rniä lo Dios. ⁵ Abiejn diagä xcuent yälrinälajz näj yälirililajz ni rajplu lo Dad Jesucrist, näjza reni yu' lo Dios. ⁶ Rniabä lo Dios tioobru xcärlililajzlu laj ni rusule'luni, te gacbesa'creni xcuent guiraa reyälhasa'c ni rajplu, ni runiidx Dad Jesucrist lojlu. ⁷ Lacti rbalazduxhä, rbedxi lazä sa'csi sanälajzlu resa'nu näjza sa'csi luj, betzä, agulecdxilu lastoo reni rililajz.

Pabl rniabni lo Filemón xcasacni Onésimo

⁸ Mase rapä xcälrnibee Jesucrist sajc guiniä gunlu xhitis ni riäj] gunlu, ⁹ rniabä lojlu gunlu te dzunsa'c sa'csi narä nacä Pabl ni rinälajzlu, nacä bengool, yu'ä latzguiib xcuent Dad Jesucrist. ¹⁰ Canabä xcuent Onésimo ni najc si'c xi'nä, sa'csi huililajzni xtidx Dios ni basule'ä lojni naj ni yu'ä latzguiib.

¹¹ Galoo, dini niajc beñsa'c lojlu, niluxh naj sacnäduxhni guiro'pnu. ¹² Ruxhalzacäni lojlu, te xcasacluni stehuält si'c ni najräni xca'lu, sa'csi siädnäni lojlu ascanu lagajc lastoä. ¹³ Narä rlazä niannäjni narä xcuentlu, te niacnäjni narä naj ni yu'ä latzguiib sa'csi basule'ä xtidx Dios. ¹⁴ Niluxh di rlazä niunä si'c palga luj dilu xcäjb gacni si'c. Dina guinia gacnäjpaculu narä si'c gojn. Narä rlazä gunluni sa'csi rlanjpaculu gacni si'c. ¹⁵ Pet gubicaj Onésimo lojlu tio'p-choñ dxejsi. Niluxh naj xca'luni te chuni lojlu par tejpas. ¹⁶ Naj xhetru si'c di te mos chuni lojlu. Naj sajcruni loj te mos. Naj najcni si'c te betzbiidlu ni sanälajzlu. Narä sanälazduxhäni, niluxh luj riäj] chanälajzruluni, xhet si'c chutis te bejn, alga si'c te bejtzlu lo Dad Jesucrist.

¹⁷ Näj palga rumbeelu narä si'c te sa'lu, cua'ni sigajc narä. ¹⁸ Palga yu' xhi bejn ni lojlu o palga yu' xhi nazäabni lojlu, basa'nni lo xcuentä. ¹⁹ Lagajc narä, Pabl abacuaä guijtzre con naä con xleträ, narä siguixäni. (Te na'c guiniä nazäabzalu lagajc luj loä.) ²⁰ Betzä, benlaa hueenre narä si'c te ni sanälajz Dios te guspaalu lazä nez loj Dad Jesucrist.

²¹ Bacuaä guijtzre lojlu sa'csi nancheä susooblu xtidxä, sujnzalu maazdi loj ni rniabä lojlu. ²² Sigajcza basuchee te lajt cadre jia'nä, sa'csi cabäzä gudzu' Dios ni gunabtu lojni, gusaan Dios jiädhuiä la'tu.

Ruxhalni xtixtios lojni

²³ Epafra ruxhal xtixtios lojlu. Laani yunäjni narä latzguiib, sa'csi gunizani xtidx Jesucrist. ²⁴ Marcw, Aristarco, Demas, näj Lucas, ni racnäj narä lo dzuunre, ruxhalzareni xtixtios lojlu.

²⁵ Dad Jesucrist gacnäj la'tu. Sugacni si'c.

Te Guijtz Nani Biääd Loj Reben Hebree

Agunii Xi'n Dios xtidx Xtadni

¹ Neņ redxe galoo garen-garen mood guninäj Dios retoxtadgoldoonu. Xhidajlza huält guniini por reniguii ni bacuaa xtiidxni. ² Neņ redxejre aguniini loonu por Xi'nni, lojzani badeed Dios yälrnibee guncheeni guedxliujre, badeedzani guira'ti lojni. ³ Laani najc xtuxh xten xcälrdimbicha' Dios, laani najczani sigajc najc Dios, laazani rapchee guira'ti con xtiidxni ni rnibee. Cheni gulujx basiani xtojlnu, gurejni xladbee Gueb Dios xhaguibaa te canibeeni.

Sacduxhru Xi'n Dios loj rexangl Dios

⁴ Ro'c gurej Xi'n Dios sa'csi sajcruni loj reangl xten Dios, sa'csi acua'ni yälrnibee si'c te bejn ni riannäj xhixten Xtadni. Lajzani sajcro lo relaj rexangl Dios. ⁵ Sa'csi Dios di niäjb loj nicla tej rexangl ni:

Luj najclu Xi'nä. Narä guleälu te guinibeelu.

Dizani niäjb xcuent nicla tej rexangl ni:

Narä gacä xtadni, laani gacni xi'nä.

⁶ Niluxh che biädnäni Xi'n xtebni lo guedxliuj, guniini:

Guiraa rexangl xten Dios, ¡Colgan Xi'nä!

⁷ Che gunii Dios xcuent rexangl ni räjpni:

Rujnni ruxhuj rexangl ni si'c bej, rujnni rbebajl rexmosni.

⁸ Niluxh xcuent Xi'nni guniini:

Luj najc Dios.

Nabajnlu par tejpas;

xcälrnibeelu par tejpas najc te yälrnibesa'c.

⁹ Ahuinälajzlu xhigabsa'c, dipaclu nichagljaz xhigabguijdx, ni'cni Dios ni najc Xtioslu, baniidxru yälrbalajz lojlu quela loj resa'lu.

¹⁰ Rniizani:

Luj, Dad, che guslojli bencheelu guira'ti,

bencheelu cad soob guedxliuj, naazalu bencheelu reguibaa.

¹¹ Laareni sinitlojreni, niluxh luj nabajnlu par tejpas.

Guiraareni siujx si'c riujx te lajd.

¹² Suse'tlureni si'c rie't te la' lajd, sidxaareni si'c rdxaa te lajd.

Niluxh luj dilu guidxaa.

Lalgajctis nabajnlu, di rexijzlu ted.

¹³ ¿Gucxha räjp Dios lo te xangl ni scree, ä? Räjpni:

Gurej xladbeä te guinibeelu dxejli cheni gudzugä guiraa ni rdxe'ch lojlu ladz ni'lu.

¹⁴ Guiraa rexangl Dios najc sprit, ruxhal Diosreni te chayacnäjreni rebejn ni xca' yäl nabajn par tejpas.

2

Na'c gusaanni diidx ni ruslaani lo dojl

¹ Ni'cni nanab jiunu xtidx Dios ni abiejn diajgnu, te na'c guibicajnu lo xnezyujni. ² Anajntu aguzojb diidx ni gunii rexangl Dios neņ redxe galoo. Luxh reni di nusoob diidxga bejnreni dojl, dxejc bateed Diosreni trabajw.

³ ¿Xho gac guibicaj xcäl naj Dios yejcnu palga dinu jiu rextidx Dios xcuent yälruslaa lo dojl, ä? Ni Dad, Jesucrist basa'n diidxga lo rexpejn pacni, dxejc laareni basule' reni rediidxre loonu. ⁴ Niluxh Dios baluii najc diidxga guliipac

sa'csi bejnri reseen, näjza yälrdxeloduxh, näjza xhidajl remilagrw. Badeedzani Sprit Dxian xtenni loj renani ahuililajz xtiidxni te gun tejpgareni garen-garen xtzuumreni si'ctis ni rlanj Dios gunreni.

Nani guläxteij yälruslaa bejn lo dojl

⁵ Di Dios gudeed yälrnibee lo rexanglni te guinibeereni guedxliucoob ni cagusä'tnu naj. ⁶ Guyu' tej ni bacuaa xtidx Dios lo guijtz, räjpni:

¿Chu najc niguii, te guinalajz Dios laani?

¿Chu najc xi'n niguii te jädhuiizaluni?

⁷ Nagabsi dxej guxiiru sajcnri lo reangl xhaguibaa,

dxejcti badesaclu xcäl'nasa'cni,

badesaclu xpala'nni,

badeedzalu yälrnibee lojni te guinibeeni guira'ti ni bencheelu.

⁸ Badeedlu guinibeeni guiralii ni yu' lo guedxliuj.

Cheni badeed Dios guira'ti te guinibeeni, xhetliidi basa'n Dios ni digacdi guinibeeni, niluxh naj ruhuiinu gajdni guinibee guiralii ni'c. ⁹ Alga rhuiinu Jesucrist, ni bejn Dios guxiiru sajcnri lo reangl xten Dios che guyu'ni lo guedxliuj balsi dxej. Che baluux Jesucrist xtzuumni lo guedxliuj, badeed Dios yälrdimbicha' näjza xpala'nni lojni. Sa'csi sanälajz Dios nuurnu basaanni gudejd Xi'nni trabajwduxh, gujtni lacuaa niejtnu.

¹⁰ Dios benchee guiralii ni yu' lo guedxliujre, najli rnibeeza Dios guira'ti.

Luxh Diosre rlanj chanäni xhidajl xi'nni xhaguibaa, ni'cni baxhal Dios xi'npacni Jesucrist te guläxteijni yälruslaa bejn lo dojl che gudejdni trabajwduxh lo crujz. ¹¹ Sa'csi Jesucrist, ni rujn chasanäj bejn te yäl'nabanya, näjza reni risanäj yäl'nabanya, tejtis najc xtradreni. Ni'cni di Xi'n Dios guitujy guiniini lojreni: "betzä". ¹² Scree caj lo xtidx Dios:

Chasule'ä lo rebetzä xho najclu,

siliä'päza xpala'nlu lojreni.

¹³ Räjpszani:

Sibäzä gacnäj Dios narä.

Ste lajt guniini:

Bahuii loä näjza rexi'nä ni baniidx Dios loä.

¹⁴ Te famil najc tejsi bääl, tejsiza rejn; ni'cni che biäd Jesucrist lo guedxliuj

guyu' tiejxhni näj xtiejnni si'c beñgedxliuj, gujtzani te gujc bejnri gunijt nani rnibee yäl'gajt, nalajznu, beñdxab. ¹⁵ Te si'c baslaani guiraa reni rdxejb yäl'gajt,

najcneni si'c reni yu'tis loj xlamni guideb nabajnni, lacti rdxejbreni yäl'gajt. ¹⁶ Guliini dini niäd te gacnäjni reangl xten Dios, biädni te gacnäjni guiralii

rexajg toAbram. ¹⁷ Ni'cni gujcnri si'cpac te bejtznu, te gac gacni te bixhojz

xten Dios ni rulasajz, te bixhosa'cza xten Dios, si'cni rlanj Dios gacni te guslaani rebejn lo dojl. ¹⁸ Sa'csi lagajc laani gudejdni trabajw, luxh baquuilza

beñdxabni niujnni dojl, ni'c naj sajc gacnäjni renani ruquuil beñdxab gun dojl.

3

Jesucrist sajcru loj Moisés

¹ Ni'cni bejtznu, reni anabansa'c, sa'csi najctu reni gurejdx Dios gac xi'nni, colyembee Jesucrist ni baxhal Dios loonu. Laani najc bixhojz ni sajcru,

rusule'zani xtidx Dios xcuent nani ahuililajznu. ² Laani huinuutis guyu'ni lo Dios ni guleni te gunni dzuunre. Sigajc ni bensa'c toMoisés xtzuum Dios

che guyu'ni loj rexpejn Israel, sigajcza bensa'c Jesucrist dzuun che biädni lo guedxliuj. ³ Sigajc ni yu'ru xpala'n dad lo xpala'n rexi'nni, sigajcza yu'ru

xpala'n Jesucrist lo xpala'n toMoisés. ⁴ Yu' xtrad guiraa refamil lo guedxliuj, niluxh gule'c Dios guiralii bejn, bencheezani guedxliuj. ⁵ Basoob Moisés

diidx si'c te mos, cuanäjni rexpen Dios si'cni gunibee Dios gunni, te baluiini xho gac redzuun ni gajd gac dxejc, luxh naj agujc redzuunga. ⁶ Niluxh Jesucrist basoob diidx si'c xi'npac Dios. Cuanäjni xfamil Dios. Nurnu najcnu xfamil Dios palga chanuutis sudzu'tznu lo xtiidxni, palga guibalajztisnu, palga gutiplajznu dxejli ni guibi' Jesucrist.

Yälrusilajz xten rexpejn Dios

⁷ Ni'cni, si'cpac rnii Sprit Dxi xten Dios:

Naj, palga jiendaigtu xse'ni,

⁸ na'c gun-najdtu lastootu si'c bejn rebejn ni bidxehnäj Dios che cuansajreni lo reyubijdz.

⁹ Ro'c bidxehnäj retoxtadgoldootu Dios sa'csi direni nililajz Dios siädnäreni, niluxh bahuiireni redzunduxh ni bejn Dios nez lojreni tiuu ijz.

¹⁰ Ni'cni laj ni cadxe'ch Dios loj rebejnğa, bejn Dios xhigab:

Sujiannäjreni xhigabguijdxreni,
dina gusanä jiu'reni xcälrusilazä.

¹¹ Ni'cni bidxe'ch Dios lojreni,
bejn Dios te xhigabduxh,
di rebejnğa jiu' te gusilaznäjni.

¹² Bejtznu, colnatiro andi chu tejtü rujn xhigabguijdx, rlajz guibicaj lo Dios, ni nabajn par tejpas, sa'csi dini chalilajz xtiidxni. ¹³ Ni'cni colgulijdx resa'tu guixe-guixee, laga najcni nadxej; te di chu tejtü gacnajd lastooni xcuent reyälrusguee xten redojl. ¹⁴ Sa'csi palga chanuunu sudzu'tznu lo xtidx Dios ni huililajznu che biembeenuni, dxejc yu' xhi rajpnu con Jesucrist. ¹⁵ Si'c caj lo guiitz:

Nadxej, palga jiendaigtu xse' Dios,

na'c gunnajdtu lastootu si'c bejn rebejn ni bidxehnäj Dios lo reyubijdz.

¹⁶ ¿Chu reni'cni bidxehnäj Dios che biendiajgreni xtiidxni? ¿La et laadi guiraa rebejn ni gulää Moisés guedx Egipto, ä? ¹⁷ ¿Chuxh loj bidxe'ch Dios tiuu ijz lo reyubijdz, ä? ¿La et laadi reni biajb lo dojl, dxejc gujtreni, huijiajbreni nez loj reyubijdz, ä? ¹⁸ ¿Chu loj räjpni dipacreni jiu' lo xcälrusilajzni? Loj reni di nusoob xtiidxni. ¹⁹ Ni'c ruhuiinu di niajcdi niu'reni lo yälrusilajz sa'csi direni nililajz xtidx Dios.

4

¹ Ni'cni palga bia'n diidx siu'pacnu lo yälrusilajz con Dios, nanab jia'pnu lagajc nuure didi yu' chu tejnu di gun gaan jiu' lo yälrusilajzga. ² Sa'csi nuure abiejn diaagzanu diidx ni rusia dojl, sigajc biejn diajg rebejnğa; niluxh xlia'si biejn diajgreni diidxga sa'csi bacuadiajgrenini niluxh direni nililajzni. ³ Luxh nuure ni ahuililaaznu siu'nu lo yälrusilajzga; caj lo guiitz gunii Dios rediidxre:

Ni'cni bidxe'chä lojreni, benä te xhigabduxh,
di rebejnğa jiu' te gusilaznäjreni narä.

Mase abaluuxni xtuunni cheni birixtiejli guedxliuj. ⁴ Sa'csi loj stee guiitz caj diidx ni guniini xcuent dxej ni rusilajz bejn:

Xho'p dxej bejn Dios xtuunni, dxejcti basilajzni tebdxej.

Xhet bejndini dxejga.

⁵ Stehuält guniini:

Di rebejnğa jiu' te gusilaznäjreni narä.

⁶ Niluxh yu' reni gajd jiu' loj yälrusilajzga, luxh reni biejn diajgni diidx ni rusia dojl di niu' sa'csi direni nusoob xtiidxni. ⁷ Ni'cni basoob Dios ste dxej gac

“nadxej”. Gudejd xhidajl ijz che gunisac Dios xcuent yälrusilajz. Badeed Dios gunii toDavid rediidxre:

Nadxej, palga jiendiajgtu xse'ni, na'c gunnajdtu lastootu.

⁸ Paru nudeed Josué yälrusilajzga loj rexpen Israel, diru Dios ninisac xcuent stee dxejre. ⁹ Naj ria'nza te yälrusilajz par rexpejn Dios, ¹⁰ sa'csi nani riu' lo xcälrusilaznäj Dios, rusilajzzani lo xtzuumni sigajc basilajz Dios lo xtzuumni. ¹¹ Nanab chanuu gusoobnu xtiidxni te jiu'nu lo yälrusilajzga, te di chu tejnu ni gacnajd lajzni si'c ni gacnajd lajz renani di nililajz.

¹² Sa'csi nasesduxh xtidx Dios, yuduxhza xcälrnibee xtidx Dios. Najcni si'c te guchiil ni caduxh ro'ni, räazni nez neñ redzujt näj yojb. Sigajcza xtidx Dios räaz nez cadre rlia' sa' xsprit näjza xaim bejn. Ruluiiza xtidx Dios rehxigab ni yu' lastoo bejn, näjza redzuun ni rlajz lastoo bejn gun. ¹³ Xheti xhi bencheedi Dios ni naga'tz nez lojni. Guiraliü guyasi ruhuii Dios. Sajpnu gudeednu cuent lo Dios.

Bixhojz ni sajcrü najc Jesucrist

¹⁴ Jesucrist, Xi'n Dios, najc xpixhojzpacnu ni sajcrü, nani abiu' loj Dios. Ni'cni nanab chanuu sudzu'tznu chalilaaznu xtidx Dios. ¹⁵ Xpixhojznu ni sajcrü sajz gulaslajzni nuure te di jiajbnu lo dojl, sa'csi laani sigajcza gudejdni trabajw, baquiil beñdxabni te niujjni dojl, niluxh dini niujn dojl. ¹⁶ Riäjlpac na'c guidxebnu cuedx-guiniabnu lo Xtiosnu ni sanälajz nuure. Na'cza guitujynu, te gulaslajzni nuure, guideb xcälracnäjni gacnäzani nuure.

5

¹ Galooli guiraa rebixhojz ni sajcrü nabee lo rebejn. Bixhojz ni sajcrü rniab lo Dios xcuent rebejn. Luxh lojni rudeed rebejn regon näjza reguidxaa ni gudeedni lo Dios te jiäu lo xtojlrni nez lo Dios. ² Rdejdza bixhojz trabajw sigajc beñgedxliuj, ni'c sajz ga'pni yälndolajz loj rebejn nani nayääl näjza reni abanijt lo Dios. ³ Niluxh sa'csi näjza laani rujjni dojl, nanab gudeedni guidxaa lo Dios te jiäu lo rextojl ni sigajc rudeedni guidxaa lo Dios te riäu lo xtojlr rebejn.

⁴ Rut sajcdi gac bixhojz xcuentcani. Dios najc ni rbejdxni te gacni bixhojz, dxejc rudeedni xpala'nni lojni si'c badeednini lo Aarón. ⁵ Si'cza di Jesucrist niajc bixhojz ni sajcrü xcuentcani. Dios najc nani gulälajni gacni bixhojz ni sajcrü, räjpni lojni:

Luj najclu Xi'nä, narä guleälu nadxej te guinibeelu.

⁶ Scree cajza lo xtidx Dios stee lajt:

Luj najclu bixhojz par tejpas sigajc gujc te niguii ni laa Melquisedec.

⁷ Cheni gubajn Jesucrist lo guedxliujre, gurejdx-gunabzani lo Dios, guredxa'ni biinzani lo Dios nani sajz nudzucajni lo yälgujt; Dios bacuadiajg xtiidxni sa'csi huinälajz Jesucrist Dios. ⁸ Ni'cni Jesucrist mase najcni Xi'n Dios bisieedni basoobni diidx luxh näj ni'c gudejdni trabajw. ⁹ Che bidzujn dxej baluuxni guiraa redzuun ni rlajz Dios gunni, laani gujcn nani rudeed laa bejn nani rusoob xtiidxni lo dojl par tejpas ¹⁰ sa'csi Dios gulälajni bixhojz ni sajcrü, gujcn bixhojz sigajc gujc Melquisedec.

Rxhuñriezgw gusa'nni xcälrlilajzni

¹¹ Rlajznu guiniinu xhidalduxhru diidx xcuent Melquisedec, niluxh nangduxh gusule'nuni lojtu sa'csi nadyejctu, ditu gacbee. ¹² Agujc xchej huililajztu rediidx xcuent Jesucrist. Ariäjlpac gusule'tu rediidxre naj, niluxh alga rquiinrutu chu gusule' rediidxre lojtu stehuält, luxh rediidxre najc rediidx guyasi xten Dios. Agucsactu si'c báz. Rlajztu yäsactu le'ch lacuaa gautu yäjt, bääl; nalajznu, redidxnagajn xten Dios. ¹³ Reni najc si'c báz, rä' le'chtis, direni

gumbesa'c redidksa'c xten Dios. ¹⁴ Niluxh reben guyajl rajw yajt. Sigajcza redidxnagajn xten Dios najc par rebejn ni aguyajl lo xtidx Dios, renani ayu' xcäriejnni, arumbeereni nani najc dzunsa'c, nani najcza dzunguijdx.

6

¹ Nanab guisieedrunu xtidx Dios te churu xcäriejnnu. Na'c guisieedtisnu didx-guyasi xcuent Jesucrist. Na'c guluiitisnu diidx xcuent yälrusiechlajz, xcuent redzuun ni rujn rejt bejn, näj yälrlililajz xtidx Dios. ² Na'c guluiitisnu xcuent yälrobnis, näj yälrudzubnaa yejc bejn, näj xcuent yälrbajnsac reben gut, näj xcuent yälguxhtis par tejpas. ³ Alga do'o guisieedru xtidx Dios te churu xcäriejnnu, palga si'c guniidx Dios jiennu.

⁴ Yu' bejn ni abianij xcäriejnni, ni acua' reyäl'nasa'c ni rudeed Dios, ni rbäjz Sprit Dxaan xten Dios nen lastooreni, ⁵ luxh bidxaglajzreni xtidx Dios näj yäl'nibee xten Dios ni churu jääd. ⁶ Palga laareni guibisacreni lo sa' yäl'nabajn ni gojpreni galoo, diru gacdi guidxaa xmodreni stehuält, sa'csi dxej sajcn si'c ni lagajc laareni gucuasacreni Xi'n Dios lo cruuz, nalajznu susanxtujyreni Jesucrist nez loj rebejn. ⁷ Ben guedxliuj ni biejn diajgni najc si'c najc yuj ni rä' nis che riajbtis nisguij. Palga yujga gudeed yäl'nasa'c loj reni rujn dzuun lojni, sunle' Dios yujga. ⁸ Niluxh palga gudeed yujga ganax yaguejch näjza cuaan ni xhet sajcdi, xlia'sini, sujn rebejn gac nadeni te checni.

Diidx ni rusudzu'tz lastoonu

⁹ Mase rniinu scree lojtu, anajnnu huililajztu xtidx Jesucrist näjza xtiidxni ni ruslaa lo dojl. ¹⁰ Sa'csi Dios najc ni rujn yälguxhtissa'c, diza lajzni jääl ni rujntu la'tu näj yäl'sanälajz ni rajptu par laani che racnäjt rebejtznu lo yälrlililajz, luxh guixe-guixee si'c rujntu. ¹¹ Naj rlajznu tejjatu chanuu ga'p lagajc yälrbalajzre dxe lultli, te gac guiraa ni cabäjztu. ¹² Rlajznu na'c gactu bejn ni rbedxitis, alga guntu sigajc bejn reben galoo, gopdzu'tzreni yälrlililajz ni batipduxh lajzreni, guläjzreni te cua'reni reyäl'nasa'c ni bia'n diidx gudeed Dios lojreni.

¹³ Luxh che bia'n Dios diidx loj toxtadgoldoonu Abram, guniini por lagajc laani sa'csi ruti stee ni sajcru lojni. ¹⁴ Scree gunii Dios: "Guliä sacnäã luj, sunidxäza xhidajl xi'nlu." ¹⁵ Cheni aguläjz Abram xchej, gusojb diidx, cua'ni nani gunii Dios lojni. ¹⁶ Sa'csi cheni rniliipac bejn te diidx, rniireni diidxga por laj ste'ca bejn ni sajcru lojreni, sas che rusä'treni laj bejnga xhetru yu'di xhi gunreni bieyj. ¹⁷ Rlajz Dios gacheepac rexagdoo to Abram sisiojbpac diidx ni bia'nni che guniini loj Abram galooli. Sisiojbpac xtiidxni, sa'csi guniini diidx con lagajc lajni che bia'nni diidxga. ¹⁸ Ni'cni naj yu' tiop diidx ni digacdi guichaa sa'csi digacdi guinii Dios didx-xhii, rusoobpacni xtiidxni, rudeedzani yäl'rbedxilajz loj renani gubig-guxun lojni, loj reni sanuu loj yälrlililajz xtiidxni nani abaniidxni loonu por lagajc lajni. ¹⁹ Laa ni'cni cabäaznu ni rusudzu'tz lajznu si'c duu-guiib con ancl ni rniazdzu'tz te barcw. Si'c rusudzu'tzni lastoonu te jionnu cadre yu'ni detz ladró. ²⁰ Lagajc ro'c biu' Jesucrist xcuent nuure, te galooli baxhalni xnez Dios loonu, te gujcn bixhojzro par tejpas si'c gujczza bixhojz nani laa Melquisedec.

7

Jesucrist najc bixhojzro si'c najc Melquisedec

¹ Galoo che guj Melquisedec reii xten guedx Salem, gujcn bixhojzro xten Gueb Dios. Che gubi' Abram che gulujx guer cadre bagu'tni rereii ni bidxe'ch lojni, huichagloj Melquisedecni, sas gunabni lo Dios te gacnäjru Dios Abram. ² Dxejcti bejn Abram tzuu cuaa guiraa ni bejnni gaan, te badeedni tej cuaani

loj Melquisedec. Laj Melquisedec säloj “reii ni runsa'c yälguxhtis”, dxejctiru reii xten guedx Salem sälojzani “reii xten yälrbedxilajz”. ³ Baluuiiojni lojreni, niluxh dinu gan chu najc xtadni, niclaza chu najc xnanni, niclaza chu najc resa'ni. Dizanu gan guc gojlni niclaza guc gujtni. Gujtni si'c najc Xi'n Dios. Najctiszani bixhojzro par tejpas.

⁴ Naj colhuii, lacti te bensa'c, te benro najc Melquisedec. Lojni badeed toxtadgoldoonu Abram tejga ni sajcro lo tejga tzuu ni bejnii gaan. Luxh Abram najc bejn ni sajcro lo rexpejnii. ⁵ Leii xten Moisés, rnibee xca' rebixhojz ni najc xfamil Leví te cuaa lo sa'reni si'c ni badeed toAbram loj Melquisedec, mase najcreni rexagdo Abram. ⁶ Niluxh di Melquisedec gac xfamil Leví. Niluxh badeed Abram te cuaa xhixtanni loj Melquisedec. Dxejcti benle'ni Abram ni biannäj xtidx Dios. ⁷ Naj rut sajcdi guinii garenca, sa'csi nani sajcro runle' yejc nani guxiiru saj. ⁸ Naj rebixhojz ni rca' tejga lo tzuu ni rajpreni, najc bejn ni rejt. Niluxh rnii xtidx Dios xcuent Melquisedec ni cua' te cuaani galooli: najcni si'c te bixhojz nani nabajn par tejpas. ⁹ Ni'cni saj guiniinu xcuent Leví nani rca' te cuaa, lagajc laani agudijx te cuaaga che badeed Abram tejga yejc tzuuga lo Melquisedec. ¹⁰ Sa'csi mase gajd xi'n toAbram chu che huichagloj Melquisedecni, batijpni lastooni sa'csi abia'n diidx sudeed Dios xajgni. Ni'cni che agudijxni te cuaaga najcni si'cni suganäjni rexajgni.

¹¹ Rexpejn Israel cua' leii che gujc bixhojz relevitas, reni najc rexi'n toAarón. Paru niajc niujnreni nibansa'c rebejn ni huisanäj leiiga, dirureni niquiin niääd stee bixhojz ni di gac si'c Aarón, alga si'c najc bixhojz Melquisedec najcni. ¹² Sa'csi cheni rdxaa te cuaa bixhojz nanab näjza leiiga guidxaa. ¹³ Niluxh rnii xtidx Dios, Dad Jesucrist najc bejn xten garenca famil. Luxh nicla tej bixhojz gajd gac bejn xten familga. ¹⁴ Huenliisi najnnu najc Dad Jesucrist te bejn xten xfamil toJudá, niluxh di Moisés ninii gac te rexpejn Judá bixhojz.

¹⁵ Luxh huenliisi najc ni rniinu, sa'csi abiricaj ste bixhojz ni najc sigajc gujc Melquisedec. ¹⁶ Luxh dini niajc bixhojz si'c rnii releii ni guyu' dxejc. Laani gujtni bixhojz xcuent yälrnibee ni najc par tejpas, ni rut gacdi gutzujl. ¹⁷ Scree najc diidx ni gunii Dios xcuentni:

Luj najclu bixhojz par tejpas si'c gujc te niguii ni laa Melquisedec.

¹⁸ Dxejcti gunijt leii sa'csi xlia'si gujtni, di niajcdi niujn bejn si'cni rniini.

¹⁹ Di xleii toMoisés niujn gaan nibansa'c bejn. Naj lacuaa leiiga rajpnu te xcärlirililazsa'c; ni'c rujn rbignu lo Dios.

²⁰ Dios bejn gacni bixhojz con xtidxliini, ni guniini con lagajc lajni.

²¹ Stecuaa rebixhojz gujcreni bixhojz niluxh et con didxliidire, con laj te benro, niluxh bixhojzre guc bixhojz con didxlii, con laj nani räjp:

Agunilii Dios diidx con lagajc lajni,

niluxh dini gusiech lajni, räjpni:

“Luj najclu te bixhojzro par tejpas,

lagajc si'c gujc Melquisedec.”

²² Ni'cni, Jesucrist najc ni rujn rile' rediidxre, luxh diidxre sajcruni loj xleii Moisés. ²³ Guyu' xhidalduxh stecuaa rebixhojz, sa'csi rejtreni, digacdi chanuureni gacreni bixhojz. ²⁴ Niluxh Jesucrist rajpni yälnabajn par tejpas, naj najczani bixhojz par tejpas. ²⁵ Ni'c rajcza ruslaani bejn lo dojl par tejpas. Ruslaani guiraa renani rbig lo Dios por laani, sa'csi anabajnii par tejpas te canabni lo Dios xcuent laareni.

²⁶ Jesucrist najc bixhojzro nani rquiinnu. Laani najc dxan, dini niujn dojl, agubicajni lo reben-dojl, huäjszani jiaaru xhaguibaa. ²⁷ Dini gac si'c stecuaa

rebixhojz ni nanab ju't man guixe-guixee te guze'c bixhojzroni lo Dios te ganid jiaa lagajc xtojlni. Dxejcti sajc guibi'ni guze'cnini lo Dios xcuent xtojlni rebejn. Niluxh Jesucrist tejtis huält gudejndi trabajw, bejnnini cheni cuajni lo cruzj, baxhe'ni xtiejnni xcuent nuure, gujtni. Si'c gudijxni xtojlnu par tejpas. ²⁸ Leii xten Moisés rusaan gac bixhojzro te bejn nani rejt, niluxh didxlii ni gunii Dios con lagajc lajni guleni tejni gac bixhojzro lagajc Xi'nni nani naya, nani nabaṅsa'c par tejpas.

8

Jesucrist najc nani rusiäjln diidx

¹ Diidx ni sajcro loj rediidx ni caniinu najc scree: bixhojz ni najc xpixhojzronu agurej xladbee Dios lo xcälrdimbicha'ni xhaguibaa. ² Neṅ yu' ni najc dxan, neṅ guidoo ni benchee Dios yu' bixhojzre, xhet neṅdi guidoo ni runchee rebeṅ lo guedxliuj. ³ Guiraa rebixhojz rajc rudeedreni gojn lo Dios, rajcza ju'treni guidxaa te gusejcreni lo Dios xcuent xtojlni, ni'cni nanab ga'p Jesucrist xhi gudeedni lo Dios. ⁴ Paru suga'ni lo guedxliujre, nicla bixhojz dini niajc, sa'csi yu' bixhojz ni rudeed regojn si'c ni rnibee xleii Moisés. ⁵ Niluxh redzuun ni rujn rebixhojzga najc si'c te balaa xten guira'ti ni yu' xhaguibaa. Najnnu najcreni balaa sa'csi balijdx Dios Moisés cheni agojl gunni xquidoo Dios, räjp Dios lojni: “Bahuii te gunlu guira'ti si'cpac ni baluiä lojlu lo dan Sinaí.” ⁶ Niluxh xpixhojznu Jesucrist rujn dzuun ni sajcro, sa'csi najcni nani suga' galäii xnezyuj Dios loj rebeṅ guedxliuj, gusule'ni diidx ni gunii Dios cheni bejn ni xhigabcoob, basa'nni didxcoob loj rebeṅ guedxliuj. Luxh didxcoobre sacduxhruni.

⁷ Paru niajc nusiejch leii ni badeed Dios galooli lo Moisés lajz rebejn, di niquiin niujn Dios ste xhigabcoob. ⁸ Niluxh bahuii Dios xhet cayunsa'cdi rebeṅ guedxliuj, dxejc räjpni:

Naj rniliä sidzujn redxej che gunä stee xhigab,

jia'n stee diidx loj rexpejn Israel näjza loj rexpejn Judá te xca'reni didxcoob.

⁹ Xhet si'cdi xhigab ni benä che bia'nä diidx loj retoxtadgoldooreni neṅ redxej ni gunazä ṅaareni te gulääreni lajdx rebeṅ Egipto.

Laareni direni nusoob xtidxä ni'c basa'näreni, diruna niuäreni.

Si'c gunii Dad, Gueb Dios.

¹⁰ Niluxh diidx nani runä xhigab rlazä jia'n diidx loj rexpejn Israel neṅ redxejre gac scree, räjp Dad:

Sunä chu rexleiä lo xcäriejnreni, sucuaäza xtidxä neṅ lastooreni.

Dxejcti narä gacä Xtiosreni, laareni gac rexpenä.

¹¹ Rut chu tejdi guluii sa'ni,

nicla bejtzni, nicla chu stee bejn gäbreni, “colyembee Dad”,

sa'csi alanumbee guiraareni narä, rebäz sigajc rebeṅgool.

¹² Narä sulaslazäreni susiaä redzundxuudx ni bejnreni, diru lazä guizaj rextojlni, nicla latzsiaj ni bejnreni.

¹³ Che bia'n Dios didxcoob, diidx nani bia'nni galoo agujcni didx-biejw, luxh nani anajc didx-biejw, xhetru sajcdini.

9

Xquidoo guedxliujre näjza guidoo xhaguibaa

¹ Laaca naj. Diidx ni bia'n galoo badeed leii xho gunreni che rajnreni Dios, näjza xho gac guidoo lo guidxliujre. ² Guc-chee guidoo dxejcti gojl te ladro galäiini te gujcnii tio'p yu'. Yu' ni najc ganid laani yudxan. Ro'c suga' candilieer, näjza mex cadre naga' yätxtiil ni aguc le' ³ Ni rojp yu'ga najc dejtz

ladro, ro'c najc yudxanduxh. ⁴ Ro'c suga' te guiib cadro ru' yaal. Najcni ganax oor. Ro'c yu'za te guiijn ni laa “arco de pacto”, najcwni ganax oor, sigajc dejtzni, sigajcza nen̄ni. Nenga yu' te bo't ganax oor. Nen̄ bo'tga, yu' yätxtiil ni laa mana. Lagajcza nen̄ guiijnga yu' bar xten toAarón nani biga', guyu' bid lojni, näjza guiij cadro bacuaa Dios xleii toMoisés. ⁵ Yejc guiijnga caj tio'p figur oor ni najc si'c xangl Dios. Laareni rujn racbee bejn̄ suga' Dios ro'c. Lagajc redee rusäuu con rexhigareni cadro ruxhe' bixhojzro xtiejn guidxaa xcuent xtoj̄l rebejn̄. Ro'cti di gacdiru guiniirunu xcuentreni naj.

⁶ Che gulujx gusucheereni, riu' rebixhojz si'csi si'c nen̄ guidoo, nen̄ yudxan te raj̄nreni Dios si'c gunibee Dios. ⁷ Niluxh nen̄ stee yu'ga ni laa yudxanduxh, ro'c rajc riu' bixhojzrotis. Xtebtisni riu'ni, luxh tejtis huält nen̄ teb ijz, te chanäni xtiejn reguidxaa ni gudeedni te jia xtoj̄lni näjza te jia xtoj̄l rebejn̄ ni najc xpejn̄ Israel. ⁸ Luxh guiraa reni'c ruluii Sprit Dxan xten Dios loonu, gajd yudxanduxh guxal che sugasijc yu' ganid, yu' ni laa dxan, cadro sanuu raj̄nreni Dios. ⁹ Guiraa ni gujc galoo najc si'c te balaa, baluiini xho gacni naj. Regon näjza reman ni rudeedreni lo Dios direni nusansa'c xcäriejn reni rudeed gojn lo Dios, sa'csi xtiejn reman rusäutisni lo xtoj̄l rebejn̄. ¹⁰ Dee najc ganaxtis xhi rajwni, ni rä'ni, con yälrobnis, o xhi stee dzuun ni rujn bejn̄ te ria ganaxtis tiejxhreni che guidzuj̄nli dxej cheni guchaa Dios guira'ti.

¹¹ Niluxh abiääd Jesucrist, naj laani najc bixhojzro xcuent redidxcoob ni sajcro naj. Nacoob guidoro cadro biu' bixhojzre, nasa'cruni naj. Xhet con naadi bejn̄ guc-cheeni. Dizani gac guidoo guedxliujre. ¹² Abiu' Jesucrist cadro najcpac yu' ni laa dxanduxh, niluxh xhet xtiejndi redxib, regon; ganax lagajc xtiejnni ca'ni biu'ni yudxanduxh tejtis huält, te si'c baslaani nuure lo dojl̄ par tejpas. ¹³ Reni basia xtoj̄l bejn̄ galoo najc redee: xtiejn regon näjza redxib, näj cobdäj xten reguidxaa ni rejc nen̄ guidodxanga; bastiojbni guiro'preni yejc reni yu' xtoj̄lni. ¹⁴ Palga basia redee xtoj̄l bejn̄, aticaxh xtiejn Jesucrist sajc gusia dojl̄, sa'csi rajpni yäl̄nabajn̄ par tejpas. Lagajc laani badeedni xtiejnni lo Dios. Niluxh najcni renya sa'csi dini niujn dojl̄, rusiazani xcäriejnnu xcuent retzuun ni xhet sajcdi, te chunu loj Dios ni nabajn̄ par tejpas.

¹⁵ Ni'cni Jesucrist najc nani suga' galäii: nez lo Dios näjza nez loj reben̄ guedxliuj xcuent didxcoob. Yäl̄gujt xten Jesucrist najc te gudzucajni xtoj̄l reben̄ näjza xtoj̄l renani bejn̄ si'cni caj lo leii, te xca' guiraa reni agurejdx Dios yäl̄nabajn̄ par tejpas, si'c bia'n diidx galooli. ¹⁶ Didxcoobre najc si'c che rlanj tej bejn̄ guinibee xho guidis xhixtenni che agojl̄ guetni, nanab gucuaa bejn̄ga lo te guiijt̄z xho guidisni, dxejcti gucuaani lajni. Niluxh xhet sajcdi guiijt̄zga che gajd bejn̄ga guet. ¹⁷ Xhet sajcdi guiijt̄zga che nabañsijc nani bejn̄ni. Sajcni che agujt̄ bejn̄ga. ¹⁸ Ni'cni che bia'n Dios diidx loj rexpejn̄ Israel galoo, gujt̄ te man te bixe' rejn̄. ¹⁹ Che gulujx gunii Moisés rediidx si'c ni caj lo leii loj guiraa rexpejn̄ Israel, bagu'tni rebiser̄, redxib, cua'ni rejnga näjza nis, bahuajdxni guid-xiil xniaa näjza te la' yajg balagbäz, hysopo, dxejcti bastiojbni rejn̄ yejc guiijt̄z cadro caj leii, näjza yejc rebejn̄. ²⁰ Dxejc guniini lojreni: “Rejnre najc seen sile'pac diidx ni abaxhaḷ Dios lojtu.”

²¹ Sigajcza bastiojb Moisés rejn̄ guidoo näj guiraa renani rquiin rebixhojz che raj̄nreni Dios. ²² Leii xten Moisés rnibee jia guiralii con rejn̄, palga di rejn̄ guixe', di xtoj̄l bejn̄ jia.

Xtiejn Jesucrist rudzucaj dojl̄

²³ Ni'cni biquiinpac gujt̄ remanre, bixe' xtiejnni te basiani reni najc xpalaan reni yu' xhaguibaa, niluxh reni yu' xhaguibaa rquiin guixe' xtiejn te ni sajcro. ²⁴ Di Jesucrist niu' nen̄ guidoo ni benchee rebejn̄, ni najc xpalaan guidoopac xten Dios xhaguibaa. Laani biu'ni lagajc xhaguibaa, te laani

suga'ni nez lojpac Dios te caniini xcuent nuure loj Dios. ²⁵ Bixhojzro xten xpen Israel biu' nen yu' ni laa dxanduxh tejtis huält nen teb ijz, ca'ni xtiejn reguidxaa. Niluxh Crist biu' xquidoo pac Dios xhaguibaa tejtis huält par tejpas, luxh ca'ni lagajc xtiejn. Di guiquiin jiu'runi balti huält. ²⁶ Palga nanab gunni si'cni rujn rebixhojz, sajpnj por niejtni te chinaduxh huält cheli birixtiej guedxliuj. Luxh naj, cheni bidzujn dxej, baluiloj Jesucrist tejtis huält, lagajc laani badeedzani xtiejn lo Dios cheni gujtni, cuajni lo cruz te si'c badzucajni par tejpas xtoj̄l rebejn. ²⁷ Guiraa bejn nanabpac guetreni tejtis huält, dxejctiru sidejdreni yäl̄guxhtis xten Dios. ²⁸ Sigajcza tejtis huält badeed Jesucrist xtiejn ni bixe' lo cruz te badzucajni xtoj̄l xhidalduxh bejn. Luxh loj renani cabäjzni suluiilojni stehuält, xhet te gudzucajdiruni dojl̄, alga te gusa'ni xcäl̄rusläa renani cabäjzni.

10

¹ Sa'csi leii xten toMoisés najctis si'c te balaa xten nani siääd naj. Niluxh dini gac si'cpac redidxcoobga. Ni'cni leii, con xtiejn reguidxaa ni rxe' cazob ijz digacdi gunsa'cni rebejn nani guibig lo Dios, sa'csi di xtiejn man gudzucajpac rextoj̄lreni. ² Paru niajc nibicajpac xtoj̄l reni rudeed xtiejn guidxaa, aguläjz rudeedreni xtiejn guidxaa, sa'csi che gubicaj xtoj̄lreni, diru xcäriejnreni gumbee dojl̄. ³ Niluxh yäl̄rejt man näj yäl̄rudeedreni rejn casob ijz rusnajtisreni lajzreni xcuent dojl̄. ⁴ Sa'csi digacdi gudzucajpac regon näjza xtiejn redxib xtoj̄l bejn.

⁵ Ni'cni che biääd Jesucrist lo guedxliuj räjpni lo Dios:

Di rlajzlu xtiejn guidxaa niclaza regon niluxh abejnlu gacä nigui-guedxliuj.

⁶ Dilu nichagljaz yäl̄rejc xten guidxaa niclaza yäl̄rudeed rejn, niclaza gojn ni rudeed rebejn te gusiani xtoj̄lreni.

⁷ Dxejc räpä: “Narä basiälä te gunä si'cni rlajzlu Dad, Dios, (si'cni caj nen reguijtz xcuent ni sacä).”

⁸ Che gulujx gunii Jesucrist diidxga: “Di rlajzlu, dizalu guidxagljaz xcäl̄rejt guidxaa näjza regon niclaza xcäl̄rejc guidxaa, niclaza yäl̄rudeed rejn xcuent xtoj̄l bejn si'cni caj lo leii gun bejn.” ⁹ Dxejcti räjpni: “Narä siälä, te gunä si'cpac ni rlajzlu, Dad Dios.” Dxejc badzucaj Jesucrist nani gujc galoo, te guläxtiejni didxcoob ni bia'n Dios loonu naj. ¹⁰ Abasia Dios lastoonu sa'csi bejn Jesucrist si'c rlajz Dios cheni baxhe'ni xtiejn lo cruz tejtis huält par tejpas.

¹¹ Guiraa rexpixhojz Israel rujnreni dzuun guixe-guixee te rudeedreni lagajctis guidxaa, näjza xtiejn reman, guiraa si'ctis ni caj lo leii, niluxh reni'c digacdi gudzucaj dojl̄. ¹² Niluxh Jesucrist tejtis huält baxhe' xtiejn lo cruz te badzucajni xtoj̄l rebejn par tejpas. Naj agurejni xladbee Dios cadre rnibeeni.

¹³ Ro'c cabäjzni guiraa ni rdxe'ch lojni te cuereni ladzni'ni. ¹⁴ Ni'cni tejtis huält cuajni lo cruz te basiani par tejpas guiraa renani ahuililajz xtiidxni.

¹⁵ Sigajcza rnii Sprit Dxaan xten Dios loonu; najni:

¹⁶ Diidx nani jiannääreni nen redxejre gac scree,

naj Dad Dios: sucuaä rextidxä lo xcäriejnreni,

susäl̄läza xtidxä nen lastooreni.

Dxejcti räjpni:

¹⁷ Diru lazä guizaj rextoj̄lreni nicla rextolguijdxreni.

¹⁸ Ni'cni, cheni abia xtoj̄l bejn, diru quiquiin gudeedreni guidxaa te jia rextoj̄lreni.

Nanab guibignu lo Dios

¹⁹ Ni'cni resa'nu, na'c guidxejbtu, sajz jiu'nu yudxanduxh cadre bixe' xtiejn Dad Jesucrist nani abadeedni lo Dios. ²⁰ Naj yu' te nezyuj, nezsiucoob, nezyuj

xten xcäl̄nabañcoobnu ni baxhalni che badzucajni ladroga. Ni'c säloj cheni biu'ni nen̄ yudxanduxh, badeedni lagajc xtiejnni lo Dios. ²¹ Jesucrist najc xpixhojzronu nani rnibee rexpejn̄ Dios. ²² Ni'cni do'o guibigrunu lo Dios guideb lastosa'cnu, na'c guidxejbdinu, na'cza guitujydinu. Con yäl̄rililajzpac abia lastoonu xcuent rexhigabguijdx, abidiibza tiejxhnu lo nis-ya. ²³ Do'o chanuu sudzu'tznu lo xtiidxn̄i nani huililajznu, na'c guchaanu xhigabnu sa'csi susoob Dios diidx ni bia'nni loonu. ²⁴ Naj̄ do'o guihuii xho jiennu te gacnäy sa'nu te si'c chonälajznu sa'nu nägajcza te jiennu ganax dzunsa'c. ²⁵ Na'c jiennu si'c rujn̄ rebejn̄ nani diru jiääd che rdxagsa'nu. Nanab guiliidxn̄u resa'nu sa'csi naj̄ asiäddzũgajxh dxej ni guibi' Dad Jesucrist.

²⁶ Palga chanuu jienrunu dojl̄, niluxh abiejn̄ diajgnu xtidx Jesucrist, diru gacdi guibicaj xtojln̄u dxejc. ²⁷ Dxejcsii guidxeebtisnu guiläaznu yälguxhtisduxh xten Dios näj guiboo ni guze'c renani rdxe'ch loj Dios. ²⁸ Cheni guyu' chu tej ni di niujn̄ si'c caj lo xleii Moisés, niluxh bidxaag xtidx tio'p o choñ̄ ni nancheepac, räjpreni dini nusoob leii, gujt̄ bejn̄ga, rut balaslajzdini. ²⁹ Maazru yäl̄rusacsíduxh nanab ted renani ruläy yejc Xi'n Dios cheni direni gusobdiajg xtiidxn̄i. Alga ruro'nreni xtiejnni ni baxhe'ni lo cruzj te basianini. Rusanxtujyzani Sprit Dxan xten Dios nani badeed didxcoob lojni. ³⁰ Anancheenu gunii Dios: “Narä susquixä bejn̄; loä siguijx bejn̄”, räjp̄ Dios. Stehuält guniini: “Dad sujn̄ yälguxhtis rexpejn̄ni.” ³¹ ;Cosduxh gac bejn̄ ni jiajb̄ ladzñaa Dios nani nabajn̄ par tejpas!

³² Niluxh col̄snaj̄ lajztu xho gujctu galoo; cheni entis cua'tu xtidx Dios, xho batip̄ lajztu, gudejdtu trabajw sa'csi cua'tu xtidx Dios. ³³ Guyu' resa'tu gudéreni lojni, yu' reni basacsí la'tu nez loj rebejn̄. Guyu'za huält astoo gudejdzatu trabajw sa'csi cahuiitu rebejn̄ nani basacsíreni, cadejdzareni trabajw. ³⁴ La'tu banaj̄ lajztu renani yu' latzguiib, guideb yäl̄rbalajz batip̄ lajztu che cua'reni guiraa xhixtentu, sa'csi gucbeetu xhaguibaa rajptu reyäl̄nasa'c ni sajcro, niluxh yu'ni par tejpas. ³⁵ Na'c gunijttu xcäl̄rililajz xtidx Jesucrist, sa'csi yäl̄rililajzga gun xca'tu yäl̄nabajn̄ par tejpas. ³⁶ La'tu nanab cuedxitu te che abejntu ni r̄lajz Dios, dxejc xca'tu nani aguniini guniidxn̄i. ³⁷ Sa'csi xtidx Dios ni bia'n̄ r̄nii:

Asiäddzũgajxhpc dxej ni jiäädni,

asiäddzũgajxhpc dxej ni jiääd nani siääd, dipacni gaclaa.

³⁸ Renani nabañsa'c sibannäy yäl̄rililajz,

niluxh palga yu' chutej ni guidxejb̄ chalilajz,

dini'c gun guibaa lazä.

³⁹ Niluxh nuure dinu gac si'c reni rusaan yäl̄rililajz te nitreni loj dojl̄. Nuure najcnu renani rililajz xtidx Jesucrist te laa xaimnu par tejpas.

11

Yäl̄rililajz

¹ ¿Xhini'c najc yäl̄rililajz? Yäl̄rililajz säloj cabäaznu sajcpac tejni gajd gac, yu'pacza ni mase dinu fiini, najcni si'cni abahuiinuni. ² Dios huinälajz retoxtadgoldoonu sa'csi huililajzreni xtiidxn̄i.

³ Sa'csi rililajznu, najnnu benchee Dios reguedxliuj, bencheeni guibaa, bencheezani guiraa nani rhuiinu. Con xtiidxtisni bencheeni nani dinu guihuii.

⁴ Gojpza toAbel yäl̄rililajz badzubyaalni rexquidxaani lo Dios. Yäl̄rbijbyaal xtenni sajcro loj yäl̄rbijbyaal xten toCaín. Ni'cni gunii Dios najc toAbel beñsa'c. Naj̄ mase agujt̄ Abel, sanuutis racbeenu xcuent yäl̄rililajz ni gojpn̄i.

⁵ Sigajcza gojp Enoc yälrlilajz, ni'c sinä Dios Enoc xhaguibaa, guideb nabajñni, te na'c niejtni. Diru rebejn nidxälni sa'csi asinä Diosni xhaguibaa. Luxh räjp Dios xcuentni che gajd Dios jinäni, gubaṅsa'cni, baspaani lajz Dios. ⁶ Rut chu tejdi sajc guspaa lajz Dios palga dini chalilajz, sa'csi che guibigni lojni, nanab chalilajzni yu' Dios, chalilajzzani sudeed Dios xcälṅnasa'cni loj renani rguilni, nalajznu renani rlajz gumbeepac Dios.

⁷ Gojpza toNoé yälrlilajz. Che räjp Dios lojni siajbpac nisguij ni gajdreni fi, huililajzni. Bejnni si'c ni räjp Dios. Bidxejbni sa'csi najni rusoob Dios xtiidxni, ni'c bencheeni te canuduxh te di niejt rexi'nni. Sa'csi gojpnä yälrlilajzga, bejnni gubibde rebejn guedxliuj, gunijtreni sa'csi direni nililajz xtiidxni. Dxejcti cua'ni yälṅnabaṅsa'c ni siääd xcuent yälrlilajz.

⁸ Sa'csi gojp toAbram yälrlilajz, basoobni xtidx Dios che gurejdx Diosni, biriini lajdxni te huijni cadre gudeed Dios yuj lojni te cuääzni ro'c. Biriini lajdxni, mase dini gan caro chääni. ⁹ Gojp toAbram yälrlilajz, ni'c huiläjzni si'c benzijt loj reyuj ni räjp Dios gudeedni lojreni. Ro'c guläjzreni si'c lajdx benzijt. Guläjzni nen reyuguijd, sigajcza bejn toIsaac näjza toJacoob, sa'csi näjza lojreni räjp Dios gudeedni yujga. ¹⁰ Niluxh toAbram cayunloj te guejdx nani sudzu'tz, te guejdx nani cuäxtiej Dios, nani gunchee lagajc Dios.

¹¹ Sigajcza gojp toSara yälrlilajz te mase anajcni beṅgool niluxh agudejd chu xi'nni, cua'ni yälṅnabee xten Dios te gujcnä nan, guyu' te xi'nni, sa'csi huililajzni susoob Dios xtiidxni. ¹² Ni'cni mase siäddzuṅgajxh dxej ni guet toAbram, guyu' xhidalduxh xajgni. Si'c rebalxhaguibaa näj si'c reguibäzläle' xten yujxh ni tre' ro' nisdoo, si'c najcreni xhidalduxh, nicla gac guigabreni.

¹³ Guiraa rebejnre gujt, direni nica' yuj nani räjp Dios gudeedni lojreni; niluxh sa'csi rajpreni yälrlilajz, bahuiireni lo yujga zitro, ni'c bibalajzreni, sa'csi anajreni najcreni benzijt, cansajsireni lo guedxliuj. ¹⁴ Reni rnii si'c, rniliireni caguilsijcreni cadre gac lajdxreni. ¹⁵ Paru niujnreni xhigab lajdxreni najc guejdx cadre biriireni, pet niajc nibisacreni ro'c. ¹⁶ Niluxh laareni rlajzreni te lajdxreni ni sajcru, nalajznu lajdx Dios xhaguibaa, ni'c rguilreni. Ni'cni di Dios guitujy gäbreni najcni Dios xtenreni, luxh alabencheeni guejdx cadre cuääzreni xhaguibaa.

¹⁷ Gojpza toAbram yälrlilajz ni'cni cheni bateed Diosni preeb, räjpni loj Abram gudeedni Isaac lojni lacuaa gudeedni xhiil, cuäjbnä gugutni xi'nni lacuaa xhiil, luxh Dios ni najc tejtis aräjp lojni galooli: ¹⁸ “Isaac guniidx chu xhidajl xajglu, xagdoolu.” ¹⁹ Sa'csi nanchee toAbram rajp Dios yälṅnabee te guspajñni rebeṅgut. Luxh si'cza cuasacni xi'nni, ascanu loj rebeṅgut cuasacni xi'nni.

²⁰ Näjza toIsaac gojp yälrlilajz benle'ni toJacoob näjza toEsaú, räjpni xhini'c gun tejegareni. ²¹ Gojpza toJacoob yälrlilajz, che agojl guetni, benle'ni guiro'p rexi'n toJosé. Dxejcti huistieni guzucajni yejc baston xtenni te si'c gojñni Dios. ²² ToJosé gojp yälrlilajz. Che agojl guetni, räjpni sirii rexpejn Israel lajdx Egipto, gunibeezani xho gunnäjreni xtuzjtni.

²³ Gojp rexuczajn Moisés yälrlilajz, ni'c cheni gojl Moisés, bacua'tzrenini chon bäii, sa'csi bahuiireni bäzdaanni. Direni niu xtidx rei ni gunibeeni, räjpni ju'treni bäz niguii. ²⁴ ToMoisés gojp yälrlilajz, ni'cni che aguroobni di rlajzni nirilajni xi'n xindxa'p rei xten Egipto. ²⁵ Bejnni xhigab tednäjni trabajw rexpejn Dios lacuaa niujñni redzuun ni rchaglaiz rujn rebeṅ Egipto, sa'csi najc reni'c dojl, luxh tera'tsi ruspaareni lajz bejn. ²⁶ Par laani maazru sajc tedni lagajc trabajw ni gudejd Jesucrist lacuaa niajpni reyälṅnasa'c xten Egipto sa'csi laani cabäjztisni reyälṅnasa'c nani churu gudeed Dios lojni. ²⁷ Gojp toMoisés yälrlilajz biriini lajdx reEgipto, dini nidxejb yälrdxe'ch xten rei,

huinuutis gusudzu'tzni si'cni najc xhigabni, ruhuiini loj nani di guzen, nalajznu Dios.

²⁸ Gojp Moisés yälirililajz bejnni lanij xten pascw. Gunibeeni baroobreni rejn ro' xpuert rexpejn Israel te che ted angl xten yälgujt nicla te xingan galoo xten rexpejn Israel di guet. ²⁹ Gojp rexpejn Israel yälirililajz gudejdreni galäii nisdoo ni laa nisdoxniaa luxh asdoo loj yubijdz rsiajreni si'c gudejdreni. Niluxh che rlajz rebejn Egipto nidejd, gubi' nis, dxejc gulo'reni nen nis.

³⁰ Xcuent yälirililajz gurebä'n paderguij xten guedx Jericó, cheni basa' gajdz dxej caded huält rexpejn Israel guejdxga. ³¹ ToRahab, te gunaguijdx, gojpszani yälirililajz ni'c dini niejt che gujt renani di nuzobdiidx, sa'csi laani bacua'tzni gaii bejn nani sagula'tz xho najc guejdxga.

³² ¿Xhiruxh guiniä? Di galdi guiniä xcuent toGedeón, xcuent toBarac, xcuent toSansón, xcuent toJefté, xcuent toDavid, xcuent toSamuel, näjza xcuent retoprofe't. ³³ Guiraareni gojp yälirililajz ni'c bejnreni gaan xhidajl reguejdx, bensa'creni yälguxhtis, cua'reni xcälracnäj Dios ni bia'n diidx xca'reni, basäureni ro' rebeedz. ³⁴ Guyu'reni nen te balduxh luxh xhet gujcdireni, gojl baxunreni te di niejtreni con espad. Reni gujc benrdxajg, guzutzu'tzreni gujcreni nadipduxh, gujcreni benduxh lo guer, barilaagwreni resoldaad xten reni rdxe'ch lojreni. ³⁵ Guyu' regunaa ni cuasac rextogoolreni, gubañsacreni lo rebeñgut.

Sgaiireni gujt xcuent yälrusacsí lacuaa nicäjbreni nusiech lajzreni te nuslaa bejnreni sa'csi rlajzreni xca'reni stee yälñabajn ni sajzru. ³⁶ Sgaiireni gudejd trabajw guniyaj bejnreni, gudinnäj bejnreni chiir, cuaduuzareni caden, guyu'zareni latzguiib. ³⁷ Guyu'za reni gujt che bacuaa bejn guij yejcreni o che gujcreni tio'p la' con sier. Guyu'za reni basacsí bejn te guro'nreni yälirililajz. Guyu'za reni gujt con spaad. Guyu' reni cuanzaj nezree nezrec, gojtreni guid-xiil näjza guid-dxib, sa'csi xhet rajpdireni luxh entis rdejdreni trabajw rusacsí bejnreni. ³⁸ Sa' rebejnnga di nungäj reben guedxliuj niääd rebejnnga lojreni. Cuanzaj rebejnnga nez lo reyubijdz cad xhet yu'di xhi gaureni nicla nis te yäreni; cuanzajreni nez nen redajn, nez nen rebiliää näj nez nen guedduxh ni yu' nen yuj. ³⁹ Guiraa rebejnnga gojp yälirililajz, luxh ni'cni huä'p xpala'nreni, niluxh direni nica' ni bia'n diidx gudeed Dios lojreni, ⁴⁰ sa'csi bejn Dios xhigab gunni te dzunsa'c lojreni. Bejn Dios xhigab guniidxni yälñasa'c loonu, naj tejsi guica'nu con laareni nani bia'n diidx guniidx Dios.

12

Guihuitisnu lo Jesucrist

¹ Ni'c najcni si'cni suga'nu galäii guiraa rebejnre luxh cahuiireni xcälirililaaznu. Ni'c do'o guisa'n te laad guiraa reni rusäu lo xnejznu, näjza redojl ni ruxhiid nuure lo xcälñabajnnu, te di jieednu chosaanu nez lo nezyuj ni sasanäanu nez cadre chonnu. ² Do'o guiheidzu'tz nez loj Dad Jesucrist nani guläxtiej, nani guluuxza xcälirililajznu. Jesucrist gudejd trabajw lo cruiz, dini nitujy gujtni lo sa' yälgujtga, sa'csi najnni cheni agudejdni trabajw, sica'ni yälrbalajz; naj agurejni xladbee Dios cadre rniweeni.

³ Colyujn xhigab la'tu xho gudejd Jesucrist ladzñaa reben dojl, te na'c guidxajgtu, na'cza jieedtu lal ni cabäjtuni. ⁴ La'tu gajd xtiejntu guixe' lo yälrucuanäj dojl. ⁵ ¿La abiäl lajztu xho balijdx Dios la'tu si'c xi'nni, ä? Scree caj xtiidxni lo reguijtz; räjpni:

Xinä, na'c cuälazlu xcälñaj Dad niclaza jieedlu che tilñajni luj.

⁶ Sa'csi si'c runnaj Dad renani sanälajzni, rujnni ríaa guiraa renani rca'ni si'c xi'nni.

⁷ Palga gatiyp lajzlu lo xcälñaj Dios, sica'ni luj si'c xi'nñi, sa'csi ¿chu dad di gunñaj xi'nñi? ⁸ Niluxh palga di Dios gunñaj la'tu si'cni runñajni guiraa rexi'nñi, ditu gac xi'npacni, najctu xi'n redolguidx. ⁹ Anajntu cheni gucnu biuux lo guedxliujre, bennaj xtadnu nuure te rsoobnu xtiidxni, te runsa'czanu si'cni rlajzni. ¿Xhicuent dinu cuadiajg xtidx xtadnu ni yu' xhaguibaa te si'c jia'pnu yälñabajñ, ä? ¹⁰ Xtradnu lo guedxliujre bennajreni nuure tio'p-chon dxej, te gac gusoobnu xtiidxni. Niluxh si'c runñaj Dios nuure te jia'pnu te yälñabanya, te gac nayazanu sigajc najcni laani. ¹¹ Guliini xhet xhi yälñajdi ni rchalonu najc laaca che rsiajcnuni, racnaj tiejxhnu niluxh ria'nnu et laadi. Niluxh guiraa renani agudejd loj yälñajga rusoob xtiidxni, rca'reni te yälñabanya ni rbecdxilajzreni.

Riez guze'ni xtidx Dios

¹² Ni'cni colñsudzu'tz reñaatu ni abadxajg, colñsudzu'tz yecxhijbtu ni abadxajg, ¹³ te colñquuil nezyuj xten xtidx Jesucrist te sudzu'tz ni'tu. Na'c guibicajtu lo xnezyujni.

¹⁴ Colñquuil xho cuedxinäjtu guiraa rebejñ. Colñchanä te yälñabanya, sa'csi renani di guibanyadi, digacdi fiireni loj Dad Jesucrist. ¹⁵ Colñhuisa'c te di gunijñ chutejtu lo xcälñracñaj Dios, colñnatiro gac chu tejtu si'c te cuanlaa ni rujñ daan, sa'csi sa' bejñga suxhiñni guiraa renani ahuililajz. ¹⁶ Nicla tejtu na'c ga'p stee gunaa te laad, nungäjñ cuäznäjñi chäältisni. Na'cza gactu bejñ ni di jiu xtidx Dios, si'c gujc toEsaú cheni bato'ni xcälñasa'cni ni najc xtenni sa'csi najcni xingan galoo xtadni. Bato'nini te cua'ni yälñrajwtis. ¹⁷ Anajntu, cheni rlajzni niunle' xtadnini te nica'ni ni najc xten xingangalooni, dini nica'ni mase guc-huin lajzni, binduxhni. Dxejcti diru niajcdi nica'nini.

¹⁸ Colñnatiro, sa'csi la'tu di'tu nibig lo te dajn cadro rajc rsiaj bejñ, te dajn ni galoo cayecduxh guiboo, cadro nacäjy, nacäiboo, cayajcza bedonduxh. ¹⁹ Diza diajgtu niejñ xse' trompet, xse' Dios si'c biendiajg rexpejñ Israel agujc xchero. Luxh che biejñ diajgreni rediidxga, direni nutiplajz, gunabduxhreni na'cru guiniini lojreni. ²⁰ (Sa'csi direni nutiplajz diidx ni caniini, räjpni: “Palga ted te mantis guläj xhuj dajnga, colñju'tni con guij.”) ²¹ Te yälñadxebduxh najc nani guzen ro'c, lagajc toMoisés räjp: “Cayacditä yälñrdxejb.”

²² Niluxh la'tu agubigtu lo dajn xten Sión, cad najc lajdx Dios ni nabajñpac, nalajznu guedx Jerusalén ni yu' xhaguibaa cadro yu' xhidalduxh xangl Dios, ²³ cadro re' reni calä'p xpala'n Dios. Ro'c re'za reni najc xi'n Dios, renani acaj lajñi xhaguibaa. Agubigzatu lo Diospac, ni najc Juejz xten guiraanu, näjza loj resprit xten rebejñ nani abasia Dios te anajcreni beñnasa'c. ²⁴ Agubigzanu loj Jesucrist nani suga' galäii nez loj Dios näj beñguedxliuj xcuent didxcoob ni bia'n Dios, näjza lo xtiejñ Jesucrist ni badeedni lo Dios xcuent nuure. Jesucrist rniab jñäjñ lajz Dios, luxh ni'c sajcro loj nani rniab xtiejñ toAbel. Xtiejñ toAbel rniab quix nani bagu'tni.

²⁵ Ni'c colñnatiro te di cuälaztu nani canii lojtu rextiidxni. Palga di rebejñ nidedbia sa'csi gulälaz nani baluii bejñ ni siäd guedxliujre, ¿xho jiennu tedbianu palga guilälaznu nani ruluii nani siäd xhaguibaali? ²⁶ Xse' Dios basniib guedxliuj galooli, niluxh naj rnisacni: “Ste huält susnibä xhet ganaxdi guedxliuj, susnibä näjza xhaguibaa.” ²⁷ Che gunii “ste huält”, ni'c säloj guibicaj renani benchee Dios ni rac rniib, te jia'n renani digacdi guiniib. ²⁸ Luxh sa'csi lajdxnu ni guniidx Dios digacdi guiniibni, do'o guideed xquixtios lo Dios xcuentni, te si'c chunu loj Dios, chonälaznuni guideb yälñrdxejb näjza yälñadolajz, ²⁹ sa'csi Xtiosnu najc si'c te balduxh ni ruse'c, ni runitlojza.

13

Xho guspaa bejn lajz Dios

¹ Colchanuu lo yälrinälajz sa'ni. ² Di gusaantu gudeedtu rolijztu guidzujn biooz, sa'csi loj reni bejn si'c, yu'reni badeed rolijzreni bidzujn xangl Dios rolijzreni, niluxh direni niacbee chu najcreni.

³ Colsnaj lajztu reni yu' neñ latzguiib, ascanu la la'tu ni yunäreni latzguiib. Colsnajza lajztu renani basacsí bejn, ascanu la la'tu ni cagusacsíreni sa'csi nájza la'tu najctu benguedxliuj si'c najcreni.

⁴ Colga'p xpala'n yälguchnaa te guiban-nayatu con chäältu sa'csi sujn Dios yälguxhtis rebejn ni resnäy chäääl bejn nájza reni rusguee rebenxteb.

⁵ Na'c chanälajztu meel, colguibalaznäj ni rajptu, sa'csi Dios agunii: “Dipacna gusanälu, dizana cuälazälu.” ⁶ Ni'c dinu guidxeeb guiniinu:

Dad ni yu' xhaguibaa najc ni rcanäj narä;
dina guidxebä xhitis ni gunnäy bejn narä.

⁷ Colsnaj lajztu renani baluii guibansa'ctu, ni basule'za xtidx Dios lojtu; colhuii xho nabajnreni te sigajcza colchanä xcälrlilajzreni.

⁸ Sigajc guj Jesucrist naii, sigajcza najcni nadxej, sigajcza sajcnii par tejpas.

⁹ Na'c gusaantu gusiejchreni lajztu xcuent ste'ca yälrluii ni digac si'c najc xtidx Jesucrist. Sacduxh sudzu'tz lastoonu lo yälracnäy ni ruluii xtidx Dios, xhet lojdi yälrajwtis. Xhet sajcdi rebejn nani rujntis xhigab xcuent yälrajw.

¹⁰ Nuurnu rajpnu garenca piään, ro'c digacdi xca' rebixhojz xhi gaurenii si'c ni cua'reni neñ guidoguijd galoo. ¹¹ Sa'csi xpixhojzro xpejn Israel rinä xtiejn reman neñ yu' ni laa dxanduxh te biäu lo dojl xten rebejn, niluxh rize'creni xpääl remanga te laad, dejtz guejdxga. ¹² Si'cza gujt Jesucrist te laad, dejtz guejdx, te basiani xtojl rebejn xcuent lagajc xtiejnii. ¹³ Naj colcho' chonnu loj Jesucrist te laad dejtz guejdx te guideednu trabajw nájza yälxtujy si'cni gudejd Jesucrist. ¹⁴ Sa'csi lo guedxliujre dxunlaasinu, niluxh caguuilnu laadxnu ni chu jiädru, te ro'c guidxunnu par tejpas. ¹⁵ Guideb xcälracnäy Jesucrist do'o guideedtisnu xquixtios lo Dios si'c te gojn ni gudeednu lojni, guiliä'pnu xpala'nni näj jielnu redij. ¹⁶ Na'cza jiälajztu guntu huen, gacnäy sa'tu, sa'csi reni'cni najc redzuun ni rdxaglaiz Dios.

¹⁷ Colcuadiajg xtidx reni rnibee la'tu, sa'csi laarenii rcanäjreni lastoonu, si'cza laarenii sudeedreni cuent lo Dios. Colyujn guibalajzreni gunreni xtzunreni, na'c gac-huin lajzreni sa'csi palga gac-huin lajzreni, xhet sajcdini par la'tu.

¹⁸ Colnab lo Dios xcuent nuunu, sa'csi racbeenu naya xcäriejnnu, rlaaznu laaca jiennu guira'ti dzuun. ¹⁹ Rniä lojtu, guiniabrutu loj Dios, te gun Dios jiojb guibi'ä jiälä lojtu.

Te didxle' näj lult xtixtios

²⁰ Dios xten yälrbexilajz ni baspajn Dad Jesucrist lo rebenjut, Jesucrist najc baxtorduxh xten rexiil xcuent rejn ni bejn gusojb didxcoob xtenni ni najc par tejpas. ²¹ Dios gun gactu bensä'c, bendxojn loj xhitis te guntu ni rlanjzni, näj gunni loj guiraa nuure si'c ni rlanjzni xcuent Jesucrist. ¡Colspaa laiz Jesucrist par tejpas! ¡Sugacni si'c!

²² Resa'nu, rniabä lojtu, colcuedxii lajztu, colcuadiajg rediidx ni rulijdxre, sa'csi riojnga cacuaä te labäz guijtze lojtu. ²³ Colyacbee abirii bejtznu Timoteu latzguiib. Palga guidzungajni ree, siädnäänni jiädhuiä la'tu.

²⁴ Colgudeed xtixtios loj guiraa renani ruluii la'tu näj loj guiraa rebejtznu ni rililajz. Reben Italia ruxhal xtixtios lojtu.

²⁵ Gacnäy Dios guiraatu. Sugacni si'c.

Guijtz Nani Bacuaa Santiaag

Santiaag rucuaa guiitz loj renani nare'ch lo guedxliuj

¹ Narä Santiaag, xmos Dios näjza xten Dad Jesucrist, ruxhalä xtixtios loj guitzubutio'p cuaa rexpejn Israel ni nare'ch lo guedxliujre.

Yälnajn nani runiidx Dios loonu

² Rebetzä lo xtidx Dios, colguibalazduxhtis che rsiajctu recos nani ruquiiltu cuälaztu xnezyuj Dios, ³ sa'csi che rsiajctu reni'c, rsiajctureni te don la guliipac ahuililajztu xtidx Dios, dxejc rsieedrutu yälrbecdxilajz. ⁴ Dxejcti yälrbecdxilajz sajc gunni xtzuunni neñ lastootu, te gactu beñsa'c, bejn ni aguyajl lo xtidx Dios, nani xhet cayäädxd xcalnajni.

⁵ Palga yu' tejtü ni cayäädxd xcalnajni, suguniabnini lo Dios, sa'csi Dios rudeedduxhni yälnajn loj guira'ti bejn, luxh dini guinii didxlaa lojni. Palga guiniab bejni, sudeedza Diosni. ⁶ Niluxh che guiniabni, suchalilajzpacni, na'c guntio'p lajzni, sa'csi bejn ni runtio'p lajzni najc si'c bäj ni sanä bej, nezree-nezre'c sääbni. ⁷ Nani najc si'c, na'c gunni xhigab yu' xhi xca'ni lo Dad Jesucrist. ⁸ Sa'csi nani runtio'p lajzni, lo guiraa ni rujni nadxej rujni tej xhigab, guixee rujni xte'ca xhigab, di gacdi chanuuni tejsi xhigab.

⁹ Te sa'nu ni najc nadolajz, suguibalajzni sa'csi najcni beñro sa'csi guläs Diosni, ¹⁰ sigajcza bejtznu ni yu' xhixtënni, suguibalajzni sa'csi abaluii Dios lojni najcni bejn ni xhet sajcdini, sa'csi nägajc laani sinitlojni si'c rnitloj reguii ni yu' lo cuaan ni yu' loniaa. ¹¹ Sa'csi che rliejn gubijdz näjza te belaa, li rgoļ recuaanga, li riuii reguii ni caj lojni, dxejc rtejbreni, dxejcti agunijt xcälsacruni. Si'cza sinitloj te bejn ni yuduxh xhixtënni laļ ni yu'ni lo xnezyujni.

Xhi xca'ni che tedni trabajw

¹² Chicbaa niguii ni rsiudzu'tz laļ ni cadejdni trabajw, sa'csi che agunii Dios didxsa'c xcuent nani bejni sica'ni coron xten yälnabajn par tejpas ni bia'n Dios diidx gudeedni loj rebejn ni sanälajz Dios. ¹³ Che gunijt tejtü, rujntu dojl, na'c gäbtu: "Dios bejn banitä", sa'csi di gacdi quiquiil Dios te gunni cosguijdx, digacdi gunijt Dios, luxh sigajcza di gacdi gun Dios gunijt te bejn, gunni dojl. ¹⁴ Niluxh tejgatu runijt che rcäy xcäriejntu sa'csi riajb yejctü guntu cosguijdx. ¹⁵ Che riajb yejctü guntu cosguijdx, runijttu rujntu dojl, luxh dojl che abejntuni, riädnäni yälgujt.

¹⁶ Sa'ä ni sanälazä, na'c gusaantu gusgueereni la'tu. ¹⁷ Guiraa recoshueen, guiraa recossa'c xhaguibaali siädreni loonu; Dios ruxhalreni, lagajc Dios ni benchee rebajl xhaguibaa, Dios nani di guchaa, sigajctis najcni. ¹⁸ Lagajc xcuentni bejn Dios gacnu xpejnna sa'csi huililajznu xtidxliipacni, te gacnu rebeñ galoo loj rexpejnna.

Xho nanab jiennu

¹⁹ Acanajntu recosre, sa'ä ni sanälazä. Niluxh tejgatu nanab gusquejnna te gucuadiajnna, per gaclaani te guiniini, gaclaazani te guidxe'chni, ²⁰ sa'csi xcälrdxe'ch bejn dini gun xcäl'nasa'c Dios. ²¹ Ni'cni colcuälaz guiraa recosguijdx, guiraa recoslatsiaj ni ria'n. Guideb yälnadolajz colchalilajz xtidx Dios ni basule'nu, ni yu'pac lastootu, sa'csi ni'c najc ni sajc guslaa xaimtu lo dojl.

²² Niluxh baluii lo guira'ti bejn najctü bejn ni rusoobpactu xtidx Dios, xhet bejnndi ni rucuardiajgtis xtiidxni, ni rusgueeni lagajc laani. ²³ Sa'csi palga najc te bejn te nani rucuardiajgtis xtidx Dios, niluxh dini gusoob diidxga, najcni

si'c te bejn ni ruhuii lojni loj te guihuajn. ²⁴ Sa'csi che ruhuiini xho najcni, sägajcni, riälläzgjajcni xho najcni. ²⁵ Niluxh nani ruhuidzu'tz lo leisa'c, nalajznu leii nani rusläa bejn, luxh rusobpacni leiiga, nani lacuaa jiallajzni nani riejn diajgni, rujnpacni ni caj lo leiiga, bejn ga najc ni sajp yälrbalajzpac lo xhitis ni rujnni.

²⁶ Palga yu' tejtü ni rujn xhigab najcni te bejn ni randuxh Dios, niluxh di gacdi gusauni ro'ni, guiraløj rniini, bejn ga rusguee lagajc laani, luxh xhet sajcdi yälrajn Dios xtenni. ²⁷ Yälrajn Dios ni najc guliipac, ni xhet nu'chdi lojni najc scree: chahuiini rebisiäjb, näjza regunaa ni agujt chäälni che yu' xhi rquiinreni, näjza na'c säblajztu guntu nani rujn reben guedxliuj ni di chalilajz xtidx Dios.

2

Nanab tebloj jiennänu guira'ti bejn

¹ Resa'ä, la'tu ahuililajztu xtidx Dad Jesucrist ni rajp guiraa yälrdimbicha', ni'c di gacdi guntu xhigab sajcrü tej bejn lo sabejn ni. ² Palga guidzujn te bejn xquidootu yu' niloor naani, najcwni ladsa'c, dxejcti jiu'za te bejn nani xhet rajpdi, najcwni ladyujxh, ladbeed, ³ dxejcti la'tu jiurutu nani najcw ladsa'cga, naatu: “Ree gurej lo yagxhilsa'cre”, dxejcti gäblu lo bejn ni xhet rajpdi: “Rec gusulii o gurej lo yujre”, ⁴ ¿la xhet rujnditu xhigab garenca najc tej bejn lo sa'ni, ä? Luxh dxejc acayajctü si'c juejz ni rujn xhigab guijdx.

⁵ ¡Colgucua diajg, betzä ni sanälazä! Agule Dios bejn nani xhet rajpdi lo guedxliujre te ga'preni yälirililazduxh, te lo xcälrnibee Dios xca'reni xcäl'nasa'c ni bia'n diidx gudeed Dios loj renani sanälajzni. ⁶ Niluxh la'tu agulälaztu rebejn nani xhet rajpdi. ¿Xhixh xhet laadi rebejn ni rajp ni rusacsitu, li rgobxhajxhreni la'tu, rinäreni la'tu loj reguxhtis, ä? ⁷ ¿La xhet laadi rebejn ni rajp ni rniyaj loj Dios ni sacduxh? La'tu abirilajtu rexi'n Dios.

⁸ Palga guliitu cagusoobtu leii xten xreiinu Dios, si'cni caj lo xquijtz Dios scree: “Colchanälajz sa'tu sigajc rinälajztu lagajc la'tu”, laaca rujntu. ⁹ Niluxh palga rinälajzrutu tej cuaa bejn lo stee cuaa bejn, cayujntu dojl, luxh xleii Dios rniij najctü bejn dojl, bejn ni rbälaz leii. ¹⁰ Palga yu' te bejn ni rusoob guiraa ni caj lo xleii Moisés, niluxh runijtni lo tejtis diidx ni caj lo leii, abanijtpacni, najcni si'cni dini nusoob nicla tej diidx lo guideb leiiga. ¹¹ Sa'csi lagajc Dios ni gunii: “Na'c guesnäjlü bejn ni di gac chäällu”, lagajc laani guniizani: “Na'c ju'tlu.” Palga dilu guesnäjlü bejn ni di gac chäällu, niluxh rugu'tlu te bejn, abanijtlu xcuent guiralii releii. ¹² La'tu colguinii, colguibajn si'c rebejn ni gun Dios yälgujxhtis con xtiidxni ni rusläa bejn lo dojl. ¹³ Sa'csi renani di gulaslajz bejn, che gun Dios yälgujxhtisreni, dizani gulaslajz laareni. Sajcrü yäl'rulaslajz lo yälgujxhtis.

Yälirililajz näj dzuun ni rujn bejn

¹⁴ Resa'ä, ¿xhi sajc palga guinii te bejn: “Ahuililazä xtidx Dios”, niluxh dini gun dzuun ni riäjil gunni, ä? Sa' yälirililajzre, ¿la susläanini lo dojl, ä? ¹⁵ Palga yu' te bejznu o te bisiajn nu ni dini ga'p xhajbni, luxh xhetiza xhi gauni, xhi yäni, ¹⁶ luxh gäb tejtü lojni: “Sucuedxi lajzlu jiilu, suguidxa' lajzlu, suguidxaj xque'lu”, niluxh dini gudeed nani caquiinni, ¿xhi sajc rediidx ni räjpni lojni, ä? ¹⁷ Sigajcza yälirililajz nani di guquiiil bejn gunreni xtzüun Dios najc si'c te ni agujt, sa'csi dini guquiiil bejn gunreni dzuun.

¹⁸ Yu'za reni naa: “Luj rajplu yäl'rilibajz, narä runä xtzüun Dios; baluii narä xcäl'rilibajzlu xhet näjdi xtzüun Dios, dxejcti narä suluiä xcäl'rilibazä xcuent rextzüun Dios ni runä.” ¹⁹ La'tu rililajztu yu' tejtis Dios. Laaca rujnlu, niluxh näjza rebejdxab rililajz yu' tejtis Dios, racdiptlireni, rdxebduxhrenini.

²⁰ ¿La di rlanjtu gacheetu, bennayääl? ¿La ditu gan, yälrlililajz ni di guichagnäj xtzuum Dios najc te yälrlililazgut? ²¹ Dios badzucaj xtojł toxtadgoldoonu Abram sa'csi bejn ni si'c gunibee Dios gunni, che badzuubni xingaanni Isa'c lo piään, nugu'tnini nez lo Dios. ²² Colhuidi xho tejsi junt sadxaag xcälrlililajz to Abram dzuun ni bejn ni, dxejcti sa'csi bejn ni nani gunibee Dios gunni, bejn Dios gujc xcälrlililajz ni sa' yälrlililajz nani rlanj Dios ga'p rexpejn ni. ²³ Dxejcti huile' xtidx Dios cadre caj scree: “Abram huililajz ni räjp Dios lojni, ni'cni badzucaj Dios xtojł ni, cua' Dios Abram si'c te bennaya.” Birilajzani “xamiigw Dios.”

²⁴ Ni'cni ruhuiitu rca' Dios te bejn si'c bennaya nez lojni xcuent xtzuum Dios ni rujnzani, xhet ganaxtis xcuent xcälrlililajz bejn ga. ²⁵ Sigajcza gusajc to Rahab, ni gujc te gunadxab. Dios badzucajza xtojł ni, bejn Dios xhigab najcni te bennaya sa'csi bejn ni xtzuum Dios che badeedni rolizni bacua'tzloj tio'p xpejn Israel ni gujc guixhajn ni sagula'tz guejdxga, dxejc gucnäj nireni te siireni ste'ca nez yuj. ²⁶ Sigajc ni di gacdi guibajn tiejxh bejn palga xheti sprit, sigajcza di gacdi guibajn yälrlililajz palga dini gun dzuun ni rnibee Dios gunni.

3

Rediidx nani rnii luudxnu

¹ Resa'ä, na'c gac xhidajltu bejn ni ruluidi xtidx Dios, sa'csi anajnnu rac yälguhtisroru rebejn nani ruluidi xtiidxni. ² Sa'csi guiragajcnu riennu xhidajl cuua dojl. Palga yu' te bejn ni di gunijt lo diidx ni rniini, laani najcni te bensa'c, rajcza rnibeeni guideb tiejxhni. ³ Palga rusälnu guib ni ru' ro' cabaii te chääni cadre rlanjnu jini, rnibeezanu guideb xtiejxhni. ⁴ Colhuidi rebarcwro, mase siolduxhneni, luxh rebeduxh rulanaareni, niluxh capitán ni rusaj barcw lo nisdoo, te guibbáz ni caj xhajn barcw nen nis, con ni'ctis rinänini cadrotis rlanjni. ⁵ Sigajcza najc luudxnu, najcni te labáz tiejxhnu, luxh colhuidi lacti didxro rniini. Najcni si'c te balbáz ni rajc ruze'c guiragajc reyajg ni yu' dajn. ⁶ Luxh luudxnu najc si'c te bajl. Rnii luudxnu guiraa redidxdxuudx ni rnii reben guedxliujre nani rdxe'ch lo Dios. Lo guiraa rela' ni najc tiejxhnu, laa luudxnu ni rundxuudx guideb tiejxhnu. Luudxnu ralguij con xquiboo gabijl. ⁷ Rebejn sajg gusiadcooreni guiraloj guidxaa, guiraa mane', guiraa bäl, guiraa man lo nisdoo, abasiadcoo bejnreni, ⁸ per nicla tej bejn di gacdi gusiadcoo lujdxni. Dini cuedxi, guidxani cosguijdx, najcni si'c te bäl ni rauya'ni rugu'tni te bejn. ⁹ Lagajc luudxnu rliä'pnu xpala'n Dios Xtdnu, lagajc laani rniyajnu sabejn ni benchee Dios sigajc najcni. ¹⁰ Tejsi ro'nu rnile' lo Dios nägajcza rgue lo bejn. Rebetzä, xhet si'c di nungäjłdi gacni! ¹¹ ¿La rbää bejn nisnejxh näjza nisrop lo tejsi bisie, ä? ¹² Betzä, ¿la caxajsi sajg xcaj aceitun loj te yagiigw, ä? ¿O la sajg xcaj iigw lo te yaguub, ä? Sigajcza digacdi guirii nisnejxh näjza nisrop lo tejsi bisie.

Yälajn ni siäd xhaguibaa

¹³ ¿Chuni'c lo guiraatu yu' xcäriejn ni, nanduxhni, ä? Suguluiini xho najcni xcuent xcäl naba'nsa'cni, sugunni xtzuumni guideb yäl nadolajz ni rudeed xcäriejn ni. ¹⁴ Niluxh palga yu' yälrdxe'ch lo sa'lu ni runnanlaa lastoolu, näjza rujnlu guira'ti parsi xcäl nasa'c lagajc luj, na'c gaclu gualajz, sa'csi ni'c najc si'c ni canilu didxrusguee xcuent xtidxlii Dios. ¹⁵ Sa'csi sa' yälajnre, xhet xhaguibaadi siädni, alga najcni yälajn xten guedxliujre, xten reben guedxliuj, xtenza reben dxab. ¹⁶ Sa'csi cadre yu' yälrdxe'ch lo sa'ni, näj cadre rujn bejn guira'ti parsi xcäl nasa'c lagajc laani, ro'c yu' biey, yu' guiraloj latsiaj. ¹⁷ Niluxh yälajn ni ruxhal Dios, ganiddoo najcni naya, dxejcti rulecdxini xcäriejn bejn, dxejc rujn ni rajc bejn nadolajz lo sa'reni, rujnzani saru runnäj bejn sa'reni, rulazlajz bejn sa'reni, rujnzareni guiraloj

dzunsa'c, runle'pacreni xtiidxreni, direni guinii tej diidx laaga cayujnreni garenca dzuun. ¹⁸ Renani rguuil yälbedxi, yälbedxi rbe'creni te xca'reni te yäl_naba_nnaya nez loj Dios si'c xcäl_nasa'creni.

4

Ni nabannäj guedxliuj

¹ ¿Casiäd rebiey, reyälrdxe'ch lo sa'ni ni casiajctu? ¿La direni jiaäd xcuent lagajc xhigab ni yu' lastootu, ä? Lagajc rexhigabga rujn biey neñ lastootu, ruscäyreni xcäriejntu. ² La'tu rlanjtu ga'ptu nani ditu ga'p, dxejcti rugu'ttu sa'tu. Rsiäblajztu xhixten sa'tu, luxh sa'csi digacdi xca'tuni, dxejc rucuanäjtu sa'tu, rdilnäjtü sa'tu. Ditu ga'p nani rlanjtu sa'csi ditu guiniabni loj Dios. ³ Rniabtuni, niluxh dini guniidxnini sa'csi xhet laadi najc xhigabtu gunabtuni, alga gunabtuni sa'csi rlanjtu gunijttuni si'cni rlanjtu. ⁴ ¡Aii! Bejn ni di gandzu' Diostis. ¿La ditu gan bejn nani rlanj gun redzuun ni rujn reben guedxliuj, bejn ga rdxe'chreni lo Dios, ä? Ni'cni palga yu' chu tejtü ni rlanj chanuu lo ni rajc lo guedxliujre, bejn ga rdxe'ch lo Dios. ⁵ O ¿la rchalotu xlia'si caj lo xtidx Dios rediidxre: “Sprit ni baxhal Dios te cuääzni neñ lastoonu, randzu'ni nuurnu sa'csi rlanjni guinibeeni nuurnu”? ⁶ Niluxh runiidxru Dios xcälracnäjni loonu. Ni'cni rnii xtiidxni scree: “Dios rdxechnäj renani runnaro lagajc laareni, niluxh rudeedruni xcälracnäjni lo reben_nadolajz.” ⁷ Coljiu'pac lo xnezyuj Dios. Colsudzu'tzpac te di guntu ni rlanj ben_dxab, te guxunni lojtu. ⁸ Colguibigrü lo Dios te guibigzani lojtu. Bendojl, colquiib naatu, nalajznu na'cru guntu latsiaj; colgusia lastootu, la'tu ni runtio'p lajztu. ⁹ Sugacnaj lajztu, suchuti xliajs, colyonduxh. Colguchaa xcäl_ruxijstu, colca' yälhuin, colguchaa xcälrbalajztu, colca' yälroon. ¹⁰ Colyajc si'c bejn ni xhetliidi sajz nez loj Dad Jesucrist, te laani guiliäsni la'tu gunni la'tu benro.

Na'c guiniyajtu sa'tu

¹¹ Rebetzä, na'c guiniyajtu resa'tu. Sa'csi renani rniyaj sa'ni o rujnni yäl_guxhtis sa'ni, reni'c rniyaj xleii Dios, rujnreni yäl_guxhtis xleii Dios luxh palga guntu si'c, dirutu gac renani rusoob xtidx Dios, alga najctu juejz xten leii. ¹² Tejtis najc nani runiidx leii loonu, tejtis najc juejz; najcni nani rajc ruslaa bejn lo dojl, nani sajzca gunitloj bejn. La'tu, ¿chuxh najctu te guntu yäl_guxhtis lo sa'tu, ä?

Dinu gan xhi gac guixee

¹³ Naj colcuadiajg dee, la'tu ni rniitu, nadxej o guixee chonnu te guejdx nezrec. Ro'c guideednu tebijz te guiziinu, guito'nu te jiennu gaan meel. ¹⁴ Luxh nicla gantu xho gac xcäl_nabajntu guixee. Xcäl_nabajntu najc si'csi te za nani rienloj tera'tbäz, dxejcti rnitlojni. ¹⁵ Hueenru guiniitu scree: “Palga rlanj Dios sibaannu, te jiennu dee o dec.” ¹⁶ Niluxh si'c ni rujntu naj, rajc guyalajztu rniitu didxro; luxh guiraa redidxroga najc dojl. ¹⁷ Ni'cni ni najn xho riäj gunni, palga dini gun si'c, rujnni dojl.

5

Rulijdxni rebejn ni yu' xhidajl xhixtenti

¹ Colgucua diajg xtidxä, bejn ni yu' xhidajl xhixtentu. Colyoon, colcuedxa' xcuent recasionduxh ni sactu. ² Guiraa rexhixtentu nani rajptu aguxhijn, luxh rexhajbtu agudajw rebaguiidni. ³ Oor näjza pla't xtentu agubibtiejnni, aguxhijnni. Lagajc dee gun gacbee Dios ditu niujn ni rlanj Dios guntu, lagajc ni'c gun chectu, nitlojtu. ¡Xlia'si batiedajntu xhixtentu neñ redxej lultga! ⁴ ¡Colhuii! Ditu niguixsa'c loj reni bejn xtzuuntu, ni'cni laareni cayujnreni

yälquij lo Dios xcuenttu. Luxh xhadijgli Dios xten reangl ni yu' xhaguibaa abidzujñ yälquij xtentu ni cabe'c renani batie' xcäl'nasa'ctu. ⁵ Agubansa'cpact lo guedxliujre, bejntu lanij si'ctis ni rlanjztu, abastio'tu lastootu neñ redxej xten yäl'ru'gu't. ⁶ Gudiiltu xho bagu'ttu rebeñsa'c luxh laareni dxiitis gusujreni, xhet bejndireni te na'c nugu'ttureni.

Colcuääz jiädxhii Diostu

⁷ Resa'ä, dxitis colcuääz guidzujñ dxej cheni jiääd Dad Jesucrist. Colhuii xho rujñ bejñ ni rbe'c binij, dxitis rbäjzñi gac xcäjñi lañ ni riajb nisguigaloo näjza nisguij ni riajb lult. ⁸ Si'cza la'tu colcuääzdxñi, colgustioob lastootu sa'csi asiäddzujñgajxh dxej ni jiääd Dad Jesucrist. ⁹ Resa'ä, na'c chale'ctu xquej sa'tu, didi gun Dios yäl'guxhtis la'tu, sa'csi asiäddzujñgajxh dxej che guidzujñ Dios ni najc Juejz. ¹⁰ Rebetzbidä, colhuii xho gudejd reniguii nani bacuaa xtidx Dios trabajw galoo, xho guläjjzareni. ¹¹ Colhuii xho rniinu chicbaa renani guläzdxñi lo trabajw ni gudejdreni. Abiejñ diajgzatu xho bejñ Job che gudejdñi trabajw, anajnzatu xho guzajcñi xcuent redzunsac ni bennäsac Diosni, ni ruluiloj xho riaduxh Dios bejñ, rapduxhni yäl'rulasajz.

¹² Rebetzä, che ria'ntu diidx lo te bejñ, gunatiro palga gusä'ttu xhaguibaa, o guedxliuj, o xhi steeni. Che naatu: “Mbaj”, ni'ctisza colguinii. Che naatu: “Na'c”, ni'ctisza colguinii te na'c gun Dios yäl'guxhtis la'tu.

¹³ ¿La yu' tejtñ ni cadejd trabajw, ä? Suginiabni lo Dios. ¿La yu' chu tejtñ ni cabalajz, ä? Sugolñi dij te guiliä'pni xpala'n Dios. ¹⁴ ¿La yu' chu tejtñ ni cayacxhuu, ä? Sucueedxñi rebeñgool ni rnibee neñ guidoo, te guiniabreni lo Dios xcuentni lañ ni cagusälzareni se't lo cuajñi con laj Jesucrist. ¹⁵ Luxh palga rililajzpacreni che canabreni, siajc benracxhuuga, siliäs Jesucrist bejñga. Luxh palga bejñni dojl, sibicaj xtojñi. ¹⁶ Ni'cni colguxhobdojl lo sa'tu, colñab lo Dios xcuent sa'tu te jiajctñ. Che rniabduxh te beñ naya lo Dios, dzunroza rujñ Dios. ¹⁷ Elías, te bejñ ni gunii xtidx Dios agujc xchero, gujca te bejñ sigajc najcnu. Gunabdipni loj Dios te na'c jiajb nisguij, luxh di nisguij niajb lo guedxliuj choñ ijz garol. ¹⁸ Dxejc gunabsacni lo Dios, dxejc bixal xhaguibaa, biabsac nisguij, dxejcru gujc reyäl'nasa'c xtenreni lo guedxliuj.

¹⁹ Rebetzä, palga yu' chu tejtñ ni guibicaj lo xtidx Dios, luxh yu' chu gacnäj guibisacni lo xtidx Dios, ²⁰ sugacbee bejñ nani racnäj guirii beñdojl lo xnezyuguijdxñi te guibisacni lo Dios, bejñga agucnäjñi te gulaa xaimni lo yäl'gajt, te gubicajza guiraa xtojñi, mase xhidalduxh najc xtojñi.

Guijtz Ganid Nani Bacuaa Pedr

Pedr cacuaa guiitz loj reni rililajz ni nare'ch

¹ Narä Pedr, te apost xten Jesucrist, cacuaä guiitzre loj renani agule Dios gac rexpejn nani rbäjz si'c benzijz lo reguedx Ponto, Galacia, Capadocia, Asia, näjza Bitinia. ² Xtadnu Dios gule la'tu galooli bencheeni niguii, aguleni la'tu par lagajc laani te gun Sprit Dxi xtenni xtzuumni neñ lastootu te gusoobtu xtidx Jesucrist te jia lastootu con xtiejn Jesucrist. Rniabä lo Dios gacnäduxhruni la'tu, guscuecdxini lastootu lo guiraliiti.

Te yäl'nabajn ni cabäaznu

³ Colguiliä'p xpala'n Dios ni najc Xtad Jesucrist, Dios nani xcuent xcäl'rulaslazduxhni bejn ni gojpn te yäl'nabañcoob sa'csi baspañsacni Jesucrist loj rebengut. Sa'csi rajpn yäl'nabañcoob, ni'c nadippac lajznu. ⁴ Ni'cni laani suniidxni te yäl'rusalajz ni di nitloj, ni di xhiñ, ni di jiuu si'c riuu rebalajc. Yäl'rusalajzga aguluchedzu'tzni xhaguibaa par la'tu, ⁵ nani cayapdzu'tz xcälmilaagwr xten Dios sa'csi rililajztu xtiidxni, te guluii Dios guira'ti ni rajpn par la'tu, ni arapcheeni te guluiinireni lojtu che luux guedxliujre.

⁶ Ni'cni rbalazduxhtu, mase nanab tedtu balti trabajw gaie'si dxej lo guedxliujre, ⁷ te guzeñ xho rililajztu. Xcäl'r'ililajztu sajzru lo oor nani rnitloj, niluxh xcäl'r'ililajztu di nitloj, mase tedni lo guiboo, ni'cni sinii Dios didxsa'c, didxro, siliä'pni xpala'ntu che guibisac Jesucrist lo guedxliujre guideb xcälmilaagwrni, näjza xcäl'rdimbicha'ni.

⁸ Mase gajdtu fii lojni, sanälajztuni. Mase ditu fii lojni naj, ahuililajztu xtiidxni, rbalazduxhtu guideb yäl'rbalajz ni rut rajcdi rusule', sa'ni yu' xhaguibaatis, ⁹ sa'csi xcäl'r'ililajztu suslaa xaimtu lo dojl, sica'tu yäl'nabajn par tejpas.

¹⁰ Luxh xcuent yäl'ruslaa dojlre, rebejn nani gunii xtidx Dios agujc xchero, laareni abasulexgaareni xcuent xcäl'racnäj Diosre nani siäd lojtu. Luxh bisiedduxhrene, gunabdiidxzareni, ¹¹ te rlajzrene gacbeerene chu bejn o gucpac gac nani cagusä't Sprit xten Crist ni yu' neñ lastooreni che gunixgaani xho nungäjl ted Jesucrist trabajw, dxejzru xcasacni yäl'rnibee. ¹² Baluii Dios lojrene, di rediidxga soob neñ redxej ni nabajrene, alga par la'tu najc rediidxga. Naj agunii rebejn ni rusule' xtidx Dios rediidxga lojtu. Abasule'reni xtidx Jesucrist sa'csi xhaguibaali baxhal Dios Sprit Dxi xtenni te cuäazni neñ lastooreni. Näjza rexangl Dios ni rbäjz xhaguibaa rlajz gacbeerureni rediidxga.

Xcäl'nabañnayanu nez loj Dios

¹³ Ni'cni, colsanij xcäriejntu, colgusudzu'tz lastootu, guideb lastootu colyenloj yäl'racnäj xten Dios ni abia'n diidx xca'nu che guibisac Jesucrist lo guedxliuj. ¹⁴ Gactu si'c biuux nani rusoob xtidx xtadni. Na'cru xcäjbtu guntu redzunguijdx ni bejntu galoo che gajdtu gumbee Dios. ¹⁵ Dios ni gule la'tu najc dxan. Sigajcza la'tu, loj guiralii ni rujntu colyajc bendxan. ¹⁶ Sa'csi lo xtidx Dios caj scree: "Sajctu bendxan sa'csi narä nacä dxan."

¹⁷ Palga la'tu rniitu "Dad" lo Dios nani tebloj rujn yäl'guxhtis loj guiraa bejn xcuent dzuun ni bejn ni, la'tu riäjl guidxejbtuni guiraa dxej ni nabañsijctu lo guedxliujre. ¹⁸ Anajntu di Dios nudeed yäl'nasa'c ni rnitlojdi, si'c oor näjza pla't, te baslaani la'tu lo recostumbr ni cua'tu lo retoxtadgoldootu. Recostumbrga xhet sa'cdireni. Di Dios nudeed oor nicla pla't te baslaani la'tu,

¹⁹ badeedni rejn ni sacduxh te baslaani la'tu loj xtojltu. Rejn si'c xtiejn te xiil ni naya, xhetpac najcdini, xtiejn lagajc Jesucrist. ²⁰ Guliipacni che gajdli guirixtiej guedxliujre, gule Dios Jesucrist, niluxh najru, nen redxelult che gajd guedxliujre nitloj, biädluilojni par xcäl'nasa'ctu, ²¹ la'tu nani rililajz xtidx Dios xcuent Jesucrist. Luxh Dios baspañsac Jesucrist loj rebengut, badeedni yäl'nibee lojni, ni'cni ahuililajztu xtidx Dios, luxh Diostis cayenlojtu naj.

²² Naj sa'csi abasoobtu xtidxliini, te si'c abasiatu lastootu te gac chanälajztu sa'tu, naj guideb lastootu colchanälajzpac sa'tu. ²³ Sa'csi acua'tu xcäl'nabañcoobtu xcuent xtidx Dios ni najc par tejpas, et xcuentdi xtidx beñ guedxliuj ni rnitloj. La'tu najctu si'c cuaan ni rliejn lo bejdz ni siääd xhaguibaa, xhet lo bejdzdi ni rnitloj. ²⁴ Galooli gunii Dios scree:

Guiraa reben guedxliuj najc si'c recuaan,
guiraa xcäl'nasa'creni najc si'c reguii ni rcaj lo cuaan,
recuaan rgol, lirtejbza reguii xtenni,

²⁵ niluxh xtidx xtad Jesucristnu rsiudzu'tzni tejpas.
Luxh diidxre najc diidx ni basule'reni lojtu.

2

¹ Ni'cni colgusaan guiraa redzunguijdx ni yu' lo guedxliuj, na'c gusgueetu sa'tu, na'c guntiop lajztu, na'c chuguij lajztu xhixten sa'tu, na'c guiniyaj sa'tu. ² Si'c riojl rebäznite' le'ch, si'cza colquiil xtidx Dios par sprittu. Coljiojl xtidx Dios te gustioobruni la'tu lo yäl'ruslaa lo dojl, ³ palga agucbeetu lacti hueen najc xcäl'racnäj Jesucrist.

Crist najc si'c te guij ni nabajn

⁴ Colguibig loj Jesucrist ni najc si'c te guij ni nabajn. Laani suniidx yäl'nabajn par tejpas loonu. Rebejn badzucaj guijga, niluxh Dios gulenini sa'csi sacduxhni. ⁵ Sigajcza tejgatu najctu si'c guij ni nabajn, ni'c colgusaan xca' Dios la'tu, reguibajn, te con la'tu gunchee Dios te yu' cadre cuääz Sprit xtenni, te gactu rexpixhojz Dios, nani nayapac lastooreni. Ni'cni sa'csi najctu tejtis con Dad Jesucrist sudeedtu lo Dios guiraa xcäl'nasa'ctu con xpriit xtentu. Dee najc nani rchaglajz Dios. ⁶ Sa'csi galooli gunii Dios scree:

Agule'cä te bejn nen guedx Siön, nalajznu Jerusalén,
ni gac si'c te guisa'c, te guiro ni rsiuj squiin te yuro.
Chutis bejn ni chalilajz xtiidxni, dini jianxtujy.

⁷ Lojtu ni ahuililajz xtiidxni najcni si'c te guisacduxh, niluxh loj renani gajd chalilajz xtiidxni, najcni:

Guij ni gulälaz renani cayunchee yu',
lagajc guijga gujc guijpac ni baliib squiin xten yu'ga

⁸ näjza:

Te guij ni rliaj ni' bejn, ni ruzälta'reni,
laareni riajbreni sa'csi direni gusoob xtidx Dios,
luxh agunibexгаа Dios nitlojreni.

Renani gule Dios

⁹ La'tu najctu te cuaa bejn ni agule Dios, tejgatu najctu rebixhojz ni najc si'c reii xten Dios. La'tu najctu te bennaya, te bensä'c, rexpejn pacni. Aguleni la'tu te gusule'tu reyäl'nasacduxh ni bejn Dios ni gurejdxtu che guyu'tu lo nezyunacäyj xten guedxliujre te biu'tu lo nezyuj ni rdimbichasejz xten Dios. ¹⁰ La'tu galoo rut najcditu, niluxh naj najctu rexpejn pac Dios. Galoo gajd Dios gulaslajztu, luxh naj abalaslajz Dios la'tu.

Colguibajn lo xnezyuj Dios

¹¹ Rebetzä ni sanälazä, nabajntu lo guedxliujre si'c beñzajt, ni rbäjz te laad, ni'c rniabduxhä lojtu, na'c guntu recoguijdx xten guedxliujre, ni rutijl neñ lastoo bejn te cuälazreni xnezyuj Dios. ¹² Colguibañsa'c lañ ni yu'tu loj rebenzajt ni di gac xpejn Israel te palga guiniyajreni la'tu gäbreni najctu beñlatsiaj, che fiireni redzunsä'c ni rujntu, siliä'ppacreni xpala'n Dios che jiädsac Jesucrist te gunni yälguxhtis.

¹³ Ni'cni, sa'csi huililajztu xtidx Jesucrist, colgusoob xtidx guiraa reni rnibeetu lo guedxliujre, si'c najc presidentro, ¹⁴ regubernadoor nani ruxhalni te rujnreni yälguxhtis rebendojl näjza te guiliä'pni xpala'n reben nani laaca rujnreni. ¹⁵ Sa'csi Dios rlajz guntu recossa'c te cuedcxitu rextidxnayääl ni rnii reni di rlajz gumbee didxlii xcuent Jesucrist.

¹⁶ Colguibajñ si'c bejn ni rut rnibeedi, na'cza guntu latsiaj sa'csi rut rnibeeditu, colguibajñ si'c guinibee Dios. ¹⁷ Ga'ptu yälnadolajz loj guiraasi bejn. Colchanälajz sa'tu ni rililajz. Colguidxejb Dios, colguiliä'p xpala'n presidentro.

Gudejd Jesucrist trabajw te baluini xho jiennu

¹⁸ La'tu ni najc mos, guideb yälnadolajz colgusobdiajg guiraa xtidx rexlamtu, xhet ganaxdi relamsä'c ni najc nadolajz, näjza relam ni najc benguijdx. ¹⁹ Sa'csi rchaglajz ruhuii Dios te bejn palga sa'csi rililajz te bejn xtidx Dios rujn bejn huant che rdejdn trabajw luxh xhet bejndini. ²⁰ Palga la'tu rujntu latsiaj ni'cni rusacsini la'tu, çxhi guntu gaan palga rujntu huant rdejdtu trabajw? Niluxh palga la'tu rdejdtu trabajw sa'csi rujntu redzunsä'c, luxh rujntu huant, ni'c najc laaca nez loj Dios. ²¹ Te guntu si'c gurejdx Diostu, sa'csi gudejzda Jesucrist trabajw xcuenttu te guluini xho guntu che chanuutu lo xnezyujni. ²² Laani dini niujn nicla tej dojl, laani dini nusguee nicla tej bejn con didx-xhii. ²³ Che guniyajreni lojni, dini nudzu' yälrniyajga. Che cadejdn trabajw, dini nudzu' diidx niluxh bateedni lagajc laani ladzñaa Dios ni rujn yälguxhtissa'c. ²⁴ Gudeed Jesucrist trabajw si'c te bendolduxh, bacuaarenini lo cruzj te ro'c gusacsiduxh tiejxhni xcuent xtojlnu, te na'c gunrunu dojl, te guibañsa'cnu lo xnezyuj Dios. Gudilguijdxreni tiejxhni te basiajcnä la'tu. ²⁵ Sa'csi galoo gujctu si'c rexii ni rut rajpdi, rijreni nezree-nezrec. Niluxh naj agubisactu lo xpaxtoortu näjza nani randzu' xaimtu, Jesucrist.

3

Xho nanab guibañnjtu chäältu

¹ Sigajcza la'tu, regunaa ni abachñaa, colgusoob xtidx chäältu, te mase yu' tejreni ni di chalilajz xtidx Dios, sililajzni xtidx Dios sa'csi fiini xho rujntu mase xhet rniidilu. ² Sa'csi fiini xho riulu xtiidxnä näjza xho rniilu nadolajz lojni, näjza xho nabaññäsa'cluni. ³ Na'c gusucheeu ganax lo jiaatis, si'c najc guichniil yejctu, näjza biaoortu ni rcaj diajgtu, guejntu, ñaatu, näjza ladsä'c ni najc sacru. ⁴ Colgusuchenäj lastootu yälnadolajz, yälrbecdxi lajz, näjza yälsanälajz, sa'csi direni nitloj, luxh sacduxhreni nez loj Dios. ⁵ Galoo si'cza bejn regunaa ni gujc xpejn Dios ni huililajz xtidx Dios, basucheereni lastooreni, basobreni xtidx chäälni. ⁶ Si'c gujc toSara, basobdiajgni xtidx toAbram, guniizani lo toAbram, Dad. Naj najctu si'c laani palga rujntu redzunsä'c, näjza na'c guidxejbditu.

⁷ Sigajcza la'tu, niguii ni abachñaa, colguibaññäsa'c chäältu. Colgapdani sa'csi dini gacnadip si'c te niguii; nanab guntu si'c sa'csi näjza lojreni badeed Dios yälnabajñ par tejpas. Colyejn si'c, te gucuadiajg Dios che cuedx-guiniabtu lojni.

Renani rdejd trabajw che laaca rujnreni

⁸ Dee najc ni caniä loj guiraatu, saru colguibaⁿnäj sa'tu. Colgulaslajz sa'tu, colchanälajz sa'tu si'c rinälajz te niguii bejtzni. Gactu beⁿsa'c, beⁿnadolajz. ⁹ Na'c gudzu'tu didxguijdx che guiniireni didxguijdx lojtu, na'cza gudzu'tu didxyaj che guiniireni didxyaj lojtu. Alga gunab lo Dios gacnäjnireni, sa'csi ni'cni gule Dios la'tu, te sica'zatu reyälⁿasa'c ni guniidxni lojtu. ¹⁰ Sa'csi scree caj lo xtidx Dios:

Nani rchaglajz guibajⁿni,

luxh rlajzzani saru tedni redxej lo guedxliujre, sugudxo^jnni guinii ro'ni didxnaj näjza didx-xhii.

¹¹ Guibicajni loj redzunguijdx, sugunni redzuns^a'ctis.

Suquuilni yäl^rbedxi te ni'c chanuuni.

¹² Sa'csi ruhuii Dios rebejⁿ ni rujn dzunsa'c, rucua^diajg^ani xtiidxreni che rniabreni lojni.

Niluxh rudzuréni lojni, rbälazzani renani rujn latsiaj.

¹³ ¿Chu laa ni gun latsiaj la'tu, palga la'tu rbaali lajztu rujntu dzunsa'c?

¹⁴ Palga caxäjsi tedtu trabajw che guntu redzuns^a'c. ¡Chicbaatu! Na'c guntu xhigab, niclaza guidxejbtu xcäl^rruchejbreni. ¹⁵ Colgusaan guinibee Dad Jesucrist neⁿ lastootu, gususin te gudzu'tu diidx loj reni rniabdiidx lojtu xhicuent runlojtu guibi' Jesucrist. Guideb yälⁿadolajz saru gudzu'tu diidx. ¹⁶ Colguibaⁿsa'c te cuedxi xcäl^rriejntu te che guiniyajreni la'tu sa'csi nabaⁿsa'ctu loj Crist, jianxtujy reni rniyaj la'tu. ¹⁷ Sa'csi hueenru tedtu trabajw che cayuntu te dzunsa'c, palga si'c rlajz Dios, lacuaa tedtu trabajw sa'csi cayujntu dojl.

¹⁸ Sa'csi sigajcza tejtis gujt Jesucrist xcuent rextojⁿnu. Xhetliidi xtojⁿni guyu' nez loj Dios, niluxh gudejdni trabajwduxh xcuent rebeⁿdojl. Bejni si'c te gac guibignu lo Dios sa'csi gujt tiejxh Jesucrist, luxh guyusac sprit xtenni lo tiejxhni te gubaⁿsacni. ¹⁹ Che gajd xp^ritni guibisac lo tiejxhni, huij spritni basule'ni diidx loj resprit ni yu' latzguiib. ²⁰ Respritga najc renani di nusoob xtidx Noé che basule'ni xtidx Dios lojreni. Guläz Dios rebejⁿga guiraa redxej ni cayujn Noé barcwro agujc xchero. Bas^laa Dios xcälⁿabajⁿ xhujntis bejⁿ, xhet gujcdireni gudejdreni lo nisguiro ni biajb guideb guedxliujre. ²¹ Che ro^bnisnu naj, rusnaalajznu rebejⁿga; yäl^rro^bnisga ruluiloj xho rus^laa Diosnu lo dojl. Et sa'csi riäjt beed lo tiejxhnu neⁿ nisga, alga sa'csi dxejc rniabnu lo Dios guniidxni te xcäriensa'c, sa'csi saj^c xca'nuni xcuent ni gubaⁿsac Jesucrist lo rebeⁿgut. ²² Che birii Jesucrist loj rebeⁿgut, biu'ni xhaguibaa cadre gurejni xladbee Dios te ro'c rnibeeni loj rexangl Dios, näjza loj guiraa resprit ni rajc rnibee, ni yu' lo guedxliuj näjza xhaguibaa.

4

Colyejn xtzuun Dios

¹ Ni'cni sa'csi agudejd Jesucrist trabajw cuajni lo cru^jz xcuentnu, sigajcza la'tu riäj^l guntu xhigab sidejdtu trabajw lo guedxliujre sa'csi nani agudejd trabajw, diruni gun dojl, ² te guideb nabajⁿni lo guedxliuj, guibajⁿni si'c rlajz Dios, diruni guibajⁿ te gunni redzunguijdx xten guedxliujre. ³ Sa'csi bejntu si'ctis ni rlajztu galoo, bejntu si'c rujn rebejⁿ ni di gumbee Dios, bejntu si'cni rlajz tiejxhtu, bejntu latsiaj, gusojztu, bejntu relan^ro, gudedcaj gusojztu, luxh bejntu cosxtuiduxh bazuxhijbzatu loj rebanäbdxab. ⁴ Dxejcti rebejⁿ ni rujn recosga naj, rdxel^rojreni sa'csi dirutu gun ni rlajzreni, ni'c rniyajreni la'tu. ⁵ Niluxh laareni suureni nez loj Jesucrist ni agojl gun yäl^rguxhtis loj guiraa rebejⁿ, rebejⁿ ni nabajⁿ näjza renani agujt, te gusule'reni xcuent nani bejnreni. ⁶ Ni'cni basule' Jesucrist xtidx Dios loj reni agujt, te mase che

gubajñreni lo guedxliuj gujcreni yälguxhtis si'ctis ni rajc bejn, dxejc gujtreni, naj sprit xtenreni sinuu guibajn si'c ni rlajz Dios.

⁷ Asiäddzungenajxh dxej che guibisac Jesucrist lo guedxliujre. Ni'cni ganax laaca colyejn xhigab, colgusin xcäriejntu te saru cuedx-guiniabtu lo Dios. ⁸ Niluxh ni maazru sajc najc yälsanälajz resa'tu sa'csi che rinälajztu resa'tu, riallajztu xtojł sa'tu. ⁹ Saru gurenäj bejn ni rdzujn rolizlu, na'c jiejytu. ¹⁰ Abaniidx Dios loj tejgatu te dzuun ni sajc guntu. Dzuunga colyacnäj resa'tu, te si'c guluiitu lo resa'tu laaca cayunsa'ctu guira'ti nani baniidx Dios lojtu. ¹¹ Palga tejtü najc xtzuunni guluini xtidx Dios, suguiniini ascanu najcni xtiidxpac Dios. Palga tejtü najc xtzuunni gacnäjni sa'ni, sugunnini, guideb yälnadip yälnadaan ni rudeed Dios lojni, te guira'tis ni rajc sujn guiliä'p xpala'n Dios xcuent Jesucrist. Sa'csi laatisni riäjł chä'p xpala'nni, laatisni riäjł guinibeeni tejpas. Sugacni si'c.

Xho nanab tednu trabajw

¹² Rebetzä ni sanälazä, na'c guidxelojtu sa'csi cadejdtu trabajw ni najc si'c guiboo, ni siäd te gactu preeb. Na'c guntu xhigab xhichani'c casiajctu. ¹³ Colguibalajz sa'csi sigajc ni cadejdtu trabajw sa'ni gudejd Jesucrist, sigajcza sibalajztu che guiluiloj xcälrdimbicha' Jesucrist. ¹⁴ Palga rniyajreni la'tu sa'csi rililajztu xtidx Jesucrist, chicbaa la'tu, sa'csi rbäjz Xpřit Dxan xten Dios guideb xcälrdimbicha'ni neñ lastootu. ¹⁵ Gunatiro, andi gusaantu ted tejtü trabajw sa'csi bagu'ttu bejn, o sa'csi gulajntu xhi xten bejn, o sa'csi bejntu latsiaj, o sa'csi huichu'ni lo xcuent sa'ni ni xhet nungäjłdi gacbeeni. ¹⁶ Palga yu' chu tej tedni trabajw sa'csi rililajzni xtidx Jesucrist, na'c guitujyni, alga suguiliä'pni xpala'n Dios xcuent Jesucrist.

¹⁷ Abidzujñ dxej che ganid rexpejn Dios ted trabajw. Luxh palga ganid nuurnu gacnu yälguxhtis luxh ahuililaaznu xtiidxni, jxhochä gun rebejn nani di chalilajz xtidx Dios xcuent Jesucrist! ¹⁸ Lo xtidx Dios caj scree:

Lacti naganlajz rliaa rebennaya lo dojl,

¿xhochä gunäjni rebejn nani di chalilajz xtidx Dios näjza rebendojl?

¹⁹ Ni'cni, guiraatu nani cadejd trabajw xcuent xtidx Dios si'cni rlajz Dios, colgudeed xprittu lo Dios ni di gusguee, ni benchetu, te chanuutis guntu ni riäjł guntu.

5

Yärlulijdx loj renani ahuililajz xtidx Dios

¹ Narä nacä te bengool, bahuiä trabajw ni gudejd Jesucrist, bahuiäza xcälrdimbicha' Jesucrist ni guniidxni loonu che guibisacni lo guedxliujre. Ni'cni rulidxä la'tu ni najc rebengool, ² colgajp renani rililajz xtidx Dios nani rajptu fiipactu xhi rujñreni. Colga'preni si'c te bejn ni rajp xiil, colyejnni guideb yejc, guideb lajztu. Colyejn si'c sa'csi si'c rlajz Dios guntu, na'c gunlojtu meel. Colguibalajz cayajptu rexpejn Dios. ³ Na'c guinibeetu lojreni si'c rnibee te lam loj reni rujñ xtzuunni, colguluiireni xho gunreni con xcäl'nabansa'clu. ⁴ Che guibisac Jesucrist, ni rajp nuure, laani suniidxni xcuentnu, te yälnasacduxh nani dipac nitloj.

⁵ Sigajcza la'tu ni najc bi'n, colgusobdiajg xtidx rebengool. Guiraatu coljiu xtidx sa'tu, colguluii sa'tu guideb nadolajz. Sa'csi:

Dios rbälaz rebejn ni runnaro lagajc laareni, niluxh racnäjni rebejn ni najc nadolajz.

⁶ Ni'cni guideb yälnadolajz coljiu lo Dios sa'csi rajpni yälnribeduxh, te guiliä'pni xpala'ntu che gal dxej ni guibisacni. ⁷ Colgudeed guiraa reyärsia' ni yu' lastootu lo Jesucrist te guscuedxini xcäriejntu sa'csi laani sanälajzni la'tu.

⁸ Colgusanij xcäriejntu, colsusin sa'csi rdxe'ch bendxab lojtu, cansaxhiga'tzni si'c te beedz nialajz, caguiilni chu guxhinni. ⁹ Colsudzu'tz nez lojni, guideb lastootu colchalilajz xtidx Dios, sa'csi anajntu sigajcza cayunnäjni guiraa rebetznu ni nabajñ lo guedxliujre. ¹⁰ Che agudejdtu trabajw tiop-choñ dxej, Dios nani rajp guiraa yälracnäj, nani gurejdx la'tu te näjza la'tu xca'tu xcalrdimbicha'ni xcuent lagajc Jesucrist, lagajc laani sunsa'cni la'tu, bejñ ni rsiudzu'tz lo xtiidxni, bejñ ni nadip lajzni, bejñ ni di guidxejb. ¹¹ Laani rajpni yälrnibeduxh par tejpas, guiliä'pnu xpala'nni par tejpas. Sugacni si'c.

¹² Siädnä Silvan guiitzre lojtu. Runä xhigab najcni te bejñ nani huililazsa'c xtidx Dios. Abacuaä bale'si diidxre lojtu te gulidxä la'tu, te guiniliä lojtu dee najc xcälracnäjpac Dios. Colsudzu'tz xcuent yälracnäjre.

¹³ Rexpejñ Dios ni re' lo guedx Babilonia ruxhal xtiixios lojtu sa'csi gule Dios la'tu sigajc guleni laareni. Marcw, ni najc si'c xi'nä, ruxhalza xtiixios lojtu. ¹⁴ Colguinii "xchan" lo tejga sa'tu ro'c.

Rniabä lo Dios guscuecdxini lastoo guiraatu ni rililajz xtidx Crist.

Guijtz Ni Rojp Ni Bacuaa Pedr

Pedr rucuaa te guiitz loj reni ahuililajz

¹ Narä nacä Simón Pedr, ni rujn xtzun Jesucrist, te apost xtenni. Rucuaä guiitzre lojtu nani rililajz xtidx Dios sigajc ni rililajznu, sa'csi bahuii Dios loonu si'c bennaya xcuent Xtiosnu Jesucrist nani baslaa nuurnu lo dojl. ² Rniabä lo Dios gacnäduxhruni la'tu, guscuecdxiruni lastootu, te gacheerutu xtidx Dios näjza Dad Jesucrist.

Xho riäjl gac rexpejn Crist

³ Sa'csi xcälrnibee Dios baniidx guira'ti ni rquiinnu te guibaṅsa'cnu, te gacnu bennaya nez lojni, xcuent rililajzpac xtiidxni ni nansa'cnu xcuent Jesucrist nani gurejdx nuure, nani gule nuure te xca'zanu xcälrdimbicha'ni, näjza guiraa xcäl'nansa'cni. ⁴ Lagajc xcuent redee baniidxni rextidxliini, rextidxsacduxhni. Palga chalilajznu xtiidxni, sajcnu xpejn, sajcnu beṅsa'c si'c najcni sa'csi abiriinu loj redzunguijdx ni chagljajz rujn rebejn ni ruxhin guedxliujre. ⁵ Ni'cni nanab gacheenu xho nabaṅnu lo guedxliujre. Siroobru xcälrililajztu sacnäjni la'tu te guibaṅsa'cnu lo Dios; luxh sa'csi nabaṅsa'ctu, siroobru xcäl'najntu xcuent dzunsa'c näjza dzunguijdx. ⁶ Luxh palga guroob xcäl'najntu xcuent dzunsa'c näjza dzunguijdx sajc guinibeetu tiejxhtu te na'c guntu dzunguijdx. Che guinibeetu tiejxhtu, sibedxi lajztu. Che arajptu yälrbedxilajz, sajctu beṅsa'c, beṅdxan. ⁷ Che anajctu beṅsa'c, beṅdxan, sinälajztu resa'tu; che asanälajztu sa'tu, arajptu yäl'sanälajz sa'tu xten Jesucrist.

⁸ Palga la'tu rusobtu guiraa rediidxre, luxh chanuutis caroobreni neṅ lastootu, ditu guibaṅxlia'; sujnpactu xtzun Dios, luxh rediidxre sacnäjrutu gumbeetu Dad Jesucrist. ⁹ Sa'csi renani di ga'p rediidxre, najcni si'c te lotiä'p ni di fii, o te ni di gacdi fii zijt, ni'cni abiälajzni xho basia Dios rextojlni nani bejnni galoo. ¹⁰ Ni'cni rniä lojtu rebetzä, colsejs, colguisieed xtidx Dios te gacheepactu, guluilojzatu lo bejn xho gurejdx, xho gule Dios la'tu, sa'csi laḷ ni chanuu gucudajgtu rediidxga, dipactu gunijt lo Dios. ¹¹ Palga guibajntu si'c lo guedxliujre, siu'pactu xhaguibaa cadre rnibee Dad Jesucrist par tejpas.

¹² Ni'cni anasuga'ä te gusnaä lajztu xcuent rediidxre, mase anajntureni, mase risutzutztu yäl'rililajz xten didxlii ni yu' neṅ lastootu. ¹³ Narä runä xhigab laaca runä che rusnaä lajztu, te gusnibä la'tu, te gusnaä lajztu. Si'cza gunä guideb ni nabaṅä lo guedxliujre. ¹⁴ Ananä asiäddzungajxh dxej ni xca' Dios narä, sa'csi abaluii Dad Jesucrist ni'c loä. ¹⁵ Ni'cni cayunduxhä dzuun naj, te che guiquiinni sinaj lajztu xtidxä che agu'tä.

Renani bahuii loj yäl'nasa'c xten Crist

¹⁶ Che basule'nu lojtu xcälrnibee näj xcälrdimbicha' Dad Jesucrist, xcuent ni guibisacpacni, dinu niniitisi, dizanu nusguee la'tu, sa'csi abahuiloonu xcälrdimbicha'ni. ¹⁷ Sa'csi che badeed Dios xtadnu yälrnibee, yälrdimbicha' lojni, dxejc biejn diajgnu gunii Dios, birii xse'ni neṅ te za ni gurej xhaguibaa, räjpni: "Dee najc xi'nä ni sanälazä, rbanälazduxhäni." ¹⁸ Lagajc nuure biejn diajgnu xse' Dios che guniini xhaguibaali che gyunäjnu Jesucrist lo dajn ni najc dxan.

¹⁹ Ni'cni naj guliiru rediidx ni gunii reprofet. Ni'cni sujntu laaca palga gusobdiajglu rediidxga, sa'csi najcreni si'c te bajl ni rusanij te lajt ni nacäy, susanijreni xcäriejntu dxejli ni jiääd bajl xhaguibaa. Dxejc lagajc laani susanij lastoonu. ²⁰ Niluxh ganiddoo nanab gacheetu dee: nicla tej bejn sajc guinii

laatisni sajc guinii xhi säloj xtidx Dios, ²¹ sa'csi nicla tej diidx ni bacuaa reprobe't dini gac diidx ni biajbtis yejcreni. Guiraliireni bacuaareni ganaxtis diidx ni badeed Xpriet Dxi Dios lojreni gucuaareni.

2

Rebejn nani rusguee (Judas 4-13)

¹ Niluxh galoo biricajza te cuaa bejn ni basguee rexpejn Israel, sigajcni siääd stee cuaa bejn ni susguee la'tu. Laareni guluixhiga'tzreni didx-xhii nani rujn rusiejxh lajz bejn xcälrlilajzreni, sibälazreni lagajc Dad Jesucrist nani gudijx xcuent xtojlni. Niluxh renani rusguee, siojb nitlojreni par tejpas.

² Xhidajlza bejn sinajlreni lo xcäl'nabaŋguijdxreni, dxejcti ni'c gun siniyaj xhidajl bejn xnezyuj xtidxlii Dios. ³ Sa'csi ruguilajzreni xmeeltu, xhixtentu, ni'c siädgusgueereni la'tu te xca'reni xhixtentu. Niluxh xcäl'guxhtisreni nani gun Dios, näjza xcäl'rnitlojreni cabäzgjajcreni agujc xchero.

⁴ Najcni si'c sa'csi di Dios niällajz rextojl rexanglni nani bejn dojl, niluxh baxhałnireni gabijl, basäunireni neñ reguednacäy cadro cabäjzreni dxej ni gun Dios xcäl'guxhtisni. ⁵ Sigajcza rebejn ni guyu' galoo, banitloj Diosreni, baslaa Dios xcäl'nabajn Noétis näjza sgajdzreni, sa'csi basule' Noé xtidx guluii Dios. Luxh baxhałni nisguiro te biädnitlojni guiraa rebejn nani di nucuadiajg xtidx Dios. ⁶ Bejn Dios yäl'guxhtis xten guedx Sodoma näjza guedx Gomorra, base'cni reguejdxga, gujcreni cobdäj. Si'c bejn Dios te gacbee bejn xho runnäj Dios rebejn ni di gusoob xtidx Dios. ⁷ Gulää Dios Lo't ni gujc te beŋsa'c lo reguejdxga, sa'csi guc-huin lajzni xcuent relatsiaj ni bejn rebendojlgä. ⁸ Guideb ni guläjs Lo't, te beŋsa'c, lo guejdxga, dxej, yäl' guc-huin lastooni xcuent nani bahuini, nani biejn diajgni, xcuentza latsiaj ni bejnreni, sa'csi beŋsa'cni. ⁹ Anajn Dios xho racnäjni rebensa'c te rbäänireni lo retrabajw ni cadejdreni, anajnza Dios xho gusacsini rebendojlni cheni guidzujlni dxej ni gunni xcäl'guxhtisreni.

¹⁰ Guliduxhni, sujnru Dios yäl'guxhtis loj rebejn nani rlaiz gun si'ctisni rlaiz tiejxhreni, näjza renani rbälaz xcäl'rnibee Dios. Najcreni bejn ni di guidxejb, rujnreni ni riajbtis yejcreni, direni guidxejb guiniyajreni rexangl Dios ni rdimbicha'. ¹¹ Niluxh nicla tej rexangl Dios ni rajpru yäl'rnibee lo rebejnre, direni guiniyaj, cue'creni xquejreni lo Dios.

¹² Luxh, rebejnğa najc si'c reguidxaa nani xheti xcäriejnreni, cabäjztisreni chu guiniaazreni te guetreni. Rniyajreni luxh direni gan xhini'c rniireni. Niluxh sigajc rnitloj reguidxaa, sigajcza sinitlojreni. ¹³ Bejnreni dojl, ni'c sinitlojreni, sidejdreni yäl'rusacsiduxh xcuent rextojlni. Laareni rchaglajzreni guntisreni laniro rdxee. Laareni najcreni si'c te cosdxuudx o si'c te manch ni rcaj lo te ladmol, rbaali lajzreni rusgueereni la'tu lał ni cayajc lanij cayaunäjreni la'tu.

¹⁴ Digacdi fiireni loj te gunaa, li rsia' lajzreni, direni guidxajg rujnreni dojl, rusgueereni rebejn te gunzaren dojl, ruluiireni lastooreni te säblajzreni meel, najcreni bejn nani batzubde Dios, ¹⁵ agulälazreni nezyusa'c, abanijtreni, naj sanajlreni xnezyuj Balaam, xi'n Beor, nani huichaglajzru nani rquijx yällatsiaj. ¹⁶ Niluxh gudilnäj Diosni xcuent xtojlni, bejn Dios gunii te mandip si'c xse' bejn, te bascuääzni profe'tga, dini nusaan niujnni nani cayujnni, cayujnni si'c te bejn ni rajc yejcn.

¹⁷ Rebejn latsiajre najc si'c te bisie cadro xheti nis, najczaren si'c rexcäy ni sanä bej nezree nezrec che cabi' te bero. Laareni su'reni lo xcäy par tejpas che gun Dios yäl'guxhtis. ¹⁸ Sa'csi rniduxhreni didxro, niluxh xhet sajc di

rediidxga luxh rniireni huenduxh najc gun bejn ni rlanjtis tiejxhrene, con yällatsiaj rusgueereni rebejn nani entis birii loj reni rujn sa' dzunguijdxga. ¹⁹ Rusgueereni, rniireni rut gudxoindini palga jiädnajlnireni, niluxh lagajc laareni najcreni mos, sa'csi rnibee latsiajreni. Xhitis ni rnibee te bejn, ni'c rusäuni nen latzguiib. ²⁰ Sa'csi palga agubicaaj te bejn loj redzunguijdx xten guedxliuj sa'csi huililajzreni xtidx Dad Jesucrist nani rusläa rebejn lo guiraa dojl, dxejctiru gubisacni loj xtojlni, abixhidsacreni lo xtojlni, nalajz najcreni si'c che gajdreni gumbee xtidx Dios. ²¹ Huenru direni niembee xnezyuj Dios, quela che abiembeerene nezyujga, cuälazreni didx dxan, xtidx Dios ni basule'reni lojreni. ²² Dxejcsii rsiojb diidx ni najc scree: "Rbisac te bä'cw loj xcälrdzujbni. Cuch ni entis gojz richusacni lo xpajjni."

3

Xho gac che guibisac Jesucrist

¹ Rebetzä, dee najc ni rojp guijtze ni caguxhalä lojtu; lo guiro'p guijtze cagusnibä la'tu xcuent reyälrulijdx ni gusnaj lajztu. ² Colgusnaj lajztu rediidx ni gunii reprofet agujc xchero, näjza rediidx ni gunii Dad Jesucrist nani basule' reapost.

³ Ganiddoo, colgacbee dee: che asiäddzungajxh redxelult, siääd rebejn ni rgubee rextidx Dios, laareni sujnreni si'ctis ni rlanj tiejxhrene.

⁴ Siniabdiidxreni: "¿Xhicuent gajd Jesucrist guibisac si'cni bia'n diidx? Cheni gujtli rextadgoldoonu, guira'ti sanuutis najcni si'c gujcn cheni guc-cheeli guedxliujre." ⁵ Niluxh che rniireni si'c, rlanjpac jiällajzreni agujc xchero benchee Dios xhaguibaa xcuent xtiidxtisni, näjza guniitis Dios te si'c guc-chee guedxliuj, biriini nen nis, naj tre'ni loj nisga. ⁶ Dxejcti gunitloj guira'ti ni yu' lo guedxliujga che biajb te nisguiro, gunitlojni. ⁷ Niluxh xhaguibaa näjza guedxliuj ni tre' naj, cayajp Diosreni xcuent xtiidxni te checreni che guidzujn dxej ni gunni yälguxhtis, che gunitlojni reben DOJL.

⁸ Rebetzä, na'c jiällajztu, Jesucrist ruhuii tebdxej si'c te tzugayuu ijz, rhuiizani te tzugayuu ijz si'c tebdxej. ⁹ Di gaclaa gusoob Dios diidx ni bia'n, si'c rujn bejn xhigab raclaani, niluxh cabecdxiru lajzni xcuent la'tu, sa'csi cabäjnzi gusiejch lajztu, sa'csi di rlanjzni nitloj nicla tejtü.

¹⁰ Niluxh sidzujn dxej che guibisac Jesucrist lo guedxliujre si'c rdzujn te gubaan, rut gacbeedi siäädni. Dxejcti sibicaaj xhaguibaa, gac te bieiduxh, guira'ti sialni lo te guiboduxh, guedxliujre näjza guira'ti ni tre' lojni, guiragajcni sejcni.

¹¹ Sa'csi sinitloj guiraa redee, ni'c nanab guibannayatu lo guedxliujre, na'c guntu DOJL. ¹² Colcuäjz dxejtis ni jiääd Dios lo guedxliuj. Dxejc sejc xhaguibaa, sinitlojni, luxh guiralii ni yu' sialni lo guiboro. ¹³ Niluxh abasa'n Dios diidx loonu, ni'cni cayenloonu te guibacoob, te guedxliucoob, cadro gunreni ganaxtis dzunsa'c, xhetiru DOJL.

¹⁴ Ni'cni rebetzä ni sanälazä, sa'csi cabääznu guiraa ni gac, colyejn huant te che guibisac Dios, sidxälni la'tu dxitis nabajntu, nabannayatu, xhetiru xtojltu. ¹⁵ Colhuii xhi dzuun bejn Dad Jesucrist ni'c rajpnu yälrusläa lo DOJL. Sigajcza bacuaa bejtznu Pabl ni sanälajznu. Bacuaani sa'csi badeed Dios yälajn lojni. ¹⁶ Nen guiraa rexquijtzn bacuaani xcuent rediidxre. Yu' gaii guijtze ni bacuaani ni najc naganduxh. Luxh bejn ni guxii racbee, ni runtio'p lajzreni, reni'c ruxhiid rextiidxni, sigajc runnäjreni guiraa xtidx Dios, ni'cni sinitlojreni.

¹⁷ Ni'cni rebetzä ni sanälazä, sa'csi ananxgaatu rediidxre, colnatiru didi jiajbtu ladznaa renani gusgueetu, te na'c gunijttu xcälrsiudzu'tztu lo xtidx Dios.

¹⁸ Colgustioob xcäriejntu con yälracnä j näjza yälñajn xten Dad Jesucrist nani rusläa nuure lo dojl. Suguiliä'pnu xpala'n Dad Jesucrist, ñaj näjza par tejpas. Sugacni si'c.

Guijtz Ganid Ni Bacuaa Juan

Xtidx Dios ni runiidx yäl̄nabaj̄n par tejpas loonu

¹ Galooli che gajd Dios gun guedxliuj, agac nabaj̄n Jesucrist. Niluxh narä bahuiä loj Jesucrist, biejn diagä rediidx ni guniini loä, gunazä naani. Laani najc Diidx ni runiidx yäl̄nabaj̄n par tejpas loonu. ² Baluilojni loonu; reapost bahuiinu lojni. Ni'cni rniä lojtu, nabaj̄n Jesucrist par tejpas. Rniliäpac nabaññaj̄ Jesucrist Dios. Baluii Dios Jesucrist loonu. ³ Caniä stehuält lojtu, bahuiinu lojni. Biejn diajgnu rediidx ni guniini loonu. Xhigab xtennu najc tejtis con Dios, näjza Jesucrist Xi'n Dios. Ni'cni cagusule'ä rediidxga lojtu, te tejtis xhigab jiennäanu resa'nu. ⁴ Cagucuaä rediidxre lojtu te guibalazduxhtu.

Dios najc Bajl

⁵ Naj cagusule'ä rediidx nani baluii Jesucrist loonu. Dios najc bajl. Guiraa redzuun ni rujni, ganax dzunsa'cni. Xhet yäl̄nacäydi yu' lo Dios. ⁶ Palga chutis tejnu naa, tejtis najc xhigabnu con Dios, niluxh riennu redzunguijdx, rniinu didx-xhii, runijtnu dinu chasanäj xtidx Dios. ⁷ Palga nabaj̄n nu lo bianij si'cni nabaj̄n Dios lo bianij, tejtis xhigab riennu con resa'nu. Dxejc rusiaza xtiejn Jesucrist Xi'n Dios lastoonu che riennu dojl.

⁸ Palga naanu xheti xtoj̄l̄nu, rusgueenu lagajc nuunu, luxh dinu ga'p xtidx Dios neñ lastoonu. ⁹ Palga guicäj̄pnu lo Dios guiraa redojl̄ ni cayennu, siällaj̄zni xtoj̄l̄nu, sudzucaj̄ni rextoj̄l̄nu, sa'csi laaca rujni luxh guli najc rextiidxni. ¹⁰ Palga guinuunu dinu niuj̄n dojl̄, rniinu najc Dios si'c te bej̄n ni rni didx-xhii sa'csi anaj Dios yu' xtoj̄l̄nu, luxh dizanu ga'p xtidx Dios neñ lastoonu.

2

Racnäj Jesucrist nuunu nez loj Dios

¹ Guejbtu, resa'ä nani huililaj̄z xtidx Dios, cagucuaä rediidxre lojtu lo guiijtz te na'c guntu dojl̄. Niluxh palga jiennu dojl̄, racnäj Jesucrist nuunu, rniinu xcuentnu lo Dios, sa'csi xheti xtoj̄l̄ni. ² Gujt Jesucrist xcuentnu lo cruujz. Gudij̄xni rextoj̄l̄nu lo cruujz. Luxh et rextoj̄l̄tisnu gudij̄xni. Gudij̄xni rextoj̄l̄ guiraa rebej̄n ni re' lo guideb guedxliuj.

³ Palga rusoobnu rextidx Dios, huenliisi rluii riembeenu Dios. ⁴ Cheni rni te bej̄n, “narä rumbeäni”, niluxh dini gusoob rextiidxni, rusgueeni resabej̄ni. Di laj̄zni nilii xtidx Dios. ⁵ Palga rusoobnu xtidx Dios, guliipac rinälaaznu Dios, ni'c naj̄n nu nabaññaj̄nuni. ⁶ Cheni rniinu nabaññaj̄nu Jesucrist, nanabpac guibañsa'cnu si'c gubaj̄n Jesucrist lo guedxliuj.

Redidxcoob

⁷ Guejbtu resa'ä, xhet didxcoobdi ni cagucuaä lojtu. Cagucuaä lagajc diidx ni naj̄ntu galooli che huililaj̄zlitu rextidx Dios, nalaj̄znu rediidx nani biejn diaj̄gtu galooli. ⁸ Niluxh najcza rediidxre didxcoob loonu, sa'csi che huililaj̄znu rextiidxni gusloj dirunu guibaj̄n lo yäl̄nacäy. Baluii Jesucrist redidxcoobga loonu. Guliipac najc Dios si'c bajl. Dini guibaj̄n lo nacäy.

⁹ Palga chutis tejnu rni, “nabañä lo nianij xten Dios”, niluxh rdxe'chni lo resa'ni, lo yäl̄nacäy yu'ni. ¹⁰ Chutis tejnu ni rinälaj̄z sa'ni, nabaj̄n ni lo bianij xten Dios, rujni dzunsa'c, dizani guichaglj̄z gunni dojl̄. ¹¹ Niluxh palga rdxe'chnu lo resa'nu, nabaj̄n nu lo yäl̄nacäy sa'csi riennu dojl̄, sasaanu lo yäl̄nacäy. Nicla gacbeenu canejz chonnu, sa'csi ruscäy beñdxab balojnu.

¹² Cagucuaä rediidxre lo guejbtu, resa'ä ni rililajz, sa'csi abadzucaj Dios rextolnu, sa'csi lo cruz gudijx Jesucrist rextolnu. ¹³ Cagucuaä rediidxre lo guejbtu, redad beḅgool, sa'csi huililajztu rextidx Jesucrist, najntu laani nabajni galooli näjza par tejpas. Cagucuaä rediidxre lojtu, rebi'n sa'csi dirutu jiu xtidx beḅdxab.

Cagucuaä rediidxre lojtu rexi'nä, sa'csi rumbeetu Dios. ¹⁴ Abacuaä rediidxre lo guejbtu, redad beḅgool, sa'csi numbeetu Jesucrist nani nabajni galooli näjza par tejpas. Abacuaä rediidxre lojtu rebi'n, sa'csi sudzu'tztu, sa'csi yuchee xtidx Dios neḅ lastootu, dirutu jiu xtidx beḅdxab.

¹⁵ Na'c guichagljaztu guntu renani rujn rebejn nani di chalilajz xtidx Jesucrist; na'cza chanälaztejtü xhixtentu ni rajptu lo guedxliuj. Palga rinälaztejtü rexhixtenti ni ra'pnu lo guedxliuj, dxejc dinu chanälajz Dios. ¹⁶ Rebeḅ guedxliuj ni di chalilajz xtidx Dios rchagljazreni rujnreni redzunguijdxre: rujnreni dzunguijdx nani rchagljaz tiejxhreni; rujnreni dzunguijdx nani rchagljaz balojreni, näjza lagajc laareni rliä'preni xpala'nreni. Niluxh guiraa reni'c najc dzun guedxliuj, xhet dzuundi ni gunibee Dios gac. ¹⁷ Luxh rnitlojpac guedxliuj. Sinitlojza guiraa reni rchagljaz rujn rebeḅ guedxliuj ni di chalilajz xtidx Dios. Niluxh palga gusoobtisnu xtidx Xadnu Dios, sibaḅnäjnuni par tejpas.

Didx guli näjza didx-xhi

¹⁸ Guejbtu resa'ä ni rililajz xtidx Dios, asiäddzungajxh dxej che guluiloj niguii nani rdxe'ch loj Jesucrist. Abiejn diajgtu siääd niguiiga. Naj yu' xhidajl reniguii nani rdxeclajz lo Crist. Ni'c alaracbeenu asiäddzungajxh dxejga che guluiloj niguiiga. ¹⁹ Yu' xhidajl rebejn ni rdxeclajz lo Jesucrist. Biriireni lo resa'nu. Direni nililajz xtidx Jesucrist. Palga nililajzreni xtidx Jesucrist si'c huililaaznu nuure xtidx Jesucrist, direni nirii lo resa'nu. Biriireni lo resa'nu, ni'c racbeenu direni gac xpejn Jesucrist.

²⁰ Gule Dios Jesucrist. Jesucristre baniidx Sprit Dxan xten Dios loonu te gacheenu xhini'c najc redidxliipac. ²¹ Et sa'csi ditu gan xhi diidx najc didx guli bacuaä rediidxga lojtu. Sa'csi najntu xhi diidx najc didx guliipac, ni'c bacuaäni, te gutijp lajztu. Palga rucuaä rediidx ni najc guli, anajntu dina gusgueä la'tu.

²² Chutis ni naa di Jesús gac Crist Xi'n Dios, xhet guliidi rextiidxni. Renani rnii di Jesucrist gac Xi'n Dios rdxeclajzni lo Jesucrist. Di reni'c nililajz xtidx Dios. ²³ Chutis reni rnii di Jesucrist gac Xi'n Dios, di reni'c gumbee xadnu Dios. Niluxh renani rnii Jesucrist najc Xi'n Dios, huililajzreni xtidx Dios, numbeezareni Dios.

²⁴ Colgusoob rediidx ni biejn diajgtu galooli che huililajztu rextidx Dios. Palga rusoobtu rediidxga, nabaḅnäjtü Dios näj xi'nni Jesucrist. ²⁵ Abia'n Jesucrist diidx guniidxni yälḅnabaḅcoob loonu. Naj ara'pnu yälḅnabajḅre, ra'pnuni par tejpas.

²⁶ Abacuaä rediidxre lojtu xcuent rebejn ni rlajz chalilajztu rediidx ni xhet guliidi. ²⁷ Baxhal Jesucrist Sprit Dxan xten Dios loonu. Rbäjzni neḅ lastoonu. Dinu guiquiin chu stee bejn guluu loonu xhi diidx najc guli, sa'csi lagajc Sprit Dxan xten Dios ruluii xtiidxni loonu. Naj ruluiini la'tu guiraa ni najc guli, dini gusguee la'tu. Colguibaḅnäj Jesucrist; colgusoob xtidx Jesucrist si'cni ruluii Sprit Dxan xten Dios lojtu.

²⁸ Naj guejbtu resa'ä, colguibaḅnäj Jesucrist, te che jädsacni lo guedxliuj sisiutzu'tznu nejz lojni, dinu guitujy nejz lojni. ²⁹ Anajntu laaca najc Dios. Anajntu renani rusoob xtidx Dios sasanäjreni Dios, ni'c najcreni xi'n Dios.

3

Rexi'n Dios

¹ Bahuii xho huinälazduxh Dios nuure, ni'c anaj Dios nuure najcnu rexi'nni. Luxh gulii najcnu rexi'n Dios. Reben guedxliuj ni di chalilajz xtidx Dios, direni gumbee nuure, rexi'n Dios, sa'csi dizareni gumbee Dios ni najc xtadnu. ² Resa'ä ni rinälazä, nuunu riolilaaznu rextidx Dios, ni'cni najcnu rexi'n Dios. Dinu gacbee xho gacnu niluxh che guibisac Jesucrist loonu, suhuiinu lojni si'c ni najcni, sa'csi suchaani nuure te gacnu si'c ni najcni laani. ³ Che rnaj laaznu sidzujñ dxej gac tejganu si'c ni najc Jesucrist, dxejc rbañsa'cnu si'c ni gubajñ Jesucrist lo guedxliuj.

⁴ Di rebejñ ni rujñ dojl gusoob leii xten Dios. Che riennu dojl, runijtnu lo leii xten Dios. ⁵ Racbeenu Jesucrist biääd lo guedxliuj, gujñni niguii te gujñ badzucajni rextojñnu. Laani dini niujñ dojl. ⁶ Che sasanäjnu Jesucrist, dinu gac benguijdx. Di bejñ nani rujñ dojl chalilajz xtidx Jesucrist, dizani gumbeeni. ⁷ Resa'ä, na'c chalilajztu didx-xhii ni rnii bejñ lojtu, che rniireni cayujntu dojl. Rebejñ ni rujñ laaca, najczareni si'c najc Jesucrist. ⁸ Rebejñ nani rujñ dojl najc xi'n beñdxab. Galodooli rujñ beñdxab dojl. Ni'cni biääd Jesucrist Xi'n Dios lo guedxliuj te gudzucajni redojl nani rujñ bejñ xcuent beñdxab.

⁹ Rebejñ nani najc xi'n Dios direni guichagljaz gunreni dojl, sa'csi abachaa Dios xcäriejnreni, sa'csi rbäjz Dios neñ lastooreni. Direni gun dojl, sa'csi najcreni xi'n Dios. ¹⁰ Si'c riembeenu rebejñ ni najc xi'n Dios, näjza rebejñ ni najc rexi'n beñdxab. Chutis tejni di gun dzunsa'c, ni dini chanälajz resa'reni, dini gac xi'n Dios.

Nungäjñ chanälajznu resa'nu

¹¹ Lagajc rediidxre biejn diajgtu galooli che huililajztu rextidx Dios: colchanälajz resa'tu. ¹² Xhet si'c di toCain nani gujñ xi'n beñdxab. Bejñni dojl, bagu'tni bejtzni. ¿Xhicuent bagu'tnini? Bagu'tnini sa'csi bejñ bejtzni ganax dzunsa'c, luxh toCain bejñ dzunguijdx. ¹³ Na'c guidxelojtu che guidxechlajz rebejñ lojtu. ¹⁴ Racbeenu dirunu sa lo xnezyuj yälgujñ, sa'csi dinu guidxechlajz loj resa'nu. Rajpnu yälñabajñ par tejpas sa'csi rionälaaznu resa'nu. Chutis tej ni di chanälajz resa'reni canzaj lo xnezyuj yälgujñ, sa'csi rdxechlajzreni lo sa'reni. ¹⁵ Chutis ni rdxechlajz lo resa'ni, najcni nejz lo Dios si'c ni abagu'tni te bejñ. Najñnu che rugu't te niguii te bejñ dini ga'p yälñabajñ par tejpas. ¹⁶ Racbeenu rinälajz Jesucrist nuunu, sa'csi gujñni lacuaa nuunu lo cruzj. Sigajcza nungäjñ gacnäjnu resa'nu, mase guetnu lacuaa guetreni. ¹⁷ Chutis tejnu ni rajp xhidajñ xhixtenni, luxh dini gacnäj nicla tejnu ni xhet rajpdi, di bejñga chanälajz Dios. ¹⁸ Guejbtu resa'ä, na'c chanälaaznu resa'nu con rextiidxtisnu, na'c guiniitisnu rionälaaznu resa'nu. Palga rionälaazpacnu resa'nu, sacnäjnu resa'nu.

Sisiutzu'tznu nez loj Dios

¹⁹⁻²⁰ Palga rionälaaznu resa'nu, nancheenu najcnu rexi'n Dios. Palga jiajbnu xhigab dinu gac beñsa'c, dizanu gac xi'n Dios, nanab jiunu rextiidxtis Dios, na'c jiunu rexhigabnu. Dios najñ rexhigabga. Niluxh Dios anaj: renani rinälaaz resa'reni, reni'c najc rexi'nni. ²¹ Rniä lo guejbtu nani rinälazä, palga lagajc lastoonu rnii loonu, “cagusooblu xtidx Dios”, sisiutijp lastoonu che rbedx-rniabnu lo Dios. ²² Xhitis ni rniabnu lo Dios, runiidxni loonu sa'csi rusoobnu xtiidxni, riennu redzuun ni ruspaajz Dios. ²³ Dee najc rediidx ni gunibee Dios gusoobnu: chalilaaznu xtidx Dios, diidx ni rnii xho gujñ Jesucrist lacuaa nuunu, chonälaazzanu resa'nu si'cni gunibee Dios. ²⁴ Palga

rusoobnu guiraa nani gunibeeni, nabaññajñuni, si'cza nabaññajni nuunu. Nancheenu nabaññaj Dios nuunu, sa'csi baniidxni Sprit Dxan xtenni te cuääz neñ lastoonu.

4

Scree gacbeenu xhi didx najc guliipac

¹ Guejbtu renani rinälazä, na'c chalilajztu rextidx chutis bejn nani naa, “rniä rextidx Dios lojtu”. Ganiddoo colgula'tz rextiidxni te gacbeetu don chu xtidx caniini, sa'csi xhidajl bejn sinii lojtu, “nuunu rniinu rextidx Dios”, niluxh caniisireni si'c. ² Scree gacbeenu xhi diidx najc guliipac. Guiraa rebejn nani guinii “Jesucrist, Xi'n Dios, ni biääd lo guedxliuj si'c niguii”, reni'c cayacñaj Sprit Dxan xten Dios, reni'c canii xtidx Dios. ³ Guiraa rebejn nani di guinii biääd Jesucrist Xi'n Dios si'c niguii, xhet xtidx Diosdi rniireni. Reni'c rdxe'chreni loj Jesucrist. Abiejn diajgtu siääd te niguii ni rdxecheduxh loj Jesucrist, luxh naj abidzujn rextzuun niguiiga lo guedxliuj.

⁴ Guejbtu resa'ä, najcnu rexi'n Dios. Naj abiennu gaan lo rebejn ni rdxe'ch lo Jesucrist sa'csi Dios ni rbäjz neñ lastoonu abejnni gaan lo bendxab ni nabajn lo guedxliuj. ⁵ Rebejn ni rni xhet guliidi xtidx Dios, rililajztisreni rediidx ni najc xten guedxliuj. Xhidalduxh rebejn ni re' lo guedxliuj riu rediidx ni xhet guliidi. ⁶ Nuunu najcnu xi'n Dios. Rebejn nani riembee Dios riu xtiidxnu. Rebejn nani di gac xi'n Dios direni jiu xtiidxnu. Scree gacbeenu chu rebejn rni didxliipac. Scree gacbeezanu chu rebejn rni diidx ni xhet guliidi.

Rinälaaj Dios rebejn

⁷ Rniä lo guejbtu nani rinälazä, nanab chanälaaznu resa'nu, renani huililajz xtidx Dios, sa'csi Dios racnäjä nuunu te chanälaaznu resa'nu. Palga rinälaaznu resa'nu, dxejc najcnu rexi'n Dios, luxh gulii riembeenu Dios. ⁸ Palga chutis tejnu di chanälajz resa'ni, dizani gumbee Dios, sa'csi lagajc Dios racnäjä chanälaaznu Dios, racnäjäzani chanälaaznu resa'nu. ⁹ Abasule' Dios loonu lacti rinälajzni nuunu. Yu' tejtis Xi'n Dios. Abaxhalni Xi'nni lo guedxliuj te gudijxni rextojlñu lo cruujz te si'c guibaññajñuni par tejpas. ¹⁰ Si'c racbeenu rinälajzpac Dios nuunu. Galoo dinu ninälajz Dios. Niluxh Dios huinälaajz nuunu, ni'c baxhalni Xi'nni lo guedxliuj te gudijxni xtojlnu lo cruujz.

¹¹ Rniä lo guejbtu nani rinälazä, si'cni rinälajz Dios nuunu, sigajcza rla-jzni chanälaaznu resa'nu. ¹² Nicla tej bejn gajd fii lo Dios. Niluxh palga chanälaaznu resa'nu, Dios nabajn neñ lastoonu, dxejc gulii rinälaazpacnu Dios. ¹³ Nancheenu nabaññajnu Dios, sigajcza nabaññajpac Dios nuunu, sa'csi abaxhalni Sprit Dxan xtenni cuääz neñ lastoonu. ¹⁴ Narä najza reapost abahuiinu loj Jesucrist. Caniä lojtu abaxhal Xtadnu Dios Xi'nni lo guedxliuj te guslaani rebejn lo xtojlni. ¹⁵ Chutis tejnu ni rni “Jesucrist najc Xi'n Dios”, nabaññajni Dios, nabaññajza Dios bejnğa.

¹⁶ Racbeenu, rililaazzanu rinälajz Dios nuure. Guliduxh rinälajz Dios nuunu. Palga rinälaaznu Dios, nabaññajnu Dios, nabaññajza Dios nuunu. ¹⁷ Naj sanälaaznu Dios si'cni rla-jzni luxh palga chanälaaznuni guidebtis ni guibajñnu, dinu guidxejb che guidzujn dxej ni gun Jesucrist yälguxhtis lo guedxliuj. Dinu guidxejb sa'csi guideb nabajñnu lo guedxliuj, nabaññajnu Dios si'c nabaññaj Jesucrist Dios. ¹⁸ Palga rinälazsa'cnu Dios, dinu guidxejb, palga rinälajzpacnu di gacdi guidxeebnu. Palga guliipacnu rinälaaznu Dios, xhetliidi rdxejbdinu. Nani rdxejb, rdejdnı trabajw, gajd bejnğa chanälazsa'c Dios.

¹⁹ Rinälaaznu Dios sa'csi ganiddoo Dios huinälaajz nuunu. ²⁰ Palga chutis tejnu naa “rinälazä Dios” niluxh rdxechlajzni lo resa'nu, xhet guliidi xtiidxni.

Palga dinu chanälajz sa'nu nani cahuiinu, xhixh sajc chanälaazzanu Dios nani gajdnu fii. ²¹ Agunibee Dios, nani rinälajz Dios chanälajzni resa'ni sigajc rinälajzni Dios.

5

Riennu gaan lo guiraa redolguijdx lo guedxliuj

¹ Chutis ni rililajz Jesús najc Crist nani baxhaļ Dios, ni'c najc Xi'n Dios. Palga rinälaaznu Xtradnu Dios, sigajcza sinälaaznu renani najc Xi'n Dios. ² Palga rinälaaznu Dios, palga rusoobzanu xtiidxni, dxejc najnnu rinälaaznu resa'nu nani najc Xi'n Dios. ³ Ni'cni, palga rinälaaznu Dios, susoobnu xtiidxni. Luxh dinu guichalo nagajn gusoobnu xtiidxni. ⁴ Chutis tejnu ni najc xi'n Dios, riennu gaan lo redoļ ni re' lo guedxliuj. Riennu gaan lo redoļ lo guedxliujre sa'csi huililaaznu xtidx Jesucrist. ⁵ ¿Chuni'c cayujn gaan lo redoļ lo guedxliuj, ä? Renani rililajz najc Jesucrist, Xi'n Dios, reni'c rujn gaan lo redoļ lo guedxliujre.

Rediidx ni baluii Dios loonu xcuent Jesucrist

⁶ Biääd Jesucrist lo guedxliujre. Birobnis Jesucrist, baxhe'zani xtiejnni lo cruzj. Xhet ganaxdi te guirobnisni biäädni, näjza te guxhe'ni xtiejnni lo cruzj che biäädni. Sprit Dxan xten Dios canii rediidxre. Guliipac rextiidxni. ⁷ Yu' choñ ni baluiloj xhaguibaa. Rniireni xcuent Jesucrist tejsi diidx. Tejni najc Dios, steeni najc nani laa Diidx, steeni najc Sprit Dxan xten Dios. ⁸ Sigajcza yu' choñ ni baluiloj lo guedxliuj. Rniireni xcuent Jesucrist tejsi diidx. Tejni najc Sprit Dxan xten Dios. Steeni najc che birobnis Jesucrist, steeni najc che baxhe' Jesucrist xtiejnni lo cruzj che gujni. ⁹ Palga rililaaznu xtidx rebejn ni rbäjz lo guedxliuj, nungäjļ chalilaazrunu xtidx Dios. Rediidx nani rnii jioñ reni baluiloj tejsi diidx najcreni con nani rnii Dios xcuent Jesucrist Xi'n Dios. ¹⁰ Palga rililaaznu xtidx Jesucrist Xi'n Dios, rnii Dios xcuent Jesucrist neñ lastoonu. Chutis tejnu ni di chalilajz xtidx Dios, rujnni najc Dios si'c tej ni rusguee sa'csi dini chalilajz xtidx Dios ni rniini xcuent Jesucrist. ¹¹ Scree najc rediidx ni rnii Dios. Abaniidx Dios loonu yälñabajñ par tejpas. Yälñabajñga biädñä Xi'nni, Jesucrist. ¹² Palga nabaññajnu Xi'nni, rajpnu yälñabajñ par tejpas. Palga dinu guibaññaj Xi'nni, dinu ga'p yälñabajñ par tejpas.

Xtixtios con diidx ni rulijdx

¹³ Abacuaä rediidxre lojtu ni rililajz rextidx Jesucrist te gacbeepactu rajptu yälñabajñ par tejpas.

¹⁴ Ni'cni dinu guidxejb che guiniinu lo Dios, sa'csi riu Dios xtiidxnu palga tejsi najc xhigabnu con Dios che rniabnu lojni. ¹⁵ Luxh palga najnnu riu Dios nuunu che rniinu lojni, sigajcza najnnu suniidxni nani rniabnu lojni.

¹⁶ Palga tejnu fii tej resa'nu cayujn doļ, niluxh riuruni xtidx Dios, nuunu rajpnu por guiniabnu lo Dios xcuent laani, te gudeed Dios yälñabajñ lojni. Niluxh yu' te doļroduxh. Chutis te bejn ni gun doļga, di Dios gudeed lo bejnğa yälñabajñ par tejpas. Dizana guiniä guiniabtu lo Dios xcuent bejn ni rujn doļroga. ¹⁷ Guiraa redzunguijdx nani rujn rebejn najc doļ. Niluxh yu' redoļ nani di gun gunijt bejn lo Dios par tejpas palga jiu bejn xtidx Dios.

¹⁸ Racbeenu guiraanu nani najc xi'n Dios di rlaaznu jiennu doļ. Racnäğ Jesucrist nuunu te di beñdxab gun gaan nuunu, te dizanu gusoob xtidx beñdxab.

¹⁹ Nancheenu nuure najcnu xi'n Dios, niluxh guiraa rebejn nani riutis rextzun guedxliuj cagusoobreni xtidx beñdxab.

²⁰ Najnnu biääd Jesucrist Xi'n Dios lo guedxliuj. Baluiini nuunu rextidx Dios te jiembeenu Dios, nani najcpac Dios gului. Nabaññajnu Dios ni najc gului, sa'csi nabaññajnu Jesucrist. Laani najc Dios ni najc gului. Caguniidxni loonu yäl nabajn par tejpas. ²¹ Resa'ä, na'c guzuxhijbtu lo rebanäjb ni xhet guliidi. Sugacni si'c.

Guijtz Ni Rojp Ni Bacuaa Juan

Diidx gului näjza yälrinälaaznu resa'nu

¹ Narä nacä beṅgool. Cagucuaä guiitzre lojlu nane' nani agule Dios, näjza loj rexi'nlu. Rinälazâpac la'tu luxh xhet xtebâdi; näjza guiraa reni rililajz xtidx Dios sanälajztu. ² Nuure rinälaaznu la'tu sa'csi yuchee neṅ lastoonu rediidx nani najc gului, luxh dilajznu jiäl rediidxre. ³ Xtadnu Dios, näjza Jesucrist Xi'nni, gacnäṅ nuunu, jiareni nuunu, guscuecdxi lajznu con xcälṅajn didxlii näjza yälrinälajz.

⁴ Bibalazduxhä che gucebeä yu' rexi'nlu ni rusoob xtidx Dios si'c gunibee Dios loonu gusoobnuni. ⁵ Nane' ni gule Dios, diidx nani rniabä gusoob guejblu naj dini gac didxcoob, niluxh lagajc diidx ni biejn diaagnu galooli, che huililaazlinu xtidx Jesucrist. Lagajc dee najc nani gunibee Dios loonu: nungäjlpac chanälaaznu resa'nu. ⁶ Sinälaaznu resa'nu palga cagusoobnu xtidx Dios. Dee najc xtidx Dios ni biejn diaagnu galooli, che huililaazlinu xtidx Jesucrist: chanälaaznu resa'nu.

Rebejn ni rnii garenca diidx ni xhet guliidi

⁷ Balti bejn birii loonu, naj cagusgueerene xhidajl bejn ni re' lo guedxliuj. Caniireni di Jesucrist niajc niguii che biädni lo guedxliuj. Sa' bejnre najc beṅrusguee. Sa' bejnre rdxe'chreni loj Jesucrist. ⁸ Colga'p la'tu te na'c chalilajztu xtiidxreni, didi xlia'si biennu dzuun ro'c, te xca'tu guiraa ni guniidx Dios lojtu.

⁹ Chutis bejn ni rlazg gugu'ch xtiidxpacni lo xtidx Jesucrist, di bejṅga gumbee Dios. Niluxh chutis bejn ni riu xtidx Jesucrist, rumbeeni Dios, rumbeezani Jesucrist Xi'n Dios. ¹⁰ Palga jiäd te bejn rolijztu ni di chasanäj xtidx Jesucrist, na'c xcäjbtu jiu'ni rolijztu, na'cza guiniitu lojni, "Xchan. Biu'."

¹¹ Sa'csi chutis bejn ni guinii "xchan" loj te bejn ni di chasanäj xtidx Jesucrist, cayacnäṅzani redzunguijdx ni rujn bejṅga.

Rudeedni xtixtios

¹² Xhidalduxhru diidx rlazä guiniä lojtu, niluxh di rlazä gucuaäreni lo guiitz. Cabäzä jiädhuiä lojtu ro'c te guiniä rediidxre lojpactu, te guibaalajztu.

¹³ Rexi'n bäjllu, nani aguleza Dios, ruxhaḷ xtixtios lojlu. Ni'ctis najc ni rucuaä lojtu. Sugacni si'c.

Guijtz Ni Riojn Ni Bacuaa Juan

Cagucuaani didxa'c lo Gayo

¹ Narä nacä te bengool. Caguxhalä guiitzre lojlu, dad Gayo. Rinälazduxhälu sa'csi huililajzlu rextidx Dios.

² Sanälazälu, nanä laaca yu' lastoolu loj Dios. Naj rniabä lo Dios gacnäjni luj, guniidxzani yäl'nadaanlu. ³ Bibalazduxhä che gubi' gaii resa'nu, guniliireni loä xho huililajzlu xtidx Jesucrist, xho basoobzalu xtidx Jesucrist. ⁴ Xheti stee diidx ni ruspaa lazä si'c rbaa lazä che racbeä rusoob resa'nu redidxlii xten Jesucrist.

⁵ Dad Gayo, laaca cayujnlu che racnäjlü renani rililajz xtidx Jesucrist, mase dilu gumbeereni che riädreni lojlu. ⁶ Aräjpreni lo resa'nu ni rdxagsa' ree xho huinälajzlureni näjza xho gucnäj'lureni. Laaca bejnlu gucnäjlu resa'nu, badeedlu xhi biquiiireni lo nejj che biriireni rolijzlu. Si'cza nanab jiennu lo guiraa resa'nu, nalajznu rebejn ni ruluii xtidx Dios. ⁷ Ruluiireni xtidx Jesucrist sa'csi sanälajzreni Jesucrist. Xhet rca'direni lo rebejn ni di chalilajz xtidx Jesucrist. ⁸ Si'cza nanab gacnäjnu rebejn ni ruluii xtidx Jesucrist neñ garen-garen guejdx, te si'c jiennänu xtzuun Dios guiraa renani ruluii xtidx Dios.

Di Diótrefes niujn redzunsä'c

⁹ Abaxhalä te guiitz lo rexpejn Jesucrist ro'c. Niluxh Diótrefes rlanj guinibeeni lo resa'nu ro'c. Dinii jiu xtidxä. ¹⁰ Ni'cni che guidzunä ro'c, narä siniä rediidxre lo resa'nu ro'c, che guidxaag sa'nu ro'c. Diótrefes rniyaj narä lo resa'nu ro'c. Dizani jiu resa'nu che rdzujnreni ro'c. Dizani gusaan fiitu resa'nu ni riäd ro'c, mase rlanj chu tejtü fiireni. Luxh rlanjni gudxojni guidxagnäjtü rebejn nani ruhuii resa'nu ni ruluii xtidx Jesucrist.

¹¹ Sa'ä ni rinälazä, na'c gunlu redzunguijdx, bejn redzunsä'c. Nani rujn dzunsä'c ni'c najc Xi'n Dios. Chutis tej ni rujn redzunsä'c najc xpejn Dios. Chutis tej ni rujn redzunguijdx, di ni'c gumbee Dios.

Rniireni didxa'c xcuent Demetrio

¹² Guiraa rebejn ganax didxa'c rniireni xcuent Demetrio, luxh huenliisi rusoobni xtidx Jesucrist. Sigajcza narä rniä didxa'c xcuentni. Najnlu guliipac rediidx ni rniä.

Rudeedni xtixtios

¹³ Rlazä guiniä xhidalduxhru diidx lojlu, niluxh di rlazä gucuää rediidxga lo guiitzre. ¹⁴ Runä xhigab di gaclaa jiädhuiä lojlu, dxejcti jieinu diidx.

¹⁵ Gulecdxi lajzlu. Rexamigwlu ruxhal'reni xtixtios lojlu. Badeed xtixtios lo tejga reexamigwä ro'c.

Guijtz Ni Bacuaa Judas

Judas cagucuaa loj renani agule Dios

¹ Narä nacä Judas, ni rujn xtzuum Jesucrist. Narä nacäza betz Jacob. Cagucuaä guiitzre loj renani agule xtdnu Dios, renani sanälazduxhni, nani cayapcheeni par Jesucrist. ² Rniabä lo Dios, gulaslazduxhruni la'tu, guscuedxiduxhruni lastootu, gacnäjni la'tu, guniidxruni yäl_sanälajz.

Renani rului yäl_rrusguee

(2 Pedro 2:1-17)

³ Rebetzä nani sanälazä, che cayunduxhä xhigab gucuaä lojtu xcuent yäl_rrusläa lo rextol_nu ni rajpnu, benä xhigab riojbru gucuaä te guiitz lojtu te gulidxätu sudzu'tznu, gapdzu'tztu yäl_rirililajz ni basule'reni par tejpas loj rexpejn Dios. ⁴ Sa'csi abiuxhiga'tz gaii bejn, renani galooli gunii Dios siädreni, niluxh sinitlojreni. Najcreni bejn ni di chalilajz xtidx Dios, najcreni benguidxduxh, rutzuréreni xcäl_rracnäj Dios, rujnreni xtujy, sanäreni te yäl_nabandxuudx. Rbälazzareni xpaxhuaannu nani rnibee loonu, Dad Jesucrist.

⁵ Mase anajntu guira'ti rediidxga tejpas, rlazä gusnaä lajztu che gudejd gulää Dad Jesucrist rexpejn Israel lo guedx Egipto, dxejcti bagu'tni renani di nililajz xtiidxni. ⁶ Rexangl Dios nani di nucuadiajg diidx, ni birii cadro rlajz Dios chureni, reni'c basäu Diosreni cadro nacäiboo te cabäjzreni gun Dios xcäl_guxhtisni lojreni. ⁷ Si'c bejn ni guedx Sodoma näjza Gomorra näjza reguedxbäz ni tre' gajxh ro'c, sa'csi bejnreni dojl, reniguii guyunäjreni niguii biräax, regunaa guyunäjzaren i regunabiräax. Dxejc gudejdreni trabawduxh huejcreni nejn guiboo par tejpas xcuent xtoj_rreni, ni'c najc te yäl_rulijdx loonu.

⁸ Rebejn ni riu' lojtu naj najc si'c reben galoo ni bejn dojl. Nabaj_nreni si'c ni bisieedreni lo guiraa nani rului yäl_rmixcal, ruxhin_rreni tiejxh_rreni, rbälazreni xcäl_rrnibee Dios, rniyajzaren i rexangl Dios. ⁹ Miguejl ni rnibeeru loj rexangl Dios, che gudildiidxni bendxab yejc tiejxh toMoisés, dini niniyaj bendxab, alga räjpni: "Sugun Dad Jesucrist yäl_guxhtis lojlu." ¹⁰ Niluxh rebejn_ga rniyajreni nicla ganreni xhini'c rniireni. Niluxh nani racbeepac rebejn_ga najc yäl_nnaj nani nicla niqiiin nisieedreni, lala sa' nani rujnza reguidxaa, ni xheti xcäriejn_ni, reni'c sujn nitlojreni.

¹¹ ¡Aii! ¡Riazanureni! Sanaj_rreni xnezyuj Caín, luxh te gunreni gaan meel ruxhu_nlireni rujnreni sa' dojl ni bejn Balaam agujc xchero, näjza sa' dojl ni bejn Coré, ni gudil_nnäj Dios, luxh gunitlojni. ¹² Laaren i najcreni te xtuiduxh lo rexchej ni rajc guidoo, direni guidxejb gau_xchenäjreni la'tu, sa'csi xque'tisreni riuren i. Najcreni si'c te xcäy ni xhet nisguij siädnäni, nani sanä bej nezree nezrec; najczaren i si'c te yagbigool nani di ninejxh xcaj lojni, tio'p huält agujtreni, najcreni si'c te yajg ni abiliäadx. ¹³ Laaren i najc si'c nis ni räjs lo nisdoo, che cayajc te bidon_duxh, sää, siädäni, carii xtujyreni si'c räjs nis lo nisdoo. Najcreni si'c bale' ni rtejb xhaguibaa, rijreni lo te yäl_nacäiduxh ni benchee Dios par tejpas.

¹⁴ Xcuentza redee agunixgaaza Enoc ni najc xagdodoo Adán, räjpni: "Bahuii, siädnä Dios xhidalduxh xangl_ni ¹⁵ te gunni yäl_guxhtis loj guiraa bejn te gusacsíduxhni guiraa rebejn ni di gumbee Dios xcuent redol_duxh ni bejnreni, xcuentza redidxnaj ni guniyaj rebendol_duxhre Dios." ¹⁶ Rebejn_re laa reni rmojm, runduxh_rreni quej, rujnreni si'ctis ni rlajz tiejxh_rreni, rniireni guiraloj didxnaj, rniisireni didxsa'c loj rebejn te gun rebejn_ga si'c ni rlajzreni gunreni.

Rulijdxni rebejn nani ahuililajz xtidx Dios

¹⁷ La'tu, betzä ni sanälazä, riäj_l guinaj lajztu rediidx nani gunii reapost xten Dad Jesucrist, ¹⁸ sa'csi guniireni lojtu: "Neñ redxelult che guibisac Jesucrist, su' bejn ni suxhiznäjäreni rextidx Dios, sujnreni si'ctis guisia' lajzreni."

¹⁹ Redee najc renani run rlia' rexpejn Dios lo sa'reni; rinuuzareni ni yu' lo guedxliuj, diza Xp_{rit} Dxan xten Dios cuääz nen lastooreni.

²⁰ Niluxh la'tu rebetzä nani sanälazä, coltioob loj xcäl_rrililajztu ni siäd lo Diostis, colnab lo Dios xcuent yäl_rnibee xten Xp_{rit} Dxan xtenni. ²¹ Colguibajntis lo yäl_sanälajz xten Dios, col_susintis la_l ni cayunlojtu yäl_rrulaslajz xten Dad Jesucrist ni guniidx yäl_nabajn par tejpas.

²² Colgacnäjä renani di chalilazsa'c te chalilajzpacreni xtidx Dios. ²³ Colyacnäjä sgaii te guibicajreni lo dojl, gudobxhajxreni, colyejn xhigab lo guiboo cayejreni. Colyacnäjä sgaii bejn, colgulaslajzreni con yäl_rdxejb, niluxh colnatiru te di guntu lagajc dojl ni rujnreni. Gulälaz nani rujnreni, nani ruxhinreni.

Redidx lult

²⁴ Colguiliä'p xpala'n Dios nani racnäjä la'tu didi jiajbtu lo dojl, nani rujn saj_c suutu lo xcäl_rdimbicha' Dios, nayadujtu, rbaduxh lajztu. ²⁵ Yu' tejtis Dios. Laatisni rajpni yäl_nnajn te guslaani nuurnu lo dojl xcuent ni bejn xtdnu Jesucrist. Colguiliä'p xpala'nni, rajpni guiralii yäl_rnibee, yäl_rdimbicha', galooli, näj naj, näjza par tejpas. Sugacni si'c.

Rediidx Nani Bacuaa Juan Xcuent Recos Ni Churu Gac

Baluijoj Jesucrist lo Juan

¹ Dee najc rediidx ni badeed Dios loj Jesucrist te guluilojnini loj rexmosni, xcuent recos nani di gaclaa gac. Jesucrist baxhal xanglni lo Juan, te baluiini guiraa recosga lojni. ² Ni'cni bacuaa Juan lo guijtze guiraa xtidx Dios nani baluii Jesucrist lojni, xcuent guiraa recos nani bahuilojpacni.

³ Chicbaa renani roj guijtze xcuent recos ni churu gac, renani riuza rediidxga, renani rguchee rediidxga nen lastooni sa'csi siäddzungenjxh redxej che soob rediidxga.

Juan cagucuaa guijtze lo gajdz guidoo

⁴ Narä nacä Juan. Cagucuaä guijtze loj guigajdz reguidoo ni tre' lo región Asia. Dios guspalajz la'tu, guscuecdxini lajtzu, lagajc Dios ni sigajc najc nadxej, sigajcza gujcnii nani, sigajcza sajcnii par tejpas. Xca'zatu xcälruspalajz näj xcälrbexilajz guigajdz respriti ni suga' guideb gabi cadro rnibeeni, ⁵ näj xcälruspalajz, xcälrbexilajz Jesucrist nani gunilii diidx ni badeed Dios lojni, nani ganiddoo gubansac lo rebengut, nani rnibeeza lo guiraa rereii loj guedxliujre. Laani sanälazduxhni nuure, laani rudzucajni xtojnii con xtiejnii. ⁶ Laani bejnii gacnu te benro, te guedxro, gaczanu bixhojz lo Dios Xtadni. Suchä'p xpala'nni, suga'pni yälrnibee par tejpas. Sugacni si'c.

⁷ ¡Colgacbee! Laani sibisacni lo rexcäy, luxh guiragajc rebejnii suhunii lojni, nägajc renani gudzujd cuä' xcustiini. Guiraa rebejnii guedxliujre soon xcuentni. Si'cti, sugacni si'c.

⁸ —Narä nacä ganid, nacäza lult, si'c najc relectr A con Z —rnii Dad Dios—. Nabañä nadxej, sigajcza gubañä nani, sigajcza sibañä par tejpas, dipacna gacä ste'ca. Rapä yälrbexiluxhru lo chutis.

Bahuiä loj Jesucrist lo xcälrdimbicha'ni

⁹ Narä, Juan, bejtztu, näjza ni cadednäjtii trabajw xcuent Jesucrist, ni riunäjzatu cadro rnibee Dios, ni rsiudzutznäjzatu lo xtidx Jesucrist, guyu'ä lo yuj nani tre' lo nisdoo, ni laa Patmos. Ro'c baxhalreni narä pres sa'csi basule'ä xtidx Dios näjza diidx xcuent ni bejnii Jesucrist lo guedxliujre. ¹⁰ Te dumingw, la' ni cayunää Dios, guzacä astoo canixcalä, dina niacheä caro yu'ä, dxejcti nez detzä biejnii diagä xse' te ni gunii dipduxh, astoo te trompet, ¹¹ najni loä:

—Narä nacä ganiddoo, nacäza lult. Lo te guitzro bacuaa nani filu, dxejcti baxhal guijtze loj guigajdz guidoo ni yu' nez Asia, nen reguejdxre: Éfeso, Esmirna, Pérgamo, Tiatira, Sardis, Filadelfia, näjza Laodicea.

¹² Dxejcti gubireä te bahuiä chuni'c canii loä. Che gubireä bahuiä lo gajdz gandilier oor. ¹³ Galäii guigajdz recandilieerga, suga' te ni najc Xi'n Dios nani gujcnii Xi'n Niguui, najcwni te lajd ni rdzujnii lo ni'lini, lastoozani naliib te cinturon gulajg ni najc ganaxduj oor. ¹⁴ Yejcni näjza xquidxejcnii najczareni nolbäj si'c xquichlajd xiil, nolbäj si'c yejg. Dxejcti rbebajl lojni. ¹⁵ Ni'ni rdimbicha' si'c guuib ni laa bronz che cayejcni lo guiboo. Xse'ni riejnii nadipduxh astoo che riäjtii nisro nen regueuu. ¹⁶ Ladbee ca' naani gajdz balxhaguibaa; ro'ni rii te espad ni guiro'p laad caj ro'ni; dxejcti rujnii lojni rujnii si'c rujnii loj gubijdx che cagusanijni guideb lagaa.

¹⁷ Che bahuiä lojni, biabrloä nez lojni si'c te bengut. Dxejcti batzuubni naani xladbeenii yecä, dxejcti guniini loä, najni:

—Na'c guidxejblu, narä nacä ni gubajñ galooli, narä nacäza ni guibajñ lult. ¹⁸ Narä nacä ni nabajñpac; gutä, niluxh ñaj nabanä par tejpas. Rapä yälñibee lo yälgujt ñajza lo gabijl. ¹⁹ Ni'cni bacuaa recos ni abahuiilu, nani cayajc ñaj, ñajza nani churu gac. ²⁰ Dee najc laa yälñhiga'tz xten regajdz balxhaguibaa ni bahuiilu lo ñää ladbee ñajza regajdz gandilier oor: guigajdz balguibaa sälojni xangl Dios xten reguidoo. Dxejc gajdz gandilieerga sälojni guigajdz reguidooga.

2

Rediidx nani chää loj rexpejñ guidoo Éfeso

¹ Dxejcti najni loä:

—Bacuaa rediidxre lo xangl Dios xten guidoo Éfeso: “Nani ca' guigajdz balxhaguibaa ñaani ladbee, ñajza nani rsiaj galäii guigajdz gandilier oor, rnii rediidxre lojtu: ² Narä numbeä xhi redzuun rujntu, xhi trabajw rdejdtu rujntu dzuunga, ñajza xho rsiudzu'tztu. Dizatu guchagsa'tu beñlatsiaj; ñajza bala'tztu xho rujñ rebejñ nani rniireni najcreni apost ni rnii xtidx Dios, luxh direni gac, luxh la'tu guchegajctu cagusgueerene bejñ. ³ Rsiudzu'tztu, rujntu huant xcuent xtidxä, gajdtu guidxajg. ⁴ Empac yu' te quej ni rbe'cä xcuenttu: dirutu chanälajz narä si'cni huinälajztu narä ganiddoo. ⁵ Ni'cni colguzaa lajztu caro banijttu, colgusiejch lajztu, colyejñ lagajc redzuun ni bejntu galoo che guslojtu huililajztu xtidxä. Palga ditu gusiech lajztu, sudzucaä xcandilieertu cadre suga'ni. ⁶ Laaca rujntu rbälaztu xtzuum rebejñ ni laa nicolaítas, sa'csi ñajza narä rbixlazä xtzuumreni. ⁷ Nani yu' diajgni te cuadiajgni diidx, sucuadiajgni diidx ni rnii Sprit Dxan xten Dios loj reguidoo: loj renani gun gaan lo dojl, gudedä gauni ninejxh ni rcaj lo yajg yälñabajñ, ni yu' xhaguibaa cadre yu' Dios.”

Rediidx ni rniini loj rexpejñ guidoo ni yu' Esmirna

⁸ Dxejcti najni loä:

—Bacuaa rediidxre lo xangl Dios xten guidoo ni yu' Esmirna: “Nani najc ganiddoo, nani najcza lult, nani agujt, dxejctiru gubañsacni par tejpas, rnii diidxre lojtu: ⁹ Narä nanä xho cadejdlu trabajw, nanäza guxilii rajplu, niluxh nez loj Dios yu' xhidajl xhixtenlu. Nanäza yu'reni rniyajlu. Reni rniyajlu rniireni najcreni rexpejñ Israel, luxh direni gac. Najcreni xpejñ xquidobäz beñdxab. ¹⁰ Na'c guidxejblu trabajw nani agojl tedlu. Aree beñdxab gusal gaii sa'tu neñ latzguiib, te gacbeeni don la guliitu ahuililajztu xtidx Dios, te tedzatu trabajw tzuu dxej. Colgutip lajztu mase guettu, dxejcti narä gunidxä te coron xten yälñabajñ. ¹¹ Nani rlajz cuadiajg diidx sucuadiajgni diidx ni rnii Sprit Dxan xten Dios loj reguidoo: nani gun gaan lo dojl, xhet gundi yälgujt ni rojppa lojni.”

Rediidx ni rniini lo rexpejñ guidoo ni yu' Pérgamo

¹² Dxejcti najni loä:

—Bacuaa rediidxre lo xangl Dios xten guidoo ni yu' Pérgamo: “Nani ca' spaad ni caduxh ro'ni guiro'p laad rnii rediidxre lojtu: ¹³ Narä nanä caro rbäjztu, rbäjztu lo guejdx cadre rnibee Beñdxab. Rsiudzu'tztu xcuent xtidxä. Laltis rsiudzu'tztu rililajztu xtidxä, mase neñ redxej cheni bagu'treni Antipas, ni gunii diidx xcuenta, nani gusudzutzpac nez loä, nani bagu'treni neñ guejdx cadre rnibee Beñdxab. ¹⁴ Niluxh yu' tiop-choñ xtojltu. Lojtu nadxaag gaii bejñ ni rujñ si'c bejñ toBalaam agujc xchero. Laani baseedni Balac xho gunni te jiajb rexpejñ Israel neñ dojl, baseednireni gaureni recos ni gurej lo dxan nez loj rebanäjb, baseedzani rexpejñ Israel guesnäjreni chutis gunaa.

15 Sigajcza nadxaag lojtu gaii bejn ni riu rediidx ni rusule' reni laa nicolaítas.
 16 Colgusiechxaa lajztu, te di jiälgacä lojtu te gucuanääreni spaad ni yu' ro'ä.
 17 Nani rlanj cuadiajg diidx, sucuadiajgni diidx ni rnii Sprit Dxaan xten Dios loj reguidoo: renani gun gaan lo dojl, lojni gudedä yätxtiil ni laa mana ni yuchee-xhiga'tz. Sudedäza lojni te guibäz ni najc nol, lojni caj te lajni ni nacoob, nani rutru racbeedi, xtebtis nani xca'ni.”

Rediidx nani rniini lo rexpejn guidoo ni yu' Tiatira

18 Dxejcti najni loä:

—Bacuaa rediidxre lo xangl Dios xten guidoo ni yu' Tiatira: “Xi'n Dios nani rbebajl balojni, ni rdimbicha' ni'ni si'c bronz, ni'c rnii rediidxre lojtu:
 19 Ananä xtzuuntu, sanälajztu sa'tu, nanä xho rililajztu xtidxä, xho racnäjtutu resa'tu, näjza xho rsiudzu'tztu, runduxhtu huant. Nanäza cayujntu dzunroru naj loj ni bejntu che guslojtu. 20 Niluxh yu' xhicuent rdxe'chä lojtu. Rcäjbtu riu'tu loj te gunaa ni laa Jezabel. Laani rniisini najcni te profe't, gunaa ni rnii xtidx Dios, rusgueetisni bejn. Luxh xcälruseedni cagusgueeni rexpenä nani ahuililajz xtidxä, te naj rujnreni cosguijdx, si'c yälresnäjä ni di gac chäälni, rajwzarenani nani gurej lo dxan xten rebanäjb. 21 Aguläzä xchej te gusiech-lajzni, gusaanni gunni dojl, luxh naaddini gusiech-lajzni xcuent redzunguijdx ni rujnni. 22 Luxh palga laani dini gusaan gunni redzuun nani rujnni, narä siguixäni, gudedä te yälracxhuro. Luxh sutedä trabajwduxh guiraa renani bennäjni dzunguijdx palga direni gusiejch lajzreni, palga direni guchaa xmoodreni. 23 Sugutxhiä, sunitloä rexi'n gunaaga, te si'c gacbee guiraa rebejn ni yu' nejn reguidoo narä nacä ni rula'tz rexhigab ni yu' xcäriejnreni, näjza yälrililajz ni yu' nejn lastooreni. Te gacbeezarenani narä sunidxä lo tejgatu ni riäjil xca'tu xcuent redzuun ni rujntu. 24 Dxejc loj guiraa reni yu' lo guedx Tiatira, la'tu ni di guirinajl xnezyuj Jezabel, la'tu ni di gumbee nani rniireni najc recosduxh xten bejdxab, xhetru rniädi lojtu, dirunä gutalä xtzuuntu. 25 Colyapdu'tz rextidxä nani arajptu dxejli ni guibisacä lojtu. 26 Nani gun gaan lo dojl, näjza nani cagusoob xtidxä dxe lultli, lojni sudedä yälrnibee te guinibeeni renacion. 27 Si'cni baniidx Xtadä yälrnibee loä, sudedä yälrnibee lojni, te guinibeeni guiraa reben guedxliuj, gunnäjni yälguixhtis lojreni te barguiib si'c rujn ni runchee guesbajjn, rlia'ni guiraa regues nani xhet sajcdi. 28 Sunidxäza bale' xhaguibaa ni rii rsildoo (ni säloj guibanänäjnu Dios). 29 Nani rlanj cuadiajg sucuadiajgni diidx ni rnii Sprit Dxaan xten Dios loj reguidoo.”

3

Rediidx nani rniini lo rexpejn guidoo ni yu' Sardis

1 Dxejcti najni loä:

—Bacuaa rediidxre lo xangl Dios xten guidoo ni yu' Sardis: “Si'c naj nani rajp guigajdz Sprit xten Dios näj guigajdz rebal xhaguibaa: Narä nanä guiraa redzuun nani rujntu, rnii rebejn nabajntu, niluxh narä nanä ascanu agujttu, dirutu gun xtzunä. 2 Colguibajjn, colgula'tzru nani rapsijcti xcuent rextidxä nani ameer nitloj nejn lastootu. Narä ruhuiä ditu niunsa'c dzuun xtenä nez loj Dios. 3 Colgusnaj lajztu rediidx ni basule'reni lojtu, nani abacuadiajgtu, colgusoob rediidxga, colgusiech lajztu. Palga ditu guibajjn, palga ditu guchaa xmoodtu, sidzunä nez lojtu si'c te gubaan, nicla gaantu cor guidzunä lojtu. 4 Niluxh yu' gaiisi bejn lo guedx Sardis nani naya, nani gajdreni gun dojl. Sajcwreni ladnolbäj te sanäreni narä xhaguibaa, sa'csi laarenani säbyäjilreni. 5 Nani gun gaan lo dojl, ni'c sajc gacwni ladnol, luxh dizana guche'nä lajni loj xlibr cadro caj laj renani sibajjnänäj Dios par tejpas. Sicäpäza nez loj Xtadä

näjza nez loj guiraa rexquixhajgni, bejnga najc rexpenä. ⁶ Nani rlanj cuadiajg diidx, sucuadiajgni diidx ni rnii Sprit Dxi xten Dios loj reguidoo.”

Rediidx nani rniini lo rexpejn guidoo ni yu' Filadelfia

⁷ Dxejcti najni loä:

—Bacuaa rediidxre lo xangl Dios xten guidoo yu' Filadelfia: “Nani najc dxan, nani najc guliipac, nani rajp xliäi toDavid (ni säloj guiragajc yälrnibee), nani che ruxhalni, rut rusäuudi, nani che rusäuuni, rut ruxhaldi, laani rniini diidxre lojtu: ⁸ Narä nanä xhini'c rujntu. Si'c te puert ni naxhal, ni rut rusäudi, si'cza sunidxä yälrnibee lojtu te gusule'tu xtidxä, rutliidi sajç gusäuu ro'tu. Mase guxii nadip-nadaantu, atu canii xtidxä, ditu cuatzlajç xtidxä. ⁹ Suhuiitu xho gunä rebejn ni yu' lo guidobäz xten bendxab. Rniisireni najcreni xpejn Israel, luxh direni gac; rusgueereni bejn. Narä sunäpac jädzuxhijbreni nez lojtu, sunäza gacbeepacreni sanälazduxhä la'tu. ¹⁰ Sa'csi basoobtu xtidxä ni gunibeä sutijptu, na'c jieedtu, ni'cni narä sacnäzatu che guidzujç dxej tedtu trabajw. Luxh orga ameer guidzujç lo guideb guedxliuj, luxh sidejd guiraa reben guedxliuj trabajw, te guibee reben'sa'c lo reben guedxliuj. ¹¹ Narä di gaclaa jäälä; gopdzu'tz ni rajptu, te rut gudzucajdi ni gunidxä xca'tu. ¹² Nani gun gaan lo dojl, narä gunäni si'c te pilajr nen xquidoo Xtioozä, nalajznu, sajçni te bejn nani gac guinibee cadre yu' Dios. Sibajçni ro'c par tejpas, diruni guirii ro'c. Lojni gucuaä laj Dios näjza laj guejdx xten Dios ni najc Jerusalencoob, nani guirii xhaguibaa cadre yu' Dios; lojni sucuaäza laä ni najcza nacoob sa'csi najçni xpenä. ¹³ Nani rlanj cuadiajg diidx, sucuadiajgni ni rnii Sprit Dxi xten Dios loj reguidoo.”

Rediidx nani rniini lo rexpejn guidoo ni yu' Laodicea

¹⁴ Dxejcti najni loä:

—Bacuaa rediidxre lo xangl Dios xten guidoo ni yu' Laodicea: “Nani laa Amén (ni säloj sugacni si'c), nani najc testiigw ni rniliipac, ni di cuäz guiniini didxliiga, nani guläxtiej guedxliujre näj guirali ni benchee Dios, laani rniini scree: ¹⁵ Nanä redzuun ni cayujntu. Ditu sasa'c lo xnezyuä, dizatu cuälaz xnezyuä. ¡Maläi guntu tejni o steeni! ¹⁶ Ni'cni, sa'csi najçtu si'c nistiib, ditu gac si'c nisnajl, niclaza gactu si'c nislää, sibäro'ä la'tu. ¹⁷ Sa'csi rniilu: Ri'cw narä, rapä xhidalduxh xhixtenä, xhet rquinädi. Luxh dilu gan xhet rajpdilu, alga najçlu ben gubijn, te ben probduxhlu, di lojlu jien, luxh suga'lu xhabäälü nez lo Dios. ¹⁸ Ni'cni rulidxälu siilu loä oor xtenä nani agudejd lo guiboo te gaclu ri'cw; gusii loä ladhacwlu, te di guitujyulu suulu xhabäälü; gusiiza unguent loä te chää balojlu, te jien lojlu. ¹⁹ Rebejn nani sanälazä, reni'c rulidxä, runäza riareni che et laadi rujnreni. Ni'cni colsäblajç; colgusiejch lajçtu. ²⁰ Colhuii, ana suga'ä roxlä' lastootu, cagusezä, cabedxa'ä. Palga yu' chu tejtü ni jiejn diajgni xse'ä, guxhalni xpuert lastooni, siu'ä lastooni, te gacnääni, te guiba'nsa'czani nez loä. ²¹ Loj nani gun gaan lo dojl, lojni gudedä guinibenäjni narä xhaguibaa, sa'csi näj narä abenä gaan lo dojl, ni'cni gurenää Xtadä cadre rnibeeni xhaguibaa. ²² Nani rlanj cuadiajg diidx, sucuadiajgni diidx ni rnii Sprit Dxi xten Dios loj reguidoo.”

4

Calä'preni xpala'n Dios xhaguibaa

¹ Che gulujç bacuaä rediidxga, guläsä loä, bahuiä astoo naxhal ro puert xhaguibaa. Dxejçru gunii xse' nani biejn diagä ganiddoo, nani riejn si'c xse' te trompet, najni loä:

—Huä'p, gudaä ree, te guluiä lojlu recos ni churu gac che luux gac recosre.

² Lagajc dxejc astoocanu si'cni huij sprit xtenä xhaguibaa. Ro'c bahuiä te yagxhilro cadro rbej nani rnibee xhaguibaa, luxh ro'c sobga' nani rnibeeni. ³ Nani sobga' lo yagxhilga, rienni si'c te guisa'c ni rbebalsejs, si'c reguisa'c ni laa jaspe, näj cornalina. Guideb gabi yagxhil cadro rnibeeni dejd te xquitgubijdx ni rbebalsejs si'c guisa'c ni laa esmeralda. ⁴ Guideb gabi cadro rnibeeni suga' sgalbitajp yagxhil, loj reyagxhilga sobga' galbitajp rebengool, najcwreni ladnol, yu' coron̄ oor yejc tejegareni. ⁵ Nez lo yagxhilro cadro rnibeeni rii reyärdinya' näjza guzii. Nez loj cadro rnibeeni caya_lguij gjadz bajl ni najc gjadz Sprit Dxan xten Dios. ⁶ Nez loj cadro rnibeeni yu' astoocanu te nisdoo ni rien si'c te guihuanro, rdimbichasejsni.

Galäii yagxhilroga näjza guideb gabini suga' tajp man, guideb nez lojreni näjza nez dejtzeneni yu' balojni. ⁷ Manganidga najc si'c te lion; man ni rojpga najc si'c te gonbäz; man ni riojnga rujn lojni si'c rujn loj te niguii; man ni rdajpga najcni si'c te bisiro cagutajt xhaguibaa. ⁸ Niluxh guidap remanga tejegareni yu' xho'p xhigareni, guideb gabireni, näj nez nenreni liguidxa balojreni, niluxh direni gusilajz, dxej-yääl caniireni:

Dxan, dxan, dxan najc Dad Dios ni rajp yä_rnibeduxh,
nani yu' galooli, nani yu' naj, nani churu jiaäd.

⁹ Guidap remanga rliä'preni xpala'n Dios, rusuxhijbreni rajnrenini, rdeedzareneni xquixtios loj nani rnibee par tejpas. ¹⁰ Dxejc guigalbitap rebengool, suzuxhijbzeneni loj nani rbej lo yagxhilro, te ganreni nani nabajn par tejpas. Sucuaareneni xcoronreni nez loj xyagxhilroni, siniireni lojni, säjpreni:

¹¹ Dad Dios baxhuaannu, Guejbpac̄lu riäj_l xca' guiraa rebala'n, guiraa reyälruzuxhijb, guiraa reyälrnibee,
sa'csi Guejblu guläxtiej guira'ti nani yu' naj,
yu'reni sa'csi rlajz Guejblu chureneni,
ni'cni benchee Guejblu guiraareneni.

5

Te guijtznä j te ni najc Xiil xten Dios

¹ Dxejcru narä Juan bahuiä lo nani sobga' lo yagxhilroga. Naani ladbee ca'ni te libr, najcni si'c te bilu guijtzn. Caj diidx nez lojni caj diidx nez dejtzn, nadxe'ni, caj gjadz seii lojni. ² Dxejcti bahuiä lo te xangl Dios ni nadipduxh, dip guniini, najni:

—¿Chuni'c riäj_l guxhal guijtzn? ¿Chuni'c riäj_l gutiäjs reseiire?

³ Niluxh nicla tej bejn di nidxäj_l ni riäj_l gutiäjs reseiiga te guxhalni guijtzn; nicla xhaguibaa, nicla lo guedxliujre, nicla xhajiät nez nen guedxliuj. Niclaza nidxäj_l chu niajc nuhuii lo guijtzn. ⁴ Narä ronduxhä sa'csi nicla tej rut riäj_ldi gutiäjs reseiiga, niclaza ni riäj_l go_l guijtzn, niclaza ni riäj_l fiitis lo guijtzn.

⁵ Dxejcti gunii te bengool loä, najni:

—Na'cru goonlu. Bahuii gan, niguii ni rniireni Lion, xagdoo toJudá, xagdoo toDavid, abejnni gaan lo yälgujt ni'c naj riäj_l guxhalni guijtzn, gutiäjszani guigajdz reseiiga.

⁶ Dxejc bahuiä nez cadro suga' yagxhilroga näj guidap remanga, näj cadro suga' guiraa rebengool luxh te galäiiga suga' tej ni najc Xiil xten Dios, astoo abagu'trenini. Sojb gjadz xca'chni näjza gjadz balojni, ni najc gjadz Sprit xten Dios nani ruxhalni guiraa nez lo guedxliuj. ⁷ Laani gubigni, cua'ni guijtzn, guläänini naa ladbee xten nani sobga' lo yagxhilroga canibee. ⁸ Che cua'ni guijtzn, guidap remanga näjza guigalbitap rebengool bazuxhijbreni nez loj Xiilga. Tejga rebengoolga ca' te arp, ca'zareneni taz oor guidxa te ni najc si'c

yaal. Yaalga najc guiraa reyälꝛbejdx, yälꝛniab xten rexpejñ Dios. ⁹ Cayolꝛareni te dicoob ni najc scree:

Guejblu sacduxh,
riäjꝛpac xca' Guejblu guiitzga,
gutiäjs Guejblu reseiiga, sa'csi bagu't rebejnꝛlu,
näjza xtiejnꝛlu gudijx xcuent bejnꝛ lo Dios.
Gudijxlu xcuent bejnꝛ ni najc garen-garen ꝛaz,
ni rnii garen-garen didxsaj,
ni siääd garen-garen guejdx lo garen-garen ladxbejnꝛ.

¹⁰ Badeedlu gacreni ꝛei näjza bixhojz lo Dios.

Laareni sinibeereni rebeñ guedxliuj.

¹¹ Che bahuiä, biejn diagä xse' xhidalduxh xangl Dios ni suga' guideb gabi yagxhilro cadro rbej nani rnibee, näjza xse' guidap reman, näjza xse' guiraa rebeñgool. Luxh di gacdi guigab xangl Dios ni tre' ro'c sa'csi xhidalduxhtej najcreni, xhidalduxh miyoñ najcreni. ¹² Dipduxh najc xse'reni, caniireni scree:

Sacduxh Xiil nani bagu'treni,
ni'c riäjꝛ xca'ni yälꝛnibeduxh, yälꝛrapduxh, yälꝛnanduxh, yälꝛmilagwr.
Riäjꝛza guiliä'pnu xpala'nni, guzuxhijbnu lojni gañnuni, gudeednu xquixtios lojni.

¹³ Dxejcti biejn diagä xse' guiragajcreni, guiraa reni benchee Dios ni yu' xhaguibaa, näj guiraa reni yu' loj guedxliujre, näjza guiraa reni yu' xhajiät nez neñ guedxliuj näj lo nisdoo, biejn diagä caniireni scree:

Loj nani sobga' lo yagxhilro cadro rnibeeni,
näjza loj ni najc Xiil xten Dios, laatisni sacduxhni,
guiliä'pnu xpala'nni, guzuxhijbnu nez lojni gañnuni,
gäbzanu rinibeeni par tejpas.

¹⁴ Dxejcti guidap remanga rnigajcreni scree:

—Sugacni si'c.

Dxejcti guigalbitap rebeñgool bazuxhijbreni nez loj nani nabajñ par tejpas, gojñrenini.

6

Guigajdz reseii

¹ Dxejcti bahuiä loj ni najc Xiil xten Dios. Batiäjsni tej seiiga. Biejn diagä gunii tej lo guidap remanga, luxh che guniini riejn xse'ni si'c che ni canii guzii, najni loä:

—Gudaa te filu.

² Dxejc bahuiä lo te cabai nol. Nani bijb dejtznı ca' te arcw nani rucuaa fle'ch. Badeedreni te coronꝛ lojni. Biriini cayujñni gaan te chanuutis gunni gaan.

³ Che batiäjsni ni rojp seiiga, biejn diagä gunii ni rojp manga, najni loä:

—Gudaa te filu.

⁴ Dxejc bahuiä lo te cabai xniaa. Loj nani bijb cabai xniaaga badeedreni yälꝛnibee gudzucajni yälꝛnadoo, yälꝛrbedxilajz, lo guedxliujre, te ju't sa' rebejnꝛ. Badeedreni te spadro cua'ni.

⁵ Dxejcti che batiäjsni ni riojñ seiiga, biejn diagä gunii ni riojñ manga, najni loä:

—Gudaa te filu.

Dxejc bahuiä lo te cabai yas. Nani bijbni naazni te balans. ⁶ Biejn diagä astoo galäii guidap remanga, birii xse' te ni canii scree:

—Tej kil xob xca'lu gunlu dzuun tebdxej; chon kil salbaad xca'lu gunlu dzuun tebdxej. Niluxh na'c guhuallu bin niclaza se't.

⁷ Dxejcti che batiäjsni ni rdap seiiga, biejn diagä gunii ni rdajp manga, najni loä:

—Gudaa te filu.

⁸ Dxejc bahuiä lo te cabai gojtz. Nani bijbni laa yälgujt, luxh dejtzni siädnalgajc ni rnibee gabijl. Gula'ni rebejn ni re' lo guedxliujre gujcreni tajp gala', dxejc loj redee badeedreni guinibeereni lo te cuaa reben̄guedxliuj te ju'treni rebejn̄ga con spaad, näj yälrliaan, näj yälracxhuu, näjza remanduxh ni yu' dajn.

⁹ Dxejcti che batiäjsni ni rajc gaii seiiga, bahuiä nez ni' xpiändxan Dios, ro'c naga' xaim rebejn̄ nani bagu'treni sa'csi huililajzreni xtidx Dios, näjza sa'csi gusutijpreni basule'reni xtidx Dios. ¹⁰ Dipduxh caniireni, canabreni lo Dios, räjpreni:

—Dad, ni najc Dxan, ni najc guliipac. ¿Gucli cuääz, gaclaa gun Guejblu yälgujhtis loj reni bagu't nuure lo guedxliuj te quiixreni ni bejnreni?

¹¹ Dxejcti cua'reni te ladnolbäj gojt tejegareni. Dxejc räjpreni lojreni cuäzsjcreni, gusilajzreni, laḷ ni guiza' resa'reni ni rusule' xtidx Dios, ni churu gugu'treni sigajc bagu'treni laareni.

¹² Bahuiäza cheni batiäjsni ni rajc xho'p seiiga, luxh gujc te xuduxh, bigasboo loj gubijdx si'c te ladyas, sas bäi gujc guidebni si'c rejn. ¹³ Rebajl ni yu' xhaguibaa bitejbreni lo guedxliujre, si'c rtejb rebetz yagxhejn̄ che rusniib te beduxh yajga. ¹⁴ Dxejcti gunitloj guibaa si'cni rnitloj te guijtz che re'ni, rajcni te biliu. Guiraa redajn näjza reyuj ni re' galäi lo nisdoo biniibreni, bidxaa xlajdreni. ¹⁵ Ni'cni guiraa reben̄ guedxliuj, rebejn̄ nani rnibee, näjza reben̄ro, näjza recapitán, näjza reben̄ rapduxh, näjza reben̄ ni nadiplajzreni, näjza remos, näjza renani rut lojdi yu'reni, guiragajczeni baxun̄reni, huicuatzojreni neḷ rebiliää neḷ redajn. ¹⁶ Dxejc räjpreni loj redajn, loj reguilaj:

—Colguitejb yejcnu, colgucua'tz nuure loj nani rbej lo yagxhilro xhaguibaa näjza loj yälgujhtis xten nani najc Xiil xten Dios. ¹⁷ Sa'csi abidzujn̄ dxero xten xcälgujhtisni, ¿chuni'c sajc suu nez lojni?

7

Tegayuu tiubitajp mil̄ rexpejn̄ Israel

¹ Dxejcti bahuiä lo tajp xangl Dios ni suga' loj guidajp laad guedxliuj. Caguscuääzreni guidajp rebej xten guedxliuj te xhet bejdi guibi' lo guedxliuj nicla lo nisdoo niclaza yejc reyajg. ² Bahuiä lo stee xangl Dios, ni siäd nez cadre rliejn gubijdx, ca'ni sei xten Gueb Dios ni nabajn̄ par tejpas. Dipduxh guniini lo guidap xangl Dios ni rajp yälrnibee te gunreni daan lo guedxliuj, näjza lo nisdoo. ³ Räjpni lojreni:

—Guläzsjctero, laḷ ni guicuaanu te seen lo cuaj reni najc xpejn̄ Dios, te dxejcru sajc guntu daan lo yuj, näj loj nisdoo, näj loj reyajg.

⁴ Dxejcti biejn diagä najreni bal bejn̄ guyu' seenga lo cuajreni, basa'reni tegayuu tiubitajp mil̄ bejn̄ ni bibee loj rexpejn̄ Israel. ⁵ Loj rexpejn̄ Judá bibee tzubitio'p mil̄; loj rexpejn̄ Rubén bibee tzubitio'p mil̄; loj rexpejn̄ Gad bibee tzubitio'p mil̄; ⁶ loj rexpejn̄ Aser bibee tzubitio'p mil̄; loj rexpejn̄ Neftalí bibee tzubitio'p mil̄; loj rexpejn̄ Manasés bibee tzubitio'p mil̄; ⁷ loj rexpejn̄ Simeón bibee tzubitio'p mil̄; loj rexpejn̄ Leví bibee tzubitio'p mil̄; loj rexpejn̄ Isacar bibee tzubitio'p mil̄; ⁸ loj rexpejn̄ Zabulón bibee tzubitio'p mil̄; loj rexpejn̄ José bibee tzubitio'p mil̄; loj rexpejn̄ Benjamín bibee tzubitio'p mil̄.

Benguixhuj ni najcw ladnolbäj

⁹ Dxejcti bahuiä lo xhidalduxh bejn, benguixhuj, nicla tej bejn digacdi gulabreni. Garen-garen ladx-bejn siädreni, garen-garen najc lajdxreni, näj raz xtenreni, näj xtiidxreni. Suga'reni nez loj yagxhilro xten ni rnibee, näjza nez lojni ni najc Xiil xten Dios. Najcwreni ladnolbäj, ca'zarenı zıjn.

¹⁰ Dipduxh rniireni, räjpreni:

Dios ni rnibee lo yagxhilro, näjza nani najc Xiilre, baslaareni nuure lo xtojlnu.

¹¹ Suga'za guiraa rexangl Dios guideb gabi yagxhilro cadre rnibeenı, näjza guideb gabi rebengool näjza guidap remanga, dxejcti bazuxhıjbreıni, basıjbreıni lojreni nez lo Dios, ¹² räjpreni:

Sugacni si'c. Loj Xtıostısnu colye'tz sacduxhni;

colguiliä'p xpala'nni;

laatisni rajpni yälınajı;

lojtısnı colgudeed xquıxhtıos, laatisni colgan,

colıuxhıjı lojni; laatisni rajpni yälrnıbee näjza yälmlıagwr.

Sugacni si'c par tejpas.

¹³ Dxejc gunii te bengool loä, najni:

—Renani najcw reladnolbäjre, ¿chu najcreni? ¿Casiädreni?

¹⁴ Dxejcti räpä lojni:

—Dad, anajı Guejblu.

Dxejc najni loä:

—Redee najc renani agudejd yälırabajwduxh, renani abia rextojlreni sa'csi xtiejn Xiil xten Dios agudıjx xtojlnı. ¹⁵ Ni'cni suga'reni nez loj yagxhilro xten Dios dxej-yäl cayujnreni xtzuunni neı xquıdooni. Ni'cni sacnäı nani sobga' lo yagxhilroga guiraa renani suga' nez lojni, sunäjıtısnı laareni. ¹⁶ Dirurenı guiliıan, niclaza jıojlnı, dıza gubıjdx guze'c lojreni, dızarenı gacnanlaa. ¹⁷ Sa'csi nani najc Xiil xten Dios ni sobga' galäıı loj yagxhilro xten Dios, laani cayajpnırenı si'c xılbäz, sınanırenı cadre yu' nısyı ni rudeed yälınabajı par tejpas. Suspijdz Dios nısbee balojrenı, dirurenı goon par tejpas.

8*Nı rajc gajdz seiıga*

¹ Che batıäjsni ni rajc gajdz seiıga, gucdxı xhaguıbaa si'ctı med or. ² Dxejctı bahuiä loj guıgajdz xangl Dios ni suga' nez loj Dios. Lojrenı badeedrenı gajdz trompe't. ³ Dxejctıru bıäd stee angl, ca'ni te bacue ni najc ganax oor, bazujnıni nez loj piändxan. Badeedrenı lojni naclejı yaal te cachaagnıni loj guiraa rextıdx xpejn Dios ni rniireni che rbedx-rııabrenı lo Dios, te checni lo piändxan ni najc ganax oor, ni yu' nez loj yagxhilroga. ⁴ Dxejctı gujxhga nägajc rextıdx rexpejn Dios, bırii ladsınaa xangl Dios ni ca' bacue, huä'prenı nez loj Dios. ⁵ Dxejctı lagajc anglga cua'ni guıboo ni dzuub lo piändxanga, bachajıni bacue, dxejctı baslojnıni lo guedxlıuj. Dxejc guyu' te guzıduxh, bıdınyaduxh, gujczı te xuduxh.

Retrompe't

⁶ Dxejctı guıgajdz rexangl Dios ni ca' guıgajdz retrompe't, guzusıırenı te guıloj golrenı retrompe'tga.

⁷ Che bıł trompetganıd, guıxob näj guıboo nu'chrenı rejı gusloj cayajbrenı loj guedxlıuj. Dxejctı huejc ni riojn la' guedxlıuj, huejczı ni riojn la' reyajı näjza guıralıı recuaan.

⁸ Che bıł ni rojı xangl Dios trompe't ni ca'ni, ascanu yu' chu bacuaanı bıajb sı'c te danro ni cayejc loj nısdoo. Dxejctı gujc ni riojn la' nısdoo sı'c rejı.

⁹ Dxejcti gujt ni riojn la' rebäjl näj guiraa reman ni yu' loj nisdoo. Gunitlojza ni riojn la' rebarcw ni sazaj lo nisdoo.

¹⁰ Che bil ni riojn xangl Dios trompe't ni ca'ni, biajb te balro xhaguibaa, cayejcti si'c te balgued. Bitejbni loj ni riojn la' regueuu, näjza cadre rliejn nis. ¹¹ Laj bajlga najc Ajenjo, ni säloj te cos ni nanladuxh. Ni riojn la' nis gujc nis nanladuxh. Dxejcti gujt xhidalduxh bejn xcuent nisnanlaaga.

¹² Che bil ni rdajp xangl Dios trompe't ni ca'ni, guxhijñ ni riojn la' gubijdx, näjza ni riojn la' bäii, näjza ni riojn la' rebal xhaguibaa, bicäyreni. Dxejcti dirureni guzanij ni riojn la' dxej, näj ni riojn la' yääl.

¹³ Dxejcti bahuiä xhaguibaa, biejn diagä si'c te bisij cagutajt nez galäii xhaguibaa. Biejn diagä cabedxa'ni, caniini rediidxre:

—¡Aii! ¡Aii! ¡Aii! Riaduxhä reben guedxliuj che guisloj goļ schon rexangl Dios retrompe't ni ca'reni. Sidejd reben guedxliuj trabajwduxhru.

9

¹ Che bil ni rgaii xangl Dios trompe't, bahuiä lo te bal xhaguibaa ni bitejb lo guedxliujli. Bajl xhaguibaaga cua'ni läii ni ruxhal ro' gabijl. ² Baxhaltini ro' gabijl, dxejc huäjs te gujxh ro'ni si'c räjs gujxh ro' te orguiboro. Dxejcti gujxhga basäuni loj gubijdx, gudxajni lo bej. ³ Dxejcti lo gujxhga birii betzsu gusujreni guideb lo guedxliuj. Cua'reni yälñibee gacreni nialajz si'c nialajz renaxejb. ⁴ Cua' remanga yälñibee na'c gunreni daan loj reguixa', loj recuaan, loj reyagbajñ; rebejñtis nani xhet beedi xten Dios caj lo cuajreni, reni'c gusacsíreni. ⁵ Cua'reni yälñibee na'c ju'tni bejn, gaii bäii gusacsíreni xcälñayanreni bejn. Luxh xcälñayanreni najc si'c yälñayan cadre rauya' te naxejb te bejn. ⁶ Neñ redxejga, siguiil rebejn yälgujt, luxh direni guidxälñi. Luxh mase rlajzreni guetreni, sibicaj yälgujt lojreni.

⁷ Rebetzsure najc si'c recabaii ni suchee te chääreni lo guer. Yejcreni yu' te ni najc si'c te coron oor; luxh lojreni rujñ si'c loj rebejn. ⁸ Xquichejcreni si'c najc xquichejc gunaa; reläyreni najc si'c läjy lion. ⁹ Luxh guideb tiejxhreni caj si'c guuib ni rusäudzu'tzreni. Rubeduxh rexhigaareni, si'c rubej che ruxuñ xhidalduxh cabaii näj xcarreni che agojñ chääreni guer. ¹⁰ Xhibaanreni najc si'c xhibaan naxejb, xcuchreni yu' yälñayan te gusacsíreni reben guedxliuj gaii bäii. ¹¹ Yu'za ni ñibee lojreni, xangl beñdxab ni birii gabijl. Xtidx hebreo laani Abadón, xtidx griegw, laani Apolión.

¹² Naj agudejd tej casionroga, naj cayäädx stio'pni.

¹³ Che bil ni rxho'p xangl Dios trompe't, biejn diagä te xse' bejn ni lascanu siädäni galäii guidajp reca'ch ni caj loj xpiändxan ni nac-chee ganax oor, ni yu' nez loj Dios. ¹⁴ Luxh xse' bejñga canii loj ni najc rxho'p xangl Diosga, ni ca' trompe't:

—Baslaa guidap reangl nani caduu nez rogueuu ni laa Eufrates.

¹⁵ Dxejcti baslaani guidap reanglga te ju'treni ni riojn la' ben guedxliuj. Luxh gule Dios reanglga parpac dxejga, bäiiga, ijzga. ¹⁶ Biejn diagä bal najc guiraa resoldaad ni rbijb cabaii: najcreni tio'p gayuu miyon.

¹⁷ Scree bahuiä lo bacal recabaiiga näjza renani bijb recabaiiga. Lastoo reni bijb recabaii caj te guuib, najcni xniaa näj zul näj gojtz. Dxejcru yej recabaiiga najc si'c yejc te beedz. Ro'reni carii bajl näj gujxh, näj sufr. ¹⁸ Ni riojn cuaa bejn gujt xcuent guichon replaag nani carii ro' recabaii, xcuent bajl näj gujxh, näjza sufr. ¹⁹ Recabaii runnäj daan ro'reni näjza xhibaanreni, sa'csi xhibaanreni najc si'c bäl, yu' yejcreni, näj ni'c runnäjreni daan.

²⁰ Luxh guiraa rebejn nani di replaagre nugu't, direni nusiejch lajzreni xcuent ni cayujñ naareni, te rajñreni rebeñdxab, näjza rebanäjb ni nac-chee

oor, nájza pla't, nájza latón, nájza guij, nájza yajg. Luxh rebanájbga di gacdi fiireni, di diajgreni jiejn, di gacdi sareni. ²¹ Diza rebejnnga nusiejch lajzreni xcuent xcälrugutreni, xcälrujnreni yälbidxaa, xcälresnäjreni bejn ni di gac cháälni, niclaza xcälgubaanreni.

10

Te angl ni ca' te guijt

¹ Bahuiä stee xangl Dios ni rajp yälrnibeduxh, siädjiäjtni xhaguibaa, li yu'ni nen baj, yejcnidejd xquitgubijdx, luxh lojni najc si'c gubijdx. Reni'ni najc si'c tio'p pilajr bajl. ² Ca'ni te librbäze', naxhal libre'ga. Bazujni ni'ni ladbee loj nisdoo, bazujni ni'ni ladbäjgw lo yuj, ³ dxejc guredxaduxh anglga si'c rbedxa' beedz. Dxejcru gunii guigajdz guzii sigajcsa. ⁴ Che gulujx gunii guziiga, narä rlazä nucuaä lo guijt nani guniireni, per biejn diagä xse' tej ni gunii xhaguibaali, najni loä:

—Guluchedzu'tz rediidxga nani gunii reguzii, na'c gucuaaluni.

⁵ Angl nani suj ni'ni loj nisdoo nájza loj yuj, guläs naani ladbee nez xhaguibaa. ⁶ Guniliini diidx con laj GuebDios ni nabajn par tejpas, ni guläxtiej xhaguibaa nájza guiraa ni tre' xhaguibaa; ni guläxtiej guedxliujre nájza guiraa ni tre' lojni; ni guläxtiej nisdoo nájza guiraa ni tre' nen nisdoo. Räjjni:

—Diru redxejre gaclaa. ⁷ Che guidzujntis dxej ni agojl gol ni najc rgajdz xangl Dios ni ca' trompe't, dxejc abaza' rextidxxhiga'tz Dios, si'c ni basule' redade' ni gunii xtidx Dios agujc xchero.

⁸ Dxejc gunisac xse' nani gunii xhaguibaali, stehuält biejn diagä caniini loä, najni:

—Huij, te xca'lu libre' ni naxhal ni yu' ladznaa angl ni suj te laad ni'ni loj nisdoo, stelaad ni'ni lo guedxliuj.

⁹ Dxejcti hua'ä lo anglga, räpä lojni:

—Guniidxlu libre'ga.

Laani najni loä:

—Anire, cua'ni, gudajwni. Sun nanlaani xque'lu, niluxh ro'lu sajcninejxh si'c dzujn.

¹⁰ Dxejcti cua'ä libre'ga lo naa anglga, dxejc gudauäni. Ro'ä guyu'ni nejxh si'c dzujn, luxh che gudämäni, lacti guc nanlaani xque'ä. ¹¹ Dxejc najni loä:

—Nanab chasulesaclu xtidx Dios xcuent nani churu gac loj xhidalduxh bejn, nájza guejdx, nájza renani rnii garen-garen xtiidxreni, nájza loj rereii.

11

Tio'p niguii ni rusule' xtidx Dios

¹ Dxejcti baniidxni loä si'c te biquii nani rurejxh. Dxejc guyu' chu naj loä:

—Huisu te charejxhlu xquidoo Dios, nájza piändxan, balabza balti bejn rusuxhijb nenga. ² Na'c gutiexhlu gabi lole' guidooga, sa'csi ni'c acua' rebenzajtne te tiubitio'p bäii chaläjsreni guedxdxan si'ctis ni rlazreni. ³ Narä sudedä yälrnibee lo tio'p dade' ni guinii diidx xcuentä, luxh guideb najcwreni ladyas, susule'reni xtidxä lojreni te mil tio'pgayuu gayojn dxej.

⁴ Guiro'preni najc si'c tio'p yag oliib, si'c tio'p gandilieer ni suga' nez lo Dios. ⁵ Palga yu' chu bejn rlazj gun latsiaj loj redade'ga, sirii bajl ro'reni te chec nani rdxe'ch lojreni. Luxh si'cpac riäjł guet chutis ni rlazj gun latsiajreni. ⁶ Guiro'p redade'ga rajp yälrnibee te gusäureni xhaguibaa te na'c jiajb nisguij guideb nen redxej nani cagusule'reni xtidx Dios, rajpzareni yälrnibee te guchaareni nis te gacni rejn, rajpzareni yälrnibee te jiädgusacsí xhitis plaag lo guedxliuj, si'ctis huält ni rlazreni. ⁷ Che luux gusule'reni xtidx

Dios, dxejcti ni najc si'c te man nialajz sirii gabijl te jädchagdijl ni guiro'preni. Sujnni gaanreni, sugu'tnireni. ⁸ Dxejcti jia'n guiro'p rebengutga lad caii xten guejdx cadro bacuaareni Dad Jesucrist lo cruz. Guejdxroga rbälajzareni Sodoma näjza Egipto. ⁹ Choñ dxej garol guiraa rebejn ni siääd guedxbäz, ni siääd guedxro, ni najc garen-garen raz, ni rnii garen-garen xtidx guiraa rebejn guedxliuj, suhuu loj guiro'p rebengutga, direni gusaan guiga'tzreni nen baa. ¹⁰ Guiraa renani nabajn lo guedxliujre sibalazduxhrene sa'csi gujtreni. Luxh sa'csi rbalajzduxhrene, suxhalzareni xhi xca' sa'reni; sa'csi guiro'p redade' ni basule' xtidx Dios baxhal trabajwduxh lojreni. ¹¹ Che gudejd choñ dxej garolga, baspañsac Diosreni, dxejcti huitiesacreni. Guiraa reni bahuii lojreni, bidxebduxhrene. ¹² Dxejcti biejn diajg guiro'preni xse' te ni canii dipduxh desde xhaguibaali, räjpni lojreni:

—Colchä'p jiaare.

Dxejcti huä'preni xhaguibaa lo te za, luxh guiraa renani rdxe'ch lojreni, bahuiireni huä'preni xhaguibaa. ¹³ Lagajc orga gujc te xuduxh, gurebä'n tej lo tzuu la' guejdxga, gujt gajdz mil bejn lo xu ni gujc ro'c. Rebejn ni bia'n ro'c bidxebduxhrene, guslojreni calä'preni xpala'n Dios ni yu' xhaguibaa.

¹⁴ Si'cti gulujx ni rojp casioon, luxh agojl guidzujn ni riojnga.

Ni rajc gajdz xangl Dios gol trompe't

¹⁵ Che bil ni rajc gajdz xangl Dios trompe't ni ca'ni, dxejc biejn xse' reni dipduxh canii xhaguibaa, cayäjpreni:

Xcälrnibee guedxliuj agudejd ladzñaa Dad Dios näjza Jesucrist; luxh laani sinibeeni par tejpas.

¹⁶ Galbitajp rebengool nani sobga' lo tron xtenreni cadro rnibee Dios, biabrlojreni nez loj Dios te calä'preni xpala'n Dios. ¹⁷ Räjpreni:

Xquixtioste Guejblu Dios, nani rajp yälrnibeduxh, nani najclu, nani gujclu, nani churu gac, sa'csi acua'lu xcälrnibeduxhlu te agusloj canibeelu.

¹⁸ Bidxe'ch reben guedxliuj lojlu, luxh abidzujn dxej guidxe'chlu lojreni, gunlu yälguxhtis rebengut, te gudeedlu cossa'c loj rexpejnlu, lo renani guni xtidx Dios, lo renani huililajz xtiidxlu, lo renani rusuxhijbni nez lojlu;

rebenproob sigajc rebenro.

Abidzujnza dxej che cuäcaylu renani bejn daan guedxliujre, te nitlojreni par tejpas.

¹⁹ Dxejc bixal xquidoo Dios ni yu' xhaguibaa, nen guidooga bien te guiñ cadro yu' guiñ cadro caj rediidx ni bia'n Dios loj rexpejn Israel. Dxejcti lacti bidinya', lacti guiniiza reguziro, gujc te xu, dxejc biajb te guixobroduxh.

12

Te gunaa näj te ni najc si'c te gutiatzro

¹ Dxejcti guyu' te senro xhaguibaa: te gunaa ni najcw si'c gubijdx, ni'ni sojb bäii, yejcnii yu' te coron ni nac-chee tzubitio'p balxhaguibaa. ² Gunaare nuxi'nni. Rbedxa'ni sa'csi agusloj cayu' yoob xque'ni te gaal xi'nni, cadejdni trabajwduxh. ³ Dxejcti bahuiä stee seen xhaguibaa: te manxniaa ni rujn lojni si'c loj te gutiatzro, manduxhni. Yu' gajdz bitiuwejcni, sojb tzuu xca'chni. Tejga yejcnii yu' te coron, najcreni gajdz coron. ⁴ Dxejcti xhibaanni cagobxajxhni ni riojn la' rebalxhaguibaa, dxejcti bacuaanireni lo guedxliuj. Dxejcti biädsu manroga nez loj gunaaga ni ameer gaal xi'nni, te gauni xi'nni che gaalni. ⁵ Dxejcti gojl xi'n gunaaga, najcni te niguii, luxh te bar guiib nungäjl

guinibenäjni lo guiraa reben guedxliuj. Guläsgajcreni bázga te sanärenini xhaguibaa cadro rnibee Dios. ⁶Dxejcti baxun gunaaga, siini nez loj reyubijdz cadro yu' te lajt ni basuchee Dios te cuääzni, te ro'c guyaannini te mil tio'p gayuu gayojn dxej.

⁷Dxejc guyu' guer xhaguibaa, xangl Dios nani laa Miguejl näj resa'ni bacuanäjreni gutiatzro. Gutiatzroga näjza rexanglni gudilduxhreni, ⁸niluxh direni niujn gaan, luxh di niajcdiru nia'n manga näjza resa'ni xhaguibaa. ⁹Dxejcti bacuaareni manroga näjza resa'ni lo guedxliujre. Laani najc ni gujc bäl galoroga, ni najc gueb Benđxab, ni laaza Satanás, ni rusguee guideb guedxliujre.

¹⁰Dxejcti biejn diagä xse' te ni canii dipduxh xhaguibaali, räjpni:

—Abidzujn yälruslaa lo dojl, näj yälmilagwr, näj yälrnibero xten Dios, näjza yälrnibee xten Jesucrist, sa'csi agulääreni bejn nani entis rbe'c xquej rexpejn Dios loj Dios dxej-yääl. ¹¹Laareni gujc bejnreni gaan loj benđxabre, xcuent xtiejn ni najc Xiil xten Dios, näjza sa'csi huililazsa'creni xtidx Dios, dizareni nidxejb mase niejtzareni. ¹²Ni'cni, guiraa la'tu ni yu' xhaguibaa näjza gueb xhaguibaa, colquibalazduxh. Niluxh riaduxhnu renani rbäjz lo guedxliujre, näjza lo nisdoo, sa'csi abiäjt benđxab lo guedxliuj, luxh cadxechduxhni sa'csi anajnni guxii dxej räjpni.

¹³Che guchee gutiatzroga abacuaarenini lo guedxliuj, birinajlni gunaa nani guyu' xi'ngaanni te gusacsinini. ¹⁴Dxejc badeed Dios lo gunaaga tio'p xhiga xten bisiro, te gac gutajtni nez lo reyubijdz cadro nac-chee cadro cuääzni. Choñ ijz garol guyu'ni ro'c, nacuatzlojni lo bälga. ¹⁵Dxejcti ro' gutiatzrore birii nis si'c te gueuu te nuslo'ni gunaaga. ¹⁶Dxejc gucnäj guedxliuj gunaaga, baxhal guedxliuj ro'ni, gu'ni gueuu ni birii ro' gutiatzroga. ¹⁷Dxejc bidxechduxh gutiatzroga loj gunaaga, ni'c sääni te gucuanäjni sgaii rexi'n gunaaga, renani cagusoob diidx ni gunibee Dios, renani rililajzza xtidx Jesucrist.

13

Tio'p manduxh

¹Narä gusuä lo yujxh ni tre' ro' nisdoo, dxejc bahuiä carii te manro lo nisdoo. Sojb tzuu xca'chni. Dxejc lo tejga xca'chni yu' te coron. Yu' gajdz bitiuvejcn cadro caj diidx ni rniyaj Dios. ²Manduxhre najc si'c te beedz, ni'ni najc si'c ni' te os, luxh ro'ni najc si'c ro' te bedzro. Gutiatzroga badeed xcälmlaagwrni lojni, näjza tron cadro rbejni, näjza xcälrnibeduxhni. ³Dxejcti bahuiä te yejcn najc ascanu yu' chu batiuugni con madxed, ameer guetni, luxh biajc cadro gurujg yejcn. Ni'cni rdxeloduxh guiralii rebejn guedxliuj, sanajlreni manduxhga. ⁴Bazuxhijbreni gojnreni gutiatzroga sa'csi badeedni xcälrnibeeni lo manduxhga, dxejctiru bazuxhijbreni gojnzareni manroga, räjpreni:

—¿Chu stee najc si'c manrore, ä? ¿Chu laa ni gac guichagdijlni, gucuanäjnni?

⁵Yu' chu badeedza lo manroga diidx dxejcti gusloj caniiini guiraloj didx-guyalajz, diidx ni rniyaj Dios. Yu'za chu badeed ga'pni yälrnibee tiubutio'p bäi, gunni si'ctis ni rlajzni. ⁶Baxhalni ro'ni, guniyaduxhni Dios, guniyajni laj Dios, näjza xquidoo Dios, nalajznu renani yu' xhaguibaa. ⁷Dxejcti yu' chu basaan bacuanäj manroga rexpejn Dios. Bejn manroga gaan rexpejn Dios, dxejcti gunibee manroga guiraa reguedxbäz, näj guiraa rebejn ni rnii garen-garen xtiidxreni, näjza guiraa reguedxroduxh. ⁸Dxejcti guiraa reben guedxliuj sazuxhijbreni, sagajjnreni manroga, guiraa rebejn nani di lajreni

nicaj lo libr xten yäl**n**abaj**n** xten Xiil nani gujt xcuentreni, sa'csi galooli guirixtiej guedxliuj cuaj lo guijtzre laj guiraa ni gac xpej**n** Dios.

⁹ Palga yu' chu rlajz cuadiajgni, sugucuadiagsa'cni. ¹⁰ Palga yu' chu nungäj**l** j*ä*uuu ne**n** latzguiib, siä**u**upacni. Chutis ni ju't te bej**n** con te madxed, con madxedza guetni. Ni'cni renani anumbee Dios, riäj**l** gunreni huant, chanuutis chalilazsa'creni xtid**x** Dios.

¹¹ Dxejcti bahuiä loj stee manro, cariini ne**n** yuj. Sojb tio'p xca'chni si'c xca'ch te xiil, rniini si'c rni**i** te gutiatz. ¹² Luxh rnibeezani si'cni rnibee manroga lagajc nez loj manroga, rujnzani rusuxhijb rebe**n** guedxliuj loj manrogalooga ni gurujc yej**c**ni, luxh biaj**c** yej**c**ni. ¹³ Manroga ni birii ne**n** yuj rujnzani remilagwrro, rujnni rtej**b** bal-guiboo xhaguibaali, rtej**b**ni lo guedxliuj nez loj rebej**n**. ¹⁴ Rusgueeni rebej**n** nani nabaj**n** lo guedxliuj xcuent remilagwrro nani rujnni nez loj manrogalooga. Guinibeeni gun rebe**n** guedxliuj te banäj**b** si'c najc manroga nani batiuug madxed yej**c**ni, luxh biaj**c**za yej**c**ni. ¹⁵ Dxejcti man ni rojppa baspaj**n** banäj**b**ga te guinii banäj**b**ga, dxejcti gunibeeni guet guiraa rebej**n** nani di guzuxhijb lojni te ganrenini. ¹⁶ Gunibeezani chu bej**n** te seen lo cuajni o **n**aani ladbee, guiraa rebej**n** ni xhet rajpdi, guiraa rebej**n** ni rajp, guiraa reni najc mos, guiraa reni najc lam, guiraa reni najc be**n**ro, guiraa reni najc**z**a be**n**bäz. ¹⁷ Gunibeezani digacdi sii, digac**d**iza guto' bej**n** palga xhet seendi caj **n**aani o lo cuajni. Seenga najc laj manga o numbr xten laj manga. ¹⁸ Dee rqui**n** yäl**n**aj**n**. Renani rajp yäl**n**aj**n** sugulabreni xseen manga, numbrga najc si'c xnumbr bej**n**; numbr xten manga najc xho'p gayuu gayon**b**ixho'p.

14

Dij ni rol te gayuu tiubitajp mil

¹ Che bahuiä stee, bahuiä suga' Xiil xten Dios yej**c** daj**n** ni laa Siön. Suganäj**n**i te gayuu tiubitajp mil bej**n** nani caj lo cuajreni laj Xiil näj laj Xtadni. ² Biejn diagä rubej xhaguibaali, rubeduxh, riejnni si'c rubej xhidaj**l** gueuro, näj te guziro; riejnzani si'cni riej**n** che cayol xhidaj**l** bej**n** ni rol arp. ³ Cayolreni te dicoob nez loj tron**n** cadre rbej nani rnibee, näjza nez loj guidap reni najc si'c man ni nabaj**n**pac, näjza nez loj rebe**n**gool. Rutliidi guj**c** bisieeddi dijga, xtebtis tegayuu tiubitajp mil bej**n** nani gu**l**aa lo rebe**n** guedxliuj. ⁴ Reniguiire najc renani gajd xhi**n** con gunaa; nicla tejreni di niesnä**j** te gunaa, najcreni be**n** dxan. Laareni rinaj**l**reni Xiil xten Dios cadrotis sääni. Redee gu**l**aa lo rebe**n** guedxliuj si'c te goj**n** lo Dios näjza lo Xiil xten Dios. Gojnre najc si'c gonganid ni rudeed bej**n** xten te cose'ch. ⁵ Nicla tej didx-xhii di guirii ro'reni, sa'csi xhetliidi xtoj**l**reni, nayareni suga'reni nez loj tron**n** cadre rnibee Dios.

Rediidx nani bazule' jion rexangl Dios

⁶ Dxejcti bahuiä loj stee xangl Dios, rutajtni nez galä**i**i xhaguibaa, siädnäni diid**x** ni najc par tejpas xten Dios te gusule'nini loj rebe**n** guedxliuj, guiraa lo reguedxro, guiraa lo reguedxbäz, loj rebe**n** ni najc garen-garen r**az**, nani rni**i** garen-garen xtiidreni. ⁷ Dipduxh guniini, räjpni:

—Colguidx**e**jb Dios, colguiliä'p xpala'n Dios sa'csi abidzuj**n** or gunni yäl**g**uxhtis guiraa rebej**n**. Colguzuxhijb loj nani benchee xhaguibaa, näjza guedxliuj, näjza nisdoo, näjza cadre rliej**n** nis.

⁸ Dxejcti siädnaj**l** stee angl nani canii:

—Abiaj**b**, abiaj**b** guejdxroga nani laa Babilonia, sa'csi baquiilni guzojz guiraa reguejdx xten guedxliuj xcuent xcäl-latsiaj**n**i, xcuent doj**l** ni bejn**n**i guideb lagaa; najcni si'c reni rä' nejp.

⁹ Dxej**c** biädnaj**l** ni rioj**n** xangl Dios, dipduxh guniini, Räjpni:

—Palga yu' chu bejn guzuxhijb loj manroga o loj banäjb ni najc si'c manroga, o xcäjbni xca'ni xseen manro lo cuajni o lo ñaani, ¹⁰ sidxechduxh Dios lojni, di xcälguxhtisduxh Dios tedcaj lojni. Sidejdpacni trabajwduxh nen balro näjza azufr nez loj rexangl Dios näjza nez loj Xiil xten Dios. ¹¹ Luxh gujxh xten reni cayejc sä'p nez lojreni guixe-guixee par tejpas. Digacdi gusilajzreni dxej-yääl, renani guzuxhijb, reni gojn manroga näjza reni gojn banäjb ni najc si'c manroga, chutisza ni rca' seen xten lajni. ¹² Ni'cni renani huililajz xtidx Dios, reni rusoobza xtidx Dios, ni rinuutis lo xnezyuj Jesucrist, nanab di guidxajgreni.

¹³ Biejn diagä xse' te ni caniini loä xhaguibaali:

—Scree bacuaa: “Chicbaa rebejn ni guet najli nani rililajz xtidx Jesucrist.” “Guliini”, naj Sprit Dxan xten Dios: “Te gusilajzreni, na'cru gunreni dzuun, sa'csi anancheenu xhi dzuun bejnreni.”

Yälñasa'c ni rudeed guedxliujre

¹⁴ Dxejcti bahuiä tre' te bänol, loj bänolga sobga' te ni najc si'c Xi'n Dios ni gujc Niguui. Yu' te coron ganaxduj oor yejcti, dxejcti ñaani ca'ni te guiboz ni caduxh ro'ni. ¹⁵ Dxejcti birii te xangl Dios loj xquidoo Dios, dipduxh caniini loj ni sobga' loj bājga, räjpni:

—Basäl xquibozlu, batiuug, te batie' yälñasa'c, sa'csi agojl or guire' yälñasa'c, guideb guedxliuj aguyajlni.

¹⁶ Dxejcti nani sobga' lo bājga basniibni xquibozni, batiuugni yälñasa'c ni caj lo guedxliujre.

¹⁷ Dxejcti stee xangl Dios birii nen guidoo ni yu' xhaguibaa, ca'zani te guiboz ni caduxh ro'ni. ¹⁸ Dxejcti birii stee xangl Dios nez loj piändxan xten Dios. Laani rajpni yälñabee lo balro. Dipduxh guniini, räjpni loj ni ca' guiboz ni caduxh ro'ni, räjpni:

—Basäl xquibozlu nez ni' reyaguub, batiuug guiraa reresim uub ni yu' lo guedxliujre, sa'csi aguyajlreni.

¹⁹ Dxejc batiuug anglga guiraa reresim uub ni yu' lo guedxliujre nalajznu rebenguijdx, basälñireni nen tanc cadre guläjreni yejcti sa'csi rdxechduxh Dios lojreni. ²⁰ Dxejcti baläjreni yejc reuub nez orii te guejdx. Biriiduxh rejn yejcteni, gutiäs rejnga, bidzujñ rejnga ro'li recabaii, gujcti si'c che riu' nisro gueuu, biäjtni si'cti choñ gayuu mil metr guideb gabi cadre baläjreni yejc reuub.

15

Guigajdz xangl Dios näj lult xcälguxhtis Dios

¹ Dxejcti bahuiä stee senro xhaguibaa, nani bascheloduxh narä. Bahuiä loj gajdz xangl Dios, tejpgareni ca' te plaag ni gusacsí reben guedxliuj. Redeetis najc lult, sa'csi che ted redee ati agulujx yälrdxe'ch xten Dios.

² Dxejcti bahuiä loj tej ni najc si'c te nisdoo ni najc si'c biidr nu'chni bajl. Dxejcti galäii nisdoooga suga' renani bejn gaan loj manroga näjza lo banäjb ni najc si'c manroga, ni bejnza gaan di nica'reni seen xten lajni. Ca'reni arp xten Dios. ³ Cayolreni dij xten to Moisés ni gujc xpejn Dios, cayolzarenı dij xten Xiil xten Dios. Scree najc dijga:

Sacduxh, ruscheloj guiraa redzuun ni rujn Guejblu, Dad Dios, ni rajp guiraa yälñabee.

Rujn Guejblu ganax dzunsa'c, rnii Guejblu ganax didxlii.

Guejblu rnibee loj guiralii reguejdx ni yu' lo guedxliuj.

⁴ Bahuii, Dad, ¿chu laa ni di guidxejb Guejblu ni di guiliä'p xpala'n Guejblu?

Sa'csi Guejbtislu najc dxan, ni'cni guiraa reguejdx ni yu' guedxliuj siädzuxhijbreni, siädgajñreni Guejblu, sa'csi abaluiloj guiraa rextzunsacpac Guejblu.

⁵ Dxejcti bahuiä xhaguibaa, bixal ro' yu' ni najc dxanro nen guidoo, cadre yuchee guij cadre caj xleii toMoisés. ⁶ Ro' yudxanroga birii gajdz xangl Dios ni ca' plaag te gusacsireni reben guedxliuj. Najcwreni te ladlin ni najc nolbäj, ni rdimbichaduxh. Dejd si'c te cinturon lastooreni ni najc ganaxduj oor. ⁷ Dxejcti yu' tajp reni najc si'c man nabajn ni yu' nez loj Dios xhaguibaa. Tej reni badeed loj tejsa reanglga te co'p ni najc ganaxduj oor. Guidxa tejsa rexhijgga xcälguxhtisro Dios nani nabajn par tejsa. ⁸ Gudxaj guidoo ni najc yudxanroruga gujxh ni siäd xcuent xcälmilaagwr, xcälr dimbichaduxh xten Dios. Rut gujcdi biu' nen yudxanroruga che gulujxli guiraa replaag ni ca' guigajdz reanglga.

16

Rexhijg ni guidxa xcälguxhtis Dios

¹ Dxejcti biejn diagä xse' te ni canii dipduxh xquidoolini, caniini loj guigajdz rexangl Dios, räjpni:

—Colchäj, colchasloj guigajdz rexhijgga lo guedxliuj, colca' rexhijg ni guidxa xcälguxhtis Dios.

² Anglalo ni huij, baslojni ni yu' nen xhijg ni ca'ni lo guedxliuj. Dxejc loj guiraa rebejn nani caj xseen manduxh, reni rusuxhijb, rajñreni banäjb ni najc si'c manroga, birii tiejxhni te guedxyanduxh ni najc si'c cancer.

³ Dxejc ni rojp anglga baslojni ni yu' nen xhijg ni ca'ni loj nisdoo, te bejnii gubixhloj nisdooa gujcnii si'c rejn xten te bengut. Dxejcti gujt guiralii reman ni yu' lo nisdoo.

⁴ Ni riojn anglga baslojni ni yu' nen xhijg ni ca'ni loj regueuu näjza cadre rliejn nis. Gubixhlojreni gujcreni rejn. ⁵ Dxejcti biejn diagä gunii angl ni rajp yälrnibee lo nis räjpni:

—Huenduxh najc Guejblu Dad ni najc naj sigajc gujc Guejblu galoo, dxanduxh najc Guejblu sa'csi cayujn Guejblu yälguxhtis redzunguijdx. ⁶ Sa'csi laareni baxhe'reni rejn, bagu'treni rexpejnlu näjza renani gunii xtiidxlu, luxh naj badeed Guejblu rejn cayä'reni. Si'cpac nungäjł gacreni.

⁷ Dxejcti biejn diagä canii steeni lagajc lo piändxan, räjpni:

—Guliipacni Dad Dios ni rajp guiralii yälrnibee, xcälguxhtis Guejblu najc laaca, si'c riäjł gacni.

⁸ Dxejcti ni rdajp anglga cua' xhijg ni ca'ni, baslojni ni yu' nen xhijgga lo gubijdx, te badeedni lo gubijdx yälrnibee guze'cnäjni rebejn guiboo.

⁹ Guiraliireni gusloj cayejceni, lacti nanladuxh, dxejc gusloj caniyajreni Dios ni rajp yälrnibee loj recosga. Niluxh direni nusiechlajzreni, niclaza niliä'preni xpala'n Dios.

¹⁰ Dxejcti ni rajc rgaii anglga cua' xhijg ni ca'ni baslojni ni yu' nen xhijgga lo tron cadre rnibee manroduxh. Bicäjy guideb cadre rnibee manduxhga, luxh rebejn rauya'tisreni lujdxreni sa'csi cayajceni yälnayanduxh. ¹¹ Guniyajreni Guejb Dios ni yu' xhaguibaa sa'csi rajceni yälnayanduxh, xcuentza rexquedxnayanreni. Luxh direni nusiechlajzreni xcuent xtojłreni.

¹² Dxejcti ni rajc xho'p anglga cua'ni xhijgni, baslojni ni yu' nen xhijgga loj gueuro ni laa Eufates. Gueuga gubidzlii nisni te guc-chee te nezyuj xten rejei ni jääd nez cadre rliejn gubijdx.

¹³ Bahuiäza birii ro' gutiatzro, näjza ro' manro, näjza ro' ni najc profet' ni rusguee, birii choṅ spritguijdx ni najc si'c bedz, ¹⁴ sa'csi najcreni respit xten beṅdxab, rujnreni milagwr, senro. Rijreni loj guiraa rereii loj guedxliuj te gutie'reni guiraa beṅ loj guedxliuj te gac guerroduxh, te gucuanäjreni Gueb Dios ni rajp guiralii yäl'rnibee che guidzujṅni lo guedxliuj. ¹⁵ "Narä siädxhiga'tzä si'c riääd te gubaan. Chicbaaza renani cabäjz, cagutie'chreni bacal lojni che guibi'ä si'c rujn nani najcw guiraa xhajn, te na'c guiga'ni xhabääl'ni, jianxtujyni che guibi'ä." ¹⁶ Dxejc gutie'reni guiraa rebejṅre te lajt ni laa lo didx hebre "Armagedón".

¹⁷ Dxejcti ni najc rgajdz anglga cua'ni xhijgni baslojni ni yu' neṅ xhijgni loj bej. Dxejcti biejn xse' te ni gunii dipduxh xquidooli Dios xhaguibaali cadro yu' tron cadro rnibee Dios, räjpni:

—Agujcni, agulujxhni.

¹⁸ Dxejc guyuduxh yäl'rdinya' näj guziro. Gujca te xuroduxh lo guedxliuj, te xu sa' ni gajdpac gac. ¹⁹ Che gujc xuroga, biräjs guedxroduxhga, gujcn chon la', dxejcti gurebä'n guiraa reguejdx guideb guedxliujre. Dxejc banaj lajz Dios guedxro ni laa Babilonia, bialoj bejn Dios yäl'guxhtis guedxga. ²⁰ Li gubicaaj, gunitloj reyuj ni tre' lo nisdoo, gunitlojza redajn. ²¹ Xhaguibaali biajb te guixhobro yejc rebejṅ; tejsa guixhobga na' si'cti tiuu kil. Guniyaj rebejṅ Dios xcuent guixhobroga, sa'csi cuentroduxh gujcn.

17

Gun Dios yäl'guxhtis te gunadxab

¹ Lo regajdz anglga ni ca' gajdz xhijg birii tej ni gunii loä, najni:

—Gudaa ree te guluiä lojlu retrabajwduxh ni ted gunadxabre ni sobga' cadro yu sijn nis. ² Guiraa rereii lo guedxliujre bennäjreni gunaaga dojl, sigajca guiraa rebeṅ guedxliuj bennäjreni gunaaga dojl. Gusosnäjreni gunaaga bejnreni si'ctis ni rlajzreni.

³ Dxejcti huinäni narä si'c lo te bacal nez lo reyubijdz. Bahuiä loj te gunaa, bijbni dejtz te manro ni najc xniaa, luxh guidebni caj diidx ni rniyaj Dios. Gajdz najc bitiuycjni, sojbza tzuu xca'chni. ⁴ Gunaaga najcw te lad moraad con xniaa, sucheduxh gunaaga oor, näj reguisa'c, näj perl ni sa'cduxh. Ca'ni te copro ni najc ganaxduj oor ni guidxa ganax recosguijdx, recosdxab ni bennäjni rebeṅ guedxliuj. ⁵ Caj te diidx lo cuajni, luxh rut racbeedi xhi sälojni. Scree rnii diidxga: "Babilonro, xnan regunadxab, xnan recosdxab ni rajc lo guedxliuj." ⁶ Bahuiä agusojs gunadxabga. Agusosnäjni xtiejn rexpejṅ Dios nani bagu'tni, näj xtiejn renani basule' xtidx Jesucrist ni bagu'tzani. Che bahuiä lojni, bixeloduxhä. ⁷ Dxejcti gunii anglga loä, najni:

—¿Xhicuent rdxelojlu, ä? Narä siniä xhi säloj gunadxabga, näjza manroga ni sojb gajdz bitiuycjni näj tzuu xca'chni. ⁸ Manroga ni bahuiilu gubajṅni galoo, niluxh agunitlojni naj, luxh agojl guiriini gabijl, dxejcti sinitlojni stee, sejtni par tejpas. Rebejṅ ni nabajṅ lo guedxliuj nani di lajreni nicaj lo guiitz xten yäl'nabajṅ xten Dios, guiitz ni guc-chee che birixtiejli guedxliuj, rebejṅga sidxeloduxhreni che fiireni loj manroga nani gubajṅ galoo, ni gunitloj, niluxh naj agubaṅsacni.

⁹ 'Ree nanab ga'pni yäl'najn. Gajdz rebitiuycjni säloj gajdz dajn cadro sobga' gunaaga, ¹⁰ sälojzaren gajdz reii. Agujc gaii reiiga ni cayajb. Tej rereiiiga canibee naj. Stee reiiga churu jääd. Luxh che jääd lult reiiga, guxii dxej guinibeeni. ¹¹ Manro ni gubajṅ galoo, ni agunitloj naj, ni'c rac xhujṅ reii, najczani tej loj guigajdz rereii, luxh sinitlojni, sejtni par tejpas.

¹² 'Guidzoo rexca'chni ni bahuiilu säloj tzuu reii. Gajdreni guisloj guinibee naj. Laareni näjza manroga xca'reni yäl̄rnibee teb or, nalajznu guxii dxej. ¹³ Tejtis xhigab gun rereiiiga, gudeedreni xcäl̄nadipreni, xcäl̄rnibeereni lo manroga. ¹⁴ Laa redee ni sucuanäj Xiil xten Dios. Dxejcti sujn Xiilga gaan lojreni sa'csi laani najcni Dad ni rnibee loj guiraa redad, najcni Reii ni rnibee lo guiraa rereii. Luxh renani siädnaļni najc reni agurejdxni, reni aguleni, sisiudzu'tznäjenini.

¹⁵ Dxejcti najza anglga loä:

—Reni ni bahuiilu cadro sobga' gunadxabga säloj guiraa guejdx, guiraa beņ guedxliuj, guiraa beņ ni rnii garen-garenca xtiidxreni, ni siäd garen-garen reguejdx. ¹⁶ Guitzoo reca'chga näjza manroga ni bahuiilu, sidxe'chreni loj gunadxabga, suro'nreni gunadxabga, susa'nreni gunadxabga xhabäalni, saļwreni bältiejxhni, suze'creni gunadxabga lo guiboo. ¹⁷ Sa'csi abasniib Diosreni te gunreni tejsi xhigab, te gudeedreni xcäl̄rnibeereni lo manroga che guidzujņli dxej ni chale' guira'ti ni gunii Dios gac. ¹⁸ Gunadxabga ni bahuiilu säloj guedxro ni rnibee loj guiraa rereii loj guedxliuj.

18

Xho jiajb guedx Babilonia

¹ Dxejcti bahuiä loj stee xangl Dios ni siädyaļt xhaguibaa. Siädnaņi yäl̄rnibeduxh, xcäl̄rdimbicha'ni bazaniļ loj guedxliujre. ² Dxejcti dipduxh gunii anglga, guredxa'ni:

—Abiajb, abiajb guedx Babilonia, agubixhlojni, naj najcni guejdx cadro rbäz rebendxab, ro'c rcaņzaj guiralii cuaa spritdxab, najczani xpitiääz guiraa reman xhaguibaa ni najc mandxab, mandxuudx. ³ Sa'csi guiraa rebeņ guedxliuj agusoļzreni xcuent doļl ni bennäjenini gunadxabga, guiraa rereii loj guedxliuj beņ doļl guläsnäjenini gunadxabga, luxh guiraa rebeņ guedxliuj ni ruto' abeņreni ganduxh, agujcreni ri'cw xcuent recosdxab ni rujn gunabdxabga.

⁴ Dxejcti bieņ diaga xse' stee nani canii xhaguibaa:

—Colguirii guejdxga rexpēä, te di näj la'tu gunnäjtu gunadxabga doļl, te di tedtu trabawduxh lo replaag xtenni. ⁵ Sa'csi yuduxh rextolņni, abidzujņreni xhaguibaali, luxh abanaļza laļz Dios rextolņni. ⁶ Colgudeed loj gunaaga sigajc ni badeedni lojreni. Colquijx loj gunaaga tio'pli huält lo ni beņni laani. Neņ co'p cadro badeedni gu' beņ (te trabajw ni bateedni beņ), lagajc neņga colyeņ te ni najc tio'p huält maazru fuert yä gunadxabga, nalajznu tedni trabajw tio'p huält. ⁷ Lacti gulä'p gunaaga xpala'nni, gubajņni si'ctis ni rlaļzni lo guedxliuj. Naj colguteed gunaaga trabajw, si'cti mediid ni gulä'pni xpala'nni; si'cti mediidza ni bibalaznäjni mood ni gubajņni, sigajcza gac-huin lastooni sa'csi beņni xhigab neņ lastooni: “Narä sobga'ä ree si'c te reņ, te beņroduxh, dina gacä biuud, niclaza gac-huin laza.” ⁸ Ni'cni tejsi dxej siajb yeļcni guiraa replaag xten Dios: yäl̄guļt, yäl̄huin laļz, näj yäl̄rliaan, luxh seļczani lo balguiboo, sa'csi rnibeduxh Dad Dios ni gun xcäl̄guxhtisni.

⁹ Guiraa rereii lo guedxliujre ni bennäļ gunaadxabga cosguijdx, reni cuansanäņnini, sonduxhreni, siaduxhreni che fireni gujxh ni carii cadro cayeļcni. ¹⁰ Zijtru sisiujreni sa'csi rdxejbreni replaag xten gunadxabga, dxej siniizarenini:

—Aii, aii, riaduxhnu guedxrore, Babilonia, guedxdipduxh guļclu, luxh chela gucbeenu, ala bidzujņ yäl̄guxhtis yeļclu.

¹¹ Rebeņ ni ruto' loj guedxliuj sonduxhreni, siareni guejdxga sa'csi rutru rsiidi xhixtenreni ni ruto'reni. ¹² Laareni ruto'reni oor, pla't, guiraloj

reguisa'c, perl, ladlin, ladmuraad, ladseed, näjza guiraloj baräjd yagdoo, näj guiraloj cos saru, ni nacchee läi elefant, näj cos saru ni nacchee bronz, näj guib, näj márm, ¹³ näjza caneel, guiraloj laj comiid, näjza yalnejh, näj perfum, näjza yaal, näjza bin, näjza se't oliib, näjza arinsa'c, näjza triuu, näjza gon, näjza rexiil, näjza cabaii, näjza gare't, näjza bejn ni ruto'reni tiejxhrene, xaimreni. Guiraa reni'c ruto'reni. ¹⁴ Dxejc guniiza xse' ni canii xhaguibaali, najni:

—Ninexhsa'c ni rladzuxhlu, agunitloj. Guiraa recossa'c, recossaruduxh agubicajreni lojtu, luxh di gaddiru guidxäl bejn reni'c.

¹⁵ Reni ruto' guiraloj recosga, nani gujcreni ri'cw xcuent guedxroga, zijtru sisiujreni sa'csi rdxejbreni trabajw ni cadeed guejdxga, sonduxhrene, sac-huinduxh lajzreni, ¹⁶ säjbreni:

—Aii, aii, riaduxhnu guedxrore, nani gojtni ladsacduxh, guiraa ladlin, ladmuraad, ladxniaa, gusucheeni con oor, con guisa'c, con perl, ¹⁷ tera'tbäztis baralii recosro ni najc xhixtenni, guxhijñreni.

Guiraa recapitán xte barcw, näjza guiraa remarineer, näjza rebejn ni rij biaj lo rebarcw näjza guiraa reni rujn dzuun lo nisdoo, gusujreni zijt, ¹⁸ näjza laareni cahuiireni cayäjs gujxh guejdxga, cabedxa'reni, caniireni:

—¿Xhi stee guejdx najc si'c najc guedxrore, ä?

¹⁹ Bachajreni yuyol yejcreni sa'csi rac-huin lajzreni, binduxhrene, guredxa'reni:

—¡Aii! ¡Aii! Riaduxhnu guedxro sa'csi xcuenttis guedduxhre guj ri'cwduxh guiraa rebejn ni rajp barcw ni rujn dzuun loj nisdoo. Luxh naj tera'tbäzsi aguxhijñ guedxrore.

²⁰ Guniiza xse' ni yu' xhaguibaa, najni:

—La'tu ni yu' xhaguibaa, la'tu rexpejn Dios, reapost xtenni, rebejn ni gunii xtidx Dios galoo, colbalasduxh sa'csi abiajb guedxrore, abejn Dios yälguxhtis xcuent ni bejn lojtu.

²¹ Dxejcti te xangl Dios ni rajp yälrnibee, guläs te guiro ni najc si'c te guij ni ro't dojb, bacuaanini loj nisdoo, dxejc najni:

—Screeza gac guedxro ni laa Babilonia siajbni lo trabajwduxh, sinitlojni par tejpas, dirutu fii lojni. ²² Diru guibi' jiejn cayel nez xladcailu reharp, reflaut, retrompe't; diru guibi' chu tej ni gun xhitis dzuun; diruza guibi' chubej molin ni cayo't. ²³ Diru guibi' jien xcälrdimbicha' te bajl ni cagusanij; diruza guibi' jiejn xse' bi'n näj dxa'p loj te sa' sa'csi rexpejñlu ni ruto' gujcreni benroduxh lo guedxliuj sa'csi basguezalu reben guedxliuj xcuent rextzundxablu.

²⁴ Nen guejdxga bidxäjlza xtiejn renani gunii xtidx Dios, näjza xtiejn rexpejn Dios, näjza xtiejn guiraa reben guedxliuj ni bagu'treni.

19

¹ Che gulujx recosre, biejn diagä lascanu xse' xhidalro bejn ni canii xhaguibaa, cayäjpreni:

¡Colguiliä'p xpala'n Dios!

Xtentis Dios, xtenni najc yälrusläa lo dojl,

näj yälrdimbicha', näj yälmilagwr.

² Sa'csi xcälguxhtisni najc ganax laaca,

huentis najcni, sa'csi abejnni yälguxhtis gunadxabga nani caguxhiñ reben guedxliuj xcuent xcälñadxabni.

Abejn Dios yälguxhtisni,

agudijxhni xcuent xtiejn rexpejn Dios ni baxhe' gunadxabga, che bagu'tnireni.

³ Guibi' guniizareni:

—¡Colguiliä'p xpala'n Dios! Gujxh xten gunadxabga sanuutis cayä'p par tejpas.

⁴ Guiraa regalbitajp rebengool näjza guidap remanbajnga bazuxhijbreni, biabrlojreni gojnreni Dios ni rbej lo tron cadro rnibeeni, caniireni:

—Sugacni si'c. ¡Colguiliä'p Xpala'n Dios!

⁵ Dxejcti nez lo tron cadro rnibee Dios biejn xse' tej ni canii:

Colgudeed xquixtios lo Dios,
guira'tu ni rujn xtzuun Dios,
guira'tu ni rajntu Dios, rebenro sigajc rebennadolajz.

Sa' xten Xiil xten Dios

⁶ Dxejcti biejn diagä ascanu xse' xhidalduxh bejn, riejnni si'c che cayäjt nisro xhidajl gueu, näjza si'c che caguidxaduxh guzii, caniireni:

¡Colguiliä'p xpala'n Dios!

Sa'csi Gueb Dios, Dad xtenu ni rajp guiralii yälrnibee, ani acanibee.

⁷ Guibalajznu, guibalazduxhnu, guiliä'pnu xpala'nni sa'csi abidzujn dxejguchnaa Xiil xten Dios, aguzucheeza dxa'p.

⁸ Abadeedreni ladlin ni najc nuiduxh gacwni.

Ladnolni, luxh rdimbicha'ni sa'csi nayadujni.

Ladnayare säloj redzunsac ni bejn rexpejn Dios.

⁹ Najza anglga loä:

—Bacuaa diidxre: “Chicbaa renani bidon jääd lo xsa' Xiil xten Dios.”

Guniizani loä, najni:

—Rediidxre najc didx-guliipac xten Dios.

¹⁰ Dxejcti bazuxhibä lojni te ganäni, dxejc laani najni loä:

—Na'c gunlu si'c, sa'csi narä nacä sigajc najclu, nacä te ni rujn xtzuun Dios, näjza bejtzlu ni rusule' xtidx Jesucrist. Bazuxhijb lo Diostis sa'csi Dios rudeed gusule' bejn xcuent Jesucrist, gusule'zareni xtidx Dios.

Nani bijb te cabainol

¹¹ Dxejcti bahuiä bixal xhaguibaa, biricaj te cabainol. Luxh laj nani rbijbni säloj casobsa'cpacni diidx, rniizani ganax didxgului. Entis laaca rujnni yälguxhtis, entis laaca rucuaani che rujnni guer. ¹² Rebalojni rbebajl, yejcnii yu' xhidalduxh coron, luxh caj te laj lojni nani rutliidi racbee, luxh laatisni racbeeni xhi sälojni. ¹³ Najcwni te lajd ni nadiini rejn; lajni najcza Xtidx Dios.

¹⁴ Guiraa resoldaad guibaa xten Dios siädnaajlni najcwreni ladnol, ladnaya, bijbzareni cabainol. ¹⁵ Ro'ni carii te spaad ni caduxh guiro'p laad ro'ni te ni'c tilnäjni guiralii reguejdx lo guedxliuj, te guinibeeni guiraa reben guedxliuj ca'ni si'c te barguiib. Sujnzani yälguxhtis lojni reni rdxechlajz lo Dios, si'c ruläjreni yec uub che rbääreni bin, si'c sujnza Dios ni rajp guiralii yälrnibee.

¹⁶ Lo xhajbni näjza cuä' cujdni caj lajni: “Reii xten rereii, Dad xten redad.”

¹⁷ Bahuiä loj te angl suga'ni galäii gubijdx, cabedxa'ni caniini loj guiraa reman ni rutajt xhaguibaa, räjpni:

—Coltaa, colguire' ree, te gautu xcheroduxh xten Dios; ¹⁸ te gautu xpääl rereii, näjza xpääl recapitán, näjza xpääl rebenro, näjza xpääl recabaii, näjza xpääl renani rbijb recabaii, näjza xpääl guiraasi bejn, bejn ni rdo' si'c rdo' guidxaa sigajc rebejn ni di gun xtzuun bejn, rebenbáz sigajc rebenro.

¹⁹ Dxejcti bahuiä loj manro näjza loj rereii guedxliuj, abire'reni te gucuanäjreni nani rbijb cabainol näjza guiraa resoldaad xtenu. ²⁰ Biga' manroga näjza profetxhii ni bejn senro nez loj manroga te basgueeni guiraa renani cua' seen xten manroga, näjza renani bazuxhijb lo banäjb xten manroga. Guiro'p redee bacuaareni guideb nabajjreni nen te bal guiboduxh

ni recnäj sufr. ²¹ Dxejc guiraa reni bia'n bagu't spaad ni birii ro' ni bijb cabainol. Guiraa reman xhaguibaa gudajw xpäälreni.

20

Te mił ijz

¹ Dxejcti bahuiä loj te xangl Dios ni siädjiäjt xhaguibaa, siädnäni liäii ni ruxhal guedro ni laa gabijl. Ca'zani te cadenro. ² Anglre gunaaaz gutiatzroga, ni gujc bäl galooli, ni najcza bendxab, ni laaza Satanás. Bacuaduunini te mił ijz. ³ Basäl'nini neñ gabijl, te ro'c basäunini, bacuaani liäii te na'cru gusgueeni reben guedxliuj lał ni guiza' te mił ijz. Che guiza' reijzga, empac sibi' lasacni bale'si dxej.

⁴ Dxejc bahuiä retron cadro rbejreni rnibeereni, bahuiäza loj renani rbej lo retron, cua'reni yälrnibee te gunreni yälguxhtis. Dxejcti bahuiä xaim rebejn nani biru' yejcti sa'csi huililajzreni xtidx Jesucrist näjza sa'csi basule'reni xtidx Dios. Direni nuzuxhijb loj gutiatz niclaza lo banäjb ni najc si'c manroga, dizareni nica' seen lo cuajreni nicla lo naareni. Gubañsacreni loj reben gut, gurenäjreni Jesucrist te laani gunibenäjreni te mił ijz. ⁵ Dee najc yälrbansac galoo lo reben gut. Niluxh stecuaa reben gut, direni guibañsac che guisa'li te mił ijz. ⁶ Chicbaa rebejn nani guibañsac ganiddoo, najcreni bendxan ni agubicaj xtojreni. Ni rojp yälgujt di guidzujn lojreni. Laareni sajcreni xpixhojz Dios näjza Jesucrist, sibenäjreni Jesucrist, sinibenäjreni Jesucrist te mił ijz.

⁷ Che guiza' te mił ijzga, suslasacni Satanás neñ gabijl. ⁸ Che guiriini ro'c, gusgueeni guiraa reguejdx ni tre' lo guidap laad guedxliujre. Susgueeni reben Gog näjza reben Magog te gutie'nireni te gunreni guer. Xhidalduxh gacreni, pet si'cti yujxh ni tre' ro' nisdoo. ⁹ Huä'preni lo te camp cadro gulagduxh. Gudäyreni guideb gabig cadro rnibee rexpejn Dios neñ guejdx nani sanälajz Dios. Per baxhal Dios bal guiboo xhaguibaali bitejbni, te guejdc guiragajcreni. ¹⁰ Dxejc bacuaareni bendxab nani biädgusguee rebejn lo bal guiboo ni cayecnäj sufr, lagajc cadro yu' manro, näjza profetxhii nani basguee; lo bal guibooga susacsirenini sidejdreni trabawduxh dxej-yääl par tejpas.

Yälguxhtis ni gujc nez loj tronronol

¹¹ Dxejcti bahuiä lo te tronronol näjza lo nani sobga' lojni te rujnni yälguxhtis. Nez lojni gunitlojli guedxliuj näjza guibaa, xhetru lajtdi bidxäjł par laareni. ¹² Bahuiä lo reben gut, benro sigajc benñadolajz, tre'reni nez lo Dios. Bixal rexquijtz Dios, dxejcti bixalza stee xquijtz Dios ni najc guijtz xten xcälñabannäj Dios par tejpas. Dxejcti bejnni yälgutxhtis reben gut xcuent ni bejnreni, xcuentza rediidx nani caj loj reguijtzga. ¹³ Guiranejz biääd reben gut: nisdoo batzuug reben gut ni yu' lojni, gabijl näjza yälgujt batzuugza reben gut ni yu' lojreni. Dxejcti bejn Dios yälguxhtis tejegareni xcuent ni bejnreni. ¹⁴ Dxejcti bacuaani yälgujt näjza gabijl lo bal guiboo ni najc si'c te nisdoo te ro'c checreni par tejpas. Dee najc yälgujt ni rojp. ¹⁵ Guiraa bejn ni di lajni nidxäjł lo xlibr yälñabajn bacuaazani reni'c lo bajłga.

21

Xhaguibacoob näjza guedxliucoob

¹ Dxejcti bahuiä te xhaguibacoob näjza te guedxliucoob, sa'csi agunitloj guibabiejw, näjza guedxliubiejw, luxh xhettiruza nisdoo. ² Narä Juan, bahuiä lo guedx Jerusaléncoob, guedxdxan, siädjiäjtñi xhaguibaali cadro rnibee Dios.

Sucheduxhni si'c rsiuchee te dxa'p nani agojl guchnaa. ³ Dxejcti biejn diagä te xse' te ni canii dipduxh, ascanu lo tron cadro rnibee Diosli carii se'ga, scree caniini:

—Colhiii, aguzuj xquidoo Dios galäii rebejn, anabannäj Dios rebejn, sajczareni rexpejñni. Sibannäj lagajc Gueb Diosreni. ⁴ Sutia Dios guiraa nisbee balojreni te na'cru goonreni. Sinitloj yälgujt, xhetru xliajsdi chu, diru bejn goon, dirureni jiajn, sa'csi guiraa redee ni guyu' galoo agunitloj.

⁵ Dxejcti ni sobga' lo tron cadro rnibeeni guniini, najni loä:

—Bahuii, najrä guscobä guira'ti.

Guniizani loä:

—Bacuaa rediidxre, sa'csi guliipacreni, sajchhalilajz bejn rediidxre.

⁶ Dxejcti najzani loä:

—Agujcni. Narä nacä A näjza Z, ni säloj nani rbaxtiej näjza nani ruluux. Lo chutis ni cayojl, sudedxlia'ä nis yäni, nalajznu yälnabajn par tejpas. ⁷ Chutis nani gun gaan lo dojl, sica'zani guiraa dee si'c yälnasa'c, luxh narä sacä Xtiosni, laani sacni xi'nä. ⁸ Niluxh renani rdxejb, renani di chalilajz xtidxä, reni rdxe'ch loä, reni rugu't sa'reni, reni runnäj gunaa dojl, renani najc bidxaa, renani rusuxhijb lo banäjb, guiraa renani rusguee rniireni didxxhii, guiragajc reni'c sij lo nisdoo ni najc ganax bal guiboo, cadro rejch guiboo näjza sufr par tejpas. Dee ni najc yälgujt ni rojpp.

Guejdx Jerusaléncoob

⁹ Dxejcti lo guigajdz xangl Dios ni ca' guigajdz xhijg ni guidxa guigajdz reyälguxhtis xten Dios, birii tejni, najni loä:

—Gudaa, te guluiä lojlu dxa'p nani guchnaa Xiil xten Dios.

¹⁰ Dxejcti bejnni gunixcalä, huinäni narä lo te danro ni jiaduxh, ro'c baluiini loä te guedxro, te guedxdxan ni laa Jerusalén, luxh xhaguibaali siädjiäjtni nez lo Dios. ¹¹ Guejdxga rdimbicha' guideb xcälrdimbicha' Dios. Luxh yälrdimbicha'ga najc si'c najc te guisacduxh ni laa jaspe, rdimbicha'zani si'c biidr. ¹² Guideb gabi guejdxga dejd te paderro cadro caj tzubitio'p xportonroni. Te angl xten Dios suga' ro' tejga portonga. Loj tejga portonga, caj laj tej retzubitio'p cuaa xten rexpejn Israel. ¹³ Chon portonga caj nez cadro rliejn gubijdx, yu'za chon portonga nez ladbee, yu'za chon portonga nez ladbäw, yu'za chon portonga cadro räaz gubijdx. ¹⁴ Yu' tzubitio'p guiro lo cimient xten guejdxga. Lo tejga reguijga caj laj tej retzubitio'p apost xten Xiil xten Dios.

¹⁵ Angl ni caninäj narä ca' si'c te biquii ni najc ganaxduj oor te gurejxhni guejdxga, näj reportonga, näjza padeerga. ¹⁶ Guejdxga najc cuadraad: sigajc ni sioolni, sigajcza ni gulajgni. Dxejcti cua'ni biquii barejxni guejdxga, barejxni tio'p mil' tio'p gayuu kilómetros tejga laad. Sigajc sioolni, sigajcza gulajgni, sigajcza jiaani. ¹⁷ Dxejcti barejxni padeerga, yu'ni gayonbitajp metr segun mediid xten bejn, sa'csi ni'c najc ni cagutiexhnäjza anglga.

¹⁸ Padeerga naccheeni guij ni laa jaspe. Guejdxga najc ganaxduj orsa'c, rdimbicha'ni si'c guihuajn. ¹⁹ Recimient xten padeerga nacchee guisa'c. Guiganid najc guijaspe; ni rojppga najc zafiro; ni riojnga najc ágata; ni rdajppga najc esmeralda; ²⁰ ni rgaiiga najc onix; ni rxho'pga najc cornalina; ni rgajdzga najc crisólito; ni rxhujnga najc berilo; ni rgaaga najc topacio; ni rtzuuga najc crisopraso; ni rtzubiteebga najc jacinto; ni rdzubitio'pga najc amatista. ²¹ Guitzubitio'p portonga najc tzubitio'p perl. Tejga portonga guchee tej perl. Nezyuro ni rdeed galäii guejdxga najc ganaxduj oor, rieni si'c te guihuajn.

²² Dina nuhuiä nicla tej guidoo nen guejdxga, sa'csi suga' Gueb Dios ni rajp guiralii yälrnibeduxh, näjza Xiil xten Dios. Laani najc xquidoo guejdxga. ²³ Guejdxga dini guiquiin gusaniy nicla gubijdx niclaza bäii, sa'csi lagajc xcälrdimbicha' Dios näjza Xiil xten Dios ruzaniy ro'c. ²⁴ Rebejn guedxliuj ni rililajz xtidx Dios sajc sareni lo bianijga, luxh rereii ni siäd lo guedxliujre siädnäzareni xcälrnibeereni, näj xpala'nreni ro'c. ²⁵ Di ro' reportanga jäüu rdxej, luxh ro'c xhettiza yääl. ²⁶ Ro'c chanäzareni yäl'nasa'c näj xpala'n reguejdxro ni yu' lo guedxliuj. ²⁷ Niluxh di gacdipac jiu' nicla tej cosguijdx ro'c, niclaza te bejn ni rujn cosguijdx näj yäl'rusguee. Ro'c siu' ganaxduj renani caj lajni lo libr xten yäl'nabajn par tejpas nani ca' Xiil xten Dios.

22

¹ Dxejc baluui anglga te gueuro loä, cadre yu' nisya xten yäl'nabajn. Rdimbicha'ni si'c te guihuaajn, luxh cariini lo tron cadre rnibee Dios näjza Xiil xten Dios, ² rdejndi loj nezyujro ni rdejndi galäii guejdxga. Guiro'p laad gueuga sojb reyajg xten yäl'nabajn, lojreni rcaj tzubitio'p cuaa ninejxh nen tebijz, tejga cuaani tejga bäii; luxh rebalajg ni rcaj lo reyajgga najc te gusiajcn reben guedxliuj. ³ Dxejcti ro'c xhettiru yälrdzubde, sa'csi ro'c yu' tron cadre rnibee Dios näjza Xiil xten Dios, ruzuxhijbza rexpejnni, rajnreni laareni. ⁴ Suhuiireni lojpacni si'cpac ni najcni, sicajza laj Dios lo cuajreni. ⁵ Ro'c diru yääl chu. Luxh reni rbäyz ro'c di guiquiin nicla bajl, niclaza xhanij xten gubijdx, sa'csi Gueb Dios susaniy lojreni. Luxh sinibenäjrenini par tejpas.

Siäddzungajxh dxej ni guibisac Jesucrist

⁶ Dxejc naj anglga loä:

—Guliipac najc rediidxga, sajcpcac chalilajzlureni. Dad Dios lagajc nani basniib lastoo rebejn ni gunii xtiidxni agujc xchero, lagajc laani baxhalni xanglni te baluilojni loj rexpejnni guira'ti nani agojl gac.

⁷ —Sajngalu gan, siojb jäälä. ¡Chicbaa nani riu rediidx ni caj lo librré!

⁸ Luxh narä, Juan, biejn diagä rediidxre, bahuiäza recosre. Luxh che bahuiä, che biejn diagä bazuxhibä te ganä xangl Dios nani baluui loä guiraa redee. ⁹ Luxh laani najni loä:

—Na'c gunlu si'c, sa'csi narä runä xtzuunni sigajc rujnluni, sigajc rujn rebejn ni gunii xtidx Dios agujc xchero, sigajc rujn rebejn ni rusoob rediidx ni caj lo librré. Bazuxhijb loj Diostis.

¹⁰ Dxejc najni loä:

—Na'c gusäuulu guijtzc cadre caj rediidxre xcuent nani churu gac, sa'csi asiäddzungajxh redxej ni chale'reni. ¹¹ Luxh laj ni guidzujn dxejga, basaan suchanuu gun dojl renani cayungajc dojl; basaan suchanuu gun dzunguijdx renani cayungajc dzunguijdx. Per renani cayujn dzunsa'c, chanuu gunreni dzunsa'c, nani najcza beñnaya, si'cza chanuu gacni beñnaya.

¹² Gunajtiro:

—Siojb jäälä, luxh siädnää xhi gunidxä loj tejpgatu si'c ni riäjlc xca'tu xcuent dzuun ni bejntu. ¹³ Narä Jesucrist nacä si'c najcza A näjza Z, ni säloj nani rbäxtiej näjza nani ruluux.

¹⁴ 'Chicbaa renani riu xtidx Dios, najcreni si'c ni rguib xhajbreni te sajc jiu'reni nez porton xten guejdxga, sajcza gauni ninejxh ni caj lo yajg xten yäl'nabajn par tejpas. ¹⁵ Per dejtzc guejdxga chajia'n reni najc si'c bä'cw, nalajznu rebidxaa, renani rusguee chälbejn, renani rugu't sa'reni, renani ruzuxhijb lo rebanäjb, näjza ni rchaglajz rnii didx-xhii te gusgueeni.

¹⁶ 'Narä Jesucrist, abaxhalä xanglä lojlu te gusule'ni lojtu diidx xcuent guiraa redee, te gusule'zalu rextidxä nen reguidoo loj rexpenä. Narä nacä

te xajg toreii David, nacäza si'c balxhaguibaa nani rdimbidxa' cäjysi che gajd jianij lo guedxliuj.

¹⁷ Sprit Dxan xten Dios näjza chääl Xiil canii, najreni:

—Coltaa.

Suguiniiza nani riejn diajgreni diidxre, gäbreni:

—Coltaa.

Sujiäädza chutis ni cayojl, sujiädyäxlia'ni nis yäl nabajñ par tejpas.

¹⁸ Sa'csi narä rniliä'ppac lojtu, guiraatu ni riejn diajgtu rediidx ni caj lo guiitzre xcuent recos ni churu gac, palga yu' chu tejtü gutajlru diidx ni caj lo guiitzre, suteedru Dios bejnga replaag yejcnij loj ni caj lo guiitzre. ¹⁹ Palga yu' chu gudzucaj loj rediidx ni caj lo guiitzre, sudzucajza Dios nani nica'ni lo yajg xten yäl nabajñ par tejpas, näjza lo guedx Dxan, ni caj xcuentreni lo guiitzre.

²⁰ Nani cagusule' diidx xcuent guiraa redee guniini, najni:

—Guliipacni siojb jialä.

Sugacni si'c. Gudaa Dad Jesucrist.

²¹ Sujiääd xcäl racnäj Dad Jesucrist lo guiraatu. Sugacni si'c.